


Tuhun tsaá tsa nacoog jutu mañi yo Jesucristo

tsi yo



New Testament in Mixtec, San Juan Colorado (MX:mjc:Mixtec,
San Juan Colorado)

Tuhun tsa a naco jutu mañi yo Jesucristo tsi yo

New Testament in Mixtec, San Juan Colorado (MX:mjc:Mixtec, San Juan Colorado)

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

c270ec54-172a-541f-83e6-7760f619c744

Contents

San Mateo	1
Marcos	86
Lucas	141
Juan	231
Los Hechos	297
Romanos	382
I Corintios	417
II Corintios	449
Gálatas	472
Efesios	485
Filipenses	497
Colosenses	506
I Tesalonicenses	514
II Tesalonicenses	521
I Timoteo	525
II Timoteo	535
Tito	542
Filemón	546
Hebreos	548
Santiago	574
I San Pedro	583
II San Pedro	593
I San Juan	599
II San Juan	608
III San Juan	610
San Judas	612
El Apocalipsis	615

Tuhun Nyoo Tsa Tyaa Ra Mateo

Nyivi ra Jesucristo tsa tsi-coo tsa ndi cumañi ca cacu ra (Lc. 3.23-38)

¹ Ihya nyecú tandihi sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuvī tsi ra.

² Sehe ra Abraham cuvī tsi ra Isaac, tan sehe ra Isaac cuvī tsi ra Jacob. Tan sehe ra Jacob cuvī tsi ra Judá tsihin tandihi ra yañi ra.

³ Tan ra Fares tsihin ra Zara sehe ra Judá tsihin ña Tamar cuvī tsi ra naha. Tan sehe ra Fares cuvī tsi ra Esrom, ra cuvī jutu ra Aram.

⁴ Tan sehe ra Aram cuvī tsi ra Aminadab, jutu ra Naasón. Tan sehe ra Naasón cuvī tsi ra Salmón.

⁵ Tan ra Booz, sehe ra Salmón tsihin ña Rahab cuvī tsi ra. Tan sehe ra Booz tsihin ña Rut cuvī tsi ra Obed, jutu ra Isaí.

⁶ Tan ra David, ra cuvī rey, sehe ra Isaí cuvī tsi ra. Tan sehe ra rey David tsihin ñaha tsa cuvī ñasihhi ra Urías cuvī tsi ra Salomón.

⁷ Tan sehe ra Salomón cuvī tsi ra Roboam, ra cuvī jutu ra Abías. Tan sehe ra Abías cuvī tsi ra Aza.

⁸ Tan sehe ra Aza cuvī tsi ra Josafat, ra cuvī jutu ra Joram. Tan sehe ra Joram cuvī tsi ra Uzías.

⁹ Tan sehe ra Uzías cuvī tsi ra Jotam, ra cuvī jutu ra Acaz.

Tan sehe ra Acaz cuvī tsi ra Ezequías.

¹⁰ Tan sehe ra Ezequías cuvī tsi ra Manasés, ra cuvī jutu ra Amón. Tan sehe ra Amón cuvī tsi ra Josías.

¹¹ Tan sehe ra Josías cuvī tsi ra Jeconías tsihin tandihi ra yañi ra. Tsicoo ra naha quivi tiñ ra ñuu Babilonia naha ra tsi nyivi Israel, tsa cua cuhun ñi cuvī ñi musu ra ñuu Babilonia can naha ra.

¹² Tsa yaha can, tan tsicoo sehe ra Jeconías, tan ra ican cuvī ra Salatiel, jutu ra Zorobabel.

¹³ Tan sehe ra Zorobabel cuvī tsi ra Abiud, ra cuvī jutu ra Eliaquim. Tan sehe ra Eliaquim cuvī tsi ra Azor.

¹⁴ Tan sehe ra Azor cuvī tsi ra Sadoc, ra cuvī jutu ra Aquim. Tan sehe ra Aquim cuvī tsi ra Eliud.

¹⁵ Tan sehe ra Eliud cuvī tsi ra Eleazar, ra cuvī jutu ra Matán. Tan sehe ra Matán cuvī tsi ra Jacob.

¹⁶ Tan ra Jacob cuvī jutu ra José, yii ña María. Juvín ña cuvī sihi ra Jesús ra cuvī Cristo, o cuñí tsi catyí, ra tsa jaquitsi Nyoo tyin quihí ndaha tsi yo.

¹⁷ Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tiñ ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata ñi nda cuanda quivi cacu ra Cristo.

Nu cacu ra Jesucristo (Lc. 2.1-7)

18 Tyehen cuvi tan cacu ra Jesucristo: tsa yaha cundaa tyiñu tsa cua tindaha ña María tsihin ra José. Tan tsa ndi cumañi ca naquihin ra tsi ña, ñihi sehe ña tsa cuenda Tatyí Ii Nyoo.

19 Tan ra José, ra cua cuvi yii ña, vaha xaan iñi ra. Ña cuñi ra cuhva ra ticanuu tsi ña. Yacan cuenda tsicá iñi ra tsa nacoo xeehe ra tsi ña tan ña cua tindaha ca ra tsihin ña.

20 Tan tsitsi tsa tsicá iñi ra yacan, quituvi iin ángel Jutu Mañi yo nuu ra nu quixi ra. Tan nyehé ra ñumaahna, tan catyí ángel can tsihin ra:

—José, tata ra David, ña çaca iñi un quihin un tsi ña María cuvi ña ñasihi un, tyin sehe ña tsa cua cacu, sehe Tatyí Ii Nyoo cuví tsi.

21 Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tsihin ra José.

22 Tacan cuvi tyin tacan tan cundaa tsa cahan ra cuvi ndusu yuhu Jutu Mañi yo tahan tsanaha.

23 Tan catyí ra tyehen:

Ñaha yoco tsa ñaha ca coo yii, cua cuhun sehe ña.

Tan cua coo iin sehe ña.
Tan cua cunañi ra:
Emanuel.

Tan sivi can cuñi tsi catyí:
“Nyoo iyó ra tsihin yo.”

24 Tan tsa ndoto ra José, javaha ra tumaa catyí ángel can tsihin ra. Quihin ra tsi ña María tyin cuvi ña ñasihi ra.

25 Maa tyin ña quixi ra tsihin ña nda cuanda tsa yaha cacu sehe ña. Tan jacunañi ra tsi lee can: Jesús.

2

Nu cuahán ra tsitó xaan, ra cuví rey, cua nyehé ra naha nu cacu ra Jesús

1 Cacu ra Jesús ñuu Belén tsa canyii nu cuví Judea. Tan quivi can ra cuví rey Judea nañi ra Herodes. Tacan tan tsaa juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuví ra naha.

2 Tsicá tuhun ra naha tsi nyivi tan catyí ra naha:

—¿Nu maa nyii ra cuví rey cuenda nyivi Israel? Tyin ityi nu caná ñicanyii nyehé ndi tiñuu tsa tsahá cuenda tyin cacu ra ityi ihya. Tan vatsí ndi vatsí jacahnu ndi tsi ra —catyí ra naha.

3 Quivi tsa tsito ra rey Herodes tsa cahan ra can naha ra, tuñu xaan cuñi ra cuvi. Tacan tucu tandihi nyivi ñuu Jerusalén can.

4 Tacan tan cana ra Herodes tsi tandihi ra jutu tsa cuví ityi nuu tsihin ra cuví jutu tan tsihin tandihi ra cuví maestro cuenda ley vehe ñuhu naha ra. Tan tsicá tuhun ra tsi ra naha numaa nda taahán tsi cacu ra Cristo.

5 Tan nacahan ra can naha ra tan catyí ra naha:

—Ñuu Belén tsa canyii Judea, ndacan taahán tsi cacu ra tyin tyehen tyaa ra cuvi ndusu yuhu Nyoo nu tutu tahan tsanaha:

6 Tan yooho Belén ñavin iin ñuu luhlu ñi cuví un tsa nuu tandíhi maa ñuu tsa cayucú Judá

tyin nuu yooho cua quita ra cua quíhi ndaha tsi nyívi ñuu yu Israel. Maa ra cua jaha cuenda ra tsi ñi.

Tacan catyí nu tutu Nyoo, —catyí ra can naha ra tsihin ra Herodes.

7 Tacan tan cana xeehe ra Herodes tsi ra tšitó xaan can naha ra, tan tsica tuhun ra tsi ra naha náa quívi tan náa hora quituví tiñuu can.

8 Tacan tan jacuhun ra tsi ra naha nda ñuu Belén, tan catyí ra tsihin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatun nañihi ndo tsi ra, quítsi catyi tuhun ndo tsihin yu, tyin cuhun ndíhi yu cujacahnu yu tsi ra —catyí ra Herodes tsihin ra naha.

9 Tsa tsiñi ra tsa tsitó xaan can naha ra tsa cahan ra Herodes, tan quihin ra naha ityi cuahán ra naha. Tan tiñuu tsa nyehe ra naha ityi nu caná ñicanyii can, cuahán tsi ityi nuu ra naha. Tan tsicuiñi tsi maa maa siqui nu canyii ra lee can.

10 Tan tsa nyehe ra tsitó xaan can naha ra tyin tsicuiñi tiñuu can, si xaan cuñi ra naha.

11 Tan quihvi ra naha tsitsi vehe nu canyii lee can. Tan nyehe ra naha tsi ra tsihin ña María, sihi ra. Tan tsicuiñi tsiti ra naha tyin jacahnu ra naha tsi lee can. Tacan tan nuña ra naha yuhu caja tsa ndahá ra naha. Tan tava ra naha

regalo tsa cuví xuhun cuaan, tan cutu vixi, tan ndutya tami tsa nañi mirra. Tan tsaḥa ra naha tsi lee can.

12 Tsa yaha tsa nyehe ra naha tsi ra Jesús tan cuanuhu ra naha. Tan tsa cuanuhu ra naha nyehe ra naha ñumaahna tan catyí tsi tyin ña taahán tsi cuhun ra naha cucatyi tuhun ra naha tsihin ra Herodes. Yacan cuenda siin ityi cuanuhu ra naha.

Nu tsinu xeehe ra José tan ña María tsihin lee sehe ñi nda Egipto

13 Tsa yaha cuahán ra tsa tsitó xaan can naha ra, tacan tan iin ángel Jutu Mañi yo quituví nuu ra José tsitsi ñumaahna. Tan catyí ángel can tsihin ra:

—Nduvita, quihin tsi lee ihya, tsihin sihi ra, tan cuhun ndo nda ñuhu Egipto. Ndo ndo ndacan nda cuanda cahán nyico yu tsihin un. Tyin ra Herodes cua nanducu ra tsi ra lee ihya tyin cuñi ra cahñi ra tsi ra —catyí ángel can tsihin ra José.

14 Tacan tan nduvita ra José tsacuaa can. Tan quihin ra tsi lee can tsihin sihi tsi. Tan cuahán ñi nda Egipto.

15 Ndacan tsicoo ñi nda cuanda tsa tsihi ra Herodes. Tacan cuví tyin cunda tsa cahan ra cuví ndusu yuhu Jutu Mañi yo tahañ tsanaha jaha Nyoo. Tyehen catyi ra: “Nda Egipto cana yu tsi Sehe yu”, catyi ra.

Nu tava tyiñu ra Herodes na cahñi ra naha tsi ra nyihi

16 [Tsa ndi cumañi ca cúu ra Herodes tan ndi ndatú

ra tsa quitsi nyico ra tsitó xaan can naha ra] tan tsa tuvī iñi ra Herodes tyin ra tsitó xaan can naha ra jan-davī ñaha ra naha tsi ra, tan nduxaan xaan ra. Tan tava tyiñu ra na cahñi andaru tsi tandihi ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacu nda cuando ra nyihi tsa uvi cuiya. Tacan javaha ra tyin tsicá iñi ra tyin tacan cuiya ra Jesús tumaa catyī ra tsitó xaan can naha ra tsihin ra.

¹⁷ Tacan cuvī tyin cundaa tsa cahan Nyoo tan tyaa ra Jeremías, ra cuvī ndusu yuhu ra tahan tsanaha. Tyaa ra tyehen:

¹⁸ Tsiñi yo iin ndusu ñuu Ramá,

tsacú tsaa nyivi, tan iyo taahan ñi.

Juvin ñi nyivi cuvī tata ña Raquel, nyivi Israel, tsacú tsaa ñi tsa cuenda sehe ñi.

Maa tyin ña cuñi ñi tsa naquihin ndaahvi nyivi tsi ñi tyin tsa yaha tsihi sehe ñi, catyī tsi nu tutu Nyoo.

¹⁹ Maa tyin tsa yaha tsa tsihi ra Herodes, tacan tan quituvī nyico iin ángel Jutu Mañi yo nuu ra José nu quixi ra nda Egipto. Tan catyī ra tsihin ra:

²⁰ —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducu cahñi tsi ra lee ihya.

²¹ Tacan tan nduvita ra José, tan quihin ra tsi lee

can tan tsihin sihi ra. Tan cuanuhu ñi nda Israel.

²² Maa tyin quivi tsito ra José tyin ra Arquelao, sehe ra Herodes, cuvī ra rey nda Judea, nayuhvi ra tan ña cuñi ra cuhun ra ndacan. Tan cuanuhu ñi nda Galilea tyin tacan jacoto Nyoo tsi ra tsitsi ñumaahna.

²³ Tsa tsaa ñi ican, tan cuahan ñi nda ñuu Nazaret, cua coo ñi. Tan ican tsicoo ñi. Tacan cuvī tyin cundaa tsa cahan ra cuvī ndusu yuhu Nyoo tahan tsanaha. Tyin catyī ra naha tyin ra Jesús ra ñuu Nazaret cua cuvī ra.

3

Nu cahan ra Juan tuhun Nyoo tsihin nyivi

(Mt. 1.1-8; Lc. 3.1-9, 15-17; Jn. 1.19-28)

¹ Quivi tsa ndi iyó ñi ñuu Nazaret, ra Juan, ra jacoondutyá tsi nyivi, cuahan ra nu tsiqui tsa iyó Judea. Tan quitsaha caahan ra tuhun Nyoo tsihin nyivi tsa tsaa nu nyii ra.

² Tan catyī ra:

—Ndu uvi iñi ndo cuatyī ndo tyin tsa cuñi tsaa quivi cundaca ñaha Nyoo tsi yo.

³ Juvin ra Juan cuvī ra tsa cahan ra Isaías ra cuvī ndusu yuhu Nyoo tahan tsanaha. Tan tyaa ra tsa saha Nyoo tsi ra tyehen:

Cua tyaa soho yo ndusu ra nu caná tsaa ra nu tsiqui tan catyī ra:

“Nuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi

yo,” catyí tuhun tsa tyaá ra Isaías.

4 Tan ra Juan nditsí ra jahma tsinū tsihin ixi camellu. Tan cinturón ra, ñii cuví tsi. Tan tica xama tsatsí ra tan tsihí ra ndutya ñuñu.

5 Quitsj nyivi ñuu Jerusalén tan tandihi ñuu tsa cayucú Judea, tan nyivi tsa iyó yatyin ñi ityi yutya cahnu Jordán can; quitsj tyaá soho ñi tuhun caahán ra.

6 Tan tsa yaha nahma ñi cuatyí ñi, ra Juan jacoondutya ra tsi ñi yutya cahnu Jordán ican.

7 Maa tyin nyehe ra Juan tyin cuaha xaan ra fariseo, ra tsa tyaá yahvi xaan ley vehe ñuhu, tan cuaha xaan ra saduceo, quitsj ra naha tyin coondutya ra naha. Tan catyí ra tsihin ra naha:

—iNyooho, tumaa tata coo xaan cuví ndo! ¿A cuñí maa ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

8 Nasama ndo cuhva iyó ndo, na nyehe yo tyin tsa ndu uvj iñi ndo cuatyí ndo nuu Nyoo.

9 Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tsihin yuu ihya, Nyoo cuví jananduvi ra nyivi ra Abraham.

10 Tsa ndatú yatsa Nyoo tsi tandihi ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua javaha Nyoo tsihin ndo —catyí ra Juan—.

11 Tsa nditsa tyin yuhu jacoondutya yu tsi nyivi tsihin ndutya, tan cuví tsi iin seña tyin tsa ndu uvj iñi ñi cuatyí ñi. Maa tyin tsa yaha jacoondutya yu tsi ñi tsihin ndutya, vatsí inga ra cua jacoondutya tsi ñi tsihin Tatyí Ii Nyoo tan tsihin ñuhū ihñi. Iyó ca tunyee iñi Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra.

12 Tan ra ican ndahá ra pala tyin cua jandava ra trigu. Cua tava siin ra trigu vaha, tan cua natyihi vaha ra itsi. Tan cua cahmi ra tsahan tsa quita tsihin trigu can tsihin ñuhū tsa ña cua ndahva maa —catyí ra Juan.

*Nu tsicoondutya ra Jesús
(Mr. 1.9-11; Lc. 3.21-22)*

13 Tacan tan quitā ra Jesús Galilea tan tsaá ra yutya cahnu Jordán nu nyii ra Juan, tyin cuñí ra tsa jacoondutya ra Juan tsi ra.

14 Tsa jihna ñi ña cuñí ra Juan jacoondutya ra tsi ra, tan quitsaha catyí ra tsihin ra:

—Cuñí un tsa jacoondutya yu tsi un, maa tyin ña taahán tsi tsa jacoondutya yu tsi un. Maa un taahán tsi jacoondutya tsi yu —catyí ra.

15 Maa tyin ra Jesús catyí ra tsihin ra:

—Tsa vityin, na cuvi tsi cuhva catyí yu tsihin un. Tyin cuñí tsi tsa javaha yo tandihi tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

¹⁶ Tsa yaha tsicoondutya ra Jesús tan quitā ra tsitsi ndutya. Tan nuña andivi, tan ra Jesús nyehe ra vatsi nuú Tatyí li Nyoo, tumaa iin paloma. Tan tsaā tsi siqui ra.

¹⁷ Tacan tan cahan iin ndusu ityi andivi, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan sii xaan cuñí yu tsihin ra —catyí ndusu can.

4

Nu nducu cuhva nu ña vaha tsi ra Jesús

(Mr. 1.12-13; Lc. 4.1-13)

¹ Tacan tan tsindaca Tatyí li Nyoo tsi ra Jesús iin nu tsiqui, tyin cua nducu cuhva nu ña vaha tsi ra.

² Tsicoo nyitya ra uvi xico nduvi tan uvi xico tsacuaa. Tsa yaha can tan quitsi socó tsi ra.

³ Tacan tan natuhva nu ña vaha nu nyaá ra, tyin cuñí nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahan tsihin yuu ihya, na nanduvi tsi paan —catyí nu ña vaha tsihin ra Jesús.

⁴ Maa tyin ra Jesús nacahan ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihí tuhun caahan Nyoo” —catyí ra Jesús tsihin nu ña vaha.

⁵ Tacan tan quihin nu ña vaha tsi ra. Tan cuahán ra

tsihin nu nda ñuu ii Jerusalén. Tan jandaa nu tsi ra jiñi vehe ñuhu cahnu.

⁶ Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuando nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un. Cua janahndi ra naha tsi un, tan ña cua nañi tsaha un nuu yuu.

⁷ Tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

⁸ Tacan tan quihin nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janaha nu tandihí tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi.

⁹ Tan catyí nu tsihin ra:

—Yuhu cuhva yu tandihí maa tsa janaha yu tsi un, tatun yooho tan cuiñi tsiti un nuu yu tan jacahnu un tsi yu.

¹⁰ Tacan tan nacahan ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

¹¹ Tacan tan cuahán nu ña vaha, tan ndoo ra Jesús. Tan tsaā ángel tan jatyinyee ra naha tsi ra.

Nu quitsahā caahán ra Jesús tuhun Nyoo tsihin nyivi tsa iyó ñuu tsa cayucú Galilea (Mr. 1.14-15; Lc. 4.14-15)

¹² Quivi tsa tsito ra Jesús tyin ra Juan nyii ra vehe caa, cuahán ra nda Galilea.

¹³ Maa tyin ña ndoo ra ñuu Nazaret, nu tsahnū ra. Cuahán ra cua coo ra nda ñuu Capernaum, iin ñuu tsa canyi yatyin ñi yuhu miñi, nu ñuhu ra Neftalí yatyin ñuhu ra Zabulón.

¹⁴ Tacan tan cundaā tsa cahan ra Isaías, ra cuvi ndusu yuhu Nyoo, tahañ tsanaha. Tan catyí ra:

¹⁵ Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán,

tsa cuví Galilea nu iyó nyivi tsa ñavin nyivi Israel cuví.

¹⁶ Nyivi iyó nu naa, ñi iyó nu iyó tixahñu tuhun tsihi, nyehé ñi iin ñuhu nditsin tsa jandunditsin nu yucú ñi, catyí ra Isaías.

¹⁷ Nda cuanda quiivi can, tan quitsahā caahán ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuñí tsa quiivi cundaca ñaha Nyoo tsi ndo —catyí ra Jesús tsihin nyivi.

Nu canā ra Jesús tsi cumi taahan ra tsa tñn tyaca (Mr. 1.16-20; Lc. 5.1-11)

¹⁸ Ra Jesús tsicá ra yuhu miñi tsa nañi Nduya Ñuhu Galilea. Tan nyehē ra tsi uvi

taahan ra tsihin yañi ra, ra Simón tsa nañi tucu Pedro, tan ra Andrés. Ra tñn tyaca cuví ra naha. Tan cañi ra naha traya ra naha nu ndutya.

¹⁹ Tacan tan catyí ra Jesús tsihin nduvi taahan ra naha:

—Ñaha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tñn ndo tyaca, tacan cua ñihi ndo nyivi cua cuvi nyivi Nyoo —catyí ra Jesús tsihin ra naha.

²⁰ Juvín ñi cuhva can nacoō ra naha traya can, tan cuahán ra naha tsihin ra Jesús.

²¹ Luxu ñi tsicā ra naha ityi nuu, tan nyehē ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan canā ra Jesús tsi ra naha.

²² Juvín ñi cuhva can tan nacoō ra naha tsi jutu ra naha tan yutun ndoo can, tan cuahán ra naha tsihin ra.

Nu cuaha xaan nyivi jacuahā ra Jesús (Lc. 6.17-19)

²³ Cuahán ra Jesús tsicá ra tandihí ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha náca ndaca ñaha Nyoo tsi yo. Tan janduvahā ra tsi nyivi cuuhví tsihin tandihí ñi nuu cuehe tsa yihí tsi ñi.

²⁴ Tacan tan tsito tandihí nyivi ñuu cuenda Siria tuhun ra Jesús. Tan tsindacā ñi

tandihí nyívi cuuhví tsi ra: juhva ñi yihí tatyí ña vaha. Tan yihí ñi tsiihí naaha ñi. Tan yihí ñi ndohó ñi cuehe xii. Tan janduvahá ra Jesús tsi tandihí ñi.

²⁵ Cuaha xaan nyívi nyicún tsi ra Jesús: nyívi iyó ñuu tsa cayucú Galilea, nyívi tsa quee nu utsi taahan ñuu tsa nañí Decápolis, nyívi iyó ñuu Jerusalén tan tandihí ca ñuu tsa cayucú Judea, tan nyívi iyó inga tsiyo yutya cahnu Jordán.

5

Nu cahan ra Jesús tsihin nyívi nu tsiqui
(Lc. 6.20-23)

¹ Nyehe ra Jesús tyin cuaha xaan nyívi, tan ndaa ra iin nuu yucu. Tan tsicunyaá ra ican. Tacan tan nyívi tsicá tsihin ra, tsinunduví ñi tsi ra.

² Tacan tan quitsaha jacuahá ra tsi ñi tan catyí ra:

³ Nasocó Nyoo tsi tandihí nyívi tsa tsitó tyin tsiñí ñuhu ra tsi ñi, tan tsa cuenda ñi cuví nu ndacá ñaha ra.

⁴ "Tan tandihí nyívi tsa cuihya cuñí tsa cuenda cuatyí ñi, nasocó Nyoo tsi ñi tan ña cua coo ca ñi tucuihya iñi.

⁵ "Tan tandihí nyívi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayívi tsa catyí Nyoo tyin cuhva ra tsi ñi.

⁶ "Tan tandihí nyívi tsa cuñí xaan javaha cuhva catyí Nyoo, nasocó Nyoo tsi ñi, tan cua jatinyee ra tsi ñi tan cua

cuví javaha ñi cuhva cuñí maa ra.

⁷ "Tan tandihí nyívi tsa cundaahví iñi tsi inga nyívi, nasocó Nyoo tsi ñi, tan cua cundaahví iñi ra tsi ñi.

⁸ "Tan tandihí nyívi tsa janduvahá Nyoo aña, nasocó ra tsi ñi, tan cua nyehe ñi tsi ra.

⁹ "Tan nyívi tsa nducú cuhva tsa coo vaha nyívi tsihin Nyoo tan tsihin inga nyívi, nasocó ra tsi ñi tan cua catyí ra tyin sehe ra cuví tsi ñi.

¹⁰ "Tan tandihí nyívi tsa javahá cuhva cuñí Nyoo tan ndasi cuñí nyívi nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra.

¹¹ "Nasocó Nyoo tsi nyooho tsa caahán nyívi ndavaha ñi tsata, tan javahá ñi tsa uhví tsi ndo, tan caahán ñi cuendu tsa ña nditsa siqui ndo tsa cuenda tsa tsinú iñi ndo tsi yu.

¹² Cusi iñi ndo tun tacan javahá nyívi tsihin ndo; sii cuñí ndo, tyin cahnu xaan tan sii xaan caá tsa cua ñihi ndo nda gloria. Tyin juvin ñi tacan javahá nyívi tsa ña vaha tsihin tandihí ra cuví ndusu yuhu Nyoo tahañ tsanaha.

Tatun jandihí yo tsa tsinú iñi yo tsi Nyoo cuví yo tumaa ñi tsa ndihí tsa uhva
(Mr. 9.50; Lc. 14.34-35)

¹³ "Nyooho tsa tsinú iñi tsi yu, tumaa ñi vaha cuví ndo. Maa tyin tatun ñi, tan ndihí tsa uhva tsi, ña cua jandu uhva ca tsi tsa catsi yo. Ña vaha ca ñi can. Tacan tan

javita yo can, tan cuañi nyivi tsata can.

Tatun tyaá yahvi vaha yo tuhun caahán Nyoo, cuví yo tumaa ñuhu tsa jandunditsín nu tsicá nyivi nu naa

14 Nyooho cuví ndo tumaa ñuhu tsa jandunditsín nu tsicá nyivi. Iin ñuu tsa canyí jñi iin yucu, ña cua cuvi quihí xeehe tsi.

15 Ña tuhvá yo tyaá ñuhu tyuma, tan tyihí xeehe yo itsi tsitsi iin caja. Tyin tuhvá yo tyaá ñuhu tan tinyí yo itsi iin nu sucun tyin tacan tan jandunditsín tsi nu yucú yo tsitsi vehe yo.

16 Tan tacan taahán tsi jandunditsín tucu nyooho tsihin ñuhu Nyoo tsa iyó aña ndo nu tsicá nyivi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

Nu jacuaha ra Jesús tyin ñiñi xaan javaha yo tandihí tuhun tsa tsaha Nyoo tsi yo tan jacuaha yo itsi tsi nyivi

17 Ña cuñi ndo tyin yuhu vatsí janaa yu ley tsa tsaha Nyoo tsi ra Moisés tyin tyaá ra. Tan ndi ña vatsí janaa yu tuhun tsa tyaá tandihí ra cuví ndusu yuhu Nyoo tahañ tsanaha. Ñavin tyiñu can vatsí yu. Yuhu vatsí yu vatsí tyaá yahvi yu tsa caahán ley can, tan catyi tuhun yu tsihin ndo náa cuñi tsi catyí ley can.

18 Tsa nditsa catyí yu tsihin ndo tyin tsitsi tsa ndi iyó ñuhu ñayivi tan andivi, ña cua naa ndi luxu ley tsa tyaá ra Moisés

tyin tandihí maa tsa tyaá ra naha tan cua cundaa tsi.

19 Yacan cuenda, ra tsa ña tyaá yahvi cuhva catyí Nyoo, vasu iin tsa luhlu ñi; tan janahá ra tsi nyivi na javaha ñi tacan, luxu cuii ñi cua cuví ra nu ndacá ñaha Nyoo. Maa tyin ra tsa tyaá yahvi tandihí, tan janahá ra tsi inga nyivi, cahnu xaan cua cuvi ra nu ndacá ñaha Nyoo.

20 Catyí yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuvi quihvi ndo nu ndacá ñaha Nyoo.

Nu caahán ra Jesús tsihin yo tyin ña taahán tsi cahan yo tsi nyivi

21 Nyooho tsa cuaha tsaha tsiñi ndo tsa catyi Nyoo tsihin nyivi tsicoo tahañ tsanaha. Catyi ra: “Ña cahñi ndo tsi nyivi, tyin tatun cahñi ndo nyivi, taahán tsi tsa cutuñi ndo.”

22 Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyivi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyí ndo tyin soho xaan caá ñi, taahán tsi cahun ndo anyaya tsa cuenda cuatyí can.

23 Tan yacan cuenda quivi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javaha un tsi yañi un,

24 *naçoo* tsa cuahán tsihin un ityi nu altar vehe ñuhu. Tan *cuhun* jihna un ndacan un tucahnu iñi tsi yañi un. Tacan tan *cuhun* un nda vehe ñuhu inga tsaha, tan *cuhva* cuenda un tsa *cua* jamañi un tsi Nyoo.

25 "Tatun iin ra tsicán *cuatyí* tsaha un, tan cuahán un tsihin ra nda nu nyaá ra *cumí tyiñu*, nducu *cuhva* cahan un tsihin ra tyin tacan tan ña cundaca ra tsi un nu nyaá ra *cumí tyiñu*, tyin ra *cumí tyiñu* can *cua* *nacuhva* cuenda ra tsi un tsi ra juez. Tan ra juez can *cua* *nacuhva* cuenda ra tsi un tsi ra vitya naha ra. Tan ra vitya can *cua* tyihi ra naha tsi un vehe caa.

26 Tan tsa nditsa *catyí* yu tsihin un tyin tun ña javaha un tacan ña *cua* tava ra naha tsi un vehe caa tun ña *cua* tyahvi un tandihi xuhun tsa *cua* ndacan ra naha.

Nu caahán ra Jesús tyin ndi tsa tsicá iñi yo tsa coo inga ñaha, o inga rayii tsi yo, tan ña vaha

27 "Nyooho tsa tsiñi ndo tyin *catyí* Nyoo tañan tsanaha tyin nyooho tsa iyó ñasihi, ña *cua* coo inga ñaha tsi ndo, tan ndi ñaha tsa iyó yii tan ña taahán tsi coo inga rayii tsi ña.

28 Maa tyin yuhu *catyí* yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsicoo *cuatyí* ndo.

29 "Tatun tinuu cuaha un janacavá tsi un tsitsi *cuatyí*, vaha taxin ca tava un tinuu un tan javita un can. Tyin vaha ca quihvi un nu ndacá

ñaha Nyoo tsihin intuhun ñi tinuu un, tan ñavin ca tsa *cuhun* un anyaya tsihin nduvi taahan tsi.

30 O tatun iin ndaha un janacavá tsi un tsitsi *cuatyí*, vaha taxin ca çahnya un ndaha un tan javita un can. Tyin vaha ca tsa quihvi un nu ndacá ñaha Nyoo tsihin tsa lundu ndaha un, tan ñavin ca tsa nanii un tan *cuhun* un anyaya.

Nu caahán ra Jesús tyin ña vaha tsa nacoo ihñi rayii tsi ñasihi ra

(Mt. 19.9; Mr. 10.11-12; Lc. 16.18)

31 "Tan juvin ñi *catyí* Nyoo tsihin nyivi tsicoo tañan tsanaha tyin yóo ra nacoo ihñi ñasihi ra, cuñi tsi tsa cani ra tutu tsa tindaha ra tsihin ña.

32 Maa tyin *catyí* yu tsihin ndo tyin nduve ndatu iyó tsi rayii tsa nacoo ra ñasihi ra tatun ña quituvi ña tsihin inga rayii. Tyin tatun nacoo ra tsi ña, tan ñavin tsa cuenda *cuatyí* can, *cua* coo *cuatyí* ra nuu Nyoo. Tan tatun quihin ña inga rayii *cua* coo ndihi *cuatyí* ña. Tan tacan ra tsa *cua* quihin tsi ña *cua* coo ndihi *cuatyí* ra.

Ña cahan yo "naha Nyoo maa"

33 "Tan tsiñi ndihi ndo, tyin *catyí* tucu Nyoo tsihin nyivi tsicoo tañan tsanaha: "Tatun *catyí* ndo 'naha Nyoo maa' tyin *cua* javaha ndo iin tsa *cua* javaha ndo nuu ra, taahán tsi tsa javaha ndo can tan ña jandavi ñaha ndo."

34 Maa tyin yuhu catyí yu tsihin ndo tyin ña cahan ndo “naha Nyoo maa”. Tan ña cahan ndo tuhun andivi, tyin yacan cuví nu nyaá Nyoo.

35 Tan ndi tuhun ñuhu ñayivi ihya ña cahan ndo, tyin ihya cuví nu tsañi Nyoo. Tan ndi ña cahan ndo tuhun ñuu Jerusalén, tyin ican cuví ñuu maa Nyoo tsa cuví ra Rey cahnu ca.

36 Tan ndi ña cahan ndo tuhun jiñi ndo, tyin ña cuvi janducuitsin ndo tan ndi tsa jandutuun ndo ndi intuhun ixi jiñi ndo.

37 Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyí ndo “naha Nyoo maa” nu ña vaha jacahán tsi ndo tsa cahan ndo tacan.

Nu caahán ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi
(Lc. 6.29-30)

38 Tan tsiñi tucu ndo tsa catyi Nyoo tahán tsanaha: “Tatun cañi nyivi tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndihi ra cumi tyiñu tacan tsihin ñi, tumaa tsa javahá ñi tsihin ndo.”

39 Maa tyin yuhu catyí yu tsihin ndo, tyin ña javaha ndo tsa ña vaha tsa javahá nyivi xaan cuñi nyehe tsi ndo. Tyin tun yóo cañi iin tsiyo nuu ndo, taahán tsi tsa cuhva ndihi ndo inga tsiyo na cañi ndihi ñi, tan ña cuxaan ndo tsi ñi.

40 O tatun tsiacán ñi cuatyí tsaha ndo, tan cuñi ñi quihin nyaa ñi iin camisa ndo. Taahán tsi cuhva ndihi ndo chamarra ndo tsi ñi tan ña cua cuxaan ndo tsi ñi.

41 O tatun yóo cuñi cundaca ndo ndaha tyiñu ñi iin kilómetro, taahán tsi cundaca ndo can uvi kilómetro.

42 Tatun yóo nyivi tsiacán tumañi iñi tsi ndo, cuhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

Na cuñi yo tsi nyivi xaan iñi tsi yo

(Lc. 6.27-28, 32-36)

43 “Tan tsiñi tucu ndo tyin catyi Nyoo tahán tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.”

44 Maa tyin yuhu catyí yu tsihin ndo, cuñi ndo tsi nyivi xaan iñi tsi ndo. Tan javaha ndo tsa vaha tsihin nyivi caahán tsi ndo, tan tsi nyivi ña cuñi nyehe tsi ndo. Tan ndacan tahvi ndo tsi Nyoo tsa cuenda nyivi tsa caahán nyaa tsi ndo tan tsa cuenda ñi tsa jacuví tsa uhvi tsi ndo.

45 Tatun javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyivi vaha tan nyivi ña vaha.

46 Tatun nyoocho tan cuñi ndo tsi nyivi vaha iñi tsi ndo tan ndasi cuñi ndo nyehe ndo tsi nyivi xaan iñi tsi ndo, nduve tsa vaha cua ñihi ndo, Tyin juvin ñi tacan javahá tucu ra tavá xuhun cuenda

ra ndacá ñaha nda ñuu Roma. Tan cuñi maa ndo tyin quiñi xaan iyó ra can naha ra.

⁴⁷ Tatun tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyivi, nduve tsa vaha xaan javahá ndo. Tyin juvin ñi tacan javahá nyivi tsa ña tsitó tuhun Nyoo.

⁴⁸ Tumaá Jutu yo tsa nyaá gloria cuiti xaan iyó ra, tacan taahán tsi coo tucu nyooho.

6

Nu caahán ra Jesús nácaa javaha yo tumañi iñi

¹ Jaha ndo cuenda tan ña nduyaa ndo náa tumañi iñi javaha ndo tsi nyivi. Tyin tatun javaha ndo tumañi iñi tyin nyehe nyivi, Jutu yo, ra nyaá gloria, nduve náa cua cuhva ra tsi ndo.

² Tun cua javaha ndo tumañi iñi, ña cua jacoto ndo tsi inga nyivi tyin javahá ndo tumañi iñi. Ña javaha ndo tumaá icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyi nyivi tyin vaha xaan iñi ra naha. Yacan ñi ñihí ra can naha ra, tan nduve náa cua cuhva Nyoo tsi ra naha.

³ Yacan cuenda quivi javahá ndo tumañi iñi tsi nyivi ndaahvi, ña jacoto ndo ndi tsi ra tsa vaha xaan ca iñi tsi ndo.

⁴ Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

Nu caahán ra Jesús nácaa ndacan tahvi yo tsi Jutu yo Nyoo

(Lc. 11.2-4)

⁵ Tatun cua ndacan tahvi ndo tsi Nyoo, ña javaha ndo tumaá javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyivi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyivi tyin vaha xaan ra naha. Tsa nditsa catyí yu tsihin ndo tyin yacan ñi ñihí ra naha.

⁶ Maa tyin nyooho quivi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyivi tsi ndo. Quihvi ndo tsitsi vehe ndo tan ndacan tahvi ndo tsihin tsa ñi iñi aña ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyivi. Tan cua cuhva ra tsa vaha tsi ndo.

⁷ Tatun cua cahan ndo tsihin Nyoo, ñavin juvin ñi tuhun tsa nduve yahvi nyaá cahan ndo. Tacan javahá nyivi tsa ña tsitó tsi Nyoo. Cuñi maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yahá cahan ñi.

⁸ Ña javaha ndo tacan. Tyin Nyoo tsa tsitó ra náa tsiñi ñuhu tsi ndo tsa ndi cumañi ca ndacan ndo tsi ra.

⁹ Yacan cuenda nyooho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

¹⁰ Na quitsi tsa ndaca ñaha un nu ñuhu ñayivi ihya,

tan na javaha tandihi nyivi tandihi cuhva cuñi maa un, tumaa cuví nda gloria.

¹¹ Cuhva tsa catsi ndi tahan tahan quivi.

¹² Jaha tucahnu iñi tsi ndi náa tsa ña vaha javaha ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

¹³ Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihi tunyee iñi tsi un. Tan taahán tsi tyin jacahnu tandihi nyivi tsi maa ñi un tandihi maa quivi tan na ña cundihí tsi. Na cuví tsi tacan ñi.

Tyehen taahán tsi ndacan tahvi ndo tsi Nyoo.

¹⁴ Tyin tatun nyoocho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo.

¹⁵ Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyí ra Jesús.

Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi

¹⁶ Tan catyí tucu ra Jesús tsihin nyivi:

—Quivi tsa iyó nyitya ndo tyin nanducú ndo tsi Nyoo, ña cuihya nyehe ndo, tumaa javahá nyivi jahá tyin vaha xaan ñi. Tyin cahyí ñi nyaá nuu ñi tyin cuñi ñi tsa nyehe nyivi tyin iyó nyitya ñi tan nanducú ñi tsi Nyoo. Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi.

¹⁷ Maa tyin nyoocho quivi tsa iyó nyitya ndo tyin nanducú ndo tsi Nyoo, ñacatyá ndo nuu ndo. Tan tyihí ndo cuca jiñi ndo.

¹⁸ Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

Tsa vaha tsa iyó nda gloria (Lc. 12.33-34)

¹⁹ Ña jacaya ndo tsa cuca tsa iyó nu ñuhu ñayivi ihya. Tyin coto tiví tsi jaha tiquixin o jaha cuxi. O cuví quihvi ñasuhu, tan suhu nu tandihi tsa jacaya ndo.

²⁰ Vaha ca jacaya ndo tsa cuca tsa iyó nda gloria. Tyin ña cua cundihí tsi ndacan. Tyin ña cuví tiví tsi ndacan, tan nduve quití jativi itsi, ndi nduve ñasuhu.

²¹ Tyin nu natyihí vaha ndo tsa cuca, ican cua cunyaa ndihí añima ndo.

Nu caahán ra Jesús tyin na jaha yo cuenda ñuhu nditsin tsa tyihí ra añima yo
(Lc. 11.34-36)

22 'Tinnuu ndo cuví ñuhu nditsin tsi ndo. Tatun vaha tinuu ndo, tanñi cuñu ñuhu ndo tan iyó ñuhu nditsin. [Tan tuhun ihya cuñí tsi catyi tyin tatun iyó ñuhu nditsin Nyoo añima ndo cuví ndo nyivi vaha.]

23 Maa tyin tatun ña vaha tinuu ndo, tandihí cuñu ñuhu ndo tan nyí tsi nu naa. Tan tacan tucu tatun nduve ñuhu Nyoo iyó añima ndo, [cuví ndo tumaa iin ra cuaa. Nu naa cuahán ndo tan ña cuví nyehe ndo ityi vaha tsa cuahán nu nyaá Nyoo].

Nu caahán ra Jesús tyin ña cuvi tyaa yahvi yo tsi Nyoo tatun cuñí xaan ca yo xuhun
(Lc. 16.13)

24 'Iin musu ña cuvi coo uvi tsitoho ra. Tyin musu can cuñí ca ra tsi iin ra tan ñavin ca tsi inga ra. Tan tyaá yahvi ra tsi iin ra, tan ñavin ca tsi inga ra. Tan tacan tucu nyooho, ña cuví cuñí ndo tsi Nyoo, tan cuñí tucu ndo xuhun.

Nu caahán ra Jesús tyin ña caca xaan iñi yo náa ndihí tsa tsiñí ñuhu tsi yo
(Lc. 12.22-31)

25 'Yacan cuenda catyí yu tsihin ndo, tyin ña caca xaan iñi ndo nácaa ñihi ndo tsa catsi ndo tan tsa coho ndo. Ndi ña caca iñi ndo nácaa cua ñihi ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu

ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña yñi cuhva ra inga tsa tsiñí ñuhu tsi yo].

26 Nyehe ndo cuhva iyó saa. Ña tatsí ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuví nyooho tan ñavin ca saa can naha ti.

27 Tan vasu ndi maa tsicá xaan iñi ndo maa tyin ña cua cuví jandusucun ca ndo ndi luxu ca tsi ndo.

28 'Tan tatun ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi cuhu, tyin ña jahá tyiñu tun tan ndi ña taví tun yuhva.

29 Maa tyin catyí yu tsihin ndo tyin ndi ra cuví rey Salomón tsihin tandihí tsa cuca ra, tan ña tsinditsi ra jahma sñi ca caá tan ñavin ca tsa jacunditsí Nyoo tsi yutun ita can.

30 Tatun tacan ñi jacunditsí Nyoo tsi yutun ita tsa iyó tsitsi cuhu vityin, tan tyaan cua cuví tun nducu tan cayu tun. ¿A ña cua jatyinyee cuaha ca ra tsi ndo? Tyin nyooho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra.

31 Yacan cuenda ña cua caca xaan iñi yo tan catyí yo: "¿Náa cua catsi yo, o náa cua coho yo, o nácaa cua ñihi yo jahma cunditsi yo?"

32 Tyin nyivi tsa ña tsitó tsi Nyoo tsicá xaan iñi ñi yacan.

Maa tyin nyooho ña çaca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsiñí ñuhu tsi ndo.

³³ Yacan cuenda, çaca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsiñí ñuhu tsi ndo.

³⁴ Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñi ñuhu tsi ndo ityaan. Çaca iñi ndo tan nyehe ndo nácaa yahá ndo quivi vityin jahá Nyoo.

7

Ña cahan yo tsa caá inga nyivi

(Lc. 6.37-38, 41-42)

¹ Ña cahan ndo tsa caá inga nyivi, tacan tan Nyoo ña cua cahan ra tsa caá ndo.

² Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juvin ñi tacan cua javaha Nyoo tsihin ndo.

³ ¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un?

⁴ Tatun tinuu maa un nyii iin yutun cahnu, ¿nacaa cuví catyi un tsihin ra yañi un: “Ñaha, na tava yu tsahan luhlu tsa nyii tinuu un”?

⁵ ¡Yooho tsa jahá tyin vaha xaan un! Tava jihna yutun cahnu tsa nyii tinuu un. Tyin

tacan tan cuvi nyehe vaha un tsahan luhlu tsa cua tava un tinuu yañi un.

⁶ Ña jañihi ndo cahan ndo tuhun Nyoo tsihin nyivi ña cuñí coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo
(Lc. 11.9-13; 6.31)

⁷ Ndacan ndo tsa tsiñí ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña.

⁸ Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

⁹ Tacan tucu nyooho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi?

¹⁰ O tatun tsicán tsi tyaca, ¿a cua cuhva ndo iin coo itsi?

¹¹ Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

¹² Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsaha

Nyoo tsi ra Moisés tan tacan tucu nyaá nu tandihi libru tsa tyaa ra cuvi ndusu yuhu Nyoo tahañ tsanaha.

Yuvehe tihin tan ityi cuiñi tsa cuahán nu nyaá Nyoo
(Lc. 13.24)

13'Nducu ndo cuhva quihvi ndo yuvehe tihin. Tyin quiihin yuvehe, tan quiihin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can.

14 Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihí ityi can.

Tsihin tsa javahá nyivi, tan nacotó yo tatun nyivi vaha, a nyivi ña vaha cuvi ñi
(Lc. 6.43-44)

15'Jaha ndo cuenda tsi ndo tsihin ra vatya naha ra. Tyin catyí ra naha tyin ndusu yuhu Nyoo cuvi ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuvi ra naha. Maa tyin tumaa quiñi xaan cuvi ra naha.

16 Nyoocho cuvi nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuvi ra naha. Tyin iin tinyata ña cua cuhva tun mangu, tan ndi iñu nduhva ña cuvi cuhva tsi yucu vixi.

17 Tan tacan tucu tandihi yutun vaha. Tsahá tun tsiti vaha. Tan tandihi yutun ña vaha, tsahá tun tsiti ña vaha.

18 Tyin yutun vaha, ña cuvi cuhva tun tsiti ña vaha. Tan

ndi yutun ña vaha ña cuvi cuhva tun tsiti vaha.

19 Tan tandihi yutun tsa ña tsahá tsiti vaha, cahnya yo tsi tun. Tan cayu tun.

20 Tan tacan tsihin tsa javahá nyivi, cuvi nacoto ndo tsi ñi tatun nyivi vaha o nyivi ña vaha cuvi ñi.

Nu catyí ra Jesús tyin ña tandihi nyivi tan cua quihvi ñi nu ndacá ñaha Nyoo
(Lc. 13.25-27)

21'Ña tandihi nyivi tsa catyí tsihin yu: "Jutu Mañi yu, Jutu Mañi yu", cua quihvi ñi nu ndacá ñaha Nyoo nda gloria. Maa tyin nyivi tsa javahá tsa catyí maa Nyoo Jutu yu, juvin ñi can cua quihvi nu ndacá ñaha ra.

22 Quiñi tatsi tuñi Nyoo tsi nyivi, cuaha xaan ñi cua catyí ñi tsihin yu tyehen: "Jutu Mañi yu, nyuhu cañan ndi tuhun cun tsihin nyivi. Tan tsihin sivi un tavañ ndi tatyí ña vaha tsa yihí tsi ñi. Tan cuaha xaan tsa iyo javahá ndi tsihin sivi un", cua catyí ñi tsihin yu.

23 Tacan tan yuhu cua catyí yu tsihin ñi: "Ña nacotó yu tsi nyoocho. Çatsiyo nyaha ndo nu nyaá yu tandihi nyoocho tsa javahá maa maa ñi tsa ña vaha", cua catyí yu tsihin ñi.

Nu caahán ra Jesús nácaa cua cacu nyivi tsa tyaa yahvi tuhun caahán ra, tan nyivi tsa ña tyaa yahvi tsa caahán ra, ña cua cacu ñi
(Lc. 6.47-49; Mr. 1.22)

24' Tacan catyí yu tsihin ndo, tyin nyivi tsa tsiñi tsa caahán yu tan javahá ñi

cuhva cuñi yu, cuvi ñi tumaa iin ra tsiñi tuñi tsa janduvita tyihyo tsaha vehe ra tsata cava.

²⁵ Tan quitsaha cuún ñihi savi. Tan cuaha xaan ndutya ñuhu yaha tsata vehe can. Tan ñihi xaan quitsaha yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava.

²⁶ Maa tyin nyivi tsa tsiñi tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javaha vehe nu nyiti.

²⁷ Tan quitsaha cuún ñihi savi. Tan cuaha xaan ndutya ñuhu yaha nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduva tsi tan cunaá tsi —catyí ra Jesús tsihin ñi tsa nyicún tsi ra.

²⁸ Cuhva tsa ndihí cahan ra Jesús tsihin ñi, iyo xaan cuñi ñi tsihin tsa caahán ra,

²⁹ tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

8

Nu janduvaha ra Jesús tsi iin ra ndohó cuehe tyaahyú (Mr. 1.40-45; Lc. 5.12-16)

¹ Cuhva tsa nuu ra Jesús yucu can, cuaha xaan nyivi nyicún tsi ra.

² Tan tsaá iin ra ndohó cuehe tyaahyú, tan tsicuiñi tsi ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví

janduvaha un tsi yu —catyí ra tsihin ra.

³ Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvaha ra.

⁴ Tacan tan catyí ra Jesús tsihin ra:

—Jihna, coto ñahñi catyí tuhun un tsihin nyivi. Maa tyin cūaahan nu nyaá ra cuví jutu, tan janaha un tsi un tsi ra. Tan cūhva un tsa taahán tsi jamañi un nuu Nyoo tumaa catyí ley Nyoo tsa tyaa ra Moisés. Tan cua cuví tsi iin tsa ndaa tsi ra jutu can tan tsi nyivi tyin tsa nduvaha un.

Nu janduvahá ra Jesús tsi musu iin ra cuví capitán (Lc. 7.1-10)

⁵ Quivi tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyii ra Jesús tan caahán ndaahvi ra tsihin ra,

⁶ tan catyí ra:

—Jutu Mañi yu, musu yu ñihi xaan cuuhví ra, canyí ra nu cama. Ña cuví nduvita ra tyin nduxii ra, tan yaha xaan cuhva cuñi ra.

⁷ Tan catyí ra Jesús tsihin ra:

—Cuhun maa yu tan cujanduvaha yu tsi ra —catyí ra tsihin ra.

⁸ Nacahan ra capitán can tan catyí ra:

—Jutu Mañi yu, ña cahnu cuví yu tan cahun un yuvehe yu; tsihin tuhun cahan ñi un tan musu yu cua nduvaha ra.

⁹ Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

¹⁰ Tan tsa tsiñi ra Jesús tsa cahan ra can, tan iyo xaan cuñi ra. Tan catyi ra tsihin nyivi tsa nyicún tsi ra:

—Tsa nditsa catyi yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya.

¹¹ Tan catyi yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo.

¹² Tan nyivi tsa taahán tsi cuhun gloria, ña cua cuhun ñi, tyin cua cuhun ñi nu naa. Tan cua vacu tsa ñi tan catsan ña cua cuvi nuhu ñi tsa cuenda tsa xaan cuñi ñi tyin nyehe ñi tundoho —catyi ra Jesús tsihin nyivi nyicún tsi ra.

¹³ Tacan tan catyi ra tsihin ra capitán can:

—Cuaahan, tan na nduvaha musu un tsa cuenda tyin tsinú iñi un tsi yu —catyi ra Jesús tsihin ra capitán.

Tan juvin ñi cuhva can nduvaha musu ra.

Nu janduvaha ra Jesús tsi tyiso ra Pedro

(Mr. 1.29-31; Lc. 4.38-39)

¹⁴ Tsa yaha can, tan cuahán ra Jesús yuvehe ra Pedro. Tan nyehe ra tsi ña tyiso ra, canyií

ña nu tsito tyin yihí cahñi tsi ña.

¹⁵ Tan tiñ ra ndaha ña, tan iin yaha ñi quita cahñi tsi ña. Tan nduvita ña, tan quitsaha nanducú ña tsa catsi ra naha.

Nu cuaha xaan nyivi cuuhvi janduvaha ra Jesús

(Mr. 1.32-34; Lc. 4.40-41)

¹⁶ Tan tsa cunaaha, cuaha xaan nyivi yihí tatyí ña vaha tsindaca nyivi tsi ra Jesús. Tan tsihin intuhun ñi tuhun cahan ra Jesús tan quita tatyí ña vaha tsi ñi. Tan tandihí ñi cuuhvi iin yaha ñi nduvaha ñi.

¹⁷ Tacan cuvi tyin tacan tan cunda tsa cahan Jutu Mañi yo tsihin yuhu ra Isaías, ra cuvi ndusu yuhu ra tahañ tsanaha. Tan catyi ra tyehen: “Maa ra quihin ra cuehe tsa yihí tsi yo, tan quihin nyaa ra tsa uhvi tsi yo.”

Nyivi tsa cuñi quihvi cuenda ra Jesús

(Lc. 9.57-62)

¹⁸ Tan tsa nyehe ra Jesús tyin cuaha xaan nyivi tsinú nduvi nu nyii ra, catyi ra tsihin ra tsicá tsihin ra tyin cua yaha ra naha inga tsiyo miñi.

¹⁹ Tacan tan tsa iin ra maestro cuenda ley vehe ñuhu tan catyi ra tsihin ra:

—Maestro, cuñi yu cunyi-cun yu tsi un tandihí ñi ityi nu cuahán un —catyi ra.

²⁰ Tan ra Jesús catyi ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayi tsa quee nda gloria, nduve nu maa cunyanaa luxu jiñi yu iyó —catyi ra.

21 Inga ra tsa tsicá tsihin ra nacahan ra tsihin ra:

—Taa, cuhva na cahun jinha yu cucutsi yu tsi jutu yu, —catyí ra.

22 Tan catyí ra Jesús tsihin ra:

—Naha yooho quitsi nyicun un tsi yu. Tan nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi —catyí ra.

Nu jacutaxín ra Jesús tatyí xaan nu miñi
(Mr. 4.35-41; Lc. 8.22-25)

23 Tacan tan quihvi ra tsitsi yutun ndoo tan ra tsicá tsihin ra cuahán ra naha tsihin ra.

24 Tan ñihi xaan quitsaha yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesús quixí ra.

25 Tan ra tsicá tsihin ra jandoto ra naha tsi ra, tan catyí ra naha:

—jJutu Mañi yu, jácacu tsi yo, tyin cuñi cunaa yo!

26 Tan catyí ra Jesús tsihin ra naha:

—¿Nacuenda yuuhví xaan ndo? ¡Nyooho tsa luxu xaan tsinú iñi tsi yu! —catyí ra Jesús.

Tacan tan nduvita ra tan cahan ra tsihin tatyí tan tsihin ndutya, tan cutaxin tsi.

27 Tan iyo xaan cuñi ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

Nu nduvahq uvi ra ñuu Gadara ra yihí tatyí ña vaha nahara

(Mr. 5.1-20; Lc. 8.26-39)

28 Tacan tan tsaá ra naha inga tsiyo miñi nda nu ñuhu Gadara. Tan tsaá uvi taahan ra yihí tatyí ña vaha. Tan quita ra naha nu ñaña cumí sandu. Xaan xaan ra naha, tan yoñi maa cuví yaha ityí can.

29 Tan caná tsaá ra naha, tan catyí ra naha:

—¿Náa cuñi un tsihin ndi, yooho Jesús Sehe Nyoo? ¿A vatsí un vatsí janyehe un tundo tsi ndi tsa ndi cumañi ca tsaá quivi? —catyí ra naha jahá tatyí ña vaha can.

30 Tan yatyin ñi can yucú cuaha quini tsatsí ti naha ti.

31 Tan catyí nu tatyí ña vaha can tsihin ra Jesús:

—Tatun cua tava un tsi ndi, cuhva tsa quihvi ndi tsitsi quini can naha ti —catyí nu tatyí ña vaha can nahnu.

32 —Vaha. Quihvi ndo —catyí ra Jesús.

Tan quita nu tatyí ña vaha can nahnu, tan quihvi nahnu tsitsi tandihi quini tsa nyecú can. Tan tandihi quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

33 Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihi tsa cuví tsi ra tsa yihí tatyí ña vaha can naha ra.

34 Tacan tan tandihi nyivi ñuu can, tsahan ñi tsinyehe ñi tsi ra Jesús, tan cahan

ndaahvi ñi tsihin ra na quita ra ñuu can.

9

Nu janduvaha ra Jesús tsi iin ra xii

(Mr. 2.1-12; Lc. 5.17-26)

¹ Tacan tan quihvi ra Jesús tsitsi iin yutun ndoo tan yaha ra miñi, tan tsaā ra nda ñuu nu iyó ra.

² Nu nyii ra ican, tsindaca nyivi tsi iin ra cuuhvi tsa ña cuví nacanda tyin nduxii ra, tan canyii ra nu tsito. Tan tsa nyehe ra Jesús tyin tsinú xaan iñi ñi tsi ra, quitsaha caahán ra tsihin ra cuuhvi can:

—Jandu iin iñi un, sehe yu, tyin tsa tsicoo tucahnu iñi cuaryi un —catyí ra Jesús tsihin ra.

³ Tacan tan quitsaha tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoo cuaryi ra nu Nyoo tsihin tuhun caahán ra”, cuñi ra naha tsicá iñi ra naha.

⁴ Maa tyin ra Jesús tsitó ra náa tsicá iñi ra naha, tan caryi ra tsihin ra naha:

—¿Nacuenda tsicá iñi ndo tsa ña vaha?

⁵ Tyin ¿ndaa tsa y# ca caryi yo: a y# ca caryi yo: “Cuaryi un tsa yaha ndatsi”, o y# ca caryi yo: “Nduvita tan caca un”?

⁶ Vityin cua janaha yu tsi ndo tyin yuhu Ray# tsa quee nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuaryi ndo —caryi ra Jesús.

Tacan tan caryi ra tsihin ra cuuhvi can:

—Nduvita, naquihin tsito un tan cuanuhu nda yuvehe un —caryi ra.

⁷ Tacan tan nduvita ra tan cuanuhu ra nda yuvehe ra.

⁸ Tan nyivi tsa nyehe tsa cuvi, nayuhvi xaan ñi. Tan quitsaha jacahnú ñi tsi Nyoo tyin tsaaha ra tunyee iñi tsi nyivi.

Nu cana ra Jesús tsi ra Mateo

(Mr. 2.13-17; Lc. 5.27-32)

⁹ Yaha can tan quita ra Jesús ican. Tan nyehe ra tsi iin ra tsa nañi Mateo, nyaá ra naquihin ra xuhun tsa tyahvi nyivi Israel tsi ra ndacá ñaha. Tan caryi ra tsihin ra:

—Cohon tsihin yu.

Tacan tan nduvita ra Mateo tan cuahán ra tsihin ra Jesús.

¹⁰ Tacan tan cuvi tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tava xuhun cuenda ra ndaca ñaha tsaā, tan tsihin inga ca ra iyó cuaryi naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra.

¹¹ Tan tsa nyehe ra fariseo naha ra tyin nyaá ra Jesús tsihin ra iyó cuaryi naha ra, tan tsicā tuhun ra naha tsi ra tsicá tsihin ra, tan caryi ra naha tsihin ra naha:

—¿Nacuenda tyin tsatsi ra maestro ndo tsihin ra tava xuhun naha ra tan ra iyó cuaryi naha ra? —caryi ra naha.

¹² Tsa tsiñi ra Jesús tsa caahán ra naha, tan caryi ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi.

¹³ Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cahñi ndo quití tan cuhva cuenda ndo tsi yu.” Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

Nu tsica tuhun nyivi tsi ra Jesús tatun taahán tsi tsa coo nyitya ñi

(Mr. 2.18-20; Lc. 5.33-35)

¹⁴ Tacan tan ra nyicún tsi ra Juan, ra jacoondutya tsi nyivi, natuhva ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

¹⁵ Tan nacahan ra Jesús tan catyí ra:

—¿A cuví cunyecú cuihya nyivi yucú vico tindaha tun nyii ra cua tindaha tsihin ñi? Maa tyin coo quivi cua quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

Nu caahán ra Jesús tyin ña nacatsí tahan tuhun tsahnu tsa iyó nyivi tsihin tuhun tsa tsa jacuahá ra tsi ñi

(Mr. 2.21-22; Lc. 5.36-39)

¹⁶ Ña tuhvá nyivi naquicú iin jahma tuuhu tsihin iin jahma tsa, tyin cua nandiyi nu naquicú ñi tsihin tsa tsa can, tan cua tyahnya tsi inga tsaha.

¹⁷ Tan tacan tucu, ña cuví tyihí nyivi vinu tsa tsitsi ñi tsaahnu tyin tatun tacan javaha ñi, cua tyahnya ñi can, tan cua tivi vinu can tan cua tivi ndihi tucu ñi can. Yacan cuenda taahán tsi tyihi yo vinu tsa tsitsi ñi tsa. Tyin tacan tan ña tyahnya ñi can tan ndi vinu can ña tivi tsi.

Nu nduvaha ñaha sehe ra Jairo tan ñaha tsa tsiñ jahma ra Jesús

(Mr. 5.21-43; Lc. 8.40-56)

¹⁸ Tsitsi tsa caahán ra Jesús tuhun ihya, tsaq iin ra cumí tyiñu cuenda vehe ñuhu nyivi Judea tan tsicuiñi tsiti ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yooho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

¹⁹ Nduvita ra Jesús tsihin ra tsicá tsihin ra tan cuahán ra naha tsihin ra.

²⁰ Tacan tan iin ñaha cuuhví natuhva ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaq ña ndaha ña jahma ra,

²¹ tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

²² Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Jandunî iñi un, xihî, tsa nduvahâ un tyin tsinú iñi un —catyí ra.

Tan juvin ñi cuhva can tan tsicuiñî tsa cuún ñiñî ña.

²³Yahâ can tan tsaâ ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyivi tsa yucú can iyo xaan tsacú ñi.

²⁴Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixí ña —catyí ra.

Tan tsa cahân ra tacan quit-sahâ tsacú naaha ñi.

²⁵Tan ra Jesús tavâ ra tsi ñi ityi tsata vehe. Tacan tan quihvi ra tsitsi vehe nu canyii ñaha can, tan tñn ra ndaha ñaha luhlu can, tan nduvitâ ña.

²⁶Tan tandihi nyivi iyó ityi ñuu can tsito ñi tsa nandoto ñaha luhlu can.

Nu janduvahâ ra Jesús tsi uvi taahan ra cuaa

²⁷Tsa quitâ ra Jesús ican, tan uvi taahan ra cuaa nyicún tsi ra, caná tsaa ra naha tan catyí ra naha:

—¿Cundahvi iñi tsi ndi, yooho ra cuví tata ra David! —catyí ra naha.

²⁸Tan tsa yahâ quihvi ra Jesús tsitsi vehe, ra cuaa can, natuhvâ ra naha nu nyaá ra, tan maa ra Jesús quitsahâ tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahân ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

²⁹Tacan tan tyanaâ ra Jesús ndaha ra tinuu ra naha tan catyí ra tsihin ra naha:

—Na cuvi maa tumaa cuhva tsinú iñi ndo —catyí ra.

³⁰Tan nduvahâ tinuu ra naha. Tan catyí ra Jesús tsihin ra naha:

—Coto ñahñi catyi tuhun ndo tsihin ndi intuhun nyivi.

³¹Maa tyin cuahân ra naha tan quitsahâ catyí tuhun ra naha tsa javahâ ra Jesús tsihin ra naha tsihin tandihi nyivi iyó ityi ñuu can.

Nu janduvahâ ra Jesús tsi iin ra ñihí

³²Tsa cuahân ra naha, juhva nyivi tsindacâ ñi tsi iin ra ñihí tsa yihí tatyí ña vaha nu nyii ra Jesús.

³³Tan tsa tavâ ra Jesús tatyí ña vaha can, tacan tan nacahân ra can. Tan iyo xaan cuñí nyivi, tan catyí ñi:

—Ñaha ca maa nyehe yo ñuu Israel ihya ndi intuhun ra tavá tatyí ña vaha tsi nyivi —catyí ñi.

³⁴Maa tyin ra cuví fariseo naha ra, catyí ra naha:

—Ra ihya tavá ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyí ra naha.

Nu caahân ra Jesús tyin ña cuaha maa nyivi jahâ tyiñu cuenda Nyoo iyó

³⁵Ra Jesús tsahân ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahân ra tuhun Nyoo nácaa ndacá ñaha

ra tsi nyivi. Tan janduvahá ra tandihí nuu cuehe tsa ndohó ñi.

³⁶ Tan tsa nyehé ra tsi nyivi, cundaahvi xaan iñi ra nyehe ra tsi ñi, tyin nyehé ñi tundoho tan iyó ñi tucuihya iñi, tumaa mbee ticatyí tsa nduve tsitoho iyó.

³⁷ Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha.

³⁸ Yacan cuenda, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

10

Nu nacatsi ra Jesús tsa utsi uvi ra cua caca tyiñu ra

(Mr. 3.13-19; Lc. 6.12-16)

¹ Tacan tan caná ra Jesús tsi tsa utsi uvi ra tsicá tsihin ra tan tsahá ra ndatu tsi ra naha na tava ra naha tatyí ña vaha tsa yihí añima nyivi, tan na janduvaha ra naha tsi nyivi cuuhví náa ndihí ca nu cuehe tan tsa uhvi.

² Ihya nyaá sivi tsa utsi uvi ra tsicá tyiñu ra: jihna ca, ra Simón, tsa nañí tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha;

³ tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañí tucu Tadeo;

⁴ tan ra Simón ra nyíí cuenda partido tsa cuñí cuhun cuatyí siqui ñuu Roma

tsa ndacá ñaha tsi ñi; tan ra Judas Iscariote, ra tsa xico tsi ra Jesús.

Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo

(Mr. 6.7-13; Lc. 9.1-6)

⁵ Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cūhun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria.

⁶ Cuaahan ndo nu yucú mbee tsa tsinaa tsa cuví nyivi Israel.

⁷ Cuaahan ndo cua cahan ndo tyin tsa tsaá quivi tsa cua cundaca ñaha Nyoo tsi nyivi.

⁸ Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyoocho naquihín ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

⁹ Ña cūiso ndo xuhun; ndi xuhun cuaan, ndi xuhun cuitsin, ndi xuhun cuaaha.

¹⁰ Tan ña cūiso ndo ndi yunu tsa cuenda tsa caca ityi ndo. Intuhun ñi camisa tsa nditsin ndo cuhun tsihin ndo. Tan ña cūiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

¹¹ Tatun tsa ndo iin ñuu cahnu o iin ñuu luhlu, nducu ndo iin nyivi vaha iñi, tan

ndoo ndo yuvehe ñi nda cuanda quita ndo ñuu can.

12 Tatun cua quihvi ndo iin vehe, cuhva ndo nacumi tsi nyivi iyó yuvehe can. Tan catyi ndo tsihin ñi: “Na coo tsa vaha Nyoo aña ndo”.

13 Tan tatun nyivi iyó yuvehe can tan nacotó ñi tyin tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihin nyico ndo can.

14 Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi siqui ñi.

15 Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

Nu catyí tuhun tsi náa ndihi tundoho cua nyehe nyivi tsicá tyiñu Nyoo

16 'iNyehe ndo! Tumaa mbee ticatyí cuví ndo, tan jacuhún yu tsi ndo nu yucú quití xaan. Nyityi jáha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti.

17 Jáha ndo cuenda tsi ndo tsihin nyivi tyin cua cuhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu.

18 Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey.

Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví.

19 Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsa cuhva tsa cua cahan ndo, Nyoo cua cuhva ra tuhun cahan ndo.

20 Tyin ñavin maa ndo cua cahan, tyin maa Tatyí Ii Jutu yo Nyoo tsa iyó aña ndo cua cuhva ra tsa cahan ndo.

21 'Yihí rayii cua xico ra naha juvin ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyivi na cahñi nyivi can tsi ñi.

22 Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú iñi ndo tsi yu, tacan tan cua cacu ndo.

23 Tatun nyaa ndaha ñi tsi ndo iin ñuu, cuhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cuhun ndo tandihí ñuu nu iyó nyivi Israel tan cua quitsi nyico yuhu, Rayii tsa queenda gloria.

24 'Iin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra.

25 Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho

ra. Yacan cuenda tatun maa yu, ra jatsii vehe, tan catyí nyívi tyin cuví yu Beelzebú, nu cuví ityi nuu tsihin nu ña vaha, tacan tucu cua catyi ñi tsihin nyívi cuenda yu.

¿Yóo tsii taahán tsi nayuhvi yo, a tsii nyívi o tsii Nyoo?

(Lc. 12.2-7)

²⁶ 'Yacan cuenda ña nayuhvi ndo tsi nyívi, tyin nduve tsa nyii xeehe tsa ña cua quituvi. Tan nduve tsa xeehe tsa ña cua coto nyívi.

²⁷ Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, ndaa ndo jiñi vehe cãna tsaa ndo can, na coto tandihí nyívi.

²⁸ Ña nayuhvi ndo tsi nyívi tsahñi cuñu ñuhu yo, tyin ña cuví cahñi ñi añima yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan añima ndo tsitsi anyaya.

²⁹ 'Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cuhva maa Nyoo Jutu yo.

³⁰ Tyin nda cuanda ixi jiñi ndo tan tsitó Nyoo najava taahan tsi iyó, tyin tsa nacahv̄i ra intuhun intuhun tsi.

³¹ Yacan cuenda ña nayuhvi ndo. Nyooho, nyaá yahvi ca ndo nu Nyoo tan ñavin ca tsa cuaha saa.

Ña cua nayuhvi yo cahan yo tuhun ra Jesucristo tsihin nyívi

(Lc. 12.8-9)

³² 'Tandihí nyívi tsa caahán catsi tsihin nyívi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi.

³³ Maa tyin nyívi cua tyihi xeehe tsi yu nuu inga nyívi, tacan tucu yuhu cua tyihi xeehe yu tsi ñi nuu Jutu yu ra nyaá gloria.

Nu caahán ra Jesús tyin tsa cuenda ra tan cua cañi tahan nyívi tsihin tahan ñi

(Lc. 12.51-53; 14.26-27)

³⁴ 'Ña cuñi ndo tyin yuhu vatsí cuhva yu tsa coo taxin nyívi nu ñuhu ñayívi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan.

³⁵ Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña.

³⁶ Tan yacan cuenda juvin ñi maa nyívi vehe ndo cua cuxaan iñi tsi ndo.

³⁷ 'Nyívi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyívi cuenda yu. Tan nyívi cuñi ca tsi sehe yii ñi a sehe sihi ñi, tan ñavin ca tsi yuhu, ña cuví cuví ñi nyívi cuenda yu.

³⁸ Tan nyívi tsa ña cuñi nyehe tundoho tan ndi ña cuñi ñi cuhva ñi ñayívi iyó ñi tsa cuenda yu, ña taahán tsi cuví ñi nyívi cuenda yu.

³⁹ Tyin nyívi cuñi xaan ca ñayívi iyó ñi, cua cunaa ñi.

Maa tyin nyivi cua cuhva ñayivi iyó ñi tsa cuenda yu, cua ñihi ñi ñayivi nyito coo ñi.

*Nu caahán ra Jesús nácaa
cua ñihi yo tsa vaha Nyoo*

(Mr. 9.41)

⁴⁰ Nyivi tsa naquihín cuenda tsi nyooho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsi tsi yu.

⁴¹ Nyivi naquihín cuenda tsi iin ra cuvi ndusu yuhu Nyoo tyin Nyoo jaquitsi tsi ra, cua ñihi ndihi ñi tsa vaha tsa cua ñihi ra cuvi ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuvi ra, juvin ñi tsa vaha tsa cua ñihi ra vaha can cua ñihi ñi.

⁴² Tan yoo nyivi tsa cuhva intuhun vasu ndutya vitsin coho nyivi tsa nyicún tsi yu, cua ñihi ndihi ñi tsa cua cuhva Nyoo tsi ñi tsa nyicún tsi yu —catyí ra Jesús.

11

*Nu jacuhun ra Juan tsi ra
tsicá tsihin ra nu nyii ra Jesús*
(Lc. 7.18-35)

¹ Tsa ndihi cahan ra Jesús tsihin tsa utsi uvi ra tsicá tsihin ra, tacan tan quitá ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

² Tan ra Juan nyii ra vehe caa quivi can, tan ñihi tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús.

Tan cuahan ra naha nu nyii ra.
³ Tan catyí ra naha tsihin ra:

—¿A juvin yooho cuvi ra Cristo tsa nyaa tsa cua quitsi jacacu tsi ndi? O tatun ñavin un cuvi, cuatu ndi tsi inga ra —catyí ra naha tsihin ra Jesús.

⁴ Nacahan ra Jesús tan catyí ra:

—Cuaahan ndo tan catyi tuhun ndo tsihin ra Juan tandihi tsa nyehé ndo, tan tsa tsiñi ndo.

⁵ Tan catyi ndo tsihin ra: nyivi cuaa nanyehé ñi, nyivi coxo nacacá ñi, nyivi ndohó cuehe tyaahyú nduvahá ñi, nyivi soho nacuñi ñi, tan nandotó nyivi tsa tsa tsihi, tan nyivi ndaahvi tsiñi ñi tuhun Nyoo nácaa cua cacu ñi.

⁶ Tan catyi ndo tsihin ra tyin sii xaan cua cuvi tsi nyivi tsa nyicún tsi yu tun ña ndu uvi iñi ñi —catyí ra Jesús tsihin ra naha.

⁷ Tsa cuahan ra naha, tan quitsaha caahan ra Jesús tuhun ra Juan tsihin nyivi, tan catyí ra:

—Quivi tsa tsahan ndo tsinyehé ndo nu tsiqui, ¿náa cua nyehe ndo cuñi maa ndo? ¿A nyehe ndo iin ndoo tsa janduvá tatyí?

⁸ ¿O náa cuvi tsa tsinyehé ndo? ¿A iin ra nditsí jahma vaha cua nyehe ndo? Ñavin. Tyin tsitó ndo tyin ra nditsí jahma vaha, iyó ra vehe ra cuvi rey.

⁹ ¿A ña tsahan ndo tsinyehé ndo tsi iin ra cuvi ndusu yuhu Nyoo? Juvin. Tyin ra ican

cahnu ca cuví ra tan ñavin ca tandihí ra cuví ndusu yuhu Nyoo.

10 Juvín ñi tuhun ra Juan cuví tsa nyaá nuu tutu Nyoo. Tan catyí tsi tyehen:

Yuhu cua jacuhun yu iin ra cahan tuhun yu tsa ndi cumañi ca cuhun yu.

Tyin natyiso vaha ra ityi nu cua cuhun un.

11 'Tsa nditsa catyí yu tsihin ndo, tyin tsitsi tsa tandihí nyívi tsa tsicoo tan nyívi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyívi. Maa tyin ra tsa ndaca ñaha Nyoo añima, vasu ra lihli ñi cuví ra, cahnu ca ra cuví ra tan ñavin ca ra Juan.

12 'Nda cuando quívi tsa tsaá ra Juan tan nda vityin, nyívi ñihi iñi, nducú xaan ñi cuhva ñihi ñi tsa cundaca ñaha Nyoo tsi ñi.

13 Ra Moisés cahan ra tuhun nácaa cua cundaca ñaha Nyoo tsi nyívi, tan tacan tucu tandihí ra cuví ndusu yuhu Nyoo. Tacan tan quítsi ra Juan jacoto ra tsi nyívi tyin tsa tsaá quívi tsa cua cundaca ñaha Nyoo.

14 Tan ra Juan cuví ra Elías ra tsa nyaá tsa cua quítsi, tun nyooho tan cuñi ndo tsinu iñi ndo tsa caahán yu.

15 Nyooho tsa iyó soho, tyaa soho ndo tsa caahán yu.

16 '¿Náa tsihin jandu inducu yu tsi nyooho, nyívi tsa iyó quívi ihya? Tumaa ra nyihi cuví nyooho. Tyin ra nyihi jasiqui nuyahvi. Caná tsaahan ra naha tan catyí ra naha:

17 "Tiví ndi tiyoo tan ña tsañi ndo yaa. Tan tsita ndi yaa cuihya, tan ña tsacundo", catyí ra nyihi. [Tan tacan cuví nyooho tyin ndi intuhun cuhva ña taahán iñi ndo.]

18 Tyin ra Juan, ra jacoondutyá, quítsi ra tan ña tsatsi vaha ra, tan ña tsihi ra vinu. Tan nyooho catyí ndo tyin tatyí ña vaha yihí tsi ra.

19 Yahá can tan tsaá tucu yuhu Rayi tsa quee nda gloria. Tan tsatsi yu tan tsihi yu. Tan catyí ndo tyin tsatsi xaan yu tan tsihi xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyívi naquihín tuhun caahán yu tan tuhun cahan ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyí ra Jesús.

Nyívi ña cuñi naquihin cuenda tuhun caahán ra Jesús cua nyehe ñi tundoho

(Lc. 10.13-15)

20 Tacan tan quítsaha caahán ra Jesús tsihin nyívi tandihí ñuu nu javahá ra cuaha tsa iyo, tyin ña nasama ñi cuhva iyó ñi, tan catyí ra:

21 — ¡Ndahvi nyooho, nyívi ñuu Corazin! ¡Ndahvi nyooho nyívi ñuu Betsaida! Tyin nyehé ndo tsa iyo tsa javahá yu tan ña nasama ndo cuhva iyó ndo. Tan ñuu Tiro tan ñuu Sidón nduve tsa nyehe ñi.

Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuihya iñi tan cua coso ñi nyaa nuu ñi: tyin ndu uvi iñi ñi cuatyí ñi.

²² Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón.

²³ Tan nyooho nyivi ñuu Capernaum, cuñí maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihi anyaya. Tun tsatyin tsicoo tsa iyo nyehe ñi ñuu Sodoma tumaa tsa nyehé ndo ihya, ñuu can ña tsinaa tsi tan iyó tsi nda cuanda vityin.

²⁴ Maa tyin catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi nyooho tan ñavin ca nyivi ñuu Sodoma.

*“Cuhva ndo tsi ndo tsi yu, tan cuhva yu tsa quitatu ndo”,
catyí ra Jesucristo
(Lc. 10.21-22)*

²⁵ Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayivi. Tyin tyihí xeehe un tuhun ihya nuu ra tsitó xaan tan ra nyityi xaan naha ra. Tan jandunditsi un tuhun ihya nuu ra nyihi.

²⁶ Tacan Tyaa, tyin tacan cuñí maa un —catyí ra Jesús.

²⁷ Tacan tan catyí tucu ra tsihin nyivi:

—Jutu yu nacuhva cuenda ra tandihi tsa iyó tsi ra tsi yu. Yoñi maa nacotó tsi yu tsa

nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñí yu tsa nacoto tsi Jutu yu, cua janaha yu tsi ra tsi ñi.

²⁸ Tandihí nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa quitatu ndo.

²⁹ Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo.

³⁰ Ña yí tsa cuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

12

*Quivi quitatú nyivi cuví tsi tan ra tsicá tsihin ra Jesús tuhún ra naha yoco itya trigu
(Mr. 2.23-28; Lc. 6.1-5)*

¹ Iin quivi quitatú nyivi, yahá ra Jesús mahñu nu iyó tsa tatsi nyivi. Tan tsaá soco tsi ra tsicá tsihin ra. Tan quitsahá tuhún ra naha yoco trigu can tan tsatsí ra naha.

² Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quivi quitatú yo —catyí ra naha tsihin ra.

³ Tan ra Jesús catyí ra tsihin ra naha:

—¿A ñaha ca cahvi ndo tsa javaha ra David tsihin ra cuctahan tsihin ra quivi tsa tsaá soco tsi ra naha?

⁴ Quivivi ra tsitsi vehe Nyoo, quihin ra paan ii, tan tsatsi ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can.

⁵ ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quivi quitatú yo? Tan ñavin cuatyí cuví can.

⁶ Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu.

⁷ Nyooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñi ca yu javaha ndo cuví tsa cundaahvi iñi ndo nyehe ndo tsi nyivi tahan ndo, tan ñavin ca tsa cahñi ndo quiti tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyivi tsa nduve cuatyí.

⁸ Yuhu, Rayii tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

Nu janduvaha ra Jesús tsi iin ra na ityi ndaha

(Mr. 3.1-6; Lc. 6.6-11)

⁹ Tacan tan quita ra Jesús ican, tan cuahán ra vehe ñuhu.

¹⁰ Tan ican nyii iin ra tsa na ityi ndaha. Tan yucú tucu juhva ra nducú cuhva nácaa

tan tyaa ra naha cuatyí tsi ra Jesús. Yacan cuenda tsica tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyivi cuuhvi quivi quitatú yo? —catyí ra naha tsihin ra Jesús.

¹¹ Tan nacahan ra Jesús tan catyí ra:

—¿Ndáa nyooho, tatun canacava iin mbee jana ndo tsitsi iin yavi quivi quitatú yo, a ña cua cuhun ndo tan tava ndo tsi ti?

¹² Tan ¿a ña nyaá yahvi ca iin nyivi tan ñavin ca mbee? Yacan cuenda taahán tsi javaha yo tsa vaha quivi quitatú yo —catyí ra.

¹³ Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvaha tsi tumaa inga tsiyo.

¹⁴ Tacan tan quita ra fariseo naha ra cua natuhun tahan ra naha nácaa cua cahñi ra naha tsi ra Jesús.

Tsa cahan ra Isaías, ra cuví ndusu yuhu Nyoo, tsa cuenda ra Jesús tahan tsanaha

¹⁵ Tsa tsito ra Jesús tyin nducú ra naha tsi ra, quita ra ican. Tan cuaha nyivi tsinyicun tsi ra. Tan maa ra janduvaha ra tsi tandihi ñi cuuhvi.

¹⁶ Tan catyí ra tsihin ñi tyin na ña catyí tuhun ñi yoo ra cuví ra.

¹⁷ Tacan cuví tyin tacan cahan ra Isaías, ra cuví ndusu yuhu Nyoo tahan tsanaha.

Tan tyehen tyaa ra tuhun Nyoo:

18 Ra ihya cuví musu yu, ra tsa nacatsi vaha yu.

Cuñí xaan yu tsi ra, tan sii xaan cuñí yu tsihin ra.

Cua kuhva yu Tatyí Ii yu tsi ra.

Tan cua jacoto ra tsi nyivi tsa ñavin nyivi Israel cuví, nácaa cua janduvaha yu tsi ñi nuu yu.

19 Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

20 Tan ndi intuhun ndoo yacua, tan ña cua cahnu ndihi ra.

Tan ndi ña cua ndahva ndihi ra tiñuhu lihli nu caná luxu yuhma.

Nda cuanda coto tandihi nyivi tyin maa ra cuví ra ndacá ñaha tsi ñi.

21 Tan tandihi nyivi, tan cua cuita iñi ñi tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo (Mr. 3.20-30; Lc. 11.14-23; 12.10)

22 Tacan tan tsindacá nyivi tsi iin ra yihí tatyí ña vaha nu nyii ra Jesús, cuaa ra tan ñihi ra. Tan ra Jesús janduvaha ra tsi ra. Tacan tan nacahan ra, tan nanyehé ra.

23 Iyo xaan cuñí tandihi nyivi, tan catyí ñi:

—¿A ñavin ra ihya cuví tata ra rey David? —catyí ñi.

24 Tan kuhva tsa tsiñi ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá

ra ihya tatyí ña vaha —catyí ra naha.

25 Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihí tyiñu tsa ndacá ñaha ra naha. Tan tatun iin ñuu o tandihí nyivi iin vehe tan cusin ñi, tacan tan cua tiví nu yucú ñi.

26 Tan tacan tucu tatun nu ña vaha tan tava nu juvin ñi tahan maa nu, cuñí tsi catyí tyin ña iin ñi cuví nahnu, tan cundihí tunyee iñi tsa iyó tsi nahnu.

27 Tan nyooho catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa kuhva catyí ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo.

28 Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñí tsi catyí yacan tyin nditsa tyin tsa tsaá kuhva ndacá ñaha Nyoo nu yucú ndo.

29 'Tan ¿yóo cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun kuhñi jihna ra tsi ra can, tacan tan cuví quihin nyaa ra tandihí tsa iyó tsi ra.

30 Nyivi tsa ña nyaá tumañi iñi tsihin yu, ñi xaan iñi tsi yu

cuví ñi. Ñi tsa ña jatyinyee tsi yu tsa caahán yu tuhun Nyoo tsihin nyívi, cuñí tsi catyi tyin ña tsahá ñi tsa coto nyívi tuhun caahán yu.

³¹ Yacan cuenda catyí yu tsihin ndo tyin Nyoo jahá ra tucahnu iñi cuatyí nyívi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí li Nyoo, yacan nditsa, ña cua jaha Nyoo tucahnu iñi tsi ñi.

³² Tan yóo nyívi tsa caahán tsa ndavaha ñi siqui yuhu Rayí tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyívi tsa caahán tsa ndavaha ñi siqui Tatyí li Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayívi ihya, tan ndi inga ñuu ñayívi tsa cua coo.

Tsihin tsa javahá nyívi tan nacoto yo tsi ñi tatun vaha ñi a ña vaha ñi
(Lc. 6.43-45)

³³ Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti tun.

³⁴ ¡Nyooho, nyívi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyívi caquiñi cuví ndo? Tyin tsa quitá tsitsi añima yo, yacan caahán yo.

³⁵ Nyívi vaha, vaha caahán ñi tyin yihí tsa vaha añima ñi. Tan nyívi caquiñi, tsa caquiñi caahán ñi, tyin tsa caquiñi yihí tsitsi añima ñi.

³⁶ Tan yuhu catyí yu tsihin ndo tyin quívi cua tatsi

tuñi Nyoo tsi tandihi nyívi, cua cuhva cuenda ñi tandihi tuhun tsa ña vaha cahan ñi.

³⁷ Tyin tsa cuenda tsa caahán ndo, tan cua catyi Nyoo tun vaha ndo o ña vaha ndo.

Nyívi ña vaha, tsa iyo ñi cuñí ñi nyehe ñi

(Mr. 8.12; Lc. 11.29-32)

³⁸ Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

³⁹ Tan nacahan ra Jesús tan catyí ra:

—Nyívi ña vaha tan nyívi tsa nyicún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javaha Nyoo tsihin ra Jonás ra cuví ndusu yuhu ra tahan tsanaha.

⁴⁰ Tyin tumaa tsinyij ra Jonás tsitsi tyaca cahnu uñi quívi tan uñi tsacuaa, tacan cua cunyii yuhu Rayí tsa quee nda gloria tsitsi ñuhu uñi quívi tan uñi tsacuaa.

⁴¹ Tan quívi cua tatsi tuñi Nyoo tsi tandihi nyívi, cua nduvita nyívi tsicoo ñuu Nínive tahan tsanaha tan cua catyi ñi na tatsi tuñi Nyoo tsi nyooho nyívi tsa iyó vityin. Tan cua catyi ñi tyin cua cunaa ndo, tyin maa ñi tsa cuví ñi ñuu Nínive, nasama ñi cuhva iyó ñi quívi cahan ra Jonás tuhun Nyoo tsihin ñi. Tan ihya nyívi ra cahnu ca cuví

tan ñavin ca ra Jonás. [Tan ña cuñí ndo tyaa soho ndo tsa caahán yu.]

⁴² Tan tacan tucu ñaha tsa tsindaca ñaha ityi Sur, cua nduvita ña quiivi cua cutuñi nyivi tan cua catyi ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahán ra Salomón. Tan vityin cahnu ca ra caahán tsihin ndo tan ñavin ca ra Salomón.

Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo (Lc. 11.24-26)

⁴³ "Tatun iin nu tatyí ña vaha quita nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu:

⁴⁴ "Cunuhu yu nda vehe yu nu quee yu." Tacan tan cuahán nyico nu añima nu quee nu. Tan nyehe nu tyin ndi xaan, tan yoñi iyó, tan sii xaan caá.

⁴⁵ Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuvi tsi nyivi quiñi iyó —catyí ra Jesús.

Nu tsaha cuenda ra Jesús tyin tumaa cuvi yañi ra, tan tu-

maa cuvi sihi ra, cuvi tsi nyivi tsa javahá cuhva cuñi Nyoo (Mr. 3.31-35; Lc. 8.19-21)

⁴⁶ Ndi caahán ca ra Jesús tsihin nyivi, tan tsa sihi ra tan yañi ra, tan nyecú ñi ityi tsata vehe, tan cuñi ñi cahan ñi tsihin ra.

⁴⁷ Tacan tan jacoto iin ra tsi ra Jesús, tan catyí ra:

—Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

⁴⁸ Tan nacahán ra Jesús tan catyí ra tsihin ra can:

—¿Yóo cuvi sihi yu tan yóo cuvi yañi yu? —catyí ra.

⁴⁹ Tacan tan janaha ndaha ra nu nyecú ra tsicá tsihin ra, tan catyí ra:

—Ra ihya naha ra cuvi sihi yu tan yañi yu.

⁵⁰ Tyin tandihi nyivi tsa javahá cuhva cuñi Jutu yu, ra nyaá gloria, juvin ñi can cuvi yañi yu, tan cuhva yu, tan sihi yu —catyí ra Jesús.

13

Nu caahán ra Jesús tyin tumaa iin ra tatsí, tacan cuvi ra caahán tuhun Nyoo

(Mr. 4.1-9; Lc. 8.4-8)

¹ Quiivi can quita ra Jesús vehe nu nyii ra tan cuahán ra, tsicunya ra yuhu miñi.

² Tan cuaha xaan nyivi ndu iin nu nyaá ra, yacan cuenda quihvi ra tsitsi iin yutun ndoo tan tsinya ra. Tan tandihi nyivi ndoo ñi yuhu ndutya.

³ Tacan tan quitsaha jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quitá iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra.

⁴ Tan cuhva tsa quití ra tsiti can, cucoyo juhva tsi yuhu ityi. Tan quítsi saa tan tsatsi ti tsiti can.

⁵ Tan juhva ca tsiti can cucoyo tyañu yuu nu ña cuaha nyahyu yihí. Tan ican cana tsiti can tsa numi ñi tyin ña cuaha nyahyu yihí tyañu yuu can.

⁶ Maa tyin cuhva tsa cana ñicanyii, numi ñi na ityi tsi, tyin ña cunu yihí yoho tsaha tsi.

⁷ Juhva ca tsiti can cucoyo tyañu iñu. Tan quivi cana trigu can tsahnü tsi iin caa ñi tshin iñu can, tan iñu can numi xaan ca tsahnü tsi tan tsahnü tsi trigu can.

⁸ Maa tyin juhva ca tsiti can cucoyo nu ñuhu vaha. Tan quivi tsahnü tsi, vaha xaan tsaha tsi tsiti. Tyin tsa iin tsiti can, cientu tsiti quitá tshin tsi. Tan inga tsiti can, uñi xico, tan inga tsi oco utsi tsiti tsaha tsi.

⁹ ;Tatun nyaá soho ndo, tyaa soho ndo tuhun caahán yu! —catyí ra Jesús.

Nu catyí tuhun ra Jesús nacuenda jacuahá ra tsi nyivi tan ña catyí tuhun catsi ra tshin ñi

(Mr. 4.10-12; Lc. 8.9-10)

¹⁰ Tacan tan natuhva ra tsicá tshin ra Jesús, tan tsicá tuhun ra naha tsi ra, tan catyí ra naha:

—¿Nacuenda tyin tshin cuhva ñi jacuahá un tsi nyivi,

tan ña catyí tuhun catsi un tshin ñi? —catyí ra naha.

¹¹ Tan nacahan ra Jesús tan catyí ra:

—Tsi nyooho jacotó Nyoo tuhun xeehe, cuhva ndacá ñaha ra, maa tyin nyivi ihya ña cuví coto ñi tsa tsaha Nyoo tsi nyooho.

¹² Tyin tandihi nyivi tsa cutuñi iñi tsa caahán yu tan javahá ñi, cuaha ca cua cutuñi iñi ñi. Tan nyivi tsa ña cutuñi iñi, tan ña cuñi ñi javaha ñi, cua quihin nyaa ndihi yu tsa luxu ñi tsa tsitó ñi.

¹³ Yacan cuenda caahán yu tshin ñi tshin cuhva, tyin nyehé ñi tan cuví tsi tumaa tsa ña nyehé ñi. Tsiñi ñi maa tyin ña cutuñi iñi ñi, tumaa tsa ña tsiñi ñi cuví can.

¹⁴ Tyin tacan tan cundaa tsa cahan ra Isaías ra cuví ndusu yuhu Nyoo tshan tsanaha, tan catyí ra:

Tsa nditsa tyin nyooho tsiñi ndo tuhun yu, maa tyin ña cutuñi iñi ndo.

Cua nyehe ndo tsa javahá yu, tan ña cua cutuñi iñi ndo.

¹⁵ Tyin tsa ndundava xaan añima nyivi ihya,

tan ña catsi vaha tsiñi ñi.

tan ndasí tinuu ñi,

na ña cua nyehe ñi tshin tinuu ñi,

tan ña cua cuñi ñi tshin soho ñi.

Tan ndi ña cua cutuñi iñi ñi tshin añima ñi.

Tan ndi ña cua nanducu ñi tsi yu, na janduvaha yu tsi ñi.

16 Maa tyin s̄i xaan cuví tsi nyooho, tyin nyehé ndo tsihin tinuu ndo, tan tsiñí ndo tsihin soho ndo.

17 Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyívi vaha, cuñí ñi nyehe ñi tsa nyehé nyooho tsa javahá yu, maa tyin ña nyehe ñi. Tan cuñí ñi tyaa soho ñi tandihí tsa tsiñí nyooho vityin, maa tyin ña tsiñí ñi.

Nu catyí tuhun ra Jesús tsa cuñí tsi catyí cuhva tsa cahan ra tsihin nyívi tsa cuenda ra tatsi can

(Mr. 4.13-20; Lc. 8.11-15)

18 Tyaa soho ndo tsa cuñí tsi catyí cuhva tsa cahan yu tsa cuenda ra tsa tatsí tsiti trigu can:

19 Nyívi tsa tsiñí tuhun nácaa cuñí Nyoo cundaca ñaha ra añima ñi, tan ña cutuñí iñi ñi, cuví ñi tumaa nu cucoyo tsiti trigu yuhu ityi. Tan quítsi nu ña vaha tan quihín nyaa nu tuhun Nyoo tsa iyó añima ñi.

20 Tan tumaa nu cucoyo tsiti can tyañu yuu, juvin ñi nyívi tsa tsiñí tuhun Nyoo cuví can. Tan s̄i xaan naquihín vaha ñi itsi juhva ñi quívi.

21 Tyin nduve ñuhu cunu ican, yacan cuenda cana tsiti can, maa tyin ña cuví juhun yoho tsi. Tan tacan cuví nyívi can. Juhva ñi quívi tsinú iñi ñi. Maa tyin quívi tsa quítahá nyehe ñi tundoho, tan caahán ndasi nyívi tsata ñi tsa

cuenda tuhun Nyoo, tacan tan jandihí ñi tsa tsinú iñi ñi.

22 Tan tumaa nu cucoyo tsiti can tsitsi iñu, juvin ñi nyívi tsa tsiñí tuhun Nyoo cuví can. Tsiñí ñi, maa tyin ña cuñí ñi javaha ñi tumaa tsiñí ñi. Tyin tyaa xaan ca iñi ñi tundoho ñayívi tan ñavin ca tuhun Nyoo. Tan nyiyo ca iñi ñi tsa cuca. Tan tandihí tuhun can jatyañú tsi tsi ñi, tan cuví ñi tumaa yutun tsa ña tsahá tsiti.

23 Tan ñuhu vaha nu cucoyo tsiti can, yacan cuví inga nyívi tsa tsiñí tuhun Nyoo, tan cutuñí iñi ñi, tan javahá ñi tandihí tuhun caahán ra. Yihí ñi cuví ñi tumaa tsiti tsa cana tan tsaha tsi iin cientu tsiti, tan inga ñi cuví ñi tumaa tsiti tsa tsahá uñi xico, o tumaa tsiti tsa tsahá oco utsi tsiti in-tuhun intuhun.

Nu caahán ra Jesús nácaa cuahán tuhun trigu tan cuhu ña vaha

24 Tan cahan tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyívi cuví tsi tumaa iin ra tsa tatsí tsiti trigu nu ñuhu ra.

25 Tan cuhva tsa quixí tandihí ra jahá tyiñu naha ra, quihví iin ra xaan iñi tsi ra jatsii can, tan quítí ra tsiti cuhu ña vaha, tan cuahán ra.

26 Tan quívi cana tsiti trigu can, tan cana yoco tsi, cana ndihí tucu cuhu ña vaha can.

27 Tacan tan ra cuví musu can naha ra, tsahan ra naha tsicatyí tuhun ra naha tsihin tsitoho ra naha: “Tata, maa ñi tsiti trigu tatsí ndi, ¿tan

nacuenda tyin cana cuhu ña vaha can?" catyí ra naha.

²⁸ Tan nacahan ra can tan catyi ra: "Iyó iin ra xaan iñi tsi yu javaha tsehe, tun cuvi." Tacan tan musu can, catyí ra naha tsihin tsitoho ra: "¿A cuñí un tyin cuhun ndi tan tuhun ndi cuhu ña vaha can?"

²⁹ Tan tsitoho ra naha catyí ra: "Ña tuhun ndo, tyin coto tuhun ndihi ndo trigu can.

³⁰ Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihi vaha ra naha tsa vaha can tsitsi yaca yu."

Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo

(Mr. 4.30-32; Lc. 13.18-19)

³¹ Tacan tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa iin tsiti mostaza tsa tatsi iin ra nu ñuhu ra.

³² Tyin tsiti can lihli ñi tsi tan ñavin ca tandihi ca tsiti. Maa tyin quivi tsahnu tsi cuví tsi iin yutun. Tan quitsi saa, tan javahá ti taca ti soco tun —catyí ra Jesús.

Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo

(Lc. 13.20-21)

³³ Tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndaá tandihi yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

Nu catyi tuhun ra Jesús nacuenda jacuahá ra tsi nyivi tsihin cuhva

(Mr. 4.33-34)

³⁴ Tandihi tuhun can cahan ra Jesús tsihin nyivi tsihin cuhva. Tan tandihi tsa cahan ra tsihin ñi ña cahan catsi maa ra, maa ñi maa tsihin cuhva cahan ra.

³⁵ Tacan cuvi tyin tacan tan cundaa tsa cahan Jutu Mañi yo tsihin yuhu ra cuvi ndusu yuhu ra tahan tsanaha tan tyaa ra tyehen:

Tsihin cuhva cua cahan yu tsihin nyivi.

Cua cahan yu tsihin ñi tuhun tsa yihí xeehe nda cuanda tsa javaha Nyoo ñuhu ñayivi.

Nu caahán ra Jesús náa cuñí tsi catyí cuhu ña vaha tsa caná tsihin tsiti trigu can

³⁶ Tacan tan jacunuhu ra Jesús tsi nyivi, tan quihvi ra tsitsi vehe nu nyii ra. Tan natuhva ra tsicá tsihin ra nu nyaá ra, tan catyí ra naha tsihin ra:

—Catyi tuhun tsihin ndi náa cuñí tsi catyi tsa cahan un tsihin nyivi tsa cuenda cuhu ña vaha tan trigu can.

³⁷ Tacan tan quitsaha catyí ra Jesús tsihin ra naha:

—Ra tsa tatsi tsiti trigu can cuví yuhu Rayi tsa quee nda gloria.

³⁸ Tan ñuhu can cuví nyivi iyó nu ñuhu ñayivi. Tan tsiti trigu can cuví nyivi tsa ndacá ñaha Nyoo. Tan cuhu ña vaha can cuví nyivi tsa nyicún tsi nu ña vaha.

³⁹ Tan nu tsa tatsi cuhu ña vaha can, nu ican cuví nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñi tsi catyí quivi cua cundihi ñuhu ñayivi. Tan ra tsa cua naquihin tsiti can, cuví ra ángel naha ra.

⁴⁰ Tumaa jataca ra naha cuhu ña vaha can tyin cayu tsi, tacan cua cuvi quivi cua cundihi ñayivi.

⁴¹ Yuhu Rayi tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí.

⁴² Tan cua tyihi ra naha tsi ñi tsitsi ono nu cayú ñuhu. Tan ican cua vacu tsaa ñi tan cahyu ña cua cuvi nuhu ñi.

⁴³ Nyooho tan nyivi javahá cuhva cuñi Nyoo cua quituvi ndo nuu Jutu yo. Tan cua cuvi ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaa soho ndo tsa caahán yu.

Xuhun cuaan tsa yihí xeehe

⁴⁴ Tsa ndacá ñaha Nyoo tsi nyivi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihí

xeehe nyico ra inga tsaha, tan sii xaan cuñi ra cuanuhu ra tan xico ra tandihí tsa iyó tsi ra. Tacan tan jata ra ñuhu nu yihí xeehe xuhun cuaan can.

Iin cuhva tsa cahan ra Jesús cuenda iin yuu xiñu tsa yahvi xaan nyaá

⁴⁵ Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra,

⁴⁶ tan tsa ñihí ra iin tsa yahvi xaan nyaá, xico ra tandihí maa tsa cumi ra, tan jata ra yuu xiñu vaha can.

Nu caahán ra Jesús iin cuhva cuenda traya

⁴⁷ Tan juvin ñi cuví tucu tsa ndacá ñaha Nyoo tsi nyivi tumaa iin traya tsa cañi ra naha nu ndutya ñuhu, tan ñihí ra naha tandihí nuu tyaca.

⁴⁸ Tan tsa tsitu traya can tsihin tyaca, tavá ra naha traya can nu ityi. Tan ican nacatsi ra naha tsi ti, naquihín vaha ra naha quiti vaha tsitsi iin tyica, tan javitá ra naha quiti ña vaha can.

⁴⁹ Tan tacan cua cuvi quivi naa ñayivi, cua quitsi ángel, quitsi tava sijn ra naha tsi nyivi vaha tan nyivi ña vaha.

⁵⁰ Tan cua tyihi ra naha tsi nyivi ña vaha can anyaya nu cayú ñuhu, nu cua vacu tsaa ñi tan cahyu ña cua cuvi nuhu ñi.

Nu caahán ra Jesús tyin vaha tuhun tsahnu Nyoo tan tuhun tsaa Nyoo

⁵¹ Tacan tan ra Jesús tsica tuhun ra tsi ra tsicá tsihin ra, tan catyí ra tsihin ra naha:

—¿A cutuñi iñi ndo tandihi tsa caħan yu?

Tan nacahañ ra naha tan catyí ra naha:

—Cutuñi iñi ndi, Jutu Mañi yu.

⁵² Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihi ra nácaa ndacá ñaha Nyoo tsihin tandihi tuhun tsa tsa caahán yu, cua cuví ra tumaa iin ra jatsii vehe tan cua jacuaha ra nduvi taahan tuhun vaha can tsi nyívi —catyí ra Jesús.

Nu tsinuhu ra Jesús ñuu Nazaret nu tsahnu ra

(Mr. 6.1-6; Lc. 4.16-30)

⁵³ Tsa ndihi caħan ra Jesús cuhva ihya tan quita ra cuahán ra.

⁵⁴ Tan tsaá nyico ra ñuu ra. Tan quitsaha jacuaha ra tsitsi vehe ñuhu ñuu can. Tan iyo cuñi nyívi tan catyí ñi:

—¿Nu maa tahan cutuhva ra ihya tsa tsitó xaan ra? ¿Tan nácaa cuví javaha ra tsa iyo?

⁵⁵ Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas.

⁵⁶ Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhva ra tandihi tsa tsitó ra? —catyí ñi.

⁵⁷ Tan yacan cuenda ña cuñi ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyívi tandihí ñi ityi jahá ñi tsa ñayívi tsi ra ndusu yuhu Nyoo, maa tyin

nyívi ñuu ra ña tyaa yahvi ñi tsi ra tan ndi nyívi vehe ra —catyí ra Jesús.

⁵⁸ Tan ña cuaha tsa iyo javaha ra ñuu ra tsa cuenda tyin ña tsinú iñi ñi tsi ra.

14

Nu catyí tsi nácaa tsihi ra Juan, ra jacoondutyá tsi nyívi
(Mr. 6.14-29; Lc. 9.7-9)

¹ Quívi can ra Herodes, ra ndacá ñaha nicahnu nu cuví Galilea, ñihí tuhun ra tsa javahá ra Jesús.

² Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyívi, ra tsa tsihi tan vityin nandoto nyico ra. Yacan cuenda iyó tunyee iñi tsi ra tsa javahá ra tsa iyo.

³⁻⁴ Tacan catyí ra tyin juvin ñi maa ra tava tyiñu tyin tiin ra naha tsi ra Juan. Tan cuhñi ra naha tsi ra tsihin cadena, tan tyihi ra naha tsi ra vehe caa. Tacan javaha ra Herodes tyin xaan cuñi ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasihi ra Felipe, yañi ra.

⁵ Yacan cuenda ra Herodes cuñi ra cahñi ra tsi ra Juan, maa tyin yuuhví ra tsi nyívi, tyin tandihí ñi tsinú iñi ñi tyin ra Juan, ndusu yuhu Nyoo cuví ra.

⁶ Tan iin quívi iyó vico ra Herodes, tan sehe ña Herodías quitsaha tsañi ña yaa nu yucú ñi vico can. Tan taħan xaan iñi ra Herodes.

⁷ Tan catyí ra:

—Naha Nyoo tyin cua cuhva yu náa cua ndacan

ñaha tyuvaa ihya tsi yu —catyí ra Herodes.

⁸Tacan tan natyuhu sibi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra ja-coondutyá tsi nyivi, tsi yu nu iin coho —catyí ña.

⁹Tsa tsiñi ra rey Herodes tsa cahan ña, nducuihya cuñí ra. Maa tyin tsa cuenda tsa cahan ra tyin tandihi tsa cua ndacan ña tan cua cuhva ra, yacan cuenda ña cuvi jandaví ñaha ra tyin tandihi nyivi yucú vico can tan tsiñi ñi tsa cahan ra. Yacan cuenda tava tyiñu ra na cuhva ra naha jiñi ra Juan tsi ña nu iin coho.

¹⁰Tan tava tyiñu ra na cuc-ahnya ra naha jucun ra Juan nu nyii ra vehe caa.

¹¹Tacan tan tsindaca ra naha jiñi ra Juan tsi ña, nyii tsi nu iin coho. Tan tsaha ra naha tsi ñaha tyuvaa can. Tan maa ña nacuhva cuenda ña tsi sibi ña.

¹²Tacan tan tsaá ra ny-icun tsi ra Juan naha ra tan naquihin ra naha cuñu ñuhu ra, tan tyihi ra naha tsitsi ñuhu. Yaha can tan tsahan ra naha tsijacoto ra naha tsi ra Jesús.

Nu jacatsi ra Jesús tsi uhun mil rayi

(Mr. 6.30-44; Lc. 9.10-17; Jn. 6.1-14)

¹³Tsa tsito ra Jesús tsa tahan ra Juan, quihin ra iin yutun ndoo, tan cuahan intuhun ñi maa ra nu taxin caa. Tan tsa tsito nyivi, quita

ñi ñuu ñi, tan cuahan tsihin tsaha ñi nu nyii ra.

¹⁴Tsa quita ra Jesús tsitsi yutun ndoo can, tan nyehe ra tyin cuaha xaan nyivi nyicun tsi ra. Tan cundaahvi iñi ra nyehe ra tsi ñi. Tan janduvaha ra tsi nyivi cuuhvi tsa tsaá tsihin ñi.

¹⁵Tan tsa cuñi cuaa, tacan tan natuhva ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca cahan un tsihin nyivi ihya na cunuhu ñi nda ñuu kujata ñi tsa catsi ñi —catyí ra naha tsihin ra Jesús.

¹⁶Tan ra Jesús catyí ra:

—Nduve náa nducu ñi cahun ñi. Cuhva nyooho tsa catsi ñi.

¹⁷Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

¹⁸Tan catyí ra Jesús:

—Ndaca ndo can tsi yu.

¹⁹Tacan tan catyí ra tsihin nyivi tyin na cunyecú ñi nu cuhu can. Yaha tsa tsinyecu ñi tan quihin ra uhun taahan paan can, tan nduvi tyaca can. Tan nanyehenda ra ityi siqui, tan nacuhva ra tyahvi nyoo tsi Nyoo tan tsahnucatyí ra paan can. Tan tsaha ra tsi ra tsicá tsihin ra, na tsatsa ra naha tsi nyivi can.

²⁰Tan tandihi nyivi tsatsi ñi tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi tyica tsihin tsa ñahñu ican.

21 Tan tsa tandihi ñi tsa tsatsi can, quita maa tumaa uhun mil tsa maa ñi maa rayii. Tan siin maa ñiñaha tan tsa nyihi.

Nu tsicá ra Jesús nu ndutya (Mr. 6.45-52; Jn. 6.16-21)

22 Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi.

23 Tsa yaha tsa jacunuhu ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaa.

24 Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañi tsi tsi yutun ndoo can tsa cuenda tyin ñihi xaan yihí tatyí nu cuahán ra naha.

25 Tan tsa cua tuvi cuahán ndihi ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya.

26 Tan cuhva tsa nyehe ra naha tsi ra, tsicá ra nu ndutya can, nayuhvi xaan ra naha. Tan caná tsaa ra naha, tan catyí ra naha:

—jIhna ndo xin. Tatyí vatsi can!

27 Maa tyin nacahan ra Jesús tsihin ra naha, tan catyí ra:

—jÑa nayuhvi ndo tyin maa yu cuví! —catyí ra.

28 Tacan tan nacahan ra Pedro tan catyí ra:

—Jutu Mañi yu, tatun maa un vatsi juvin, cuhva tsa quitsi ndihi yu nu vatsi un.

29 Tan ra Jesús catyí ra tsihin ra:

—Ñaha jiin.

Tacan tan quita ra Pedro tsitsi yutun ndoo can, tan quitsaha tsicá ra nu ndutya tan cuahán ra nda nu vatsi ra Jesús.

30 Maa tyin cuhva tsa tuvi ñi ra tyin ñihi xaan quitsaha yihí tatyí, nayuhvi xaan ra, tacan tan quitsaha cuñi yee ra, tan quitsaha caná tsaa ra tan catyí ra:

—jJacacu tsi yu, Jutu Mañi yu!

31 Tan iin yaha ñi tñin ra Jesús ndaha ra, tan catyí ra tsihin ra:

—¿Nacuenda tsa nayuhvi un, yooho tsa luxu xaan tsinú ñi tsi yu? —catyí ra Jesús tsihin ra.

32 Tan cuhva tsa quihvi ra naha tsitsi yutun ndoo can, cutaxin tatyí can.

33 Tacan tan ra yucú tsitsi yutun ndoo can tsicuiñi tsi ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

Nu janduvaha ra Jesús tsi nyivi cuuhvi tsa iyó Genesaret (Mr. 6.53-56)

34 Tsa yaha sava ra naha miñi can, tsaa ra naha ñuhu Genesaret.

35 Tan cuhva tsa nacoto nyivi iyó ican tsi ra Jesús tyin juvin ra cuví, jacoto ñi tsi tandihi nyivi iyó tani cahnu

can. Tan tsindacá ñi tandihi nyiví cuuhví nu nyíi ra.

³⁶ Tan caahán ndaahvi ñi tsihin ra, na cuhva ra tsa tñn ñi vasu luxu jahma ra. Tan tandihi ñi tsa tñn jahma ra, nduvahá ñi.

15

Tsajativí tsi nyiví nuu Nyoo
(Mr. 7.1-23)

¹ Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyíi ra Jesús tan tsicá tuhun ra naha tsi ra, tan catyí ra naha:

² —¿Nacuenda ña javahá ra tsicá tsihin un naha ra cuhva nacoó tsii tsaahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyí ra naha.

³ Tan tsicá tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñí ndo tyaa yahvi ndo tsa caahán Nyoo?

⁴ Tyin Nyoo catyí ra: “Tyaa yahvi ndo tsi jutu ndo tan tsi sihi ndo, tyin tandihi nyiví tsa caahán ndavaha ñi siqui jutu ñi o sihi ñi, cua cúu ñi”, catyí Nyoo.

⁵ Maa tyin nyooho catyí ndo tyin cuví catyí ndo tsihin jutu ndo o tsihin sihi ndo tye-hen: “Ña cuví jatyinyee yu tsi un tyin tsa tsahá yu tandihi tsa iyó tsi yu tsi Nyoo.”

⁶ Tatun tsa catyí ndo yacan, ña cuñí tsi tsa jatyinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo.

⁷ ¡Nyooho cuñí ndo tyin vaha xaan ndo, maa tyin ña nditsa ndo! Nditsa tsa cahan ra Isaías, ra cuví ndusu yuhu Nyoo, siqui ndo jahá Nyoo. Tan catyí ra tye-hen:

⁸ Nyiví ihya, jacahnú ñi tsi yu tsihin yuhu ñi.

Maa tyin ñavin tsihin tsa ñi iñi ñi.

⁹ Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jahá Nyoo, catyí ra Jesús tsihin ra ican naha ra.

¹⁰ Tacan tan caná ra Jesús tsi nyiví tan catyí ra tsihin ñi:

—Tyaa soho ndo tsa caahán yu, tan nducu ndo cuhva cutuñi iñi ndo.

¹¹ Tyin nyiví tsa tiví nuu Nyoo, ñavin tsa quihví yuhu ñi jativí tsi ñi. Tyin tiví ñi jahá tsa quitá yuhu ñi.

¹² Tacan tan natuhva ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñí ra naha tsa tsiñi ra naha tsa cahan un.

¹³ Tan maa ra Jesús nahan ra tan catyí ra:

—Tandihí yutun tsa ña tatsí Jutu yu, ra nyaá gloria, cua

tuhun ra nda cuanda yoho tun.

¹⁴ Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

¹⁵ Tacan tan quitsaha catyí ra Pedro tsihin ra Jesús:

—Catyi tuhun tsihin ndi náa cuñí tsi catyi tsa cahān un nañi.

¹⁶ Tacan tan ra Jesús catyí ra tsihin ra naha:

—Ndi nyooho tan ña cutuñí ndihí iñi ndo.

¹⁷ ¿A ña cutuñí iñi ndo tyin tsa tsatsí yo, tsitsi yo cuahán tsi? Yaha can tan cua quita nyico tsi.

¹⁸ Maa tyin tuhun tsa quitá yuhu yo, tsitsi añima yo queé can tan nyivi tiví ñi nuu Nyoo jahá tsa caahán ñi.

¹⁹ Tyin tsa caquiñi tsicá iñi ñi tsitsi añima ñi quitá can, tan cuñí ñi cahñi ñi nyivi. Cuñi ñi suhu ñi. Yihí nyivi caahán ñi cuendu, o jacuñí nyaa ñi tsi inga ca nyivi. Yihí ra cuñí ra coo inga ñaha ra, o ñiñaha iyó yñi tsicá nuu ñi tsihin inga rayii. Yihí ra tsicoó ra tsihin ñaha tan ña tindaha ra tsihin ña. Tan yihí rayii quixí ra tsihin juvin ñi maa rayii. Tan ñiñaha yihí ñi quixí ñi tsihin juvin ñi maa ñaha. Tan tandihí ca maa tsa caquiñi tsa javahá ñi tsihin cuñu ñuhu ñi.

²⁰ Yacan cuví tsa jatíví tsi nyivi nuu Nyoo. Tyin tsa ña nacatyá ñi ndaha ñi tsa ndi

cumañi ca catsi ñi, ña jatíví can tsi ñi —catyí ra Jesús.

Nu tsinu iñi iin ñaha inga ñuu tsi ra Jesús

(Mr. 7.24-30)

²¹ Quita ra Jesús ñuu can tan cuahán ra ityi ñuu Tiro tan Sidón.

²² Tan ityi can iyó iin ñaha Canaán. Tan tsa nyehe ña tsi ra Jesús natuhva ña nu nyaá ra tan caná tsaa ña tan catyí ña:

—Jutu Mañi yu, tata ra David, cundaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

²³ Maa tyin tumaa tsa ña tsiñi ñi ra Jesús jahá ra tsi ra tan ña nacahan ra tsa iin yaha ñi. Tacan tan natuhva ra tsicá tsihin ra tan catyí ra naha tsihin ra:

—Cahan tsihin ña na cunuhu ña tyin utsan xaan yo tsa caná tsaa ña tsata yo.

²⁴ Tacan tan catyí ra Jesús tsihin ra naha:

—Vatsí yu jaha Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

²⁵ Tan ñaha can natuhva ña nu nyaá ra tan tsicuiñi tsiti ña nuu ra, tan catyí ña tsihin ra:

—Jutu Mañi yu, jatyinyee tsi yu!

²⁶ Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

27 Maa tyin ña ndasi cuñí ña tsa cahān ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyo xuu mesa tsitoho ti —catyí ña.

28 Tacan tan catyí ra Jesús tsihin ña:

—Yooho ñaha, tsinú xaan iñi un tsi yu. Na cuvi maa cuhva tsicá iñi un.

Tan juvin ñi cuhva can tan nduvahā sehe ña.

Nu cuaha xaan nyivi cuuhví janduvahā ra Jesús

29 Tsa yahā yacan tan ra Jesús cuahán ra ityi yuhu miñi Galilea, tan ndaa ra iin jiñi yucu tan ícan tsinyaa ra.

30 Tan cuaha xaan nyivi cuahán ñi nu nyaá ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñiñhi ñi, lundu ñi. Tan yihí ñi yihí inga ca nu cuehe tsi ñi. Tan tsaquín nyecu ñi tsi tandihi ñi cuuhví can nu nyaá ra Jesús. Tan janduvahā ra tsi ñi.

31 Tan iyo xaan cuñí nyivi can nyehé ñi tyin nacahān ñi ñiñhi tan nduvahā ñi lundu, tan nacacá ñi coxo, tan nanyehé ñi cuaa. Tan quitsahā jacahnu xaan ñi tsi Nyoo ñi, tsa cuví ñi nyivi Israel.

Nu tsahá ra Jesús tsa catsi cumi mil rayi

(Mr. 8.1-10)

32 Tacan tan canā ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyivi ihya, tyin

tsa uñi quivi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

33 Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyivi cuaha ihya, tyin ihya nduve nyivi iyó?

34 Tacan tan ra Jesús tsicā tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

35 Tan catyí ra tsihin nyivi na cunyecu ñi nu ñuhu.

36 Tacan tan quihīn ra tsa utsa paan can tan tyaca can, tan nacuhvā ra tyahvi nyoo tsi Nyoo. Tan quitsahā tsahnú cuatyí ra paan tsihin tyaca, tan tsahā ra tsi ra tsicá tsihin ra tyin na tsatsa ra naha tsi nyivi.

37 Tandihī ñi tsatsī ñi, tan ndahā vaha iñi ñi. Tan tsa ndihī tsatsī ñi tan naquihīn ra naha tsa ñahñu tsa ndoo can tan quita utsa tyica cuví tsi.

38 Tan ra tsa tsatsī can naha ra quita maa cumi mil ra naha tan sīn maa ñiñaha tan tsa nyihi.

39 Yahā can tan jacunuhū ra tsi ñi, tan quihvī ra tsitsi yutun ndoo, tan cuahán ra ityi Magdala.

16

Ra cuví fariseo naha ra tan ra cuví saduceo naha ra tsicán

ra naha tsi ra Jesús na javaha ra iin tsa iyo

(Mr. 8.11-13; Lc. 12.54-56)

¹ Tacan tan ra fariseo naha ra tan ra saduceo naha ra tsahan ra naha nu nyii ra Jesús, tyin cuñí ra naha nducu cuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo.

² Maa tyin nacahan ra Jesús tan catyí ra tsihin ra naha:

—Tsa cueñi, tuhvá ndo catyí: “Siñ xaan caa ityaan cua cuvi tyin cuaaha xaan nu vico”.

³ Tan tsa tsvi catyí tucu ndo tyin ña siñ maa caa cua cuvi, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha?

⁴ Nyivi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñí ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuví tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

Tuhun caahán ra fariseo naha ra cuví tsi tumaa yutsan iya

(Mr. 8.14-21)

⁵ Cuhva tsa yaha ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha.

⁶ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

⁷ Tacan tan quitsaha natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

⁸ Tan tsa tsvi iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo?

⁹ ¿A ñaha ca cutuñi iñi ndo? ¿A ña nducuhún iñi ndo quivi tsa jacatsi yu tsi uhun mil rayi tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can?

¹⁰ ¿A tsa naa ndihi tucu iñi ndo quivi tsa jacatsi yu cumi mil rayi, tan najava taahan tyica jacutu ndo tsihin tsa ndoo tsa utsa taahan ñi paan?

¹¹ ¿Nacuenda ña tsvi iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

¹² Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

Nu catyí ra Pedro tyin ra Jesús cuví ra Cristo, ra jacacú tsi yo

(Mr. 8.27-30; Lc. 9.18-21)

¹³ Cuhva tsa tsaá ra Jesús ityi ñuu Cesarea Filipo, tsicá tuhun ra tsi ra tsicá tsihin ra tan catyí ra:

—¿Náa catyí nyívi? ¿Yóo ra cuví yu, Rayi tsa quee nda gloria? —catyí ra.

¹⁴ Tan nacahan ra naha tan catyí ra naha:

—Yihí nyívi catyí ñi tyin ra Juan ra jacoondutyá tsi nyívi cuví un. Tan inga nyívi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahan tsanaha cuví un.

¹⁵ Tacan tan catyí ra tsihin ra naha:

—Tan nyooho, ¿yóo ra cuví yu, catyí ndo?

¹⁶ Tacan tan nacahan ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

¹⁷ Tan nacahan ra Jesús tan catyí ra:

—Sií xaan cuví tsi yooho, Simón, sehe ra Jonás, tyin ñavin nyívi janaha tuhun ihya tsi un, tyin maa Jutu yu, ra nyaá gloria janaha tsi un.

¹⁸ Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi.

¹⁹ Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu

ñuhu ñayívi, tsa nuuhñi jaha Nyoo nda gloria. Tan tandihi tsa ndatsi un ihya nu ñuhu ñayívi, tsa ndatsi maa Nyoo nda gloria.

²⁰ Tacan tan catyí ra Jesús tsihin ra tsicá tsihin ra tyin ña cahan ra naha tsihin nyívi tun juvin ra cuví ra Cristo ra tsa quee nu nyaá Nyoo.

Nu caahán ra Jesús tyin cua cahñi nyívi tsi ra

(Mr. 8.31—9.1; Lc. 9.22-27)

²¹ Nda quívi can quitsaha catyí ra Jesús tsihin ra tsicá tsihin ra, tyin cuñi tsi tsa cahun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quívi cua nandoto ra inga tsaha.

²² Tacan tan quihin ra Pedro tsi ra tan quita sin ra tsihin ra tan quitsaha caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

²³ Tan nanyico coo ra Jesús, tan quitsaha caahán ra tsihin ra Pedro:

—¡Jatsiyo nyaha tsi un, cuhna! Tyin cuñi un casi un tsi yu. Tyin yooho ña tsicá iñi un cuhva cuñi Nyoo, tyin cuhva cuñi nyívi tsicá iñi un —catyí ra.

²⁴ Tacan tan ra Jesús catyí ra tsihin ra tsicá tsihin ra:

—Tatun ndáa nyooho cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Tan ña cua ndu uvi iñi ndo tsa yihí ndo cuenda yu, vasu tandihí quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunyicun ndo tsi yu.

²⁵ Tan nyooho tsa ña cuñí nyehe tundoho, tan ña cuñí ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi ndo tsa cuenda yu, cua cacu ndo.

²⁶ Tyin nduve yahvi nyaá tsa cua ñihi ndo tandihí tsa iyó nu ñuhu ñayivi tun añima ndo tan ña cua cacu tsi. Tyin nduve maa náa tsihin tan cuvi tyahvi ndo tan ña cua cunaa añima ndo.

²⁷ Tyin yuhu, Rayi tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javaha ndo.

²⁸ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

17

Nu nyehe uñi taahán ra tsicá tsihin ra Jesús nácaa tsa

sii caá xiñu ra Jesús nu ndacá ñaha ra nda gloria

(Mr. 9.2-13; Lc. 9.28-36)

¹ Tan tsa yaha iñu quivi, tan quihin ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha.

² Tan ican nasama cuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu.

³ Tacan tan nyehe ra naha tsi ra Moisés tan ra Elías, natuhún ra naha tsihin ra Jesús.

⁴ Tan quitsaha caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñí un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

⁵ Tsitsi tsa caahán ra Pedro, quitsi iin vico tsa xiñu xaan siqui ra naha. Tan tyasi tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan sii xaan cuñí yu tsihin ra. Tyaa yahvi ndo tsa caahán ra —catyí ndusu can.

⁶ Tsa tsiñi ra tsicá tsihin ra Jesús tuhun ihya, tsicava tsihin nuu ra naha nda nu ñuhu, tyin nayuhvi xaan ra naha.

⁷ Tacan tan natuhva ra Jesús nu cayucú ra naha, tan tijn ra tsi ra naha, tan catyí ra:

—Nduvita ndo, tan ña nayuhvi ndo.

⁸ Tan cuhva tsa nanyehe ra naha, intuhun ña ra Jesús nyaá, tan nduve inga uvi ca ra naha.

⁹ Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cahan ndo tsa nyehe ndo ihya tsihin nyivi. Tsa yaha tsa cúu Rayíi tsa quee nda gloria tan nandoto ra, tacan tan cua cahan ndo can —catyí ra.

¹⁰ Tacan tan tsica tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

¹¹ Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihi.

¹² Maa tyin yuhu catyí yu tsihin ndo tyin tsa yaha quitsi ra Elías, tan ña nacoto nyivi tsi ra, tan javaha ñi tsihin ra tandihi cuhva cuñi maa ñi. Tan tacan tucu yuhu, Rayíi tsa quee nda gloria, cua janyehe ñi tundoho tsi yu —catyí ra tsihin ra naha.

¹³ Tacan tan cutuñi iñi ra naha tyin tuhun ra Juan, ra jacoondutya, caahán ra Jesús.

Nu janduvaha ra Jesús tsi iin ra luhlu tsa tsihi naaha jahá tatyí ña vaha

(Mr. 9.14-29; Lc. 9.37-43)

¹⁴ Cuhva tsa tsaá ra naha nu yucú nyivi, natuhvá iin

ra tan tsicuiñi tsihi ra nuu ra Jesús, tan catyí ra tsihin ra:

¹⁵ —Tata, cundaahvi iñi tsi sehe yu, tyin yihí cuehe tsihi naaha tsi ra, tan tuhvá ra nduva ndasava, tan cuaha xaan tundoho nyehé ra jahá cuehe can. Tan yihí tsaha nduvá ra nu ñuhu tan cayú ra, tan nduvá tucu ra nu yihí ndutya.

¹⁶ Tan tsindaca yu tsi ra tsi ra tsicá tsihin un, maa tyin ña cuvi janduvaha ra naha tsi ra —catyí ra.

¹⁷ Tan nacahan ra Jesús tan catyí ra:

—¡Nyooho, nyivi tsa ña tsinú iñi cuví ndo! ¡Tan caquiñi ndo! ¿Ndáa nda quivi cua cunyi yu tsihin ndo? ¿Tan ndáa nda quivi cua cunyeet iñi yu tsihin ndo, tyin nyooho ña tsinú vaha maa iñi ndo tsi yu? Tindaca ndo tsi ra luhlu tsi yu —catyí ra.

¹⁸ Tacan tan tava ra Jesús tsi nu tatyí ña vaha can, tan quitá nu tsi ra luhlu can. Tan juvin ñi cuhva can nduvaha ra.

¹⁹ Tsa yaha can tan tsica tuhun sin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuvi tava ndi tatyí ña vaha can?

²⁰ Tan ra Jesús nacahan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsihi mostaza, cuví catyí ndo tsihin yucu ihya na catsiyo tsi tan cuhun tsi inga ityi, tan

yucu ihya cahun tsi inga ityi. Tan nduve tsa ña cua cuvi javaha ndo tatun nditsa tsa tsinú iñi ndo tsi yu.

²¹ Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

Inga tsaha cahan ra Jesús tsa cua cahñi nyivi tsi ra

(Mr. 9.30-32; Lc. 9.43-45)

²² Yucú ra naha Galilea can, tan ra Jesús catyí ra tsihin ra naha:

—Yuhu, Rayi tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra.

²³ Tan cua cahñi ra naha tsi yu. Maa tyin tsa tsinu uñi quivi tan cua nandoto yu —catyí ra.

Tsa tsiñi ra naha tuhun ihya, cuiihya xaan cuñi ra naha cuvi.

Nu tyahví ra naha cuenda tsa nduvaha vehe ñuhu cahnu

²⁴ Cuhva tsa tsaá ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsahan ra naha tsinyehe ra naha nu nyii ra Pedro tan tsicá tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahví xuhun tsa cuenda vehe ñuhu cahnu? —catyí ra naha tsihin ra Pedro.

²⁵ Tan nacahan ra Pedro tan catyí ra:

—Tuhvá ra.

Tan tsa quihvi ra Pedro tsitsi vehe nu iyó ra naha, jihna ca ra Jesús nacahan tan catyí ra:

—¿Nacaa cuñi yooho, Simón? ¿Yóo tsi quihín ra cuvi rey tsa iyó nu ñuhu ñayivi ihya yahvi? ¿A tsi nyivi ñuu maa ra o tsi inga nyivi?

²⁶ Nacahan ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña taahán tsi tyahvi ñi.

²⁷ Maa tyin ña cuñi yo tsa cahan ra naha siqui yo, yacan cuenda vaha ca tsa cahun un yuhu miñi can, tan jacuhun un yiqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

18

Nu janaha ra Jesús yóo ra cahnu ca cuvinuu tandih nyivi tsa ndacá ñaha Nyoo

(Mr. 9.33-37; Lc. 9.46-48)

¹ Quivi can natuhva ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuvi nu ndacá ñaha Nyoo?

² Tacan tan ra Jesús cana ra tsi iin ra luhlu, tan tyaa ra tsi ra mahñu ra naha.

³ Tan catyí ra:

—Tsa nditsa catyí yu tsihin ndo, tyin tatun nyoocho tan ña cua nasama ndo cuhva iyó ndo tan ña janduluhlu ndo

tsi ndo tumaa ra nyihi, ña cua cuvi quihvi ndo nu ndacá ñaha Nyoo.

⁴ Tyin ra tsa cahnu ca cuvi nuu Nyoo, juvin ra cuví ra tsa janduluhú tsi, tumaa ra luhlu ihya.

⁵ Nyivi tsa naquihín tsi iin nyivi tumaa ra luhlu ihya, tyin tsinú ñi tsi yu, yuhu naquihín cuenda ñi.

Nu caahán ra Jesús tshin yo nácaa jaha cuenda yo tsi yo coto javaha yo tsa ña vaha

(Mt. 5.29-30; Mr. 9.42-48; Lc. 17.1-2)

⁶ Tatun yoo nyivi natyuhú tsi iin nyivi tsa ñaha ca tsinú vaha ñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan cunjaneñi nyivi tsi ñi nu cunu ndutya ñuhu.

⁷ ¡Ndahvi nyivi ñuu ñayivi, tyin tacan iyó tsa jatívi tsi ñi! ¡Tan ndahvi tucu ra ndaahvi tsa jatívi tsi ñi!

⁸ Yacan cuenda tatun ndaha un o tsaha un javahá tsa ña vaha, cahnya can tan javita un. Tyin vaha ca quihvi un nu coo un tshin Nyoo tshin tsa lundu ndaha un o lundu tsaha un, tan ñavin ca tsa naní un tan jacuhun Nyoo tsi un nu cayú ñuhu tsa ña cua ndahva maa.

⁹ Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tshin Nyoo tshin intuhun tinuu un, tan ñavin ca tsa jacuhun Nyoo tsi un tshin nduvi tinuu un nu cayú ñuhu tsitsi anyaya.

Nu cahán ra Jesús tyin tumaa mbee tsa cunaq, tacan cuvíyo

(Lc. 15.3-7)

¹⁰ 'Ña caca ñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyi yu tshin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria.

¹¹ Tyin yuhu, Rayi tsa queenda gloria, vatsí jacacu yu tsi nyivi tsa cuanaa.

¹² ¿Nacaa cuñi nyooho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cuhun ra cunanducu ra tsi quití tsa cuanaa can?

¹³ Tan tatun nañihi ra tsi ti, tsa nditsa tyin si ca cua cuñi ra tshin quití can, tan ñavin ca tshin tsa cumi xico tsahun cumi quití tsa ña tsinaa.

¹⁴ Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyivi tsa cuví tumaa ra nyihi ihya.

Nacaa taahán tsi jahá tahan yo tucahnu ñi tsi yo

(Lc. 17.3)

¹⁵ Tatun ra yañi un tan javaha ra tsa ña vaha tsi un, cahán tshin intuhun ñi maa ra tan catyi un tshin ra tyin ña vaha cuhva javaha ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can.

16 Maa tyin tatun ña tyaa yahvi ra tsi un, tacan tan çana un tsi iin o uvi ra tyin cuvi ra naha tsa ndaa tsa cuenda tsa cua cahan un tsihin ra can.

17 Tatun ña tyaa yahvi ra ndi maa tsi ra tsa tsahan tsihin un naha ra, tacan tan çahan tsihin tandihi nyivi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jaha ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

18 Tsa nditsa catyí yu tsihin ndo, tyin tandihi tsa cuhñi ndo ihya nu ñuhu ñayivi, tsa nuuhñi tsi jaha maa Nyoo nda gloria. Tan tandihi tsa ndatsi ndo ihya nu ñuhu ñayivi, tsa ndatsi maa Nyoo nda gloria.

19 Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo.

20 Tyin nu yucú uvi o uñi nyivi tan jacahnú ñi tsi yu, ican nyaá yu mahñu ñi —catyí ra Jesús.

21 Tacan tan tsahan ra Pedro tsindaca tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

22 Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

Nucahan ra Jesús iin cuhva cuenda iin ra tsa ña cuñi jaha tucahnu iñi

23 Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandihi musu ra tyin cua nyehe ra nácaa nyaá cuenda ra naha tsi ra.

24 Tan cuhva tsa quitsaha natavá ra cuenda, tan tsindaca ra tsi iin musu tsa cuaha millón pesu nyaá cuenda tsi ra.

25 Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasñhi ra, tan tsihin sehe ra tan tandihi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.”

26 Tacan tan musu can tsicuiñi tsiti ra nuu tsitoho ra, tan çahan ndaahvi ra tsihin ra, tan catyí ra: “Tata, jaha tumañi iñi, çatu un luxu, tan tyahvi yu tandihi tsa nyaá cuenda yu tsi un nda ñihi yu xuhun”, catyí ra.

27 Tan cundahvi iñi tsitoho ra tsi ra, tan jaha ra tucahnu iñi tsi ra, tan janaa ra tandihi tsa nyaá cuenda ra, tan jandoo nuña ra tsi ra.

28 Maa tyin cuhva tsa quita musu can, nañihí ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tññ ra tsi ra can, tan quitsaha tññ ra jucun ra,

tan catyí ra tsihin ra: “Tyahvi tsa nyaá cuenda un tsi yu.”

²⁹ Tacan tan tsicuiñi tsiiti ra can nuu ra, tan cahān ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra.

³⁰ Maa tyin maa ra ña cuñi ra cuatu ra, tan tsahān ra tsi-tyihí ra tsi ra can vehe caa nda cuenda tsa tyahvi ra tsa nyaá cuenda ra tsi ra.

³¹ Tsa nyehe inga ca musu tsa javahā ra, cuihya xaan cuñi ra naha, tan tsahān ra naha tsinacatyí tuhun ra naha tsihin tsitoho ra naha tsa ña vaha tsa javahā ra can.

³² Tacan tan tsitoho ra can tava tyiñu ra na quitsi ra can. Tan tsa tsaā ra, tan catyí ra tsihin ra: “Musu ña vaha cuví un. Yuhu jahā yu tucahnu iñi tandihi tsa nyaá cuenda un tsi yu, tyin cahān ndaahvi un tsihin yu.

³³ Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra.

³⁴ Tan cuxaan xaan tsitoho ra, tan tava tyiñu ra na tatsi tuñi ra naha tsi ra nda cuenda tsa tyahvi ra tandihi tsa nyaá cuenda ra.

³⁵ Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tucahnu iñi tsi nyivi ndo tsihin tsa ñi iñi añima ndo.

Nu caahán ra Jesús tyin ña vaha tsa nacoo ihñi rayi tsi ñasihi ra

(Mr. 10.1-12; Lc. 16.18)

¹ Tsa yaha tsa cahān ra Jesús tuhun ihya, tan quita ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñicanyii.

² Cuaha xaan nyivi tsinyicun tsi ra, tan janduvahā ra tsi nyivi cuuhvi.

³ Tacan tan juhva ra fariseo naha ra natuhva ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuvi tyaa ra naha cuatyí siqui ra. Tan tsica tuhun ra naha tsi ra tan catyí ra naha:

—¿A vaha tsa nacoo rayi tsi ñasihi ra tsa cuenda náa ñi tsihi tsahā ña tsi ra?

⁴ Tan nacahān ra tan catyí ra:

—¿A ña tuhvá ndo cahvi nu tutu Nyoo nu catyí tsi tyin ra tsa javahā tsi ndo nda quivi jihna ñi, javahā ra rayi tan ñaha?

⁵ Tan catyí tsi tyehen: “Taahán tsi nacoo rayi tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuvi ñi tumaa tsa intuhun ña nyivi.”

⁶ Yacan cuenda, ñavin ca uvi taahan ñi, maa tyin nduvi ñi intuhun ña nyivi cuví ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

⁷ Tacan tan tsica tuhun ra naha tsi ra Jesús tan catyí ra naha:

—¿Nacuenda tsa tyaḡ ra Moisés tyin cuví caní iin rayii tutu cuenda ley ra tan nacoo ra ñasihi ra?

⁸Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsaḡ ra Moisés ndatu tsa nacoo ndo ñasihi ndo. Maa tyin quivi jihna ñi ñavin tacan tsicoḡ nyivi.

⁹Yuhu catyí yu tsihin ndo tyehen: Ra tsa nacoḡ ñasihi, tan ñavin tsa cuenda tsa quituvi ña tsihin inga rayii, tan tindaha ra tsihin inga ñaha, tsicoó cuatyí ra nuu Nyoo. Tan ra tsa tindaha tsihin ñaha tsa nacoḡ rayii can, juvin ñi tsicoó tucu cuatyí ra can —catyí ra.

¹⁰Tacan tan ra tsicá tsihin ra, catyí ra naha tsihin ra:

—Tatun tacan taahán tsi coo rayii tsihin ñasihi ra, vaha ca ña tindaha yo.

¹¹Tan ra Jesús catyí ra tsihin ra naha:

—Ña tandihi nyivi cuví naquihin cuenda tuhun ihya. Maa tyin nyivi tsa tsaḡ Nyoo cuví naquihin cuenda ñi can.

¹²Tsa ña tindaha nyivi, cuaha ñi cuenda cuví tsi. Yihí ñi ña cuñí ñi tindaha ñi tyin iin cuhva caa maa ñi nda cacu ñi. Tan inga ñi ña cuñí ñi tindaha ñi tyin tsa nducapun ñi jahḡ nyivi. Tan yihí ñi ña tindaha ñi tsa cuenda tsa cuñí ñi javaha ñi maa ñi maa tyiñu Nyoo, na nducuaaha ca añima tsa ndacá ñaha Nyoo. Tandihi nyivi tsa cuví javaha yacan na javaha ñi —catyí ra Jesús.

Nu nasocó ra Jesús tsi tsa nyihi

(Mr. 10.13-16; Lc. 18.15-17)

¹³Tacan tan quitsi ndaca nyivi juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quit-saha caahán ra naha tsi nyivi tsa cuahán tsihin tsa nyihi can.

¹⁴Maa tyin ra Jesús catyí ra:

—Jaña ndo tsi tsa nyihi na quitsi maa tsi naha tsi nu nyaá yu. Tan ña casi ndo. Tyin nyivi ndacá ñaha Nyoo cuví ñi tumaa tsa nyihi ihya —catyí ra.

¹⁵Tacan tan tyiso ndaha ra jiñi tsi naha tsi. Yahḡ can tan cuahán ra.

Nu tsaḡ ra Jesús cuhva tyin yii xaan nacuhva cuenda iin ra cuca tsi ra tsi Nyoo

(Mr. 10.17-31; Lc. 18.18-30)

¹⁶Iin ra tyuvaa tsahan ra tsindaca tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayivi nyito tsa ña cua naa maa?

¹⁷Tan ra Jesús catyí ra tsihin ra:

—¿Nacuenda catyí un tyin ra vaha cuví yu? Intuhun ñi maa Nyoo cuví ra vaha. [Tan tsa catyí un tyin vaha yu, nacotó un tyin Nyoo cuví yu.] Maa tyin tatun cuñí un coo un ñayivi tsa ña cua naa maa, javaha tandihi tuhun tsa tsaḡ Nyoo tyin javaha yo —catyí ra tsihin ra.

18 Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña cahñi un nyívi. Ña coo inga ñaha tsi un. Ña suhu un tsa tsii nyívi. Ña cahan un cuendu siqui nyívi.

19 Tyaa yahvi tsi jutu un tan tsi sihi un. Tan cuñi tsi nyívi, tumaa tsa cuñi un tsi maa un.

20 Tan ra tyuvaa can, catyí ra tsihin ra:

—Tandihí maa yacan tan tyaá yahvi yu nda tahan luhlu yu tan nda cuando vityin. ¿Náa ca cumañi tsi yu?

21 Tan ra Jesús catyí ra tsihin ra:

—Tatun cuñi un tsa iin ndaha ñi cuví un iin ra cuiti nuu Nyoo, cuaahan tan xico un tsa iyó tsi un, tan cuhva un tsi nyívi ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

22 Maa tyin cuhva tsa tsiñi ra tyuvaa can tsa cahan ra Jesús tsihin ra, cuihya xaan cuñi ra cuví tan cuanuhu ra tyin cuca xaan ra.

23 Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yíi xaan tan cuví nacuhva cuenda nyívi cuca tsi ñi na cundaca ñaha Nyoo tsi ñi.

24 Catyí yu tsihin ndo inga tsaha, tyin vasu yíi xaan yaha iin camellu xuu iin yiquí tucu, maa tyin yíi xaan ca tsa quihvi iin nyívi cuca nu ndacá ñaha Nyoo —catyí ra Jesús.

25 Tsa tsiñi ra tsicá tsihin ra Jesús tsa cahan ra, iyo xaan cuñi ra naha, tan quitsaha tsicá tuhun tahan ra naha, tan catyí ra naha:

—Tun tacan, yoñi cua cuví cacu

26 Tacan tan nanyehe ra Jesús nu nyecú ra naha tan catyí ra:

—Nyívi ña cuví javaha ñi yacan, maa tyin Nyoo cuví javaha ra tandihí.

27 Tacan tan quitsaha caahán ra Pedro tsihin ra:

—Jutu Mañi yu, nyuhu tandihí maa tsa iyó tsi ndi nacoo ndi tan nyicún ndi tsi un. ¿Náa cua ñihi ndi? —catyí ra tsihin ra.

28 Tan nacahan ra Jesús tan catyí ra:

—Tsa nditsa catyí yu tsihin ndo, tyin quívi tsa cua ndut-saa tandihí tsa iyó, yacan cuví quívi cua cunyaa yuhu Rayíi tsa quee nda gloria nu tyayu síi xaan caá tan cua cundaca ñaha yu. Tan nyooho tsa nyicún tsi yu, cua cunyecu ndihí ndo nu utsi uvi taahan tyayu síi caá. Tan cua cundaca ñaha ndo tsi tandihí nyívi cuví tata tsa utsi uvi taahan sehe ra Israel.

29 Tan tandihí nyooho tan tandihí inga nyívi tsa nacoo vehe, o yañi ñi, o cuhva ñi, o jutu ñi, o sihi ñi, o ñasihi ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsaha siqui can, tan cua ñihi tucu ñi ñayívi nyito tsa ña cua naa maa coo ñi.

30 Cuaha xaan nyívi cuahán ityi nuu vityin, ñi ican cua cuhun nu ndihí ña. Tan cuaha

xaan nyivi cuahán nu ndihi vityin, ñi ican cua cuhun ityi nuu.

20

Nu jacuahā ra Jesús iin cuhva cuenda ra jahá tyiñu

¹ Tsa ndacá ñaha Nyoo tsi nyivi, cuví tsi tumaa iin ra iyó cora uvas. Tan tuvi ñi quitā ra cuahán ra cuanducú ra musu jaha tyiñu nu tyiñu jahá ra.

² Tan ndoo ra tuhun tsihin musu can tyin cua tyahvi ra yahvi tsa iin quivi. Tan jacuhun ra tsi ra naha cua jaha tyiñu ra naha nu iyó tyiñu jahá ra.

³ Yahā can tan cuahán ra inga tsaha cuhva caa in tsa tuvi. Tan nyehe ra tsi juhva ca ra yucú taxin nuyahvi can.

⁴ Tan catyí ra tsihin ra naha: “Cuaahan ndihi tucu nyooho jaha tyiñu ndo nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihi tucu ra can naha ra.

⁵ Tan tsitoho cora can quitā ra inga tsaha tsa ora. Tan juvin ñi musu nducú ra. Tan caa uñi tsa tseñi, quitā ra inga tsaha nducú ra musu.

⁶ Yahā can tan quitā nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.”

⁷ Tan nacahan ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí

ra tsihin ra naha: “Cuaahan ndihi ndo jaha tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra.

⁸ Tan cuhva tsa cua cuaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihi naha ra, tan nu cua ndihi tan tyahvi un tsi ra tsa quihvi tsa jihna ñi naha ra”, catyí ra.

⁹ Tacan tan tsaā ra tsa quihvi caa uhun tsa tseñi can naha ra. Tan intuhun intuhun ra naha quihin ra naha yahvi nanii iin quivi.

¹⁰ Yahā can, tan cuhva tsa tahan tsi tsi ra tsa quihvi tsa jihna ñi can naha ra, cuñi maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivi quihin ra naha.

¹¹ Tan cuhva tsa quihin ra naha, quitsaha caahán ra naha tsi tsitoho tyiñu can.

¹² Tan catyí ra naha: “Ra tsa tsaā nu ndihi ihya naha ra, intuhun ñi hora jaha tyiñu ra naha. Tan iin ñi yahvi tyahvi un tsi ra naha tsihin tucu nyuhu tan nduvi nduvi jaha tyiñu ndi nu ihñi”, catyí ra naha.

¹³ Maa tyin nacahan tsitoho tyiñu can, tan catyí ra tsihin iin ra can: “¡Tsaal, nduve tsa ña vaha javaha yu tsihin un. ¿A ñavin yahvi tsa iin quivi ndoo yo tuhun tyin cua tyahvi yu tsi un?”

¹⁴ Quihin yahvi un, tan

cuanuhu. ¿A nduve ndatu iyó tsi yu tsa tyahvi yu tsi ra tsa quihv̄i nu ndih̄i iin ñi cuhva tsa tyahv̄i yu tsi yooho?

15 ¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha iñi yu tsihin inga ra can naha ra?” catyí ra.

16 Tacan nyivi quihv̄i nu ndih̄i, cuhun ñi ityi nuu. Tan nyivi cuahán ityi nuu, nda nu ndih̄i ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

Inga tsaha jacotó ra Jesús cuhva cua cahñi nyivi tsi ra

(Mr. 10.32-34; Lc. 18.31-34)

17 Cuhva tsa cuñi cuhun ra Jesús nda ñuu Jerusalén, cana s̄in ra tsi tsa utsi uvi ra tsicá tsihin ra tan catyí ra tsihin ra naha:

18 —Nyehe ndo tyin cuahán yo Jerusalén vityin. Tan ndacan cua nacuhva cuenda nyivi tsi yuhu, Raȳi tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyí ra naha tyin taahán tsi cúu yu.

19 Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyí ra Jesús tsihin ra naha.

Nu tsicán sihi ra Jacobo tan ra Juan iin tumañi iñi tsi ra

Jesús

(Mr. 10.35-45)

20 Tacan tan ñasihi ra Zebedeo natuhv̄a ña nu nyii ra Jesús tsihin nduvi sehe ña, ra Jacobo tan ra Juan. Tan tsicuiñi tsiti ña nuu ra tyin cua ndacan ña iin tumañi iñi tsi ra.

21 Tan tsica tuhun ra Jesús tsi ña tan catyí ra:

—¿Náa cuñi un?

Tan catyí ña:

—Quivi tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

22 Maa tyin nacahan ra Jesús tan catyí ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cuhun ndo tuhun tsihi tumaacua cuhun yuhu? —catyí ra.

Tan nacahan ra naha tan catyí ra naha:

—Cuví maa.

23 Tan catyí ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsihi tumaacua cuhun yuhu tuhun tsihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyí ra Jesús tsihin ra naha.

24 Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra.

²⁵ Maa tyin cana ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha.

²⁶ Maa tyin ñavin tacan taahán tsi javaha nyooho. Tyin ra tsa cuñí nducahnu ca cuví nu Nyoo, cuñí tsi cuví ra musu tandihi nyooho.

²⁷ Tan ndáa nyooho tsa cuñí ndo cuví ndo ityi nuu, cuñí tsi cuví ndo musu tandihi ca ra naha.

²⁸ Tumaa yuhu, Rayii tsa quee nda gloria, ña vatsí yu tyin jatyinyee nyivi tsi yu. Maa tyin yuhu vatsí yu vatsí jatyinyee yu tsi maa ñi, tan cua cuhva yu ñayivi yu tsa cuenda ñi. Tyin tsihin yacan cua tyahvi yu cuatyí tandihi ñi.

Nu janduvaha ra Jesús tsi uvi taahan ra cuaa
(Mr. 10.46-52; Lc. 18.35-43)

²⁹ Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha.

³⁰ Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsaha caná tsaa ra naha. Tan catyí ra naha:

—Jutu Mañi yu, tata ra David, cundaahvi iñi tsi ndi! —catyí ra naha.

³¹ Tan nyivi quitsaha caahán ñi tsihin ra naha na

casi ra naha yuhu ra naha. Maa tyin ñihi ca cana tsaa ra naha:

—Jutu Mañi yu, tata ra David, cundaahvi iñi tsi ndi!

³² Tacan tan tsicuiñi ra Jesús tan cana ra tsi nduvi taahan ra cuaa can, tan tsica tuhun ra tsi ra naha tan catyí ra:

—¿Náa cuñí ndo javaha yu tsi ndo?

³³ Tan nacahan ra naha tan catyí ra naha:

—Jutu Mañi yu, jananyehe tsi ndi.

³⁴ Tacan tan cundaahvi iñi ra Jesús tsi ra naha, tan tin ra tinuu ra naha. Tan iin yaha ñi nanyehe ra naha, tan cuiti cuanyicún ndihi ra naha tsi ra Jesús.

21

Nu cuahán ra Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

¹ Tsa cua tsaa ra naha ñuu Jerusalén, tan tsaa ra naha ñuu Betfagé, yatyin ñi yucú Olivo nu iyó yutun olivo. Tacan tan tava tyiñu ra Jesús tsi uvi ra tsicá tsihin ra.

² Tan catyí ra tsihin ra naha:

—Cuahan ndo ñuu tsa canyí ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndatsi ndo tsi ti, tan quitsi ndaca ndo tsi ti naha ti tsi yu.

³ Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyí ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa

tyin numi ñi cua quitsi ndaca nyico ndi tsi ti naha ti”, catyi ndo tsihin ñi —catyi ra.

⁴ Tacan cuvı tyin cundaa tsa cahan ra cuvı ndusu yuhu Jutu Mañi yo tahan tsanaha nu catyi ra tyehen:

⁵ Cahān ndo tsihin nyivi ñuu Sión:

“Nyehe ndo, vatsı rey ndo nu iyó ndo.

Ndaahvi ñi vatsı ra yosó ra iin urru luhlu, sehe iin quitı tsa tuhvá nyisó carga”, catyi ra cuvı ndusu yuhu Nyoo can.

⁶ Tacan tan cuahán ra tsicá tsihin ra Jesús, tan javahā ra naha tumaa tsa cahan ra tsihin ra naha.

⁷ Quitsı ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaa ra Jesús tsi ti.

⁸ Tan cuaha xaan nyivi tsaquın ñi jahma ñi nu ñuhu ityi nu cuahán ra, tan inga ñi tsahnyā ñi ndaha yutun tsaquın ñi tsitsi ityi.

⁹ Tan nyivi tsa cuahán ityi nuu tan ityi tsata, quitsahā caná tsaa ñi tan catyi ñi:

—¡Cahnu xaan cuvı ra cuvı tata ra rey David! ¡Cahnu xaan cuvı ra tsa jaquitsı Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyi ñi.

¹⁰ Cuhva tsa tsaā ra Jesús ñuu Jerusalén can, tandihi maa nyivi ñuu quitsahā cuvaá jahá ñi, tan cuaha xaan ñi tsicá tuhun tahan ñi tsi ñi, tan catyi ñi:

—¿Yóo ra cuvı ra ihya?

¹¹ Tan catyi ñi:

—Ra Jesús, ra cuvı ndusu yuhu Nyoo, ra ñuu Nazaret tsa canyiı Galilea cuvı ra —catyi ñi.

Nu tava ra Jesús tsi nyivi xicó tsitsi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahā can tan quihvi ra Jesús tsitsi vehe ñuhu cahnu Nyoo. Tan tava ra tsi tandihi nyivi jatá tan xicó ican. Tan janduvā ra mesa nu nasamá ñi xuhun. Tan janduvā ra tyayu nu xicó ñi paloma.

¹³ Tan catyi ra tsihin nyivi:

—Nu tutu Nyoo catyi tyin vehe Nyoo, nu tsicán tahvi yo tsi ra cuvı tsi, tan tacan cua cunañi tsi. Tan nyooho jananduvı ndo vehe ihya, vehe ñasuhu —catyi ra tsihin ñi.

¹⁴ Tan tsa tsito juhva ra cuaa tan ra coxo naha ra tyin nyıı ra Jesús tsitsi vehe ñuhu cahnu, quihvi ra naha tan janduvahā ra Jesús tsi ra naha.

¹⁵ Tan nyehe ra jutu tsa cuvı ityi nuu naha ra tan ra maestro cuenda ley vehe ñuhu cahnu naha ra tyin javahā ra Jesús tsa iyo. Tan tsiñi ra naha tyin caná tsaa tsa nyihi tsitsi vehe ñuhu, tan catyi tsa nyihi can:

—¡Cahnu xaan cuvı ra cuvı tata ra rey David! —catyi tsi naha tsi.

Tacan tan cuxaan ra naha tsa tsiñi ra naha tsa cahán tsa nyihi can.

¹⁶ Tan catyi ra naha tsihin ra Jesús:

—¿A tsiñí un tsa caahán tsa nyihi can?

Tan nacahan ra Jesús tan catyí ra:

—Tsiñí yu. Maa tyin ¿a ñaha ca cahvi nyooho nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín sii xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

17 Tacan tan nacoq ra tsi ra naha, tan quita ra ñuu can cuahán ra ñuu Betania. Tan ican ndoq ra tsacuaa can.

Nu cahan ra Jesús tsi yutun higo tsa ña tsahá tsiti

(Mr. 11.12-14, 20-26)

18 Tan tsa tuvi cuii ñi inga quivi can, vatsí nyico ra Jesús nda ñuu Jerusalén, tan tsaa soco tsi ra.

19 Tan nyehe ra nyaá iin yutun higo yatyin ñi yuhu ityi can. Tan natuhvā ra nu nyaá tun, maa tyin nduve maa náa nañihí ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaha ña cua cuhva ca un tsiti!

Tan juvin ñi cuhva can na ityi tun.

20 Tan tsa nyehe ra tsicá tsihin ra tsa javahā ra tsi tun, iyo xaan cuñí ra naha, tan tsicā tuhun ra naha tsi ra tan catyí ra naha:

—¿Nacuenda tsa numi xaan na ityi yutun higo can?

21 Tan nacahan ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahā yu tsihin yutun higo ihya ñi cuví javaha tucu nyooho, tyin cuví ndihi tucu catyi ndo tsihin yucu ihya: “Cuatsiyo ihya tan cuhun un nda tsitsi ndutya ñuhu.” Tan cua cuhun tsi.

22 Tan tandihi tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihi ndo —catyí ra Jesús.

Nu tsicā tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tyin cahan ra tsihin nyivi

(Mr. 11.27-33; Lc. 20.1-8)

23 Yahā can tan quihvī ra Jesús tsitsi vehe ñuhu cahnu, tan tsitsi tsa jacuahá ra ican, natuhvā ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicā tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

24-25 Tan nacahan ra Jesús tan catyí ra:

—Yuhu tucu cuñí yu ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, o nyivi? Tatun catyi tuhun ndo tsihin yu, cua catyi tuhun tucu yuhu tsihin ndo yóo tava tyiñu tsi yu tsa javahā yu tyehen —catyí ra Jesús tsihin ra naha.

Tacan tan ra ican naha ra quitsahā caahán yuhu tahan ra naha, tan catyí ra naha:

—Tatun catyí yo tyin Nyoo jaquitsi tsi ra Juan, cua catyi ra tsihin yo: “Tun tacan, ¿nacuenda ña tsinu ñi ndo tsi ra?”

²⁶ Tan tatun catyi yo tyin nyivi jaquitsi tsi ra, yuuhvi yo coto cuxaan nyivi tsi yo, tyin tandihi ñi tsinu ñi ñi tyin ra Juan, cuenda Nyoo cahan ra —catyí ra naha.

²⁷ Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyi tuhun yu tsihin ndo yóo tavá tyiñu tsi yu.

Nu caahán ra Jesús iin cuhva cuenda uvi taahan sehe iin rayii

²⁸ Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayii, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.”

²⁹ Tan nacahan sehe ra tan catyí ra: “¡Ña cuhun yu!” Maa tyin yahá can tan nasama cuhva tsicá ñi ra tan tsahan ra tsijahá tyiñu ra.

³⁰ Yahá can tan jutu ra cahan ra tsihin inga sehe ra. Tan catyí tucu ra tsihin ra na cuhun ra kujaha tyiñu ra. Tan ra ican numi ñi quihin ra tyiñu tan catyí ra: “Vaha, tyaa, cuhun maa yu.” Maa tyin ña tsahan ra.

³¹ Tsitsi tsa nduvi taahan ra can naha ra, ¿ndáa ra javahá

tsa cahan jutu ra? —catyí ra Jesús.

Tan nacahan ra naha tan catyí ra naha:

—Ra tsa cahan ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tavá xuhun cuenda ra ndacá ñaha tan ñi sii ñi caca nuu, jihna ca ñi cua quihvi nu ndacá ñaha Nyoo tan ñavin ca nyooho.

³² Tyin ra Juan, ra jacondutyá tsi nyivi, quitsi ra jacuahá ra tsi ndo nácaa taahán tsi coo cuiti ndo, tan nyooho ña tsinu ñi ndo tsi ra. Maa tyin ra tavá xuhun naha ra tan ñi sii ñi caca nuu tsinu ñi ñi tsi ra. Tan nyooho vasu ndi maa nyehe ndo yacan, maa tyin ña nasama ndo cuhva iyó ndo, tan ña tsinu ñi ndo tsi ra.

Nu caahán ra Jesús tyin tumaa cuvi juhva nu caquiñi nahnu, tacan cuvi ra tsa cua cahñi tsi ra

(Mr. 12.1-12; Lc. 20.9-19)

³³ Tyaa soho ndo inga cuhva ihya: Tsicoo iin rayii, tan iyó ñuhu ra. Tan tatsi ra yoho yucu vixi tsa nañi uvas, tan tyihí ra cora. Tan javahá ra iin nu cua tava ra ndutyá uvas can. Tan javahá tucu ra iin vehe sucun tyin cuvi jaha cuenda ra tandihi.

Yahá can tan tsahá nuu ra ñuhu can tsi juhva ra cua jaha tyiñu naha ra, tan cuahán ra inga ñuu.

³⁴ Tan tsa tsaá quivi tsa iyó uvas can, jacuhun ra tsi

juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahán tsi tsi ra.

³⁵ Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra.

³⁶ Tacan tan tsa inga tsaha, cuaha ca musu jacuhun tsi-toho cora can tan ñavin ca tsa jihna ñi. Maa tyin tumaa tsa javaha ra naha tsihin ra tsa tsahan jihna naha ra, tacan ñi javaha nyico ra naha tsihin ra ihya naha ra.

³⁷ 'Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra.

³⁸ Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: "Ra ihya cua ndoo tsihin tandihi tsa iyó ihya. Na cahñi yo tsi ra tan ndoo maa yo tsihin cora ihya", catyí ra naha.

³⁹ Tacan tan tñin ra naha tsi ra, tan tava ra naha tsi ra ityi tsata cora can, tan tsahñi ra naha tsi ra —catyí ra Jesús.

⁴⁰ Tacan tan tsica tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

⁴¹ Tan nacañan ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha

tyiñu naha ra, tan quivi coo uvas, cua nacuhva cuenda ra naha juhva tsa taahán tsi tsi ra cuví tsi-toho cora can.

⁴² Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tye-hen?

Yuu tsa javita ihñi ra javahá vehe,

Yacan cuví yuu tsa ñiñi ca.

Jutu yo Nyoo cuví ra tsa javaha tandihi can.

Tan iyo xaan cuñi yo nyehé yo, catyí tsi.

⁴³ 'Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahá cuhva cuñi ra tyin nditsa tsahá ñi tsi ñi cundaca ñaha ra.

⁴⁴ Tan tsa cuenda yuu can, yoo nyivi tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yoo nyivi, cua taxin nyihi ñi —catyí ra Jesús.

⁴⁵ Cuhva tsa tuví iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cañan ra Jesús cuhva ihya,

⁴⁶ cuñi ra naha tñin ra naha tsi ra, maa tyin yuuhví ra naha tsi nyivi tyin tsinú iñi ñi tyin ra Jesús caahán ra cuenda Nyoo.

22

Nu cañan ra Jesús iin cuhva cuenda vico tindaha (Lc. 14.15-24)

¹ Quitsaha caahán ra Jesús tsihin nyivi inga tsaha tsihin cuhva, tan catyí ra:

2 —Tsa ndacá ñaha Nyoo tsi nyivi cuví tsi tumaa iin rey tsa javahā iin vico tsa cuenda tsa cua tindaha sehe ra.

3 Tan jacuhun ra tsi musu ra na cucana ra naha tsi nyivi tsa jacotō ra tyin cuhun ñi, maa tyin ñi ican, ña cuñi ñi cuhun ñi.

4 Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quití xaahan. Tan tsa iyó vaha tandihi. Yacan na quitsi ñi”, catyí ra.

5 Maa tyin ñi ican ña tyaa yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra.

6 Tan inga ra naha tñin ra naha tsi musu rey can naha ra tan cañi xaan ra naha tsi ra naha nda cuanda tsahñi ra naha tsi ra naha.

7 Tacan tan ra rey can cuxaan xaan ra, tan jacuhun ra tsi andaru ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha.

8 Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi cana yu, ña taahán tsi tsa quitsi ñi.

9 Cuaahan ndo ityi cahnu tan cana ndo tsi tandihí nyivi tsa nañihi ndo na quitsi ñi vico tindaha”, catyí ra rey can.

10 Musu can cuahán ra naha tandihí ñi ityi, tan jandu iin ra naha tsi tandihí nyivi nañihí ra naha: ñi caquiñi tan

ñi vaha iñi. Tacan tan tsitu tsitsi vehe ra tsihin nyivi.

11 Tacan tan quihvi ra rey can cua nyehe ra tsi tandihí nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsí.

12 Tan catyí ra rey tsihin ra: “Tsa, ¿nacuenta nyí un ihya tan nduve jahma vico tindaha nditsi un?” Tan ña nacahan maa ra can.

13 Tacan tan catyí ra rey can tsihin ra tyihí mesa can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra.

14 Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

Nu caahán ra Jesús tsa cuenda tsa tyahví nyivi xuhun tsi ra ndacá ñaha nda ñuu Roma

(Mr. 12.13-17; Lc. 20.20-26)

15 Tacan tan cuahán ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra.

16 Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñi un nyehe un tsi nyivi cuca tan nyivi ndaahvi.

17 ¿Nacaa tsicá tucu iñi yooho: A vaha tyahví yo tsa tsicán ra ndacá ñaha nda ñuu Roma, o ña vaha?

18 Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu?

19 Janaha jihna ndo iin xuhun tsa tuhvá yo tyahví tsi ra ndacá ñaha tsi yu —catyí ra.

Tan tsindacá ra naha iin xuhun tsa nañi denario tsi ra.

20 Tan tsa nyehē ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

21 Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

22 Tsa tsiñi ra naha tsa cahan ra Jesús, iyo xaan cuñi ra naha. Tan cuahán ra naha.

Nu cuñi ra cuví saduceo naha ra jandavi ñaha ra naha tsi ra Jesús

(Mr. 12.18-27; Lc. 20.27-40)

23 Juvín ñi quivi can juhva ra cuví saduceo naha ra tsahan ra naha nu nyíi ra Jesús. Tan ra cuví saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan

cuenda tsicá tuhun ra naha tsi ra Jesús, tan catyí ra naha:

24 —Maestro, ra Moisés catyi ra tyin tatun iin ra tindaha tan tsihi ra tan ña tsicoo sehe ra, taahán tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi.

25 Vaha. Tun iin ra tan iyó utsa sehe yi ra, tan ra tsa jihna ñi tindaha ra. Tan nduve sehe ra tsicoo tsihin ñasihi ra tan tsihi ra. Ndo ñasihi ra tsi yañi ra tsa tsinu uvi.

26 Tan juvín ñi tsihi ndihi ra can. Tan ndoo ñaha can tsihin ra tsa tsinu uñi, maa tyin juvín ñi tacan tahanan ndihi ra. Tan inducu ñi tahanan tandihi tsa utsa ra naha.

27 Tan nu ndihi ña tsihi ndihi maa ñaha can.

28 Tatun nditsa tsa cua nandoto nyivi tsihi, ¿ndaa tsa utsa taahan ra can naha ra cua cuvi yi ña? Tyin tandihi maa ra naha tindaha tsihin ña —catyí ra naha.

29 Tan nacahan ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo.

30 Tyin quivi cua nandoto nyivi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuvi ñi tumaa cuví ángel tsa iyó gloria.

31 Tyin tuhun Nyoo tsahá cuenda tsi nácaa cuví tuhun tsa cua nandoto nyivi tsa

tsihí. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

32 “Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añima ra can naha ra, vasu tsanaha tsihí ra naha. Tyin Nyoo ñavin Nyoo cuenda nyívi tsihí cuví ra, tyin Nyoo cuví ra Nyoo cuenda nyívi nyito —catyí ra.

33 Tan tsa tsiñi nyívi tsa caahán ra Jesús, iyo xaan cuñí ñi.

Ley tsa ñiñi ca tsa tsaha Nyoo

(Mr. 12.28-34)

34 Tsa tsito ra fariseo naha ra tyin ra Jesús tyasi ra yuhu ra saduceo naha ra, ndu ijin ra naha.

35 Tan iin ra tsa nyí tsihin ra naha cuví ra maestro cuenda ley vehe ñuhu tan cuñi ra nducu cuhva ra tsi ra Jesús. Tan tsicá tuhun ra tsi ra, tan catyí ra:

36 —Maestro, ¿ndáa ley cuví tsa ñiñi ca?

37 Tan catyí ra Jesús tsihin ra:

—“Cuñi tsi Jutu Mañi yo Nyoo tsihin tsa ñi iñi un tan tsihin tsa ñi iñi añima un, tan tsihin tandihí tsa tsiñi tuñi jiñi un.”

38 Ley ihya cuví tsa ñiñi ca, tan tsa jihna ñi taahán tsi javaha yo.

39 Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi tyehen: “Cuñi tsi

nyívi tahan un tumaa cuñi un tsi maa un.”

40 Tatun tyaá yahvi ndo nduvi taahan ley ihya, tsa tyaá yahvi ndihí ndo tandihí ca ley tsa tyaá ra Moisés jahá Nyoo, tan tandihí tuhun tsa jacuahá ra cuví ndusu yuhu Nyoo tahañ tsanaha.

Ra Cristo cuví ra Sehe Nyoo tan juvin ñi cuví ra tata ra David

(Mr. 12.35-37; Lc. 20.41-44)

41 Tsitsi tsa ndi yucú ra fariseo naha ra nu ndu ijin ra naha,

42 ra Jesús tsicá tuhun ra tsi ra naha, tan catyí ra:

—¿Nacaa tsicá iñi nyooho cuenda ra cuví Cristo? ¿Yóo tata cuví ra, cuñi maa ndo?

Tan nacahañ ra naha tan catyí ra naha:

—Tata ra David cuví ra.

43 Tacan tan ra Jesús catyí ra tsihin ra naha:

—Tun tacan, ¿nacuenta jacahañ Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

44 Nyoo cahañ tsihin Jutu Mañi yu, ra Cristo, tan catyí ra tsihin ra:

“Cunyaá xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

45 ¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

46 Tan yoñi maa cuvî nacahan nu cahan ra ndi intuhun maa tuhun. Tan nda quivi can, yoñi ca maa cuñi nducu tuhun tsi ra.

23

Nu caahán ra Jesús tyin cuaha xaan cuatyí ra maestro cuenda ley vehe ñuhu naha ra tan ra fariseo naha ra

(Mr. 12.38-40; Lc. 11.37-54; 20.45-47)

1 Tacan tan ra Jesús catyí ra tsihin tandihi nyivi, tan tsihin ra tsicá tsihin ra:

2 —Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaá ra Moisés.

3 Yacan cuenda tyaá yahvi ndo tsa caahán ra naha tan javaha ndo tandihi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha.

4 Janducuahá ca ra naha ley tsa tsaha Nyoo tahañ tsanaha. Tan cuñi ra naha tsa javaha nyivi tandihi can. Maa tyin ña cunyeé ñi javahá ñi tandihi can, tan ndi maa ra naha tan ña cuñi ra naha javaha ra naha can.

5 Tyin maa ra naha tyaá ra naha caja ñi nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsí ra naha jahma nañi ca tan ñavin ca tsa iyó tsi inga ca nyivi. Javahá ra naha tandihi

can tyin na nyehe nyivi tyin vaha xaan ca ra naha.

6 Tan nu vaha ca, cuñi ra naha cunyece ra naha nu iyó vico tan catsi ra naha. Tan nu vaha ca cuñi ra naha cunyece ra naha tsitsi vehe ñuhu.

7 Tan nu tsicá nuu ra naha cuñi ra naha tyin cuhva nyivi nacumi tsi ra naha tyin jahá ñi tsa ñayivi tsi ra naha. Tan cuñi tucu ra naha tsa catyí ñi “maestro” tsihin ra naha.

8 Maa tyin nyooho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyii tsihin ndo, tan tandihi ca maa ra naha yañi ndo cuví tsi ra naha.

9 Tan ña cahan ndo Jutu ndo tsihin ndi intuhun rayii ñuu ñayivi ihya, tyin intuhun ñi ra nyaá gloria cuví Jutu ndo.

10 Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo.

11 Ra tsa jahá tyiñu tyiñu tandihi ca ra naha, ra ican cuví ra cahnu ca nu yucú ndo.

12 Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

13 'Ndahvi nyooho ra cuví maestro cuenda ley vehe ñuhu tan nyooho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuví quihvi nyivi. Tan ndi maa ndo ña quihvi ndo, tan ndi ña tsahá ndo tsa quihvi nyivi tsa cuñi quihvi.

14 'iNdahvi nyoooho ra cuví maestro cuenda ley tan nyoooho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyí tyin quihín nyaa ndo vehe ñi ndaahvi tsa tsihi yii tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

15 'iNdahvi nyoooho ra maestro cuenda ley vehe ñuhu tan nyoooho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo nii cahnu nu ñuhu ñayivi tyin cuñí ndo nañihi ndo vasu intuhun nyivi cunicun tsi ndo. Tatun tsa quihvi ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cuhun ñi anyaya tsihin ndo.

16 'iNdahvi nyoooho ra ndaahvi! Tyin cuñí ndo jaquihin ityi ndo tsi nyivi, ¡maa tyin cuaa ndo! Caahán ndo tyin yóo nyivi cua cahan “Naha Nyoo” tsa cuenda vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo.

17 ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu íí tsi xuhun cuaan can?

18 Tan juvin ñi catyí tucu ndo tyin yóo nyivi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañí ñi nu altar, tacan tan taahán tsi javaha ñi tsa cahan ñi, catyí ndo.

19 ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañí ndo nu altar can, o maa altar tsa jandu íí tsa jamañí ndo?

20 Tyin nyivi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndihi ñi tsa cuenda tandihi tsa yosó nu altar can.

21 Tan nyivi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican.

22 Tan tacan tucu nyivi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

23 'iNdahvi nyoooho ra cuví maestro cuenda ley vehe ñuhu tan nyoooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaa yahvi ndo ley nahnu ca tsa taahán

tsi javaha yo: tsa javahá yo tsa vaha tsihin tandihí nyívi, tsa cundaahvi íñi yo tsi ñi, tsa tsinú íñi yo tsi Nyoo tan ña nacoo yo tsi ra. Cuñí tsi javaha ndo tandihí can, tan ña cua jandihí ndo tsa cuhva ndo diezmo can.

²⁴ Nyoocho ra cuaa, cuñí ndo jaquihin ityi ndo tsi nyívi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

²⁵ 'iNdahvi nyoocho ra cuví maestro cuenda ley vehe ñuhu tan nyoocho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá íñi ndo tsa coo cuaha ndaha tyiñu ndo.

²⁶ ¡Nyoocho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndihí ityi tsata.

²⁷ 'iNdahvi nyoocho ra cuví maestro cuenda ley vehe ñuhu tan nyoocho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyí, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandihí nuu tsa caquiñi.

²⁸ Tacan cuví nyoocho, tyin cuñí nyívi tyin vaha xaan íñi ndo, maa tyin añima ndo ican quitá tsa jandaví ñaha ndo tan tandihí tsa caquiñi ndo.

²⁹ 'iNdahvi nyoocho ra cuví maestro cuenda ley vehe ñuhu, tan nyoocho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyacuquí ndo ñaña ra cuví ndusu yuhu Nyoo, tan nacahyí ndo ñaña nyívi vaha tsicoo tahan tsanaha.

³⁰ Tacan tan catyí ndo: "Tun tsatyin tsicoo yo quívi tsicoo tsii tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo", catyí ndo.

³¹ ¡Tsihin yacan ñi tan nacotó ndo tyin cuví ndo tata nyívi tsahñi tsi ra cuví ndusu yuhu Nyoo!

³² ¡Yacan vityin nyehé maa ndo na jaha ndo, javaha ndihí ndo tsa javahá tsii tsaahnu ndo, tun cuñí ndo!

³³ 'iNyoocho nyívi caquiñi cuví ndo, tan nyívi cuví tata coo! ¿Nacaa cua cacu ndo tan ña cua cuhun ndo anyaya? Ña cua cuví.

³⁴ Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsaa ra naha nu yucú ndo. Maa tyin nyoocho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu.

Tan cunyaa ndaha ndo tsi ra naha tan iin tan iin ñuu.

³⁵ Yacan cuenda, tsata nyooho cua cunyaa cuatyí tsa cuenda tandihí ra vaha tsa tsahñí tsií tsaahnu ndo nda cuanda tsihí ra Abel tan nda cuanda quiví tsihí ra Zacarías, sehe ra Berequías, tsa tsahñí ra naha tsitsi vehe ñuhu yatýn nu nyaá altar tsa yosó tsa jamañí yo tsi Nyoo.

³⁶ Tsa nditsa catyí yu tsihin ndo, tyin tandihí cuatyí can cua coso siqui nyooho, nyiví tsa iyó vityin —catyí ra Jesús tsihin ra naha.

Nu nducuiihya cuñí ra Jesús nyehé ra tsi nyiví ñuu Jerusalén

(Lc. 13.34-35)

³⁷ ¡Ñuu Jerusalén! ¡Ndahvi nyooho nyiví ñuu Jerusalén! Tyin tsahñí ndo tsi ra cuví ndusu yuhu Nyoo. Tan cañí ndo yuu tsi tandihí ra tsa jaquitsí Nyoo nu yucú ndo. Tan yuhu cuaha xaan tsaha cuñí yu jaha cuenda yu tsi ndo, tumaa iin ndiví sihi tsa jahá cuenda tsi sehe tí, tan naquihín vaha tí sehe tí tsitsi nditsin tí, maa tyin ña cuñí ndo.

³⁸ Nyehe ndo vityin, tyin tsa nacoq ihñí Nyoo tsi ndo.

³⁹ Tan catyí yu tsihin ndo, tyin ña cua nyehe ca ndo tsi yu nda cuanda quita quiví tsa cua catyí ndo tyin cahnu xaan cuví ra vatsí tsihin siví Nyoo Jutu yo —catyí ra Jesús.

24

Nu caahán ra Jesús tyin cua

tani vehe ñuhu cahnu
(Mr. 13.1-2; Lc. 21.5-6)

¹ Quita ra Jesús tsitsi vehe ñuhu cahnu can, tan tsa cuñí cuhun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra.

² Maa tyin nacahan ra Jesús tan catyí ra:

—¿A nyehé ndo tandihí tsa iyó ihya? Tsa nditsa catyí yu tsihin ndo, tyin ihya ndi in-tuhun ca yuu tan ña cua coso tsata inga tsi. Tandihí maa can tan cua tani —catyí ra.

Nu caahán ra Jesús náa cua cuvi tsa ndi cumañí ca naa ñuhu ñayiví

(Mr. 13.3-23; Lc. 21.7-24; 17.22-24)

³ Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahan ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñí ndi tsa catyí tuhun un tsihin ndi, ama cua cuvi tandihí tsa cahan un. ¿Nacaa tan coto ndi tatun tsa cuy-tyin tsa cua quitsi un inga tsaha tan tsa cua naa ñuhu ñayiví?

⁴ Tacan tan nacahan ra Jesús:

—Jaha vaha ndo cuenda coto jandavi ñaha nyiví tsi ndo.

⁵ Tyin cuaha xaan ra cua quitsi, tan cua cutyiñu ra naha siví yu, tan cua catyí ra naha: “Yuhu cuví ra Cristo, ra tsa jaquitsí Nyoo.” Tan

cuaha nyivi cua jandavi ñaha ra naha.

⁶ Tan cua ñihi tuhun ndo tyin iyó cuatyí tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi.

⁷ Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi.

⁸ Tandihí yacan cua cuvi nu ndi cua quitsaha nyehe nyivi tundoho.

⁹ Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihí nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu.

¹⁰ Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi.

¹¹ Tan cuaha xaan ra caahán cuendu cua coo, tan cua catyi ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha.

¹² Tan cuaha xaan tsa caquiñi cua coo. Yacan cuenda cua jandihí ñi tsa cuñi tahan ñi tsi ñi.

¹³ Maa tyin nyivi tsa tsinú iñi tsi yu nda cuanda nu ndihí, tan ña cua ndu uvi iñi ñi, cua cacu ñi.

¹⁴ Tan tanií cahnu ñuhu ñayivi cua nacutya tuhun vaha tsa cuenda cuhva tsa

ndacá ñaha Nyoo. Tan quivi cua coto nyivi tandihí ñuu tuhun vaha ihya, tacan tan cua naa ñayivi.

¹⁵ Ra Daniel, ra cuvi ndusu yuhu Nyoo, tyaa ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu Li, (nyooho tsa cahví, na cutuñi iñi ndo).

¹⁶ Tyin quivi can, nyivi tsa iyó Judea taahán tsi tsa quita ñi ican tan cuhun ñi ityi yucu.

¹⁷ Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi.

¹⁸ Tan nyivi yucú tsitsi cuhu ña cua cunuhu jihna ñi cunaquihin ñi jahma ñi.

¹⁹ ¡Ndahvi ñiñaha tsa ñuhú sehe quivi can! O tatun iyó sehe ñi tsa tyaxín, ¡ndahvi ñi can!

²⁰ Ndacan ndo tsi Nyoo na ña tahan tsi cunu ndo quivi vitsin, tan ndi quivi quitatú yo.

²¹ Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha.

²² Tyin tatun ña cua janducuiti Nyoo quivi can, yoñi maa cua cacu. Maa tyin cua janducuiti ra tsa cuenda tsa cuñi ra tsi nyivi nacatsi maa ra.

²³ Tatun yóo cua cahan tsihin ndo: “Jihna ndo, ihya nyaá ra Cristo” o “Nyehe ndo, ndacan nyaá ra Cristo”, ña tsinu iñi ndo.

²⁴ Tyin cua quitsi ra jandavi ñaha naha ra tan cua catyi ra naha tyin ra Cristo cuví ra naha. Cua catyi ra naha tyin ndusu yuhu Nyoo cuví ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsi maa Nyoo tun tsatyin cuvi jaha ra naha.

²⁵ Vaha tyin tsa tsitó ndo vityin ihya, jaha ndo cuenda tsi ndo quivi can.

²⁶ Yacan cuenda tatun catyi nyivi tsihin ndo: “Nyehe ndo, va ra Cristo nyii nu tsiqui can”, Ña cahun ndo. O tatun catyi ñi tsihin ndo: “Nyehe ndo, nyii ra tsitsi cuarto ihya”, ña tsinu iñi ndo.

²⁷ Tyin tumaa tsa cañi tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayi tsa quee nda gloria.

²⁸ Tumaa natacá nditsii nu cayucú tsa iñi, tacan cua nataca nyivi yihí cuenda yu quivi quitsi yu inga tsaha.

Nacaa cua quitsi Rayi tsa quee nda gloria inga tsaha

(Mr. 13.24-37; Lc. 21.25-33; 17.26-30, 34-36)

²⁹ Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihi tsa iyó andivi cua nacanda.

³⁰ Tacan tan cua quituvi seña ityi andivi tyin vatsi yuhu Rayi tsa quee nda gloria. Cua quitsi yu nu vico

ityi andivi tsihin tunyee iñi cahnu tan tsihin tsa cahnu cuví Nyoo. Tan tandihi nyivi iyó nu ñuhu ñayivi, cua vacu tsa xaan ñi tsa cua nyehe ñi tsi yu.

³¹ Tan cuaha ángel cuenda yu cua jaquitsi yu tyin ñihi cua tivi ra naha cutu tan cua jandu iin ra naha tsi nyivi nacatsi maa Nyoo. Cua quita ñi tani cahnu nu ñuhu ñayivi, nda cuanda nu ndihi ñuhu ñayivi tan nda cuanda nu ndihi andivi.

³² Cutuñi iñi ndo iin cuhva yutun tsa nañi higo: Tatun tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsi tun.

³³ Tan juven ñi tacan, tatun tsa cuví tandihi yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi.

³⁴ Tsa nditsa catyi yu tsihin ndo tyin tandihi yacan cua cuvi jihna, tsa ndi cumañi ca cúu nyivi iyó nu ñuhu ñayivi.

³⁵ Tan coo quivi cua cunaa andivi tan tsihin ñuhu ñayivi, maa tyin tuhun caahán yuhu, ña cua cundihí tsi tyin cua cundaa tandihi tsi.

³⁶ Maa tyin quivi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

³⁷ Tumaa cuvi quivi tsa tsicoo ra Noé, tacan cua cuvi quivi tsa cua quitsi nyico yuhu Rayi tsa quee nda gloria.

³⁸ Quivi tsa ndi cumañi ca cuun savi xaan, nyivi can,

tsatsí ñi, tsihí ñi, tindahá ñi, tan tsahá ñi tsi sehe síhi ñi tindaha nda cuando quívi quihví ra Noé tsitsi yutun ndoo.

³⁹ Tan sana iñi ñi tan tsaa savi tan tañi tandihi ñi. Tan tacan sana iñi ñi tan cua tahan tsi quívi quitsi nyico yuhu Rayi tsa quee nda gloria.

⁴⁰ Tan tatun yucú uvi taahan rayi tsitsi cuhu quívi can, intuhun ñi ra cua quihin yu, tan cua naco yu tsi inga ra.

⁴¹ Tan quívi can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña.

⁴² Cuatu vaha ndo tyin ña tsitó ndo náa hora cua quitsi ra ndacá ñaha tsi ndo.

⁴³ Tan coto ndo tuhun ihya tyin tatun iin tsitoho vehe tan tsitó ra náa cuhva cua quihví ñasuhu tsitsi vehe ra, cua cuatu vaha ra tan ña cua cuhva ra tsa quihví ñasuhu can.

⁴⁴ Yacan cuenda nyooho, cuatu vaha ndo. Tyin sana iñi ndo, tan cua quitsi nyico yuhu Rayi tsa quee nda gloria.

Musu vaha tan musu ña vaha

(Lc. 12.41-48)

⁴⁵ 'Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihi ca musu.

⁴⁶ Tan síi xaan cuñi ra cuví musu vaha can, tatun cuhva tsa jahá tyiñu ra tan tsaa tsitoho ra. Tyin tyaá yahvi ra tandihi tsa taahán tsi ica ra.

⁴⁷ Tan tsa nditsa catyí yu tsihin ndo, tyin tsitoho ra cua nacuhva ra tandihi cuii tsa cumí ra, cua quíhi ndaha ra, tyin vaha tyaá yahvi ra tsihin tyiñu jahá ra.

⁴⁸ Maa tyin iin musu ña vaha tsicá iñi ra tyin cua cu-cuee tsitoho ra.

⁴⁹ Tacan tan quitsaha cañi ra tsi inga musu, tan tsatsí ra tan tsihí ra nyixi tsihin ra tsiñi naha ra.

⁵⁰ Tacan tan sana iñi ra tan cua tsaa tsitoho ra quívi tsa ña ndatú ra tsi ra, tan hora tsa ña tsitó ra.

⁵¹ Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra icá tsihin nyívi tsa jahá tyin vaha xaan ñi tan ña icá ñi tsa vaha. Tacan tan cua vacu ra cuví musu ña vaha can tan cahyu ña cua cuvi nuhu ra tsa nyehé ra tundoho.

25

Nucahan ra Jesús iin cuhva cuenda utsi taahan ñaha yoco

¹ 'Tsa ndacá ñaha Nyoo tsi nyívi cuví tsi tumaa utsi taahan ñaha yoco tsa quihin lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha.

² Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi.

³ Ñi tsa soho ñuhú iñi can, nyisó ñi lámpara ñi maa tyin ña quihin ñi juhva ca acetye tsa natyihí ñi tsitsi lámpara ñi tatun ndihi tsi.

⁴ Tan ñi tsa catsi tsicá iñi can, nyisó síin ñi inga yutyi

acetye tsa cua natyihí ñi tsitsi lámpara can tatun ndihí acetye tsa yihí tsitsi lámpara can.

⁵ Tan ra tsa cua tindaha can cucueé xaan ra, tacan tan tñin ñumaahna tsi tandihí ñi, tan quixí ñi.

⁶ Tacan tan maa ñuu tsiñi ñi iin ndusu tsa catyí tyehen: “¡Tsa vatsí ra tsa cua tindaha! ¡Quita ndo, jatahan ndo tsi ra!”

⁷ Tandihí ñi can nduvita ñi tan quitsaha janduvahá ñi lámpara ñi.

⁸ Tacan tan quitsaha caahán tsa uhun ñi soho ñuhú iñi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñí ndahva lámpara ndi”, catyí ñi.

⁹ Maa tyin ñi yoco tsa catsi tsicá iñi can nacahan ñi tyehen: “Ña cua kuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca kuhun maa ndo kujata ndo nu cuyahví tsi.”

¹⁰ Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaá ra tsa cua tindaha can. Tan ñi yoco tsa ndatú vaha can, quihví ñi tsihin ra tsitsi vehe nu cua coo vico tindaha. Tan tsicundasí yuvehe can.

¹¹ Yahá can tan tsaá nyico ñi soho ñuhú iñi can, tan catyí ñi: “¡Yooho tata! ¡Nuña yuvehe na quihví ndi!”, catyí ñi.

¹² Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

¹³ Tacan tan quitsaha

caahán ra Jesús:

—Cuatu vaha ndo, tyin ña tsitó ndo ndáa quivi tan náa hora cua quitsi nyico yuhu Rayí tsa quee nda gloria.

Nu caahán ra Jesús tsihin yo na jaha tyiñu yo tsihin tsa tsaha Nyoo tsi yo
(Lc. 19.11-27)

¹⁴ Tsa ndacá ñaha Nyoo tsi nyivi cuví tsi tumaa iin rayí tsa nyaá cua quita kuhun inga ñuu nu cañi. Tan cana ra tsi musu ra, tan tsaha cuenda ra xuhun ra tsi ra naha tyin jaha cuenda ra naha.

¹⁵ Iin ra tsaha ra uhun mil xuhun, tan inga ra tsaha ra uvi mil xuhun, tan inga ra tsaha ra iin mil. Tsaha ra tsi intuhun intuhun ra nácaa kuhva tsitó ra jaha tyiñu ra naha tan cua nandaa siqui xuhun can. Tacan tan cuahán ra.

¹⁶ Musu tsa quihin uhun mil xuhun can, ñihi jahá tyiñu ra tsihin xuhun can, tan jahá canaa ra inga uhun mil ca siqui tsi.

¹⁷ Tan juvin ñi tacan tucu ra tsa quihin uvi mil can, jahá canaa ra uvi mil ca tsihin xuhun can.

¹⁸ Maa tyin ra tsa quihin intuhun ñi mil can, tsahan ra tan tsatyá ra iin yavi tsitsi ñuhu tan tyihí xeehe ra xuhun tsitoho ra.

¹⁹ Cuaha quivi yahá tan tsaá nyico tsitoho musu can. Tan quitsaha natavá cuenda ra tsihin intuhun intuhun ra naha.

²⁰ Jihna ca ra tsa quihin uhun mil xuhun can tsaá, tan nacuhvá cuenda ra uhun mil

ca siqui can, tan catyí ra: “Taa, uhun mil tsaḥa un tsi yu, juhun inga uhun mil ihya tsa jahā canaa yu siqui tsi.”

21 Tan tsitoho ra catyí ra tsihin ra: “Vaha. Iin musu vaha xaan cuví un. Tan javaha un tandiḥi tsa caḥan yu tsihin un. Luxu ñi xuhun tsaḥa yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan siñ cuñi un tsihin yu.”

22 Yaha can tan tsaḥa musu tsa quihín uvi mil xuhun can, tan catyí ra: “Taa, uvi mil ñi tsaḥa un tsi yu, juhun uvi mil ca ihya tsa jahā canaa yu siqui tsi.”

23 Tan catyí tsitoho ra tsihin ra: “Vaha. Iin musu vaha xaan cuví un, tan javaha un tandiḥi tsa caḥan yu tsihin un. Luxu ñi xuhun tsaḥa yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan siñ cuñi un tsihin yu”, catyí ra.

24 Tan cuhva tsa tsaḥa musu tsa quihín intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñi un naquihín un xuhun nu ña jahá tyiñu un, tan cuñi un naquihin un cosecha nu ña tatsi un.

25 Yacan cuenda nayuhvi yu tan tsaḥan yu tan tyihí xeehe yu xuhun un tsitsi ñuhu. Juhun xuhun ihya tsa tsaḥa un tsi yu”, catyí ra.

26 Tacan tan nacahan tsitoho ra, tan catyí ra tsihin

ra: “Musu ña vaha cuví un, tan musu jutsan cuví yooho. Tatun tsitó un tyin naquihín yu nu ña jahā tyiñu yu, tan quihín yu cosecha nu ña tatsi yu,

27 ¿nácaa tyin ña tsityihí un xuhun yu nu banco? Tun tsatyin tacan javaha un, tsa cua quitsi nyico yu cuví naquihin yu xuhun can tsihin xuhun siqui tsa jahā canaa tsi”, catyí ra.

28 Tacan tan quitsaha caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cuhva ndo tsi ra tsa ndahá utsi mil.

29 Tyin nyivi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyivi tsa ña cuñi jaha tyiñu tsihin tsa tsaḥa yu, nda cuanda tsa luxu tsa cumí ñi, cua quihin nyaa ndiḥi yu.

30 Tan musu tsa ña tsiñi ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsa ra, tan cahyu ña cua cuví nuhu ra tsihin tsa nyehé ra tundoho.”

Nu caḥan ra Jesús tyin cua cutuñi tandiḥi nyivi

31 'Quivi cua quitsi nyico yuhu Rayi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu siñ caá tan cua cundaca ñaha yu.

32 Tandiḥi cuiñ nyivi iyó naniñ cahnu nu ñuhu ñayivi cua nataca ñi nuu yu. Tan cua natava siñ yu tsi intuhun

intuhun ñi, tumaa ra jahá cuenda mbee tavá siin ra tsi mbee ticatyí tan tavá siin tucu ra tsi mbee chivo.

33 Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu.

34 Tacan tan yuhu tsa cuví yu Rey cua catyí yu tsihin nyívi nyecú tsiyo cuaha yu: “Ñaha nyooho nyívi tsa nasoco Jutu yu. Na quíhin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahá ra ihya quívi javahá ra ñuhu ñayívi.

35 Tyin quívi tsiyoco yu, nyooho tsahá ndo tsa tsatsí yu. Quívi na ityí iñi yu, tsahá ndo ndutyá tsihi yu. Tan quívi tsicá nuu yu cuví yu ra inga ñuu, tsahá ndo nu quixí yu.

36 Quívi cumañi jahma yu, tsahá ndo jahma tsinditsí yu. Quívi cuhví yu, tsinyehé ndo nu canyí yu. Tan quívi tsinyí yu vehe caa, tsinyehé ndo nu nyí yu”. Tacan cua cahan yu tsihin ñi.

37 Tan ñi tsa vaha iñi can cua ndaca tuhun ñi tsi yu, tan catyí ñi: “Jutu Mañi yu, ¿ama nyehe ndi tsiyoco un, tan tsahá ndi tsa tsatsí un? ¿Ama nyehe ndi na ityí iñi un tan tsahá ndi tsa tsihi un?”

38 ¿Ama nyehe ndi tsi un tsicá nuu un cuví un ra inga ñuu tan tsahá ndi vehe nu quixí un? ¿Ama cumañi jahma un, tan tsahá ndi jahma tsinditsí un?

39 ¿Ama nyehe ndi cuhví un, o tsinyí un vehe caa, tan

tsahan ndi tsinyehé ndi tsi un?” cua catyí ñi.

40 Tan yuhu tsa cuví Rey cua catyí yu tsihin ñi: “Tsa nditsa catyí yu tsihin ndo, tyin tandihi tumañi iñi tsa javahá ndo tsi ra ndaahvi, ra yañi yu, tsi yuhu javahá ndo tumañi iñi”, cua catyí yu tsihin ñi.

41 Tacan tan yuhu tsa cuví Rey cua cahan yu tsihin nyívi tsa yucú tsiyo satyin yu tye-hen: “Çatsiyo ndo nuu yu, nyooho, nyívi taahán tsi cuhun anyaya. Cuaahan ndo nu ñuhu tsa ña cua ndahva maa. Tsinu anyaya can tyin ican cua coo nu ña vaha tan tatyí ña vaha cuenda nu.

42 Tyin tsiyoco yu tan nyooho ña tsahá ndo tsa catsi yu. Na ityí iñi yu tan ña tsahá ndo ndutyá coho yu.

43 Tsicá nuu yu cuví yu iin ra inga ñuu, tan ña tsahá ndo nu cusu yu. Cumañi jahma yu tan ña tsahá ndo jahma cunditsi yu. Nacuhví yu tan tsinyí yu vehe caa, maa tyin ña tsahan ndo tsinyehé ndo tsi yu nu tsinyí yu”, cua catyí yu tsihin ñi.

44 Tacan tan cua catyí ñi tsihin yu: “Jutu Mañi yu, ¿ama nyehe ndi tsiyoco un, o na ityí iñi un, o tsicá nuu un cuví un ra inga ñuu, o nduve jahma un, o nacuhví un, o tsinyí un vehe caa, tan ña jatyinyee ndi tsi un?” cua catyí ñi.

45 Tan yuhu tsa cuví yu Rey cua catyí yu tsihin ñi: “Tsa nditsa caahán yu tsihin ndo tyin tandihi maa tsa ña javahá ndo tsihin nyívi

ndaahvi ihya, ña javahā ndihi ndo tsihin yu, cuví can”, cua catyi yu tsihin ñi.

⁴⁶ Tacan tan ñi can cua cuhun ñi nu cayú ñuhu tsa ña cua ndahva maa. Tan nyivi vaha can cua cuhun ñi coo ñi ñayivi nyito tsa ña cua naa maa.

26

Nu nducú ra mandoñi naha ra cuhva nácaa tan tiin ra naha tsi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva tsa ndihi cahan ra Jesús tandihi tuhun can, tan quitsahā catyí ra tsihin ra tsicá tsihin ra:

² —Nyooho tsitó ndo tyin ndi cumañi uvi ca quivi tan tahan tsi vico pascua. Tan yuhu, Rayii tsa quee nda gloria, cua cuhva cuenda nyivi tsi yu na tyaa ra cumi tyiñu tsi yu nu cruu —catyí ra.

³ Quivi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsaahnu tsa cuví ityi nuu.

⁴ Tan jandaa ra naha tyiñu nácaa cua jandavi ñaha ra naha tsi ra Jesús tan tiin ra naha tsi ra tan cahñi ra naha tsi ra.

⁵ Tan catyí ra naha:

—Ña cua cahñi yo tsi ra quivi maa vico, coto nduvaa xaan nyivi —catyí ra naha.

Nu tyosó iin ñaha ndutya tami jiñi ra Jesús

(Mr. 14.3-9; Jn. 12.1-8)

⁶ Ra Jesús nyii ra ñuu Beta-nia, vehe ra Simón, ra tsa yihí cuehe tyaahyu.

⁷ Tan natuhva iin ñaha nu nyaá ra Jesús, ndahá ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyoso ña ndutya can jiñi ra.

⁸ Tsa nyehe ra tsicá tsihin ra, nduxaan ra naha tan catyí ra naha:

—¿Nacuenda jativi ña ndutya tami can?

⁹ Vaha ca tun tsatyin xico ña can, tan ñihi cuaha ña xuhun tsihin can. Tan cuvi jatyinyee ña tsi nyivi ndaahvi tsihin xuhun can —catyí ra naha.

¹⁰ Tan tsa tsiñi ra Jesús tsa caahán ra naha, tacan tan catyí ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi.

¹¹ Tyin nyivi ndaahvi tandihi ñi quivi cua coo ñi tsihin ndo, maa tyin yuhu, ña naha ca cua cunyii yu tsihin ndo.

¹² Tyoso ña ndutya tami siqui cuñu ñuhu yu, tyin janduvahā ña itsi tyin cua cuhun tsi tsitsi ñuhu.

¹³ Tsa nditsa catyí yu tsihin ndo, tyin tandihi ñi nu cua cahan nyivi tuhun Nyoo tanií cahnu ñuhu ñayivi, cua nacatyí tuhun tucu ñi tsa javahā ñaha ihya, na nducuhun iñi nyivi tsi ña —catyí ra Jesús.

Nu xico ra Judas Iscariote tsi ra Jesús

(Mr. 14.10-11; Lc. 22.3-6)

¹⁴ Tacan tan iin ra tsicá tsihin ra Jesús, ra tsa nañi Judas Iscariote, tsahan ra tsicahan ra tsihin ra jutu tsa cuví ityi nuu naha ra.

¹⁵ Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsaha ra naha oco utsi xuhun cuitsin tsi ra.

¹⁶ Tan nda quivi can tan quitsaha nducú ra Judas cuhva cua nacuhva cuenda ra tsi ra Jesús tsi ra jutu can naha ra.

Nu cuxiñi ra Jesús tsihin ra tsicá tsihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quivi jihna ñi tsa quitsaha vico nu tsatsí nyivi paan tsa nduve yutsan iya yihí, ra tsicá tsihin ra Jesús natuhva ra naha nu nyaá ra tan quitsaha tsicá tuhun ra naha tsi ra tan catyí ra naha:

—¿Numaa cuñi un tsa cujanduvaha ndi tsa cuxiñi un cuenda vico pascua ihya?

¹⁸ Tan catyí ra Jesús tsihin ra naha:

—Cuaahan ndo tsitsi ñuu nda vehe rayi ihya. Tan catyi ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, catyi ndo tsihin ra —catyí ra Jesús.

¹⁹ Tacan tan javaha ra naha cuhva cahan ra Jesús tsihin

ra naha. Tan janduvaha ra naha tsa cuxiñi ra naha vico pascua can.

²⁰ Tsa cunaaha tan tsicun-yaá ra Jesús nu mesa tsihin tandihí utsi uvi ra tsicá tsihin ra.

²¹ Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooho cua xico ndo tsi yu tsi ra xaan iñi tsi yu.

²² Tan nducuihya xaan cuñi ra naha, tan quitsaha tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

²³ Tan nacahan ra Jesús tan catyí ra:

—Ra tsa tsatsí iin ñi coho tsihin yu, ra ican cua xico tsi yu.

²⁴ Yuhu, Rayi tsa quee nda gloria, cua tahan yu tumaa tsa caahan nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacu ra —catyí ra Jesús.

²⁵ Tacan tan nacahan ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahan ra Jesús, tan catyí ra:

—Juvín un.

²⁶ Tsitsi tsa tsatsí ra naha, ra Jesús quihin ra paan tan nacuhva ra tyahvi nyoo tsi Nyoo, tan tsahnu sava ra, tan tsaha ra tsi ra tsicá tsihin ra, tan catyí ra tsihin ra naha:

—Catsi ndo. Paan ihya cuví tumaa cuñu ñuhu yu.

27 Yaha can tan quihin tucu ra vasu vinu, tan nacuhva ra tyahvi nyoo tsi Nyoo, tan jayahā ra tsi tandihi ra naha tan catyí ra:

—Coho tandihi ndo vinu ihya.

28 Tyin cuví tsi tumaa niñi yu. Tan tsihin niñi yu cua cundaa tyiñu tsa ndoo Nyoo tsihin ndo, tyin cua cati niñi yu tsa cuenda tsa vaha tsi nyivi cuaha, tyin tsihin niñi yu cua coo tucahnu iñi cuatyí ñi.

29 Tan catyí yu tsihin ndo, tyin ña cua coho ca yu tahan vinu tsa cuví ndutya uvas ihya, nda cuanda tsa coho yu vinu tsaa tsihin ndo nda nu ndacá ñaha Jutu yu gloria —catyí ra.

Nu cahan ra Jesús tyin cua cahan ra Pedro tyin ña nacotó ra tsi ra

(Mr. 14.26-31; Lc. 22.31-34; Jn. 13.36-38)

30 Tsa yaha tsa tsita ra naha iin yaa Nyoo, tan cuahán ra naha yucu Olivo.

31 Tacan tan quitsaha caahán ra Jesús tsihin ra naha:

—Tandihí nyooho tan cua nadoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi.

32 Maa tyin tsa yaha nandoto yu, jihna ca yu cua cahun Galilea, tsa ndi cumañi ca cahun nyooho.

33 Tacan tan nacahan ra Pedro tan catyí ra:

—Vasu ndi maa tandihi ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

34 Tacan tan catyí ra Jesús tsihin ra:

—Tsa nditsa catyí yu tsihin un tyin juvin ñi maa tsacuaa vityin, tsa ndi cumañi ca vacu tsitooho, uñi tsaha cua cahan un tyin ña nacotó un tsi yu —catyí ra Jesús.

35 Tan ra Pedro catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra.

Tan juvin ñi tacan catyí tandihi ca ra tsicá tsihin ra.

Nu tsican tahvi ra Jesús tsi Nyoo nda Getsemaní

(Mr. 14.32-42; Lc. 22.39-46)

36 Tacan tan tsaa ra Jesús tsihin ra tsicá tsihin ra iin nu iyó cuaha yutun nu nañi Getsemaní, tan catyí ra tsihin ra naha:

—Cunyecu ndo ihya tsitsi tsa cuahán yu ndacan cua ndacan tahvi yu.

37 Tan quihin ra tsi ra Pedro tan nduvi sehe ra Zebedeo cuahán tsihin ra. Tan quitsi tucuiihya iñi cahun tsi ra, tan tsa tuñu cuñi ra.

38 Tacan tan catyí ra tsihin ra naha:

—Cahnu xaan tucuiihya iñi nyaá añima yu, nda cuanda cuñi cahñi ña can tsi yu. Ndo ndo ihya tan coo nyito ndo tsihin yu —catyí ra.

39 Tacan tan cuahán ra Jesús luxu ca ityi nuu tan tsicuiñi tsiti ra tan tsaquin ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuvi jatsiyo nyaha un tundoho ihya siqui yu, vaha xaan. Maa tyin na ña cuvi cuhva cuñi maa yu, tan na cuvi cuhva cuñi maa un —catyí ra.

40 Tacan tan tsaq ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora?

41 Coo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa nditsa tyin añima ndo, cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús.

42 Tan tsa tsahan ra tsa tsinu uvi tsaha, tsicán tahvi ra tyehen:

—Tyaa, tatun ña cuvi tsa jatsiyo nyaha un tundoho ihya siqui yu, na cuvi cuhva cuñi maa un —catyí ra.

43 Tacan tan tsaq ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñi xaan ra naha cusu ra naha.

44 Tacan tan nacoq ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsicán tahvi ra tsi Nyoo juvin ñi maa tsihin tuhun tsa tsa yahá cahan ra.

45 Tacan tan tsaq nyico ra nu yucú ra tsicá tsihin ra, tan catyí ra tsihin ra naha:

—Vityin cusu ndo tan quitatu ndo. Tyin tsa tsaq cuhva tsa cua nacuhva cuenda ra can tsi Rayi tsa quee nda gloria tsi ra iyó cuatyí naha ra.

46 Nduvita ndo, cohon ndo. Tyin tsa vatsí ra tsa xico tsi yu —catyí ra Jesús.

Nu tsaha cuenda ra Judas tsi ra Jesús tsi nu xaan ñi tsi ra nahnu

(Mr. 14.43-50; Lc. 22.47-53; Jn. 18.2-11)

47 Ndi caahán ca ra Jesús yacan, tan tsaq ra Judas, ra tsa cuví iin ra tsicá tsihin ra Jesús. Tan tsihin ra Judas tsaq tucu cuaha xaan nyivi ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi nyivi Israel naha ra.

48 Tan ra Judas, ra tsa tsahá cuenda tsi ra Jesús, tsa yahá tsahá ra iin seña tsi ra can naha ra, tyin coto ra naha yóo cua tiin ra naha. Tyin tsa yahá cahan ra tsihin ra naha:

—Ra tsa cua tyayuhu yu, ra ican cuví ra tsa cua tiin ndo.

49 Tacan tan natuhva ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

50 Tacan tan nacahan ra Jesús tan catyí ra tsihin ra:

—¿Náa tyiñu vatsí un ñih?

Tacan tan natuhva ra can naha ra tan tiin ra naha tsi ra Jesús.

51 Tacan tan iin ra cutahán tsihin ra Jesús, tava ra mityi tan tsahnya ra soho musu jutu tsaahnu tsa cuví ityi nuu.

52 Tan catyí ra Jesús tsihin ra:

—Natyihí mityi un tsitsi vena un. Tyin tandihí nyivi tsa cañí tahan tsihin mityi, juvin ñi tsihin mityi cua cúu ñi.

53 ¿A ña tsitó un tyin tatun yuhu tan cuñí yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu?

54 Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

55 Tacan tan catyí ra Jesús tsihin tandihí nyivi:

—¿A vatsí tñin ndo tsi yu tumaa cua tñin ndo iin ñasuhu? tyin ndahá ndo mityi tan yutin. Tandihí quivi tsinyii yu jacuahá yu tsi ndo tsitsi vehe ñuhu cahnu, tan ña tñin ndo tsi yu.

56 Tandihí yacan cuví tyin tacan tan cundaa cuhva catyí tuhun Nyoo, tsa tyaa ra cuví ndusu yuhu Nyoo tahan tsanaha.

Tacan tan tandihí ra tsicá tsihin ra, tsinu ra naha. Tan ndoo intuhun ña maa ra.

Nu tsicá tuhun ra mandoñi naha ra tsi ra Jesús tatun Sehe Nyoo cuví tsi ra

(Mr. 14.53-65; Lc. 22.54-55, 63-71; Jn. 18.12-14, 19-24)

57 Tan ra tsa tñin tsi ra Jesús, tsindaca ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra.

58 Tan ra Pedro cuahán ra tsata ra naha, tan tsaá ra nda nuquehe vehe ra Caifás can. Tan quihvi ra tan ndoo ra nyii ra tsihin vitya can naha ra, tyin cua nyehe ra nácaa cua quita tuhun can.

59 Ra jutu tsa cuví ityi nuu naha ra, tan ra mandoñi naha ra, tan tandihí ra cumí tyiñu naha ra, nducú ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra.

60 Maa tyin ña ñihí maa ra naha cuatyí tyaa ra naha siqui ra, vasu ndi maa cuaha nyivi tsahan ñi tsicahan ñi cuendu siqui ra. Tan nu ndihí tuhun, tsaá uvi ca tsa ndaa tsa caahán cuendu.

61 Tan catyí ra naha:

—Ra ihya, catyí ra tyin cuví cani ra vehe ñuhu cahnu Nyoo, tan tsitsi tsa uñi quivi cua janduvita ra tsi inga tsaha —catyí ra naha.

62 Tacan tan ra jutu tsa cuví ityi nuu can, nduvitá ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

63 Maa tyin ra Jesús ña nacahan ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí

un tsa nditsa vaha. ¿A ra Cristo Sehe Nyoo cuví tsi un? —catyí ra.

⁶⁴ Tan catyí ra Jesús tsihin ra:

—Juvín yu cuví. Tan catyí tucu yu tsihin ndo, tyin cua nyehe ndo tsi yuhu, Rayii tsa quee nda gloria, cunyaa yu xiin cuaha Nyoo ra iyó tandihí tunyee iñi, tan cua nyehe ndo nu cua quítsi yu nu vico ityi andiví inga tsaha —catyí ra.

⁶⁵ Tacan tan ra jutu tsaahnu tsa cuví ityi nuu can tsahnya ra jahma ra tumaa iin seña tyin cuñi maa ra tyin ña vaha tsa caahán ra Jesús, tan catyí ra tsihin tandihí ca ra naha:

—Ra ihya tsicoo cuatyí ra nuu Nyoo tsihin tsa caahán ra. ¡Nyehe ndo vityin! Ña cuñi ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cahan ra.

⁶⁶ ¿Náa catyí ndo vityin?

Tan nacahan ra naha tan catyí ra naha:

—Iyó cuatyí ra, yacan taahán tsi tsa cúu ra.

⁶⁷ Tacan tan tiví sñi ra naha nuu ra tan cañi ra naha tsi ra. Inga ra cañi ra naha nuu ra tsihin tsiqui.

⁶⁸ Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

Nu cahan ra Pedro tyin ña nacotó ra tsi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Tsitsi tsa ndi nyí ra Pedro nuquehe ityi tsata vehe can, tan iin ñaha tsa cuví musu jutu can, natuhva ña nu nyaá ra tan catyí ña tsihin ra:

—Yooho tucu tsica un tsihin ra Jesús, ra Galilea can.

⁷⁰ Tan ra Pedro catyí ra nuu tandihí nyiví yucú can:

—Ña tsica yu tsihin ra can. Ña tsitó yu náa caahán un.

⁷¹ Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsica ndihí tucu ra ihya tsihin ra Jesús, ra ñuu Nazaret —catyí ña.

⁷² Tan inga tsaha tyihí xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

⁷³ Tañi cui ca, tan ra yucú can natuhva ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

⁷⁴ Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cañi maa Nyoo tsi yu tatun ña nditsa tsa caahán yu —catyí ra.

Tan juvín ñi cuhva can navacu tsitooho.

⁷⁵ Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho, yooho tsa yaha cahan un uñi tsaha tyin ña nacotó un tsi yu”, catyí ra

Jesús, nducuhun iñi ra. Tacan tan quitā ra ican, tan tsacu xaan ra tsa cuihya cuñi ra tsa javahā ra tacan.

27

Nu nacuhva cuenda ra naha tsi ra Jesús tsi ra Pilato
(Mr. 15.1; Lc. 23.1-2; Jn. 18.28-32)

¹ Tan tsa tuvī inga quivi, tandihī ra jutu tsa cuvī ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús.

² Tan nuuhñi ra jahā ra naha. Tan tsahan ra naha tsinacuhva cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

Nu tsihi ra Judas

³ Tsa nyehe ra Judas, ra tsa xico tsi ra Jesús, tyin cua cúu ra, tan ndu uvī iñi ra tsa javahā ra, tan nacuhva ra tsa oco utsi xuhun cuitsin can tsi ra jutu tsa cuvī ityi nuu naha ra, tan tsi ra mandoñi ñuu naha ra.

⁴ Tan catyī ra:

—Tsicoo cuatyī yu, tyin tsahā cuenda yu tsi iin ra nduve cuatyī na cúu ra.

Tan nacahan ra naha tan catyī ra naha:

—¿Nacuenda nyuhu? ¡Nyehe maa yooho!

⁵ Tacan tan tyoso ihñi ra Judas xuhun can tsitsi vehe ñuhu cahnu, tan quitā ra cuahán ra tsityihī ra yoho jucun ra tan ticaā ra tsi ra iin nu yutun, tan tsihi ra.

⁶ Ra cuvī ityi nuu tsihin jutu can naha ra naquihin ra naha xuhun can tan catyī ra naha:

—Ña cuvī tyihi yo xuhun ihya tsitsi caja nu yihī xuhun tsa tsahá nyivi tsi Nyoo tyin xuhun tsa cuyahvi ra tsa cua cati niñi cuvī can.

⁷ Tacan tan ndoo ra naha tyiñu, tyin cua jatā ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyivi inga ñuu tun tsihi ñi ñuu can.

⁸ Yacan cuenda nañi ñuhu can nda cuando vityin “Ñuhu Cuenda Tsa Tsati Niñi Nyivi”.

⁹ Tacan cuvī tyin cundaā tsa tyaa ra Jeremías, ra cuvī ndusu yuhu Nyoo tahan tsanaha nu catyī tsi tyehen: “Juvín ñi maa ra naha quihin nyico tsa oco utsi xuhun cuitsin, tsa jatā ra naha tsi ra Cristo.

¹⁰ Tan tsihin can, jatā ra naha ñuhu tsa nañi ‘Ñuhu Ra Javahá Quisi’, tacan catyī Jutu Mañi yo tsihin yu”, catyī tsi.

Nu nyehe ra Pilato tyin nduve cuatyī ra Jesús

(Mr. 15.2-5; Lc. 23.3-5; Jn. 18.33-38)

¹¹ Tsindaca ra mandoñi can naha ra tsi ra Jesús nuu ra ndacá ñaha, tan ra can tsica tuhun ra tsi ra, tan catyī ra:

—¿A yooho cuvī rey cuenda nyivi Israel?

Tan ra Jesús catyī ra tsihin ra:

—Juvín yu, tumaa cuhva catyī maa un.

12 Tan cuhva tsa tyaa ra jutu can naha ra tan ra mandoñi naha ra cuatyí síqui ra, ña nacahan maa ra.

13 Tacan tan catyí ra Pilato tsihin ra:

—¿A ña tsiñi un tandihi tsa caahán ra naha síqui un?

14 Maa tyin ra Jesús ña nacahan maa ra. Tan iyo xaan cuñi ra ndacá ñaha can tyin ña nacahan ra.

Nu cahan ra cumí tyiñu tyin taahán tsi cúu ra Jesús

(Mr. 15.6-20; Lc. 23.13-25; Jn. 18.38—19.16)

15 Tan vico pascua tuhvá ra ndacá ñaha jañá intuhun ra yucú vehe caa. Ndáa ra tsa nacatsi maa nyivi, juvin ra cua quita nuña.

16 Tan quivi can nyii iin ra tsa nañi Barrabás vehe caa. Tan tandihi nyivi tsitó tuhun ra.

17 Tan cuhva tsa ndu iin nyivi, ra Pilato tsicá tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

18 Tyin tsitó ra tyin tsa cuenda tsa ndasi cuñi ra jutu can naha ra nyehe ra naha tsi ra Jesús, yacan cuenda tsaha cuenda ra naha tsi ra tsi ra Pilato.

19 Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhvi xaan tsi tsi yu”, catyí ña.

20 Maa tyin ra jutu can naha ra tan ra mandoñi naha ra, cuñihi ra naha natyuhú ra naha tsi nyivi na ndacan ñi tsa jaña ra Pilato tsi ra Barrabás, tan na cúu ra Jesús.

21 Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahan ñi, tan catyí ñi:

—Jaña tsi ra Barrabás.

22 Tan ra Pilato tsicá tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañi Cristo ihya?

Tandihi ñi nacahan ñi tan catyí ñi:

—¡Tyaa tsi ra nu cruu na cúu ra!

23 Tacan tan catyí ra Pilato tsihin ñi:

—Tan ¿náa tsa ña vaha javaha ra?

Maa tyin maa ñi cana tsaa ñi inga tsaha tan catyí ñi:

—¡Tyaa tsi ra nu cruu na cúu ra!

24 Tsa nyehe ra Pilato tyin ña cuvi jaha ra tsi nyivi, tyin ñihi xaan cuvaá jahá ñi. Tacan tan tsican ra ndutya, tan nacatyá ra ndaha ra nuu nyivi can, tan catyí ra:

—Ña cua ndoo cuatyí tsa cua cúu ra vaha ihya síqui yuhu, tyin síqui nyooho cua ndoo cuatyí can.

25 Tan tandihi nyivi nacahan ñi, tan catyí ñi:

—Na ndoo maa tsi síqui ndi tan síqui sehe ndi.

26 Tacan tan ra Pilato jaña ra tsi ra Barrabás, tan tava tyiñu ra na ndoho ra Jesús,

tan nacuhva cuenda ra tsi ra tsi ra andaru naha ra na cúu ra nu cruu.

27 Tacan tan ra andaru cuenda ra Pilato, ra ndacá ñaha can tsindaca ra naha tsi ra Jesús nda vehe tyiñu ra Pilato, tan jandu iin ra naha tsi tandihi ca andaru nu nyaá ra.

28 Tacan tan tava ra naha jahma ra tan jacunditsi ra naha iin jahma cuaaha tsi ra.

29 Tan tyihi ra naha iin corona tsa tsinu tsihin iñu jiñi ra. Tan tsaha ra naha iin yutun tatun na cundaha ra tsihin ndaha cuaha ra. Tacan tan tsicuiñi tsiti ra naha nuu ra, tan tsacu nducu ra naha tsi ra tan catyí ra naha:

—¡Nacumi tsi un, yooho Rey cuenda nyivi Israel!

30 Tan tiví sii ra naha tsi ra. Tan quihin ra naha yutun tatun can tan cañi ra naha jiñi ra.

31 Tsa yaha tsa tsacu nducu ra naha tsi ra tan tava ra naha jahma cuaaha tsa nditsi ra, tan jacunditsi nyico ra naha jahma maa ra tsi ra. Tacan tan cuahán ra naha tsihin ra cua cahni ra naha tsi ra nu cruu.

Nu tyaa ra naha tsi ra Jesús nu cruu

(Mr. 15.21-32; Lc. 23.26-43; Jn. 19.17-27)

32 Tsa quita ra naha ican, tahan ra naha tsi iin ra ñuu Cirene, tsa nañi Simón. Tan jañiñi ra naha tsi ra na cuiso ra cruu ra Jesús.

33 Tan tsaá ra naha iin nu nañi Gólgota, tan cuñi tsi catyí “Yiqui Jiñi Ndiyí”.

34 Tan ican tsaha ra naha vinu nasaca tsihin ndutya uva xaan coho ra Jesús. Tan tsa yaha tsa tsihi ra luxu can, ña cuñi ca ra coho ra.

35 Tan tsa yaha tsa tyaa ra naha tsi ra nu cruu, tacan tan ra andaru can quihin ra naha jahma ra tan tava cuenda ra naha tyin cua nyehe ra naha ndáa ra jaha canaa intuhun intuhun jahma ra. Tacan cuvi tyin cundaá tuhun tsa tyaa iin ra cuvi ndusu yuhu Nyoo tahan tsanaha nu catyí tsi tyehen: “Tava cuenda ra naha tan tsatsa ra naha jahma yu”, catyí tsi.

36 Tacan tan tsinyecu ra naha ican tyin jaha cuenda ra naha tsi ra.

37 Tan ityi jiñi ra tyaa ra naha letra tsa catyí nacuenda cua cúu ra. Tan catyí tsi tyehen: “Ra ihya cuvi ra Jesús, rey cuenda nyivi ñuu Israel.”

38 Tan tyaa tucu ra naha uvi taahan ra suhu tsihin ra nu uvi taahan ca cruu. Iin ra tyaa ra naha xiin cuaha ra, tan inga ra xiin satyin ra.

39 Tan nyivi tsa yaha ican, caahán ñi tsi ra, tan javicó ñi jiñi ñi tsa tsacú nducu ñi tsi ra.

40 Tan catyí ñi tsihin ra:

—¡Yooho tsa cahan un tyin cua cani un vehe ñuhu cahnu, tan tsitsi tsa uñi quivi tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuvi tsi un! —catyí ñi tsihin ra.

41 Tan juvin ñi tacan tsacú nducu ra jutu tsa cuvi ityi nuu naha ra tsi ra, tan ra maestro cuenda ley vehe

ñuhu naha ra tan ra fariseo naha ra, tan ra mandoñi ñuu naha ra. Tan natuhún taha ra naha tan catyí ra naha:

42 —Jacacū ra tsi inga nyivi, maa tyin ña cuví jacacu ra tsi maa ra. Tun nditsa tyin Rey cuenda nyivi Israel cuví ra, na nuu ra nu cruu can, tan cua tsinu iñi yo tsi ra.

43 Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñí ra tsi ra. Tyin catyí ra tsihin yo tyin Sehe Nyoo cuví tsi ra.

44 Tan nda cuanda nu ñasuhu nahnu tsa nyaá nu cruu xiin ra tan tsacū nducu ndihí nahnu tsi ra.

Nu tsihi ra Jesús

(Mr. 15.33-41; Lc. 23.44-49; Jn. 19.28-30)

45 Tacan tan ndunañ tani cahnū ñuhu ñayivi tsa ora tan nda cuanda caa uñi tsa tseñi.

46 Tan juvin ñi cuhva can, ñihi xaan cana tsa ra Jesús. Tan catyí ra:

—Elí, Elí, ¿lama sabactani? —tan cuñí tsi catyí: Nyoo Jutu yu, Nyoo Jutu yu, ¿nacuenda nacoó ihñi un tsi yu?

47 Juhva ra yucú can naha ra, tsiñi ra naha tsa cahān ra, tan catyí ra naha:

—Ra Elías, ra cuví ndusu yuhu Nyoo tsanaha, caná tsa ra.

48 Tan juvin ñi cuhva can, cuahán iin ra cua quihin ra iin yahma cuhva caá catyi, tan jatyi ra tsihin vinu iya, tan tyaa ra nu yutun, tan jatuhva ra yuhu ra Jesús tyin na coho ra.

49 Maa tyin inga ra naha catyí ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

50 Inga tsaha cana tsa ñihi ra Jesús, tacan tan tsihi ra.

51 Tan juvin ñi cuhva can ndata sava jahma tsa ticaá tsitsi vehe ñuhu cahnū tyasi Nu Ii Xaan, nda cuanda ityi siqui tan nda cuanda ityi tsaha. Tan ñihi xaan tañ. Tan tahvi cuatyí cava nahnu.

52 Tan nuña yuhu ñaña. Tan cuaha nyivi tsa tsinú iñi tsi Nyoo tan tsihi ñi, nandoto ñi.

53 Tan tsa yahā nandoto ra Jesús quitā ñi nu ñaña tan quihvi ñi tsitsi ñuu Jerusalén, tan cuaha nyivi nyehe tsi ñi.

54 Tacan tan ra capitán tan ra andaru tsa jahā cuenda tsi ra Jesús, nayuhvi xaan ra naha tsa tañ, tan tsa nyehe ra naha inga ca tsa cuví. Tan catyí ra naha:

—Nditā nditsa cuii, tyin Sehe Nyoo cuví tsi ra ihya.

55 Cuaha ñiñaha tsa tsinyicun tsi ra Jesús nda Galilea tan jatinyee ñi tsi ra, yucú ñi nyehe ñi ndasava.

56 Tan juhva ñi ican cuví ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

Nu tsicutsi ra naha tsi ra Jesús

(Mr. 15.42-47; Lc. 23.50-56; Jn. 19.38-42)

57 Cuhva tsa cuñí cuaa, quitsi iin ra cuca tsa nañi José, ra ñuu Arimatea. Tan tsinú iñi ra tsi ra Jesús.

58 Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra.

59 Tacan tan quihin ra José cuñu ñuhu ra, tan cava nuu ra iin jahma cuitsin vaha tsi ra.

60 Tan tyihj ra cuñu ñuhu ra Jesús tsitsi iin ñaña tsa tsa cuví iin yavi yuu tsa tava tyiñu ra tsatyā ra naha. Tan tsa yaha tsa nacasi ra yuhu ñaña can tsihin iin yuu cahnu, tan cuahan ra.

61 Tan ña María tsa quee Magdala, tan inga ña María, ndoq ñi yucú ñi yuhu ñaña can.

Nu jahá cuenda ra andaru ñaña ra Jesús

62 Tan tsa inga quivi, quivi quitatú nyivi cuví can, tan ra jutú tsa cuví ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato.

63 Tan catyí ra naha tsihin ra:

—Yooho taa, nducuhun iñi ndi tyin ra vatya can, catyí ra tahan nyito ra tyin tsa yaha tsa uñi quivi tsa cua cúu ra tan cua nandoto ra.

64 Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cahun ra tsicā tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuví, yaha ca cuhva cua cuví tan ñavin ca tsa jihna ñi —catyí ra naha.

65 Tan ra Pilato catyí ra:

—Quihin ndo andaru ihya. Cuaahan ndo, tan jaha cuenda vaha ndo ñaña can, nácaa cunye maa ndo jaha cuenda ndo —catyí ra.

66 Tacan tan cuahan ra naha, tan jahā cuenda vaha ra naha ñaña can, tan tyaa ra naha iin tsa tyaa ra naha tsata yuu tsa ndasí can tyin tatun nacanda yuu can coto ra naha. Tan nacoq ra naha tsi ra andaru jahá cuenda ra naha ican.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

1 Tsa yaha quivi tsa quitatú nyivi, cuhva tsa cuñí cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña.

2 Tan ñihi xaan taan tyin quitsi iin ángel Jutu Mañi yo quee ra andivi, tan tsaq ra nu ñaña can. Tan jatsiyō ra yuu tsa ndasí yuhu can, tan tsicunyaq ra tsata can.

3 Tan xiñu xaan ra, tumaa tsa cañí tatsa. Tan cuitsin xaan jahma ra.

4 Cuhva tsa nyehe ra andaru can naha ra tsi ra, nayuhvi xaan ra naha tan quitsaha nihí ra naha, tan nda cuanda tsihi naaha ra naha tsihin tsa yuuhvi ra naha.

5 Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo.

⁶ Yoñi ca ra nyii ihya, tyin tsa nandoto ra, tumaa catyi ra. Naha ndo tan nyehe ndo nu tinyi ra naha tsi ra.

⁷ Janumi xaan ndo cuhun ndo cucatyí tuhun ndo tsihin ra tsica tsihin ra tyin tsa nandoto ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyi tuhun yu tsihin ndo —catyi ángel can tsihin ñi.

⁸ Tacan tan numi ñi quita ñi nu ñaña can. Yuuhví ñi, tan sii xaan cuñi tucu ñi. Tan tsinú xaan ñi cuahán ñi cua catyi tuhun ñi tsihin ra tsica tsihin ra Jesús.

⁹ Tan cuhva can quituvi ra Jesús nuu ñi tan tsaha ra nacumi tsi ñi. Tacan tan natuhva ñi nu nyaá ra tan tsicuiñi tsiti ñi nuu ra tan jacahnú ñi tsi ra, tan tsicunumi nyaá ñi tsaha ra.

¹⁰ Tan catyi ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyi ra tsihin ñi.

Tuhun tsa nacatyí tuhun ra andaru naha ra

¹¹ Tsitsi tsa cuahán ñi can, juhva andaru tsa jahá cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra.

¹² Tacan tan ra jutu can naha ra tsahan ra naha tsicahan ra naha tsihin ra mandoñi ñuu naha ra na

natuhun tahan ra naha nácaa cua javaha ra naha. Tacan tan cuaha xaan xuhun tsaha ra naha tsi ra andaru can naha ra.

¹³ Tan catyi ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixí ndo, tsahan ra tsica tsihin ra Jesús tan quihin ra naha cuñu ñuhu ra.

¹⁴ Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo.

¹⁵ Tacan tan quihin ra andaru can xuhun can, tan cuahán ra naha cuajavahá ra naha cuhva catyi ra naha tsihin ra naha. Tan nda quivi vityin tan tacan caahán nyivi ñuu Israel.

Nu tava tyiñu ra Jesús tsi ra tsicá tyiñu ra

(Mr. 16.14-18; Lc. 24.36-49; Jn. 20.19-23)

¹⁶ Tan tacan, tandihi tsa utsi iin ra tsica tsihin ra, cuahán ra naha nda Galilea nda yucu nu catyi maa ra Jesús tsihin ra naha tyin cuhun ra naha.

¹⁷ Tan cuhva tsa nyehe ra naha tsi ra Jesús, jacahnú ra naha tsi ra, maa tyin juhva ra naha uvi ñi tsicá iñi ra naha.

¹⁸ Tacan tan natuhva ra Jesús nu nyecú ra naha tan catyi ra tsihin ra naha:

—Nyoo tsaha ra tsa cundaca ñaha yuhu tandihi andivi tan nu ñuhu ñayivi ihya.

¹⁹ Yacan cuenda, cuaahan ndo tandihi nu iyó nyivi,

tandihí ñi ñuu, tan catyi ndo tsihin ñi na cunyicun ñi tsiyu. Tan jacoondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatyí li ra.

²⁰ Tan jacuaha ndo tsi ñi na tyaa yahvi ñi tandihí tsa catyi yu tyin javaha ndo. Tan coto ndo tyin yuhu cunyaa yu tsihin ndo tandihí quivi nda cuanda naa ñayivi —catyí ra Jesucristo tsihin ra tava tyiñu ra.

Tan na cuvi tsi tacan ñi.

Tuhun Nyoo Tsa Tyaa ra Marcos

Nu caahán ra Juan, ra jacoondutya tsi nyivi, tuhun Nyoo

(Mt. 3.1-12; Lc. 3.1-9, 15-17; Jn. 1.19-28)

¹ Tyehen quitsaha tuhun ra Jesucristo, Sehe Nyoo.

² Tsanaha ra Isaías, ra cuvi ndusu yuhu Nyoo, tyaa ra nácaa cua quitsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyivi

na janduvaha ñi tsi ñi tsa ndi cumañi ca cahun un nu yucú ñi, catyí Nyoo tsihin ra Cristo.

³ Cua tyaa soho yo ndusu ra nu cana tsaa ra nu tsiqui, tan catyí ra:

“Nuña ndo iin ityi cuiti tan natyiso vaha ndo tsi ndo tyin tsa vatsí Jutu Mañi yo”, catyí tuhun tsa tyaa ra Isaías.

⁴ Tacan cuvi; quitsi ra Juan nu tsiqui, tan javaha ra cuhva tyaa ra Isaías. Catyí ra tsihin nyivi tyehen: “Ndu uvi iñi ndo cuatyí ndo tan coondutya ndo tyin tacan tan jaha Nyoo tucahnu iñi tsi ndo tsa cuenda cuatyí ndo.”

⁵ Tan tandihi nyivi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiñi ñi tsa caahán ra, ndu uvi iñi ñi cuhva iyó ñi tan nahma

ñi cuatyí ñi nu Nyoo. Tacan tan tsicoondutya ñi yutya Jordán.

⁶ Tan jahma ra Juan tsinu tsi tsihin ixi camellu. Tan cinturón ra cuvi ñi. Tan maa ñi tica xama tsatsí ra, tan tsihi ra ndutya ñuñu tsa iyó tsitsi cuhu.

⁷ Caahán ra tuhun Nyoo tsihin nyivi tan catyí ra:

—Tsa yatyin cuí quitsi ra tsa cahnu ca cuvi tan ñavin ca yuhu. Tan ndi ña taahán tsi tsi yu tsa ndatsi yu ñi nditsan ra, tyin cahnu ca cuvi maa ra tan ñavin ca yuhu.

⁸ Yuhu jacoondutya yu tsi ndo tsihin ndutya ñi. Maa tyin maa ra cua jacoondutya ra tsi ndo tsihin Tatyí Ii Nyoo —catyí ra Juan.

Nu tsicoondutya ra Jesús
(Mt. 3.13-17; Lc. 3.21-22)

⁹ Quivi can quita ra Jesús ñuu Nazaret, tsa canyí Galilea, tan cuahán ra nu nyí ra Juan yutya Jordán tyin jacoondutya ra tsi ra.

¹⁰ Tsa quita ra Jesús tsitsi ndutya tsa yaha tsicoondutya ra, nuña andivi tan nyehé ra vatsí nuú Tatyí Ii Nyoo siqui ra tan caá tsi tumaa caá iin paloma.

¹¹ Tan nacahan iin ndusu ityi andivi tan catyí tsi tsihin ra tyehen:

—Yooho cuvi Sehe yu tan cuñi xaan yu tsi un. Tan sii xaan cuñi yu nyehé yu tsi un —catyí ndusu can.

Nu nducu cuhva nu ña vaha tsi ra Jesús
(Mt. 4.1-11; Lc. 4.1-13)

12 Tsa yahā tsa tsicoon-dutyā ra Jesús tan tsindaca Tatyí Ii Nyoo tsi ra nu tsiqui.

13 Tan tsinyij ra ican uvi xico quivi nu nduve nyivi iyó, maa ñi quití xaan iyó. Tan nducū cuhva nu ña vaha tsi ra. Yahā can tan tsaā ángel Nyoo tan jatyinyee ra naha tsi ra.

Nu quitsahā caahán ra Jesús tuhun Nyoo tsihin nyivi iyó Galilea

(Mt. 4.12-17; Lc. 4.14-15)

14 Tsa yahā tsa tyihí nyivi tsi ra Juan vehe caa, tan tsinuhū ra Jesús Galilea tan caahán ra tsihin nyivi nácaa ndacá ñaha Nyoo.

15 Tan catyí ra:

—Tsa tsaā quivi tsa cua cundaca ñaha Nyoo tsi nyivi iyó nu ñuhu ñayivi ihya. Yacan cuenda ndū uvi iñi ndo cuatyí ndo, tan tsinu iñi ndo tuhun tsa jacacú Nyoo tsi nyivi —catyí ra Jesús.

Nu canā ra Jesús cumi taa-han ra tñn tyaca

(Mt. 4.18-22; Lc. 5.1-11)

16 Iin quivi cuahán ra Jesús tsicá ra yuhu miñi tsa nañi Nduya Ñuhu Galilea. Tan nyehe ra tsi ra Simón tan ra Andrés, yañi ra Simón, cañi ra naha traya ra naha nu ndutya, tyin ra tñn tyaca cuví ra naha.

17 Tan catyí ra Jesús tsihin ra naha:

—Ñaha ndo, quitsi nyicun ndo tsi yu, tan yuhu cua jatyinyee yu tsi ndo tyin tumaa tsa tñn ndo tyaca ihya, tacan cua ñihi ndo nyivi cua

cuvi nyivi Nyoo —catyí ra Jesús tsihin ra Simón tan tsihin ra Andrés.

18 Juvín ñi cuhva can tan nacoō ra naha traya can, tan cuahán ra naha cuanyicún ra naha tsi ra.

19 Ña cuaha ñi tsicā ra naha, tan nyehe ra Jesús tsi uvi taa-han sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya.

20 Canā ra tsi nduvi taa-han ra naha. Tan nacoō ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

Nu quitā tatyí ña vaha tsi iin rayi

(Lc. 4.31-37)

21 Tsa tsaā ra Jesús ñuu Capernaum tsihin ra tsicá tsihin ra, quihvi ra Jesús tsitsi vehe ñuhu quivi quitatú nyivi. Tacan tan quitsahā jacuahá ra tuhun Nyoo tsi nyivi.

22 Tan iyo xaan cuñi ñi tsa tsiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra.

23 Tan tsitsi vehe ñuhu can nyii iin ra yihí tatyí ña vaha. Tan canā tsaa ra tan catyí ra:

24 —¿Nacuvi tyihí un tsi un tsihin nyuhu, yoocho Jesús, ra ñuu Nazaret? ¿A vatsí un vatsí janaa un tsi ndi? Yuhu nacotó vaha yu tsi un, tan tsitó yu tyin Sehe Ii Nyoo cuví un

—catyí ra can tsihin ra Jesús jahá nu tatyí ña vaha can.

25 Tacan tan nduxaan ra Jesús tsi nu tan catyí ra tsihin nu:

—¡Ña cahan ca un! ¡Quita tsi ra ihya! —catyí ra tsihin nu.

26 Tacan tan quitsaha ñihi rayi can jahá nu. Tan ñihi xaan cana tsaa ra jahá nu, tan quita nu tsi ra.

27 Tandihí nyívi iyo xaan cuñí ñi tan tsicá tuhun tahan ñi tsi ñi, tan catyí ñi:

—¿Náa cuví tsa nyehé yo ihya? ¿Náa tuhun tsaa jacuahá ra ihya? ¡Tyin iyó vaha tunyee iñi tsi ra, nda cuando tatyí ña vaha tan tyaá yahví tsi ra! —catyí ñi.

28 Tan numi ñi tsito nyívi iyó tandihí ñuu tsa cayucú Galilea tuhun ra Jesús.

Nu nduvaha tyiso ra Simón Pedro

(Mt. 8.14-15; Lc. 4.38-39)

29 Tsa ndihí jacuahá ra Jesús tsi nyívi tsitsi vehe ñuhu, quita ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra.

30 Tan ña tyiso ra Simón cuuhví ña tsihin cahñi canyí ña nu tsito. Tan catyí tuhun nyívi ña tsihin ra Jesús tyin cuuhví ña.

31 Tacan tan natuhva ra Jesús yuhu tsito nu canyí ña, tñin ra ndaha ña, tan cañihí ra tsi ña. Juvín ñi cuhva can, quita cahñi tsi ña, tan quitsaha nanducú ña tsa catsi ra naha.

Nu cuaha xaan nyívi cuuhví janduvaha ra Jesús

(Mt. 8.16-17; Lc. 4.40-41)

32 Tsa tsa cuñí cuaa tsa tsa yahá tyiso ñicanyii, tandihí nyívi cuuhví tan nyívi yihí tatyí ña vaha tsindaca nyívi tsi ñi nu nyíi ra Jesús.

33 Tan ndu iin tandihí nyívi ñuu can nu yucú ra naha.

34 Tan janduvaha ra tsi tandihí ñi tsa yihí siin siin cuehe, tan cuaha tatyí ña vaha tava ra. Maa tyin ña tsaha ra tsa cahan tatyí ña vaha can, tyin tsitó nahnu yoo ra cuví ra.

Nu tsicá ra Jesús caahán ra tuhun Nyoo tandihí ñuu tsa cayucú Galilea

(Lc. 4.42-44)

35 Ra Jesús nduvita ra tsa ndi naa ca inga quívi, quita ra ñuu can tan cuahán ra iin nu taxin caá cuandacán tahví ra tsi Nyoo.

36 Tsa nyehé ra Simón tyin nduve ra, tacan tan cuahán ra tsihin tandihí ca ra naha cuananducú ra naha tsi ra.

37 Tan tsa nañihí ra naha tsi ra, catyí ra naha tsihin ra:

—Tandihí nyívi tan nanducú ñi tsi un —catyí ra naha.

38 Maa tyin catyí ra tsihin ra naha:

—Cohon ndo ñuu tsa cayucú yatyin ñi ihya, tyin cuñí tsi cahan ndihí yu tuhun Nyoo ican, tyin yacan tyiñu vatsí yu —catyí ra Jesús tsihin ra naha.

39 Tan tacan tsicá ra Jesús caahán ra tuhun Nyoo tsihin nyívi tsitsi vehe ñuhu tan iin tan iin ñuu tsa cayucú Galilea.

Tan tavaḡ ra tatyí ña vaha tsi nyívi.

tandihí ñi ityi tan quitaḡ nyívi,
tan tsinyehē ñi tsi ra.

*Nu janduvahaḡ ra Jesús tsi
ra ndohó cuehe tyaahyú*

(Mt. 8.1-4; Lc. 5.12-16)

40 Tsa ndi cuahán ra Jesús tsicá ra tan quitaḡ iin ra ndohó cuehe tyaahyú tsicuñi tsiti ra nuu ra, tan catyí ra tsihin ra:

—Tun yooho tan cuñi un, cuví janduvaha un tsi yu —catyí ra.

41 Tan cundaahvi iñi ra Jesús nyehē ra tsi ra, tan tyiso ndaha ra jiñi ra, tan catyí ra tsihin ra:

—Cuñi yu janduvaha yu tsi un. Tan vityin tsa nduvahaḡ un —catyí ra tsihin ra.

42 Tsa cahan ra Jesús tacan tsihin ra, juvin ñi cuhva can tan nduvahaḡ ra.

43 Tacan tan catyí ra Jesús tyin tsa cuvi cunuḡ ra, maa tyin cahan vaha xaan ra tsihin ra na javaha ra tyehen:

44 —Coto catyi tuhun un tsihin nyívi yóo janduvahaḡ tsi un. Maa tyin cuaahan nu nyaá ra cuví jutu, tan janaha un tsi un tsi ra. Tan cuhva tsa catyi ra Moisés tyin cuhva ndo tsa cuenda tsa nduvahaḡ ndo tun cuhvi ndo. Yacan cua cuvi tsa ndaa tsi ra jutu tan tsi nyívi tyin tsa nduvahaḡ un —catyí ra Jesús tsihin ra.

45 Maa tyin ra ican cuahán ra, tan quitsahaḡ catyí tuhun ra tsihin tandihí nyívi nácaa nduvahaḡ ra. Yacan cuenda ña cuvi ca quihvi nditsin ra Jesús tsitsi ndi intuhun maa ñuu. Tan tsicá ra ityi tsata ñuu ñi nu nduve nyívi iyó, maa tyin

2

*Nu janduvahaḡ ra Jesús tsi
iin ra xii*

(Mt. 9.1-8; Lc. 5.17-26)

1 Tsa yaha juhva quívi tan cuahán ra Jesús ñuu Capernaum inga tsaha. Tan tsa tsito nyívi tyin tsaḡ nuhu ra yuvehe ra,

2 iin yaha ñi ndu cuaha ñi yuvehe ra tan ña tsitahan maa ñi tsitsi vehe tan ndi yuvehe. Tan caahán ra tuhun Nyoo tsihin ñi.

3 Tacan tan tsaḡ cumi taahan rayi nyisó ra naha iin ra xii. Cuñi ra naha cuhun ra naha tsihin ra nda nu nyaá ra Jesús.

4 Maa tyin ña cuvi yaha ra naha yuvehe tan cuhun ra naha nu nyaá ra Jesús tyin cuaha xaan nyívi nyecú yuvehe can. Yacan cuenda ndaaḡ ra naha jiñi vehe, tan jatsiyó ra naha juhva tyiyo ndihí cuhva nu nyaá ñi ra Jesús. Tacan tan januḡ ra naha tsi ra cuuhví can nu nyaá ra Jesús tsihin iin tsito.

5 Tsa nyehē ra Jesús tyin tsinú xaan iñi ra can naha ra, catyí ra tsihin ra cuuhví can:

—Vityin, tsa jahḡ yu tucahnu iñi tsi un tsa cuenda tandihí cuatyí un —catyí ra Jesús tsihin ra.

6 Tan nyecú juhva ra cuvi maestro cuenda ley vehe ñuhu naha ra ican, tacan tan quitsahaḡ tsicá iñi ra naha tuhun ihya:

⁷ “¿Nacuenda tyin caná iñi ra ihya caahán ra tyehen? Tan intuhun ñi maa Nyoo cuví ra jahá tucahnu iñi tsi yo. Tsi-coo cuatyí ra nuu Nyoo tsa cuenda tsa caahán ra tacan”, cuñí ra naha, tsicá iñi ra naha.

⁸ Maa tyin ra Jesús iin yaha ñi tuví iñi ra cuhva tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

⁹ ¿Náa yí ca cahan yo; “Cu-atyí un tsa yahá ndatsí”, o catyí yo: “Nduvita, naquihin tsito un tan çaça”?

¹⁰ Vaha. Cua janaha yu tsi ndo tyin yuhu, tsa cuví yu Rayí quee nda gloria, iyó ndatu tsi yu nu ñuhu ñayiví ihya tsa jaha yu tucahnu iñi tsi nyiví tsa cuenda cuatyí ñi —catyí ra Jesús tsihin ra naha.

Tacan tan nacahan ra tsihin ra cuuhví can:

¹¹ —Catyí yu tsihin un; nduvita, naquihin tsito un, tan cuanuhu yuvehe un —catyí ra Jesús tsihin ra.

¹² Tan iin yaha ñi nduvita ra cuuhví can, naquihin ra tsito ra, tan cuanuhu ra. Tan iyo xaan cuñí tandíhi maa nyiví tsa nyehe can, tan quitsahá jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehe yo tsehe —catyí ñi.

Nu cana ra Jesús tsi ra Leví (Mt. 9.9-13; Lc. 5.27-32)

¹³ Tsa yahá yacan tan cuahán ra Jesús yuhu miñi inga tsaha. Tacan tan tsaá

cuaha nyiví nu nyíí ra, tan quitsahá jacuahá ra tsi ñi.

¹⁴ Tsa ndihí jacuahá ra tsi ñi, tan cuanuhú ra. Tan tsa cuahán ra yahá ra nu nyaá vehe nu tyahví nyiví xuhun cuenda ra ndacá ñaha ñuu Roma, tan ícan nyaá ra Leví, sehe ra Alfeo, naquihin cuenda ra xuhun can. Nyehe ra Jesús tsi ra, tan catyí ra tsihin ra:

—Cohon tsihin yu.

Tacan tan nduvita ra Leví, tan cuahán ra tsihin ra.

¹⁵ Yahá can tan cuahán ra Jesús cuacatsí ra yuvehe ra Leví tsihin ra tsicá tsihin ra. Tsinyaa ra nu mesa tan tsinyecu ndíhi tucu ra tavá xuhun cuenda ra ndacá ñaha tan inga ca nyiví iyó cuatyí. Tyin cuaha xaan nyiví nyicún tsi ra.

¹⁶ Maa tyin tsa nyehe ra cuví maestro cuenda ley vehe ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsí tan tsihí ra maestro ndo tsihin ra tavá xuhun tan ra iyó cuatyí?

¹⁷ Tsa tsiñí ra Jesús tsa cahan ra naha tan catyí ra:

—Yuhu ña vatsí yu vatsí jatyinyee yu tsi nyiví cuñí tyin vaha iyó ñi; vatsí yu vatsí jatyinyee yu tsi nyiví tsitó tyin iyó cuatyí ñi tumaa nyiví cuuhví, tyin nyiví cuuhví tsiñí ñuhu doctor tsi ñi. Maa tyin nyiví vaha cuñí, ña tsiñí ñuhu doctor tsi ñi —catyí ra Jesús tsihin ra naha.

Nu tsicā tuhun nyivi tsi ra Jesús tun taahán tsi coo nyitya ñi

(Mt. 9.14-15; Lc. 5.33-35)

18 Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahan juhva nyivi nu nyii ra Jesús, tan tsicā tuhun ñi tsi ra, tan catyí ñi:

—¿Nacuenda tyin tsicoó nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoó nyitya ra naha? —catyí ñi.

19 Nacahan ra Jesús tan catyí ra:

—¿A cuví coo nyitya nyivi yucú nu iyó vico tindaha tun ndi nyii ra cua tindaha tsihin ñi? Ña cuví coo nyitya ñi tun ndi nyii ra tsihin ñi.

20 Maa tyin coo quivi ña cua cunyi ca ra tsihin ñi. Tacan tan cua coo nyitya ñi —catyí ra Jesús tsihin ñi.

Nu caahán ra Jesús tyin ña nacatsi tahan tuhun tsahnu tsa iyó nyivi tsihin tuhun tsaa tsa jacuahá ra tsi ñi

(Mt. 9.16-17; Lc. 5.36-39)

21 Tan catyí ra Jesús:

—Ña tuhvá nyivi natyaá jahma tsaa iin jahma tuuhu, tyin jahma tsaa can cua nandiyi can tan cua nducahnu ca nu ndatá jahma tuuhu can jaha can.

22 Tacan tucu ñi ñii yihí vinu tun tyihí yo vinu tsaa tsitsi ñii tsaahnu cua ndata ñii can, tan cua cati vinu can tan cua tivi can. Yacan cuenda cuñi tsi tsa tyihí yo vinu tsaa tsitsi ñii tsaa —catyí ra Jesús.

Nu jocón ra tsicá tsihin ra Jesús yoco trigu quivi quitatú nyivi

(Mt. 12.1-8; Lc. 6.1-5)

23 Iin tsaha yaha ra Jesús tsitsi tsa tatsi nyivi tan cuví tsi quivi quitatú ñi. Tan tsa yaha ra tsicá tsihin ra quitsaha tuhún ra naha yoco trigu.

24 Tacan tan tsa nyehe ra fariseo naha ra can quitsaha caahán ra naha tsihin ra Jesús:

—¡Nyehe tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quivi ihya —catyí ra naha.

25 Tan nacahan ra Jesús tsihin ra naha:

—¿A ñaha ca cahvi ndo nu tutu nu tsahá cuenda tsi tsa javahá ra David tan ra cutahán tsihin ra quivi tsisoco ra naha?

26 Ra David quihvi ra tsitsi vehe Nyoo quivi cuví ra Abiatar jutu tsaahnu cuví ityi nuu. Tan quihin ra paan ii, tsa taahán tsi catsi maa ñi maa ra jutu naha ra. Maa ra tan tandihi ra cutahán tsihin ra tsatsi ra naha paan can —catyí ra Jesús.

27 Tacan tan catyí ra Jesús tsihin ra naha:

—Nyoo javahá ra quivi quitatú yo tyin tacan tan cuví quitatu cuñu ñuhu yo; tan ñavin maa yo tsinu tsa cuenda quivi quitatú yo.

28 Yacan cuenda yuhu tsa cuví yu Rayi quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo

quivi quitatú yo —catyí ra Jesús.

3

Nu nduvahá ra na ityi iin ndaha

(Mt. 12.9-14; Lc. 6.6-11)

¹ Tsa quihvi ra Jesús inga tsaha tsitsi vehe ñuhu, nyii iin ra na ityi iin ndaha ican.

² Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quivi quitatú nyivi. Tyin tun cua janduvaha ra tsi ra can, tacan tan cua cuvi tyaa ra naha cuaryi siqui ra.

³ Tacan tan catyí ra Jesús tsihin ra na ityi ndaha can:

—Ndúvita nyityi tan cunyaa un mahñu ihya.

⁴ Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quivi quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyivi, o cahñi yo tsi ñi? —catyí ra Jesús.

Maa tyin ña nacahan ra naha.

⁵ Tacan tan nanyehe xaan ra Jesús nuu ra naha, tan nducuihya cuñi ra tyin ña cuñi ra naha cutuñi iñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoo ra can ndaha ra, tan iin yaha ñi nduvahá ndaha ra.

⁶ Tacan tan quita ra fariseo naha ra, tan quitsaha

natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

Nu cuaha xaan nyivi cuahán cuanyehé nu nyii ra Jesús yuhu miñi

⁷ Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyivi iyó Galilea cuahán cuanyicún tsi ra naha.

⁸ Tsa tsito nyivi tyin nahnu xaan tsa iyo javahá ra, cuaha ñi tsahan nu nyii ra tyin cuñi ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihi ca ñuu tsa cayucú yatyin nu cayucú nduvi ñuu can.

⁹ Tsa nyehe ra Jesús tsaá nyivi, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuvi ca nyivi, cuvi quihvi ra tsitsi yutun ndoo can tyin tacan tan ña cua tindahñi ñi tsi ra.

¹⁰ Tsa cuaha xaan nyivi janduvahá ra, yacan cuenda tsahan cuaha ca nyivi cuuhví nu nyii ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi.

¹¹ Yihí ñi cuuhví can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi caná tsaa nu tan catyí nu tsihin ra:

—¡Yooho cuví Sehe Nyoo!

12 Tan tandihí ñi cuhva tsa caahán tatyí ña vaha yoo ra cuví ra, tyasí ra nu cahan nu.

Nu nacatsi ra Jesús tsi utsi uvi ra caca tyiñu ra
(Mt. 10.1-4; Lc. 6.12-16)

13 Tsa yaha yacan tan ndaa ra Jesús iin yucu tan cana ra tsi ra tsa cuñi maa ra cana ra. Tacan tan cuahán ra naha nu nyii ra.

14 Tan tsitsi tsa tandihí ra tsa cana ra, nacatsi ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo.

15 Tan tsaha ra ndatu tsi ra naha tsa janduvaha ra naha tsi nyivi cuuhví, tan tava ra naha tatyí ña vaha yihí tsi nyivi.

16 Ihya nyecú sivi ra naha: ra Simón, tsa jacunañi tucu ra Jesús Pedro;

17 tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyi: “ra caahán tumaa ñihi caahán savi”.

18 Tan tandihí ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cuhun cuatyí siqui ñuu Roma tsa ndacá ñaha tsi ñi;

19 tan ra Judas Iscariote, tsa xico tsi ra Jesús.

Tsa yaha yacan tan cuahán ra Jesús tsitsi iin vehe tsihin ra tsicá tsihin ra.

Nu xaan iñi tsi ra Jesús catyi nahnu tyin tsihin tunyee iñi nu ña vaha javahára tsa iyo
(Mt. 12.22-32; Lc. 11.14-23; 12.10)

20 Tan nducuaḥa nyivi nu yucú ra naha inga tsaha, tan nda cuando ña cuyatyí ca ra naha catsi ra naha.

21 Tsa tsito nyivi ra Jesús tyin nyii ra ícan, tsahan ñi tsiquihín ñi tsi ra tyin cunuhu ra tsihin ñi, tyin catyi nyivi tsihin ñi tyin ndusaná iñi ra.

22 Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaḥa ra naha nu nyii ra Jesús tan catyi ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihí tatyí ña vaha —catyi ra naha.

23 Tsa tuví iñi ra Jesús tyin tacan caahán ra naha, cana ra tsi ra naha tan tsaha ra iin cuhva tsi ra naha, tan catyi ra tsihin ra naha:

—¿A cuví tavá nu ña vaha juvín ñi maa tahan nu? Ña cuví.

24 Tyin tun ra ndacá ñaha naha ra tan cua natahvi sava ra naha, tan cua quitsaha cañi tahan ra naha, cua cundihi tsa ndacá ñaha ra naha.

25 Tacan tucu ñi tun nyivi iyó iin caa ñi iin vehe tan cañi tahan ñi, cua cusin ñi tan ña cua cuvi coo vaha ñi.

26 Tan tun nu ña vaha tan ndusiin nu tan nduvita iin nu siqui inga nu, ¿náa cua tahan nahnu? Cua ndusiin nahnu tan cua cundihi nahnu.

27 'Yoñi cuví quihvi tsitsi vehe iin ra xaan tan suhu ra tsa iyó tsi ra, tun ña cuhñi jihna ra tsi ra. Maa ñi cuñí tsi cuhñi jihna ra tsi ra jatsii vehe can tan cuvi quihvi ra suhu ra tsa tsii ra.

28 Tsa nditsa catyí yu tsihin ndo tyin cuví coo tucahnu iñi tsi nyivi tsa cuenda tandihi nuu cuatyí javahá ñi, tan tsa cuenda tucu tsa caahán ñi tsa ña vaha.

29 Maa tyin tun cahan ñi ndavaha ñi siqui Tatyí li Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quivi —catyí ra Jesús.

30 Tacan cahan ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yihí tsi ra.

Nu catyí ra Jesús tyin nyivi tyaá yahvi tuhun Nyoo, juvin ñi cuví yañi ra, tan sihi ra

(Mt. 12.46-50; Lc. 8.19-21)

31 Tacan tan tsaá sihi ra Jesús tan yañi ra nu nyíí ra, maa tyin ndoo ñi ityi tsata vehe, tan catyí ñi tsihin ra nyecú ican naha ra tyin cana ra naha tsi ra Jesús.

32 Tan catyí nyivi nyecú nanñi canduvi xiin ra Jesús tsihin ra:

—Sihi un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

33 Maa tyin catyí ra:

—¿Yóo cuví sihi yu tan yañi yu?

34 Tacan tan nanyehe ra nanñi canduvi nu nyaá ra, tan catyí ra:

—Nyivi nyecú ihya cuví sihi yu, yañi yu tan cuhva yu.

35 Tyin tandihi nyivi javahá cuhva cuñí Nyoo, juvin ñi cuví yañi yu, cuhva yu tan sihi yu —catyí ra Jesús.

4

Nu caahán ra Jesús tyin ra caahán tuhun Nyoo cuví ra tumaa iin ra tatsi

(Mt. 13.1-9; Lc. 8.4-8)

1 Quitsaha jacuahá ra Jesús inga tsaha yuhu miñi. Tan cuaha xaan nyivi ndu iin nu nyíí ra. Tan tsa cuenda tsa cuaha xaan ñi cuvi, quihvi ra tsitsi yutun ndoo tsa canyíí nu ndutya yuhu miñi can, tan tsinyaá ra tsitsi can. Tan ndoo tandihi maa nyivi nu nyiti.

2 Tacan tan cuaha xaan tsa jacuahá ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:

3 —Tyaa soho ndo tsa cua cahan yu. Iin ra quita ra yuvehe ra. Tan cuahán ra cua tatsi ra trigu nu ñuhu ra.

4 Tan cuhva tsa quití ra tsiti trigu can, cucoyo juhva tsi yuhu ityi. Maa tyin quitsi saa tan tsatsi ti naha ti itsi.

5 Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi cana tsiti can tyin ña cuaha nyahyu yihí tyañu yuu can.

6 Maa tyin tsa cana ñicanyii, iin yaha ñi na ityi tsi tyin ña cunu cuahán yoho tsi.

⁷ Tan juhva ca tsiti can cucoyo tsi tyañu iñu. Quivi cana tsiti can, tsahnū tsi iin caa ñi tsihin iñu can. Maa tyin iñu can numi ca tsahnū can tan tsahñi can trigu can. Yacan cuenda ña tsaha trigu can tsiti.

⁸ Maa tyin juhva ca tsiti can cucoyo tsi nu ñuhu vaha. Cana tsi tan tsahnū tsi, tan cuaaha tsiti tsaha tsi. Tyin tsa intuhun tsiti can, tsaha tsi oco utsi tsiti tsitsi yoco tsi. Tan inga tsiti can tsaha tsi uñi xico, tan inga tsi tsaha tsi iin cientu —catyí ra Jesús tsihin ñi.

⁹ Tan catyí nyico ra tsihin ñi:

—Nyooho tsa iyó soho, tyaa soho ndo tsa caahán yu.

Nu tsahá cuenda ra Jesús nacuenda jacuahá ra tsi nyivi tsihin cuhva

(Mt. 13.10-17; Lc. 8.9-10)

¹⁰ Tsa yaha yacan tan ndoo maa ña ra Jesús tsihin ra tsicá tsihin ra tan nyivi nyicún tsi ra. Tan tsicá tuhun ñi:

—¿Náa cuñí tsi catyí tsa cahan un nañi?

¹¹ Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacá ñaha ra. Maa tyin inga ca nyivi jacotó yu can tsi ñi tsihin cuhva ñi tyin ña cuñí ñi cunyicun vaha ñi tsi yu.

¹² Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñí ñi, ña cua cutuñí iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi

tsa cuenda cuatyí ñi —catyí ra Jesús tsihin ñi.

Nu tsahá cuenda ra Jesús tsa cuñí tsi catyí tuhun ra tatsí
(Mt. 13.18-23; Lc. 8.11-15)

¹³ Tan catyí ndihi ra tsihin ñi:

—Tun ña cutuñí iñi ndo tuhun cahan yu nañi, ndi ña cua cutuñí iñi ndo tandihi ca tsa cua jacuahá yu tsi ndo tsihin cuhva ñi.

¹⁴ Ra tatsí trigu can cuví ra caahán tuhun Nyoo.

¹⁵ Yihí nyivi cuví ñi tumaa nu cucoyo tsiti trigu yuhu ityi tyin tsiñí ñi tuhun Nyoo, maa tyin yaha can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsí ra añima ñi.

¹⁶ Tan juhva nyivi cuví ñi tumaa nu cucoyo tsiti trigu tsata yuu tyin sii xaan cuñí ñi tsiñí ñi tuhun Nyoo juhva ñi quivi.

¹⁷ Maa tyin ña ndoó tsi añima ñi tan ña cuví cuahnu ñi tan juhva ñi quivi tsinú iñi ñi, yacan cuenda cuví ñi tumaa nu cucoyo tsiti tsata yuu tyin tsata yuu can luxu cuii ñi nyahyu yihí. Yacan cuenda ña tsahnū tsi tyin ña ñihí tsi nu cuhun yoho tsi. Tacan cuví nyivi can, tyin quivi vatsí tundoho siqui ñi, tan caahán nyivi tsi ñi tsa cuenda tuhun Nyoo, ndu uví iñi ñi tan jandihí ñi tsa tsinú iñi ñi tsi Nyoo.

¹⁸ Tan juhva nyivi cuví ñi tumaa nu cucoyo tsiti tyañu iñu tyin tsiñí ñi tuhun Nyoo,

19 maa tyin tsicá xaan iñi ñi tundoho ñayivi ihya tan ña tsicá iñi ñi tuhun Nyoo. Nyiyo iñi ñi tsa cuca, tan cuñi ñi coo tandihi tsa iyó nu ñuhu ñayivi ihya tsi ñi. Tan tandihi yacan jatyañú can tsi ñi, tan cuví ñi tumaa cuví yutun tsa ña tsaḥa tsiti.

20 Maa tyin nyivi tsa tsiñi tuhun Nyoo tan naquihín vaha ñi itsi, tan javahá ñi tandihi tsa caahán tsi, juvin ñi cuví tumaa ñuhu vaha nu cucoyo tsiti can tyin tsiti tsa cucoyo can caná vaha tsi, tsahnú tsi, tan yihí tsi tsaḥa tsi oco utsi tsiti. Inga tsi tsaḥa tsi uñi xico tsiti, tan inga tsi tsaḥa tsi cientu tsiti.

Nu caḥan ra Jesús tyin ña taahán tsi tyihi xeehe yo ñuhu Nyoo tsa jandunditsín añima yo coto quihin nyaa ra itsi

(Lc. 8.16-18)

21 Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyí yo can iin nu sucun tyin tacan tan janditsin can nani tsitsi vehe.

22 Tyin nduve tsa yihí xeehe tan ña cua quituvi, tan ndi tsa xeehe tan ña cua coto nyivi. Tyin tandihi maa tan cua quita nu nditsin tan coto yo can.

23 Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

24 Tan catyí tucu ra:

—Tyaa soho vaha ndo tsa caahán yu tyin tun tyaá yahvi

ndo tuhun tsiñi ndo, cuaha ca tsa cua cuhva Nyoo tsi ndo.

25 Tyin nyivi tyaá soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyaá soho, cua quihin nyaa ra nda cuanda tsa luxu tsa iyó tsi ñi tsa tsa yaha ñihí ñi.

Nu tsaḥa ra Jesús iin cuhva nácaa tsahnú iin tsiti

26 Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsí nyivi.

27 Tyin nyivi tatsí ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quivi tsa tatsí ñi, tacan tan cuahán ñi cuanyehé ñi inga tsaha. Tsa tsaá ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi,

28 tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan tan tsaḥa tsi tsiti.

29 Tan tatun tsa tsitsa tsiti tsi, tacan tan jocón ñi itsi tyin tsa taḥan maa tsi quivi coyo tsi —catyí ra Jesús.

Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo
(Mt. 13.31-32; Lc. 13.18-19)

30 Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin náa tsihin? Cuví.

31 Tyin cuví tsi tumaa iin tsiti mostaza tsa tatsí nyivi.

Tsiti can cuví tsa nyihi ca tan ñavin ca tandihí ca tsiti tsa iyó nu ñuhu ñayívi.

³² Maa tyin tsa yaha tatsi tsi, caná tsi tan ndunahnú tsi, tan cuví tsi yutun tumaa nducua. Ndunahnú soco tun, tan cuahán saa cua quitatu ti naha ti nuu tun.

Nu tsahá cuenda ra Jesús nacuenda jacuahá ra tsi nyívi tsihin cuhva ñi
(Mt. 13.34-35)

³³ Tacan jacuahá ra Jesús tsi nyívi, tsihin cuaha cuhva, ndihí cuhva cuví cutuñí iñi ñi.

³⁴ Tan tandihí tsaha tsa cahan ra tsihin ñi maa ñi maa tsihin cuhva cahan ra. Maa tyin cahan catsi ra tsihin ra tsicá tsihin ra.

Nu jacutaxín ra Jesús tatyí xaan nu miñi
(Mt. 8.23-27; Lc. 8.22-25)

³⁵ Tsa tseñi juvin ñi maa quívi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

³⁶ Tacan tan ra Jesús tan ra tsicá tsihin ra nacoo ra naha tsi nyívi tan quihví ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyívi tsi ra naha.

³⁷ Tan quitsahá yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñí cutu yutun ndoo can.

³⁸ Tan ra Jesús canyí ra quixí ra tsa yatyin xuu yutun ndoo can, tan nyanaá iin

jahma jiñi ra. Jandoto ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñí nyee yo?

³⁹ Tacan tan nduvitá ra Jesús tan jacutaxín ra tatyí xaan can. Tan catyí ra tsihin ndutya:

—¡Taxin ñi!

Tan cutaxín tatyí can tan ndutya can. Tacan tan taxin cuí ñi cuví.

⁴⁰ Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu iñi ndo? —catyí ra tsihin ra naha.

⁴¹ Maa tyin iyo xaan cuñí ra naha tsa nyehe ra naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuanda tatyí tan ndutya tyaá yahvi tsi naha tsi tsi ra —catyí ra naha.

5

Nu caahán ra Jesús tyin ra caahán tuhun Nyoo cuví ra tumaa iin ra tatsí Nu nduvahá iin ra Gadara tsa yihí tatyí ña vaha

(Mt. 8.28-34; Lc. 8.26-39)

¹ Tsaá ra naha inga tsiyo miñi nda nu ñuhu cuenda Gadara.

² Tsa quitá ra Jesús tsitsi yutun ndoo, tan quitá iin ra yihí tatyí ña vaha nu ndaa cumi santu, tan tsaá ra nu nyaá ra.

³ Tan nu ndaa can iyó maa ra can. Tsaahñí ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñí ra.

4 Cuaha xaan tsaha tsahñi nyivi tsaha ra tan ndaha ra tsihin cadena, maa tyin tsaahnyá cuatyí ra can. Tan yoñi maa cuví cunye tsi ra.

5 Tan tsicá nuu maa ra caná tsa ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu.

6 Maa tyin ndi cañi ca quita ra Jesús, tan nyehe ra can tsi ra, tan tsinú xaan ra tsahan ra, tsicuiñi tsi ti ra nuu ra.

7 Tan caná tsa ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

8 Tacan catyí nu tatyí ña vaha can tsihin ra Jesús tyin tsa yahá cahan ra tsihin nu tyehen:

—¡Yooho tatyí ña vaha, jaña tsi ra ihya! —catyí ra.

9 Tan ra Jesús tsicá tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

10 Tan caahán ndaahvi nu tsihin ra Jesús na ña jacuhun cañi ra tsi nahnu.

11 Yatyin ñi yucu can yucú cuaha quini tsatsí ti naha ti.

12 Tacan tan catyí tandihi nahnu tsihin ra Jesús:

—Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

13 Tacan tan tsaha ra Jesús ndatu tsi nahnu, tan quihvi nahnu tsitsi quini can. Quita nahnu tsi ra can tan quita tumaa uvi mil quini yucú can. Tsa quihvi nahnu tsitsi ti naha ti, quitsaha tsinú ti naha ti, tan yahá ti naha ti yuhu xahva tan cucoyo ti naha ti tsitsi miñi, tan tsihi ti naha ti tsitsi ndutya.

14 Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhú ra naha cuacatyí tuhun ra naha tsa cuví can tsihin nyivi ñuu can tan inga ca nyivi tsa taahán ra naha ityi huhu. Tan tandihi nyivi tsa cahan ra naha tsihin, tsahan ñi tsinyehe ñi tsa cuví can.

15 Cuhva tsa tsaá ñi nu nyii ra Jesús, nayuhvi xaan ñi tsa nyehe ñi tsi ra tsa yihí tatyí ña vaha can. Nyaá taxin ra, nditsí ra jahma, tan vaha cuñi ra.

16 Tan tandihi maa nyivi tsa nyehe tsa tahanan ra can tan tsa tahanan quini can, catyí tuhun ñi can tsihin inga ca nyivi.

17 Tacan tan quitsaha caahán ndaahvi ñi tsihin ra Jesús, na ña ndoo ra nu ñuhu ñi.

18 Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra.

19 Maa tyin ña tsaha ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu

iyó nyivi un, tan catyi tuhun tsihin ñi tandihi tsa javaha Jutu Mañi yo Nyoo tsihin un, tan nácaa cundaahvi ñi ra tsi un.

²⁰ Tacan tan cuanuhú ra tan quitsahá catyí tuhun ra tsihin nyivi iyó tandihi ñuu tsa cayucú Decápolis tandihi tsa javaha ra Jesús tsihin ra. Tan iyo xaan cuñi ñi.

Nu nduvahá sehe ra Jairo tan ñaha tsa tñin jahma ra Jesús (Mt. 9.18-26; Lc. 8.40-56)

²¹ Tsa tsaá ra Jesús tsihin yutun ndoo nda inga tsiyo miñi can, tsaá cuaha nyivi nu tsaá ra. Tan ndoo ra yuhu miñi ican.

²² Tacan tan tsaá iin ra nyisó tyiñu vehe ñuhu, nañi ra Jairo. Cuhva tsa nyehé ra tsi ra Jesús, tsicuiñi tsiiti ra nuu ra.

²³ Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñi cúu cuii ña ña.

²⁴ Tacan tan cuahán ra Jesús tsihin ra, tan cuaha xaan nyivi cuahán cuanyicún tsi ra, nda cuanda catyihí tahan ña maa ñi.

²⁵ Tsihin nyivi can cuahán ndihi iin ñaha cuuhví. Ñaha ihya tsa quitá maa utsi uvi cuiya ndohó ña cuehe tsa cuún niñi ña.

²⁶ Tan cuaha xaan tundoho nyehé ña tsihin tsa cuaha doctor. Tandihí xuhun ña janaa ña tsihin ra naha, maa tyin nduve maa náa catyí janaa ña xuhun ña tyin vihi ca nduñihí cuuhvi ña.

²⁷ Tsa tsiñi ña caahán nyivi tyin tsaá ra Jesús, natuhva ña ityi tsata ra tan tñin ña jahma ra.

²⁸ Tyin tsicá ñi maa ña: “Tatun tñin yu vasu tan jahma ra, cua nduvaha yu”.

²⁹ Tsa tñin ña jahma ra iin yaha ñi cutaxin tsa cuún niñi ña. Tan tuví ñi cuñu ñuhu ña tyin tsa janduvahá ra tsi ña.

³⁰ Tsa tuví ñi ra Jesús tyin nduvahá iin nyivi tsihin tunyee ñi tsa iyó tsi ra. Tacan tan nanyico coo ra ityi tsata ra tan tsicá tuhun ra tan catyí ra:

—¿Yóo tñin jahma yu?

³¹ Tacan tan catyí ra tsicá tsihin ra:

—¿Nacuenda tsicá tuhun ca un: yóo tñin jahma un? tan nyehé vaha un tyin cuaha xaan nyivi nyicún tsi un tan tyañu xaan jahá ñi —catyí ra naha tsihin ra.

³² Maa tyin ra Jesús nanyehe ra nani ñi tyin cuñi ra coto ra yóo tñin jahma ra.

³³ Tacan tan ñaha can tsahan ña tsicuiñi tsiiti ña nuu ra Jesús tyin tsitó vaha ña tyin tsa nduvahá ña. Yuuhví ña tan nihí ña tsahan ña tsicatyí tuhun ña tandihí tsa nditsa tsihin ra.

³⁴ Tan catyí ra Jesús tsihin ña:

—Nduvahá un tyin tsinú ñi un. Na cuhun vaha un, tan na ña cuhvi ca un —catyí ra Jesús tsihin ña.

³⁵ Ndi caahán ca ra Jesús tan tsaá nyivi quee yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi ñaha luhlu sehe un. Ña cahan yuhu ca un tan ña jatyañu ca un tsi ra Maestro ihya —catyí ñi tsihin ra.

³⁶ Maa tyin ra Jesús ña tyaa yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsinu iñi yooho —catyí ra tsihin ra.

³⁷ Tan ña tsaḥa ra cuhun cuaha nyivi tsihin ra. Tan quihin ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra.

³⁸ Tsa tsaḥa ra naha yuvehe ra nyisó tyiñu vehe ñuhu, nyehe ra Jesús tyin tsacú xaan nyivi tan caná tsa ñi.

³⁹ Quihvi ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Ñaha luhlu ihya quixí ña; ñavin tsihi ña —catyí ra tsihin ñi.

⁴⁰ Maa tyin ña tsinu iñi ñi tan tsacu naaha ñi nyehé ñi tsi ra. Tacan tan tava ra tsi tandihi ñi nuquehe, tan quihin ra tsi jutu ñaha luhlu tsa tsihi can tan sihi ña tan ra tsa tsaḥa tsihin ra, tan quihvi tandihi ñi nu canyii ña.

⁴¹ Tan tin ra ndaha ña, tan catyí ra tsihin ña:

—Talita cumi —tan cuñi tsi catyí tsi tyehen: Catyí yu tsihin yooho ñaha luhlu, jnduvita!

⁴² Juvín ñi cuhva can tan nduvita ña, tan nacaca ña. Utsi uvi cuiya ña. Tan tsa nyehe nyivi tsa iyo tsa javaha ra Jesús, iyo xaan cuñi ñi cuví.

⁴³ Maa tyin ra Jesús ñihi tsaḥa cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tava tyiñu ra tsi sihi ña na cuhva ña tsa catsi ña.

6

Nu tsinuhu ra Jesús ñuu Nazaret nu tsahnu ra
(Mt. 13.53-58; Lc. 4.16-30)

¹ Tacan tan quita ra Jesús ican, tan cuanuhu ra nda ñuu ra. Tan ra tsicá tsihin ra cuahán ndihi ra naha tsihin ra.

² Tan tsa tahañ tsi quivi quitatú nyivi, tacan tan cuahán ra naha vehe ñuhu tan quitsaha jacuahá ra Jesús tsi nyivi. Tan cuaha ñi yucú tyaá soho ñi tsa caahán ra. Iyo cuñi ñi tsa tsiñi ñi tsa caahán ra, tan catyí ñi:

—¿Numaa tahan cutuhva ra ihya tandihi tsa tsitó ra? ¿Yóo tsaḥa tsa tsiñi tuñi iñi ra? ¿Tan nácaa cutuhva ra javahá ra tsa iyo?

³ Tan ra tahví yutun cuví ra. Tan sehe ña María cuví ra. Tan yañi ra cuví ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñi ñi tyaa yahvi ñi tsi ra.

⁴ Maa tyin catyí ra tsihin ñi:

—Tandihi ñi ityi tan jahá tandihi nyivi tsa ñayivi tsi ra cuví ndusu yuhu Nyoo, maa tyin nyivi ñuu ra, tan nyivi ra, tan nyivi vehe ra ña tyaá yahvi ñi tsi ra —catyí ra Jesús.

⁵ Tan tyiso ndaha ra jiñi juhva nyivi cuuhvi, tan jan-duvahā ra tsi ñi, maa tyin ña cuvī javahā ra inga ca tsa iyo.

⁶ Tan iyo cuñi ra tyin ña tsinú iñi ñi tsi ra. Tacan tan cuahán ra cuajacuahá ra tsi nyivi iyó tandihi ñi ñuu nyihi tsa cayucú yatyin ñi ñuu can.

Nu jacuhun ra Jesús tsi ra tsicá tsihin ra cucahan ra naha tuhun Nyoo

(Mt. 10.5-15; Lc. 9.1-6)

⁷ Tsa yaha yacan tan cana ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsaha jacuhún ra uvi uvi ra naha. Tan tsaha ra ndatu tsi ra naha tsa tava ra naha tatyí ña vaha tsi nyivi.

⁸ Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuvī cundaha ra naha yutun ñi.

⁹ Tan cunyaa nditsan tsaha ra naha. Tan ña cundaha ra naha inga nditsi jahma, na cuhun ra naha tsihin cuhva nditsi ñi maa ra naha.

¹⁰ Tan catyí ra tsihin ra naha:

—Cuhva tsa tsa ndo iin ñuu, quihvi ndo iin vehe, tan ndo ndo ican nda cuanda quita ndo ñuu can.

¹¹ Tan tatun tsa ndo iin ñuu tan ña naquihin cuenda nyivi iyó ñuu can tsi ndo, tan ña cuñi ñi tyaa soho ñi tsa cua cahan ndo, quita ndo ican tan naquisi ndo nyaca tsaha ndo tan yacan janaha

tyin ndoo cuatyí ñi siqui ñi. Tsa nditsa catyí yu tsihin ndo, tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gommorra —catyí ra Jesús tsihin ra naha.

¹² Tacan tan cuahán ra naha cuacahán ra naha tuhun Nyoo tsihin nyivi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo.

¹³ Tan cuaha ñi nyivi tava ra naha tatyí ña vaha. Tan tyihí ra naha acetye tsi nyivi cuuhvi tan nduvahā ñi.

Nu tsahá cuenda tsi náca tsihi ra Juan, ra jacoondutyá tsi nyivi

(Mt. 14.1-12; Lc. 9.7-9)

¹⁴ Ra rey Herodes tsitó ra tsa javahá ra Jesús tyin tandihi nyivi tan caahán ñi tsa javahá ra, tan tsicá iñi ra tyehen:

—Ra ihya cuvī ra Juan, ra jacoondutyá tsi nyivi, ra tsa tsihi. Vityin nandoto ra. Juvín ra cuvī can, yacan cuenda iyó tunyee iñi tsi ra —cuñi ra Herodes, tsicá iñi ra.

¹⁵ Yihí nyivi catyí ñi:

—Ra Elías, ra cuvī ndusu yuhu Nyoo tahañ tsanaha, cuvī ra.

Tan catyí tucu inga ñi:

—Nduyu yuhu Nyoo cuvī ra, tumaa ra tsicoo tahañ tsanaha naha ra —catyí ñi.

¹⁶ Tsa tsiñi ra Herodes tandihi tsa caahán nyivi, tan catyí ra:

—Ra ihya cuvī ra Juan tsa tava tyiñu yu tyahnya jucun.

Vityin nandotoꝝ ra —catyí ra Herodes.

¹⁷ Tacan catyí ra tyin juvin ñi maa ra tavaꝝ tyiñu na tyihi ra naha tsi ra Juan vehe caa tan cuhñi ra naha tsi ra tsihin carena. Tacan javahaꝝ ra Herodes tsihin ra Juan tsacatyí ña Herodías tsa cuví ñasihi ra Felipe yañi ra. Ra Herodes quihin ra tsi ña Herodías tyin cuví ña ñasihi ra

¹⁸ Tan tsa tacan javahaꝝ ra, catyí ra Juan tsihin ra tyin ña vaha tsa quihin ra tsi ña Herodías tyin ñasihi yañi ra cuví ña.

¹⁹ Yacan cuenda ndasi cuñí ña Herodías nyehé ña tsi ra Juan. Cuñí ña cahñi ña tsi ra, maa tyin ña cuví,

²⁰ tyin ña tsahá ra Herodes tyin tsitó ra tyin ra vaha cuví ra Juan tan cuiti iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñí iñi ra Herodes tandihí tsa caahan ra Juan, maa tyin vaha cuñí ra tyaá soho ra tsa caahan ra.

²¹ Maa tyin tsa tahan tsi quivi cacu ra Herodes javahaꝝ ra iin vico. Tan cana ra tsi ra cumí tyiñu naha ra, tan ra yihí ndaha andaru naha ra, tan nyivi cuca tsa iyó ityi Galilea. Quivi ihya tsican ña Herodías tsa cuñí ña tsi ra Herodes.

²² Tyin ñaha sehe ña tsahan ña tsicuañi ña yaa nu iyó vico ra Herodes. Tan tahan xaan iñi ra Herodes tan ra nyecú cuxiñí tsihin ra cuhva tsañí ña. Tacan tan catyí ra Herodes tsihin ña:

—Ndacan tsi yu náa cuñí maa un. Náa tahan ñi maa tsi cua ndacan un tsi yu cua cuhva maa yu can tsi un.

²³ Tsitó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un —catyí ra tsihin ña.

²⁴ Tacan tan quita ña, cuahan ña cuandacá tuhun ña tsi sihi ña tan catyí ña:

—¿Náa ndacan yu tsi ra?

Tan catyí sihi ña:

—Ndacan jiñi ra Juan, ra jacoondutyá tsi nyivi tsi ra —catyí ña.

²⁵ Tacan tan numi ñi quihvi nyico ñaha tyuvaa can nu nyii ra rey Herodes, tan catyí ña tsihin ra:

—Cuñí yu jiñi ra Juan, ra jacoondutyá tsi nyivi. Cahnya jucun ra tan tinyii un jiñi ra nuu iin coho, cuhva un tsi yu vityin vityin ñi —catyí ña tsihin ra.

²⁶ Tacan tan cuihya xaan cuñí ra rey can cuví. Maa tyin tsa cuenda tsa cahan ra tyin cua cuhva maa ra tsa cua ndacan ña, ña cuñí ra jandavi ñaha ra tsi ña tyin tandihí maa nyivi yucú vico can tan tsiñi ñi tsa cahan ra, yacan cuenda tsaha ra tsa tsican ña.

²⁷ Numi ñi tavaꝝ tyiñu ra rey can tsi iin andaru na cuquihin ra jiñi ra Juan.

²⁸ Tsahan andaru can tsitsi vehe caa, tan tsahnya ra jucun ra Juan. Tan tsindaca ra jiñi ra Juan tsi ñaha tyuvaa can, nyii tsi nu iin coho. Tan nacuhva cuenda ña can tsi sihi ña.

29 Tsa tsitō ra nyicún tsi ra Juan tsa cuvī, tsahan ra naha tsiquihin ra naha cuñu ñuhu ra, tan tsicutsi ra naha can.

Nu jacatsi ra Jesús uhun milrayi

(Mt. 14.13-21; Lc. 9.10-17; Jn. 6.1-14)

30 Tsa yaha yacan tan ndu iin ra tsicá tyiñu ra Jesús tsihin ra, tan catyi tuhun ra naha tsihin ra tandihi tsa javaha ra naha, tan tsa jacuaha ra naha nu tsahan ra naha tsicahan ra naha tuhun Nyoo tsihin nyivi.

31 Tan catyi ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyi ra tsihin ra naha tyin cuaha xaan nyivi cuahan tan vatsi, tan ndi ña cuyaty ra naha catsi ra naha jahá ñi.

32 Tacan tan quihvi ra Jesús tsihin ra naha tsitsi iin yutun ndoo tan cuahan ra naha iin nu taxin caa.

33 Maa tyin cuaha xaan nyivi nyehe ñi cuahan ra naha. Tan nacotó ñi tsi ra Jesús. Tacan tan cuahan ñi tsihin tsaha ñi, quita ñi tandihi ñi ñuu tan jihna ca ñi tsaá nu cua tsaá ra Jesús.

34 Cuhva tsa tsaá ra naha, quita ra Jesús tsitsi yutun ndoo tan nyehe ra tyin cuaha xaan nyivi yucú ican. Tan cundaahvi iñi ra nyehe ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsaha jacuaha ra cuaha xaan tuhun vaha tsi ñi.

35 Tsa tsa cua cuiso ñicanyii, tan natuhva ra tsicá tsihin ra Jesús xiin ra tan catyi ra naha tsihin ra:

—Tsa cueñi xaan, tan nduve nyivi iyó yatyin ñi ihya.

36 Vaha ca jacunuhu un tsi nyivi tyin ihya nduve tsa catsi ñi. Tan na kujata ñi paan catsi ñi vehe tsa iyó tsitsi cuhu ihya tan ñuu tsa cayucú yatyin ñi —catyi ra naha tsihin ra.

37 Maa tyin nacahan ra Jesús, tan catyi ra:

—Cuhva nyooho tsa catsi ñi.

Tacan tan nacahan ra naha tan catyi ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihi nyivi ihya.

38 Tan catyi ra Jesús tsihin ra naha:

—Nyehe jihna ndo najava paan ndahá ndo —catyi ra.

Cuhva tsa tsitō ra naha naja paan ndahá ra naha, tacan tan tsicahan ra naha tsihin ra tan catyi ra naha:

—Ndahá ndi uhun taahan ñi paan tan uvi taahan ñi tyaca.

39 Tacan tan catyi ra tsihin nyivi na cunyecu ñi nu cuhu can.

40 Tan tsinyecu cuenda cientu tan cuenda uvi xico utsi ñi tsa iin cuhva tsinyecu ñi.

41 Tacan tan quihin ra Jesús tsa uhun paan can tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo, tsa yaha tan tsahnū cuaty ra paan can, tan tsaha ra can tsi ra

tsicá tsihin ra tyin tsatsa ra naha can tsi nyívi. Tsa ndihi tsatsa ra naha paan can, tan tsatsa ndihi ra naha tyaca.

42 Tsatsi tandihí ñi tan ndaha ñi ñi.

43 Tan jacutu ra naha utsi uvi tyica tsihin paan tan tyaca tsa ndoo.

44 Tan uhun mil rayi tsatsi paan can.

Nu tsicá ra Jesús nu ndutya (Mt. 14.22-27; Jn. 6.16-21)

45 Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuhu ra tsi nyívi yuvehe ñi.

46 Tsa yaha cuanuhu nyívi, tacan tan cuahán ra Jesús cuandacán tahvi ra tsi Nyoo iin jiñi yucu.

47 Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyii ra yuhu miñi can.

48 Tan tsa nyehe ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñi tui, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha.

49 Maa tyin tsa nyehe ra naha tsicá ra nu ndutya, tsicá ñi ra naha tyin tatyí cuví ra, tacan tan quitsaha caná tsa ra naha

50 tyin tandihí ra naha nyehe ra naha tsi ra tan nayuhvi ra naha. Maa tyin

nacahan ra tan catyí ra tsihin ra naha:

—iÑa nayuhvi ndo tyin maa yu cuví!

51 Tacan tan quihvi ra tsitsi yutun ndoo nu yucú ra naha, tan tsa yaha quihvi ra, iin yaha ñi cutaxin tatyí can. Tan iyo xaan cuñi ra naha cuví

52 tyin ñaha ca cutuñi ñi ra naha tsa iyo tsa javaha ra tsihin paan, tyin ndi ndava añima ra naha.

Nu janduvaha ra Jesús nyívi cuuhví tsa iyó nduhva tsa nañi Genesaret (Mt. 14.34-36)

53 Yaha sava ra naha nu miñi can tan tsaá ra naha Genesaret inga tsiyo yuhu miñi can, tan tsahñi ra naha yutun ndoo can yatyin ñi yuhu ndutya.

54 Cuhva tsa quita ñi ra naha tsitsi yutun ndoo can, tan nacoto nyívi tsi ra Jesús.

55 Tacan tan tsinú xaan ñi cuahán ñi cuajacoto ñi tsi nyívi iyó nanñi cahnu ityi can tyin tsaá ra Jesús. Tan tsaá cuaha nyívi quee tandihí ñi ñuu nu nyii ra, tan yucú nyívi cuuhví nu tsitó tsaá tsihin ñi.

56 Tan tandihí ñi ityi nu cuahán ra tsitsi ñuu nyihi o tsitsi ñuu nahnu, o tsitsi cuhu, tsaquin nyívi nyívi cuuhví yuhu ityi. Tan caahán ndaahvi ñi tsihin ra na cuhva ra tñi ñi cuuhví can vasu tan yuhu jahma ra tan nduvaha ñi. Tan tandihí maa nyívi tsa tñi jahma ra nduvaha ñi.

7

*Tsa jativí tsi nyivi nu Nyoo
(Mt. 15.1-20)*

¹ Tacan tan tsaꝓ juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyíi ra Jesús.

² Ra ihya naha ra nyehe ra naha tyin juhva ra tsicá tsihin ra Jesús ña nacatyꝓ ra naha ndaha ra naha tañ tsatsi ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahꝓ ra can naha ra.

³ Tyin ra fariseo naha ra javahá ra naha tumaa catyí costumbre tsii tsaahnu ra naha tacan tucu ñi tandihí ca nyivi Israel ña cuví catsi ñi tun ña nacatyá ñi ndaha ñi cuaha tsaha tumaa iyó maa ñi.

⁴ Tan tatun ña nacatya ñi ndaha ñi tsa tsaá ñi quee ñi nuyahvi, ña cuví catsi ñi. Iyó cuaha ca costumbre tsa tuhvá ñi javahá tumaa tsa nacatyá ñi vasu, jarra, tan tandihí ndaha tyiñu tsa tsinú tsihin caa tsa iyó tsi ñi tan nda cuanda cama ñi.

⁵ Tacan tan tsicꝓ tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoꝓ tsii tsaahnu yo naha ra? Tyin ña nacatyá jihna ra naha ndaha ra naha tumaa iyó maa yo tan tsatsi ra naha —catyí ra naha tsihin ra.

⁶ Tan nacañan ra Jesús, tan catyí ra:

—Nditsa tsa cahan ra Isaías, ra cuví ndusu yuhu Nyoo tuhun nyooho tsa jahá ndo tyin vaha xaan ndo tan ña nditsa ndo. Tyin catyí ra tye-hen:

Nyivi ihya jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ña ñi.

⁷ Yacan cuenda nduve yahvi nyaá jacahnú ñi tsi yu,

tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyí ra Isaías tuhun ndo jahꝓ Nyoo, catyí ra Jesús tsihin ra naha.

⁸ Tyin nyooho nacoꝓ ndo cuhva caahán Nyoo, tan nyicún ndo cuhva caahán nyivi ñi, tumaa tuhvá ndo nacatya ndaha tyiñu ndo, tan inga ca tsa tuhvá ndo javahá.

⁹ Nyooho tyaa tsiyo ndo tuhun caahán Nyoo, tacan tan javahá ndo tuhun tsahnu tsa nacoꝓ tsii tsaahnu ndo.

¹⁰ Tyin catyí ley Nyoo tsa tyaa ra Moisés: “Tyaa yahvi ndo tsi jutu ndo tan tsi sihi ndo, tyin tandihí nyivi tsa cua cahan ndavaha ñi tsi jutu o tsi sihi, cua cúu ñi” catyí ley Nyoo tsa tyaa ra Moisés.

¹¹ Maa tyin nyooho catyí ndo tyin cuví catyí iin nyivi tsihin jutu ñi o sihi ñi tye-hen: “Ña cuví jatyinyee yu tsi un tyin tandihí tsa iyó tsi yu cuví tsi Corbán.” (Tuhun ihya cuñí tsi catyí: “Tsa ndihí can tsaha cuenda yu tsi Nyoo.”)

12 Tan tatun catyí nyiví tacan, ña cuñí ca tsi jatyinyee ñi tsi jutú ñi o tsi síhi ñi, catyí ndo.

13 Yacan cuví tsa javahá ndo vityin, tyaá tsiyo ndo tuhun caahán Nyoo, tsahan tyaá yahvi ca ndo tuhun tsahnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

14 Tacan tan cana nyico ra Jesús tsi nyiví tan catyí ra tsihin ñi:

—Tyaá soho vaha tandihi ndo tsa cua cahan yu, tan nducu ndo cuhva cutuñi iñi ndo.

15 Tsa quihví yuhu nyiví, ña cuví jatíví tsi tsi ñi. Tsa jatíví tsi ñi cuví tsa quitá aña ñi.

16 Nyooho tsa iyó soho, tyaá soho ndo tsa caahán yu —catyí ra Jesús tsihin ñi.

17 Tsa yahá nacoq ra Jesús tsi nyiví, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra.

18 Tan catyí ra tsihin ra naha:

—¿A ndi nyooho tan ña cutuñi iñi ndo? ¿A ña tsitó ndo tyin tsa quihví tsitsi yo ña cuví jatíví tsi tsi yo?

19 Tyin tsitsi yo quihví tsi tan ñavin aña yo. Yaha can tan quitá tsi tsitsi cuñu ñuhu yo —catyí ra Jesús.

Tsihin tsehe janaha ra tyin tandihi nyayu tan vaha catsi yo itsi.

20 Tan catyí tucu ra:

—Tsa quitá aña nyiví, yacan jatíví tsi ñi.

21 Tyin tsa caquiñi tsa tsicá iñi ñi tsitsi aña ñi quitá can, tacan tan rayí cuñí ra coo inga ñaha tsi ra, o ñiñaha cuñí ñi coo inga rayí tsi ñi. Yihí ra tsicoó ra tsihin inga ñaha tan ña tindaha ra tsihin ña. Yihí rayí tsicoó ra tsihin ra ndusihi. Tan yihí ñiñaha tsicoó ñi tsihin ñi nduyí. Tan yihí ñi cuñi ñi cahñi ñi nyiví,

22 o cuñí ñi suhu ñi. Yihí ñi cuñí ñi coo tsa tsii inga nyiví tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi.

23 Tandihi tsa ña vaha ihya, quitá can tsitsi aña nyiví, tan jatíví can tsi ñi —catyí ra Jesús tsihin ra naha.

Nu tsinu iñi iin ñaha inga ñuu tsi ra Jesús

(Mt. 15.21-28)

24 Tsa yahá yacan tan quita ra Jesús ñuu can, tan cuahán ra ñuhu nu canyí ñuu Tiro tan ñuu Sidón. Tsa tsaq ra ican, quihví xeehe ra tsitsi iin vehe tyin ña cuñí ra coto nyiví numaa nyí ra. Maa tyin ña cuví cunyí xeehe ra

25 tyin yatyi xaan tsito síhi iin ñaha tyuvaa tsa yihí tatyí ña vaha nu nyí ra. Tacan tan cuahán ña nu nyí ra. Tsa tsaq ña tan tsicuiñi tsiti ña nuu ra.

26 Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaq ña nu nyí ra Jesús tan caahán

ndaahvi ña tsihin ra tyin na tava ra tatyí ña vaha yihí tsi sehe ña.

²⁷ Maa tyin catyí ra Jesús tsihin ña:

—Ña cahan yuhu ca un; na catsi jihna nyivi Israel, ñi cuví sehe Nyoo, tyin ña vaha quihin nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

²⁸ Tan nacahan ña tan catyí ña:

—Ndotsa, Jutu Mañi yu, maa tyin nda cuando ina cuví ndatú ti tan tsatsí ti titsehe tsa cucoyó xuu mesa jahá sehe tsitoho ti —catyí ña tsihin ra.

²⁹ Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yahá quita tatyí ña vaha tsi sehe un. Cuanuhu vityin —catyí ra tsihin ña.

³⁰ Tan cuhva tsa tsaá ña yuvehe ña, canyií taxin sehe ña nu cama, tyin tsa yahá quita tatyí ña vaha tsi ña.

Nu janduvahá ra Jesús tsi ra soho tan ñihi

³¹ Quita nyico ra Jesús ñuhu nu canyií ñuu Tiro, tan yahá ra ñuu Sidón, tan cuahán ra inga ca ñuu tsa cayucú Decápolis. Yahá ra ican tan tsaá ra miñi Galilea.

³² Tsa tsaá ra Jesús ican, tsahan nyivi tsindaca ñi iin ra soho tsa ña cuví cahan nu nyii ra. Cahán ndaahvi ñi tsihin ra na tyiso ra ndaha ra jiñi ra can.

³³ Tacan tan quihin ra tsi ra can cuahán tsiyo tsihin ra nu nduve nyivi. Tan tyaxin ra nundaha ra tsitsi soho ra can,

tan tiví sñi ra, tan tñin ra nu yaa ra can.

³⁴ Tacan tan nanyehe ndaa ra ityi andivi. Tan ixta tatyí ra, tan catyí ra:

—¡Efata! —tan tuhun ihya cuñi tsi catyí: ¡Nuña!

³⁵ Tan tsihin can nuña soho ra can, tan nduvahá yaa ra, tan cuví nacahan ra.

³⁶ Tan catyí ra Jesús tsihin ñi tyin ña cahan ñi can tsihin nyivi, maa tyin vasu ndi maa caahán ra tacan tsihin ñi, cuñihí ca ñi caahán ñi tsa javahá ra.

³⁷ Iyo cuñi ñi tan catyí ñi:

—Tandihí tsa javahá ra tan vaha javahá ra itsi. Nyivi soho nacuñi ñi jahá ra tan nyivi ñihi nacahan ñi.

8

Nu tsaá ra Jesús tsa catsi cumi mil nyivi
(Mt. 15.32-39)

¹ Quivi can nataca cuaha nyico nyivi nu nyii ra Jesús. Tan nduve maa tsa catsi ñi iyó. Tacan tan cana ra Jesús tsi ra tsicá tsihin ra, tan catyí ra tsihin ra naha:

² —Ndaahvi xaan cuñi yu nyehé yu nyivi ihya, tyin tsa uñi quiivi yucú ñi tsihin yo, tan nduve ca tsa catsi ñi.

³ Tyin tun jacuhun yu tsi ñi yuvehe ñi tsa ndi cumañi ca catsi ñi, cua cúu naaha ñi ityi cuhun ñi, tyin yihí ñi cañi xaan quee ñi —catyí ra Jesús tsihin ra naha.

⁴ Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve

nyiví iyó ihya tan xico ñi tsa catsi yo?

⁵Tan tsicā tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

⁶Tacan tan catyí ra tsihin nyiví na cunyecu ñi nu ñuhu. Tsa yahā caḥan ra yacan, tacan tan quihīn ra tsa utsa paan can, tan nacuhva ra tyahvi nyoo tsi Nyoo tsa cuenda can. Tsahan tsahnu cuatyí ra can tan tsahā ra can tsi ra tsicá tsihin ra, tyin tsatsa ra naha can tsi nyiví.

⁷Tan ndahá tucu ra naha juhva tyaca nyihi. Tsahā ndihi ra Jesús tyahvi nyoo tsi Nyoo tsa cuenda can, tacan tan tsahā ra can tsi ra naha tyin tsatsa ra naha tsi nyiví.

⁸Tandihí ñi tsatsí ñi, tan ndahā vaha iñi ñi. Tsa ndihí tsatsí ñi tan jacutu ra naha utsa tyica tsihin tsa ndoo.

⁹Tan quitā maa cumi mil nyiví jacatsí ra. Yahā can tan jacunuhu ra tsi ñi.

¹⁰Tsa yahā cuanuhu ñi, tacan tan quihvī ra tsihin ra tsicá tsihin ra tsitsi iin yutun ndoo. Tan cuahán ra naha ityí Dalmanuta.

Nu tsicán ra fariseo naha ra tsi ra Jesús tyin javaha ra iin tsa iyo

(Mt. 16.1-4; Lc. 12.54-56)

¹¹Tsaā ra fariseo naha ra nu nyí ra Jesús, tan quitsahā caahán yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsí tsi ra, yacan cuenda catyí ra naha tsihin

ra tyin javaha ra iin tsa iyo nyehe ra naha.

¹²Tacan tan ra Jesús ñihi xaan ixtā tatyí ra, tan catyí ra:

—¿Nacuenda tyin tsicán nyiví iyó vityin tsa iyo? Tsa nditsa catyí yu tsihin ndo tyin ña cua nyehe ndo ndi intuhun tsa iyo —catyí ra tsihin ra naha.

¹³Tacan tan nacoō ra tsi ra naha, tan quihvī nyico ra tsitsi yutun ndoo tan cuahán ra inga tsiyo miñi.

Nu catyí ra Jesús tyin tsa jacuahá ra fariseo naha ra cuví can tumaa yutsan iya

(Mt. 16.5-12)

¹⁴Ra tsicá tsihin ra Jesús naā iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can.

¹⁵Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo naha ra tañ ra Herodes —catyí ra tsihin ra naha.

¹⁶Tan ra tsicá tsihin ra quitsahā natuhún tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

¹⁷Tsa tuví iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cuntuñi iñi ndo? ¿A ñaha ca coto ndo? ¿Nacuenda ndi ndava xaan añima ndo?

¹⁸Nyecú tinuu ndo, tan ña nyehé ndo. Nyecú soho ndo,

tan ña tsiñi ndo. ¿A ña nducuhún iñi ndo tsa javaha yu

¹⁹ quivi tsa jacatsi yu uhun mil rayi tsihin uhun taahan ñi paan? ¿A ña ñuhú iñi ndo najava tyica jacutu ndo tsihin tsa ndoo? —catyí ra Jesús, tsicá tuhun ra tsi ra tsicá tsihin ra.

Nacahan ra naha tan catyí ra naha:

—Utsi uvi tyica.

²⁰ Tan catyí nyico ra Jesús tsihin ra naha:

—Tan quivi jacatsi yu cumi mil nyivi tsihin utsa taahan ñi paan, ¿najava tyica jacutu ndo tsihin tsa ndoo?

Nacahan ra naha tan catyí ra naha:

—Utsa taahan tyica.

²¹ Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

Nu janduvaha ra Jesús iin ra cuaa nda ñuu Betsaida

²² Tsa yaha yacan tan cuahán ra Jesús tsihin ra tsicá tsihin ra nda ñuu Betsaida. Tsa tsaá ra naha ican, tsindaca nyivi ñuu can iin ra cuaa nu yucú ra naha. Tan cahan ndaahvi ñi tsihin ra Jesús tyin tñin ra tsi ra cuaa can tan janduvaha ra tsi ra.

²³ Tacan tan tñin ra ndaha ra cuaa can, tan quihin ra tsi ra cuahán tsihin ra ityi tsata ñuu. Tyaa sii ra nu ndaha ra tan tñin ra tinuu ra can, tan tyiso ra ndaha ra soco ra can, tan tsicá tuhun ra tsi ra tun nditsin nyehé ra luxu.

²⁴ Ra cuaa can nanyehe ra tan catyí ra:

—Nyehé yu juhva nyivi, tan caá ñi tumaa caá yutun, maa tyin tsicá ñi —catyí ra.

²⁵ Tacan tan tñin nyico ra Jesús tinuu ra inga tsaha, tan nanyehe vaha ra tan nduvaha ra. Nanyehe catsi vaha ra tandihi tsa iyó.

²⁶ Tacan tan jacunuhu ra Jesús tsi ra yuvehe ra, tan catyí ra tsihin ra:

—Ña quihvi un tsitsi ñuu ihya tan ña nacatyí tuhun tsehe tsihin nyivi —catyí ra Jesús tsihin ra.

Nu cahan ra Pedro tyin ra Jesús cuví Cristo, ra jacacú tsi yo

(Mt. 16.13-20; Lc. 9.18-21)

²⁷ Yaha can tan cuahán ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javaha ra Felipe. Tsitsi tsa cuahán ra naha, tan tsicá tuhun ra Jesús tsi ra naha, tan catyí ra:

—¿Náa caahán nyivi tuhun yu? ¿Yóo ra cuví yu catyí ñi? —catyí ra tsihin ra naha.

²⁸ Nacahan ra naha tan catyí ra naha:

—Yihí nyivi catyí ñi tyin ra Juan, ra jacoondutyá tsi nyivi, cuví un. Inga ñi catyí ñi tyin ra Elías. Yihí ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

²⁹ Tacan tan tsicá tuhun ra tsi maa ra naha, tan catyí ra:

—Tan nyooho, ¿yóo ra cuví yu, cuñi ndo?

Tan nacahan ra Pedro tsihin ra:

—Yooho cuví ra Cristo, ra jacacú tsi nyivi.

³⁰ Maa tyin caḥan ra Jesús tsihin tandihí ra naha tyin ña caḥan ra naha can tsihin ndi intuhun maa nyivi.

Nu caḥan ra Jesús tyin cua cúu ra
(Mt. 16.21-28; Lc. 9.22-27)

³¹ Tacan tan quitsahaḥa jacuahá ra tyin Rayí tsa quee nda gloria cua nyehe xaan ra tundoho. Tan ña cua tsinu íñi ra mandoñi naha ra tan ra jutu cuví ityi nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahñi nyivi tsi ra maa tyin cua nandoto ra tsa tsinu uñi quivi.

³² Tacan caḥan catsi ra tsihin ra naha. Tacan tan quihin ra Pedro tsi ra cuahán tsihin ra tsata vehe tan quitsahaḥa caahán ra tsihin ra Jesús tyin ña vaha tsa caḥan ra.

³³ Maa tyin ra Jesús nanyico coo ra, tan nanyehe ra nu nycú inga ra tsicá tsihin ra. Tan quitsahaḥa caahán ra tsihin ra Pedro, tan catyí ra:

—¡Cúatsiyo nuu yu ihya, cuihna! Tyin yooho ña tsicá íñi un tumaa tsicá íñi Nyoo, tyin tsicá íñi un tumaa tsicá íñi nyivi—catyí ra Jesús tsihin ra Pedro.

³⁴ Tacan tan cana ra Jesús tsi nyivi tan tsi ra tsicá tsihin ra tan catyí ra:

—Tatun ndáa nyooho cuñí cunyicun tsi yu, caḥnya íñi ndo nacoo ndo tsa cuñí maa ndo javaha ndo, tyin tacan tan cuví javaha ndo

cuhva cuñí Nyoo. Tan ña cua ndu uvi íñi ndo tsa yihí ndo cuenda yu, vasu ndi maa tandihí quivi nyehe ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunyicun ndo tsi yu.

³⁵ Tyin nyooho tsa ña cuñí nyehe tundoho tan cuhva ndo ñayivi ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi tsa cuenda yu tan tsa cuenda tuhun Nyoo, cua cacu ndo.

³⁶ Tyin nduve yahvi nyaá cua ñihi ndo tandihí tsa iyó nu ñuhu ñayivi ihya tun ña cua cacu añima ndo.

³⁷ Tyin nduve maa náa tsihin tyahvi ndo tan cuví cacu añima ndo tan ña cunaa tsi.

³⁸ Tyin nyivi cua nducahan nuu tsa cuenda yu tan tsa cuenda tuhun caahán yu quivi cahan ñi tsihin nyivi caquiñi tsa ña tyaá yahvi tuhun Nyoo, yuhu Rayí tsa quee nda gloria cua nducahan nuu yu nyehe yu tsi ñi quivi quitsi yu tsihin ángel cuenda Nyoo Jutu yu tan tsihin tsa sii caá ra.

9

¹ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nácaa ndacá ñaha Nyoo tsihin tunyee íñi ra tsa ndi cumañi ca cúu ndo.

Nu nyehe uñi ra tsicá tsihin ra Jesús nu nasamaḥa cuhva caá ra

(Mt. 17.1-13; Lc. 9.28-36)

² Tsa yaha iñu quivi, tacan tan quihin ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasama cuhva caá ra tan nyehe ra yucú tsihin ra can.

³ Xiñu xaan tan cuitsin xaan jahma ra cuvi tumaa cuitsin vico. Ndi intuhun maa nyivi iyó nu ñuhu ñayivi ihya tan ña cuvi janducuitsin ñi jahma tumaa cuitsin jahma ra.

⁴ Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra.

⁵ Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro.

⁶ Cahān ra tacan tyin ña tsitó ra náa cahan ra tyin maa ra tan ra yucú tsihin ra nayuhvi xaan ra naha.

⁷ Tacan tan nuu iin vico siqui ra naha tan tyasi tsi tsi ra naha. Tan tsitsi vico can nacahan iin ndusu tan catyí tsi:

—Ra ihya cuvi Sehe yu, tan cuñi xaan yu tsi ra. Tyaa yahvi ndo tsa caahán ra —catyí ndusu can.

⁸ Tan cuhva tsa nanyehē ra naha, nduve ca ra Elías tan ra Moisés nyaá, intuhun ña maa ra Jesús nyaá.

⁹ Tan cuhva tsa vatsí nuu ra naha yucu can, catyí ra Jesús tsihin ra naha tyin ña cahan naha ra naha tsa nyehe ra

naha. Cuví cahan maa ra naha can nda yaha nandoto Rayi quee nda gloria, tan rayi can cuví maa ra.

¹⁰ Yacan cuenda ña cahan maa ra naha tuhun can, tan natuhún tahan ra naha náa cuñi tsi catyí tuhun tsa cua nandoto ra.

¹¹ Tacan tan tsicā tuhun ra naha tsi ra Jesús tan catyí ra naha:

—¿Nacuenda tyin catyí ra cuvi maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayivi ihya inga tsaha?

¹² Tan nacahan ra, tan catyí ra:

—Nditsa tyin jihna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihi. ¿Tan náa catyí tuhun Nyoo cuenda yuhu Rayi quee nda gloria? Catyí tsi tyin cua nyehe yu tundoho, tan ña cua cuñi nyivi nyehe ñi tsi yu.

¹³ Maa tyin yuhu catyí yu tsihin ndo tyin tsa yaha quitsi ra Elías. Tan nyivi javaha ñi tsihin ra cuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

Nu janduvaha ra Jesús iin ra tyuvaa tsayihí tatyí ña vaha (Mt. 17.14-21; Lc. 9.37-43)

¹⁴ Tsa yaha yacan tan cuahán ra naha nu yucú tandihi ca ra tsicá tsihin ra naha. Tsa tsaa ra naha ican, nyehe ra naha tyin yucú cuaha nyivi nani canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra

naha tsihin ra tsicá tsihin ra Jesús.

¹⁵ Tsa nyehe nyivi can tsi ra Jesús, iyo xaan cuñi tandihí ñi cuvi. Tacan tan tsahan ñi nu nyaá ra tsicuhva ñi nacumi tsi ra.

¹⁶ Tacan tan tsicá tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

¹⁷ Tacan tan nacahan iin ra tsa nyaá tyañu tandihí nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihí ra jahá nu.

¹⁸ Tyin tandihí ñi nu tiin tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yahá cahan yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuvi tava ra naha tsi nu —catyí ra can tsihin ra Jesús.

¹⁹ Nacahan ra Jesús tan catyí ra:

—¡Nyooho nyivi ña tsinú iñi tan caquiñi! ¿Ndáa nda quivi cua cunyi yu tsihin ndo? ¿Tan najava ca quivi cua cun- yee iñi yu nyehe yu tsi ndo tyin ña tsinú vaha iñi ndo tsi yu? Ndaca ndo tsi ra luhlu can tsi yu ihya —catyí ra.

²⁰ Tacan tan tsindacá jutu ra luhlu can tsi ra tsi ra Jesús. Tan cuhva tsa nyehe nu tatyí ña vaha can tsi ra Jesús, janduvá nu tsi ra luhlu can tan quitsahá tsicó tuvi ra nu ñuhu

jahá nu. Tan quita tiñuu yuhu ra.

²¹ Tacan tan tsicá tuhun ra Jesús tsi jutu ra luhlu can tan catyí ra:

—¿Ama quitsahá taahán ra tyehen?

Tan nacahan jutu ra luhlu can, tan catyí ra:

—Nda ndi luhlu xaan ra.

²² Tan cuaha tsaha tyihí tatyí ña vaha can tsi ra nu cayú ñuhu, tan nu ndutya. Cuñi nu cahni nu tsi ra. Maa tyin tun cuvi javaha un náa javaha un tsihin ra, cundaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

²³ Tan catyí ra Jesús tsihin ra:

—Tun tsinú iñi un, tandihí tan cua cuvi tyin tsa cuenda ra tsa tsinú iñi tandihí tan cuvi —catyí ra Jesús.

²⁴ Tacan tan caná tsaa jutu ra tan catyí ra tsihin ra Jesús:

—¡Tsinú iñi yu! ¡Jatyinyee tsi yu na tsinu ca iñi yu! —catyí ra tsihin ra.

²⁵ Cuhva tsa nyehe ra Jesús tyin cuaha nyivi ndu iin nu nyaá ra, tacan tan tava ra tatyí ña vaha can, tan catyí ra tsihin nu:

—Yooho tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihvi ca un tsi ra —catyí ra Jesús tsihin nu tatyí ña vaha can.

²⁶ Tacan tan quiñi xaan caná tsaa nu tatyí can tan janduvá nu tsi ra inga tsaha, tan quita nu tsi ra. Tan jacúu

naaha nu tsi ra. Tan cuñí maa nyívi tyin tsa tsihí ra.

²⁷ Maa tyin ra Jesús tíin ra ndaha ra luhlu can, tan cañihí ra tsi ra, tan tsinyaá nyityi ra.

²⁸ Tacan tan quihví ra Jesús tsitsi iin vehe, tan tsicá tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

²⁹ Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahví yo tsi Nyoo —catyí ra tsihin ra naha.

Nu cahan ra Jesús inga tsaha tyin cua cahñi nyívi tsi ra

(Mt. 17.22-23; Lc. 9.43-45)

³⁰ Quívi tsa quita ra Jesús ican, tan ra tsicá tsihin ra yahá ra naha ñuhú Galilea. Tan ña cuñí ra Jesús tsa coto nyívi iyó ican tyin nyí ra nu iyó ñi.

³¹ Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayí tsa quee nda gloria cua nacuhva cuenda nyívi tsi yu tsi ra xaan íni tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quívi.

³² Maa tyin ra ican naha ra ña cutuñí íni ra naha tsa caahán ra tsihin ra naha. Tan ña cuñí ra naha ndaca tuhun ra naha tsi ra tyin yuuhví ra naha.

Nu janahá ra Jesús yóo ra cahnu ca cuví tsitsi tsa tandihí nyívi tsa ndacá ñaha Nyoo

(Mt. 18.1-5; Lc. 9.46-48)

³³ Tan tsa tsaá ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicá tuhun ra Jesús tsi ra naha tan catyí ra:

—¿Náa natuhún xaan ndo ityi vatsí yo? —catyí ra tsicá tuhun ra.

³⁴ Tsa cahan ra Jesús tacan, taxin ña cuví ra naha, tyin ityi vatsí ra naha natuhun ra naha yóo ra cahnu ca cuví tsa nuu tandihí ra naha.

³⁵ Tacan tan tsinyaá ra Jesús tan caná ra tsi tandihí tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñí cuví ityi nuu, cuñí tsi cuví ndo nda nu ndihí ña tsa nuu tandihí ndo, tan jatyinyee ndo tsi tandihí nyívi —catyí ra Jesús tsihin ra naha.

³⁶ Tacan tan quihín ra iin ra luhlu tyaa ra mahñu ra naha. Tan tyihí jucun ndaha ra tsi ra luhlu can, tan catyí ra:

³⁷ —Nyívi naquihin iin nyívi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñí ñi tsi yu. Tan nyívi naquihin cuenda tsi yuhu, naquihin cuenda tucu ñi tsi ra tsa jaquitsí tsi yu tan ñavin maa ñi maa yu naquihin cuenda ñi.

Nyívi tsa ña cuxaán tsi yo, juvin ñi ican jatyinyeé tsi yo

(Mt. 10.42; Lc. 9.49-50)

³⁸ Tacan tan catyí ra Juan tsihin ra Jesús:

—Maestro, nyehé ndi iin ra tavá tatyí ña vaha tsi nyívi tsihin sivi un. Maa tyin tyasi

ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

³⁹ Maa tyin catyí ra Jesús tsihin ra:

—Ña çasi ndo nu javaha nyivi tacan. Tyin ndi intuhun ñi tsa javaha tsa iyo tsihin sivi yu tan ña cua cana iñi ñi cahán ñi ndavaha ñi tsi yu.

⁴⁰ Tyin nyivi tsa ña xaan iñi tsi yo, tsihin yo cutahán ñi.

⁴¹ Tan nyivi tsa cua cuhva vasu tan iin yatsin ndutya coho ndo tyin tsinú iñi ndo tsi yu, cua cuhva Nyoo tsa cua cuhva ra tsi ñi.

Nu tsahá cuenda ra Jesús tsi yo nácaa jaha cuenda yo tsi yo tan ña javahayo tsa ña vaha (Mt. 18.6-9; Lc. 17.1-2)

⁴² Nyivi cua natyuhu tsi iin nyivi tsa ñaha ca tsinú vaha iñi tsi yu tyin javaha ñi tsa caquiñi, vaha ca cuhñi nyivi yuu yoso vee jucun ñi tan cujanehñi ñi tsi ñi tsitsi nu cunu ndutya ñuhu.

⁴³ Tatun ndaha un javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca quihvi un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un.

⁴⁴ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁵ Tatun tsaha un tan javahá tsa ña vaha, çasi nu javahá can tacan. Tatun ña cuví, çahnya can tan javita

un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu.

⁴⁶ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁷ Tun tinuu un javahá tsa ña vaha, çasi nu javahá can tacan. Tatun ña cuví, çava can tan javita un tyin vaha ca quihvi un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un.

⁴⁸ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁹ Maa tyin tandihi nyivi nyicún tsi yuhu, ñi tsa nyehé tundoho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñi.

⁵⁰ Vaha xaan ñi. Maa tyin tun ndihi tsa uhva tsi, ña jandu uhva ca tsi tan ña cuví ca cuatyíñu nyivi itsi. Yacan cuenda nyooho, ña jandihí ndo tsa coo tuhun Nyoo añima ndo tyin cuví tsi tumaa ñi. Tyin tacan tan cuví coo taxin ndo tsihin tahan ndo.

10

Nu caahán ra Jesús tyin ña vaha nacoo rayi ñasihí ra (Mt. 19.1-12; Lc. 16.18)

¹ Quita ra Jesús ñuu Capernaum tan cuahán ra cuenda Judea inga tsiyo yutya Jordán.

Tan ndu iin cuaha nyico nyivi nu nyii ra, tacan tan quitsaha jacuahá ra tsi ñi tumaa tuhvá maa ra javahá.

² Tacan tan natuhva juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsicá tuhun ra naha tsi ra tatun vaha nacao rayii ñasihi ra.

³ Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

⁴ Tan nacahan ra naha tan catyí ra naha:

—Ra Moisés catyí ra tyin cuví caní ndi tutu cuenda ley ndi, tacan tan cuvi nacao ndi ñasihi ndi —catyí ra naha tsihin ra.

⁵ Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo.

⁶ Maa tyin quivi jihna ñi, quivi javaha Nyoo tandihi maa tsa iyó, catyí nu tutu ra tyin javaha ra rayii tan ñaha.

⁷ “Yacan cuenda taahan tsi nacao rayii jutu ra tan sihi ra tan ndu iin ra tsihin ñasihi ra.

⁸ Tan nduvi ñi cua cuvi ñi tumaa intuhun ña nyivi.” Yacan cuenda ñavin ca uvi taahan ñi, tyin intuhun ña nyivi cua cuvi ñi.

⁹ Yacan cuenda, ña cuví jasiin nyivi tsa jandu iin Nyoo —catyí ra Jesús tsihin ra naha.

¹⁰ Yahá can tan cuanuhu ra nda yuvehe, tan quitsaha nducú tuhun nyico ra tsicá tsihin ra siqui tuhun can.

¹¹ Tan catyí ra Jesús tsihin ra naha:

—Ra tsa cua nacao ñasihi tan quihin ra inga ñaha, cua coo cuatyí ra nu Nyoo.

¹² Tacan tucu ñi ñaha: Tun nacao ña tsi yii ña tan tindaha ña tsihin inga rayii, juvin ñi cua coo tucu cuatyí ña —catyí ra Jesús.

Nu nasoco ra Jesús tsi tsa nyihi

(Mt. 19.13-15; Lc. 18.15-17)

¹³ Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsaha cuxaán ra naha tsi nyivi cuahán cuandacá tsa nyihi.

¹⁴ Maa tyin tsa nyehe ra Jesús tsa javahá ra naha tacan, cuxaan ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña çasi ndo itsi naha tsi tyin nyivi ndacá ñaha Nyoo cuví ñi tumaa cuví tsa nyihi tyin tsinú iñi ñi tsi Nyoo.

¹⁵ Tan tsa nditsa catyí yu tsihin ndo tun ña cuita iñi nyivi tsi Nyoo tumaa nyitá iñi iin ra luhlu tsi jutu ra, ña cua cuví quihvi ñi nu ndacá ñaha Nyoo —catyí ra Jesús tsihin ra naha.

¹⁶ Tacan tan quihin ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

Nu tsahā cuenda ra Jesús tyin y#i xaan nacuhva cuenda iin ra cuca tsi ra tsi Nyoo

(Mt. 19.16-30; Lc. 18.18-30)

¹⁷ Yahā yacan tan cuahán ra Jesús. Tan tsinú xaan iin ray#i cuahán ra cuanyicún ra tsi ra. Tsa tahān ra tsi ra, tsicuiñi tsi#i ra nuu ra, tan tsicā tuhun ra tsi ra, tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa? —catyí ra tsihin ra Jesús.

¹⁸ Tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi ra vaha iyó tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu.

¹⁹ Yooho tsitó un tsa catyí Nyoo tyin javaha yo: “Ña coo inga ñaha tsi un. Ña cahñi un nyivi. Ña suhu un. Ña cahan un cuendu. Ña jandavi ñaha un tsi nyivi. Tyāa yahvi tsi jutu un tan tsi sihi un” —catyí ra Jesús tsihin ra.

²⁰ Nacahan ra tan catyí ra:

—Maestro, tandih#i tuhun ihya tan tyaá yahvi yu itsi nda ndi luhlu yu tan nda cuanda vityin —catyí ra.

²¹ Tacan tan si#i cuñi ra Jesús nyehé ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandih#i tsa iyó tsi un, tan cuhva un xuhun can tsi nyivi ndaahvi. Tacan tan coo tsa cuca tsi un nda

gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyivi tsi un —catyí ra Jesús tsihin ra.

²² Tsa tsiñi ra tyuvaa can tsa cahān ra Jesús tacan, cui-ihya xaan cuñi ra cuvi, tan tsihin tucuiihya iñi cuanuhu ra yuvehe ra tyin cuca xaan ra.

²³ Tacan tan nanyehe ra Jesús nan#i canduvi nu nyaá ra, tan catyí ra tsihin ra tsicá tsihin ra:

—iY#i xaan tan cuvi nacuhva cuenda nyivi cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

²⁴ Tsa tsiñi ra tsicá tsihin ra tsa caahán ra, iyo xaan cuñi ra naha cuvi. Maa tyin catyí tucu ra tsihin ra naha inga tsaha:

—iSehe yu, nyivi tyaá xaan jiñi tandih#i tsa cuca, y#i xaan tan quihvi ñi nu ndacá ñaha Nyoo!

²⁵ Yaty#i ca cuvi yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra Jesús.

²⁶ Tsa tsiñi ra naha tuhun ihya, iyo xaan cuñi ra naha cuvi, tan quitsahā tsicá tuhun tahan ra naha, tan catyí ra naha:

—Tun tacan, ¿yóo cua cacu? —catyí ra naha.

²⁷ Tacan tan nanyehe ra Jesús tsi ra naha tan catyí ra tsihin ra naha:

—Nyivi ña cuví javaha ñi tsehe, maa tyin Nyoo cuví

javaha ra tyin tsa cuenda Nyoo nduve maa tsa yii.

²⁸ Tacan tan catyí ra Pedro tsihin ra:

—Jutu Mañi yu, tandihi maa tsa iyó tsi ndi nacoó ndi can tan nyicún ndi tsi un.

²⁹ Nacahan ra Jesús tan catyí ra:

—Tsa nditsa catyí yu tsihin ndo tyin tandihi nyooho tan tandihi inga ca nyivi tsa cua nacoó vehe, o yañi, o cuhva, o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyivi tyin cuñi Nyoo jacacu ra tsi ñi,

³⁰ cua ñihi ñi cientu ca tsaha siqui tsa nacoó ñi nu ñuhu ñayivi ihya. Cua ñihi ñi vehe, cua ñihi ñi nyivi cua cuvi yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyivi tundoho tsi ñi. Tan nu inga ñuhu ñayivi tsa tsa vatsí, cua ñihi ñi ñayivi nyito tsa ña cua naa maa coo ñi.

³¹ Cuaha ñi nyivi cuahán ityi nuu vityin, cua cuhun ñi nda nu ndihi ña. Tan nyivi cuahán nu ndihi ña vityin, cuaha ñi cua cuhun ityi nuu —catyí ra Jesús.

Nu jacotó nyico ra Jesús nácaa cua cahñi nyivi tsi ra (Mt. 20.17-19; Lc. 18.31-34)

³² Tsa tsa cuñi cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandihi nyivi tsa cuahán cuanyicún tsi ra. Iyo xaan cuñi ñi tan tsihin tsa yuuhví ñi cuahán ñi. Tacan tan tava sijn ra tsi tsa utsi uvi ra tsicá

maa tsihin ra. Tan quitsaha catyí tuhun ra tsihin ra naha tsa cua tahan ra.

³³ Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyivi tsi yuhu, Rayii quee nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyi ra naha tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra.

³⁴ Cua vacu nducu ra naha tsi yu, cua cañi ra naha tsi yu, cua tivi sii ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

Nu tsicán ra Jacobo tan ra Juan iin tumañi iñi tsi ra Jesús (Mt. 20.20-28)

³⁵ Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

³⁶ Tacan tan tsicá tuhun ra Jesús tsi ra naha tan catyí ra:

—¿Náa cuñi ndo javaha yu?

³⁷ Tan nacahan ra naha tan catyí ra naha:

—Cuñi ndi tsa cuhva un cunyecú ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

³⁸ Tacan tan catyí ra Jesús tsihin ra naha:

—Nyooho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

³⁹ Tan nacahan ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu.

⁴⁰ Maa tyin tsa cunyaa iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyi yóo cua ñihi can —catyí ra Jesús tsihin ra naha.

⁴¹ Tsa tsiñi tsa utsi ca ra tsicá tsihin ra Jesús yacan, cuxaan ra naha tsi ra Jacobo tan ra Juan.

⁴² Maa tyin cana ra Jesús tsi ra naha tan catyí ra tsihin ra naha:

—Tsa tsitó ndo tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi.

⁴³ Maa tyin ñavin tacan taahán tsi javaha nyooho tyin ra tsa cuñí cuvi ra cahnu ityi nuu Nyoo, cuñí tsi cuvi ra musu tandihi ndo.

⁴⁴ Tan nyooho tsa cuñí cuvi ityi nuu, cuñí tsi cuvi ndo musu tandihi ca ndo.

⁴⁵ Tyin yuhu, Rayi tsa quee nda gloria, ña vatsí yu tyin cuñí yu jatyinyee nyivi tsi yu. Yuhu vatsí yu vatsí jatyinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

Nu jananyehē ra Jesús tsi ra Bartimeo

(Mt. 20.29-34; Lc. 18.35-43)

⁴⁶ Tacan tan tsaā ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyivi cuahán cua nyicun tsi ra naha. Tan ityi yaha ra naha nyaá iin ra cuaa nañi Bartimeo, sehe ra Timeo, tsicán ra caridaa.

⁴⁷ Tan cuhva tsa tsito ra cuaa can tyin tsa cua cuyatyi yaha ra Jesús, ra ñuu Nazaret, nu nyaá ra, quitsaha caná tsa ra, tan catyí ra:

—¡Jesús, tata ra David, cundaahvi iñi tsi yu! —catyí ra caná tsa ra.

⁴⁸ Tacan tan quitsaha cuxaan nyivi tsi ra tan catyí ñi tsihin ra na cutaxin ra, maa tyin cuñihí ca ra caná tsa ra tan catyí ra:

—¡Tata ra David, cundaahvi iñi tsi yu! —catyí ra.

⁴⁹ Tacan tan tsicuiñi ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Nduvita, cohon tyin caná ra tsi un —catyí ra naha tsihin ra.

⁵⁰ Tacan tan janehñi ra jahma ndasi ra nda sava. Tan cuahan ra iin yaha ñi nda nu nyaá ra Jesús.

⁵¹ Tacan tan tsicā tuhun ra Jesús tsi ra:

—¿Náa cuñí un javaha yu?

Tan nacahan ra cuaa can tan catyí ra:

—Maestro, cuñi yu janduvaha un tinuu yu na nanyehe nyico yu —catyí ra.

⁵² Tan catyí ra Jesús tsihin ra:

—Cuanuhu. Tsa nduvaha un tyin tsinú ifi un tsi yu.

Juvin ñi cuhva can tan nanyehe ra can. Tan cueta cuahán ra cuanyicún ra tsi ra Jesús.

11

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Tsa tsa cuñi tsa ra Jesús tan nyivi nyicún tsi ra nda ñuu Jerusalén, yatyn nu canyí ñuu Betfagé tan ñuu Betania, tan yatyn ñi yucu nu iyó yutun Olivo, tan catyí ra Jesús tsihin uvi ra tsicá tsihin ra:

² —Cuaahan ndo ñuu tsa canyí ityi nuu ihya. Tsa tsa ndo ican cua nañihi ndo iin urru. Quiti yoco cuví ti, nyaá ti nuuhñi ti, tan ñaha ca quih tyayu ti. Ndatsi ndo tsi ti, tan quihin ndo tsi ti quitsi ndaca ndo tsi yu.

³ Tatan cusana ndaca tuhun nyivi tsi ndo: “¿Nacuu ndo urru ihya?” Tacan tan catyi ndo tsihin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyi ndo tsihin ñi —catyí ra Jesús tsihin ra naha.

⁴ Tacan tan cuahán ra naha, tan tsa tsaá ra naha, nañihi ra naha urru can nuuhñi ti tsitsi ityi tsata yuhu iin cora. Tan ndatsi ra naha tsi ti.

⁵ Tan catyí juhva ra yucú ican naha ra tsihin ra naha:

—¿Náa javahá ndo? ¿Nacuenda ndatsi ndo urru can? —catyí ra naha tsihin ra naha.

⁶ Tacan tan nacahan ra naha tumaa cahan ra Jesús tsihin ra naha. Tan tsaá ra can naha ra quihin ra naha urru can.

⁷ Tacan tan tsindaca ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti.

⁸ Tan tsaquin cuaha nyivi jahma ñi tsitsi ityi nu yaha ra, tan inga ñi tsahnya ñi ndaha yutun tan tsaquin ñi tsitsi ityi.

⁹ Tacan tan nyivi tsa cuahán ityi nuu ra tan ityi tsata ra, quitsaha caná tsa ñi tan catyí ñi:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsi Nyoo!

¹⁰ ¡Na jacahnu yo tsi ra vatsi cundaca ñaha tumaa tsindaca ñaha ra David, tsii tsaahnu yo! ¡Cahnu xaan cuví ra nyaá gloria! —catyí ñi.

¹¹ Tacan tan quihvi ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yaha nyehe ra tandihi tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

Nu cahan ra Jesús tsi yutun higo tsa ña tsahá tsiti

(Mt. 21.18-19)

¹² Tsa tuvi inga quivi tsa quita ra Jesús tan ra tsicá tsihin ra ñuu Betania, tsaá soco tsi ra Jesús.

13 Tsa quita ra naha ndasava nyehe ra Jesús nu nyaá iin yutun higo tsa iyó numa. Tsahan ra tsinyehe ra tun iñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi cuhva tun tsiti.

14 Tacan tan cahan ra Jesús tsi tun, tan catyí ra:

—Ndi iin sava ca quivi ña cua quee ca tsiti catsi nyivi nuu un —catyí ra tsihin tun.

Tan tsiñi ra tsicá tsihin ra tsa caahán ra.

Nu jacunū ra Jesús nyivi xicó nuquehe vehe ñuhu cahnu (Mt. 21.12-17; Lc. 19.45-48; Jn. 2.13-22)

15 Tsa tsaq ra naha ñuu Jerusalén, cuahán nyico ra Jesús vehe ñuhu cahnu tan quitsaha jacunú ra nyivi xicó tan jata tsa yucú nuquehe yu-vehe ñuhu can. Janduva ra mesa nu nyecú nyivi samá xuhun nyivi. Tan janduva tucu ra tyayu nu nyecú nyivi xicó paloma.

16 Tan ña tsaha ca ra yaha sava ñi nuquehe vehe ñuhu can tsihin ndaha tyiñu.

17 Tan quitsaha jacuahá ra tsi nyivi, tan catyí ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé naniñ nu ñuhu ñayivi tsi Nyoo”? Tan nyooho jananduvi ndo itsi vehe ñasuhu —catyí ra tsihin ñi.

18 Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsaha

nducú ra naha cuhva cahñi ra naha tsi ra tyin yuuhví ra naha nyehe ra naha tsi ra tsa cuenda tsa janahá ra tsi nyivi tan yuuhví tucu ra naha tyin tsa cuaha xaan nyivi nyicún tsi ra.

19 Maa tyin tsa tsa cuñi cuaa, quita ra Jesús ñuu can tsihin ra tsicá tsihin ra.

Nu na ityi yutun higo (Mt. 21.20-22)

20 Tsa tuvi inga quivi, yaha nyico ra naha nu nyaá yutun higo tsa cahan ra Jesús. Tan nyehe ra naha tyin na ityi tun tan nda cuanda yoho tun na ityi.

21 Tacan tan tsa nyehe ra Pedro yutun higo can, nducuhun iñi ra tsa javaha ra Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahan un —catyí ra.

22 Nacahahan ra Jesús, tan catyí ra:

—Tsinu iñi ndo tsi Nyoo.

23 Tyin tsa nditsa catyí yu tsihin ndo tyin nyivi cua cahan tsihin yucu ihya tyehen: “Cuatsiyo ihya tan cuaahan tsitsi ndutya ñuhu”, tan tatun tsinú iñi ñi tyin cua cundaa tsa cahan ñi tan ña uvi tsicá iñi ñi, cua cundaa tsi.

24 Yacan cuenda catyí yu tsihin ndo tyin tandihí tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihin cuenda ndo can, cua naquihin ndo can.

25 Tan tsa cua ndacan tahvi ndo tsi Nyoo, tun nducuhún

iñi ndo tyin xaan cuñí ndo tsihin nyivi, jaha ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo.

²⁶ Maa tyin tun ña jaha ndo tucahnu iñi tsi nyivi, ndi Jutu ndo, ra nyaá gloria, tan ña cua jaha ra tucahnu iñi tsi maa ndo.

Nu tsicā tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyivi

(Mt. 21.23-27; Lc. 20.1-8)

²⁷ Tacan tan tsaā nyico ra naha ñuu Jerusalén. Tsa nyii ra Jesús tsicá nuu ra nuquehe vehe ñuhu cahnu, natuhva ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra nu nyaá ra.

²⁸ Tan tsicā tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

²⁹⁻³⁰ Tan nacahan ra Jesús, tan catyí ra:

—Cuñí tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo o nyivi? Tatun catyi tuhun ndo tsihin yu yóo jaquitsi tsi ra, cua catyi tuhun tucu yuhu tsihin nyooho yóo tava tyiñu tsi yu javahá yu tyehen —catyí ra Jesús tsihin ra naha.

³¹ Tacan tan quitsaha caahán yuhu tahan ra naha, tan catyí ra naha:

—Tun catyi yo tyin Nyoo jaquitsi tsi ra Juan, cua catyi ra tsihin yo tyehen: “Tun Nyoo jaquitsi tsi ra, ¿nacuenda ña tsinu iñi ndo tsa cahan ra?”

³² ¿A vaha tun catyi yo tyin nyivi jaquitsi tsi ra? Ña cuvi —catyí ra naha, tyin yuuhví ra naha tsi nyivi, tyin tandihi ñi tan tsinú iñi ñi tyin ndusu yuhu Nyoo cuvi ra.

³³ Tacan tan catyí ra naha tsihin ra Jesús:

—Ña tsitó ndi.

Tacan tan catyí ra Jesús tsihin ra naha:

—Tun ña tsitó ndo, ndi yuhu tucu, tan ña cua catyi tuhun yu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

12

Nu caahán ra Jesús tuhun ra ña vaha jaha tyiñu

(Mt. 21.33-46; Lc. 20.9-19)

¹ Tacan tan quitsaha caahán ra Jesús tsihin ra naha tsihin cuhva ihya, tan catyí ra:

—Tsioco iin rayi tsa tatsi yoho yucu vixi tsa nañi uva, ra ican tyasi ra iin cora nani canduvi nu tatsi ra yucu vixi can. Tan javaha ra iin nu cua tava ra ndutya uvas can. Tan javaha tucu ra iin vehe sucun tyin tacan tan cuvi jaha cuenda ra nani cahnu nu ndaha tyiñu ra.

Tsa yaha yacan tan tsaha nuu ra ñuhu can tsi juhva rayi tyin jaha tyiñu ra naha tsihin tsi. Tacan tan cuahán ra inga ñuu.

2 Tsa tahañ ra tsi quivi iyó uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra.

3 Maa tyin ra ican naha ra tñin ra naha tsi ra. Tan cañi ra naha tsi ra. Tan jacunuhu ra naha tsi ra tsihin ndaha ndii ra.

4 Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cahañ nyaa ra naha tsi ra.

5 Tsitoho ñuhu can jacuhun nyico ra inga musu. Tan tsahñi ra naha tsi ra. Yahá yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

6 "Tan cumañi intuhun ña ra tsa cuvi jacuhun ra. Tan ra ican cuvi sehe ra tsa cuñi xaan ra. Nu ndihi tuhun jacuhun ra sehe ra tyin cuñi maa ra tsicá iñi ra: "Tun jacuhun yo sehe yo, cua tyaa yahvi ra naha tsi ra tyin sehe yo cuvi ra", cuñi ra.

7 Maa tyin tsa nyehe ra jahá tyiñu can naha ra tsi ra sehe ra, natuhun tahan ra naha tan catyí ra naha: "Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tsihin can", catyí ra naha.

8 Tacan tan tñin ra naha tsi ra tan tsahñi ra naha tsi ra. Tan tava ra naha cuñu ñuhu ra ityi tsata cora can —catyí ra Jesús.

9 Tacan tan tsicá tuhun ra

Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can.

10 ¿A ñaha ca cahví ndo nu tutu Nyoo nu catyí tsi tyehen? Yuu tsa javita ra javahá vehe naha ra,

yacan cuvi yuu tsa tsiñi ñuhu ca.

11 Maa Nyoo Jutu yo jahá tsa cahnu ca cuvi yuu ihya. Tan iyo xaan cuñi yo nyehé yo can, catyí tsi —catyí ra Jesús tsihin ra naha.

12 Tacan tan ra jutu cuvi ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducu ra naha cuhva tyihi ra naha tsi ra Jesús vehe caa tyin tsitó ra naha tyin tuhun maa ra naha caahán ra tsa tsatyiñu ra cuhva can. Maa tyin ña tñin ra naha tsi ra tyin yuuhvi ra naha nyehe ra naha tsi nyivi. Nacoo ra naha tsi ra, tan cuahán ra naha.

Nu caahán ra Jesús siqui tuhun tsa tyahvi nyivi xuhun tsi ra ñuu Roma tsa ndacá ñaha tsi nyivi Israel

(Mt. 22.15-22; Lc. 20.20-26)

13 Tacan tan jacuhun ra naha juhva ra yihí cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahan ra Jesús iin tsa ña vaha tyin tacan tan cuvi tyaa ra naha cuatyí tsi ra.

14 Tsa tsaꞗ ra can naha ra tan quitsahꞗ caahán ra naha tsihin ra Jesús tan catyí ra naha:

—Maestro, tsitó ndi tyin tsa nditsa caahán un. Tan inducu ñi cuñí un nyehe un nyivi cuca tan nyivi ndaahvi. Tan nditsa tyin ityi Nyoo janahá un. Yacan cuenda cuñí ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

15 Tan tsitó ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Ndaca ndo iin xuhun tsi yu ihya, na nyehe yu —catyí ra.

16 Tsindacꞗ ra naha xuhun can tsi ra. Tsa nyehe ra can tan tsicꞗ tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

17 Tacan tan catyí ra Jesús tsihin ra naha:

—Tun tacan, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi Nyoo —catyí ra Jesús tsihin ra naha.

Tan iyo xaan cuñí ra naha tsihin tsa nacahan ra.

Nu cuñi ra saduceo naha ra jandavi ñaha ra naha tsi ra Jesús

(Mt. 22.23-33; Lc. 20.27-40)

18 Tacan tan cuahán juhva ra saduceo naha ra nu nyii ra Jesús. Tan ra saduceo can naha ra catyí ra naha tyin ña cua nandoto nyivi. Yacan cuenda cahꞗn ra naha tyehen tan catyí ra naha tsihin ra Jesús:

19 —Maestro, ra Moisés tyaa ra nácaa taahán tsi javaha yo tatun iin rayii tsihi tan ndoo ñasihi ra tan nduve sehe ña tsicoꞗ tsihin ra. Catyí ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi.

20 Iin tsaha iin rayii tsicoꞗ utsa sehe yii ra. Ra tsa jihna ñi tindaha ra tsihin iin ñaha, maa tyin nduve sehe ra tsicoꞗ tsihin ña, tan tsihi ra.

21 Tacan tan tindaha ra yañi ra tsa tsinu uvi tsihin ñaha tsa ndoo can. Maa tyin juvin ñi ña tsicoꞗ sehe ra tsihin ña tan tsihi ra. Juvin ñi tacan tahan tucu ra tsa tsinu uñi.

22 Tandihí tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoꞗ sehe ra naha tsihin ña. Tan nu ndihí tuhun, tsihi ndihí maa ña.

23 Tan vityin, tun nditsa tsa cua nandoto nyivi, ¿ndaa tsa utsa taahan ra can naha ra cua cuvi yii ña quivi cua nandoto ñi? Tyin tandihí maa ra naha tan tindaha ra naha tsi-

hin ña —catyí ra naha tsihin ra Jesús.

24 Tacan tan nacahan ra Jesús tan catyí ra tsihin ra naha:

—Caahán soho ñi maa nyooho, tyin ña tsitó ndo tsa catyí tuhun Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo.

25 Quivi cua nandoto nyivi, ndi ña cua tindaha ñi tan ndi ña cua tindaha sehe ñi, tyin cua cuví ñi tumaa ángel iyó gloria.

26 Tan tuhun tsa cua nandoto nyivi, ¿a ñaha ca cahvi ndo nu libru tsa tyaa ra Moisés nu catyí tsi nácaa cahñ Nyoo tsihin ra nu cayú yutun iñu? Tyin catyi ra tsihin ra tyehen: “Yuhu cuví Nyoo ra Abraham, ra Isaac, tan ra Jacob”, catyi Nyoo tsihin ra Moisés.

27 Ihya nyehé yo tyin nyito añima ra can naha ra vasu ndi maa tsanaha tsihi ra naha tyin Nyoo ñavin Nyoo nyivi tsihi cuví ra, tyin Nyoo cuví ra Nyoo nyivi nyito. Yacan cuenda catyí yu tyin nyooho caahán soho ñi maa ndo —catyí ra Jesús tsihin ra naha.

Ley tsa ñiñi ca tsa tsaha Nyoo

(Mt. 22.34-40)

28 Ña naha ñi tan tsañ iin ra maestro cuenda ley vehe ñuhu, tan tsiñi ra tsa caahán ra Jesús tsihin ra saduceo can naha ra. Tan cuhva tsa tsito ra tyin ra Jesús vaha nacahan ra tsihin ra naha, tsicá tuhun ra tsi ra tan catyí ra:

—Tsitsi tsa tandihi ley, ¿ndaa tsa ñiñi ca cuñi tsi javaha yo? —catyí ra.

29 Tan nacahan ra Jesús tan catyí ra:

—Ley tsa jihna ñi tan ñiñi ca cuñi tsi javaha yo tsa nuu tandihi ley, cuví ley ihya: “Nyooho nyivi Israel, tyaa soho ndo: intuhun ñi maa Nyoo Jutu yo iyó.

30 Cuñi ndo tsi Jutu Mañi yo Nyoo tsihin tsa ñi iñi ndo, tan tsihin tsa ñi iñi añima ndo, tan tsihin tandihi tsa tsiñi tuñi jiñi ndo, tan tsihin tandihi tunyee iñi tsa iyó tsi ndo.” Ley ihya cuví tsa ñiñi ca tan tsa jihna ñi taahán tsi javaha yo.

31 Tan tsa tsinu uvi tsa yatyin inducu ñi caahán tsi tsihin tsa jihna ñi tan catyí tsi tyehen: “Cuñi tahan ndo tsi ndo tumaa cuñi ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyí ra Jesús.

32 Tacan tan ra maestro cuenda ley can catyí ra tsihin ra:

—Vaha xaan nacahan un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó.

33 Tan tsa cuñi yo tsi Nyoo tsihin tsa ñi iñi yo, tan tsihin tandihi tsa tsiñi tuñi jiñi yo, tan tsihin tsa ñi iñi añima yo, tan tsihin tandihi tunyee iñi iyó tsi yo, tan tsa cuñi tahan yo tsi yo tumaa cuñi yo tsi maa yo, tandihi yacan tan cahnu ca cuví can tan ñavin ca tsa jamañi yo tsi Nyoo, tsa tsahñi yo quiti tan tsahmí yo

can nu altar —catyí ra maestro cuenda ley can tsihin ra Jesús.

³⁴ Tsa nyehe ra Jesús tyin vaha nacahan ra tsihin tsa catsi jiñi ra, tan catyí ra tsihin ra:

—Luxu cuii ña tan ñihi un cuhva nácaa nacuhva cuenda un añima un tsi Nyoo na cundaca ñaha ra tsi un —catyí ra Jesús tsihin ra.

Ndi intuhun ca maa nyivi tan ña cana ca iñi ñi ndaca tuhun ñi náa ndaca tuhun ñi tsi ra Jesús.

Ra Cristo Sehe Nyoo tsi ra tanjuvin ñi cuví tucu ra tata ra David

(Mt. 22.41-46; Lc. 20.41-44)

³⁵ Jacuahá ra Jesús tsitsi vehe ñuhu cahnu, tan catyí ra:

—¿Nacuenda tyin catyí ra maestro cuenda ley vehe ñuhu naha ra tyin tata ra David cuví ra Cristo?

³⁶ Tan juvin ñi maa ra David catyí tuhun ra Cristo tyehen:

Nyoo cahan ra tsihin Jutu Mañi yu, tan catyí ra:

“Cunyaa xiin cuaha yu ihya nda cuanda caquin yu tsi ra xaan iñi tsi un naha ra tsaha un”, catyí ra David tahanan tsanaha jahá Tatyí li Nyoo.

³⁷ ¿Nacaa cuví cuú tucu ra Cristo tata ra David, tan juvin ñi maa ra David catyí tyin ra Cristo cuví Jutu Mañi ra? —catyí ra Jesús.

Tan cuaha nyivi yucú tyaa soho tsa caahán ra tan sii xaan cuñi ñi.

Nu caahán ra Jesús tyin iyó cuaha cuatyí ra maestro cuenda ley vehe ñuhu naha ra

(Mt. 23.1-36; Lc. 11.37-54; 20.45-47)

³⁸ Quitsaha jacuahá ra Jesús tan catyí ra tyehen:

—Jaha ndo cuenda tsi ndo tsihin ra maestro cuenda ley vehe ñuhu naha ra, tyin taahán xaan iñi ra naha cunditsí ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva ndo nacumi tsi ra naha.

³⁹ Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha ca cunyecu ra naha.

⁴⁰ Tan quihín nyaá ra naha vehe ñi ndaahvi tsa tsihi yhi tyin ña cuví tyahvi ñi xuhun tsa tsicán ra naha tsi ñi. Tan cuñi ra naha tsa vaha cahan nyivi tuhun ra naha. Yacan cuenda naha tsicán tahvi ra naha tsi Nyoo nu tuví nyivi. Maa tyin nduve náa catyí javahá ra naha tacan tyin ñihi ca cua tatsi tuñi Nyoo tsi ra naha —catyí ra Jesús.

Tsa tsaha ñaha ndaahvi tsihi yhi

(Lc. 21.1-4)

⁴¹ Iin tsaha nyii ra Jesús tsitsi vehe ñuhu cahnu tan nyaá ra yatyin ñi nu nyii tsatun nu tyihí nyivi xuhun tsa tsahá ñi tsi Nyoo. Tan nyehé ra nu tyihí nyivi xuhun tsitsi tsatun can. Tan cuaha nyivi cuca tyihí ñi cuaha xaan xuhun.

⁴² Tsitsi tsa nyaá ra ican tsaq iin ñaha ndaahvi tsihi

yíi, tan tyihí ña uvi taahan ñi xuhun nyihí tsa caaha xaan nyaá.

⁴³ Tacan tan caná ra Jesús tsi ra tsicá tsihin ra, tan catyí ra tsihin ra naha:

—Tsa nditsa catyí yu tsihin ndo tyin nuu Nyoo cuaha ca xuhun tsahá ñaha ndaahvi ihya tan ñavin ca inga nyívi.

⁴⁴ Tyin tsahá ñi tsa ndoo siqui xuhun ñi. Maa tyin ñaha ihya tyihí ña tandihí tsa iyó tsi ña —catyí ra Jesús.

13

Nu caahán ra Jesús tyin cua tani vehe ñuhu cahnu
(Mt. 24.1-2; Lc. 21.5-6)

¹ Cuhva tsa cua quita ra Jesús tsitsi vehe ñuhu cahnu can, iin ra tsicá tsihin ra catyí ra tsihin ra:

—¡Maestro, nyehe jihna tsa sii caá yuu yihí vehe ihya! ¡Nyehe tsa nahnu vehe ihya! —catyí ra tsihin ra Jesús.

² Maa tyin nacahan ra Jesús, tan catyí ra tsihin ra:

—Nditsa nahnu vehe ihya tan sii caá tsi nyehé yo vityin. Maa tyin catyí yu tsihin un tyin coo quívi nduve ca maa náa cua ndoo ihya. Ndi in-tuhun yuu tan ña cua coso tahan tsi tsihin inga tsi, tyin tandihí maa tsi tan cua tani tsi —catyí ra Jesús.

Nu tsahá cuenda ra Jesús náa cua cuvi tsa ndi cumañi ca naa ñuhu ñayívi

(Mt. 24.3-28; Lc. 21.7-24; 17.22-24)

³ Tacan tan cuahán ra Jesús tsihin ra tsicá tsihin ra yucu yutun Olivo tsa canyí inga

tsiyo nu nditsin nyehé tsi vehe ñuhu cahnu. Tsa tsinyaa ra Jesús ican, ra Pedro, ra Jacobo, ra Juan, tan ra Andrés tsicá tuhun xeehe ra naha tsi ra tan catyí ra naha:

⁴ —Cuñí ndi tsa catyí tuhun un tsihin ndi ama cua cuvi tandihí tsa cahan un. ¿Nacaa tan coto ndi tatun tsa cuyatyin cundaa tandihí can? —catyí ra naha.

⁵ Nacahan ra Jesús tan catyí ra:

—Jaha ndo cuenda tsi ndo coto jandavi ñaha nyívi tsi ndo.

⁶ Tyin cuaha xaan nyívi cua quitsi, tan cua cuatyí ñi siyí yu, tan cua catyí ñi: “Yuhu cuví ra Cristo, ra tsa jaquitsi Nyoo.” Tan cuaha xaan nyívi cua jandavi ñaha ñi.

⁷ Maa tyin tun ñihi tuhun ndo tyin iyó cuatyí tan cañi tahan nyívi ityi can tan ityi ihya, ña nayuhvi ndo tyin tacan taahán maa tsi cuvi tsa ndi cumañi ca naa ñuhu ñayívi.

⁸ Tyin nyívi iin ñuu cua cañi tahan ñi tsihin nyívi inga ñuu, tan cua coo cuatyí iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyívi. Vasu ndi maa nyehe nyívi tundoho ihya, ña cua naa naha ñuhu ñayívi tyin ndi nyaá ca cua nyehe ñi tundoho.

⁹ Maa tyin jaha ndo cuenda tsi ndo tyin cua kuhva cuenda nyívi tsi ndo tsi ra cumí tyí ñu naha ra. Tan cua cañi ñi tsi ndo tsitsi vehe ñuhu. Cua kuhva cuenda ñi tsi ndo tsi ra

cumi tyiñu tan tsi ra cuví rey tsacatyí yuhu. Tyin tacan tan cuví cahan ndo tuhun yu nuu ra naha.

¹⁰ Tyin tsa ndi cumañi ca naa ñuhu ñayivi, cuñi tsi coto tandihi nyivi inga ñuu tyin Nyoo jacacú ra tsi nyivi.

¹¹ Tan cuhva tsa cua cundaca ñi tsi ndo nuu ra cumi tyiñu naha ra, ña caca iñi ndo náa cua cahan ndo. Tyin juvin ñi maa hora can tan cua cuhva Nyoo tsa cahan ndo. Tyin ñavin maa ndo cua cahan; tyin maa Tatyí li Nyoo cua cahan.

¹² Yihí ra naha cua nacuhva cuenda ra naha juvin ñi maa yañi ra naha tan cua ndacan ra naha tsa cúu ra can naha ra. Yihí nyivi cua nacuhva cuenda ñi juvin ñi maa sehe ñi. Tan yihí ñi cua nacuhva cuenda ñi nda cuanda jutu ñi tan sihi ñi tyin cúu ñi.

¹³ Tandihí nyivi iyó nu ñuhu ñayivi ndasi cua cuñi ñi nyehe ñi tsi ndo tsacatyí yuhu. Maa tyin nyooho tsa cua cunyeey iñi tsinú iñi tsi yu nda nu ndihi, cua cacu ndo.

¹⁴ "Tandihí nyooho tsa cahví nu tutu Nyoo nu tyaa ra Daniel, ra cuví ndusu yuhu Nyoo tsa tsicoo tahan tsanaha, cütuñi iñi ndo tyin iyó tsa janducaquiñi tan tsa jatívi. Quívi tsa nyehe ndo tyin tsa nyí yacan nu ña taahán tsi cunyi can, nyooho nyivi iyó Judea, quita ndo ñuu ndo tan cahun ndo ityi yucu.

¹⁵ Nyooho tsa cua cuyucu jiñi vehe quívi can, cua nuu ndo, maa tyin ña cua nuu ndo

tsa quihvi ndo tsitsi vehe ndo tan tava ndo tsa iyó tsi ndo.

¹⁶ Nyooho tsa cua cuyucu tsitsi cuhu, ña cua cunuhu jiñna ndo cuquihin ndo jahma ndo.

¹⁷ ¡Ndahvi ñiñaha tsa ñuhú sehe quívi can! ¡Tan ndahvi ñi iyó sehe lee tsa ndi tyaxín! ¡Ndahvi ñi!

¹⁸ Ndacan tahvi ndo tsi Nyoo na ña tahan tsi cunu ndo quívi vitsin.

¹⁹ Tyin tundoho tsa cua nyehe nyivi quívi can, ñaha ca maa coo can ndaha tsinu maa ñuhu ñayivi nda cuanda vityin. Tan ndi ityi nuu ca tan ña cua nyehe nyivi tahan tundoho can inga tsaha.

²⁰ Tun tsatyin Jutu Mañi yo tan ña jandihí ra tsa cua nyehe yo tundoho quívi can, yoñi maa cua cacu. Maa tyin cua jandihí ra can tsa cuenda tsa cuñi ra tsi nyivi yihí cuenda ra, nyivi nacatsi vaha maa ra.

²¹ "Tatun catyi nyivi tsihin ndo: "Jihna ndo, ihya nyaá ra Cristo" o "Nyehe ndo, ican nyaá ra Cristo", ña tsinu iñi ndo.

²² Tyin cua quitsi nyivi jandavi ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyivi nacatsi maa Nyoo, tatun cunyeey ñi javaha ñi tacan.

²³ Maa tyin nyooho jaha cuenda vaha ndo tsi ndo vityin tsa tsa tsitó ndo tandihí

yacan tsa ndi cumañi ca tahan tsi quivi can —catyí ra Jesús.

*Nu jacoto ra Jesús nácaa
cua quitsi nyico ra inga tsaha
(Mt. 24.29-35, 42-44; Lc.
21.25-36)*

²⁴ Tan catyí nyico ra Jesús tyehen:

—Maa tyin tsa cua yaha nyehe nyivi tundoho quivi can, cua ndunaa ñicanyii, yoo ña cua jandunditsin ca tsi,

²⁵ tan cua cucoyo tiñuu. Tan tandihi tsa iyó andivi tan cua nacanda tsi naha tsi.

²⁶ Tacan tan cua nyehe ndo tsi yuhu, Rayii tsa quee nda gloria, vatsí yu nu vico tsihin tunyee iñi cahnu tan tsihin tsa cahnu cuví Nyoo.

²⁷ Tan cuaha ángel cuenda yu cua jaquitsi yu tyin jandu iin ra naha nyivi nacatsi maa Nyoo. Cua quita ñi nanií cahnu nu ñuhu ñayivi, nda nu ndihi ñuhu ñayivi tan nda nu ndihi andivi.

²⁸ Cũtuñi iñi ndo cuhva iyó yutun tsa nañi higo: Tun tsa nduyutyá soco tun tan cana ndaha yutya tun, tsitó ndo tyin tsa cua quee tsiti tun.

²⁹ Tan juvin ñi tacan, tatun tsa cuví tandihi tsa iyo tsa caahán yu tuhun tsihin ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi.

³⁰ Tsa nditsa catyí yu tsihin ndo tyin tsa ndi cumañi ca cúu nyivi iyó nu ñuhu ñayivi ihya tan cua cuví tandihi tsa caahán yu tuhun tsihin ndo.

³¹ Tan coo quivi cua cundihí andivi tan cua cundihí ñuhu ñayivi, maa tyin tuhun caahán yuhu, ña cua cundihí maa tsi tyin tandihi tsi tan cua cundaa tsi.

³² Maa tyin quivi tan hora tsa cua cuví tandihi yacan, yoñi maa tsitó can, ndi maa ca ángel tan ña tsitó ra naha, ndi yuhu tsa cuví yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihi.

³³ Yacan cuenda ço nyito vaha ndo, tan jaha cuenda ndo tsi ndo, tan ndacan tahvi ndo tsi Nyoo, tyin ña tsitó ndo náa quivi tan náa cuhva cua quitsi nyico yu.

³⁴ Tumaa iin rayii tsa cua cuhun nu cañi. Ra ican tsa ndi cumañi ca cuhun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jahá cuenda yuvehe na jaha cuenda vaha ra.

³⁵ Yacan cuenda nyooho ço nyito ndo tyin ña tsitó ndo náa cuhva cua quitsi yu tsa cuví yu tumaa tsitoho vehe can, tyin cuví quitsi yu tsa cua cunaaha, maa ñuu, o cuhva tsacú tsitooho, o tsa cua cana ñicanyii.

³⁶ Yacan cuenda ço nyito vaha ndo tan ña cusu ndo tyin sana iñi ndo tan cua quitsi yu.

³⁷ Tsa caahán yu tsihin nyooho, caahán tucu yu tsihin tandihi ca nyivi: Ço nyito ndo.

14

Nu nducu ra jutu cuví ityi

nuu nahara cuhva t̃in ra naha tsi ra Jesús

(Mt. 26.1-5; Lc. 22.1-2; Jn. 11.45-53)

¹ Tsa ndi cumañi uvi quivi ca tan tahan tsi vico pascua tan vico nu tuhvá nyivi tsatsi paan tsa nduve yutsan iya yihí. Ra jutu tsa cuví ityi nuu naha ra tan ra maestro cuenda ley vehe ñuhu naha ra nducú ra naha cuhva t̃in xeehe ra naha tsi ra Jesús tan cahñi ra naha tsi ra.

² Maa tyin natuhun tahan ra naha tan catyí ra naha:

—Ña cua t̃in naha yo tsi ra quivi maa vico tyin coto nduvaa xaan nyivi —catyí ra naha.

Nu tyihí iin ñaha ndutya tami jiñi ra Jesús

(Mt. 26.6-13; Jn. 12.1-8)

³ Tsa ndi cumañi ca tahan tsi vico can, nyii ra Jesús ñuu Betania, vehe ra Simón, ra tsa tsindohō cuehe tyaahyu. Tsitsi tsa nyaá ra Jesús tsatsi ra, tsaá iin ñaha ndahá ña iin yutyi tsa tsinu tsihin yuu tsa nañi alabastro. Tsiu can yihí ndutya tami tsa nañi nardo. Tan yahvi xaan nyaá ndutya tami can. Nuñá ña yuhu yutyi can tan tava ña ndutya tami can tan tyihí ña can jiñi ra Jesús.

⁴ Maa tyin juhva ra tsa yucú ican naha ra nduxaan ra naha tan catyí ra naha:

—¿Nacuenda tyin jativi ñaha ihya ndutya tami can?

⁵ Tun tsatyin xico ña can, cuaha xaan xuhun cua ñihi ña tsihin can, tan cuvi jatyinyee

ñá tsi nyivi ndaahvi tsihin xuhun can —catyí ra naha.

Tan cuxaan ra naha tsi ña.

⁶ Maa tyin ra Jesús catyí ra:

—¡Jaña ndo tsi ña! ¿Nacuenda cuñi ndo jandu uvi iñi ndo tsi ña? Tan tsa vaha javahá ña tsihin yu.

⁷ Tyin nyivi ndaahvi tandihí ñi quivi cua cuyucu ñi tsihin ndo, maa tyin yuhu, ña naha ca cunyi yu tsihin ndo.

⁸ Ñaha ihya javahá ña ndihí cuhva cuvi ñi javahá ña. Tyihí ña ndutya tami cuñu ñuhu yu, tumaa tuhvá maa yo javahá tsihin cuñu ñuhu nyivi tsa ndi cumañi ca quihvi ñuhu ñi.

⁹ Tsa nditsa catyí yu tsihin ndo, tyin tandihí ityi nu cua cahan nyivi tuhun Nyoo nanií cahnu nu ñuhu ñayivi, cua cahan ñi tuhun ñaha ihya tan tsa javahá ña, tyin tacan tan ña naa iñi nyivi tsi ña —catyí ra Jesús.

Nu xico ra Judas tsi ra Jesús
(Mt. 26.14-16; Lc. 22.3-6)

¹⁰ Tsa yahá yacan tan quita iin ra tsitsi tsa utsi uvi ra tsicá tsihin ra Jesús. Ra ihya cuvi ra Judas Iscariote. Tsahan ra tsicahan ra tsihin ra jutu cuví ityi nuu naha ra, tan jandaá ra tyiñu tsihin ra naha tyin cua cuhva cuenda ra tsi ra Jesús tsi ra naha.

¹¹ Cuhva tsa tsiñi ra naha tsa caahán ra, sii xaan cuñi ra naha cuvi, tan catyí ra naha tsihin ra tyin cuhva ra naha xuhun tsi ra. Tacan tan quit-sahá nducú ra Judas cuhva

cuhva cuenda ra tsi ra Jesús tsi ra naha.

Nu cuxiñi ra Jesús tsihin ra tsicá tsihin ra
(Mt. 26.17-29; Lc. 22.7-23; Jn. 13.21-30; 1 Co. 11.23-26)

12 Quivi jihna ñi tsa quit-saha vico nu tsatsi nyivi paan tsa nduve yutsan iya yihí tan quivi tuhvá ñi tsahñi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñi un cuhun ndi janduvaha ndi tsa cuxiñi un cuenda vico pascua ihya?

13 Tacan tan tavá tyiñu ra tsi uvi taahan ra naha tan catyí ra tsihin ra naha:

—Cuaahan ndo tsitsi ñuu, tan ican cua nañihi ndo iin rayi yosó socio iin quiyi ndutya. Tsa nyehe ndo tsi ra, cūanyicun ndo tsi ra.

14 Tsa tsaa ndo yuvehe nu cua quihvi ra, catyí ndo tye-hen tsihin tsitoho vehe can: “Ra Maestro cuñi ra coto ra numaa nyaá cuartu nu cua jacahnu ra vico tsihin ra tsicá tsihin ra”, catyí ndo.

15 Tan cua janaha ra iin cuartu cahnu nu tsinu uvi pisu tsi ndo. Tsa nduvaha maa tsitsi tsi jahá ra, javaha ndo tsa cuxiñi yo tsitsi vehe can—catyí ra Jesús tsihin ra naha.

16 Tacan tan cuahán ra naha. Tsa tsaa ra naha tsitsi ñuu can, nañihi ra naha tandihí maa cuhva catyí ra Jesús tsihin ra naha. Tan javaha ra naha tsa cua cuxiñi ra naha cuenda vico pascua.

17 Tsa ndihí javaha ra naha tsa cua cuxiñi ra naha, tacan tan cuahán nyico ra naha nu nyii ra Jesús. Tan tsa cunaaha, cuahán ra Jesús, cuacuxiñi ra tsihin tsa utsi uvi ra tsicá tsihin ra.

18 Tan cuhva tsa nyecú ra naha tsatsi ra naha nu mesa, tan catyí ra Jesús:

—Tsa nditsa catyí yu tsihin ndo tyin iin nyooho tsa tsatsi tsihin yu cua xico tsi yu tsi ra xaan iñi tsi yu.

19 Tacan tan nducuihya xaan cuñi ra naha, tan quitsaha tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

20 Tan nacahan ra Jesús tan catyí ra:

—Ña tandihí ndo. Intuhun ñi ra tsitsi tsa utsi uvi ndo. Tan ra ican cuví ra tsa jatyií paan iin ñi tsitsi coho tsihin yu.

21 Tyin yuhu, Rayi tsa quee nda gloria, cua tahan yu tumaa caahán maa nu tutu Nyoo tyin cua tahan yu. Maa tyin indahvi ra ndaahvi tsa cua xico tsi yu! Vaha ca tun tsatyin ña cacu ra —catyí ra Jesús.

22 Tan tsitsi tsa tsatsi ra naha, tacan tan quihni ra Jesús iin paan tan nacuhva ra tyahvi nyoo tsi Nyoo tsa cuenda can, tan tsahnū sava ra can, tan tsaha ra can tsi ra tsicá tsihin ra, tan catyí ra:

—Catsi ndo paan ihya tyin tsehe cuví tumaa cuñu ñuhu yu —catyí ra tsihin ra naha.

23 Tsa yaha_h yacan quih_hin ndihi ra vasu nu yihí vinu. Tsa yaha_h tsaha_h ra tyahvi nyoo tsi Nyoo, tacan tan tsaha_h ra can tsi ra naha. Tandih_hi ra naha tan tsih_hi ra naha vinu tsa yihí tsitsi vasu can.

24 Tan catyí ra tsihin ra naha:

—Vinu ihya cuví tumaa niñi yu tyin tsihin niñi yu cua ndoo Nyoo tuhun tsaa tsihin ndo tyin cua cati niñi yu tsa cuenda tsa vaha tsi nyooho tan tsa vaha tsi cuaha nyivi.

25 Tsa nditsa catyí yu tsihin ndo tyin ña cua coho ca yu vinu tsa cuví ndutya yucu vixi uva, nda cuanda coho yu vinu tsaa nda nu ndacá ñaha Nyoo quivi tsaa yu ndacan —catyí ra Jesús tsihin ra naha.

Nu jacotó ra Jesús tyin cua cahan ra Pedro tyin ña nacotó ra tsi ra

(Mt. 26.30-35; Lc. 22.31-34; Jn. 13.36-38)

26 Tsa ndih_hi tsit_ha ra naha yaa Nyoo, tan cuahán ra naha yucu yutun Olivo.

27 Tacan tan catyí ra Jesús tsihin tandih_hi ra naha:

—Tandih_hi maa ndo tan cua nacoo ihñi ndo tsi yu tsa cuaa vityin tyin catyí nu tutu Nyoo tyehen: “Tandih_hi mbee ticatyí jana yu cua cuhun tsiyo ti naha ti s_hin s_hin ityi tyin cua cahñi yu tsi ra jahá cuenda tsi ti naha ti”, catyí tsi.

28 Maa tyin tsa yaha nandoto yu, jihna ca yu cua

cuhun Galilea tsa ndi cumañi ca cuhun nyooho —catyí ra Jesús tsihin ra naha.

29 Tacan tan catyí ra Pedro tsihin ra:

—Vasu ndi maa nacoo ihñi tandih_hi ra naha tsi un, maa tyin yuhu ña cua nacoo ihñi maa yu tsi un —catyí ra tsihin ra Jesús.

30 Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitooho tsa tsinu uvi tsaha, uñi tsaha cua cahan un tyin ña nacotó un tsi yu —catyí ra Jesús tsihin ra Pedro.

31 Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro.

Tan juvin ñi tacan catyí tandih_hi ca ra naha.

Nu nyii ra Jesús Getsemani tsicán tahvi ra tsi Nyoo

(Mt. 26.36-46; Lc. 22.39-46)

32 Tacan tan tsaa_h ra Jesús tan ra tsicá tsihin ra iin nu nañi Getsemani. Tan catyí ra Jesús tsihin ra naha:

—Nd_oo ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

33 Tan quih_hin ra tsi ra Pedro, ra Jacobo tan ra Juan cuahán tsihin ra. Tan tsaa_h tucuiihya iñi cahnu tsi ra tan tuñu cuñi ra.

34 Tan catyí ra tsihin ra naha:

—Cuiihya xaan cuñí yu; cahñi ña maa tucuiihya iñi ihya tsi yu, cuñí yu. Ndo ndo ihya, tan ña cusu ndo —catyí ra.

³⁵ Tacan tan cuahán ra luxu ca ityi nuu. Tan tsicuiñi tsi ra nu ñuhu tan tsaqujn ra nuu ra nda nu ñuhu. Tan tsican tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho tsa cua nyehe yu —catyí ra tsican tahvi ra.

³⁶ Tan tsa tsicán tahvi ra, catyí ra:

—Jutu Mañi yu, tsa cuenda yoocho nduve tsa ña cuví javaha un. Tun yoocho tan cuñí un cuví jatsiyo un tundoho ihya siqui yu. Maa tyin na cuví maa cuhva cuñí maa un, tan ñavin cuhva cuñí maa yu —catyí ra Jesús tsican tahvi ra.

³⁷ Tacan tan cuahán ra nu nacoo ra tsi uñi ra tsicá tsihin ra. Tsa tsaá ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeé iñi un coo nyito un tsihin yu ndi intuhun hora?

³⁸ Ña cusu ndo; ndacan tahvi ndo tsi Nyoo, tyin tacan tan ña cua javaha ndo cuhva cuñí nu ña vaha. Tsa nditsa tyin añima ndo cuñí xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñí —catyí ra Jesús tsihin ra naha.

³⁹ Tacan tan cuahán nyico ra inga tsaha. Tan tsican

tahvi ra tsi Nyoo juven ñi tsihin tuhun tsa cañan ra tsa jihna ñi.

⁴⁰ Tacan tan tsaá nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasí maa tinuu ra naha jahá ñumaahna. Tan ña tsitó ra naha náa nacahan ra naha tsihin ra. Ndi maa ra tan ña cañan ca ra.

⁴¹ Tan cuahán nyico ra. Tsa tsaá ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaá tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa tañan tsi hora tsa cua cuhva cuenda ra tsi yuhu, Rayi tsa quee nda gloria.

⁴² Nduvita ndo, cohon ndo tyin tsa vatsí ra tsa xico tsi yu —catyí ra Jesús tsihin ra naha.

Nu tsaha cuenda ra Judas tsi ra Jesús tsi nu xaan iñi tsi ra nahnu

(Mt. 26.47-56; Lc. 22.47-53; Jn. 18.2-11)

⁴³ Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhun ra naha tsihin ra Judas, iin ra tsicá tsihin ra Jesús, tyin tñi ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaá ra Judas tsihin nyivi cuaha can.

⁴⁴ Tsa ndi cumañi ca cuhun ra Judas, ra tsa xico tsi ra Jesús, tsa catyi maa ra tsihin

nyiví náa cua javaha ra tan coto ñi ndáa ra cuví ra Jesús. Tan caḥan ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jaḥa cuenda vaha ndo coto cunu ra —catyí ra nu quitsí tsi.

⁴⁵ Tsa tsaá ra Judas nu nyii ra Jesús natuhva ra nu nyaá ra tan catyí ra tsihin ra:

—Maestro.

Tan tyaa yuhu ra tsi ra.

⁴⁶ Tacan tan quihin ra naha tsi ra Jesús cuahán tsihin ra naha.

⁴⁷ Maa tyin iin ra nyii tsihin ra Jesús, tava ra mityi ra tan tsahnya ra soho musu ra jutu tsaahnu cuví ityi nuu.

⁴⁸ Tacan tan catyí ra Jesús tsihin ra quihin tsi ra:

—¿A ñasuhu cuví yuhu? tyin vatsí ndo vatsí quihin ndo tsi yu tsihin mityi tan yutun.

⁴⁹ Ndihi quivi tsinyij yu jacuahá yu tsi ndo tsitsi vehe ñuhu cahnu, tan ña quihin ndo tsi yu. Tandihí tsehe cuví tyin tacan tan cundaa tsa catyí nu tutu Nyoo —catyí ra Jesús tsihin ra naha.

⁵⁰ Tacan tan tsinü tandihí ra tsicá tsihin ra, tan ndoo intuhun ña maa ra jaḥa ra naha.

⁵¹ Maa tyin ndoo intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyí tan tiin ndihí ra naha tsi ra.

⁵² Maa tyin nacoḡ ihñi ra ticatyí can tan tsinü tandi ra.

Nu tsica tuhun ra mandoñi naha ra tsi ra Jesús tun juvin Sehe Nyoo tsi ra

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tacan tan tsindaca ra naha tsi ra Jesús tsi ra jutu tsaahnu cuví ityi nuu tan ndu iin tucu tandihí ra jutu cuví ityi nuu naha ra tan ra cuví mandoñi nyiví Israel naha ra, tan ra maestro cuenda ley vehe ñuhu naha ra.

⁵⁴ Ra Pedro nyicún tsica nyicún tsica ñi ra tsi ra naha cuahán ra. Tan tsaá ra nda nuquehe yuvehe ra jutu tsaahnu cuví ityi nuu can. Tan ndoo ra tuñú ra ñuhu tsihin ra vitya naha ra.

⁵⁵ Ra cuví jutu ityi nuu naha ra, tan tandihí ca ra cumí tyiñu naha ra nducú ra naha cuatyí tyaa ra naha siqui ra Jesús, tyin tacan tan cuví cahñi ra naha tsi ra. Maa tyin ña ñihí maa ra naha cuatyí tyaa ra naha tsi ra.

⁵⁶ Cuaha xaan nyiví caḥan cuendu siqui ra, maa tyin ña nacatsí tahan maa tuhun caahán ndi intuhun ñi.

⁵⁷ Yihí ñi nduvita ñi tan caḥan ñi maa ñi maa cuendu siqui ra, tan catyí ñi:

⁵⁸ —Nyuhu tsiñi ndi tsa caḥan ra tan catyí ra tyehen: “Yuhu cua cani yu vehe ñuhu cahnu tsa javahá nyiví. Tan cua janduvita yu inga vehe ñuhu tsitsi tsa uñi quivi ñi. Maa tyin ñavin tahan vehe ñuhu tsa javahá nyiví” catyí ra —catyí ñi.

⁵⁹ Vasu ndi maa tacan caahán ñi, maa tyin ña

nacatsj̄ tahan maa tsa cah̄an ñi.

⁶⁰Tacan tan nduvit̄a ra jutu tsaahnu cuví ityi nuu mahñu tandih̄i ra yucú ican naha ra, tan tsic̄a tuhun ra tsi ra Jesús, tan catyí ra:

—¿A ña cua nacahan un nu caahán nyivi ihya? ¿A nditsa tsa caahán ñi, o ña nditsa? —catyí ra

⁶¹Maa tyin ña nacahan maa ra Jesús tan nduve maa náa cah̄an ra. Tacan tan ra jutu tsaahnu cuví ityi nuu tsic̄a tuhun ra tsi ra inga tsaha, tan catyí ra:

—¿A yooho cuví ra Cristo, Sehe Nyoo ii tsa tsahá tsa vaha?

⁶²Tan ra Jesús catyí ra tsihin ra:

—Juvín. Nyooho cua nyehe ndo tsi yuhu, Rayīi tsa quee nda gloria, nyaá yu xiin cuaha Nyoo, ra iyó tandih̄i tunyee iñi, tan cua nyehe tucu ndo nu quitsi yu nu vico ityi andivi —catyí ra tsihin ra.

⁶³Tacan tan tsahnya ra jutu tsaahnu cuví ityi nuu jahma ra tumaa iin seña tyin ña taahán iñi ra tsa caahán ra Jesús tyin cuñi maa ra tyin ña vaha tsa caahán ra, tan catyí ra:

—Ña tsiñī ñuhu ca tsa nducu yo tsi ra cuví tsa ndaa.

⁶⁴Tyin tsa tsiñī maa ndo tsa cah̄an ra. Tsicoq̄ cuatyí ra nuu Nyoo tsihin tuhun cah̄an ra. ¿Náa catyí ndo vityin? —catyí ra.

Tacan tan nacahan tandih̄i ra naha tan catyí ra naha tyin taahán tsi cúu ra.

⁶⁵Tacan tan quitsaha tiví s̄ii juhva ra naha tsi ra. Tyasī ra naha nuu ra, tan cañī ra naha tsi ra tsihin tsiqūi tan catyí ra naha tsihin ra:

—¿Cahan tsihin ndi yóo cañī tsi un! —catyí ra naha tsihin ra.

Tan cañī tucu ra vitya naha ra nuu ra.

Nu cah̄an ra Pedro tyin ña nacotó ra tsi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶Tsitsi tsa ndi nyií ra Pedro nuquehe tsata vehe ra jutu tsaahnu cuví ityi nuu, tsaq̄ iin ñaha cuví musu ra jutu can.

⁶⁷Cuhva tsa nyehe ñaha can tsi ra Pedro nyaá ra tuñú ra ñuhu, quitsaha nyehe xaan ña tsi ra, tan catyí ña tsihin ra:

—Tsic̄a tucu yooho tsihin ra Jesús, ra ñuu Nazaret can —catyí ña tsihin ra.

⁶⁸Maa tyin ra Pedro tyih̄i xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quit̄a ra ityi yuhu cora. Tan tsacu ñi tsitooho.

⁶⁹Tacan tan ñaha can nanyehe nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha iñi tsi ra can cuví ra ihya —catyí ña.

⁷⁰Maa tyin tyih̄i xeehe nyico ra inga tsaha. Tacan tan ña naha ñi tan catyí ra yucú ican naha ra tsihin ra Pedro:

—Nditsa tyin ra vaha iñi tsi ra can cuví yooho, tyin ra Galilea cuví un, tan

caahán un tumaa caahán nyivi Galilea —catyí ra naha tsihin ra.

⁷¹ Tacan tan iyo xaan caahán ra Pedro, tan catyí ra:

—¡Tsitó vaha maa Nyoo tyin ña nacotó yu tsi ra tsa caahán ndo tuhun! ¡Na cahñi maa Nyoo tsi yu tun ña nditsa yu tsa caahán yu! —catyí ra.

⁷² Juvín ñi cuhva can navacu tsitooho tsa tsinu uvi tsaha. Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yahá cahan un uñi tsaha tyin ña nacotó un tsi yu.” Tsa nducuhun iñi ra Pedro tsehe, quitsahá ra tsacú ra.

15

Nu jaqueé yuhu ra Pilato tsi ra Jesús

(Mt. 27.1-2, 11-14; Lc. 23.1-5; Jn. 18.28-38)

¹ Tan tsa tuví inga quivi ndu iin ra jutu cuví ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandihi ca ra cumí tyiñu tsa yihí ndaha tsi nyivi Israel. Nuuhñi ñi maa ra Jesús tan tsindacá ra naha tsi ra nuu ra Pilato.

² Tan tsicá tuhun ra Pilato tsi ra, tan catyí ra:

—¿A juvin un cuví rey nyivi Israel?

Nacahan ra Jesús tan catyí ra:

—Juvín yu, tumaa caahán maa un.

³ Tan cuaha xaan cuendu cahan ra cuví jutu ityi nuu naha ra siqui ra Jesús.

⁴ Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyehé, cuaha xaan cuatyí tyaá ra naha siqui un —catyí ra.

⁵ Maa tyin ra Jesús ña nacahan maa ra. Yacan cuenda ña ñihí ra Pilato náa cahan ra.

Nu tsahá ra Pilato ndatu tsa cúu ra Jesús

(Mt. 27.15-31; Lc. 23.13-25; Jn. 18.38—19.16)

⁶ Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñi maa nyivi tyin tava ra.

⁷ Quivi can nyii iin ra nañi Barrabás vehe caa, tsihin inga ca ra tsahñi nyivi nu cuvaá nyivi siqui ra ndacá ñaha.

⁸ Tan tsahan nyivi tsicahan ñi tsihin ra Pilato na jaña ra iin ra yucú vehe can tumaa tuhvá maa ra javahá.

⁹ Tan nacahan ra Pilato, tan catyí ra:

—¿A cuñi ndo tsa jaña yu tsi ra cuví Rey ndo?

¹⁰ Tacan cahan ra tyin tuví iñi ra tyin tsahá cuenda ra jutu cuví ityi nuu naha ra tsi ra Jesús tsi ra tsa cuenda tsa ndasi cuñi ra naha nyehe ra naha tsi ra tyin cuaha nyivi nycún tsi ra.

¹¹ Maa tyin ra jutu cuví ityi nuu can naha ra natyuhu ra naha tsi nyivi tsa cahan ñi na tava ra Pilato tsi ra Barrabás vehe caa.

¹² Tacan tan tsicá tuhun ra Pilato tsi ñi, tan catyí ra:

—¿Tun tacan, náa cuñí ndo javaha yu tsihin ra tsa jacu-nañi ndo Rey cuenda ndo? —catyí ra tsihin ñi.

13 Tacan tan cana tsaa ñi, tan catyí ñi:

—¡Tyaa tsi ra nu cruu na cúu ra! —catyí ñi.

14 Tan catyí ra Pilato tsihin ñi:

—Maa tyin, ¿náa tsa ña vaha javaha ra? —catyí ra.

Ñi ican quitsaha caná tsaa nyico ñi tan catyí ñi:

—¡Tyaa tsi ra nu cruu na cúu ra! —catyí ñi.

15 Tacan tan tsa cuñí ra Pilato ndoo vaha ra nuu nyivi, tava ra tsi ra Barrabás vehe caa. Tsa yaha tava ra tsi ra can, tava tyiñu ra na ndoho ra Jesús. Tsa yaha ndoho ra Jesús, tan tsaha cuenda ra tsi ra tsi andaru na ticaa ra naha tsi ra nu cruu.

16 Tacan tan tsindaca ra andaru can naha ra tsi ra nuquehe vehe tyiñu. Tan jandu iin ra naha tandihi ca andaru.

17 Tan jacunditsi ra naha iin jahma cuaaha tuun tsi ra. Tan javaha ra naha iin corona iñu. Tan tyihí ra naha can jiñi ra.

18 Tsa yaha yacan tan quitsaha caná tsaa ra naha tsata ra tan tsacú nducu ra naha tsi ra, tan catyí ra naha:

—¡Nacumi tsi un, yooho Rey nyivi Israel! —catyí ra naha.

19 Tan cañi ra naha jiñi ra tsihin yutun, tan tiví sií ra naha tsi ra. Tan tsicuñi tsiti ra naha nuu ra jahá ra naha tyin jacahnú ra naha tsi ra.

20 Tsa yaha tsacu nducu ra naha tsi ra, tava ra naha jahma cuaaha tuun tsa jacunditsi ra naha tsi ra. Tacan tan jacunditsi nyico ra naha jahma maa ra tsi ra. Tan cuahán ra naha tsihin ra cuticaá ra naha tsi ra nu cruu.

Nu tyaa ra naha tsi ra Jesús nu cruu

(Mt. 27.32-44; Lc. 23.26-43; Jn. 19.17-27)

21 Ityi cuahán ra naha tahan ra naha iin ra ñuu Cirene tsa nañi Simón. Tan cuví ra jutu ra Alejandro tan ra Rufo. Ndi vatsí nuhu ra quee ra cuhu. Cuhva tsa cua yaha ra, jañiñi ra andaru naha ra tsi ra na cuiso ra cruu ra Jesús.

22 Tan tsindaca ra naha tsi ra Jesús iin nu nañi Gólgota, tan cuñi tsi catyi Yiqui Jiñi Ndiyí.

23 Tan ican jacoho ra naha vinu saca nuu tsihin numeri tsa nañi mirra tsi ra. Maa tyin ra Jesús ña cuñi ra coho ra can.

24 Tsa yaha tyaa ra andaru naha ra tsi ra nu cruu, quihin ra naha jahma ra tan tava cuenda ra naha tyin cuñi ra naha coto ra naha yóo cua jaha canaa intuhun intuhun jahma can.

25 Tyaa ra naha tsi ra nu cruu caa iin tsa tuvi.

26 Tan letra tsa tyaa ra naha jiñi cruu ra, catyí tsi nacuenda cua cúu ra. Tan catyí tsi tyehen: “Ra ihya cuví Rey nyivi Israel.”

27 Tan tyaa ndihi ra naha uvi taahan ñasuhu tsihin ra. Iin iin ra naha tsa iin nu cruu.

Iin ra xiin cuaha ra, tan inga ra xiin satyin ra.

²⁸ Tacan cuvī tan cundaa cuhva catyí nu tutu Nyoo tyehen: “Javahā nyivī tsihin ra tumaa javahá ñi tsihin ra caquiñi.”

²⁹ Tan nyivī yahá ican jacuñí nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyí ñi:

—¡Jaan! ¡Yooho tsa cahān tyin cua canī un vehe ñuhu cahnu, tan tsitsi tsa uñi quivī cua janduvaha nyico un itsi,

³⁰ jācacu tsi un vityin tan nuu nu cruu juvin! —catyí ñi.

³¹ Tan juvin ñi tacan tsacú nducu tucu ra jutu cuvī ityī nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—¡Jacacū ra tsi inga ca nyivī, maa tyin ña cuvī jacacu ra tsi maa ra!

³² Tun nuu ra nu cruu vityin nyehe yo, tacan tan cua tsinu iñi yo tyin juvin ra cuvī ra Cristo, Rey cuenda yo tsa cuvī yo nyivī Israel —catyí ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacū nducu ndihi nahnu tsi ra.

Nu tsihi ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva tsa cua tahan hora, ndunaā naniī cahnu nda cuanda caa uñi tsa tseñi.

³⁴ Tan juvin ñi cuhva can canā tsaa ra Jesús tsihin tandihī tunyee iñi ra, tan catyí ra:

—Eloi, Eloi, ¿lama sabac-tani? —tan cuñí tsi catyí: Nyoo Jutu yu, Nyoo Jutu yu, ¿nacuenta nacoō ihñi un tsi yu? —catyí ra.

³⁵ Juhva ra yucú ican naha ra tsiñi ra naha tsa cahān ra tan catyí ra naha:

—¡Jihna ndo! Caná tsaa ra tsi ra Elías, ra cuvī ndusu yuhu Nyoo tahan tsanaha —catyí ra naha.

³⁶ Tacan tan tsinú xaan iin ra tsiquihin ra iin yahma tsa caá tumaa caá catyí, tan jatyiī ra can tsihin vinu iya. Tan tyaa ra can iin nu yutun tan jatuhva ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

³⁷ Tacan tan ñihi xaan canā tsaa ra Jesús, tan tsihi ra.

³⁸ Tan jahma tsa ticaá tsitsi vehe ñuhu cahnu ndatā sava tsi, nda siqui tan nda cuanda ityi tsaha.

³⁹ Tan ra capitán tsa yihí ndaha andarū tsa nyaá yatyin ñi nu ticaá ra Jesús nyehe ra nácaa canā tsaa ra, tan nácaa tsihi ra, tacan tan catyí ra:

—Nditsa nditsa cuii tyin Sehe Nyoo tsi ra ihya —catyí ra.

⁴⁰ Tan ndasava ñi nyecú tucu juhva ñiñaha nyehé ñi. Tan mahñu ñi can nyií ña María tsa quee ñuu Magdala, tan ña María sihi ra José tan ra Jacobo ra tyuvaa ca. Tan nyií tucu ña Salomé.

⁴¹ Ñiñaha ihya tsinyicun ñi tsi ra Jesús, tan jatyinyee ñi

tsi ra quiví tsicā nuu ra ityi Galilea. Tan yucú cuaha tucu ñiñaha inga ñuu tsa tsaā tsihin ra ñuu Jerusalén ican.

Nu tsicutsi ra naha tsi ra Jesús

(Mt. 27.57-61; Lc. 23.50-56; Jn. 19.38-42)

⁴² Quiví tsa tuhvá nyiví jan-duvaha tsa catsi ñi cuenda inga quiví tuhvá ñi quitatu, juvin ñi tseñi can

⁴³ tsaā ra José ra ñuu Ari-matea nu nyii ra Pilato. Ra José can cuví ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jaquitsi Nyoo tyin cundaca ñaha nu ñuhu ñayiví. Ña nayuhví ra tan tsahan ra tsindacan ra cuñu ñuhu ra Jesús tsi ra Pilato.

⁴⁴ Tsa tsito ra Pilato tyin tsa yaha tsihi ra Jesús, iyo xaan cuñí ra. Tacan tan cana ra tsi iin capitán tan tsicā tuhun ra tsi ra tun nditsa tyin tsa tsihi ra Jesús.

⁴⁵ Tan tsa tsito vaha ra Pilato tyin tsa yaha tsihi ra Jesús, tava tyiñu ra na cuhva ra andar naha ra cuñu ñuhu ra tsi ra José.

⁴⁶ Tacan tan tsijata ra José iin jahma cuitsin tsa tsinu tsihin jahma vaha tsa nañi linu, tan januu ra cuñu ñuhu ra Jesús nu cruu. Yaha can tan cava nuu ra jahma can cuñu ñuhu ra. Tacan tan tyihí ra cuñu ñuhu ra tsitsi iin ñaña tsa nyaá nduvaha tsitsi iin cava. Tan tyasi ra yuhu ñaña can tsihin iin yuu cahnu.

⁴⁷ Tan ña María, tsa quee ñuu Magdala, tan ña María,

sihi ra José, tsahan ñi, tsinyehé ñi nu tinyi ra José can cuñu ñuhu ra Jesús.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Tsa yaha quiví quitatú nyiví, ña María ñuu Magdala, tan ña María sihi ra Jacobo, tan ña Salomé jata ñi ndutya tami tyin cuñí ñi cahun ñi cutyihí ñi can cuñu ñuhu ra Jesús.

² Tacan tan cuahán ñi nu nyaá ñaña ra tsa cunditsin cuii ñi quiví quitsaha vitya. Tan tsaā ñi ican cuhva tsa cua cana cuii ñi ñicanyii.

³ Tan ityi cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

⁴ Maa tyin cuhva tsa tsaā ñi nyehe ñi tyin tsa catsiyo yuu cahnu tsa ndasí yuhu ñaña can.

⁵ Tan cuhva tsa quihví ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyuvaa. Nditsi ra jahma cuitsin cañi. Tan nayuhví xaan ñi.

⁶ Maa tyin catyí ra tsihin ñi:

—Ña nayuhví ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihi nu cruu. Maa tyin nduve ca ra nyii ihya vityin tyin tsa nandoto ra. Nyehe ndo nu tinyi ra naha tsi ra.

⁷ Cuaahan ndo tan jacoto ndo tsi ra Pedro tan tsi inga ca ra tsicā tsihin ra Jesús. Tan

catyi ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyi maa ra tsihin ra naha tsa ndi cumañi ca cúu ra —catyi ángel can tsihin ñi.

⁸ Tacan tan tsinú xaan ñi cuahán ñi, tyin nihí ñi jahá tsa yuuhví ñi. Tan ña cahán maa ñi tsa cahan ñi tsihin ndi in-tuhun maa nyivi tyin yuuhví xaan ñi.

Nu quituvi ra Jesús nuu ña María quee ñuu Magdala
(Jn. 20.11-18)

⁹ Ra Jesús nandoto ra quivi quitsahá vitya. Tan quituvi ra jihna cuii ca nuu ña María ñuu Magdala. Juvín ña cuví ña tsa tavá ra utsa tatyí ña vaha.

¹⁰ Tsañan ña tsijacoto ña tsi ra tsicá tsihin ra, tyin yucú ra naha tsihin tucuihya iñi tan tsacú ra naha.

¹¹ Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinú iñi ra naha.

Nu quituvi ra Jesús nuu uvi ra tsicá tsihin ra
(Lc. 24.13-35)

¹² Tsa yahá yacan, tan quituvi ra Jesús nuu uvi ra tsa cuahán ityi cuhu naha ra. Maa tyin siin cuhva caá ra nyehe ra naha.

¹³ Tan tsinuhú ra naha tsi-jacoto ra naha tsi tandihí ca ra naha. Maa tyin juvín ñi ña tsinú iñi ra naha tsa cahán ra can naha ra.

Nu tsahá ra Jesús tyiñu tsi ra tsa tsicá tsihin ra
(Mt. 28.16-20; Lc. 24.36-49; Jn. 20.19-23)

¹⁴ Yaha yacan tan quituvi ra Jesús nuu tandihí tsa utsi iin ra tsa tsicá tsihin ra, tsitsi tsa nyecú ra naha nu mesa. Tan cuxaan ra tsi ra naha tsa cuenda tsa ña tsinú iñi ra naha, tan tsa cuenda tucu tsa ndava añima ra naha tan ña tsinú iñi ra naha tsa cahán nyivi tsa nyehe tsi ra tsa yahá nandoto ra.

¹⁵ Tan catyi ra tsihin ra naha:

—Cuaahan ndo nanií cahnu nu ñuhu ñayivi, tan cahán ndo tuhun Nyoo tsihin tandihí nyivi, tan catyi ndo tsihin ñi nácaa jacacú Nyoo tsi ñi.

¹⁶ Tan nyivi tsa cua tsinu iñi tan coodutya ñi, cua cacu ñi. Maa tyin ñi tsa ña cua tsinu iñi cua ndoo cuatyí ñi siqui ñi tan cua cunaa ñi.

¹⁷ Tan tandihí tsa iyo ihya cua javaha nyivi tsa cua tsinu iñi tsi yu: Tsihin sivi yu cua tava ñi tatyí ña vaha, tan cua cahán ñi inga yuhu tsa ña tuhvá ñi cahan.

¹⁸ Cua tiin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyivi cuuhví, tan cua nduvaha nyivi.

Nu ndaa ra Jesús andivi
(Lc. 24.50-53)

¹⁹ Tsa ndihí cahán Jutu Mañi yo Jesús tsihin ra naha, tacan tan ndaa ra andivi, tan tsinyaá ra xiin cuaha Nyoo.

²⁰ Tacan tan ra tsicá tsihin ra quitá ra naha tan tsahán ra naha tandihí ñi ityi tsicahán ra naha tuhun Nyoo nácaa jacacú ra tsi yo. Juvín ñi maa

Jutu Mañi yo jatyinyee tsi ra
naha tyin tsaḥa ra tsa javaha
ra naha cuaha tsa iyo. Tan
tsihin yacan nyehe nyivi tyin
nditsa tsa caahán ra naha.
Tan na cuvi tsi tacan ñi.

Tuhun Nyoo Tsa Tyaa Ra Lucas

Nu quitsaha jacotó ra Lucas tuhun ra Cristo tsi ra Teófilo

1 Cuaha ñi nyivi nducu ñi cuhva tyaa ñi nuu tutu tandihi tsa cuvi nu yucú ndi ihya. Tyaa ñi cuhva

2 nacatyí tuhun nyivi tsihin yo, ñi tsa nyehe tan cahan tuhun ra Jesús nda quivi jihna ñi.

3 Tan yuhu tucu tsa yaha cahvi yu tan nducu tuhun vaha yu tandihi tsa cuvi nda nu quitsaha. Yacan cuenda cuñi yu tyaa yu tuhun ihya tsa cuenda un, yooho Teófilo, nda nu quitsaha tan nda nu ndihi.

4 Tyin tacan tan coto un tyin nditsa tsa jacuahá nyivi tsi un.

Nu jacoto iin ángel tsi ra Zacarías ama cua cacu ra Juan, ra cua jacoondutya tsi nyivi

5 Quivi tsa cuvi ra Herodes rey tani cahnu cuenda Judea, tsicoo iin ra cuvi jutu, nañi ra Zacarías. Tan yihí ra cuenda ra cuvi jutu naha ra tsa nañi Abías. Tan ñasihi ra nañi ña Elisabet. Tata ra Aarón, ra cuvi jutu tahanan tsanaha, cuvi ña.

6 Tan nduve maa cuatyí ñi nuu Nyoo. Tyin vaha xaan tyaá yahvi ñi tuhun caahan Nyoo Jutu yo. Tan yoñi maa cuvi tyaa cuatyí tsi ñi.

7 Tan nduve maa sehe ñi tsi-coo. Tyin ña Elisabet, ña cuvi coo sehe ña. Tan tsa tsahnu xaan nduvi taahan ñi.

8 Iin quivi taahan tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo.

9 Tan cuhva iyó maa ra cuvi jutu naha ra, tava ra naha suerte, ndaa ra cua tahan tsi quihvi tsitsi vehe ñuhu Jutu Nyoo, tyin cahmi ra cutu. Quivi can tahanan tsi tsi ra Zacarías.

10 Tan cuaha nyivi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmi ra cutu can.

11 Tan tsitsi tsa ndi nyii ra ican tan quituvi iin ángel Jutu Nyoo nu nyii ra. Tan nyaá nyityi ángel can ityi xiin cuaha nu nyaá altar nu tsahmi ra cutu.

12 Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra.

13 Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahan un tsihin ra. Tan cua coo iin sehe ña Elisabet ñasihi un. Tan cua cunañi ra Juan.

14 Si xaan cua cuñi un. Tan cuaha xaan nyivi cua cusii ndihi iñi quivi cua cacu ra.

15 Tyin sehe un, cahnu xaan cua cuvi ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihí Tatyí Ii Nyoo tsi ra tsa ndi cumañi ca cacu ra tan tandihi tyembu tsa cua coo ra.

16 Tan cuaha xaan nyivi Israel cua cunyicun ñi tsi Jutu

yo Nyoo jaha ra.

¹⁷ Juvín ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihí xaan Tatyí li Nyoo tsi ra. Tyín cua cuví ra tumaa ra Elías, ra cuví ndusu yuhu Nyoo taħan tsanaha. Tan cua cuhva cuenda ra nácaa coo vaha nyiví iyó sehe tsihin sehe ñi. Tan cua janaha ra tsi nyiví caquiñi, na tyaa yahví ñi tuhun caahán Nyoo. Tacan cua janduvaha ra tsi nyiví tan cua cuatu vaha ñi tsi Nyoo —catyí ángel tsihin ra Zacarías.

¹⁸ Tan tsicá tuhun ra Zacarías tsi ángel can, tan catyí ra:

—¿Nacaa tan coto yu tyín nditsa tsa cua coo sehe ñasihi yu? Tyín yuhu tsa tsahnu xaan yu. Tan tacan tucu ñasihi yu —catyí ra.

¹⁹ Tan ángel can nacahañ ra tan catyí ra:

—Yuhu Gabriel nañí yu. Tan tsicá yu tyiñu Nyoo. Maa ra tava tyiñu tsi yu tyín jacoto yu tyiñu ihya tsi un tan jacoto yu tuhun vaha ihya tsi un.

²⁰ Tan vityín cua nduñihi un. Tyín ña tsinú iñi un tsa caahán yu tsihin un. Tan ña cua cuví cahan un nda cuanda tsa yaha cacu sehe ñasihi un. Tan nda quiví cundaa tandihí tsa caħan yu tsihin un —catyí ángel ican tsihin ra.

²¹ Tan nyiví tsa ndatú tsi ra Zacarías ityi tsata vehe ñuhu, iyo xaan cuñí ñi tyín cucuee xaan ra tsitsi vehe ñuhu can.

²² Tan cuhva tsa quitá ra Zacarías, ña cuví maa cahan

ra tsihin ñi. Tan tuví iñi ñi tyín iyó tsa nyehe ra tsitsi vehe ñuhu can. Tacan tan quitsaha caahán ra tsihin ñi tsihin ndaha ra. Tyín ña cuví cahan ra.

²³ Tan quiví ndihí tyiñu jahá ra Zacarías vehe ñuhu can, tan cuanuhu ra yuvehe ra.

²⁴ Tsa yaha quiví can tan tsicuhun sehe ñasihi ra, ña Elisabet. Tan ña quitá maa ña tsata vehe tsa tandihí tsa uhun yoo. Tan tsicá iñi ña:

²⁵ “Tyehen javaha Jutu Mañi yu tsihin yu, tyín tacan tan ña cahan nyaa ca nyiví tsi yu”, cuñí ña tsicá iñi ña.

Nu jacoto iin ángel tsi ña María tyín cua cacu ra Jesús

²⁶ Tsa quitá iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyí Galilea.

²⁷ Tyín cahan ra tsihin iin ñaha yoco tsa nañí María. Tan tsa nyaá maa tsa cua tindaha ña tsihin ra nañí José, ra cuví tata ra rey David.

²⁸ Tan quihví ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihí ca ñaha —catyí ángel ican tsihin ña.

²⁹ Tan tsa tsiñi ña tsa caħan ra, iyo xaan cuñí ña tsa caħan ra. Tan tsicá iñi ña: “¿Nacuenda tacan caahán ra ihya nacumi tsi yo?” tsicá iñi ña.

³⁰ Tan catyí ángel ican:

—Ña nayuhvi un, María, tyin ñihí un tumañi iñi Nyoo.

31 Vityin cua cahun sehe un. Tan cua cunañi ra Jesús.

32 Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuvi ra David, tsi tsaahnu ra.

33 Tyin cua cundaca ñaha ra tsi nyivi Israel tandihi maa tyembu. Tan ña cua ndihi maa tsa cundaca ñaha ra —catyí ángel can tsihin ña.

34 Tacan tan tsica tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo yii yu.

35 Tan nacahan ángel tan catyí ra:

—Maa Tatyí Ii Nyoo cua quitsi siqui un. Tan tunyee iñi Nyoo, ra nyaá gloria, cua quitsi tan cua casi tsi siqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo.

36 Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyivi tyin ñaha can ña cuví coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña.

37 Tyin Nyoo nduve tsa ña cuví jaha ra —catyí ángel tsihin ña.

38 Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyii ña Elisabet

39 Tan iin quivi can, numi ñi cuahán ña María iin ñuu tsa canyí Judea nu maa ñi maa yucu iyó.

40 Tan quihvi ña tsitsi vehe ra Zacarías. Tan nacuhva ña nacumi tsi ña Elisabet.

41 Tan tsa tsiñi ña Elisabet tsa cahan ña María, tan natuñu sehe ña tsitsi ña. Tan ñihi nyaá Tatyí Ii Nyoo tsihin ña.

42 Tan ñihi xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihi ca ñiñaha. Tan nasoco ra tsi sehe un.

43 ¿Tan yóo cuví yuhu? Tyin quitsi sihi Jutu Mañi yu quitsi nyehe ña nu nyaá yu.

44 Cuhva tsa tsiñi yu tsa cahan un, tan natuñu sehe yu tsitsi yu. Tyin sii xaan cuñi ra.

45 Tan sii xaan cuñi tucu maa añaima un tyin tsinú iñi un. Tyin cua cuvi cuhva tsa cahan Nyoo tsihin un —catyí ña Elisabet.

46 Tan catyí ña María:

—Jacahnú yu tsi Nyoo tsihin tandihi añaima yu.

47 Tan sii xaan cuñi añaima yu tsihin Nyoo ra jacacú tsi yu.

48 Tyin cuví yuhu iin ñaha ndaahvi tan Nyoo nyehe ndaahvi ra tsi yu.

Tan vityin tandihi quivi cua cahan nyivi tyin cahnu xaan tumañi iñi ñihí yu.

49 Tyin Nyoo, cahnu xaan cuví ra. Tan cahnu tsa javahá ra tsihin yu.

Tan ii xaan sivi ra.

50 Tan ndaahvi cuñí ra tsihin tandihí nyívi tsa cua coo tan tyaa yahvi ñi tsi ra.

51 Cahnu xaan tsa javahá ra tsihin tunyee iñi tsa iyó tsi ra.

Jatsiyó ra tsi nyívi tsa cahnu xaan tsicá iñi ñi.

52 Quinyaá ra tunyee iñi iyó tsi nu cuví rey.

Tan cua janducahnu ra tsi nyívi ndaahvi.

53 Tsahá Nyoo tsa vaha tsi nyívi cuñí coto tsa vaha.

Tan nyívi cuca tsa cuñí tyin nduve tsa tsiñí ñuhu tsi ñi, tsihin ndaha ndí ñi, jacuhún ra tsi ñi.

54 Jatyinyeé ra tsi nyívi Israel tsa cuví ñi musu ra.

Tan ña naá iñi ra tsi ñi. Nyehé ndaahvi ra tsi ñi.

55 Tumaa cuhva catyí Nyoo tsihin ra Abraham, tsií tsaahnu yo, tan tsihin sehe ra, tacan ñi javahá maa Nyoo —catyí ña María.

56 Tan ña María ndoo ña tsihin ña Elisabet uñi yoo. Tan tsa yahá uñi yoo can tan cuanuhú ña nda yuvehe ña.

Quívi cacú ra Juan, ra tsa jacoondutyá tsi nyívi

57 Tsa tsaá quívi tsa cacú sehe ña Elisabet, jacacú ña iin rayí.

58 Tan nyívi vehe ña tsihin nyívi tsa iyó yatyin ñi yuvehe ña, sií xaan cuñí ñi. Tacan tucu maa ña. Tyin vaha xaan tsa javahá Nyoo tsihin ña.

59 Tan tsa quitá una quívi tsa cacú ra, tan tyaa ra naha tuñi Nyoo tsi ra tumaa cuhva

iyó maa ñi. Tan cuñí ra naha tsa cunañi ra Zacarías tumaa nañi maa jutu ra.

60 Maa tyin sihi ra catyí ña:

—Ña cuví. Tyin Juan cua cunañi ra.

61 Tan catyí ra naha:

—¿Nacuenda jacunañi un Juan tsi ra? Tan yoñi nyívi ndo nañi tacan —catyí ra naha.

62 Tan quitsahá tsicá tuhun ra naha tsihin ndaha ra naha tsi jutu ra. Tyin coto ra naha náa sivi cuñí ra tsa cunañi ra.

63 Tan tsican jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihí maa ra ican naha ra iyo xaan cuñí ra naha tsa tacan.

64 Juvín ñi maa hora can nacahan ra Zacarías. Tan quitsahá jacahnú ra tsi Nyoo.

65 Tan tandihí maa nyívi iyó yatyin yuvehe ñi, iyo xaan cuñí ñi cuví. Tan tandihí maa nyívi tsa iyó yucu iyó Judea ican nacatyí tuhun tahan ñi tsa cuví can.

66 Tan tandihí maa nyívi tsa tsito can, tsicá iñi ñi, tan tsicá tuhun tahan ñi tsi ñi:

—¿Yóo ra cua cuvi ra lee ihya? —catyí ñi.

Tyin nditsa, Nyoo nasocó xaan ra tsi ra.

Nu jacahnu ra Zacarías tsi Nyoo

67 Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsahá cuenda ra tsa caahán Nyoo tsihin ra, tan catyí ra:

68 —Cahnu xaan ra cuví Jutu yo Nyoo cuenda yo nyívi Israel.

Tyin quitsu ra nu yucú yo, tsa
cuví yo nyivi maa ra.
Tan jacacú ra tsi yo.

69 Tan tsaḥa ra iin ra tsa
cahnu xaan cuví tsi yo,
ra cua jacacu tsi yo.

Tata ra David, ra tsa cuví
musu Nyoo cuví ra.

70 Tacan cua javaha ra, catyi
Nyoo taḥan tsanaha,
quivi caḥan ra cuví
ndusu yuhu ra, tan
catyi ra naha tyehen:

71 Cua jacacu Nyoo tsi yo
ndaha nu xaan iñi tsi
yo, tan nuu tandihi nu
tsa ndasi cuñi nyehe tsi
yo.

72 Tan cua cundaahvi iñi ra
nyehe ra tsi nyivi yo tsa
tsicoḡ taḥan tsanaha.

Tan cua nducuhun iñi ra
tsa caḥan ra tsihin ñi
taḥan tsanaha.

73 Caḥan maa Nyoo tsihin ra
Abraham, tsii tsaahnu
yo,

74 tan catyi ra tyin cua jacacu
ra tsi yo ndaha nu xaan
iñi tsi yo.

Tyin ña cua nayuhvi ca yo jac-
ahnu yo tsi ra.

75 Tan maa ra cua janaha ra
cuhva coo yo.

Tan vaha cua coo yo nuu
ra tan coo yo maa ñi
tsa cuenda maa ra
tandihi quivi tsa cua
coo yo ñayivi —catyi ra
Zacarías.

76 Tan catyi ra Zacarías tsi-
hin lee can:

—Sehe luhlu yu, yooho cua
cuví un ndusu yuhu
Nyoo, ra nyaá gloria.

Tyin cuhun un ityi nuu Jutu
Mañi yo. Tan cua ca-
han un tuhun ra tsi-
hin nyivi tyin tsa cuñi
quitsu ra.

77 Tan cua jacoto un tsi nyivi
tyin cua jaha Nyoo tuc-
ahnu iñi tsi ñi.

Tacan tan cacu añima ñi.

78 Tyin Jutu yo Nyoo cuñi ra
tsi yo. Tan cundaahvi
xaan iñi ra tsi yo.

Tan cua jaquitsu ra iin ra
jatyinyee tsi yo. Tan
cuví ra tumaa ñuhu
ñicanyii.

79 Tyin cua janaha ra ñuhu
nditsin nu iyó nyivi nu
naa, nu ndatú tuhun
tsihí tsi ñi.

Cua janaha ra ityi ra tsi yo,
ityi vaha —catyi ra
Zacarías.

80 Tan ra luhlu can cua
cuahnu ca ra. Ñihi xaan tsi-
coḡ tunyee iñi tsi ra tsihin
Tatyí li Nyoo. Tan tsicoḡ ra iin
tsiqui ndi nda cuanda quivi
tsa nacoto nyivi Israel tsi ra.

2

Quivi cacu ra Jesús (Mt. 1.18-25)

1 Quivi ican tsicoḡ iin ra
ndacá ñaha, ra cuví rey
cahnu, nañi ra Augusto. Tava
tyiñu ra tsi ra nyisó tyiñu
naha ra na tyaa ra naha sivi
tandihi nyivi tani cahnu ñuu
ñayivi.

2 Ihya cuví tsa jihna ñi
tsinyaá sivi nyivi. Tan ra
Cirenio cuví ra ra ndacá ñaha
tandihi ñuu nu cuví Siria.

3 Tan tandihi nyivi cuanuhu
ñi ñuu ñi, tyin cua ndaca ñi
sivi ñi.

4 Yacan quee ra José ñuu Nazaret tsa canyí Galilea. Tan cuahán ra ñuu Belén tsa canyí Judea, nu cacu ra rey David, tyin tata ra David cuví ra.

5 Cuahán ra cuandacá ra sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña.

6 Tan tsa ndi yucú ca ñi ñuu Belén ican tan quitsaha cuuhví tsitsi ña tyin tsa cua cacu sehe ña.

7 Tan ican cacu sehe nuu ña. Tan cava nuu ña jahma tsi ra. Tan nacaquin ña tsi ra tsitsi iin canuva nu tsatsí quití itya. Tyin ña ñihí ñi iin vehe coo ñi.

Cuhva cahan ángel tsihin ra jahá cuenda mbee

8 Yatyin ñi ñuu Belén can yucú ra jahá cuenda mbee tsa tsacuaa.

9 Tan sana iñi ra naha quituví iin ángel Nyoo. Tan jandunditsin Jutu yo Nyoo taní cahnu nu yucú ra naha. Tan nayuhví xaan ra naha.

10 —Ña nayuhvi ndo —catyí ángel can—. Tyin vatsí cahan yu iin tsa vaha xaan tsihin ndo. Sii xaan cua cuñí tandihí cuii maa nyívi tsa cuenda tsi.

11 Vityin nda ñuu ra David cacu iin ra cua jacacu tsi nyívi. Cuví ra Cristo, ra cuví Jutu Mañi yo.

12 Tan tsihin cuhva ihya cua nacoto ndo tsi ra: cua nañihi ndo tsi ra lee ican, cava nuu ra jahma tan canyí ra tsitsi iin canuva nu tsatsí quití —catyí ángel can tsihin ra jahá cuenda mbee can.

13 Tan juvin ñi cuhva ican quituví cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

14 Cahnu xaan cuví Nyoo, ra nyaá gloria.

Tan nu ñuhu ñayívi, na coo tsa vaha añaima nyívi tsa ñihí tumañi iñi Nyoo, catyí ra ángel naha ra.

15 Tacan tan tsa cuanuhu ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacoto tsi yo —catyí ra naha.

16 Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José. Tan canyí ra lee can tsitsi iin canuva nu tsatsí quití itya.

17 Tan cuhva tsa nyehe ra naha tsi ra, quitsaha natuhún ra naha tandihí tuhun cahan ángel tsihin ra naha tsa cuenda lee ican tsihin ñi.

18 Tan tandihí nyívi tsa tsiñi tuhun cahán ra naha, iyo xaan cuñí ñi.

19 Maa tyin ña María naquihín cuenda ña tuhun ican tsitsi añaima ña, tan tandihí tuhun ican tsicá iñi ña.

20 Tan cuanuhu ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñi ra naha. Tyin cundaá cuhva tsa catyí ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

21 Tsa ndu unā quiví ra Jesús, tan tyaa ñi tuñi Nyoo tsi ra tyin tacan catyí tuhun tsahnu maa ñi. Tan jacunañi ñi Jesús tsi ra. Juvín ñi maa sivi tsa catyí ángel tsihin ña María quiví tsa ndi cumañi ca cahun ra Jesús tsitsi ña.

22 Tan tsa yaha quiví cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo.

23 Tacan ñi javaha ñi tyin catyí ley Nyoo tyin: “Tandihí sehe nuu ñi tsa cuví rayí, cua tyaa cuenda ñi tsi ra ndaha Jutu yo Nyoo”, catyí ley ican.

24 Tan tsahan ñi tsijamañi ñi uvi taahan quití, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

25 Tan quiví can iyó iin ra ñuu Jerusalén nañi ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihí ca nyiví ñuu Israel ican. Tan nyaá Tatyí Ii Nyoo tsihin ra Simeón.

26 Tan jacoto Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo.

27 Tan Tatyí Ii jacuhun ra tsi ra Simeón can nda vehe ñuhu. Tan juvín ñi cuhva can

tsaa jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley.

28 Tan cuhva tsa tsaa ñi nu nyaá ra Simeón tan quihín ra Simeón tsi ra Jesús. Tan tyihí jucun ndaha ra tsi ra. Tacan tan quitsaha jacahnú ra tsi Nyoo, tan catyí ra:

29 —Jutu Mañi yu, vityin tsa cundaq cuhva tsa catyí maa un tsihin yu, tsa cuví yu musu un,

cuví jaña ndaha un tsi yu vityin, tan na cúu yu tsihin tsa vaha.

30 Tyin tsa nyehe tsihin nuu yu tsi ra cua jacacu tsi ndi.

31 Tsa iyó ra ihya ityi nuu tandihí nyiví.

32 Tan cua cuví ra ñuhu tsa cua jandunditsin aña nyiví tsa ñavin nyiví Israel cuví.

Tan cahnu ca cua jaha ra tsi nyiví Israel, tsa cuví ndi nyiví cuenda maa un —catyí ra Simeón.

33 Tan ra José tsihin sihi ra Jesús, iyo xaan cuñí ñi tsa tsiñi ñi tsa cahan ra Simeón tsa cuenda lee ican.

34 Tacan tan tsican tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehe tsi lee ihya. Cuaha xaan nyiví Israel ñuu Nyoo cua tsinu iñi tsi ra quiví coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaha ra tsi ra tan cuví ra tumaa seña tsa cuenda yo.

35 Tacan tan coto tandihí yo náa tsicá ñi nyívi tun tsinú ñi ñi o ña tsinú ñi ñi tsi ra. Maa tyin tsa cuenda yooho, María, tsehe cuví tumaa iin mityi xaan tsa cua yaha añima un —catyí ra Simeón tsihin ña.

36 Tan ican, tsitsi vehe ñuhu cahnu can, nyí tucu iin ñaha tsa cuví ndusu yuhu Nyoo. Nañi ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindaha ña, maa tyin utsa cuiya ñi tsicoo ña tsihin yí ña tan tsihí ra.

37 Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicán tahvi ña tan iyó nyitya ña.

38 Tan juvin ñi tsa ndi nyí ca ra José tan ña María tsihin lee ican, tan tsaá ña Ana nu yucú ñi. Tan quitsaha nacuhvá ña tyahvi nyoo tsi Nyoo. Tan cahán ña tuhun ra Jesús tsihin tandihí nyívi tsa yucú ican, nyívi tsa ndatú tsa cacu ñuu Jerusalén.

Nu cuanuhu ñi nda ñuu Nazaret

39 Tacan tan tsa yaha tsa javaha ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhu ñi nda ñuu Nazaret tsa canyí Galilea nu cuví ñuu maa ñi.

40 Tan ra luhlu Jesús vatsí cuahnu ca ra. Tan cua ndun- yee ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

Nu cahán ra luhlu Jesús tsihin ra maestro cuenda ley vehe ñuhu naha ra

41 Ra José tsihin sihi ra Jesús tuhvá ñi tsicá vico pascua nda ñuu Jerusalén ndihí ñi cuiya.

42 Tan tsa quitá tsa utsi uvi cuiya ra Jesús, tan tsahán tandihí ñi nda ñuu Jerusalén, cuhva tuhun tsa iyó maa ñi.

43 Tan quívi ndihí vico, tan vatsí nuhu ñi, maa tyin ra luhlu Jesús ndoo ra ñuu Jerusalén can. Tan ña jaha jutu ra tan sihi ra cuenda.

44 Tsicá ñi maa ñi tyin vatsí maa ra tyañu tandihí nyívi ican. Tan ndihí iin quívi tsicá ityi ñi. Tacan tan quitsaha nanducú ñi tsi ra tyañu nyívi nacotó tsi ñi.

45 Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

46 Tan tsa yaha uñi quívi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha.

47 Tan tandihí nyívi tsiñi tsa caahán ra, iyo xaan cuñi ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra.

48 Cuhva tsa nyehe jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javaha un tyehen? Jutu un tan yuhu tuñú xaan cuñi ndi tan nanducú xaan ndi tsi un —catyí ña.

49 Tacan tan catyí ra Jesús:
—¿Nacuenda nanducú ndo tsi yu? ¿A ña tsitó ndo tyin ñiñi ca cuñí tsi nyehé yu tyiñu Jutu yu? —catyí ra.

50 Maa tyin ña cutuñi iñi ñi tsa caahán ra tsihin ñi.

51 Tacan tan cuanuhu ra tsihin ñi nda ñuu Nazaret. Tan vaha javahá ra tyin tyaa yahvi ra tsi ñi. Tan sihi ra naquihin vaha ña tandihi tuhun ihya tsitsi añima ña.

52 Tan ra Jesús cua cuahnu ca ra tan tsaá ca tsa tsiñi tuñi jiñi ra. Tan sii xaan cuñi Nyoo tsihin ra, tacan tucu nyivi, sii xaan cuñi ñi tsihin ra.

3

Nu cahan ra Juan, ra jacoondutyá tsi nyivi, tuhun Nyoo nuu tsiqui

(Mt. 3.1-12; Mr. 1.1-8; Jn. 1.19-28)

¹ Tsa quita tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisaniás ndacá ñaha ra Abilinia quivi can.

² Tan ra Anás tsihin ra Caifás cuví ra naha jutu tsaahnu tsa cuví ityi nuu. Quivi can cahan Nyoo tsihin ra Juan sehe ra Zacarías iin nu tsiqui.

³ Tan ra Juan tsicá nuu ra tandihi ñuu tsa cayucú yatyin ñi yutya cahnu Jordán, caahán ra tuhun Nyoo tsihin nyivi. Tan catyí ra tsihin ñi tyin na ndu uvi iñi ñi cuatyí ñi tan coondutya ñi. Tacan tan

Nyoo cua jaha ra tucahnu iñi cuatyí ñi, catyí ra.

⁴ Tumaa caahán tuhun tsa nyaá nu libru tsa tyaa ra Isaías, ra cuví ndusu yuhu Nyoo tahan tsanaha. Tan catyí ra:

Cua tyaa soho yo ndusu ra nu caná tsa ra nu tsiqui tan catyí ra:

“Nuña ndo iin ityi cuiti tan natyiso vaha ndo tsi ndo tyin tsa vatsi Jutu Mañi yo.

⁵ Tumaa tsa tahví ndo yucu tan jandutú ndo xahva cunu, jandoó ndo ityi yacua, tan janduvahá ndo nu quiñi.

⁶ Tacan tan tandihi nyivi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahan ra Juan tsihin nyivi.

⁷ Tan tsa cuahán nyivi tsa cuñi ñi jacoondutya ra tsi ñi, tan catyí ra tsihin ñi:

—¿Nyooho cuví ndo tumaa tata coo! ¿A cuñi ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

⁸ Yacan nasama ndo cuhva iyó ndo, na nyehe yo tyin tsa ndu uvi iñi ndo cuatyí ndo nuu Nyoo. Tan ña nduyaa ndo cahan ndo tyin nyivi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyivi ra Abraham.

⁹ Tsa ndatú yatsa Nyoo tsi tandihi ndo tyin cuví ndo tumaa yutun tsa ña tsahá

tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

¹⁰ Tacan tan nducu_u tuhun ñi tsi ra tan catyí ñi:

—¿Tan nácaa javaha ndi? —catyí ñi.

¹¹ Tacan tan nacahan ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

¹² Tan tsa_u tucu ra tsa tavá xuhun cuenda ra ndacá ñaha nda ñuu Roma, tsa cuñi ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

¹³ Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴ Tacan tan tsica_u tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyivi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndo_o ndo vaha tsihin yahvi ndo —catyí ra Juan.

¹⁵ Tan quivi can tandihi nyivi ndatú ñi tsi ra Cristo. Tan tsicá iñi ñi tun juvin ra Juan cuví Cristo.

¹⁶ Maa tyin ra Juan catyí ra tsihin tandihi ñi:

—Tsa nditsa tyin jacoondutya_u yu tsi ndo tsihin ndutya. Maa tyin vatsí inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuví yu musu ra tan ndatsi yu ñi nditsan ra. Tan ra ican cua jacoondutya ra tsi ndo tsihin Tatyí Ii Nyoo, tan tsihin ñuhu ihñi.

¹⁷ Tan ra ican ndahá ra pala tyin cua jandava ra trigu. Cua natava sin ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan tsihin ñi.

¹⁸ Tan tacan cahan ra Juan tsihin nyivi can. Tan náa ndihi ca maa cuhva cahan ra tan jacoto_o ra tsi ñi nácaa tsa cua quitsi Sehe Nyoo.

¹⁹ Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihin ra tsi ña Herodías, ñasihi ra Felipe, yañi ra, tsihin tsa cuenda náa ndihi tsa ña vaha javahá ra.

²⁰ Maa tyin ña tyaa yahvi maa ra Herodes tuhun cahan ra Juan. Nu ndihi tuhun tinyii ra tsi ra Juan tsitsi vehe caa.

Nu jacoondutya_u ra Juan tsi ra Jesucristo

(Mt. 3.13-17; Mr. 1.9-11)

²¹ Tsa ndi cumañi ca cuhun ra Juan vehe caa tan jacoondutya_u ra tsi tandihi nyivi. Tan jacoondutya_u ndihi ra tsi ra Jesús. Tsa yahá tsicoondutya_u

ra, tsican tahvi ra tsi Nyoo, tacan tan nuña andivi.

²² Tan nuu Tatyí Ii Nyoo siqui ra tumaa iin paloma. Tan cahan iin ndusu ityi siqui andivi, tan catyí tsi tyehen:

—Yooho cuví Sehe yu, tan cuñí xaan yu tsi un. Tan sii xaan cuñí yu nyehé yu tsi un —catyí ndusu ican tsihin ra.

Cuhva quitsi tata ra Jesu-cristo
(Mt. 1.1-17)

²³ Tan tsa iyó maa tan oco utsi cuiya ra Jesús tan quit-saha jahá tyiñu ra tyiñu Nyoo. Tan tandihi nyivi cuñí maa ñi tyin sehe ra José cuví tsi ra. Tan ra José, sehe ra Elí cuví tsi ra.

²⁴ Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra.

²⁵ Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra.

²⁶ Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra. Tan ra Semei, sehe ra José cuví tsi ra. Tan ra José, sehe ra Judá cuví tsi ra.

²⁷ Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan

ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra.

²⁸ Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam, sehe ra Elmodam cuví tsi ra. Tan ra Elmodam, sehe ra Er cuví tsi ra.

²⁹ Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra. Tan ra Jorim, sehe ra Matat cuví tsi ra.

³⁰ Tan ra Matat, sehe ra Leví cuví tsi ra. Tan ra Leví, sehe ra Simeón cuví tsi ra. Tan ra Simeón, sehe ra Judá cuví tsi ra. Tan ra Judá, sehe ra José cuví tsi ra. Tan ra José, sehe ra Jonán cuví tsi ra. Tan ra Jonán, sehe ra Eliaquim cuví tsi ra.

³¹ Tan ra Eliaquim, sehe ra Melea cuví tsi ra. Tan ra Melea, sehe ra Mainán cuví tsi ra. Tan ra Mainán, sehe ra Matata cuví tsi ra. Tan ra Matata, sehe ra Natán cuví tsi ra.

³² Tan ra Natán, sehe ra David cuví tsi ra. Tan ra David, sehe ra Isaí cuví tsi ra. Tan ra Isaí, sehe ra Obed cuví tsi ra. Tan ra Obed, sehe ra Booz cuví tsi ra. Tan ra Booz, sehe ra Salmón cuví tsi ra. Tan ra Salmón, sehe ra Naasón cuví tsi ra.

³³ Tan ra Naasón, sehe ra Aminadab cuví tsi ra. Tan ra Aminadab, sehe ra Aram cuví tsi ra. Tan ra Aram, sehe ra Esrom cuví tsi ra. Tan ra Esrom, sehe ra Fares cuví tsi

ra. Tan ra Fares, sehe ra Judá cuvī tsi ra.

³⁴Tan ra Judá, sehe ra Jacob cuvī tsi ra. Tan ra Jacob, sehe ra Isaac cuvī tsi ra. Tan ra Isaac, sehe ra Abraham cuvī tsi ra. Tan ra Abraham, sehe ra Taré cuvī tsi ra. Tan ra Taré, sehe ra Nacor cuvī tsi ra.

³⁵Tan ra Nacor, sehe ra Serug cuvī tsi ra. Tan ra Serug, sehe ra Ragau cuvī tsi ra. Tan ra Ragau, sehe ra Peleg cuvī tsi ra. Tan ra Peleg, sehe ra Heber cuvī tsi ra. Tan ra Heber, sehe ra Sala cuvī tsi ra.

³⁶Tan ra Sala, sehe ra Cainán cuvī tsi ra. Tan ra Cainán, sehe ra Arfaxad cuvī tsi ra. Tan ra Arfaxad, sehe ra Sem cuvī tsi ra. Tan ra Sem, sehe ra Noé cuvī tsi ra. Tan ra Noé, sehe ra Lamec cuvī tsi ra.

³⁷Tan ra Lamec, sehe ra Matusalén cuvī tsi ra. Tan ra Matusalén, sehe ra Enoc cuvī tsi ra. Tan ra Enoc, sehe ra Jared cuvī tsi ra. Tan ra Jared, sehe ra Mahalaleel cuvī tsi ra. Tan ra Mahalaleel, sehe ra Cainán cuvī tsi ra.

³⁸Tan ra Cainán, sehe ra Enós cuvī tsi ra. Tan ra Enós, sehe ra Set cuvī tsi ra. Tan ra Set, sehe ra Adán cuvī tsi ra. Tan ra Adán, sehe Nyoo cuvī tsi ra.

4

Nu nducu cuhva nu ña vaha tsi ra Jesús

(Mt. 4.1-11; Mr. 1.12-13)

¹Tan ñihi nyaá Tatyí Ii Nyoo tsihin ra Jesús tsa yaha tsi-coondutya ra, quitā ra yutya

Jordán tan cuanuhu ra. Tan quihīn Tatyí Ii Nyoo tsi ra, tan tsaḥan ra iin nu cuvī nu tsiquī

² nu tsinyī ra uvi xico nduvi. Tan ña tsatsī maa ra tandīhi quivī ican. Yaha can tan quitsī tsa tsisocó ra. Tan nducú cuhva nu ña vaha tsi ra.

³Tan catyí nu tsihin ra:

—Tatun juvin Sehe Nyoo cuvī tsi un, caḥan tsihin yuu ihya, na nanduvi tsi paan catsi un.

⁴Tan ra Jesús nacahaḥan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyivī coonyito ñi, tyin coonyito ñi tsihin tandīhi tuhun caahán Nyoo —catyí ra Jesús tsihin nu ña vaha.

⁵Tacan tan quihīn nu ña vaha tsi ra Jesús, cuahán ra iin jiñi yucu sucun. Tan iin yaha ñi janahaḥa nu tandīhi tsa cuca nu ndacá ñahaḥa nu ñuu ñayivī ihya tsi ra Jesús.

⁶Tan catyí nu tsihin ra:

—Cuhva yu tandīhi tsa nyehé un tun cuñí un tyin maa Nyoo tsaḥa tsa cundaca ñaha yu tandīhi can, tan ndáa ra cuñí yu cuhva yu can, cuvī tsi ra.

⁷Tatun yooḥo tan cuiñi tsiiti un nuu yu ihya tan jacahnu un tsi yu, tandīhi can cua cuhva yu tsi un —catyí nu ña vaha tsihin ra.

⁸Tan nacahaḥan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacahnu tsi intuhun ñi maa Jutu Nyoo.

Tan tyiñu intuhun ñi maa ra taahán tsi javaha un.”

⁹ Tacan tan quihin nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaa nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuando nu ñuhu.

¹⁰ Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuenda ra naha tsi un.

¹¹ Cua janahndí ra naha tsi un. Tan ña cua nañi tsaha un nu yuu.

¹² Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³ Tan tsa ndihí nducu cuhva nu ña vaha tsi ra Jesús, tacan tan nacoq nuu nu tsi ra.

Nu quitsaha caahán ra Jesús tuhun Nyoo tsihin nyivi (Mt. 4.12-17; Mr. 1.14-15)

¹⁴ Tan tsa yaha tsa nducu cuhva nu ña vaha tsi ra Jesús tan cuanuhu ra nda Galilea tsihin tsa tsitú tunyee iñi Tatyí Ii Nyoo tsi ra. Tan tsitó nyivi tuhun ra ñi cahnu Galilea can.

¹⁵ Tan jacuahá ra tsi nyivi nu cuví vehe ñuhu tandihí ñi ñuu. Tan tandihí ñi jacahnu ñi tsi ra.

Tsa tsaq nyico ra Jesús ñuu Nazaret nu tsahnu ra (Mt. 13.53-58; Mr. 6.1-6)

¹⁶ Tacan tan tsaq nyico ra Jesús ñuu Nazaret nu tsahnu ra. Tan iin quivi quitatú nyivi, quihvi ra tsitsi vehe ñuhu, tumaa tsa tuhvá maa ra tsicá. Tan nduvitá ra cua cahvi ra tuhun Nyoo.

¹⁷ Tan tsaha ra naha iin libru tsa tyaa ra Isaías ra cuví ndusu yuhu Nyoo. Tan cuhva tsa nuña ra, nañihí ra iin nu catyí tsi:

¹⁸ Iyó Tatyí Ii Nyoo tsihin yu, tyin maa Nyoo tava tyiñu tsi yu

cahan yu tuhun ra tsihin nyivi ndaahvi.

Tan janduvaha yu tsi nyivi tsa uhvi añima.

Tan maa ra tava tyiñu tsi yu tyin jacoto yu tsi nyivi yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyivi cuaa.

Tan cua nacoo nuña yu tsi nyivi tsa iyó tundoho.

¹⁹ Tan jacoto yu tsi nyivi tyin tsa quitá quivi tsa nyaá Nyoo tumañi iñi tsihin ñi.

²⁰ Tacan tan ndihí cahvi ra tan nacasi ra nuu libru can. Tan nacuhva ra tsi iin ra tsa jatinyeé tsihin tyiñu vehe ñuhu can. Tan tsinyaa ra Jesús. Tacan tan tandihí nyivi tsa nyecú ican, ndoo ñi tsa nyehé ñi tsi ra.

²¹ Tacan tan catyí ra tsihin ñi:

—Vityin quivi ihya tsa cundaq cuhva catyí tuhun Nyoo tsa cahvi yu tsiñi ndo —catyí ra Jesús tsihin ñi.

22 Tan tandihí nyívi tsa nyecú can, vaha xaan cahān ñi tuhun ra. Tan iyo xaan cuñí ñi tsihin tandihí tsa vaha tsa cahān ra. Tacan tan quitsahā tsicá tuhun tahan ñi:

—¿A ñavin ra ihya cuví sehe ra José?

23 Tan nacahān ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyívi, janduvaha jihna tsi maa un.” Tan cuñí tucu ndo catyí ndo: “Tandihí tsa javahā un ñuu Capernaum tsitó ndi, javaha ndihí tucu can ñuu maa un ihya.”

24 Tan cahān ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyívi ñuu ra naha tsi ra naha.

25 Tan tsa nditsa tyin cuaha xaan ñi ndaahvi tsa tsihi yíi tsicoo Israel ihya quívi tsa tavā Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsicā ra cahān ra tuhun Nyoo. Tan quívi can ña cuun maa savi uñi cuiya sasava. Tan tsicoo tama cahnu xaan.

26 Tan ñavin tsa cuenda ndi intuhun maa ñi Israel ihya tavā Nyoo tyiñu tsi ra Elías cuahán ra. Maa tyin tsahān ra jatinyee ra tsi iin ñaha ndaahvi tsihi yíi tsa tsicoo ñuu Sarepta tsa canyíi Sidón.

27 Tacan tucu quívi tsicā inga ra cuví ndusu yuhu Nyoo cuenda nyívi Israel, ra Eliseo. Cuaha xaan ra cuuhví tsihin cuehe tyaahyú tsicoo

Israel ihya, tan ndi intuhun ra naha tan ña nduvahā ra naha. Nduvahā intuhun ñi ra Naamán ra quee ñuu Siria —catyí ra Jesús.

28 Tsa yahā tsiñi ñi tandihí tuhun can, tandihí nyívi tsa yucú tsitsi vehe ñuhu can xaan xaan cuñí ñi cuví.

29 Tan nduvitā ñi. Tan tavā ñi tsi ra Jesús nda jiñi yucu sucun nda yuhu ñuu, tsa cuñi ñi janacava ñi tsi ra ican.

30 Maa tyin ra Jesús yahā ra tyañu ñi tan cuahán ra.

Nu quitā tatyí ña vaha tsa yihí tsi iin rayíi

(Mr. 1.21-28)

31 Tan cuahán ra Jesús ñuu Capernaum tsa canyíi Galilea. Tan jacuahá ra tsi nyívi tsitsi vehe ñuhu tandihí sauru, quívi tuhvá nyívi quitatú.

32 Tan iyo xaan cuñí ñi tsihin tsa cahān ra. Tyin ñihi xaan cahān ra tumaa tuhvá ra cumí tyiñu caahán.

33 Tan iin quívi nyíi ra Jesús vehe ñuhu tan iin ra yihí tatyí ña vaha catyí ra caná tsa ra jahā tatyí ña vaha can:

34 —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu n-cotó vaha yu tsi un. Yooho cuví Sehe Ii Nyoo.

35 Tacan tan nduxaan ra Jesús tsi tatyí ña vaha tsa yihí tsi ra can tan catyí ra:

—Taxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyivi nduvā ra can nu ñuhu jaha tatyí ña vaha can, tan nduve ca náa javahā nu tsi ra can. Tan quita nu cuahán nu.

³⁶ Tandihí nyivi tsa nyehe can, iyo xaan cuñí ñi tan yuhví ñi cuví. Tan quitsahā tsicá tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyí ña vaha tan ñihi caahán ra, tan quita tatyí ña vaha ican —catyí ñi.

³⁷ Tacan tan tandihí ñi ityí quita natuhun nyivi tuhun ra Jesús.

Nu janduvahā ra Jesús tsi ña tyiso ra Simón Pedro

(Mt. 8.14-15; Mr. 1.29-31)

³⁸ Tacan tan quita ra Jesús tsitsi vehe ñuhu can. Tan cuahán ra vehe ra Simón. Tan nu tsaā ra can, canyii ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña.

³⁹ Tacan tan natuhvā ra nu canyii ña tan nacañi nuu ra jiñi ra tan cahān ra tsihin cahñi can na quita tsi. Tacan tan quita cahñi can iin yaha ñi, tan nduvitā ña can, quitsahā nanducú ña tsa catsi ra Jesús.

Nu cuaha xaan nyivi cuuhví janduvahā ra Jesús

(Mt. 8.16-17; Mr. 1.32-34)

⁴⁰ Tan tsa tyiso ñicanyii, tandihí nyivi tsa iyó ñi cuuhví vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun

intuhun ñi cuuhví can tan janduvahā ra tsi ñi.

⁴¹ Tan cuaha xaan nyivi quita tatyí ña vaha tan canā tsa nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaan ra tsi nahnu tan ña tsaahā ra tsa cahan nahnu, tyin tsitó nahnu tyin juvin ra cuví Cristo.

Nu tsicā ra Jesús cahān ra tuhun Nyoo tandihí ñuu cayucú Galilea

(Mr. 1.35-39)

⁴² Tsa tuvi inga quivi, tan quee ra Jesús ñuu can. Tan cuahán ra iin nu taxin caá. Tan nyivi nanducú ñi tsi ra. Tan tsaā ñi nda nu nyii ra ican. Tan cuñí ñi tsa ña cuhun ca ra.

⁴³ Tacan tan catyí ra Jesús tsihin ñi:

—Ndi cuñí ca tsi jacoto yu tsi nyivi tandihí ca ñuu nácaa tan quihvi Nyoo aña ñi tan cundaca ñaha ra tsi ñi. Tyin yacan cuenda vatsí yu nu ñuhu ñayivi ihya.

⁴⁴ Tan tacan ñi tsicá ra Jesús caahán ra tuhun Nyoo vehe ñuhu tandihí ñi ñuu tsa cayucú Galilea.

5

Nu tsaahā ra Jesús ndatu tsa cuaha xaan tyaca ñihí ra naha
(Mt 4.18-22; Mr. 1.16-20)

¹ Iin quivi nyaá ra Jesús yuhu miñi nu cuví Genesaret. Tan tsaā cuaha xaan nyivi, tyin cuñí ñi tyaa soho ñi tuhun Nyoo. Tan tihin xaan nyii ra Jesús tyañu ñi.

² Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quita ra tiin tyaca. Tan nacatyá ra naha traya.

³ Tacan tan quihvi ra Jesús tsitsi iin yutun ndoo tsa cuví tsii ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaa ra Jesús tsitsi yutun ndoo can. Tan quitsaha caahán ra tsihin nyivi.

⁴ Cuhva tsa ndihí cahan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tiin ndo tyaca.

⁵ Tan nacaahan ra Simón tan catyí ra:

—Maestro, tsa jahá tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatun maa un catyí, cua jacuhun nyico ndi traya.

⁶ Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsaha tyaahnyá tsihin tsa vee tyaca can.

⁷ Tacan tan jandaha ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaá ra can naha ra. Tan jacutú ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca.

⁸ Tsa nyehe ra Simón Pedro tsa cuví tacan, tan tsicuiñi

tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

⁹ Tyin ra Simón tsihin tandihí ra yucú tsihin ra, nayuhvi xaan ra naha tsa cuenda tsa cuaha xaan tyaca ñihí ra naha.

¹⁰ Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhvi xaan ra naha. Tan ra Jesús catyí ra tsihin ra Simón:

—Ña nayuhvi un, tyin vi-tyin tan nda nu cuahán ca tsi ityi nuu, tumaa tsa tiin ndo tyaca ihya, tacan cua ñihí un nyivi cua cuví nyivi Nyoo, tan cua tava un tsi ñi nu caquiñi, na quihvi ñi cuenda Nyoo —catyí ra Jesús tsihin ra Simón.

¹¹ Tacan tan tava ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tsihin ra Jesús.

Nu janduvaha ra Jesús tsi iin ra ndohó cuehe tyaahyú (Mt 8.1-4; Mr. 1.40-45)

¹² Iin quivi nyii ra Jesús iin ñuu nu iyó iin ra ndohó cuehe tyaahyú. Tan tsa nyehe ra tsi ra Jesús, tan tsicuiñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yoocho tan cuñi un, cuví janduvaha un tsi yu —catyí ra.

13 Tacan tan tyiso ndaha ra Jesús jiñi ra cuuhví can, tan catyí ra:

—Cuñí yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvaha ra.

14 Tacan tan catyí ra Jesús tsihin ra:

—Coto catyi tuhun un tsihin nyivi. Intuhun ñi tsa cua cahan yu tsihin un, cuaahan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaá ra Moisés, tan cua cuví tsi iin tsandaa tsi ra jutu can tan tsi nyivi tyin tsa nduvaha un —catyí ra Jesús tsihin ra.

15 Vasu ndi maa tsa ña cuñi ra Jesús tsa coto nyivi, ñihi ca quitá tuhun ra. Tan cuaha xaan nyivi ndu iin tyin cuñi ñi tyaa soho ñi tsa caahán ra tan janduvaha ra tsi ñi.

16 Maa tyin ra Jesús, jatsiyó, jatsiyó ñi ra tsi ra nu iyó nyivi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvaha ra Jesús tsi iin ra xii

(Mt. 9.1-8; Mr. 2.1-12)

17 Iin quivi jacuahá ra Jesús tsi nyivi. Tan yucú juhva ra fariseo, ra tyaá yahvi xaan ley Nyoo tsa tyaá ra Moisés tsanaha. Tan yucú tucu juhva ra maestro cuenda ley vehe ñuhu ícan. Quitá ra naha ñuu Jerusalén, tan inga ñuu nyihi tani cahnu Galilea tan Judea. Tan iyó xaan tunyee iñi Nyoo

tsi ra Jesús tsa janduvaha ra tsi nyivi cuuhví.

18 Tacan tan tsaá ra naha tan nyiso ra naha iin ra cuuhví tsihin cuehe xii nu tsito. Tan cuñi ra naha quihvi ra naha tsitsi vehe tan caquin ra naha tsi ra cuuhví can nu nyii ra Jesús.

19 Maa tyin ña ñihí ra naha nu quihvi ra naha tyin tuvi xaan nyivi. Tacan tan ndaa ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyii ra Jesús tyañu nu tuvi nyivi can.

20 Tan nyehe ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoo tucahnu iñi tsi un, tsa cuenda cuatyí un —catyí ra Jesús tsihin ra can.

21 Tacan tan ra maestro cuenda ley vehe ñuhu tsihin ra cuví fariseo, quitsaha tsicá iñi ra naha: “¿Yoo ra cuví ra ihya? Tsicoo cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoo tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñi ra naha tsicá iñi ra naha.

22 Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

23 ¿Náa tsa yii ca catyí yo? ¿A yii catyí yo: “Cuatyí un tsa yaha ndatsi”, a yii ca catyí yo tsihin iin nyivi xii: “Nduvita tan caa un”?

24 Maa tyin vityin cua janaha yu tsi ndo tyin yuhu

Rayi tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yaha cahan ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

²⁵ Tan nduvita ra can, tan naquihin ra tsito ra. Tan cuanuhu ra yuvehe ra, juvin ñi jacahnú ra tsi Nyoo.

²⁶ Tandihí nyivi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví (Mt. 9.9-13; Mr. 2.13-17)

²⁷ Yaha can tan quita ra Jesús vehe can. Tan nanyehe ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañi ra Leví. Tan nyaá ra nu tyahví nyivi. Tan catyí ra Jesús tsihin ra:

—Cohon tsihin yu —catyí ra.

²⁸ Tacan tan nduvita ra Leví. Tan nacoo ra tandihí tsa iyó tsi ra. Tan cuahán ra tsihin ra Jesús.

²⁹ Tacan tan javaha ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyivi.

³⁰ Tan ra fariseo naha ra tsihin ra cuví maestro cuenda ley vehe ñuhu naha ra, quit-saha cahán nyaá ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

³¹ Tan ra Jesús nacahan ra, tan catyí ra:

—Ña tsiñi ñuhu doctor tsi ra tsa vaha maa. Ra cuuhví, cuví ra tsiñi ñuhu doctor.

³² Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janaha ra Jesús tyin tatun tsa cuahán ra cua coo nyitya nyivi nyicún tsi ra

(Mt. 9.14-15; Mr. 2.18-20)

³³ Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsi-coó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yooho, ndihí quivi tsatsí ra naha tan tsihí ra naha. ¿Nacuvi? —catyí ra naha.

³⁴ Tan nacahan ra Jesús, tan catyí ra:

—¿A cuví coonyitya nyivi yucú vico tindaha jaha ndo tatun nyíí ra tsa cua tindaha tsihin ñi? Ña cuví. [Tyin sii cuñí ñi, tan cuñí ñi catsi ñi.]

³⁵ Maa tyin cua quita quivi tsa cua jatsiyo ra tindaha ican tsi ra nu yucú ñi. Tacan tan cua coonyitya ñi.

Nu jacuahá ra Jesús tyin ña nacatsí tahan tuhun tsahnu

tša iyó nyívi tsihin tuhun tšaa tša jacuahá ra

(Mt. 9.16-17; Mr. 2.21-22)

³⁶ Tacan tan cahan tucu ra Jesús iin cuhva tsihin nyívi, tan catyí ra:

—Yoñi tsaahnyá iin jahma tšaa, tan naquicú ñi tsihin jahma tuuhu. Tyin tatun javaha ñi tacan, nandiyi jahma tšaa can. Tan ña ndoo vaha tsi tsihin jahma tuuhu can.

³⁷ Tan tacan tucu, ña cuví tyihi nyívi vinu tšaa tsitsi ñi tsaahnu. Tyin cua tyahnya ñi can tsihin vinu tšaa can. Tan cua tiví vinu can tan tiví ndihi tucu ñi tsaahnu can.

³⁸ Yacan cuenda taahan tsi tyihi yo vinu tšaa tsitsi ñi tšaa. Tyin tacan tan nduvi taahan tsi tan cua jaha cuenda tahan tsi itsi.

³⁹ Tan yoñi tsihí vinu tsahnu, tan cuñi ñi coho ñi vinu tšaa. Tyin catyí ñi, vaha ca vinu tsahnu. [Vinu tsahnu can cuñi tsi catyí tyin cuví tsi cuhva iyó maa ñi.]

6

Nu tuhun ra tsicá tsihin ra Jesús yoco itya trigu quívi quitatú nyívi

(Mt. 12.1-8; Mr. 2.23-28)

¹ Iin quívi quitatú nyívi, yahá ra Jesús mahñu tša tatsi nyívi. Tan ra tsicá tsihin ra tuhún ra naha yoco trigu. Tan jocon ra naha can tsihin ndaha ra naha. Tan tsatsi ra naha tsiti can.

² Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tša ña taahan tsi javaha yo quívi quitatú yo?

³ Tan nacahan ra Jesús, tan catyí ra:

—¿A ñaha ca cahvi ndo nu tsahá cuenda tsi tša javahá ra David tan ra cutahán tsihin ra quívi tša tšisocó ra naha?

⁴ Quihvi ra tsitsi vehe Nyoo. Tan quihin ra paan tša tyiso nyívi nuu altar Nyoo. Tan tsatsi ra. Tan tsahá ndihi ra tsi ra tša cutahán tsihin ra. Tan maa ñi maa ra cuví jutu naha ra taahan tsi catsi paan can —catyí ra Jesús.

⁵ Tacan tan catyí ra Jesús:

—Rayi tša quee nda gloria iyó ndatu tsi ra tša cahan ra tsihin intuhun intuhun ndo náa taahan tsi javaha ndo quívi quitatú yo —catyí ra.

Nu janduvaha ra Jesús tsi iin ra na ityi ndaha

(Mt. 12.9-14; Mr. 3.1-6)

⁶ Inga quívi quitatú nyívi quihvi ra Jesús tsitsi vehe ñuhu. Tan quitsahá jacuahá ra tsi nyívi. Tan nyehe ra tsi iin ra tša na ityi ndaha cuaha.

⁷ Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quívi quitatú nyívi, tyin tacan tan cuví tyaa ra naha cuatyí tsi ra Jesús.

⁸ Maa tyin ra Jesús tsitó ra tša tsicá iñi ra naha. Tan catyí ra tsihin ra na ityi ndaha can:

—Nduvita. Cunya nyityi mahñu ra naha ihya.

Tacan tan ra na ityi ndaha can nduvita ra. Tan tsinyaa nyityi ra mahñu ra naha.

⁹ Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quivi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyivi, o cahñi ndihi yo tsi ñi?

10 Tacan tan ra Jesús nyehé ra intuhun intuhun ra naha. Yahá can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihi ra ndaha ra. Tan nduvahá ndaha ra.

11 Maa tyin ra yucú ican naha ra, cuxaan ra naha. Tan quitsahá tsicá tuhun tahan ra naha tsi ra naha:

—¿Nacaa javaha yo tan cuvi casi yo nu caahán ra Jesús ihya? —catyí ra naha.

Nu nacatsi ra Jesús tsa utsi uvi taahan ra cua caca tyiñu ra

(Mt. 10.1-4; Mr. 3.13-19)

12 Quivi ican ndaa ra Jesús iin yucu. Tan ñiñu maa tsicān tahvi ra tsi Nyoo.

13 Tan tsa tuvi, caná ra tsi tandihi ra nycún tsi ra. Tan nacatsi ra utsi uvi taahan ra naha. Tan jacunañi ra tsi ra naha apóstol, tan cuñi tsi catyi tsi “ra tsa tavá tyiñu Nyoo”.

14 Tan ihya nyaá sivi tandihi tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé;

15 ra Mateo; ra Tomás; ra Jacobo, sehe ra Alfeo; tan ra Simón ra nyanaá cuvi ra cuenda partido tsa cuñi

cuhun cuatyí siqui ñuu Roma tsa ndacá ñaha tsi ñi;

16 tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

Nu jacuahá ra Jesús tsi nyivi cuaha

(Mt. 4.23-25)

17 Tacan tan nuu ra Jesús yucu ican tsihin tsa utsi uvi ra naha. Tan ndu iin nyivi tsa nycún tsi ra tsaha yucu can. Tan tsaá cuaha tucu nyivi quee ñuu Jerusalén tsihin tandihi ca ñuu cayucú Judea, tsihin tucu nyivi quee ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsaá ñi tyin tyaa soho ñi tuhun caahán ra Jesús. Tan tandihi nyivi cuuhvi cuñi ñi tsa janduvaha ra tsi ñi.

18 Tan tandihi nyivi tsa yihí tatyí ña vaha janduvahá ra tsi ñi.

19 Tan tandihi ñi cuñi ñi tiin ñi tsi ra, tyin janduvaha ra tsi ñi tsihin tunyee iñi tsa iyó tsi ra.

Tsehe cahān ra Jesús tsihin nyivi tsa naquihin ndaahvi ra

(Mt. 5.1-12)

20 Tacan tan nanyehé ra Jesús tsi ra tsicá tsihin ra. Tan catyí ra tsihin ra naha:

—Tandihi nyooho tsa ndaahvi, sii xaan cua cuñi ndo, tyin taahán tsi cundaca ñaha Nyoo tsi ndo.

21 Tandihi nyooho tsa tsisocó vityin, sii xaan cua cuñi ndo. Tyin coo quivi ña cua cusoco ca maa ndo. Tan tandihi nyooho tsa tsacú tsa cuihya cuñi ndo, sii xaan cua

cuñi ndo tyin ña cua coo ca ndo tucuihya iñi. Tan cua vacu naaha xaan ndo tsihin tsa sii cuñi ndo.

22 Cusii iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyi ñi tyin nyivi ña vaha cuví ndo tyin tsinú iñi ndo tsi maa yu tsa cuví yu Rayii quee nda gloria.

23 Sii cuñi ndo quivi can tyin tacan tucu javaha nyivi ñi tahañ tsanaha. Cuxaan ñi tsi ra cuví ndusu yuhu Nyoo. Ndaña ndo tsihin tsa sii cuñi ndo. Tyin cahnu xaan ndatu cua ñihi ndo nda gloria.

Tsehe cañan ra Jesús tsihin nyivi ña tsinú iñi tsi ra

24 Maa tyin ndahvi nyooho, ñi cuca. Tyin vityin sii xaan cuñi ndo tsihin tandihi tsa cuca ndo. Maa tyin cua coo quivi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

25 Tan ndahvi nyooho tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooho tsa sii cuñi vityin, ndahvi nyooho, tyin coo quivi cua coo ndo tucuihya iñi. Tan cua vacu xaan ndo.

26 Tan ndahvi nyooho tsa vaha caahán nyivi tuhun ndo. Tyin tacan caa tucu nyivi tsicoo tsanaha, vaha xaan cañan ñi tuhun ra tsa cañan tsa ña nditsa tsihin ñi.

Cuñi ndo tsi nyivi xaan iñi tsi ndo

(Mt. 5.38-48; 7.12)

27 Tandihí nyooho tsa tsiñi tsa caahán yu, catyi yu tsihin ndo tyin: Cuñi ndo tsi nyivi xaan iñi tsi ndo. Javaha ndo tsa vaha tsihin nyivi tsa ndasi cuñi nyehe tsi ndo.

28 Cañan ndo tsa vaha tsihin nyivi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyivi caahán nya tsi ndo.

29 Tatun iin ra cañi iin tsiyo nuu ndo, cuhva ndihi ndo inga tsiyo, nacañi ndihi maa ra. Tatun iin ra quinyaá tsaqueta nditsi ndo, cuhva ndihi ndo camiseta ndo.

30 Cuhva ndo náa ndihi tsicán nyivi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi.

31 Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi.

32 Tatun cuñi ndo tsi maa ñi maa nyivi tsa cuñi tsi ndo, nduve tsa vaha javahá ndo. Tyin tacan icá tucu nyivi quiñi iyó.

33 Tan tatun tsihin nyivi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyivi, nduve tsa vaha icá ndo cuví can, tyin nyivi caquiñi, tacan icá tucu ñi can.

34 Tatun javahá ndo tumañi iñi tsi iin nyivi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyivi caquiñi, tacan icá ñi. Tatun náa tumañi iñi javahá ñi tsi nyivi vaha iñi tsi ñi, ndatú ñi tsa nacuhva tucu ñi can tumañi iñi tsi ñi.

35 Maa tyin nyooho, cuñi ndo tsi nyivi xaan iñi tsi ndo. Tan javaha ndo tsa vaha tsihin ñi. Tan cuhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuvi ndo sehe maa Nyoo, ra nyaá gloria. Tyin Nyoo vaha iñi ra nda cuando tsihin nyivi tsa ña nacuhvá tyahvi nyoo tsi ra, tan tsihin nyivi caquiñi.

36 Cu uhvi iñi ndo tsi nyivi, tumaa uhvi cuñi Nyoo Jutu yo nyehé ra tsi yo.

Ña cahan nyaa yo tsi inga nyivi

(Mr. 7.1-5)

37 Ña cahan nyaa ndo tsi nyivi, tacan tan Nyoo ña cua cahan nyaa ra tsi maa ndo. Ña catyi ndo tsa cahun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyivi. Tan Nyoo cua jaha ra tucahnu iñi tsi maa ndo.

38 Cuhva ndo tsa tsiñi ñuhu tsi nyivi. Tacan tan cua cuhva tucu maa Nyoo tsa tsiñi ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyivi, tacan cuhva cua cuhva Nyoo tsi ndo —catyi ra Jesús.

39 Tan tsaha ra Jesús cuhva ihya tsi ñi, tan catyi ra:

—Iin ra cuaa ña cuvi janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuvi canacava ra naha tsitsi iin xahva.

40 Ndi intuhun ra cutuhvá ña cua cuvi coto ra tsa tsitó

ra jacuahá tsi ra. Tyin ndi quitsaha cahvi ra. Cua coto ra nda ndihi cahvi ra.

41 '¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un?

42 Tatun tinuu maa un nyii iin yutun cahnu, ¿nacaa cua cuvi catyi un tsihin ra yañi un: “Ñaha, na tava yu tsahan luhlu tsa nyii tinuu un.”? ¡Yooho tsa jahá tyin vaha xaan un! Tava jihna yutun cahnu tsa nyii tinuu maa un. Tyin tacan tan cuvi nyehe vaha un tsahan luhlu tsa cua tava un tinuu yañi un.

Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuvi ñi

(Mt. 7.17-20; 12.34-35)

43 Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha.

44 Tandihí yutun nacotó yo tsi tun tsihin tsiti tun. Tyin tiñata, ña cua cuhva tun mangu. Tan ndi intuhun iñu nduuhva ña cua cuhva tun uvas [tsa cuvi yucu vixi].

45 Tan tacan tandihí nyivi vaha, vaha caahán ñi, tyin yihí tsa vaha añima ñi. Maa tyin nyivi ña vaha, maa ñi maa tsá ña vaha caahán ñi tyin yihí tsa caquiñi añima ñi. Tyin tsihin yuhu yo caahán yo tandihí tsa quitá tsitsi añima yo.

Cua cacu nyivi tsa tyaá yahvi tuhun caahán ra Jesús,

tan nyivi ña tyaá yahvi tsa caahán ra, ña cua cacu ñi
(Mt. 7.24-27)

⁴⁶ ¿Nacuenda catyí ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu?

⁴⁷ Vityin cua catyi yu tsihin ndo yóo ndacú nyooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyi yu.

⁴⁸ Cuví ndo tumaa cuví iin ra tsitó janduvita vehe. Tyin jihna ca tahvĭ cunu xaan ra tan tahán ra yuu. Tan tyaá ra tyihyo tsaha vehe can tsata yuu can. Tan quivĭ nduñihĭ cuún savi, ndutya can tsatyá xaan tsi tsaha vehe, maa tyin vehe can ña tanĭ maa tsi tyin vaha xaan quita tyihyo tsaha tsi.

⁴⁹ Maa tyin nyivi tsa tsiñí tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quivĭ tsaá savi, tan cuñihĭ cuún savi, tan yaha ndutya cuaha tsaha vehe can. Tan vehe can, iin yaha ñi tanĭ tsi —tacan catyi ra Jesús.

7

Nu janduvaha ra Jesús musu iin ra capitán andarū
(Mt. 8.5-13)

¹ Ndihi cahan ra Jesús tsihin nyivi, tacan tan cuanuhu ra inga tsaha nda ñuu Capernaum.

² Tan ñuu can iyó iin ra capitán. Tan iyó iin musu ra

tsa cuñí xaan ra. Tan cuuhví ra can. Tan tsa cuñí cúu ra.

³ Tan tsa tsitó ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra.

⁴⁻⁵ Tacan tan tsaá ra tsahnu ican naha ra nu nyíi ra Jesús. Tan quitsaha caahán ndaahvi ra naha tsihin ra tan catyi ra naha:

—Iyó iin ra capitán cuenda ñuu Roma. Tan vaha xaan nyivi cuví ra tsihin yo tsa cuví yo nyivi Israel. Nda cuanda javahá ña ra iin vehe ñuhu yo. Tan taahán tsi tyin jatyyinee un tsi ra. Tyin cuuhví xaan musu ra. Tan cuñí ra tyin janduvaha un tsi ra.

⁶ Tacan tan cuahán ra Jesús tsihin ra naha. Maa tyin tsa ndi cumañi ca tsaá ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaá ra naha nu nyíi ra Jesús. Tan catyi ra naha tsihin ra Jesús:

—Taa, catyi ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyi ra.

⁷ Yacan ña cana iñi ra quitsi ra nu nyíi un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyi ra?

⁸ Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tava tyiñu ra tsi iin ra cuatyí ican, na cuhun

ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

⁹ Tsa tsiñi ra Jesús tsa cahan ra can naha ra, tan iyo xaan cuñí ra. Tan nanyehe ra tsi nyivi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

¹⁰ Tacan tan cuanuhu ra vaha iñi tsi ra capitán can naha ra. Tan tsa tsaá ra naha nda yuvehe, tan nyehe ra naha tyin tsa nduvaha musu ra.

Nu janandotó ra Jesús tsi sehe iin ñaha ndaahvi tsihi yii

¹¹ Tsa yaha yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyivi.

¹² Tacan tan cuhva tsa cua tsaá ra yatyin ñuu ican, nyehe ra tyin cuaha xaan nyivi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihi yii. Tan intuhun ñi maa ra cuví sehe ña, tan tsihi ra.

¹³ Tan tsa nyehe ra Jesús tsi ña, tan cundaahvi iñi ra nyehe ra tsi ña. Tan catyí ra tsihin ña:

—Ña vacu un.

¹⁴ Tsahan natuhva ra tan tijn ra tsatun tsa nyii ndiyi can. Tacan tan ra nyisó tsi ndiyi can naha ra tsicuiñi ra naha. Tan catyí ra Jesús tsihin ndiyi can:

—Ndúvita, yooho ra tyuvaa —catyí ra.

¹⁵ Tacan tan nduvita ndiyi can. Tan nacunyaá ra. Tacan tan quitsaha caahán ra. Tan ra Jesús nacuhva cuenda ra tsi ra tsi sihi ra.

¹⁶ Tsa nyehe ñi tsa tacan nandoto ra jaha ra Jesús tan yuuhvi xaan ñi, tan quitsaha jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaá nu yucú yo ihya.

Tan catyí tucu ñi:

—Maa Nyoo cuví ra vatsi nu iyó yo, vatsi jatyinyee ra tsi yo —catyí ñi.

¹⁷ Tan tandihi maa nyivi tani cahnu Judea, tsito ñi tsa javaha ra Jesús.

Nu jacuhun ra Juan uvi taahan ra tsa tsicá tsihin ra nu nyii ra Jesús

(Mt. 11.2-19)

¹⁸ Tan ra tsicá tsihin ra Juan naha ra nacatyí tuhun ra naha tsa javaha ra Jesús. Tacan tan cana ra Juan tsi uvi taahan ra naha.

¹⁹ Tan tava tyiñu ra tsi ra naha na cahun ra naha nu nyii ra Jesús, tan ndaca tuhun ra naha tsi ra tatun juvin ra cuví Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra.

20 Tacan tan ra tsa jacuhun ra Juan, cuahán ra naha. Tan tsaá ra naha nu nyíí ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

21 Tan tsa ndi yucú ra tsa jacuhun ra Juan naha ra tan cuaha xaan nyívi cuuhví janduvahá ra Jesús. Tan tacan tucu nyívi yihí tatyí ña vaha. Tan cuaha tucu nyívi cuaa nanyehe ñi jahá ra.

22 Tacan tan catyí ra Jesús tsihin ra tsa jacuhun ra Juan naha ra:

—Cuahaan ndo. Tan nacatyí tuhun ndo tsihin ra Juan tandihi tsa nyehe ndo, tan tandihi tsa tsiñi ndo. Tan catyí ndo tsihin ra: ra cuaa nanyehe ra, ra coxo nacaca ra, ra ndohó cuehe tyaaahyú nduvahá ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyí ndo tsihin ra tyin

23 sñi xaan cuñi ñi nyicún tsi yu tun ña ndu uví ñi —catyí ra Jesús tsihin ra naha.

24 Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyívi. Tan catyí ra:

—¿Náa nyehe ndo quivi tsahan ndo nuu tsiqui ndii ican? ¿A nyehe ndo iin ndoo tsa janduvá tatyí?

25 ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey.

26 ¿A ña nyehe ndo tsi iin ra cuví ndusu yuhu Nyoo? Juvin. Cahnu ca cuví ra tan ñavin ca ra ndusu yuhu Nyoo.

27 Juvin ñi tuhun ra Juan cuví tsa nyaá nuu tutu tsa tyaa ra Isaías tahañ tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cahun un.

Na natyiso vaha ra ityi nu cua cahun un.

28 "Tan catyí yu tsihin ndo tyin tsitsi tsa tandihi ra tsa cacu jahá ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

29 "Tandihi nyívi tan ra tava xuhun naha ra, tsa tsicoondutyá jahá ra Juan, nacoto ñi tyin cuhva javahá Nyoo, cuii xaan tsi.

30 Maa tyin tandihi ra fariseo tsihin ra maestro cuenda ley vehe ñuhu, ña cuñi ra naha tsa jacoondutyá ra Juan tsi ra naha, tyin ña cuñi ra naha quihin ra naha tsa tsahá Nyoo tsi ra naha —catyí ra Jesús.

31 Tan catyí tucu ra:

—¿Náa cua jandu inducu yu tsihin nyooho, nyívi iyó quivi

ihya? ¿Yóo caá tumaa caá ndo?

³² Tumaa ra nyihi cuví nyooho. Tyin ra nyihi jasiquí nuyahvi. Tan caná tsaá tahan ra naha, tan catyí ra naha: “Tiví ndi tiyoo tan ña tsañi ndo yaa. Tan tsita ndi yaa cuihya, tan ña tsacu ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán iñi ndo.]

³³ Tyin ra Juan, ra jacoondutyá, quítsi ra tan ña tsatsí vaha ra. Tan ña tsihi ra vinu. Tan nyooho catyí ndo tyin tatyí ña vaha yihí tsi ra.

³⁴ Tan quítsi tucu yuhu tan cuví yu Rayi tsa quee nda gloria. [Tan tsatsí yu tan tsihi yu.] Tan nyooho catyí ndo tyin tsatsí xaan yu tan tsihi xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra.

³⁵ Maa tyin catyí yu tsihin ndo tyin tsa tsiñi tuñi Nyoo tsahá ra tsi nyivi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

Nu nyii ra Jesús vehe ra Simón ra cuví fariseo

³⁶ Iin ra fariseo tsa nañi Simón jacotó ra tsi ra Jesús tyin cuhun ra cucatsi ra nda yuvehe ra. Tan tsaá ra Jesús vehe ra, tan tsicunyaá ra nu mesa.

³⁷ Tacan tan iin ñaha sii iñi ñuu ícan tsitó ña tyin nyii ra

Jesús ícan. Tan tsaá ña tsihin iin yutyi yuu xiñu tsitú tsi ndutyá tami.

³⁸ Tan tsinyaá ña yatyin ñi tsaha ra. Tan quítsahá tsacú ña tyin ndu uví iñi ña cuatyí ña. Tan cuún ndutyá nuu ña. Tan tsihin ndutyá nuu ña nacatyá ña tsaha ra Jesús. Yahá can tan jana ityi ña tsaha ra tsihin ixi jiñi ña. Tan tyayuhú ña tsaha ra. Tacan tan tyosó ña ndutyá tami ícan tsata tsaha ra.

³⁹ Tsa nyehe ra fariseo can tsa tacan íca ña, tan tsicá iñi ra: “Tatun nditsa tsa Nyoo jaquítsi tsi ra ihya, cua nacoto ra yóo ñaha tñn tsaha ra, tyin ñaha ícan, ñaha iyó cuatyí cuví ña.”

⁴⁰ Tacan tan ra Jesús catyí ra tsihin ra fariseo ícan:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahan ra Simón, tan catyí ra:

—Vaha, cahan tsihin yu, Maestro —catyí ra.

⁴¹ Tan catyí ra Jesús tyehen tsihin ra:

—Uvi taahan rayi nyaá cuenda ra xuhun tsi iin ra tsa tuhvá tsahá nuu xuhun. Tan iin ra ícan nyaá cuenda ra uhun cientu denario. Tan inga ra nyaá cuenda ra uvi xico utsi ñi denario.

⁴² Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ícan, jahá ra tucahnu iñi tsi nduvi taahan ra naha. Tan vityin çatyí tsihin yu, yooho Simón, ¿ndáa ra cua cuñi ca tsi ra

tsa tsahá nuu xuhun ican? —catyí ra Jesús.

43 Tacan tan nacahan ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

44 Tacan tan nanyehe ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihya? Yuhu quihvı̄ yu tsitsi vehe un, tan ña tsahá un ndutya tsa ndoo tsaha yu tumaa cuhva tsa iyó yo. Tan ñaha ihya nacatya ña tsaha yu tsihin ndutya nuu ña. Tan jana ityi ña tsihin ixi jiñi ña.

45 Yooho ña tyayuhu un ndaha yu, tumaa cuhva tsa iyó yo, maa tyin maa ña nda cuanda tsa quihvı̄ yu ihya tan ña jandihı̄ ña tsa tyayuhú ña tsaha yu.

46 Tan yooho ña tyihı̄ un acetye jiñi yu, maa tyin ñaha ihya tyihı̄ ña ndutya tami tsaha yu.

47 Tan catyí yu tsihin un, yooho Simón, vasu cahnu xaan cuatyı̄ ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyı̄vi tsa jahá yu tucahnu iñi luxu ñi cuatyı̄ ñi, luxu ñi cuñi ñi tsi yu —catyí ra Jesús.

48 Tacan tan catyí ra Jesús tsihin ña can:

—Cuatyı̄ un tsa yahá cat-siyó, tyin tsa jahá Nyoo tuc-ahnu iñi tsi un —catyí ra Jesús tsihin ña.

49 Tacan tan ra yucú tsihin ra quitsahá tsicá iñi ra

naha: “¿Yóo ra cuvı̄ ra ihya? tyin jahá ra tucahnu iñi cu-atyı̄ nyı̄vi.”

50 Tacan tan catyí ra Jesús tsihin ñaha ican:

—Cuahan vityin, tsa cacu un tyin tsinu iñi un tsi yu. Cuahan tsihin tsa vaha —catyí ra tsihin ña.

8

Ñiñaha tsa jatyinyeé tsi ra Jesús

1 Tsa yahá can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tsihin nyı̄vi. Tan jacotó ra tsi ñi tuhun vaha nácaa cuñi Nyoo cun-daca ñaha ra tsi ñi. Tan tsa utsi uvi taahan ra tsa tava tyiñu ra, cuahán ra naha tsihin ra.

2 Tan cuahán tucu juhva ñiñaha tsa janduvahá ra: ñi cuhvı̄ tan ñi yihı̄ tatyı̄ ña vaha. Tan tsihin ñi cuahán ña María tsa quee ñuu Magdala, tan juvin ña cuvı̄ ña yihı̄ utsa tatyı̄ ña vaha tan nduvahá ña.

3 Tan cuahán tucu ña Juana, ñasihi ra Chuza, ra cumı̄ tyiñu cuenda ra Herodes, tan ña Susana tsihin tandihı̄ ca ñiñaha tsa jatyinyeé tsi ra Jesús tsihin tsa iyó tsi ñi.

Nu caahán ra Jesús tyin tu-maa iin ra tatsı̄ tacan cuvı̄ ra caahán tuhun Nyoo

(Mt. 13.1-9; Mr. 4.1-9)

4 Tan cuaha xaan nyı̄vi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nyecú, tan quitsahá caahán

ra tsihin ñi tsihin iin cuhva tsahā cuenda ra, tan catyí ra:

⁵ —Quita iin ra vehe ra. Cuahán ra nu iyó tyiñu jahá ra, tyin cua tatsi ra tsiti trigu nu ñuhu ra. Tan cuhva tsa tatsí ra quití ra tsiti can, tan cucoyo juhva yuhu ityi. Tan tsañi nyivi tsata can. Tan quitsi saa tan tsatsi ti.

⁶ Tan juhva ca tsiti can cucoyo tyañu yuu. Canā tsiti ican. Maa tyin na ityi tsi tyin luxu cuii ñi ñuhu yihí tsaha tsi. Tan nduve catsin.

⁷ Tan juhva ca tsiti cucoyo tyañu iñu. Maa tyin quivi canā trigu iin caa ñi tsihin iñu can, iñu can tsahñi tsi trigu can.

⁸ Maa tyin juhva ca tsiti cucoyo nu ñuhu vaha. Tan quivi tsahnu tsi, vaha xaan tsahā tsi tsiti. Tyin tsa iin ñi tsiti ican, cientu tsiti quita tsihin tsi —catyí ra Jesús.

Tan tsa yahā tsahā ra cuhva can, tan quitsahā caná tsaa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacoto ra Jesús nacuenda jacuahá ra tsi nyivi tsihin cuhva caahán ra tsihin ñi

(Mt. 13.10-17; Mr. 4.10-12)

⁹ Yahā can tan ra tsicá tsihin ra, nducu tuhun ra naha tsi ra náa cuñi tsi catyí cuhva tsa cahan ra tsihin nyivi.

¹⁰ Tacan tan catyí ra tsihin ra naha:

—Tsi nyooho jacotó Nyoo tuhun xeehe, nácaa ndacá ñaha ra. Maa tyin tandihí ca ñi

ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñi ñi maa tyin ña cua cutuñi iñi ñi náa tuhun cuví can.

Nu tsahā cuenda ra Jesús cuenda ra tsa tatsí

(Mt. 13.18-23; Mr. 4.13-20)

¹¹ Cuhva tsa tsahā yu tsi ñi, cuñi tsi catyí tsi tyehen: tsiti can, tuhun Nyoo cuví tsi.

¹² Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsi nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi.

¹³ Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Sii xaan naquihin vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsahā nyehé ñi tundoho, tan jandihí ñi tsa tsinú iñi ñi.

¹⁴ Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasamā ñi cuhva iyó ñi. Tyin yihí ñi, tyaa ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi sii ca cuñi ñi tsihin tsa sii caá tsa iyó nu ñuhu ñayivi. Tan cuví ñi tumaa cuví yutun tsa ña tsahā tsiti.

¹⁵ Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha aña ñi tyin tsinú iñi ñi tsihin tanñi aña ñi.

Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihi tuhun caahán ra.

*Nu cahan ra Jesús tyin ña cua tyihi xeehe yo ñuhú tsajan-
dunditsín Nyoo añima yo coto
quinyaa ra itsi*

(Mr. 4.21-25)

¹⁶ Ndi intuhun yo ña tyaá yo ñuhú tyuma tan tyihí xeehe yo xuu tsito a inga nu xeehe. Tyaá yo ñuhú tyuma maa tyin tsaquín nyaa yo can iin nu sucun, tacan tan quihví nyivi tsitsi vehe maa tyin nditsin.

¹⁷ Tyin nduve iin tsa nyii xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo.

¹⁸ Yacan cuenda tyaá soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaá soho ndo, tacan tan cua quinyaa Nyoo nda cuanda tsa luxu ñi tsa cuñí maa ndo tyin cumí ndo.

*Nu tsaha cuenda ra Jesús tyin tumaa yañi ra, tan tumaa
sihi ra, tacan cuví nyivi tyaá
yahvi tuhun Nyoo*

(Mt. 12.46-50; Mr. 3.31-35)

¹⁹ Tacan tan tsaá sihi ra Jesús tsihin yañi ra nu nyii ra. Maa tyin ña cuví tsaá ñi tyin tuvi xaan nyivi.

²⁰ Tacan tan jacoto nyivi nyecú ican tsi ra Jesús, tan catyí ñi:

—Sihi un tsihin ra yañi un naha ra nyecú ñi tsata vehe.

Tan cuñí ñi cahan ñi tsihin un.

²¹ Tacan tan nacahan ra Jesús, tan catyí ra:

—Tandihí maa nyivi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

*Nu jacutaxin ra Jesús tatyí
ñihi nu miñi*

(Mt. 8.23-27; Mr. 4.35-41)

²² Cuví tsi iin quivi quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican.

²³ Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaá tatyí ñihi xaan. Tan quitsaha tyihí tsi ndutya tsitsi yutun ndoo ican. Tan cuñí nyee yutun ndoo can tyin cuaha xaan ndutya quihví.

²⁴ Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñí nyee yo tsitsi ndutya —catyí ra naha.

Tacan tan nduvita ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi.

²⁵ Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhvi xaan ra naha. Tan iyo xaan cuñi ra naha. Tan quitsaha tsicá tuhun tahan ra naha:

—¿Yóo ra cuví ra ihya? Tyin nda cuando tatyí tan ndutya tan tyaá yahvi tsi tsa caahán ra.

Nu nduvahá iin ra yihí tatyí ña vaha nda Gadara (Mt. 8.28-34; Mr. 5.1-20)

²⁶ Tacan tan tsaá ra naha nda Gadara tsa canyíi yuhu miñi ityi nuu Galilea tsa canyíi inga tsiyo miñi can.

²⁷ Tan quita ra Jesús tsitsi yutun ndoo ican. Tan ican tsaá iin ra ñuu tsa canyíi Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu.

²⁸⁻²⁹ Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyivi iyó. Ra ican tsaá ra nu nyi ra Jesús. Tan cuhva tsa nyehe ra can tsi ra Jesús, tsicuiñi tsiti ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin

ra Jesús tava tyiñu ra tsi nu tsa quita nu tsi ra ndaahvi ican.

³⁰ Tan nducú tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.]

³¹ Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehe nahnu tundoho tan ña cuvi maa quita nahnu.

³² Tan tsican nahnu tsi ra Jesús na cuhva ra quihvi nahnu tsitsi quini tsa yucú yuhu miñi ican tsatsí ti naha ti. Tacan tan tsahá ra Jesús ndatu tsa quihvi nahnu tsitsi quini ican naha ti.

³³ Tan quita nahnu tsi ra ndaahvi can. Tan quihvi nahnu tsitsi quini ican naha ti. Tacan tan tsinu quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

³⁴ Tacan tan ra jahá cuenda tsi quini ican naha ra, nayuhvi xaan ra naha. Tan tsinú ra naha cuahán ra naha cua nacatyí tuhun ra naha tsa cuvi can tsihin nyivi nda ñuu. Tan tandihí ñi nyivi tsa nyehe ra naha, tan nacatyí tuhun ra naha tsa cuvi ican.

35 Tacan tan tsahan nyivi tsinyehe ñi náa tsa cuvi, tan tsaá ñi nu nyii ra Jesús. Tan nañihí ñi tsi ra tsa tsa yaha quitá tatyí ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñí jiñi ra. Tan nayuhvi xaan ñi cuvi.

36 Tacan tan tandihí ñi tsa nyehe tsa cuvi ican, nacatyí tuhun ñi tsihin tandihí ca nyivi nácaa quitá tatyí ña vaha tsi ra ndaahvi can, tan nduvahá ra.

37-39 Tacan tan tandihí nyivi iyó Gadara can quitsahá caahán ñi tsihin ra Jesús na cunuhu ra ityi nu quee ra. Tyin nayuhvi xaan ñi tsa javahá ra tsihin nu tatyí ña vaha ican. Tacan tan ra tsa quitá nu tatyí ña vaha can nahnu, cahan ndaahvi ra tsihin ra Jesús, na cuhva ra cuhun ndihí ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihí tsa javahá Nyoo tsihin un —catyí ra.

Tacan tan ra Jesús quihvi ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvahá ican, cuanuhu ra nda ñuu ra. Tan ityi cuahán ra nacatyí tuhun ra tsihin tandihí nyivi ñuu ican nácaa janduvahá ra Jesús tsi ra.

Nu nduvahá ña sehe ra Jairo tan ñaha tsa tñin jahma ra Jesús

(Mt. 9.18-26; Mr. 5.21-43)

40 Quivi tsa tsaá ra Jesús inga tsaha tsa tsahan ra inga

tsiyo miñi can, cuaha xaan nyivi ndatú tsi ra. Tan sñi xaan cuñí ñi tyin tsaá nyico ra.

41 Tacan tan tsaá iin ra tsa nañí Jairo, ra cuví ityi nuu vehe ñuhu, tan tsicuiñi tsiti ra nuu ra Jesús. Tan quitsahá caahán ndaahvi ra tsihin ra na cuhun ra vehe ra.

42 Tyin iyó iin ñaha sehe ra, tan iyó utsi uvi cuiya ña. Tan tsa cuñí cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi.

43 Tan tsihin nyivi ican cuahán iin ñaha cuuhví. Tsa iyó utsi uvi cuiya ndohó ña cuehe tsa cuún niñi ña. Tan tsa ndihí maa xuhun ña janaa ña tsihin doctor tan ña nduvahá ña.

44 Maa tyin tsaá ña nu cuahán ra Jesús, ityi tsata ra. Tan tñin ña jahma ra. Tan iin yaha ñi, tan tsicuiñi tsa cuún niñi ña.

45 Tacan tan catyí ra Jesús:
—¿Yóo tñin jahma yu?
Tan tandihí ñi cuahán tsihin ra catyí ñi:

—Yoñi.

Tan ra Pedro tsihin ra cu-tahan tsihin ra, catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tñin jahma yu?” —catyí ra naha.

46 Maa tyin ra Jesús catyí ra:
—Tsitó maa yu tyin iyó iin nyivi tñin jahma yu, tyin tuví

iñi yu cuahán juhva tunyee iñi tsa iyó tsi yu —catyí ra.

⁴⁷ Tacan tan ñaha can nyehé ña tyin tsa tsitó ra. Tan quit-saha níhí ña tsihin tsa yuuhví ña. Tan tsicuiñi tsiiti ña nuu ra. Tan nacatyí tuhun ña tsihin ra nacuenda tiñ ña jahma ra, tan nácaa nduvaha ña iin yaha ñi ican. Tan tsiñi tandihi nyívi tsa nacatyí tuhun ña.

⁴⁸ Tacan tan catyí ra Jesús tsihin ña:

—Tsa nduvaha un tyin tsinú iñi un tsi yu. Cuaahan tsihin tsa vaha —catyí ra.

⁴⁹ Ndi caahán ca ra Jesús, tan tsaá ñi iin ra quee vehe ra Jairo, ra cuví ityi nuu vehe ñuhu. Tan catyí ra tsihin ra Jairo:

—Sehe un tsa yaha tsihi ña. Ña cuhva ca un tsihi tsi ra Maestro ihya —catyí ra.

⁵⁰ Maa tyin tsa tsiñi ra Jesús tsa cahan ra ican, tan catyí ra tsihin ra Jairo:

—Ña nyuhvi un. Tsinu iñi. Tan ña sehe un cua nduvaha ña —catyí ra.

⁵¹ Tan cuhva tsa tsaá ra Jesús vehe ra Jairo, ña tsaha ra quihvi nyívi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvi ñi tsitsi vehe nu canyí ñaha luhlu tsa tsihi can.

⁵² Tan tandihi ñi tsacú xaan ñi tsa cuenda tyin tsihi ña. Maa tyin ra Jesús catyí ra tsihin ñi:

—Ña vacu ca ndo. Tyin ña tsihi ña. Quixí ña —catyí ra.

⁵³ Maa tyin tsacú naaha ñi tsa caahán ra tacan. Tan ña

tsinú iñi ñi, tyin tsitó ñi tyin tsa tsihi ña.

⁵⁴ Tacan tan tiñ ra Jesús ndaha ña. Tan tsa nacahan ra tan catyí ra tsihin ña:

—Nduvita, ñaha luhlu —catyí ra.

⁵⁵ Tacan tan nandoto ña. Tan iin yaha ñi nduvita ña. Tan catyí ra Jesús:

—Cuhva ndo tsa catsi ña.

⁵⁶ Tan jutu ña tsihin sihi ña, iyo xaan cuñi ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuví ican.

9

Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo

(Mt. 10.5-15; Mr. 6.7-13)

¹ Cana ra Jesús tsa utsi uvi taahan ra tsicá tsihin ra. Tan tsaha ra tunyee iñi cahnu tsi ra naha tyin cuvi tava ra naha tatyí ña vaha tsi nyívi, tan cuvi janduvaha ra naha tsi nyívi cuuhví.

² Tan tava tyiñu ra tsi ra naha na cahan ra naha nácaa ndacá ñaha Nyoo tsi nyívi. Tan tava tucu ra tyiñu tsi ra naha na janduvaha ra naha tsi nyívi cuuhví.

³ Tan catyí ra tsihin ra naha:

—Nduve tsa cuiso ndo ityi cuhun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cuhun tsihin ndo.

⁴ Tan ndáa cuví ñi vehe tsa ndo, ndo ndo ican nda

cuanda quita quivi tsa cuhun ndo inga ñuu.

⁵ Tan nu ña cuñi nyivi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndoó cuatyí ñi siqui ñi —catyí ra Jesús tsihin ra naha.

⁶ Tacan tan cuahán ra naha tandihi maa ñuu. Tan caahán ra naha tuhun Nyoo tan nácaa cuñi tsi tan cacu ñi. Tan janduvahá ra naha tsi nyivi cuuhví.

Nu cuñi ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyivi

(Mt. 14.1-12; Mr. 6. 14-29)

⁷ Ra Herodes, ra cuví ra ndacá ñaha [tanií cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyivi catyí ñi tyin ra Juan nandoto.

⁸ Tan yihí ñi catyí ñi tyin ra Elías quituvi nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto.

⁹ Maa tyin catyí ra Herodes:
—Maa maa yu tyihí tyiñu tsa tyahnya jucun ra Juan. Tun tacan, yóo ra cuví ra tsa caahán xaan nyivi tuhun catyí ñi tsiñí yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

Nu tsahá ra Jesús tsa catsi uhun mil rayí

(Mt. 14.13-21; Mr. 6.30-44; Jn 6.1-14)

¹⁰ Tan cuhva tsa tsaá nyico ra tava tyiñu ra Jesús, tan nacatyí tuhun ra naha tsihin ra Jesús tandihi maa tsa cuví nu tsahan ra naha. Tacan tan tava siin ra Jesús tsi ra naha tan cuahán ra naha yatyin ñi iin ñuu tsa nañí Betsaida.

¹¹ Maa tyin cuhva tsa ñihí tuhun nyivi tyin cuahán ra Jesús ndacan, tan cuahán ñi nda nu nyii ra. Tan naquihin cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyivi cuuhví.

¹² Tan tsa tseñi cuí ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyivi ihya, na cunuhu ñi na quitatu ñi, na nanducu ñi tsa catsi ñi ñuu tsa canyí yatyin ñi ihya, tyin ihya nduve maa tsa catsi yo iyó —catyí ra naha.

¹³ Tacan tan catyí ra Jesús tsihin ra naha:

—Cuhva nyooho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihí tsa catsi tandihi nyivi ihya. Ndi maa cuhun ndi cujata ndi, maa tyin ña cua ñihí tsa catsi ñi tyin cuaha xaan ñi —catyí ra naha.

¹⁴ Tyin vasiqui quitá maa uhun mil rayí yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin iin nu cunyecu ñi.

15 Tacan tan tsicunyecu tandihí ñi jahā ra naha.

16 Tan quihin ra Jesús uhun taahan paan ican tsihin uvi taahan tyaca ican. Tan nanyehē ndaa ra ityi andivi, tan nacuhvā ra tyahvi nyoo tsi Nyoo tsa cuenda can. Tan tsahnyā sava ra paan tan tyaca ican. Tan tsahā ra tsi ra tsicá tsihin ra, na tsatsa ra naha can tsi nyivi.

17 Tacan tan tandihí ñi tsatsi ñi, tan ndaha vaha iñi ñi. Yahā can tan ndoo ca tsa ñahñu, tan jacutu ra naha utsi uvi taahan tyica tsihin tsa ñahñu ican.

Nu catyi ra Pedro tyin ra Jesús cuví ra Cristo, ra jacacú tsiyo

(Mt. 16.13-19; Mr. 8.27-29)

18 Iin quivi quitā sñin ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndihí tsican tahvi ra, tan tsicā tuhun ra tsi ra tsicá tsihin ra tan catyi ra tsihin ra naha:

—¿Náa catyi nyivi tuhun yu, yoo ra cuví yu, catyi ñi?

19 Tan nacahan ra tsicá tsihin ra, tan catyi ra naha:

—Yihí ñi catyi ñi tyin ra Juan, ra jacoondutyā tsi nyivi, cuví un. Tan yihí ñi catyi ñi tyin ra Elías cuví un. Tan yihí ñi catyi ñi tyin inga ra cuví ndusu yuhu Nyoo tahanan tsanaha cuví un —catyi ra naha.

20 Tacan tan nducu tuhun ra Jesús tsi ra naha, tan catyi ra:

—Tan nyooho, ¿yoo ra cuví yuhu, cuñi maa ndo?

Tan nacahan ra Pedro, tan catyi ra:

—Yooho cuví ra Cristo, ra tsa quee nu nyaá Nyoo.

21 Tan catyi ra Jesús tsihin ra naha tyin ña cahan ra naha can tsihin nyivi.

Nu jacoto ra Jesús nácaa cua cahñi nyivi tsi ra

(Mt. 16.20-28; Mr. 8.30—9.1)

22 Tacan tan catyi ra tsihin ra naha inga tsaha:

—Yuhu Rayi tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quivi cua nandoto yu —catyi ra Jesús.

23 Tacan tan catyi ra tsihin ra naha:

—Nyooho tsa cuñi cunyi-cun tsi yu, cahnya iñi ndo tsa cuñi maa ndo javaha ndo, tacan tan cuví javaha ndo tsa cuñi Nyoo. Ña ndu uvi iñi ndo tsa yihí ndo cuenda yu vasu tandihí quivi nyehé ndo tundoho. Tyin yacan cuví tumaa cruu tsa taahán tsi cuiso ndo tatun cua cunycun ndo tsi yu.

24 Tan nyooho tsa ña cuñi nyehe tundoho tan ña cuñi ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi iyó ndo tsa cuenda yu, cua cacu ndo.

25 Nduve yahvi nyaá cua ñihi ndo tandihí tsa iyó nu ñuhu ñayivi ihya, tun ña cua cacu añima ndo.

26 Tyin tatun cahan nuu ndo tsa xaan cuñi nyivi nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsa quivi quitsi yu inga tsaha. Tyin cua quitsi nyico yuhu Rayii tsa quee nda gloria tsihin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra.

27 Tan tsa nditsa catyí yu tsihin ndo tyin yihí ndo tsa nyecú ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo (Mt. 17.1-8; Mr. 9.2-8)

28 Una quivi yaha tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra.

29 Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Sii xaan cuitsin tsi tan xiñu tsi.

30 Tacan tan quituvi uvi taahan ra natuhún tsihin ra, ra Moisés tan ra Elías.

31 Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra.

32 Tan vasu cuñi xaan ra Pedro naha ra cusu ra naha, maa tyin ña quixi maa ra

naha tyin nyehé ra naha tsa nditsin cuví nu nyaá ra Jesús tsihin ra nyecú tsihin ra.

33 Cuhva tsa cuahán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

34 Tan tsa ndi caahán ca ra tan quitsi iin vico siqui ra naha. Tan nayuhvi xaan ra naha tsa quihvi ra naha tsitsi vico ican.

35 Tacan tan tsitsi vico ican tsiñi ra naha iin ndusu tsa catyí:

—Juvín ra ihya cuví Sehe yu, tan cuñi xaan yu tsi ra. Tyaa soho ndo tsa caahán ra —catyí ndusu ican.

36 Tan tsa yaha cahan ndusu ican, tan nanyehe ra naha tyin intuhun ña maa ra Jesús nyaá ican. Tan yoñi maa tsihin cahan ra naha tsa nyehe ra naha.

Nu janduvaha ra Jesús tsi iin ra luhlu tsa yihí tatyí ña vaha

(Mt. 17.14-21; Mr. 9.14-29)

37 Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra.

38 Tacan tan cana tsa iin ra cuahán tsihin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu.

39 Tan tuhvá tatyí ña vaha quihví tsi ra. Tan tuhvá ra caná tsaa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra.

40 Tsa cahān yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tavā ra naha tsi nu —catyí ra.

41 Tacan tan nacahān ra Jesús tan catyí ra:

—Nyooho, nyivi ña tsinú vaha iñi. Tan caquiñi ndo. ¿Najava taahan ca quivi cun-yaa yu tsihin ndo tan cun-yehe iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndāca sehe un tsi yu.

42 Tan cuhva tsa natuhvā ra luhlu can nu nyaá ra Jesús, tan janduvā nu tatyí ña vaha ican tsi ra ndasava. Maa tyin ra Jesús tavā ra tsi nu tatyí ña vaha ican. Tan janduvahā ra tsi ra. Tacan tan nacuhvā cuenda ra tsi ra tsi jutu ra.

43 Tan tandihi nyivi, iyo xaan cuñí ñi tsa cahnu tsa javahā Nyoo nu yucú ñi.

Tsitsi tsa iyo cuñí nyivi tsa javahā ra Jesús, tan catyí ra tsihin ra tsicá tsihin ra:

Nu cahān ra Jesús inga tsaha tyin cua cahñi nyivi tsi ra

(Mt. 17.22-23; Mr. 9.30-32)

44 —Tyāa soho vaha ndo tuhun caahán yu. Tan ña naa iñi ndo. Tyin Rayi tsa quee nda gloria, cua cuhva cuenda

nyivi tsi ra tsi ra xaan iñi tsi ra —catyí ra Jesús.

45 Maa tyin ra tsicá tsihin ra ña cutuñí iñi ra naha nacuenda cahān ra tacan. Tyin Nyoo ña tsahā ra tsa cutuñi iñi ra naha. Tan yuuhví ra naha nducu tuhun ra naha tsi ra Jesús náa cuví tsa caahán ra.

Nu janahā ra Jesús yóo ra tsa cahnu ca cuví nu ndacá ñaha Nyoo

(Mt. 18.1-5; Mr. 9.33-37)

46 Tacan tan ra tsicá tsihin ra quitsahā caahán yuhu tahan ra naha, ndāa ra cahnu ca cuví tsitsi tsa utsi uvi taahan ra naha.

47 Tan tsitó ra Jesús tsa tsicá iñi ra naha, tan quihñi ra iin ra luhlu.

48 Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi tsi yu, naquihín cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

Nyivi tsa ña cuxaán tsi yo, juvin ñi ican jatyinyeé tsi yo

(Mr. 9.38-40)

49 Tacan tan ra Juan catyí ra tsihin ra Jesús:

—Maestro, nyehe ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsahā ca ndi javaha ra tacan. Tyin

ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahan ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

⁵¹ Tuví iñi ra Jesús tyin tsa nyaa naa yatyin quivi tsa cunuhu ra gloria. Tan jandu iin ra iñi ra, tan quihin ra ityi tan cuahán ra ñuu Jerusalén.

⁵² Tan tava tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús.

⁵³ Maa tyin nyivi Samaria ican, ña cuñi ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñi ñi nyehe ñi tsi nyivi ñuu Jerusalén.

⁵⁴ Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñi un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñi ñi tsa ndoo yo ñuu ñi —catyí ra naha.

⁵⁵ Tacan tan nyehe ra Jesús nuu ra naha. Tan cuxaan ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñi iñi ndo náa tyiñu vatsí yuhu.

⁵⁶ Tyin Rayi tsa quee nda gloria, ña vatsí ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

Nyivi tsa cuñi quihvi cuenda ra Jesús (Mt. 8.19-22)

⁵⁷ Tan tsitsi tsa tsicá ityi ra naha, quita iin ra, tan catyí ra tsihin ra Jesús:

—Jutu Mañi yu, cuñi yu cunyicun yu tsi un. Tan cuhun yu tsihin un tandihi ñi ityi cuhun un —catyí ra.

⁵⁸ Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayi tsa quee nda gloria ndi nu cava jiñi ra tan nduve iyó —catyí ra tsihin ra ican.

⁵⁹ Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, cūatu nuu tsi yu, na cuhun jihna yu cucutsi yu tsi jutu yu —catyí ra.

⁶⁰ Tacan tan ra Jesús nacahan ra tan catyí ra tsihin ra:

—Nācoo tsi nyivi ña iyó Nyoo aña na cucutsi tahan maa ñi tsi ñi tsitsi ñuhu tun tsihi ñi. Maa tyin yooho cuaahan cahan un tuhun Nyoo tsihin nyivi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

⁶¹ Tacan tan catyí inga ra tsihin ra Jesús:

—Cuñí yu cunyicun yu tsi un, tata. Maa tyin cūhva na cuhun jihna yu cucahan yu tsihin nyivi vehe yu —catyí ra.

⁶² Tan ra Jesús catyí ra tsihin ra:

—Tumaa iin ra tahví ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñí nyico ra tsa tsa nacoq ra, ña cuvi cūhva ra tsi ra cundaca ñaha Nyoo —catyí ra Jesús tsihin ra.

10

Nu tava ra Jesús tyiñu tsi uñi xico utsi taahan ra cua cahan tuhun Nyoo tsihin nyivi

¹ Tsa yaha can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihi ñi ñuu, uvi uvi ra cuahan tsa iin nu cuahán ra nu cua cuhun ra Jesús.

² Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan ndo tuhun Nyoo tsihin nyivi.

³ Tan cuaahan ndo tan nyēhe ndo tyin cua jacuhun yu tsi ndo tumaa mbee mahñu lobo tsa cuví quití xaan. Tyin lobo tuhvá ti tsahñí tsi mbee. Tan tacan tucu cua cuñi nyivi cahñi ñi tsi ndo.

⁴ Tan ña cua cuiso ndo ndi marali tan ndi nu yihi xuhun

ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cūhva ndo nacumi tsi ñi tan ña cucuiñi ndo natuhun ndo tsihin ñi.

⁵ Cūhva tsa quihvi ndo tsitsi vehe iin nyivi, cahan ndo tsihin ñi. Tan catyí ndo, na coo tsa vaha añima ñi.

⁶ Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yoñi ñi vaha añima, ña cua ndoo tsa vaha tsihin ñi.

⁷ Tan ndoq ndo juvin ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa cōho ndo, cōho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsaa quivi tsa cuhun ndo inga ñuu.

⁸ Tan nu tsaa ndo iin ñuu tan vaha cahan ñi tsihin ndo, catsi ndo tandihi tsa cūhva ñi catsi ndo.

⁹ Tan janduvaha ndo tsi ñi cuuhví ñuu ican. Tan catyí ndo tsihin ñi: “Tsa nyanaá yatyin Nyoo, ra cuñi quihvi añima ndo cundaca ñaha ra tsi ndo.”

¹⁰ Maa tyin tatun tsaa ndo iin ñuu tan ña cuñi nyivi tyaa soho ñi tsa caahán ndo, quita ndo ityi cahnu. Tan catyí ndo tsihin ñi:

¹¹ “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñi tsi catyí tyin cuatyí ndo ndoó can siqui ndo. Tyin Nyoo nyanaá yatyin ra tsihin ndo tan ña tyaá soho

ndo tsa caahán ra nácaa cuñí tsi tsa cundaca ñaha ra tsi ndo.” Tacan catyí ndo tsihin ñi —catyí ra Jesús tsihin ra tsa uñi xico utsi can naha ra.

12 Tan catyí tucu ra tsihin ra naha:

—Quivi cua tatsi tuñi Nyoo tsi nyivi, yaha ca cuhva cua nyehe nyivi ñuu ican tundoho tan ñavin ca nyivi tsicoo tahan tsanaha ñuu Sodoma, —catyí ra Jesús.

Nyivi ña tyaá soho tuhun caahán ra Jesús cua nyehe ñi tundoho

(Mt. 11.20-24)

13 Tan catyí ra Jesús:

—¡Ndahvi nyooho, nyivi ñuu Corazin! Tan ¡ndahvi nyooho nyivi ñuu Betsaida! Tyin nyehé ndo tsa iyo javahá yu, tan ña cuñí ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuihya iñi tan cunyecu ñi nu nyaa: tsa ndu uvi iñi ñi cuatyí ñi cuví can.

14 Yacan cuenda, nyooho nyivi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can.

15 Tan nyooho nyivi ñuu Capernaum, cuñí maa ndo tyin cundaa ndo nda cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyí ra Jesús.

16 Tan catyí ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyooho, tsa caahán yuhu tyaá soho ñi. Tan nyivi ña tyaá soho tsa caahán nyooho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyí ra Jesús tsihin ra naha.

Nu tsaq nyico tsa uñi xico utsi ra tsa tsahan tsicahan tuhun Nyoo

17 Ihya cuví nu tsaq nyico tsa uñi xico utsi ra tsa tsahan tsicahan tuhun Nyoo tsihin nyivi. Tan sii xaan cuñí ra naha. Tan catyí ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa cahan ndi tsihin sivi un —catyí ra naha.

18 Tacan tan catyí ra Jesús tsihin ra naha:

—Tacan tyin yuhu nyehe yu andivi nu canacava nu ña vaha, nu nañi Satanás. Tumaa cañi iin tatsa savi, tacan canacava nu.

19 Tan maa yuhu, tsaha tunyee iñi tsi ndo tyin cuví cañi tahan ndo tsihin nu ña vaha. Tan cuví cañi ndo tsata coo tan tujuhma, tan nduve tsa cua jaha ti naha ti tsi ndo.

20 Maa tyin ña cusii xaan iñi ndo tyin cuví tava ndo tatyí ña vaha ican. Cusii ca iñi ndo tyin nyaá sivi ndo nu libru Nyoo nda gloria —catyí ra Jesús tsihin ra naha.

Nu jacahnú ra Jesús tsi Nyoo tsa s̄i cuñí ra tyin janahá Nyoo tsa vaha tsi nyivi ndaahvi

(Mt. 11.25-27; 13.16-17)

²¹Tacan tan s̄i xaan cuñí ra Jesús jahá Tatyí Ii Nyoo, tan catyí ra:

—Jacahnú yu tsi un, Jutu yu, tyin yooho cuví ra ndacá ñaha andivi tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñí maa un —catyí ra Jesús.

²²Tan catyí ra Jesús tsihin tandihi ra naha:

—Tandihi maa tsaha Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yóo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yóo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñí Sehe Nyoo jacoto ra tsi ñi —catyí ra Jesús.

²³Tacan tan nanyehe ra nu nyecú ra tsicá tsihin ra. Tan caahán xeehe ra tsihin ra naha:

—S̄i xaan cuñí nyoooho tan nyivi tsa iyó vityin tyin nyehé ndo tsa javahá yu.

²⁴Tyin cuaha xaan rey tan ra cuví ndusu yuhu Nyoo tahañ tsanaha, cuñi ra naha nyehe ra naha tsa nyehé nyoooho vityin. Maa tyin ña nyehe ra naha. Tan cuñi ra naha tyaa soho ra naha tsa tsiñi nyoooho vityin. Maa tyin

ñā tsiñi ra naha —catyí ra Jesús tsihin ra tsa tsicá tsihin ra.

Nu jacuahā ra Jesús tsi yo tyin taahán tsi jatyinyee yo tsi tandihi ñi maa nyivi

²⁵Tacan tan tsaā iin ra maestro cuenda ley vehe ñuhu. Tan quitsaha tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayivi nyito tsa ña cua naa maa?

²⁶Tacan tan nacahan ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

²⁷Tacan tan nacahan ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin taniñi añima yo tan tsihin tandihi cuhva tsicá iñi yo, tan tsihin tandihi tunyee iñi tsa iyó tsi yo, tan tsihin tandihi tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

²⁸Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

²⁹Maa tyin ra maestro cuenda ley can cuñi ra cuví ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

³⁰Tacan tan nacahan ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan tahan ra tsi nu ñasuhu nahnu. Tan suhu nahnu tandihí maa tsa nyisó ra, nda cuanda jahma ra. Tan cañi nahnu tsi ra nda cuanda tsaquin taxin ña nahnu tsi ra. Tan nacoq ihñi nahnu tsi ra ican.

³¹ Tacan tan yahá iin ra cuví jutu ityi can. Maa tyin tsa nyehe ra tsi ra canyii ican, ndasava ñi yahá tsiyo ra.

³² Tacan tan yahá tucu iin ra yihí cuenda vehe ñuhu, ra cuví tata ra Leví. Maa tyin tsa nyehe ra tsi ra canyii ican, juvin ñi ndasava yahá ra.

³³ Tacan tucu iin ra Samaria yahá ra juvin ñi ityi can. Tan nyehe ra tsi ra canyii ican, tan quitsi tsa ndaahvi cuñí ra nyehé ra tsi ra.

³⁴ Tan natuhva ra nu canyii ra, tan quitsaha tyaá ra numeri tsi ra, tyihí ra acetye tsihin vinu nu uhvi can. Tan tyaá ra iin jahma vita nu uhvi can. Yahá can tan jandaá ra tsi ra tsata burru jana ra, tan quihin ra tsi ra, cuahán tsihin ra nu nyaá iin vehe. Tan jahá cuenda ra tsi ra.

³⁵ Tan tsa inga quivi tsa cuñí cuhun ra Samaria. Tan tava ra uvi taahan xuhun. Tan tsaha ra tsi ra jatsii vehe can. Tan catyí ra tsihin ra: “Jaha cuenda vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñí ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

³⁶ Nu ndihí nacatyí tuhun

ra Jesús, tan nducy tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsi ra ndaahvi tsa tsinyaa ndaha nu ñasuhu nahnu? —catyí ra Jesús.

³⁷ Tacan tan catyí ra maestro ican:

—Ra tsa cundaahvi iñi tsi ra —catyí ra.

Tacan tan catyí ra Jesús:

—Cuahan tan ica tucu yooho tacan tsihin nyivi tsa nyehé tundoho —catyí ra.

Nu tsinyaa ra Jesús vehe ña Marta tsihin ña María

³⁸ Tan quihin ra Jesús ityi cuahán ra. Tan tsaá ra iin ñuu. Tan ican iyó iin ñaha tsa nañi Marta. Tan tsaá ra vehe ña. Tan tsaha ña quihvi ra tsitsi vehe ña.

³⁹ Tan ña Marta, iyó iin tahan ña nañi María. Tan ña María tsicunyaá ña yatyin ñi tsaha ra Jesús, tyin tyaa soho ña tsa caahán ra.

⁴⁰ Tan ña Marta cuaha xaan tyiñu javahá ña. Tan tsaá ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacoq ña tsi intuhun ñi maa yu tsihin tyiñu ihya? Cahan tsihin ña na jatyinyee ña tsi yu —catyí ña tsihin ra.

⁴¹ Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñi un tsihin tyiñu can.

⁴² Maa tyin iyó intuhun tsa ñiñi ca taahan tsi caca iñi yo. Tan ña María ihya nacatsi ña tyiñu vaha ca javahá ña.

Tan yoñi cuví quinyaa can tsi ña —catyí ra Jesús tsihin ña Marta.

11

Nu jacuahā ra Jesús tsi ra tsicá tsihin rá nácaa ndacan tahvi ra naha tsi Nyoo

(Mt. 6.9-15; 7.7-11)

¹ Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janahā ra Juan tsi ra tsicá tsihin ra —catyí ra.

² Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tyehen ndācan tahvi ndo, catyi ndo:

Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihi cuhva cuñi maa un, tumaa cuhva cuví nda gloria.

³ Cuhva tsa catsi ndi tan yaha ndi iin iin quivi.

⁴ Jaha tucahnu iñi tsi ndi tsa cuenda cuatyí ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan jacacu tsi ndi tan ña cua cunyeen nu ña vaha tsihin ndi.

Tacan ndācan tahvi ndo —catyí ra Jesús.

⁵ Tan catyí tucu ra:

—Na catyi yo tyin iin nyooho iyó iin ra vaha iñi tsi ndo, tan tsaā ra vehe ndo tsa tsa cuaa tan catyí ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu.

⁶ Tyin iin ra vaha iñi tsi yu ndi tsaā ra yuvehe yu. Tan cañi xaan quee ra. Tan nduve tsa cuhva yu catsi ra.”

⁷ Tan nyooho cua nacahan ndo tan catyi ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuví nduvita yu tan cuhva yu tsa cuhva yu tsi un tsa vityin.” Tacan cua catyi ndo tsihin ra.

⁸ Tan catyí yu tsihin ndo. Vasu ra vaha iñi ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsa ra tsi ndo tsa ña cua cuví cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo.

⁹ Tan tacan tucu nyooho tsihin Nyoo, ndācan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña.

¹⁰ Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

¹¹ Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi

tun tsicán tsi paan. Tan ña tuhvá ndo cuhva iin coo itsi tun tsicán tsi tyaca.

¹² Tan ña tuhvá ndo cuhva tujuhma tsi sehe ndo tatun tsicán tsi ndivi catsi tsi.

¹³ Nyooho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí Ii ra cunyaa añaima ndo tun ndacan ndo tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo (Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha tsa janduñhi tsi iin rayii. Tsa quita nu tatyí can tsi ra can, cuví nacahan ra. Tacan tan iyo xaan cuñí nyivi tsa nyehe ñi tsa cuví.

¹⁵ Tan yihí ñi catyí ñi:

—Ra ihya, tavá ra tatyí ña vaha tsihin tunyee iñi nu Beelzebú nu cuví ityi nuu tsihin tandihi tatyí ña vaha —catyí ñi.

¹⁶ Tan yihí ñi cuñí ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi.

¹⁷ Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihí tyiñu tsa ndacá ñaha ra naha. Tan tatun iin vehe tan natahvi nyivi tsihin tahan ñi, tacan tan cua tivi nu yucú ñi.

¹⁸ Tan tacan tucu nu ña vaha, tatun natahvi nahnu,

cua cundihí tunyee iñi tsa iyó tsi nahnu. Caahán yu tyehen tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu.

¹⁹ Maa tyin tun tsatyin tavá yu tsi nahnu tumaa cuhva catyí ndo, ndaca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo.

²⁰ Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñí tsi catyí yacan tyin nditsa tyin Nyoo, ra taahán tsi cundaca ñaha tsi nyivi, tsa tsaa ra nu yucú ndo.

Nu jacuahá ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

²¹ Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuví quinyaa ñasuhu.

²² Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

²³ Nyivi ña jahá tyiñu tsihin yu, jativí ñi tyiñu jahá yu. Tan tatun ña caahán ñi tuhun Nyoo tsihin nyivi, tyin cunyi-cun ñi tsi yu; cuñí tsi catyí tsi tyin ña tsahá ñi tsa cunyi-cun nyivi tsi yu.

Nu jacuahā ra Jesús tsi yo nácaa quihvi tatyí ña vaha tsi yo inga tsaha tatun naa iñi yo

²⁴ "Tatun iin nu tatyí ña vaha quitā nu tsi iin nyivi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: "Cunuhu nyico yu nda vehe yu nu quee yu."

²⁵ Tacan tan tsaā nyico nu añima nu quee nu. Tan nyehé nu tyin ndi xaan tan sii xaan caá.

²⁶ Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihi nahnu añima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyivi tsa nditsa iyó vaha ñi nu ñuhu ñayivi

²⁷ Tsitsi tsa ndi caahán ca ra Jesús yacan, tan canā tsaā iin ñaha tsa nyii mahñu nyivi ican. Tan catyí ña:

—¡Náa tsa sii cuñí ñaha tsa jacacū tsi un, ñaha tsa jacaxin tsi un! —catyí ña.

²⁸ Maa tyin ra Jesús catyí ra:

—Sii xaan ca cuñi nyivi tsa tsiñi tuhun caahán Nyoo tan tyaá yahvi ñi itsi —catyí ra.

Nyivi ña vaha, maa ñi maa tsa iyó cuñi ñi nyehe ñi

(Mt. 12.38-42; Mr. 8.12)

²⁹ Tacan tan tsaā ca nyivi nu nyii ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñí ñi nyehe jihna ñi tsa iyó. Maa tyin intuhun ñi

tsa iyó cua nyehe ñi, yacan cuví tsa javahā Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyó cua nyehe ñi.

³⁰ Tumaa tsa janahā ra Jonás tsi nyivi ñuu Nínive tañan tsanaha tyin ii Nyoo, tacan tucu yuhu, Rayi tsa quee nda gloria, janahá yu tsi nyivi tsa iyó vityin tyin ii Nyoo.

³¹ Quivi cua tatsi tuñi Nyoo tsi nyivi, cua nandoto ñaha cuví reina ityi sur tañan tsanaha, tan cua catyí ña tyin cuhun ndo anyaya tyin maa ña vasu cañi ñuu ña, maa tyin quitsi ña, quitsi tyaa soho ña tsa tsiñi tuñi tsa cañan ra Salomón. Tan vityin cahnu ca cuví ra nyaá tsihin ndo tan ñavin ca ra Salomón.

³² Tan quivi cua cutuñi tandihi nyivi, cua nandoto nyivi tsicoo ñuu Nínive tañan tsanaha, tan cua catyí ñi tyin nyooho nyivi tsa iyó vityin cuhun ndo anyaya, tyin nyivi Nínive ican, nasama ñi cuhva iyó ñi quivi cañan ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

Nu janahā ra Jesús tyin na jaha yo cuenda añima yo na coo tsa nditsin jahá Nyoo

(Mt. 5.15; 6.22-23)

³³ Ndi intuhun ndo tan ña tuhvá ndo tyaá ñuhu tyuma tan tyihí xeehe ndo can, a tinyii ndo can tsitsi iin caja. Tyin ñuhu can taahán tsi cunyii can nu sucun. Tyin tatun

quihvi nyivi tsitsi vehe ndo, nditsin.

³⁴ Tinuu yo, iin ñuhu nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añima yo. Tatun iyó tsa nditsin jahá Nyoo añima yo, vaha nyivi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo.

³⁵ Yacan cuenda jaha ndo cuenda tsi ndo, na coo tsa nditsin jahá Nyoo añima ndo, tan ña coo tsa naa.

³⁶ Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi tanii cahnu ndo. Tumaa tsa nyaá iin ñuhu tyuma jandunditsín tsi tanii cahnu ndo cuví can —catyí ra Jesús.

Nu cuxaan ra Jesús tsihin ra maestro cuenda ley vehe ñuhu naha ra tan tsihin ra fariseo naha ra

(Mt. 23.1-36; Mr. 12.38-40; Lc. 20.45-47)

³⁷ Tsa ndihí cahán ra Jesús tsihin nyivi, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaá ra Jesús vehe ra. Tan quihvi ra tsi cunyaá ra nu mesa.

³⁸ Tacan tan ra fariseo ican iyo cuñí ra tyin ña nacatyá ra Jesús ndaha ra tsa ndi cumañi ca catsi ra, tumaa cuhva iyó maa ra naha.

³⁹ Maa tyin Jutu Mañi yo Jesús catyí ra tsihin ra:

—Nyooho, ra cuví fariseo, tumaa tsa tsata ñi vasu tan

coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyooho. Tyin cuñí nyivi tyin vaha ndo. Maa tyin xeehe ñi suhú ndo tan javahá ndo tsa ña vaha.

⁴⁰ Ndava xaan iñi ndo. ¿A ña tsitó ndo tyin ra tsa javahá ityi tsata ndo, juvin ñi maa ra javahá ityi tsitsi ndo?

⁴¹ Taahán tsi javaha ndo tumañi iñi tsi nyivi ndaahvi, tan jatyinyee ndo tsi ñi tsihin tanii añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

⁴² ¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndihi ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaá yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñi vaha ca ndo tsi Nyoo tan javaha ndo cuhva cuñi ra, tan ña jandihí ndo tsa cuhva ndo diezmo can.

⁴³ ¡Ndahvi nyooho tsa cuví ndo fariseo! tyin cuñí ndo cunyaá ndo nu tyayu vaha tsitsi vehe ñuhu. Tan cuñí ndo tsa tyaa yahvi nyivi tsi ndo nuyahvi.

⁴⁴ ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyíi. Tyin tsañí nyivi tsata can tan ña tsitó ñi tyin nyíi ndiyi tsitsi ñaña ican. Tyin nduve ca cuhva canyíi nu nyíi ndiyi

ican. Cuñí maa nyiví tyin vaha ndo, tan ña tsitó ñi tyin ña vaha añima ndo —catyí ra Jesús.

⁴⁵ Tacan tan nacahan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nyaa ndihí un tsi ndi —catyí ra.

⁴⁶ Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahá Nyoo tahan tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyiví can, tan maa ndo ndi luxu ña jatyinyeé ndo tsi ñi.

⁴⁷ ¡Ndahvi nyooho! tyin janduvahá vaha ndo ñaña nu ñuhú yiqui ra cuví ndusu yuhu Nyoo tsa tsahñi ra cuví tsii tsaahnu ndo tahan tsanaha.

⁴⁸ Yacan cuñí tsi catyí tyin ndoó ndo vaha tsa javahá tsii tsaahnu ndo naha ra. Tyin tsii tsaahnu ndo tsahñi ra naha tsi ra cuví ndusu yuhu Nyoo. Tan nyooho janduvahá ca ndo ñaña ra naha.

⁴⁹ Yacan cuenda catyí Nyoo tahan tsanaha tsihin tsa tsiñi tuñi ra tyin cua jaquitsi ra tsi ra cua cuví ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha.

⁵⁰ Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyiví iyó vityin tsa cuenda tandihí ra cuví ndusu yuhu ra tsa tsahñi

tsii tsaahnu ndo naha ra nda cuanda tsinu ñuhu ñayiví tan nda cuanda vityin.

⁵¹ Nda cuanda niñi ra Abel tsa tsatí tsa tsahñi ra Caín yañi ra tsi ra, tan nda cuanda niñi ra Zacarías tsa tsahñi nyiví tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyiví tsa iyó vityin tsa catyí cuatyí nyiví tsa tsicoo tahan tsanaha.

⁵² ¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quihví nyiví ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihví inga nyiví tsa cuñi quihví —catyí ra Jesús.

⁵³ Ndihi cahan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaan xaan ra naha tan quitsahá nducú tuhun xaan ra naha tsi ra Jesús.

⁵⁴ Tyin cuñi ra naha tsa cahan ra Jesús iin tsa ña vaha, tyin tacan tan cuví tyaa ra naha cuatyí tsi ra.

12

Nu jacuahá ra Jesús tyin ña cuví tyihi xeehe yo cuatyí yo

¹ Cuenda mil nyiví ndu iin nda cuanda catyihí tahan ña ñi, tyin cuaha xaan ñi. Tacan tan ra Jesús cahan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa

yutsan iya. Tyin ndaá paan jahá yutsan iya, tan tacan cuví cuatyí ra can naha ra. Tyin jahá ra naha tyin vaha ra. Maa tyin ña cuví tyihi xeehe ra naha cuatyí ra naha.

² Tyin nduve iin tsa yíhí xeehe tan cuñí yo, tyin ña cua quituvi. Tan nduve tsa xeehe tan cuñí yo, tyin ña cua coto nyívi.

³ Yacan cuenda, náa ndihí tsa caahán ndo nu xeehe, cua quita tsi nu nditsin. Tan náa ndihí tsa caahán ndo tsitsi vehe ndo, cua cana tsa nyívi jiñi vehe.

¿Yóo taahán tsi nayuhvi yo, a tsi nyívi a tsi Nyoo?

(Mt. 10.28-31)

⁴ 'Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsahñí cuñu ñuhu yo. Tyin yaha can tan nduve ca tsa cuví javaha nu tsi yo.

⁵ Maa tyin cua catyí yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

⁶ 'Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti.

⁷ Tan nyoocho, nyaá yahvi ca ndo nu Nyoo tan ñavin ca tsa cuaha saa can, tan nda cuanda ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

Na ña nayuhvi yo cahan yo tuhun ra Jesucristo tsihin nyívi

(Mt. 10.32-33; 12.32; 10.19-20)

⁸ 'Catyí yu tsihin ndo tyin tandihí nyoocho tsa janahá ndo tsi nyívi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayíi nda gloria quee yu.

⁹ Maa tyin nyoocho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyívi cuenda yu cuví ndo.

¹⁰ Tan vasu cuxaan nyívi tsi yuhu, Rayíi tsa quee nda gloria, Nyoo cua jaha ra tuc-ahnu iñi tsi ñi. Maa tyin nyívi caahán tsa ndavaha ñi siqui Tatyí li Nyoo ña cua coo tuc-ahnu iñi tsi ñi cuenda yacan.

¹¹ 'Quívi tsa cua cundaca nyívi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo.

¹² Tyin cuhva tsa cua nacahan ndo, cua cuhva maa Tatyí li Nyoo náa tuhun taahán tsi cahan ndo —catyí ra Jesús.

Nu tsaha cuenda ra Jesús tyin ña taahán tsi nyiyo iñi yo tsa cuca

¹³ Iin ra tsa nyíi tsihin nyívi cuaha tsa ndu iin nu nyíi ra Jesús, catyí ra tsihin ra Jesús:

—Maestro, cahan tsihin ra yañi yu na natahvi ra tsa tsií jutu ndi, cuhva ra tsa taahán tsi tsi yu.

14 Tacan tan catyí ra Jesús tsihin ra:

—¿Tsa, yóo tsaḥ tsi yu tsa cuví yu juez tan natahvi yu ndaha tyiñu ndo? —catyí ra.

15 Tan yaḥ can tan catyí ra nuu nyivi cuaha can:

—Jaha xaan ndo cuenda tan ña nyiyo xaan iñi ndo tyin ña tsiñi ñuhu tsa coo cuaha ndaha tyiñu yo tan coonyito yo.

16 Tacan tan tsaḥ cuenda ra Jesús iin cuhva tsi tandihi nyivi, tan catyí ra:

—Tsicoo iin ra cuca. Tan cuaha xaan ndaha tyiñu ñihi ra nu jaha tyiñu ra.

17 Tacan tan tsicá iñi ra: “¿Nacaa javaha yu? Nduve nu quihí tandihi ndaha tyiñu ihya.”

18 Tan catyí ra: “Tsa tsitó yu nácaa cua javaha yu. Cua cani yu tandihi yaca nyihi yu, tan cua javaha yu tsa nahnu ca, tan natyihí yu tandihi ndaha tyiñu can tsihin tandihi ca tsa iyó tsi yu tsitsi can.

19 Tacan tan cua catyí yu tsihin yu: Cuaha xaan ndaha tyiñu naquihin vaha un, tan vityin cuahán maa cuiya, quitatu, catsi vaha, coho vaha, tan cusii iñi.”

20 Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihin vaha un ¿Yóo tsii cua cuví yacan?” catyí Nyoo tsihin ra can.

21 Tacan cuví iin ra tsa jat-acá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

Ña caca xaan iñi yo náa ndihi tsa tsiñi ñuhu tsi yo

(Mt. 6.25-34)

22 Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihi ndo tsa catsi ndo, tan ndi jahma tsa cunditsi ndo.

23 Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo.

24 Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa.

25 Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo.

26 Tatun ndi luxu can tan ña cuví jahá ndo, ¿nacuenta tsa tsicá xaan iñi ndo tandihi ca tsa tsiñi ñuhu tsi ndo?

27 Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandihi tsa cuca ra tan ña sii caá tsa tsinditsi ra tumaa tsa jacunditsi Nyoo tsi yutun ita ican.

28 Tatun tacan ñi jacunditsi Nyoo tsi yutun ita tsa iyó nu tsiqui vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra.

29 Ña caca xaan iñi ndo tuhun tsa catsi ndo tan tsa coho ndo.

30 Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñi ñuhu tsi ndo.

31 Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihi tsa tsiñi ñuhu tsi ndo.

*Tsa vaha tsa iyó gloria
(Mt. 6.19-21)*

32 Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñi ra tsi ndo. Yacan cuenda cua cuhva ra quihvi ndo nu ndacá ñaha ra.

33 Xico ndo tsa iyó tsi ndo. Tan jatyinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihi tsa vaha. Tyin yoñi yóo jativí can ndacan, ndi nu ñasuhu, tan ndi quiti.

34 Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihi añima ndo —catyí ra.

Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

35 Cuatu vaha ndo tsi yu tsihin ñuhu nditsin Nyoo quivi quitsi yu inga tsaha.

36 Tan cuvi ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra.

37-38 Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra.

39 Tan coto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra.

40 Tan tacan cuví tucu nyooho, cuatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

*Musu vaha tan musu ña vaha
(Mt. 24.45-51)*

41 Tacan tan quitsaha nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihi nyivi?

42 Tacan tan nacahan ra Jesús, tan catyí ra tsihin ra:

—Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihi ca musu ican.

43 Tan sii xaan cuñi musu ican tatun cuhva tsa jahá tyiñu ra, tan cua tsaa tsitoho ra. Tyin tyaá yahvi ra tandihi tsa taahán tsi ica ra.

44 Tan catyí yu tsihin ndo tyin tsa nditsa. Tyin tsitoho

ra cua nacuhva ra tandihí tsa cumí ra, cua quihí ndaha ra. Tyin vaha tyaá yahvi ra tsihin tyiñu jahá ra.

45 Maa tyin tatun tsicá ñi musu ican tyin naha xaan cuahán tsitoho ra, tan quit-sahá cañi ra tsi inga musu tsa cutahán tsihin ra tan ñiñaha jahá tyiñu ican, tan ña cuñi ra jaha tyiñu ra. Tyiñu tsatsi ñi tan tyiñu tsiñi nyixi ñi iyó ra.

46 Tacan tan sana ñi ra cua tsa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñu ñi tsa caahán ra.

47 "Tan iin musu tsa tsitó nácaa iyó tsitoho ra tan ña javahá ra cuhva cuñi tsitoho ra, cuaha xaan tundoho cua nyehe ra.

48 Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javahá ra. Tatun iin musu tan cuaha tsa tsahá tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

Nu cahan ra Jesús tyin tsacatyí ra cua cañi tahan nyivi tsihin nyivi ñi

(Mt. 10.34-36)

49 "Tumaa tsa jatahán yu ñuhu nu ñuhu ñayivi, tacan cuví tyiñu vatsí yu. ¡Tan cuñi xaan yu tsa nacayu catyín ña ñuhu ihya!

50 Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihí tyiñu jahá yu.

51 Cuñi maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiin yu tsi ndo.

52 Tyin tsa vityin tan ityi nuu ca, uhun taahan nyivi iin vehe ñi cua cusin ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi.

53 Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe sihi cua cañi tahan ña tsihin sehe sihi ña. Tan ña cuví sehe sihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

Nu cahan ra Jesús tsihin nyivi tyin ña nacotó ñi tyin tsa tsaq Sehe Nyoo nu yucú ñi

(Mt. 16.1-4; Mr. 8.11-13)

54 Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví.

55 Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo.

56 Nyooho jahá ndo tsa tsitó xaan ndo, tan nacotó ndo tandihí tsa cuví andivi, tan tandihí tsa cuví nu ñuhu

ñayivi ihya. Tan ¿nacuenta tsa ña nacotó ndo náa tyembu iyó ndo vityin?

Nducu yo cuhva nácaa coo vaha yo tsihin ra tsicán cuatyí tsaha yo coto cahun yo anyaya

(Mt. 5.25-26)

⁵⁷ ¿Nacuenta ña jahá ndo cuenta, ndáa tsa vaha tan ndáa tsa ña vaha?

⁵⁸ Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa.

⁵⁹ Tatun tacan cua cuvi, catyí yu tsihin ndo tyin ña cua quita ndo nda cuanda tyahvi ndo tandihi tsa taahán tsi tyahvi ndo —catyí ra Jesús.

13

Cuñí tsi tsa nasama yo cuhva iyó yo, tun ña cuñí yo cahun yo anyaya

¹ Tacan tan juvin ñi quivi can nyecu juhva ra naha. Tan quitsaha nacatyí tuhun ra naha tsihin ra Jesús tsa javaha ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quití jana ra naha tsi Nyoo. Tan tacan saca nuu niñi ra ican naha ra tsihin niñi quití tsa tsijamañi ra ican naha ra.

² Tan nacahan ra Jesús tan catyí ra tsihin ra naha:

—¿A tsicá ñi nyooho tyin cahnu xaan ca cuatyí ra Galilea ican naha ra tan ñavin ca tandihi ca ra ñuu ra naha, tan yacan tsihi ra naha?

³ Ñavin. Tyin tatun nyooho tan ña nasama ndo cuhva iyó ndo, tacan cua cunaa ndo.

⁴ Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñí maa ndo?

⁵ Ñavin. Tyin tatun nyooho tan ña nasama ndo cuhva iyó ndo, cua cunaa ndo.

Nu tsaha cuenda ra Jesús iin cuhva nácaa ndatú Nyoo tsa nasama yo cuhva iyó yo

⁶ Tacan tan tsaha cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaa tun nu ñuhu ra. Tan tsahan ra tsinyehé ra tatun ñi tsiti tun. Tan nyehe ra tyin nduve.

⁷ Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehe yu tatun iyó tsiti tun. Tan nduve maa tsiti tun ñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra.

⁸ Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha

tun tan cua tyihi yu ñuhu tyaahyú.

⁹ Vasiquí tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quivi quitatú nyivi janduvahá ra Jesús tsi iin ñaha tihí tsata

¹⁰ Iin quivi tsa quitatú nyivi, jacuahá ra Jesús tsi nyivi tsitsi vehe ñuhu.

¹¹ Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví ndundoo ña.

¹² Tacan tan nyehe ra Jesús tsi ña. Tan cana ra tsi ña. Tan quitsahá caahán ra tsihin ña, tan catyí ra:

—Tsa nduvahá un. Nduve ca cuehe ndohó un —catyí ra tsihin ña.

¹³ Tacan tan tyisó ra ndaha ra jiñi ña. Tan iin yaha ñi tan ndundoo ña. Tacan tan quitsahá jacahnú ña tsi Nyoo.

¹⁴ Maa tyin ra cuví ityi nuu vehe ñuhu, cuxaan xaan ra tsi ra. Tyin quivi quitatú janduvahá ra tsi ña. Tan catyí ra tsihin nyivi nyecú ican:

—Iyó iñu taahan quivi taahán tsi jaha tyiñu yo. Tacan quivi quitsi ndo cuví ndo numerí. Tan ña quitsi ndo quivi quitatú yo —catyí ra.

¹⁵ Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsí tucu

nyooho quití jana ndo tan jahahó ndo ndutya tsi ti quivi quitatú yo?

¹⁶ Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

¹⁷ Tacan tan cuhva tsa cahan ra Jesús yacan, tandihi maa nu xaan iñi tsi ra nducahan nuu nahnu. Maa tyin tandihi ca maa nyivi sii xaan cuñi ñi tsihin tsa cahnu tsa iyo javahá ra Jesús.

Nu cahan ra Jesús tyin tumaa iin tsiti mostaza cuví tsa ndacá ñaha Nyoo tsi yo

¹⁸ Tacan tan catyí ra Jesús: —¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi?

¹⁹ Tumaa iin tsiti mostaza, tacan cuví tsi. Tyin iin ra tatsi ra iin tsiti ican nu ñuhu ra, tan cana iin yutun luhlu, tan tsahnú tun. Tan cuví tun iin yutun cahnu xaan. Tacan tan tsaá saa naha ti nuu yutun ican. Tan javahá ti taca ti nuu tun.

Nu cahan ra Jesús tyin tumaa yutsan iya, tacan cuví tsa ndacá ñaha Nyoo tsi yo

(Mt. 13.33)

²⁰ Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo?

²¹ Cuví tsi tumaa yutsan iya tsa nasacá nuu iin ñaha

tsihin uñi jahma yutyi paan. Tyin tumaa ndaá tanií yut-san paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

Yuvehe tihin tan ityi cuiñi tsa cuahán nu nyaá Nyoo (Mt. 7.13-14, 21-23)

²² Ityi cuahán ra Jesús ñuu Jerusalén caahán ra tuhun Nyoo tsihin nyivi tandihi ñi ñuu nu yahá ra.

²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahan ra Jesús, tan catyí ra:

²⁴ —Nanducu ndo cuhva quihvi ndo yuvehe tihin. Tyin tacan cuví quihvi ndo nu ndacá ñaha Nyoo. Tyin cuaha xaan ndo cuñi ndo quihvi ndo ndacan, tan ña cuví.

²⁵ Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyooho tsa nyecú ndo ityi tsata cua jandatsan ndo yuvehe, tan cua catyi ndo: “Nuña yuvehe.” Tan ra ican cua catyi ra tsihin ndo: “Ña tsitó yu ndáa ityi quee nyooho.”

²⁶ Tacan tan nyooho cua catyi ndo: “Nyuhu tsatsi ndi tan tsihi ndi tsihin un. Maa un jacuahá un tuhun Nyoo tsi ndi ityi nu nyecú vehe ndi”, cua catyi ndo tsihin ra.

²⁷ Maa tyin ra ican cua nacahan ra tsihin ndo tan cua catyi ra: “Tsa catyi yu tsihin ndo tyin ña tsitó yu ndáa ityi quee ndo. Catsbyo nyaha ndo

nu nyaá yu tandihi nyooho nyivi javahá tsa ña vaha”

²⁸ Tacan tan cua vacu ndo tan catsan ña cua cuví nuhu ndo tsa cua nyehe ndo tsi ra Abraham tsihin ra Isaac tan ra Jacob, tan tsihin tandihi ra cuví ndusu yuhu Nyoo tsa tsicoo tahan tsanaha. Tyin nyecú ra naha nu ndacá ñaha Nyoo. Tan nyooho ndoo ndo ityi tsata.

²⁹ Tan cua quitsi nyivi ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra.

³⁰ Tan juhva nyivi tsa cuahán ityi nuu vityin, ñi can cuhun nu ndihi. Tan juhva nyivi tsa cuahán nu ndihi ña, ñi can cua cuhun ityi nuu —catyí ra.

Nu cuihya xaan cuñi ra Jesús nyehé ra tsi nyivi ñuu Jerusalén

(Mt. 23.37-39)

³¹ Juvín ñi maa quivi can tsaá juhva ra fariseo. Tan catyi ra naha tsihin ra Jesús:

—Quita ihya tyin ra Herodes cuñi ra cahñi ra tsi un —catyí ra naha.

³² Tan catyi ra Jesús tsihin ra naha:

—Cuahan ndo tan cahan ndo tsihin ra tsa cuví tumaa ñicuii, tyin nda cuanda quita quivi tsa ndihi tyiñu jahá yu tsa tavá yu tatyí ña vaha tsi nyivi tan tsa janduvahá yu tsi nyivi cuuhvi tsihin cuehe, tacan tan cundihí tyiñu jahá yu.

³³ Maa tyin nda cuanda tahan tsi tsa ndihí maa tyiñu jahá yu, tacan tan cahun maa yu cua cúu yu nda ñuu Jerusalén. Tyin ña cuví cúu iin ra cuví ndusu yuhu Nyoo ityi tsata ñuu Jerusalén.

³⁴ ¡Ndahvi nyooho nyivi Jerusalén! tyin tsahñí ndo tsi ra cuví ndusu yuhu Nyoo. Tan cañí ndo yuu tsi tandihí ra tsa jaquitsí Nyoo nu yucú ndo. Tan yuhu cuaha xaan tsaha cuñí yu jaha cuenda yu tsi ndo, tumaa jahá cuenda iin ndivi síhi sehe ti, tan naquihín vaha ti tsi ti naha ti tsitsi nditsin ti. Maa tyin maa ndo ña cuñí ndo.

³⁵ Nyehe ndo vityin tyin tsa nacoó yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan ra vatsí tsihin sívi Nyoo Jutu yo —catyí ra Jesús.

14

Nu janduvaha ra Jesús tsi iin ra cuuhví tsa iyó cuiñu quivi quitatú nyivi

¹ Cuví tsi iin quivi quitatú nyivi. Tan ra Jesús cuahán ra cua catsi ra vehe iin ra cuví ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús.

² Tacan tan yatyin ñi nuu ra Jesús nyaá iin ra cuuhví tsa iyó cuiñu.

³ Tan catyí ra Jesús tsihin ra maestro cuenda ley vehe

ñuhu naha ra tan tsihin ra fariseo naha ra:

—¿A vaha janduvaha yo nyivi cuuhví quivi quitatú yo? ¿Náa catyí ley Nyoo? —catyí ra.

⁴ Tacan tan tandihí ra naha, taxin ña tsinyecu ra naha. Tacan tan tyiso ndaha ra Jesús jiñi ra cuuhví can. Tan janduvaha ra tsi ra. Tan catyí ra tsihin ra na cunuho ra.

⁵ Tacan tan catyí ra Jesús tsihin ra fariseo naha ra:

—Tatun nyooho tan canacava iin burru jana ndo, a inga quiti jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quivi quitatú yo cuví? —catyí ra.

⁶ Tacan tan taxin ña tsinyecú ra fariseo naha ra. Tyin ña ñihí ca ra naha náa nacahan ra naha.

Nu jacuaha ra Jesús tsi yo tyin ña vaha tsa cahnu jaha yo tsi yo

⁷ Nyehe ra Jesús tyin tandihí ra nyecú vico ican nacatsí ra naha tyayu vaha ca cunyecu ra naha. Tacan tan tsaha cuenda ra tyehen tsi ra naha:

⁸ —Ndáa quivi cahun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuví tan ñavin ca maa ndo,

⁹ tan coto quitsi ra tsa cana tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan cua cuhva ndo tyayu can. Tacan tan cua cunyecu ndo nu ndihí ña.

10 Maa tyin catyí yu tsihin ndo, tyin ndáa quiví cana ra tsi ndo, cúaahan ndo, tan ñavin nu vaha cunyecu ndo. Tyin tacan tan cua quitsi maa ra tsa cana tsi ndo tan cua cahan ra tsihin ndo: “Amigos, naha ndo, cunyecu ndo nu tyayu vaha ihya.” Tan tacan cua jacahnu ca ra tsi ndo nu nyívi nyecú yuhu mesa tsihin ndo.

11 Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuví ra —catyí ra Jesús.

12 Tacan tan catyí tucu ra tsihin ra cana tsi ra nu iyó vico can:

—Ndáa quiví coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyívi un, ndi tsi nyívi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un.

13 Maa tyin catyí yu tsihin un tyin ndáa quiví coo vico vehe un, cana tsi nyívi ndaahvi, nyívi cuuhví, nyívi coxo, tan tsihin nyívi cuaa.

14 Tacan tan sñi cua cuñí un, tyin ñi ican ña cua cuví natyahvi ñi tsi un. Maa tyin cua natyahvi Nyoo tsi un quiví cua nandoto un tsihin nyívi vaha.

Nu tsaha cuenda ra Jesús iin cuhva nácaa caná ra tsi yo na quihvi yo nu ndacá ñaha Nyoo

(Mt. 22.1-10)

15 Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sñi xaan cua cuñi nyívi tsa cua catsi nu ndacá ñaha Nyoo —catyí ra.

16 Tacan tan catyí ra Jesús tsihin ra:

—Iin ra ican jacoó ra iin vico cahnu xaan vehe ra. Tan cana ra cuaha xaan nyívi.

17 Tacan tan tsaá cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa tahañ tsi cuhva cuxiñi ñi.

18 Maa tyin tandihí ñi ican quitsaha caahán ñi tyin ña cua cuhun ñi. Tan iin ra ican catyí ra: “Ndi jata yu iin ñuhu. Tan cuñí tsi cuhun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cuhun yu.”

19 Tacan tan inga ra ican catyí ra: “Ndi jata ñi yu uhun taahan yunta. Tan cuhun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuví cuhun yu.”

20 Tacan tan inga tucu ra ican catyí ra: “Ndi tindaha cuii ñi yu, tan ña cua cuví cuhun yu”, catyí ra.

21 Tacan tan musu ra ican cuanuhu ra. Tan catyí tuhun ra tandihí tsa cuví ican tsihin ra tsitoho ra. Tsa tsiñi tsitoho ra tsa tacan, tan cuxaan xaan ra. Tan catyí ra tsihin musu ra: “Cúaahan vityin tandihí maa ityi. Tan quitsi ndaca un tsi nyívi ndaahvi, nyívi cuuhví, nyívi coxo, tan tsihin nyívi cuaa”, catyí ra.

22 Tan tsa yaha tsa nyico musu ican tan catyí ra tsihin ra tsitoho ra: “Tsa javaha yu tandihi maa tsa cahan un tsihin yu. Tan nuña ca tsitsi vehe”, catyí ra.

23 Tacan tan tsitoho ra catyí ra tsihin ra: “Cuahan cua nducu ca nyivi tandihi maa ityi. Tan jañiñi un tsi ñi na quitsi ñi, tyin na cutu tsitsi vehe yu.

24 Tyin catyí yu tsihin un tyin ndi intuhun ñi tsa cana yu tsa jihna, ña cua catsi ñi tsihin yu”, catyí ra —catyí ra Jesús.

Cuaha xaan tundoho nyehéyo tatun cuendará Jesús yihíyo

(Mt. 10.37-38)

25 Cuaha xaan nyivi nyicún tsi ra Jesús. Tacan tan nanyehé ra tsi ñi, tan catyí ra tsihin ñi:

26 —Tandihí nyooho tsa nyicún tsi yu, tatun cuñí ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñí ca ndo tsi maa ndo tsa nuu yuhu, ñavin cuenda yu yihí ndo.

27 Tyin nyooho tsa ña cuñí nyehe tundoho tsa cunyicun ndo tsi yu, ña taahán tsi cuvi ndo nyivi cuenda yu, tyin tsa nyehé ndo tundoho, yacan cuvi cruu tsa taahán tsi cuiso ndo.

28 Tyin tun cua javaha ndo iin vehe, nacañí nuu jihna ndo jiñi ndo tan tyihí tuñi iñi ndo tun quita vehe cahnu can tsihin xuhun tsa nyí tsi ndo.

29 Tyin tatun quitsaha jandaá ndo vehe ican, tan ña

cuvi jandihí ndo tyin nduve ca xuhun ndo, cua vacu nducu nyivi tsi ndo.

30 Tan cua catyí ñi: “Ra ican quitsaha javahá ra vehe ra, tan ndi ña cuví jandihí ra can”, cua catyí ñi.

31 A tatun iin rey tan cuñí ra cañi tahan ra tsihin inga rey za ña cunyaa jihna ra tan nyehe ra tatun ñihi tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican?

32 Tan tatun tsitó ra tyin ña cua cuvi jaha canaa ra tsi inga rey ican, tacan tan cañi ca vatsí inga rey ican, tan cua jacuhun ra tsi musu ra tyin na catyí tuhun ra naha tsihin inga rey ican na jandihí taxin ra itsi.

33 Tan tacan cuví nyooho. Tatun ña cahnya iñi ndo tandihí maa tsa cuñí ndo tan tandihí tsa cumí ndo, ña cua cuvi cunyicun ndo tsi yu.

Nu jacuahá ra Jesús tyin tumaa ñi tsa ndihí tsa uhva, tacan cuvíyo tatun ndu uvi iñi yo tsa tsinú iñi yo tsi ra

(Mt. 5.13; Mr. 9.50)

34 Vaha ñi tyin jacu uhvá tsi tsa catsi yo. Maa tyin tatun ndihí tsa uhva tsi, ña vaha ca tsi.

35 Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyooho tsa iyó soho, tyaa soho ndo tuhun caahán yu —catyí ra Jesús.

15

Nujacuahā ra Jesús tyin tu-maa mbee tsa cuanaá tacan cuvıyo

(Mt. 18.10-14)

1 Tandihı ra tavá xuhun cuenda ra ndacá ñaha nda ñu Roma, tan ra iyó cuatyı naha ra, natuhvā ra naha nu nyıı ra Jesús, tan tyaá soho ra naha tsa caahán ra.

2 Tacan tan ra fariseo naha ra tshin ra maestro cuenda ley vehe ñuhu naha ra quit-sahā caahán nyaa ra naha tsi ra Jesús, tan catyı ra naha:

—Ra ihya, caahán ra tshin ra iyó cuatyı naha ra. Tan tsatsı ra tshin ra naha —catyı ra naha.

3 Tacan tan ra Jesús tsahā cuenda ra cuhva ihya, tan catyı ra:

4 —Nyooho tsa iyó iin cientu mbee jana, tun cunaa intuhun ti, ¿a ña cua nacoo ndo tsi tandihı ca ti, tan cunanducu ndo tsi mbee tsa cunaa can nda cuanda tsa nañihı ndo tsi ti?

5 Tan tsa yaha nañihı ndo tsi ti, tyiso soco ndo tsi ti. Tan sıi xaan cua cuñı ndo.

6 Tan tsa tsa nyico ndo vehe ndo, tan ndu iin ndo tshin ra vaha iñı tsi ndo tan tshin nyıvi iyó yatyin yuvehe ndo, tacan tan catyı ndo tshin ñı tyin na cusıi ndihı iñı ñı tshin ndo tyin nañihı ndo mbee jana ndo tsa tsinaā.

7 Tan catyı yu tshin ndo, tyin tacan tucu sıi xaan ca cuñı ángel Nyoo tsa iyó gloria tsacatyı intuhun ra tsa iyó cuatyı tan nasamá ra cuhva iyó ra, tan ñavin ca tsa cumı xico tsahun cumı taahan nyıvi tsa

nduve cuatyı tan ña cuñı ca tsi tsa nasama ñı cuhva iyó ñı.

Ñaha tsa tsinaā xuhun tan nañihı ña

8 "Tan catyı yu tshin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tıhvi ña taniı tsitsi vehe ña. Tan cua nanducu ña xuhun can nda cuanda tsa nañihı ña can.

9 Tan tsa yaha nañihı ña, cua cuhun ña cunanducu ña tsi ñı vaha iñı tsi ña, tshin nyıvi tsa iyó yatyin yuvehe ña, tan cua cahan ña tshin ñı: "Cusıi ndihı iñı ndo tshin yu tyin tsa nañihı yu xuhun yu tsa tsinaā", cua catyı ña.

10 Tan catyı yu tshin ndo tyin tacan tucu sıi cuñı ángel Nyoo tsacatyı intuhun ra iyó cuatyı tan ndu uvi iñı ra cuatyı ra —catyı ra Jesús.

Nu jacuahā ra Jesús nácaa cuñı Nyoo tsi iin ra ndu uvi iñı cuatyı

11 Tacan tan tsahā cuenda ra Jesús inga cuhva ihya tan catyı ra:

—Iin ra, iyó uvi taahan sehe ra.

12 Tan ra tsa luhlu ca caahán ra tshin jutu ra tyin na nacuhva ra tsa taahán tsi tsi ra. Tacan tan jutu ra natahvi sava ra tsa tsii ra tan tsahā ra tsi nduvi taahan sehe ra.

13 Tan ña cuaha ñı quıvi tan ra luhlu ıcan xico ra tandihı maa tsa tsahā jutu ra tsi ra. Tan jandu iin ra xuhun ra, tan quihın ra ityi, cuahán ra iin ñuu cañı xaan. Tan ndacan tsicoq ra tan janaā ra

tandih̄i maa xuhun ra tsihin tus̄ī iñi. Tan quiñi xaan icá ra tsicá nuu ra.

14 Tacan tan tsāa tama ityi nu iyó ra. Tan quitsah̄a tsisocó ra tyin tandih̄i xuhun ra janāa ra.

15 Tacan tan tsāhan ra tsin-ducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quiñi jana ra, tyin jaha cuenda ra tsi ti naha ti.

16 Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñi ra catsi ra tsa tsatsi quiñi ican naha ti. Tan yoñi maa tsah̄a tsa catsi ra.

17 Tacan tan nducuhun iñi ra tsi jutu ra. Tan nacañī jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñi cúu yo jahá soco.

18 Vityin cua cunuhu yo nu nyaá jutu yo. Tan cua catyi yo tsihin ra tyin tsicoō cuatyí yo nuu Nyoo tan tacan tucu nuu maa ra.

19 Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuví tsi yo” cuñi ra tsicá iñi ra.

20 Tacan tan quih̄in ra ityi cuanuh̄u ra nda vehe jutu ra. Tan cañi ca vatsi ra tan nyehe jutu ra tsi ra, tan cundaahvi iñi ra nyehé ra tsi sehe ra. Tan tsin̄u xaan ra tsijatahan ra tsi ra. Tan tsinum̄i nyaa ra tsi ra.

21 Tacan tan catyi ra tsihin jutu ra: “Tyatya, tsicoō cuatyí yo nuu Nyoo tan tsicoō cuatyí yo nuu tucu maa un. Tan yacan ña taahán ca tsi tsi yo

tsa cuví yo sehe un”, catyi ra tsihin jutu ra.

22 Maa tyin jutu ra tava tyiñu ra, tan catyi ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihi ndo iin xehe nundaha ra. Tan tyihi ndihi ndo zapatu tsaha ra.

23 Tan cah̄ñi ndo iin be-cerru tsa xaahan vaha ca, tyin catsi yo tsi ti. Tyin vityin cua coo yo vico.

24 Tyin ra sehe yo ihya tsa tsihi ra cuñi maa yu, tsicá iñi yu. Cuñi maa yu tyin ña cua nyehe ca yu tsi ra, tan tsāa nyico ra”, catyi jutu ra can. Tacan tan quitsah̄a tsicoō ñi vico. Tan sī xaan cuñi ñi tyin tsāa nuhu nyico ra.

25 Tacan tan inga sehe ra, ra tsa tsitsa, nyii ra tsicuhu. Tan tsa cua tsāa nuhu ra nda yuvehe ra, tan tsiñi ra tyin iyó yaa. Tan tuv̄i iñi ra tyin tsañi ñi yaa.

26 Tacan tan tsa cuyatyin ra nda yuvehe ra tan cana ra tsi iin musu ra. Tan tsicá tuhun ra tsi ra can náa cuví xaan can.

27 Tacan tan musu can catyi ra: “Ra yañi un tsāa nuhu ra. Tan yacan tava jutu un tyiñu tyin na cah̄ñi ra naha iin be-cerru xaahan. Tyin vaha tsāa ra yañi un, tan nduve náa tahañ ra”, catyi musu can tsihin ra.

28 Tacan tan nduxaan xaan cuñi ra can. Tan ña cuñi ra quihvi ra tsitsi vehe. Tan jutu ra tsāhan ra tsicahañ ndaahvi ra tsihin ra, tyin na quihvi ra tsitsi vehe.

29 Tacan tan nacahan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaa yahvi xaan yu tsa caahan un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu.

30 Maa tyin vityin tsa nuhu nu sehe un ihya, nu tsa janaa xuhun tsihin ñaha sii iñi. Tan tsaha un iin becerru quití xaahan tsi nu”, catyí ra tsihin jutu ra.

31 Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihi quivi. Tan tandihi tsa cumí yu, tsi un cuví can.

32 Tan vityin taahan tsi tyin javaha yo vico ihya, tan cusii iñi yo. Tyin tsa nuhu ra yañi un, ra tsa tsihi, cuñi maa yu. Tuma tsa nandoto nyico ra cuví can, tyin tsinaa ra, tan nañihí yo tsi ra inga tsaha”, catyí ra tsihin sehe ra —catyí ra Jesús.

16

Nu jacuahá ra Jesús tsi yo nácaa javaha yo tumañi iñi tsihin tsa iyó tsi yo

1 Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yihí ndaha tandihi tyiñu jahá ra cuca can. Tan tsahan iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaa ra tandihi tsa iyó tsi ra.

2 Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quiti nu nyaá yu. Vaha ca nacuhva cuenda un tandihi tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra.

3 Tacan tan ra yihí ndaha tyiñu can tsicá iñi ra: “¿Nacaa cua javaha yu vityin? Tsi toho yu ña cuñi ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahan xaan nuu yu caya yu tsitsi ñuu.

4 Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua tsa yu vehe ñi”, tsicá iñi ra can.

5 Tacan tan cana ra tsi intuhun intuhun ra tsa nyaá cuenda tsi tsi toho ra. Tan catyí ra tsihin iin ra ican: “¿Náa nyaá cuenda un tsi tsi toho yu?” catyí ra.

6 Tacan tan nacahan ra ican tan catyí ra: “Yuhu nyaá cuenda yu cumi mil litru acetye.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahan ra.

7 Tacan tan tsa inga ra. Tan tsicá tuhun tucu ra tsi ra ican: “¿Náa nyaá cuenda un tsi tsi toho yu?” Tan nacahan ra ican: “Nyaá cuenda yu iin mil arroba trigo”, catyí

ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra.

⁸ Tacan tan tsito tsitoho ra tsa ña vaha tsa javaha ra. Tan iyo xaan cuñi ra cuca can, tyin yatyí xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaá yahvi tsi Nyoo yatyí xaan ca jahá ñi tsi ñi tan ñavin ca nyivi tsa iyó ñuhu nditsin Nyoo aña.

⁹ Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatinyee ndo tsi nyivi. Tan quivi tsa cua ndihí tsa cuca, cua ñihí ndo coo ndo nu ña cua naa maa.

¹⁰ Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo.

¹¹ Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo.

¹² Tyin tandihí tsa iyó tsi ndo, maa Nyoo tsaha nuu itsi tsi ndo. Tan tatun ña javahá ndo tumañi ñi tsihin tsi, ña cua cuhva ra tsa cuvi tsii ndo.

¹³ Iin musu ña cuví coo uvi taahan tsitoho ra. Tyin musu

ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuvi cuñi ndo tsi Nyoo tatun cuñi tucu ndo tsa cuca —catyí ra Jesús.

¹⁴ Tan tsa tsiñi ra fariseo naha ra tandihí tsa cahan ra Jesús, tacan tan quitsaha tsacú nducu ra naha tsi ra. Tyin maa ra fariseo naha ra cuñi xaan ra naha xuhun.

¹⁵ Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha aña ndo. Tandihí tsa cahnu cuñi maa nyivi, Nyoo ña cuñi ra nyehe ra yacan.

Ley Nyoo tsa tyaa ra Moisés, tan tsihin tsa ndacá ñaha Nyoo tsi yo

¹⁶ Ley tsa tsaha Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo taha tsanaha, yacan cuví tsa janaha ityi tsi nyivi nda cuando quivi tsa quitsi ra Juan. Tan ra Juan quitsaha caahan ra tuhun vaha tyin tsa cuñi quitsi Nyoo tyin cua cundaca ñaha ra. Tan tandihí nyivi nducú xaan ñi cuhva tsa quihvi ñi nu ndacá ñaha ra.

¹⁷ Tan catyí yu tsihin ndo, tyin vasu cunaa andivi tan nu ñuhu ñayivi ihya, maa tyin tsa cuví ley Nyoo tsa tyaa ra Moisés, ña cua cunaa tsi tyin cua cundaa tandihí tsi.

Nu jacuahq̄ ra Jesús tyin ña vaha tsa nacoo ihñi rayiñ ñasiñi ra

(Mt. 19.1-12; Mr. 10.1-12)

18 "Tatun iin rayiñ tan iyó ñasiñi ra, tan nacoo ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayiñ tsihin ñaha tsa nacoo yiñ, coo tucu cuatyí ra can nuu Nyoo.

Nu jacuahq̄ ra Jesús tsi nyivi cuenda ra cuca tsihin ra Lázaro

19 "Tsicoo iin ra cuca. Tan vaha xaan jahma tsinditsi ra. Tan tandihí quivi iyó vico jahá ra tan tsatsí vaha ra.

20 Tan tsicoo tucu iin ra ndaahvi tsa tsinañi Lázaro. Tan ra ihya cuaha xaan ndihyi iñi tsi ra. Tan nyaá ra yuvehe ra cuca ican.

21 Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda cuanda ina tan tsaá ti naha ti nu nyaá ra, tan tsacayaá ti nu uhvi ra.

22 Tan iin quivi tsihi ra ndaahvi can. Tan ángel maa Nyoo na quihin tsi ra tan tsindacq̄ ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra.

23 Tacan tan ra cuca ican nyehé xaan ra tundoho nu nyii ra anyaya. Tan nanyehe ra nu cañi xaan nu nyaá ra Abraham tsihin ra Lázaro.

24 Tacan tan canq̄ tsaá ra cuca can tan catyí ra: "Tyatya Abraham, cundaahvi iñi tsi yu. Jaquitsi tsi ra Lázaro tan na jatyii ra luxu nundaha ra. Tan na jatoo ra ndutya nu

yaa yu. Tyin nyehé xaan yu tundoho nu cayú ñuhū ihya", catyí ra.

25 Tan ra Abraham catyí ra tsihin ra: "Nducuhun iñi tyin vaha xaan tsicoo un nu ñuhu ñayivi. Tan ra Lázaro, tuhun ndaahvi tsicoo ra. Tan vityin vaha iyó ra ihya, tan yooho nyehé un tundoho.

26 Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehe ña cuví cuhun ra naha nu nyii un. Tan ndi ra yucú nu nyii un, ña cuví quitsi ra naha nyehe", catyí ra Abraham tsihin ra cuca can.

27 Tacan tan catyí ra cuca ican: "Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu.

28 Tyin iyó uhun taahan ca ra yañi yu naha ra. Tan cuñi yu tyin catyí tuhun ra Lázaro tsihin ra naha nácaa nyii yu nyehé yu tundoho ihya, coto quitsi ndihí ra naha ihya", catyí ra.

29 Tacan tan catyí ra Abraham: "Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo tahan tsanaha. Na tyaa yahvi ra yañi un naha ra, tun cuñi ra naha", catyí ra Abraham.

30 Tacan tan catyí ra cuca ican: "Tyatya Abraham. Ña cua tyaa yahvi ra naha. Maa tyin tatun yóo tsa nandoto, tan cuhun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha", catyí ra cuca ican.

³¹Tan ra Abraham catyí ra: “Tatun ña cuñí ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo taħan tsanaha, vasu ndi maa nandoto iin nyívi tan cahan ñi tsihin ra naha ña cua tsinu iñi ra naha.”

17

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha

(Mt. 18.6-7, 21-22; Mr. 9.42)

¹Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jatívi tsi nyívi. Maa tyin ndahvi ra ndaahvi tsa jatívi tsi nyívi.

²Vaha taxin ca na cunuhñi iin yuu jucun ra, tan jacuhun nyívi tsi ra nu ndutya ñuhu. Coto jatívi ca ra tsi nyívi ndi nasama cuhva iyó.

³Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javaha ra. Tun nasama ra cuhva iyó ra, jaha ndo tucahnu iñi tsi ra.

⁴Tan ndi maa javaha ra tsa ña vaha tsihin ndo utsa tsaha tsa iin quiví, tatun tandihí tsa utsa tsaha tan catyí ra tsihin ndo tyin ndu uví iñi ra tsa javaha ra; tandihí tsa utsa taahan tsaha can, jaha ndo tucahnu iñi tsi ra.

Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha

⁵Tacan tan catyí ra tava tyiñu ra Jesús tsihin ra:

—Cuhva tsa tsinu ca iñi ndi tsi un —catyí ra naha.

⁶Tan catyí ra Jesús tsihin ra naha:

—Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yutun cahnu tsa nañí sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷Tan catyí ra Jesús:

—Tatun iin nyooho tan iyó iin musu ndo, tan tsa ra tsa tsahan ra tsicuhu tsijaha tyiñu ra, a tsijaha cuenda ra quiñi jana ndo, ¿a catyí ndo tsihin ra: “Cunyaa tan catsi un”? Ña tuhvá ndo cahan tacan tsihin ra.

⁸Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyihí un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra.

⁹Ndi ña tuhvá ndo nacuhvá tyahvi nyoo tsi ra tyin javaha ra náa tyiñu tava ndo tsi ra.

¹⁰Tacan tucu maa ndo tsihin Nyoo. Quiví ndihí javaha ndo tandihí tsa cahan ra tsihin ndo, taahán tsi catyí ndo tsihin ra: “Nyuhu nduve náa ca tyiñu cuaha xaan javaha ndi. Tyiñu tsa tava ñi un tsi ndi, yacan ñi javaha ndi. Tan ña yaha ca javaha ndi.”

Nu janduvahā ra Jesús tsi utsi taahan ra ndohó cuehe tyaahyú

¹¹ Cuahán ra Jesús ityi ñuu Jerusalén tan yahā ra nu cuvī xahñu Samaria tsihin Galilea.

¹² Tan nu tsaā ra iin ñuu, quita utsi taahan ra cuuhvi tsihin cuehe tyaahyú. Tan tsicuiñi ra naha ndasava.

¹³ Tan canā tsaā ra naha tan catyí ra naha:

—Yooho, Maestro Jesús, cundaahvi iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahā ndo.

Tacan tan cuahán ra naha. Tan ityi cuahán ra naha tan nduvahā ra naha.

¹⁵ Tacan tan tsa nyehe iin ra ican tyin tsa nduvahā ra, vatsí tsihin tsata nyico ra nu nyii ra Jesús. Tan quitsahā caná tsaā ra, jacahnú ra tsi Nyoo.

¹⁶ Tan tsa tsaā ra nu nyii ra Jesús, tsicuiñi tsiti ra, tan nacañi nuu ra jiñi ra nda nu ñuhu nuu ra Jesús. Tan nacuhvā ra tyahvi nyoo tsi ra. Ra tsa nduvahā ihya, ra Samaria cuvī ra.

¹⁷ Tacan tan catyí ra Jesús:

—¿A ñavin utsi taahan ndo nduvahā? ¿Náa inga iin taahan ca ra naha?

¹⁸ ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvahā ican:

—Nduvita, cuaahan. Nduvahā un tyin tsinú iñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihya (Mt. 24.23-28, 36-41)

²⁰ Tsica tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuvī tsa ndacá ñaha Nyoo ihya nu ñuhu ñayivi.

²¹ Ña cua cuvī catyí nyivi: “Juvín ra nyii ihya, juvín ra nyii ityi ican.” Tyin Nyoo tsa tsaā ra mahñu ndo, tan ndacá ñaha ra tsi nyivi yihí cuenda ra —catyí ra tsihin ra naha.

²² Yahā yacan tan catyí ra tsihin ra tsicá tsihin ra:

—Cua tsaā quivi tsa cua cuñi ndo nyehe ndo tsi yuhu Rayi quee nda gloria. Maa tyin ña cua nyehe ndo tsi yu.

²³ Yihí ñi cua catyí ñi tsihin ndo: “Ihya nyii ra.” Inga ñi cua catyí ñi: “Ndacan nyii ra.” Maa tyin coto cuhun ndo cunyehe ndo. Tan ña cunyicun ndo tsi ra can tyin ñavin yu cuvī can.

²⁴ Tyin tandihí nyivi cua nyehe tsi yuhu, Rayi tsa quee nda gloria, quivi cua quitsi nyico yu inga tsaha. Tumaa tsa nyehé tandihí nyivi nu cañi tatsa savi tan quituvi ñuhu tatsa can ñi canduvi andivi, tacan cua cuvī quivi cua quitsi yu inga tsaha.

²⁵ Maa tyin cua nyehe jihna yu tundoho cahnu xaan. Tyin

nyiví tsa iyó vityin, ndasi cua cuñi ñi nyehe ñi tsi yu.

²⁶ Tuma q̄uiví tsa tsicō ra Noé, tacan cua cuvī q̄uiví cua quitsi nyico yuhu Raȳi queē nda gloria.

²⁷ Quiví tsicō ra Noé, tsatsí nyiví. Tsihí ñi. Tindahá ñi. Tan tsaḥá ñi sehe sihi ñi tindaḥa, nda cuanda quiví quihvī ra Noé tsitsi yutun ndoo tan cuṽn savi xaan. Tan tandihí ñi can tsihí ñi jaha ndutya.

²⁸ Tacan tucu cuvī quiví tsicō ra Lot. Tsatsí ñi. Tsihí ñi. Jatá ñi. Xicó ñi. Tatsí ñi itu. Tan javahá ñi vehe ñi.

²⁹ Tan quiví tsa quitā ra Lot ñuu Sodoma ican, cuṽn ñuhu tsihin azufre tsa queē nda andiví. Tan tsahñī ñuhu can tandihí nyiví Sodoma.

³⁰ Tacan cua cuvī quiví quitsi nyico yu tsa cuvī yu Raȳi queē nda gloria.

³¹ Tatun nyecú ndo nuquehe quiví quitsi yu, ña quihvī ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo.

³² Ndūcuhun iñi ndo tsa tahan ñasihi ra Lot.

³³ Tandihí nyooḥo tsa cuñí tsa iyó nu ñuhu ñayiví ihya, cua cunaa ndo. Tan tandihí nyooḥo tsa ña tyaá yahvi tsa iyó nu ñuhu ñayiví ihya, cua cacu ndo.

³⁴ Tan catyí yu tsihin ndo tyin tsacuaa can, uvi taahan nyiví cua cava iin nu tsito. Iin ñi cua naquihin yu. Tan inga ñi cua ndoo ñi.

³⁵ Tan uvi taahan ñiñaha, iin caa ñi cua nyico ñi quiví can. Intuhun ña cua naquihin yu. Tan inga ña cua ndoo ña.

³⁶ Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

³⁷ Tsa tsiñī ra naha tsa caḥan ra Jesús tacan, tsicā tuhun ra naha tsi ra:

—¿Numaa tahan cua cuvī yacan, Jutu Mañi yu? —catyí ra naha.

Tacan tan nacahān ra Jesús, tan catyí ra:

—Nu canyíi ndiyi, ican cua nataca nditsii.

18

Nu jacuaḥa ra Jesús tyin tuma tsa caḥan yuhu iin ñaha tsihī ȳi tsihin juez, tacan taahán tsi ndacan yo tsi Nyoo

¹ Tsaḥá cuenda ra Jesús iin cuhva ihya. Tyin iin nyita ñi cuñí tsi tsa ndacan tahvi ra naha tan ña cundihí iñi ra naha.

² Tan catyí ra:

—Iyó iin ñuu tsa nyaá iin ra cuvī juez. Tan juez ican ña tyaá yahvi maa ra tsi Nyoo. Tan ndi nyiví tan ña tyaá yahvi ra.

³ Tan juvin ñuu ican iyó iin ñaha ndaahvi tsa tsihī ȳi. Tan tsaahán ña tsicahán ña tsihin ra can, tyin tsicán ña cuatyí tsaḥa iin nu xaan iñi tsi ña.

⁴ Tan juez ican ña tyaá yahvi nu tsa caahán ña. Ña jandaḥa maa nu tyiñu tsicán ña. Tan tsanaha xaan tsicán ña. Tacan tan quitsaḥa tsicá

iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyivi,

⁵ maa tyin ñaha ihya tsahá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihi tsi yu”, cuñi ra tsicá iñi ra.

⁶ Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican.

⁷ Tan vihi ca cuví Nyoo tsihin yo, ¿a ña cua jatyinyee ra tsi nyivi tsa nacatsí ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi?

⁸ Catyí yu tsihin ndo, tyin numi ca cua jatyinyee ra tsi ñi. Maa tyin quivi tsa cua quitsi nyico yu tsa cuví yu Rayi tsa quee nda gloria, tsitó Nyoo tun nañihi ca yu tsi nyivi tsa tsinú tsa cuii iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

⁹ Tacan tan tsahá cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñi ra naha nyehé ra tsi inga nyivi. Tan catyí ra:

¹⁰ —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun

cuenda ra ndacá ñaha nda ñuu Roma cuví ra.

¹¹ Tan ra fariseo ican nduvita nyityi ra, tan quitsaha caahán ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya.

¹² Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can.

¹³ Tan ra tsa tavá xuhun can tsa cañi luxu nyaá ra. Tan ña cana iñi ra nanyehe ndaa ra. Tan cañi ndaha ra yiqui nyica ra tyin ndu uví iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

¹⁴ Tan catyí nyico ra Jesús tyehen:

—Catyí yu tsihin ndo tyin Nyoo jahá ra tucahnu iñi tsi ra tavá xuhun ican. Janaa Nyoo cuatyí ra tan cuanuhu ra nda yuvehe ra. Maa tyin ra fariseo ican, nduve tucahnu iñi tsicoo tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

Nu nasocó ra Jesús tsi tsa

nyihi

(Mt. 19.13-15; Mr. 10.13-16)

¹⁵ Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehē ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsaha ra naha cahun tsa nyihi can.

¹⁶ Tacan tan cana ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya.

¹⁷ Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuví quihvi ndo nu ndacá ñaha Nyoo.

Nu tsaha ra Jesús cuhva tyin yii xaan nacuhva cuenda iin ra cuca tsi ra tsi Nyoo

(Mt. 19.16-30; Mr. 10.17-31)

¹⁸ Tacan tan iin ra tsa cuví ityi nuu cuenda vehe ñuhu tsicá tuhun ra tsi ra Jesús, tan catyí ra:

—Maestro, ra vaha cuví un. ¿Naca cua javaha yu tan coo yu ñayivi tsa ña cua naa maa? —catyí ra.

¹⁹ Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha.

²⁰ Yooho tsitó un tandihi tuhun tsa tsaha Nyoo tyin javaha yo: “Tsa ña coo inga

ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaa yahvi un tsi jutu un tan sihi un” —catyí ra Jesús.

²¹ Tacan tan ra ican catyí ra:

—Tandihí maa yacan tan tyaá yahvi yu nda tahañ luhlu yu tan nda cuanda vityin —catyí ra.

²² Tsa tsiñi ra Jesús tsa cahan ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

²³ Maa tyin tsa tsiñi ra tsa cahan ra Jesús, nducuiihya xaan cuñi ra, tyin cuca xaan ra.

²⁴ Tan tsa nyehe ra Jesús tyin nducuiihya cuñi ra, tan catyí ra:

—Yii xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.

²⁵ Yatyi xaan ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

²⁶ Tan nyivi tsa tsiñi tsa cahan ra catyí ñi:

—Tatun tacan, ¿yoo cua cuví cacu? —catyí ñi.

²⁷ Tacan tan ra Jesús catyí ra:

—Tandihí tsa ña cuví javahá nyivi, Nyoo cuví javahá ra tandihí —catyí ra.

28 Tacan tan ra Pedro catyí ra:

—Jutu Mañi yu, nyuhu tandihi maa tsa iyó tsi ndi nacoq ndi, tan nyicún ndi tsi un —catyí ra.

29 Tacan tan catyí ra Jesús tsihin ra:

—Tsa nditsa catyí yu tsihin ndo, tyin tandihi nyooho tsa nacoq vehe, a ñasihi ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo,

30 cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

Inga tsaha jacoto ra Jesús cuhva cua cahñi nyivi tsi ra

(Mt. 20.17-19; Mr. 10.32-34)

31 Tan cana sijn ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cahun yo nda ñuu Jerusalén. Tyin ndacan cua cundaa tyiñu Rayi tsa quee nda gloria: tandihi tyiñu tsa tyaa ra cuvi ndusu yuhu Nyoo tahañ tsanaha.

32 Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tivi sii ra naha nuu yu.

33 Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

34 Maa tyin ña cutuñi iñi ra tsicá tsihin ra tsa cahan ra, tan ndi ña tsitó ra naha náa tuhun cahan ra tsihin ra naha. Tyin ña cuví cutuñi iñi ra naha.

Nu janduvaha ra Jesús iin ra cuaa ñuu Jericó

(Mt. 20.29-34; Mr. 10.46-52)

35 Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra.

36 Tacan tan tsiñi ra cuvaa tsa yahá cuaha nyivi. Tan tsica tuhun ra náa cuenda ñihi xaan cuvaa.

37 Tan catyí tuhun nyivi tsihin ra tyin ra Jesús, ra ñuu Nazaret, vatsí.

38 Tacan tan quitsaha caná tsaa ra tan catyí ra:

—¡Yooho Jesús, tata ra rey David! ¡Cundaahvi iñi tsi yu! —catyí ra.

39 Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca cana tsaa ra, tan catyí ra:

—¡Yooho, tata ra rey David! ¡Cundaahvi iñi tsi yu! —catyí ra.

40 Tacan tan tsicuiñi ra Jesús. Tan tava tyiñu ra na cahun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

41 —¿Náa cuñi un javaha yu tsihin un?

Tacan tan ra cuaa ican nacahan ra, tan catyí ra:

—Jutu Mañi yu, cuñi yu nanyehe yu —catyí ra.

42 Tacan tan catyí ra Jesús tsihin ra:

—Nanyehe. Tsa nduvaha tinuu un tyin tsinú ñni un tsi yu —catyí ra.

⁴³ Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihi nyivi tsa nyehe tsa cuví can, jacahnú ndihi tucu maa ñi tsi Nyoo.

19

Nu cuahán ra Jesús vehe ra Zaqueo

¹ Tacan tan quihví ra Jesús ñuu Jericó. Tan cua yaha ra tsitsi ñuu.

² Tan ñuu can iyó iin ra cuca xaan, nañí ra Zaqueo. Tan cuví ra ityi nuu tsihin ra tavá xuhun cuenda ra ndacá ñaha nda ñuu Roma.

³ Ra ihya cuñí xaan ra nacoto ra tsi ra Jesús. Tan ña cuví nyehe ra tsi ra tyin cuaha xaan nyivi cuahan tsihin ra. Tan maa ra ndiqui xaan ra.

⁴ Tacan tan tsinú xaan ra cuahán ra ityi nuu, tan ndaa ra iin nu yutun cahnu tsa nañí sicómoro tsa nyaá yuhu ityi nu cua yaha ra Jesús, tan cuví nyehe ra tsi ra Jesús.

⁵ Tan cuhva tsa quita ra Jesús nu nyaá yutun can, nanyehe ndaa ra ityi siqui tan nyehe ra tsi ra Zaqueo. Tan catyí ra tsihin ra:

—Zaqueo, janumi nuu un nu yutun juvin. Tyin vityin cuñí tsi tsa cuhun yu yuvehe un —catyí ra tsihin ra.

⁶ Tacan tan numi xaan nuu ra Zaqueo. Tan sih xaan cuñí ra. Tan quihin ra tsi ra Jesús cuahán tsihin ra yuvehe ra.

⁷ Tan tsa nyehe nyivi tsa tacan cuví, tandihi ñi quita saha caahán nyaa ñi tsi ra Jesús. Tan catyí ñi tyin ndoo ra vehe iin ra iyó cuatyí.

⁸ Tan nu nyecú ra naha tsitsi vehe, ra Zaqueo tsinyaa nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandavi ñaha yu tsi nyivi tan suhuv yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

⁹ Tacan tan catyí ra Jesús:

—Vityin cacu un, tan nyivi ra Abraham cuví tsi un. [Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo.]

¹⁰ Tyin yuhu, Rayi tsa quee nda gloria, vatsí yu vatsí nanducu yu tan vatsí jacacu yu tsi nyivi tsa cuanaa maa —catyí ra Jesús.

Nu jacuahá ra Jesús tsi yo na jaha tyiñu yo tsihin tsa tsaha Nyoo tsi yo
(Mt. 25.14-30)

¹¹ Tan tsitsi tsa tsiñí nyivi tsa caahán ra Jesús, tan quita saha tsahá cuenda ra inga cuhva ihya tsi ñi. Tyin tsa cuñí tsa ra ñuu Jerusalén. Tan nyivi cuñí maa ñi tyin tsa cua quita saha cundaca ñaha ra ndacan.

¹² Tacan tan catyí ra:

—Tsicoo iin ra cuca tan tsa cuñí cuhun ra iin ñuu cañi. Tyin ndacan cua quihin cuenda ra tyiñu tsa cuví ra

rey, tyin tacan tan cua quitsi nuhu nyico ra ñuu ra.

¹³ Tsa ndi cumañi ca cuhun ra, cana ra utsi taahan musu ra. Tan tsaḥa cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra.

¹⁴ Maa tyin nyivi ñuu ra, ndasi cuñi ñi nyehé ñi tsi ra tan ña cuñi ñi tsa cundaca ñaha ra tsi ñi. Tan jacuhun ñi tsi ra cuhun cunycun tsi ra, tyin cahan ra naha tyin ña cuñi ñi tsa cundaca ñaha ra tsi ñi.

¹⁵ Maa tyin ra ican cuvi maa ra rey. Tacan tan tsaḥ nyico ra nda ñuu ra. Tan quivi tsa tsaḥ ra, cana ra tsi musu ra, ra tsa nacoḡ ra xuhun tsihin. Tyin cuñi ra coto ra nácaa xuhun jaha canaa xuhun ra tsa nacoḡ ra.

¹⁶ Tan tsaḥ iin ra ican. Tan catyí ra: “Yooho taa, jaha canaa yu utsi taahan ca siqui xuhun tsa nacoḡ un tsi yu”, catyí ra.

¹⁷ Tacan tan catyí ra rey can tsihin ra: “Vaha xaan. Yooho cuvi musu vaha. Tyin javaha un ndihi tyiñu tsa tava yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra.

¹⁸ Tacan tan tsaḥ tucu inga ra tsa tsaḥ ra xuhun. Tan catyí ra: “Juhun xuhun ihya. Jaha canaa yu uhun taahan ca siqui xuhun tsa nacoḡ un tsi yu”, catyí ra.

¹⁹ Tacan tan catyí ra rey tsihin ra: “Yooho cua cundaca ñaha un uhun taahan ñuu”,

catyí ra.

²⁰ Tacan tan tsaḥ tucu inga ra can. Tan catyí ra: “Juhun xuhun tsa tsaḥ un tsi yu. Yuhu naquihin vaha yu itsi tsitsi pañitu.

²¹ Tyin yuuhvi xaan yu tsi un, tyin yooho xaan xaan un. Tyin tuhva un naquihin tsa ñavin tsa tatsi un. Tan naquihín un ndaha tyiñu quita nu jaha tyiñu inga nyivi”, catyí ra can.

²² Tacan tan ra rey ican catyí ra tsihin ra: “Yooho musu ña vaha cuvi un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquihín yu tsa ña tatsi yu, tan naquihín yu ndaha tyiñu inga nyivi,

²³ ¿nacuvi tyin ña tsityihí un xuhun yu banco tyin tsaḥ yu maa tyin tsa nandaa xuhun yu?” catyí ra rey can.

²⁴ Tan catyí ra tsihin ra nyecú ican: “Quinyaa ndo xuhun tsa tsaḥ yu tsi ra ihya, tan cuhva ndo tsi ra tsa jaha canaa utsi taahan ca siqui tsa tsaḥ yu tsi ra”, catyí ra.

²⁵ Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha.

²⁶ Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jaha tyiñu tsihin tsa tsaḥ yu tsi ra, cuaha ca cua cuhva yu tsi ra. Tan ra tsa tsaḥ yu luxu ñi, tan ña cuñi ra jaha tyiñu ra tsihin tsi, cua quinyaa yu

tandihi can tsi ra.

²⁷ Tan tandihi nyivi xaan iñi tsi yu, ñi tsa ña cuñi tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

Nu tsaq ra Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Tsa yaha cahan ra Jesús yacan, tan jañihí ra cuahán ra ñuu Jerusalén.

²⁹ Tacan tan tsa cuñi tsa ra ñuu Betfagé tsihin ñuu Betania, yatyin ñi iin yucu tsa nañi Olivo, [tyin maa ñi maa yutun olivo iyó ican]. Tava tyiñu ra tsi uvi taahan ra tsicá tsihin ra.

³⁰ Tan catyí ra tsihin ra naha:

—Cuaahan ndo ñuu tsa canyii yatyin ñi ihya. Ican cua nañihi ndo iin burru luhlu, quití tsa ñaha ca quihi tyayu. Nuuhñi ti. Ndatsi ndo tsi ti. Tan quitsi ndaca ndo tsi ti tsi yu.

³¹ Tatun yóo tsicá tuhun tsi ndo: “¿Nacuenda ndatsí ndo tsi ti?” catyi ndo tsihin ñi: “Ndatsí ndi tsi ti tyin tsiñi ñuhu ti tsi ra ndacá ñaha.”

³² Tacan tan ra tsicá tsihin ra, cuahán ra naha. Tan nañihí ra naha tsi ti tumaa tsa cahan maa ra tsihin ra naha.

³³ Tan cuhva tsa ndatsí ra naha tsi ti, tsaq tsitoho ti. Tan nducú tuhun ra can naha ra tsi ra naha tan catyí ra:

—¿Nacuenda ndatsí ndo burru ihya? —catyí ra naha.

³⁴ Tacan tan nacahan ra can naha ra:

—Ndatsí ndi tsi ti tyin tsiñi ñuhu ti tsi ra ndacá ñaha —catyí ra naha.

³⁵ Tacan tan quihin ra naha tsi ti. Tan tsindaca ra naha tsi ti nu nyii ra Jesús. Tan tyiso ra naha jahma ra naha tsata ti. Tacan tan jandaq ra naha tsi ra Jesús tsata ti.

³⁶ Tacan tan cuahán ra Jesús. Tan cuaha xaan nyivi cuahán tsihin ra tsaquin ñi jahma ñi nu ñuhu ityi nu cua yaha ra, yosó ra burru ican.

³⁷ Tsa tsa cua cuyatyin tandihi nyivi tan ra Jesús nu iñi nuu yucu Olivo, quitsaha caná tsa tandihi ñi tsiñi iñi tsi ra tsihin tsa siñi cuñi ñi. Tan jacahnú ñi tsi Nyoo tyin cuaha xaan tsa iyo javaha ra nyehe ñi.

³⁸ Tan catyí ñi:

—¡Na jacahnu yo tsi ra Rey ihya tyin vatsí ra tsihin sivi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyí ñi.

³⁹ Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyivi ihya —catyí ra naha.

⁴⁰ Tan nacahan ra Jesús tan catyí ra:

—Tatun nyivi ihya tan cutaxin ñi, yuu cua cana tsa, tan cua jacahnu tsi tsi yu —catyí ra Jesús.

⁴¹ Tacan tan tsa tsaq ra Jesús yatyin ñi yuhu ñuu Jerusalén, nanyehe ra ñuu can tan quitsaha tsacú ra tsa cuihya cuñi ra.

⁴² Tan catyí ra:

—Vaha xaan tun tsatyin cuvi coto ndo tan cutuñi iñi ndo nácaa ñihi ndo tsa taxin coo añima ndo vityin ihya. Maa tyin xeehe xaan yihí tsa vaha can, tan ña cuví nañihi ndo can.

⁴³ Coo quiví cua nyehe ndo tundoho jaha nu xaan iñi tsi ndo cua tyihi cutu nahnu tsi ndo. Tandihí ityi cua quitsi nahnu. Tan cañi tahan nahnu tsihin ndo.

⁴⁴ Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi in-tuhun ca yuu tsa yosó toto tan ña cua nacoo ca nahnu. Tacan cua cuví tyin maa ndo ña cuñi ndo nacoto ndo tyin tsa vatsí Nyoo, vatsí jacacu ra tsi ndo.

Nu tavá ra Jesús tsi nu xicó tsitsi vehe ñuhu cahnu nahnu
(Mt. 21.12-17; Mr. 11.15-19; Jn. 2.13-22)

⁴⁵ Tacan tan quihví ra Jesús tsitsi cora vehe ñuhu cahnu. Tan quitsahá tavá ra tandihí nyiví xicó tan nyiví jatá tsa yucú nu quehe.

⁴⁶ Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyoo-ho jananduví ndo itsi vehe ñasuhu —catyi ra Jesús.

⁴⁷ Tan tandihí quiví tsaahán ra Jesús tsijacuahá ra tsi nyiví tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra.

⁴⁸ Maa tyin ña ñihí maa ra naha nácaa javaha ra naha tyin tandihí nyiví tan vaha tyaá soho ñi tsa caahán ra Jesús.

20

Nu tsicá tuhun ra cumi tyiñu vehe ñuhu naha ra tsi ra Jesús yóo tavá tyiñu tsi ra tsa cahan ra tsihin nyiví

(Mt. 21.23-27; Mr. 11.27-33)

¹ Iin quiví jacuahá ra Jesús tsi nyiví tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaá ra jutu tsa cuví ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuví mandoñi naha ra.

² Tan catyí ra naha tsihin ra Jesús:

—Cati tyi tuhun tsihin ndi ¿yóo tavá tyiñu tsi un javaha un tyiñu ihya? —catyí ra naha.

³ Tacan tan ra Jesús catyí ra tsihin ra naha:

—Yuhu cuñi tucu yu nducu tuhun yu tsi ndo.

⁴ ¿Yóo jaquitsí tsi ra Juan tyin jacoondutya ra tsi nyiví? ¿A Nyoo jaquitsí tsi ra, a nyiví?

⁵ Tacan tan ra ican naha ra quitsahá caahán yuhu tahan ra naha tan catyí ra naha:

—Tun catyí yo tyin Nyoo jaquitsí tsi ra Juan, cua catyi ra tsihin yo nacuenta ña tsinú iñi yo tsa cahan ra Juan.

⁶ Tun catyí tucu yo tyin nyiví jaquitsí tsi ra, tandihí nyiví cua cahñi ñi tsi yo tsihin yuu. Tyin tandihí ñi, tan cuñi

ñi tyin ndusu yuhu Nyoo cuvī ra Juan —catyī ra naha.

⁷ Tacan tan nacahan ra naha tsihin ra Jesús tyin ña tsitó ra naha yóo tava tyiñu tsi ra Juan jacoondutya ra tsi nyivi.

⁸ Tacan tan ra Jesús catyī ra tsihin ra naha:

—Ndi yuhu, tan ña cua catyī tuhun yu tsihin ndo yóo tava tyiñu tsi yu tsa javaha yu tyiñu ihya.

Nu jacuahā ra Jesús tyin tumaa cuvī juhva ra caquiñi naha ra, tacan cuvī ra tsa cua cahñi tsi ra

(Mt. 21.33-44; Mr. 12.1-11)

⁹ Tacan tan tsahā cuenda ra Jesús iin cuhva ihya tsi nyivi:

—Iin ra, tatsi cuaha ra nu ñuhu ra yoho tsiti yucu tsa cua cuvī vinu. Yahā can tan tsahā nuu ra ñuhu can tsi juhva ra jahá tyiñu. Tacan tan naha cuahán ra inga ñuu.

¹⁰ Tan quivi tsa iñi tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundi ra jacunuhu ra naha tsi ra.

¹¹ Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahan nyaa ra naha tsi ra. Tan jacunuhu ra naha tsi ra. Tan juvín ñi nduve tsa tsahā ra naha cuiso ra cunuhu ra.

¹² Tacan tan ra cuvī tsitoho yoho can jacuhun nyico ra inga ra. Maa tyin juvín ñi tacan javahā nyico ra naha

tsihin ra can. Tan jañicuehe ra naha tsi ra. Tan tava ra naha tsi ra.

¹³ Yahā can tan catyī tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñi xaan yu. Vasiqi cua tyaa yahvi ra naha tsi ra, tyin sehe yu cuvī tsi ra”, catyī ra.

¹⁴ Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyī ra naha.

¹⁵ Tacan tan tava ra naha tsi sehe tsitoho ñuhu ican ityi tsata cora, tan tsahñi ra naha tsi ra —catyī ra Jesús.

Tacan tan catyī ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsahñi ra naha sehe ra?

¹⁶ Catyī yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyī ra Jesús.

Tan tsa tsiñi nyivi tsa caahán ra, nayuhvi xaan ñi cuvī. Tan catyī ñi:

—¿Ña cuñi Nyoo tahan yo tacan! —catyī ñi.

¹⁷ Maa tyin ra Jesús nanyehē ra nuu ñi tan catyī ra:

—Tun tacan tsicá iñi ndo ¿náa cuñi tsi catyī tsa nyaá nu tutu Nyoo? Tyin catyī tsi tyehen:

Yuu tsa ña cuñi ra javaha
vehe cuatyĩnu ra,
yacan cuvı yuu tsa tsiñi ñuhu
ca.

¹⁸ Yoo nyivi cua canacava
tsata yuu can, cua tahnu
cuatyı ñi. Tan tatun maa yuu
can canacava tsata ñi cua
taxin nyihi ñi —catyı ra Jesús.

¹⁹ Tan ra jutu tsa cuvı ityi
nuu naha ra tan ra maestro
cuenda ley vehe ñuhu naha
ra, tuvı iñi ra naha tyin tsa
cahan ra Jesús tacan, tsi maa
ra naha nañi can. Tan cuñi
ra naha tiin ra naha tsi ra tyin
cañi ra naha tsi ra. Maa tyin
ña tsitó maa ra naha nácaa
javaha ra naha, tyin nayuhvi
ra naha tsi nyivi.

*Nu jacuahā ra Jesús tsa
cuenda tsa tyahvi nyivi xuhun
tsi ra ndacá ñaha ñuu Roma
(Mt. 22.15-22; Mr. 12.13-
17)*

²⁰ Tacan tan jacuhun ra
naha tsi juhva ra nducu
cuhva tsi ra Jesús. Tan jahā
ra naha tyin ra vaha cuvı ra
naha. Tyin tacan tan coto
ra naha náa tsa ña vaha cua
cahan ra Jesús tan cuvı tiin
ra naha tsi ra. Tan cuhva
cuenda ra naha tsi ra tsi ra
ndacá ñaha.

²¹ Yacan tsicā tuhun ra
naha tsi ra Jesús:

—Maestro, tsitó ndi tyin
vaha tsa caahán un. Tan
jacuahá un tsa vaha tsi nyivi.
Tan ñavin cuhva iyó ñi nyehé
un maa tyin nyehé un cuhva
iyó añima ñi. Tan maa ñi
maa tsa nditsa tyin ityi Nyoo
janahá un.

²² Catyı tsihin ndi ¿a vaha
tsa tyahvi yo tsa tsicán ra

ndacá ñaha nda ñuu Roma tsi
yo, a ña vaha? —catyı ra
naha.

²³ Tan ra Jesús tuvı iñi ra
tyin nducu cuhva ra naha tsi
ra. Tan catyı ra tsihin ra
naha:

—¿Nacuenda cuñi ndo
nducu cuhva ndo tsi yu?

²⁴ Janaha jihna ndo iin
xuhun tsi yu, na nyehe yu.
¿Yoo nuu nyaá xuhun can tan
yoo sivi nyaá can? —catyı ra.

Tacan tan nacahan ra
naha:

—Nuu ra ndacá ñaha, ra
cuvı rey cahnu, nyaá can
tan juvin ñi sivi ra nyaá can
—catyı ra naha.

²⁵ Tacan tan catyı ra Jesús:

—Tun tacan, cuhva ndo
xuhun can tsi ra ndacá ñaha
tyin tsii maa ra cuvı tsi. Tan
cuhva ndo tsi Nyoo tsa taahán
tsi tsi ra —catyı ra Jesús tsihin
ra naha.

²⁶ Tan ña cuvı maa jandavi
ñaha ra naha tsi ra Jesús tsi-
hin tsa caahán ra tacan tsihin
nyivi. Tan iyo xaan cuñi ra
naha tsa nacahan ra. Tan
taxin ña cuvı ra naha.

*Nu cuñi ra cuvı saduceo
naha ra jandavi ñaha ra naha
tsi ra Jesús*

*(Mt. 22.23-33; Mr. 12.18-
27)*

²⁷ Tsa yaha can tan tsaā
juhva ra cuvı saduceo nu nyii
ra Jesús. Maa ra naha cuvı ra
tsa catyı tyin ña nandoto nyivi
tun tsa tsihi ñi.

²⁸ Tacan tan catyı ra naha
tsihin ra Jesús:

—Maestro, jandoo ra
Moisés tyiñu ihya tyin tatun
iin ra tsihi tan nandoo ñasihi

ra, tatun nduve sehe ra tsicoo tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra.

29 Maa tyin cuñi ndi coto ndi nácaa, tyin tsicoo iin ra tan tsicoo utsa sehe ra. Tan ra tsa ñihi ca tsicoo ñasihi ra, maa tyin nduve sehe ñi tsicoo, tan tsihi ra.

30 Tacan tan naquihin ra tsa tsinu uvi tsi ña can. Tan nduve tucu sehe ñi tsicoo. Tan tsihi tucu ra can.

31 Tan juvin ñi tacan javaha ra tsinu uñi. Tandihí tsa utsa ra naha javaha tacan. Ndi intuhun ra tan ña tsicoo sehe ra tsihin ña.

32 Tan nu ndihí tuhun tsihi ndihí maa ña.

33 Tan cuñi ndi coto ndi yoo ra cua cuví yñi ña tsitsi tsa tandihí tsa utsa taahan ra naha quivi cua nandoto nyivi —catyí ra saduceo naha ra.

34 Tacan tan nacahan ra Jesús, tan catyí ra:

—Ihya nu ñuhu ñayivi, rayii tan ñaha tindaha ñi.

35 Maa tyin nyivi tsa nacatsi Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha.

36 Tan nduve tuhun tsihi iyó ndacan tyin cua cuví ñi tumaa ángel. Tan cua cuví ñi sehe Nyoo tyin nandoto ñi.

37 Tan tsa cuenda tuhun tsa nandoto ndiyi. Tsa nditsa cuví tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyivi tsihi cua nandoto ñi. Tyin catyí ra: “Jutu yo Nyoo

cuenda ra Abraham, tan cuenda ra Isaac, tan cuenda ra Jacob”, catyí ra Moisés.

38 Tacan catyí ra tyin Nyoo, ñavin Nyoo cuenda nyivi tsihi cuví ra. Nyoo cuenda nyivi nyito cuví ra. Tyin tsa cuenda Nyoo tandihí yo tan nyito aña yo vasu tsa tsihi cuñu ñuhu yo —catyí ra Jesús.

39 Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahan un, Maestro —catyí ra naha.

40 Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuví ra tata ra David, tan juvin ñi cuví tucu ra Sehe Nyoo

(Mt. 22.41-46; Mr. 12.35-37)

41 Tacan tan tsica tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra?

42-43 Tyin juvin ñi maa ra David catyí ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunya xiiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo tsa tsatyin ra yuhu ra David tahanan tsanaha.

44 ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu caħan ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihí nyívi tsiñi ñi tsa caħan ra Jesús tsihin ra tsicá tsihin ra nu caħan ra tyehen:

⁴⁶ —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñí ra naha tsa cuhva nyívi yucú nuyahvi nacumi tsi ra naha tsihin tsa jaha ñi tsa ñayívi tsi ra naha. Tan nanducú ra naha tyayu vaha cunyecu ra naha tsitsi vehe ñuhu, tan nu cuahán ra naha vico.

⁴⁷ Tan naha tsicán tahvi ra naha tsi Nyoo nu tuví, tsa cuñí ra naha tsa nyehe nyívi tan catyí ñi tyin vaha xaan nyívi cuví ra naha. Maa tyin juvin ñi maa ra naha cuví ra quinyaá vehe ñi ndaahvi tsa tsihi yí tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

21

Tsa jamañi iin ñaha ndaahvi tsa tsihi yí
(Mr. 12.41-44)

¹ Tan nyehe ra Jesús tyin cuaha xaan nyívi cuca tyihí ñi xuhun tsitsi caja tsa nyíi tsitsi vehe ñuhu cahnu.

² Tan nyehe tucu ra tsi iin ñaha ndaahvi tsa tsihi yí. Tan tyihí ña uvi taahan ñi xuhun nyihi.

³ Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can.

⁴ Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catyí ra.

Nu caħan ra Jesús tyin cua tani vehe ñuhu cahnu

(Mt. 24.1-2; Mr. 13.1-2)

⁵ Tacan tan juhva nyívi natuhún ñi tuhun cuenda vehe ñuhu cahnu ican. Tan catyí ñi tyin sii xaan caá yuu. Tan sii xaan caá tsa jamañi nyívi. Tacan tan catyí ra Jesús:

⁶ —Coo quivi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua cani nu xaan iñi tsi ndo.

Tsa cua cuvi tsa ndi cumañi ca naa ñuhu ñayívi

(Mt. 24.3-28; Mr. 13.3-23)

⁷ Tacan tan nducú tuhun nyívi tsi ra Jesús, tan catyí ñi:

—Maestro, ¿ama cua cuvi tandihí tsa caahán un ihya? ¿Nacaa tan coto ndi tatun tsa cuyatyin tsa naa ñuhu ñayívi? —catyí ñi.

⁸ Tacan tan catyí ra Jesús:

—Jaha vaha ndo cuenda, coto jandavi ñaha nyívi tsi ndo. Tyin cuaha xaan ra cua quitsi, tan cua cuatyínu ra naha sivi yu, tan cua catyí ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayívi”, cua catyí ra. Maa tyin ña cunyi-cun ndo tsi ra naha.

9 Tan quiví cua ñihi tuhun ndo tyin tsa iyó cuatyí tan ñihi cañí tahan nyiví, ña nayuhvi ndo. Tyin tandihi can taahán tsi cuví tsa jihna ñi. Maa tyin cumañi ca tsa quiví tsa cua naa ñuhu ñayiví.

10 Tan catyí tucu ra:

—Nyiví iyó iin ñuu cua cañi tahan ñi tsihin nyiví inga ñuu. Tan cua coo cuatyí.

11 Tan ñihi xaan cua taan. Tan cua coo tama. Tan cua coo cuehe tandihi ñi ityi. Tan cua nyehe nyiví tsa yuuhví ityi andiví. Tan cuaha xaan tsa iyo nahnu tsa ña tuhvá nyiví nyehe tan cua nyehe ñi.

12 Maa tyin tsa ndi cumañi ca cuví yacan, cua cuxaan iñi nyiví tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihi ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí siví yuhu.

13 Tacan tan cuví cahan ndo tuhun yu tsihin ñi.

14 Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ican.

15 Tyin yuhu cua cuhva yu tuhun cua cahan ndo. Tan cua cuhva yu tsa nyityí jiñi ndo nu cua cahan ndo. Ndi intuhun nu xaan iñi tsi ndo tan ña cuví jaha nahnu tsi ndo.

16 Maa tyin nyiví cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyiví ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi

tsi ndo. Tan yihí nyooho cua cahñi nyiví tsi ndo.

17 Tandihi nyiví tan ndasi cua cuñi ñi nyehe ñi tsi ndo tsacatyí yuhu.

18 Maa tyin ndi intuhun ixi jiñi ndo tan ña cua cunaa.

19 Tatun ña ndu uvi iñi ndo tsa nyicun ndo tsi yu, cua cacu ndo.

20 'Quiví cua nyehe ndo tyin nii canduvi yuhu ñuu Jerusalén ihya nyecú andarú, coto ndo tyin tsa cuñi naa ñuu ihya.

21 Tan nyiví iyó ñuu tsa cayucú Judea, cua cunu ñi tan cuhun xeehe ñi ityi yucu. Tan nyiví iyó ñuu Jerusalén ihya, cua quita ñi. Tan nyiví iyó tsitsi cuhu, ña cua quitsi nuhu ñi ñuu ihya.

22 Tyin yacan cuví quiví tsa cua tatsi tuñi Nyoo tsi nyiví ñuu ihya. Tyin tsa cua cuví tandihi cuhva catyí nu tutu Nyoo.

23 Tan ndahvi ñiñaha tsa ñuhú sehe quiví can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihi nyiví. Tyin cahnu xaan tsa uhvi cua nyehe nyiví ñuu Jerusalén ihya cua jaha Nyoo.

24 Andaru cua cahñi ra naha tsi juhva nyiví tsihin mityi. Tan cua tin ra naha juhva ñi tan cundaca ra naha tsi ñi ñuu nahnu. Tan nyiví tsa ñavin nyiví Israel cuví, cua cuyucu ñi ñuu Jerusalén ihya nda cuanda quiví tsa catyí maa Nyoo.

Nacaa cua quitsi Rayii tsa quee nda gloria inga tsaha

(Mt. 24.29-35, 42-44; Mr. 13.24-37)

25 Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu.

26 Tan cua cúu naaha ñi tsihin tsa yuuhvi ñi tsa tsicá ñi ñi náa ndihi tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan.

27 Tacan tan cua nyehe ñi tsi yuhu, Rayii tsa quee nda gloria, vatsi nuu yu tsitsi vico tsihin tunyee ñi Nyoo, tan tsihin tsa cahnu cuvi ra.

28 Tan cuhva tsa cua quitsaha yacan tan jandu iin ndo ñi ndo tan cusii ñi ndo tyin numi xaan cua cacu ndo —catyí ra.

29 Tacan tan tsaha cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihi ca yutun.

30 Tatun tsa nduyutyá numa tun tsa cuyatyin cuun savi.

31 Tan tacan tucu nyooho, tatun tsa nyehe ndo tyin tsa quitsaha cuvi tandihi tsa cahan yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

32 Maa tyin tsa nditsa catyí yu tsihin ndo tyin yacan cua cuvi jihna tsa ndi cumañi ca cúu nyivi tsa iyó nu ñuhu ñayivi.

33 Coo quivi cua naa andivi tan ñuhu ñayivi, maa tyin tuhun caahan yu, ña cua cundihi tsi.

34 Tan jaha ndo cuenda tsi ndo coto ndundava ñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan ñi ndo tundoho ñayivi ihya. Jaha ndo cuenda coto ndundava ñi ndo tsihin yacan. Tan coto sana ñi ndo tan quita quivi cua quitsi yu tan cua quitsi tundoho cua nyehe ndo.

35 Tyin tacan cua cuvi, tandihi nyivi iyó nu ñuhu ñayivi, sana ñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi.

36 Maa tyin nyooho cuatu ndo. Ndacan tahvi ndo tsi Nyoo tandihi quivi, na jacacu ra tsi ndo. Tan ña nyehe ndo tandihi tundoho tsa cua coo. Ndacan tahvi ndo, tacan tan cua cuvi tsa ndo nu nyaá yuhu, Rayii tsa quee nda gloria —catyí ra Jesús.

37 Tan tandihi quivi jacuahá ra Jesús tsi tandihi nyivi tsitsi vehe ñuhu cahnu. Tan tsa tsacuaa tsicá ra yucu Olivo.

38 Tan tandihi nyivi tsaá ñi tsitsi vehe ñuhu cahnu ndihi tsa tui, tyin tyaa soho ñi tsa caahan ra.

22

Nu cua xico ra Judas Iscariote tsi ra Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

1 Tan tsa nyanaá yatyin quivi tsa cua coo vico pas-cua, vico nu tuhvá nyivi tsatsi

paan tsa nduve yutsan iya yihí.

² Tan ra jutu tsa cuví ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyívi.

³ Tacan tan quihví nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsi ra Jesús.

⁴ Tan nu ihya, tsahan nu tsicahan nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha.

⁵ Tan ra ican naha ra sii xaan cuñi ra naha. Tan tyihí ra naha cuhva tyin cuhva ra naha xuhun tsi ra Judas.

⁶ Tan ra Judas ndoo ra vaha. Tan quitsaha nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyívi yucú tsihin ra Jesús.

Nu cuxiñi ra Jesús tsihin ra tsicá tsihin ra

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Tan tsaá quívi tsa cuví vico tsa tsatsí nyívi paan tsa nduve yutsan iya yihí. Tan juvin ñi quívi ican tuhvá ñi tsahñi iin mbee luhlu tsa vico pascua can. Tyin catsi ñi tsi ti.

⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cujan-
duvaha ndo mbee tsa cua
cuxiñi yo cuenda vico pascua
—catyí ra.

⁹ Tacan tan nducú tuhun ra naha tsi ra:

—¿Numaa cuñi un javaha
ndi tsa cuxiñi yo? —catyí ra
naha.

¹⁰ Tacan tan catyí ra Jesús
tsihin ra naha:

—Cuaahan ndo tsitsi ñuu.
Ican cua nañihi ndo tsi iin
ra nyisó iin quívi ndutya.
Cuaahan ndo tsata ra tan
quihví ndo vehe nu quihví ra.

¹¹ Tan catyí ndo tsihin tsi-
toho vehe can: “Ra cuví Mae-
stro, cuñi ra coto ra numaa
nyaá cuarto nu cua cuxiñi
ra tsihin ra tsicá tsihin ra,
tyin jacahnu ra vico pascua.”
Tacan catyí ndo tsihin ra.

¹² Tacan tan cua janaha ra
iin cuarto cahnu ityi siqui, nu
tsinu uvi pisu tsi ndo. Tan tsa
nduvaha maa tsi. Tan nda-
can cua javaha ndo tsa cuxiñi
yo —catyí ra tsihin ra naha.

¹³ Tacan tan cuahan ra
naha. Tan nañihi ra naha
tandihí tumaa tsa cahan ra
Jesús. Tacan tan na icá vaha
ra naha tsa cuxiñi ra naha
cuenda vico pascua.

¹⁴ Tacan tan tsa tahan tsi
cuhva tsa cuxiñi ra Jesús tsi-
hin tandihí ra tavá tyiñu ra,
tsinyecú ra naha yuhu mesa.

¹⁵ Tacan tan catyí ra Jesús:
—Cuñi xaan yu cuxiñi yu
tsihin ndo cuenda vico pas-
cua ihya tsa ndi cumañi ca
nyehe yu tundoho tan cúu yu.

¹⁶ Tan catyí yu tsihin ndo
tyin ña cua catsi ca yu inga
tsaha tsa cuenda vico ihya,
nda cuanda tahan tsi inga

tsaha nda nu ndacá ñaha Nyoo —catyí ra.

¹⁷ Tacan tan quihin ra iin vasu vinu. Nacuhva ra tyahvi nyoo tsi Nyoo. Yaha can tan catyí ra tsihin ra nyecú tsihin ra:

—Quihin ndo tsehe. Tan coho ndo luxu luxu.

¹⁸ Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

¹⁹ Yaha can tan quihin ra paan, tan tsaha ra tyahvi nyoo tsi Nyoo, tan tsahnya sava ra can. Tsahan tsaha ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

²⁰ Tan tsa yaha cuxiñi ra naha, tacan tan quihin ra vasu vinu, tan catyí ra:

—Tsihin vinu ihya ndoó Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuví tsi. Tan tsa vaha tsi nyooho tan cua cati niñi yu. Tan cua cúu yu.

²¹ Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya.

²² Tyin yuhu, Rayi tsa quee nda gloria, cua tahan yu tumaa tsa nyaá maa tsa cua tahan yu. Maa tyin jndahvi

ra tsa cua nacuhva cuenda tsi yu! —catyí ra Jesús.

²³ Tacan tan ra tsicá tsihin ra Jesús quitsaha nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cahan yuhu tahan ra tsicá tsihin ra Jesús, yoo ra cahnu ca cuví

²⁴ Yaha can tan quitsaha caahan yuhu tahan ra tsicá tsihin ra Jesús, ndáa ra cahnu ca cuví.

²⁵ Tan ra Jesús catyí ra:

—Tsitó nyooho tyin ra ndacá ñaha tsi nyivi iyó nu ñuhu ñayivi, ñihi xaan ndacá ñaha ra naha tsi ñi. Tan cuñí ra naha tyin catyí nyivi tyin jatyinyeé ra naha tsi ñi.

²⁶ Maa tyin nyooho ña taahán tsi javaha ndo tumaa javahá ra ícan naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuví ndo musu tandihi ndo.

²⁷ Tyin nu ñuhu ñayivi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

²⁸ Tan nyooho cuví ndo tsa nyecú tsihin yu tandihi nu nyehé yu tundoho.

²⁹ Yacan cuenda, yuhu tsaha yu iin nu cua cundaca ñaha ndo tumaa tsa tsaha Jutu yu tsa cundaca ñaha yu.

³⁰ Tyin cua catsi ndo tan cua coho ndo nu mesa tsihin yu nda nu ndacá ñaha yu.

Tan ndacan cua cunyecu ndo cundaca ñaha ndo nyivi cuví tata tsa utsi uvi sehe ra Israel.

Nu caahán ra Jesús tyin cua catyi ra Pedro tyin ña nacoto ra tsi ra

(Mt. 26.31-35; Mr. 14.27-31; Jn. 13.36-38)

³¹ Tacan tan catyí ra Jesús tsihin ra Pedro:

—Nyēhe vaha un, yooho Simón. Tyin nu ña vaha tsa tsicān ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo.

³² Maa tyin tsicān tahvi xaan yu tsi ra tsa cuenda un, na ña jandihí un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandihí ra naha tsa tsinú iñi ra naha tsi yu —catyí ra Jesús tsihin ra Simón.

³³ Tan ra Simón catyí ra tsihin ra:

—Jutu Mañi yu, tsa ndu iin vaha iñi yu tsa cuhun yu tsihin un vasu vehe caa, vasu cúu yu tsihin un —catyí ra.

³⁴ Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyi un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñí tsa cuhva tsa cua nacuhva cuenda ra Judas tsi ra Jesús

³⁵ Tacan tan tsicā tuhun ra Jesús tsi ra tsicá tsihin ra tan catyí ra tsihin ra naha:

—Ndūcuhun iñi ndo quivi tsa jacuhun yu tsi ndo tsa cahān ndo tsihin nyivi, tan nduve tsa tsindahā ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyí ra Jesús.

—Nduve —catyí ra naha.

³⁶ Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo.

³⁷ Tyin catyí yu tsihin ndo, tyin tandihí tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivi tsi ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandihí tsa catyí tsi tsa cuenda yu cua cundaa tsi —catyí ra.

³⁸ Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

Nu tsicān tahvi ra Jesús tsi Nyoo nda Getsemaní

(Mt. 26.36-46; Mr. 14.32-42)

³⁹ Tacan tan quitā ra Jesús vehe nu nyii ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra.

⁴⁰ Tan tsa tsaā ra naha ndacan, catyí ra tsihin ra naha:

—Ndaçan tahvi ndo tsi Nyoo tyin tacan tan ña cuvi jaha canaa nu ña vaha tsi ndo.

41 Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan tsicuiñi tsiiti ra. Tan quitsahá caahán ra tsihin Nyoo,

42 tan catyí ra:

—Tyatya Jutu yu, tun yooho tan cuñi un, jatsiyo tundoho tsa cua nyehe yu ihya. Maa tyin na ña cuvi cuhva cuñi maa yu. Na cuvi cuhva cuñi maa un —catyí ra Jesús.

43 Tacan tan quituvi iin ángel Nyoo, tyin cuhva ra tunyee iñi tsi ra Jesús.

44 Tan tsitsi tsa nyehé xaan ra Jesús tundoho tsa cuiihya xaan cuñi ra, tan ñihi ca tsican tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá niñi.

45 Tacan tan nduvita ra tsa ndihí cahán ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuiihya xaan cuñi ra naha, ña cunyeé iñi ra naha ñumaahna tan quixi ra naha.

46 Tacan tan catyí ra Jesús tsihin ra naha:

—¿Nacuenda quixí ndo? Nduvita ndo. Tan ndaçan tahvi ndo tsi Nyoo, tyin tacan tan ña cuvi jaha canaa nu ña vaha tsi ndo.

Nu tsahá cuenda ra Judas tsi ra Jesús tsi nu xaan iñi tsi ra (Mt. 26.47-56; Mr. 14.43-50; Jn. 18.2-11)

47 Ndi caahán ca ra Jesús yacan, tan tsaá cuaha ra catsaa. Tan ityi nuu, vatsí nu Judas, iin ra tsicá tsihin ra Jesús. Tan natuhva nu nu nyaá ra Jesús tyin tyayuhu nu tsi ra.

48 Tacan tan cahán ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayi tsa quee nda gloria tsi nu xaan iñi tsi yu nahnu? —catyí ra Jesús.

49 Tan ra nyecú tsihin ra Jesús quitsahá nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

50 Tacan tan iin ra can, tsahnyá ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

51 Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tiin ra Jesús soho ra ican tan janduvahá ra itsi.

52 Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahán tsitiin tsi ra Jesús. Tan catyí ra Jesús tsihin ra naha:

—¿A vatsí tiin ndo tsi yu tumaa tiin ndo iin ñasuhu? tyin ndaha ndo mityi tan yutun.

53 Ndihi quivi tsinyij yu tsitsi vehe ñuhu cahnu, tan

ña t̄in ndo tsi yu ndacan. Maa tyin vityin tsā cuhva tsa ndunā tyin nu ña vaha ndacá ñaha. Yacan cuenda vatsí t̄in ndo tsi yu.

Nu caḡan ra Pedro tyin ña nacotó ra tsi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tacan tan t̄in ra naha tsi ra Jesús. Tan tsindac̄a ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahán ra nyicún ra.

⁵⁵ Tan tsa tsā ra naha vehe ra jutu tsaahnu tsa cuví ityi nuu, jataḡan ra tsa cuví musu naha ra ñuh̄u nuquehe. Tan tsinyec̄u ra naha tanī canduví nu cayú ñuh̄u can. Tan tsinyaa ndih̄i ra Pedro tyañu ra naha.

⁵⁶ Tan tsa ndunditsín tsa cayú ñuh̄u ican, tacan tan iin ñaha tsa cuví musu jutu can, nyeḡe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

⁵⁷ Maa tyin ra Pedro catyí ra:

—Yuhu ña nacotó yu tsi ra can.

⁵⁸ Tañi ñi tan nyeḡe tucu inga nyiví tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

⁵⁹ Tan tsa yahā iin hora, tan nyeḡe tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin

ra can. Tyin juvin ra Galilea cuví ra —catyí ra.

⁶⁰ Tacan tan catyí ra Pedro: —Ña tsitó yu náa caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navac̄u ñi iin tsi-tooho.

⁶¹ Tacan tan ra Jesús nanyeḡe ra nuu ra Pedro. Tan ra Pedro nducuhun iñi ra tsa caḡan ra Jesús tsihin ra: “Tsa ndi cumañi ca navac̄u tsitooho, yooho tsa cahan un uñi tsaha tyin ña nacotó un tsi yu.”

⁶² Tacan tan quit̄a ra Pedro ityi tsata vehe. Tan tsac̄u xaan ra tsa cuih̄ya cuñi ra.

Nu tsac̄u nducu nyaa ra naha tsi ra Jesús tan cañi ra naha tsi ra

(Mt. 26.67-68; Mr. 14.65)

⁶³ Tacan tan ra jahá cuenda tsi ra Jesús, quitsahā tsac̄u nducu ra naha tsi ra. Tan cañi ra naha tsi ra.

⁶⁴ Tsañī ra naha jahma nuu ra, tan quitsahā cañi ra naha nuu ra. Tan catyí ra naha tsihin ra:

—Nācoto yóo ra cañi tsi un —catyí ra naha tsihin ra.

⁶⁵ Tan cuaha xaan ca maa tsa caḡan nyaa ra naha tsi ra.

Nu tsic̄a tuhun mandoñi naha ra tsi ra Jesús tatun Sehe Nyoo cuví tsi ra

(Mt. 26.59-66; Mr. 14.55-64; Jn. 18.19-24)

⁶⁶ Tan tsa cunditsin inga quivi, tan ndu iin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro

cuenda ley vehe ñuhu naha ra. Tan quih̄in ra naha tsi ra Jesús, cuahán tsihin ra nda nu cua coo Junta Cahnu. Tan nducū tuhun ra naha tsi ra Jesús:

67 —Catyi tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyi yu tsihin ndo tyin juvin yu cuví, ña cua tsinu iñi ndo tsa cahan yu.

68 Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu.

69 Maa tyin vityin tan ityi nuu ca, Rayii tsa quee nda gloria cua cunyaa ra xiin cuaha Nyoo, ra tsa iyó tandihi tunyee iñi —catyí ra Jesús.

70 Tacan tan tandihi ra naha tsicā tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

71 Tacan tan natuhun tahan ra naha:

—Tsiñí ndo tsa caahán ra. Ña cuñí ca tsi tsandaa. Tyin tsa tsiñi maa yo tsa cahan ra —catyí ra naha.

23

Nu nyehe ra Pilato tyin nduve cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

1 Tacan tan nduvitā tandihi ra naha. Tan tsindacā ra naha tsi ra Jesús nda nu nyaá

ra Pilato, [ra ndacá ñaha quee nda ñuu Roma].

2 Tacan tan quitsaha tyaa ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuví ra Cristo, ra tsa jaquitsi Nyoo tyin cuví ra rey —catyí ra naha tsihin ra Pilato.

3 Tacan tan ra Pilato tsicā tuhun ra tsi ra Jesús:

—¿A yooho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

4 Tacan tan catyí ra Pilato tsihin ra jutu tsa cuví ityi nuu naha ra, tan tsihin nyivi:

—Nduve cuatyí ra ihya —catyí ra tsihin ñi.

5 Maa tyin jañihí ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tsihi tsahá ra, tyin jacuahá ra tsi nyivi. Tsa jihna ñi quitsaha caahán ra tsihin nyivi iyó ñuu tsa cayucú Galilea. Tan nani ityi vatsí ra, jacuahá ra tsi nyivi. Tan vityin tsa tsaā ra Judea ihya tan juvin ñi yacan javahá ra —catyí ñi.

Nu jacuhun ra Pilato tsi ra Jesús nu nyaá ra Herodes, ra cuví rey nyivi iyó Galilea

6 Cuhva tsa tsiñi ra Pilato yacan, tan nducū tuhun ra tatun ra Galilea cuví ra Jesús.

7 Tan catyí nyivi tsihin ra tyin juvin. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyii ra ñuu Jerusalén.

8 Tan cuhva tsa nyehe ra Herodes tsi ra Jesús, sii xaan cuñi ra. Tyin tsanaha xaan cuñi ra nyehe ra tsi ra. Tyin ñihj tuhun ra tyin cuaha xaan tsa iyo javahá ra. Tan cuñi xaan ra nyehe ra iin tsa iyo tsa cua javaha ra Jesús.

9 Tan cuaha xaan tsa nducū tuhun ra Herodes tsi ra Jesús. Maa tyin ra Jesús ña nacahan maa ra.

10 Ican nyecú ndihi tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaa xaan ra naha cuatyí tsi ra Jesús.

11 Tacan tan ra Herodes tsihin andaru cuenda ra, tsacū nducu ra naha tsi ra. Tan jacunditsj nuu ra naha iin jahma yahvi tan sii caá tsi ra Jesús, tumaa caá tsa tuhvá rey tsinditsí. Tacan tan jacuhun nyico ra Herodes tsi ra nda nu nyaá ra Pilato.

12 Tan quivi can ra Pilato tsihin ra Herodes nduvaha iyó ra naha. Tyin nu quitsj quivi, ña cuví nyehé tahan ra naha tsi ra naha.

Nu cutuñi ra Jesús tyin cua cúu ra

(Mt. 27.15-26; Mr. 15.6-15; Jn. 18.39-19.16)

13 Tacan tan ra Pilato jandu iin ra tsi ra jutu tsa cuví ityi nuu naha ra, tan ra cumí tyiñu vehe ñuhu naha ra, tan tsihin tandihi nyivi.

14 Tan catyí ra tsihin ñi:

—Nyooho quitsj ndaca ndo tsi ra ihya nu nyaá yu. Tan catyí ndo tyin jativí ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahan ndo can nañihj yu.

15 Tan ndi ra Herodes tan ña nañihj ra ndi intuhun cuatyí ra. Yacan jaquitsj nyico ra tsi ra inga tsaha nu nyaá yu. Nyehe ndo tyin nduve cuatyí ra. Tan yacan ña taahán tsi tsa cúu ra.

16 Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

17 Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá.

18 Maa tyin tandihi nyivi iin caa ñi cana tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

19 Tan ra Barrabás can nyii ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyivi.

20 Tan ra Pilato cuñi ra jaña ra tsi ra Jesús. Tan quit-saha caahán ra tsihin nyivi can inga tsaha tyin cua jaña ra tsi ra.

21 Maa tyin nyivi tsaa ca cana tsaa ñi:

—iTyaa tsi ra nu cruu. Na cúu ra nu cruu!

22 —¿Náa tsa ña vaha javaha ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

23 Maa tyin nyivi cana tsaa ca ñi, tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityi nuu naha ra, ñihí ñi tsa cuñí ñi tyin cana tsaa xaan ñi.

24 Tacan tan javaha ra Pilato cuhva cahan ñi.

25 Tan jaña ra tsi ra Barrabás, ra tsa nyíí vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyivi. Tan nacuhva cuenda ra Pilato tsi ra Jesús tsi ñi cuhva cuñí maa ñi.

Nu tyaq ra naha tsi ra Jesús nu cruu

(Mt. 27.32-44; Mr. 15.21-32; Jn. 19.17-27)

26 Tacan tan quihin andaru tsi ra Jesús. Tan cuahán ra tsihin ra naha. Tan tñin tucu ra naha tsi iin ra ñuu Cirene nañí Simón. Ra ican ndi vatsí nuhu ra quee ra huhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

27 Tan cuaha xaan nyivi cuahán ityi tsata ra Jesús. Tan cuaha xaan ñiñaha tsacú xaan ñi tsa cuiihya cuñí ñi tsacatyí tundoho tahan ra.

28 Maa tyin ra Jesús nanyehé ra nuu ñi. Tan catyí ra tsihin ñi:

—Tandihí nyoooho, ñiñaha ñuu Jerusalén ihya, ña vacu ndo tsacatyí yuhu. Vacu ndo,

tsacatyí maa ndo tan tsacatyí sehe ndo.

29 Tyin cua quitsi quivi cua nyehe xaan ndo tundoho. Tan cua cahan nyivi tsi tandihí ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoo tyin cuaha xaan tundoho nyehé yo vityin”, cua catyí ñi tsihin ndo.

30 Tyin quivi can cua cuñi ñi nduva yucu tsata ñi tan quihvi xeehe ñi.

31 Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityi —catyí ra Jesús tsihin ñiñaha ñuu Jerusalén can.

32 Tan quihin tucu andaru can naha ra tsi uvi taahan ra iyó cuatyí, tyin cahñi ndihí ra naha tsi ra naha iin caa ñi tsihin ra Jesús.

33 Tacan tan tsaa ra naha iin nu nañí Yiquí Jiñi Ndiyí. Tan ican tyaq ra naha tsi ra Jesús nu cruu. Tan tacan tyaq ndihí tucu ra naha tsi nduvi taahan ra iyó cuatyí can naha ra. Iin ra tyaq ra naha nuu cruu xiin cuaha ra Jesús. Tan inga ra can tyaq ra naha nuu cruu xiin satyin ra.

34 Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tava ra naha suerte tsihin jahma ra Jesús, tyin nyehe ra naha ndáa ra cua jaha canaa jahma can.

35 Tan nyiví nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacú ra tsi inga nyiví. Na jacacu ndihí tucu maa ra tsi ra vityin, tun nditsa tsa ra Cristo, ra tsa jaquitsí Nyoo, cuví ra —catyí ra naha.

36 Tan juven ñi cahān nyaá ra andaru can naha ra tsi ra. Tan natuhvā ra naha nu ticaá ra. Tan tsahā ra naha vinu iya tsihí ra.

37 Tan catyí ra naha tsihin ra:

—Tatun rey cuenda nyiví Israel cuví un, j̄acacu tsi un —catyí ra naha.

38 Tan jiñi cruu nu nyaá ra Jesús nyaá iin tsa tyaa ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyiví ñuu Israel” —catyí letra can.

39 Tan iin ra tsa iyó cuatyí tsa nyaá nu cruu xiin ra Jesús, quitsahā caahán nyaa ra tsi ra:

—Tatun nditsa tyin ra Cristo cuví un, j̄acacu tsi un. Tan j̄acacu ndihí tsi nyuhu —catyí ra can.

40 Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juven ñi tundoho tsa taahán ra ihya, tan taahán un vityin.

41 Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

42 Tacan tan catyí ra can tsihin ra Jesús:

—Yooho Jesús, nducuhun iñi tsi yu quiví cundaca ñaha un —catyí ra.

43 Tacan tan ra Jesús nacahān ra tsihin ra tan catyí ra:

—Tsa nditsa caahán yu tsihin un tyin juven ñi vityin tan cua cunyaa un tsihin yu nda paraíso [nu yucú añima nyiví tsinú iñi tsi Nyoo] —catyí ra Jesús tsihin ra.

Nu tsihí ra Jesús

(Mt. 27.45-56; Mr. 15.33-41; Jn. 19.28-30)

44 Tacan tan cuhva ora quitsahā ndunaá nu ñuhu ñayiví, nda cuanda caa uñi tsa tseñi.

45 Tyin ndunaā ñicanyii. Tan jahma tsa ticaá tsitsi vehe ñuhu cahnu, ndatā sava tsi.

46 Tacan tan canā tsa ra Jesús tan catyí ra:

—Tyatya, Jutu yu, tyaa cuenda yu añima yu ndaha un —catyí ra.

Tan cuhva tsa cahān ra tacan, tan tsihí ra.

47 Tan ra cuví capitán cuenda andaru can naha ra, nyehé ra tandihí tsa cuví. Tan jacahnū ra tsi Nyoo, tan catyí ra:

—Nduve tsa cuii cuatyí ra ihya tsicoō —catyí ra.

48 Tan tandihí nyiví tsa nyecú ican, nyehé ñi tsa cuví. Tan cuahán ñi tan quitsahā cañí ndaha ñi yiqui nyica ñi. Tyin tsitó ñi tyin ña vaha tsa javahā ñi tsihin ra Jesús.

49 Tan tandihí nyiví tsa nacotó tsi ra Jesús, tan ñiñaha tsa tsinyicun tsi ra nda Galilea,

nyecú ñi ndasava. Tan nyehe ñi tandihí tsa cuví can.

24

Nu cua cutsi ra naha tsi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Tan iyó iin ra vaha, nañí ra José. ra ñuu Arimatea tsa canyí Judea. Tan cuví ra iin ra cuví ityi nuu cuenda Junta Cahnu nyívi Israel.

⁵¹ Tan ra José can ndatú ra quívi tsa cua cundaca ñaha Nyoo. Tan ña ndoo ra vaha tsihin tsa javahá ra cutahán tsihin ra, ra cuví jutu tsa cuví ityi nuu naha ra.

⁵² Tacan tan tsahan ra José can tsindacan ra cuñu ñuhu ra Jesús tsi ra Pilato.

⁵³ Tan yahá tsa januu ra José can cuñu ñuhu ra Jesús nu cruu, cava nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsa tsa cuví yavi yuu tsa javahá nyívi tan ñaha ca quihvi ndiyi tsitsi can.

⁵⁴ Tan viernes cuví can, quívi tsa janduvahá nyívi tsa catsi ñi tsa sabaru, quívi quitatú ñi. Tan tsa cua tahan tsi quívi can.

⁵⁵ Tan tandihí ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyí cuñu ñuhu ra.

⁵⁶ Tan cuanuhu ñi nda yuvehe ñi. Tan janduvahá ñi ndutya tami tyin cua tyihí ñi cuñu ñuhu ra Jesús. Tacan tan quitatú ñi inga quívi can tumaa catyí maa tuhun tsa tsahá cuenda Nyoo tsi yo.

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Tsa tuví tuingu quívi nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahá ñi.

² Tan cuhva tsa tsaá ñi, nyehe ñi tyin tsa cuatsiyó yuu tsa ndasí yuhu ñaña can.

³ Tan quihví ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús.

⁴ Tan yucú ñi tsihin tsa yuhví ñi. Tan ña tsitó ñi náa cua javaha ñi. Tan sana iñi ñi quituví uvi taahan rayí nuu ñi. Tan xiñu xaan jahma nditsí ra naha.

⁵ Tan tsihin tsa yuhví ñi, tan tsaquin ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi?

⁶ Nduve ca ra nyíi ihya, tyin tsa nandoto ra. Ndūcuhun iñi ndo tsa cahan ra tsihin ndo quívi tsicá ra Galilea.

⁷ Catyí ra tyin taahán tsi nacuhva cuenda nyívi tsi ra ndaha ra iyó cuatyí naha ra. Tyin cuví ra Rayí tsa quee nda gloria. Tan taahán tsi tyin cahñi ra can naha ra tsi ra nu cruu. Maa tyin tsa tsinu uñi quívi cua nandoto ra. Tacan catyí ra tsihin ndo —catyí ángel can naha ra tsihin ñi.

⁸ Tacan tan nducuhun iñi ñi tsa cahan ra Jesús quívi can.

⁹ Tan cuanuhu ñi. Tan nacatyí tuhun ñi tsihin tsa

utsi iin ra tsa tava tyiñu ra Jesús tan tsihin tandihí ca nyivi tsa tsinyicun tsi ra.

10 Tan ñiñaha tsa tsicatyí tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha.

11 Maa tyin ra tava tyiñu ra Jesús cuñí maa ra naha tyin caahán ñi maa ñi. Tan ña tsinú iñi ra naha tsa caahán ñi.

12 Maa tyin ra Pedro nduvita ra tan tsinú xaan ra cuahán ra cua nyehe ra tsitsi ñaña nu tinyii ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasi ña ra canyií nda sava. Tacan tan cuanuhu ra yuvehe nu yucú tandihí ca ra naha. Tan iyo xaan cuñí ra tsa cuví.

Tsa cuví ityi cuahán ñuu Emaús
(Mr. 16.12-13)

13 Juvín ñi maa quivi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa queé yo ñuu Jerusalén.

14 Tan cuahán ra naha tan natuhún tahan ra naha náa ndihí tsa cuví.

15 Tan tsitsi tsa natuhún ra naha, tan ra Jesús tahan ra tsi ra naha ityi cuahán ra naha.

16 Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuví nacoto ra naha tsi ra Jesús.

17 Tacan tan nducu tuhun ra Jesús tsi ra naha:

—¿Náa natuhún xaan ndo? ¿Nacuenda cuihya xaan cuñí ndo? —catyí ra tsihin ra naha.

18 Tan iin ra tsa nañí Cleofas nacahan ra tan catyí ra:

—Tandihí nyivi tsitó tsa cuví ñuu Jerusalén. ¿A ra inga ñuu cuví yooho tyin ña tsitoun tsa cuví? —catyí ra.

19 Tacan tan catyí ra Jesús tsihin ra naha:

—¿Náa cuví?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuví ra iin ra cuví ndusu yuhu Nyoo. Tan tsihin tunyee iñi cahnu Nyoo javaha ra tsa cahnu tan cahan ra tsa vaha nuu Nyoo tan nuu tandihí nyivi.

20 Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tsaha cuenda ra naha tsi ra tsi ra ndacá ñaha cuenda ñuu Roma. Tan tsahñi ra naha tsi ra. Tan tsihi ra nu cruu.

21 Tan vityin tsa quitá uñi quivi tsa cuví yacan. Tan nyuhu cuñí maa ndi tyin juvin ra cua jacacu tsi yo tsa cuví yo nyivi Israel.

22 Maa tyin vityin iyo xaan cuñí ndi tsa nacatyí juhva ñiñaha tsihin ndi. Tyin maa ñi tsahan ñi nu ñaña ra tsa tuví.

23 Tan nduve ca cuñu ñuhu ra canyií. Tan nacatyí tuhun ndihí ñi tyin nyehe ñi uvi taahan ángel. Tan catyí ángel can naha ra tsihin ñi tyin ra Jesús nyito ra.

24 Yaha yacan tan tsahan tucu juhva ra cutahan tsihin ndi tsinyehe ra naha nu ñaña. Tan nyehe ra naha tyin tsa nditsa cuví tsa cahan ññaha can. Maa tyin ña nyehe ra naha tsi ra Jesús —catyí ra naha tsihin ra Jesús.

25 Tacan tan catyí ra Jesús tsihin ra naha:

—Luxu xaan cutuñí iñi ndo. Tan cuee xaan tan tsinu iñi ndo tuhun tsa cahan ra cuví ndusu yuhu Nyoo tahanan tsanaha.

26 ¿A ña tsitó ndo tyin taahan tsi tsa nyehe jihna ra Cristo tundo? Yaha can tan tahanan tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

27 Tacan tan quitsaha tsahá cuenda ra nácaa cuahán tuhun maa ra nu tutu Nyoo. Tan quitsaha caahán ra tuhun tsa tyaá ra Moisés tahanan tsanaha. Tan yaha can tan cahan ra tuhun tandihi libru tsa tyaá ra cuví ndusu yuhu Nyoo.

28 Tan cuhva tsa tsaá ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra.

29 Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoo tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha.

30 Tan cuhva tsa tsinyaa ra yuhu mesa tsihin ra naha, quihin ra paan. Tan tsaha ra tyahvi nyoo tsi Nyoo. Tan

tsahnü sava ra, tan tsaha ra tsi ra naha.

31 Tan iin yaha ñi nuña nuu ra naha tan nacoto ra naha tsi ra Jesús. Maa tyin ra Jesús naa ihñi ñi ra.

32 Tacan tan quitsaha natuhún tahanan ra naha tan catyí ra naha:

—Yacan cuenda vaha xaan cuñí aña yó tsa vatsí ra tsihin yó, tan tsahá cuenda ra tuhun Nyoo tsa nyaá nu tutu Nyoo tsi yó —catyí ra naha.

33 Ña ndatu ca ra naha, tan cuanuhu ra naha nda ñuu Jerusalén. Tan ñihí tahanan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha.

34 Tacan tan tsa utsi iin ra can naha ra nacatyí tuhun ra naha tsihin ra tsa ndi tsaá can naha ra:

—Nditsa tyin Jutu Mañi yó nandoto ra. Tyin ra Simón nyehe ra tsi ra —catyí ra naha.

35 Tacan tan ra tsa ndi tsaá can nacatyí tuhun ndihi ra naha nácaa natuhún ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnü sava ra paan.

Nu quituvi ra Jesús nu yucú ra tsicá tsihin ra

(Mt. 28.16-20; Mr. 16.14-18; Jn. 20. 19-23)

36 Ndi natuhún ca ra naha yacan tan quituvi ra Jesús tyañu ra naha. Tan tsaha ra nacumi tsi ra naha, tan catyí ra:

—Na coo tsa vaha aña ndo.

37 Tacan tan nayuhv̄i xaan ra naha. Tan cuñí ra naha tyin tatyí ndiyí cuví can.

38 Tacan tan catyí ra Jesús tsihin ra naha:

—¿Nacuenda yuuhví xaan ndo? ¿Tan nacuenda tsicá xaan iñi ndo?

39 Nyehe ndo ndaha yu. Tan nyehe ndo tsaha yu. Tyin juvin ñi maa yu cuví. T̄in ndo tsi yu tan coto ndo. Tyin tatyí ndiyí nduve cuñu ñuhu can iyó. Tan nduve yiqui can tumaa tsa nyehé ndo tsi yuhu —catyí ra Jesús.

40 Tan cuhva tsa cahan ra yacan, tan janahá ra ndaha ra tsihin tsaha ra tsi ra naha.

41 Maa tyin maa ra naha, tsa cuenda tsa iyo cuñí ra naha tan s̄i cuñí ra naha, nda cuanda ña cuví ca tsinú vaha iñi ra naha. Yacan nacahan ra Jesús tsihin ra naha:

—¿A iyó tsa catsi yo? —catyí ra.

42 Tacan tan tsahá ra naha luxu tyaca tyihyo tsihin ndutya ñuñu tsi ra.

43 Tan quih̄in ra. Tan quit-sahá tsatsí ra nu nyecú ra naha.

44 Tan catyí ra tsihin ra naha:

—Tandih̄i tsa tahan yu, yacan cuví tsa catyí yu tsihin ndo quiví can. Tan catyí yu tsihin ndo tyin tacan cua cuvi, tumaa cuhva nyaá tuhun tsa tyaá ra Moisés tan ra cuví ndusu yuhu Nyoo tan tsihin tsa nyaá nu libru salmo —catyí ra tsihin ra naha.

45 Tacan tan tsahá cuenda ra Jesús cuhva catyí nu tutu

Nyoo. Tan cutuñi iñi tandih̄i ra naha jahá ra.

46 Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quiví cua nandoto ra.

47 Tan taahán tsi coto nyiví tuhun ra Cristo, tyin tatun ndu uvi iñi ñi cuatyí ñi, cua coo tucahnu iñi tsi ñi. Tan jihna ñi cua cahan ra naha tsihin siví ra Cristo ñuu Jerusalén, yaha can tan tandih̄i ca ñuu tan̄i cahnu nu ñuhu ñayiví.

48 Tan catyí tucu ra Jesús tsihin ra naha:

—Tan nyooho cuví tsandaa tsa cuenda tandih̄i tsehe.

49 Tan cua jaquitsi maa yu Tatyí Ii Nyoo siqui ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria (Mr. 16.19-20)

50 Tacan tan ra Jesús cuahán ra tsihin tandih̄i ra tsicá tsihin ra nda ñuu Betania. Tan cañih̄i ra ndaha ra. Tan nasoco ra tsi ra naha.

51 Tan tsitsi tsa nasocó ra tsi ra naha, nandaá ra andiví.

52 Tacan tan tandih̄i ra naha quitsahá jacahnú ra naha tsi ra. Tan s̄i xaan cuñí ra naha, cuanuhu ra naha nda ñuu Jerusalén.

53 Tan tandih̄i quiví tsiyucu ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuvi tsi tacan ñi.

Tuhun Nyoo tsa Tyaa Ra Juan

Tuhun tsa Caahán Nyoo nanduví tsi iin rayíi, tan rayíi can cuví ra Cristo

¹ Nda quívi jihna ñi, nda ndi cumañi ca coo tandihí tsa iyó, tan tsa iyó maa ra cuví Tuhun tsa Caahán Nyoo. Nyíi ra tsihin Nyoo. Tan Nyoo cuví ra.

² Tan iyó ra tsihin Nyoo nda quívi jihna ñi.

³ Tan tsihin ra, javahá Nyoo tandihí cuíi maa tsa iyó. Tan nduve tsa javahá Nyoo tsa in-tuhun ñi maa ra.

⁴ Ra tsa cuví Tuhun tsa Caahán Nyoo iyó ñayívi nyito tsa ña cua naa maa tsi ra. Tan juvin ñayívi can, cuví ñuhu tsa jandunditsín añima nyívi.

⁵ Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

⁶ Tsicoo iin ra tsa jaquitsi Nyoo, nañí ra Juan.

⁷ Quitsi ra cuví ra tsa ndaa. Tyin cahán ra tumañi iñi cuenda ra cuví ñuhu can, tyin tacan tan tsinu iñi tandihí nyívi tsi ra.

⁸ Ra Juan, ñavin ñuhu can cuví ra. Iin tsa ndaa cuenda ra cuví ñuhu can cuví ra.

⁹ Tyin ñuhu nditsa can, ndi cua quitsi tsi nu ñuhu ñayívi, tan cua jandunditsín tsi añima tandihí nyívi tsa iyó nu ñuhu ñayívi ihya.

¹⁰ Ra cuví Tuhun tsa Caahán Nyoo quitsi ra nu ñuhu ñayívi. Tan juvin ñi maa

ra tsihin Jutu ra javahá ra naha ñuhu ñayívi. Maa tyin nyívi iyó nu ñuhu ñayívi ihya, ña nacoto ñi tsi ra tsa ra Cristo cuví ra.

¹¹ Quitsi ra nu iyó nyívi ñuu ra, nyívi Israel, tan ña naquihín vaha ñi tsi ra.

¹² Maa tyin tandihí nyívi tsa naquihín vaha tsi ra, tan tsinú iñi ñi tyin ra Cristo cuví ra, tsahá ra ndatu tsi ñi tsa cuví ñi sehe Nyoo.

¹³ Juvin ñi nacacu tsa. Maa tyin ñavin tumaá tsa cacu ñi tsa culee ñi cuenda cuñu ñuhu ñi. Tan ndi ñavin tsa cuenda tsa cuñi iin rayíi coo ra tsihin iin ñaha. Ñavin tsa cuenda tsa cuñi nyívi coo sehe ñi. Maa tyin nacacu tsa ñi jahá maa Nyoo.

¹⁴ Tan ra cuví Tuhun tsa Caahán Nyoo nanduví ra iin rayíi. Tan tsicoo ra tsihin yo. Tan nyehe ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsi tu ra tsihin tsa nditsa tan tsa vaha.

¹⁵ Tan ra Juan can cahán ra tumañi iñi tsa cuenda ra, tan catyí ra:

—Juvín ra ihya cuví ra tsa cahán yu tuhun quívi can, tyin ra tsa vatsí ityí tsata yu, cahnu ca cuví ra tan ñavin ca maa yu. Tyin nda quívi cacu yu tan tsa iyó maa ra —catyí ra Juan.

¹⁶ Tandihí yo naquihín yo tumañi iñi cahnu tsa tsahá ra tsi yo, tyin nasocó xaan ra tsi yo.

¹⁷ Ra Moisés tsahá cuenda ra ley Nyoo tsi yo. Maa tyin ra

Jesucristo tsahá ra tsa naquihin yo tsa vaha Nyoo. Tan caahán ra tsa nditsa tsihin yo.

¹⁸ Tan nduve maa yóo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

Nu caahán ra Juan, ra jacoondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cuví ityi nuu tsihin nyivi Israel tsa iyó ñuu Jerusalén, tava tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cuhun ra naha nu nyii ra Juan tan ndaca tuhun ra naha tsi ra yóo ra cuví ra.

²⁰ Tan tsicá tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyihí xeehe ra.

²¹ Tacan tan tsicá tuhun nyico ra naha tsi ra Juan:

—¿Yóo ra cuví un? ¿A ra Elías, ra cuví ndusu yuhu Nyoo tañan tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicá tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahan nyico ra Juan tan catyí ra:

—Ñavin.

²² Tan tsicá tuhun nyico ra naha tsi ra Juan inga tsaha:

—¿Yóo ra cuví un? Tyin cuñí tsi catyí tuhun ndi tsihin ra tsa tava tyiñu tsi ndi yóo ra cuví un —catyí ra naha tsihin ra.

²³ Tan nacahan ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Nuña ndo tsitsi añima ndo tyin tsa vatsí Jutu Mañi yo.” Tuma cañan ra Isaías ra cuví ndusu yuhu Nyoo tuhun yu tañan tsanaha —catyí ra Juan tsihin ra naha.

²⁴ Ra fariseo naha ra cuví ra tava tyiñu tsi ra can naha ra, na ndaca tuhun ra naha tsi ra Juan.

²⁵ Tan tsicá tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacuvi tyin jacoondutyá un tsi nyivi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

²⁶ Tan nacahan ra Juan tan catyí ra:

—Yuhu jacoondutyá yu tsi nyivi tsihin ndutya. Maa tyin mahñu ndo nyii iin ra tsa ña nacotó ndo.

²⁷ Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuvi ndatsi yu ñi nditsan ra —catyí ra Juan.

²⁸ Tandihí yacan cuví nu nañi Betábara tsa canyí inga tsiyo yutya cahnu Jordán nu tsinyii ra Juan jacoondutyá ra.

Ra Jesucristo, Mbee Ticatyi Luhlu jana Nyoo

²⁹ Tsa inga quivi nyehe ra Juan tsi ra Jesús cuahán ra nu nyii ra, tacan tan catyi ra Juan:

—Nyehe jihna ndo, ra ihya cuví Mbee Ticatyi Luhlu jana Nyoo ra tsa quihín nyaa cuctyi nyivi iyó nu ñuhu ñayivi ihya.

³⁰ Tuhun ra cahán yu quivi catyi yu tsihin ndo tyin ityi tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoo yu.

³¹ Ndi yuhu tan ña nacoto yu tsi ra quivi can. Maa tyin vityin vatsí yu jacoondutyá yu tsihin ndutya tyin tacan tan nacoto nyivi Israel ñuu yu tsi ra —catyi ra Juan.

³² Tan catyi nyico ra Juan:

—Yuhu nyehe yu Tatyí Ii Nyoo tsa quitsi ityi andivi tan quitsi tsi tumaa iin paloma, tan ndoo tsi tsihin ra.

³³ Yuhu ñaha ca nacoto yu yoo ra cuví ra quivi can. Maa tyin Nyoo, ra tsa tava tyiñu tsi yu jacoondutya yu tsi nyivi tsihin ndutya, catyi ra tsihin yu: “Quivi nyehe un Tatyí Ii, vatsí nuú tsi siqui iin rayii, tan ndoo tsi tsihin ra, juvin ra can cuví ra tsa cua jacoondutya tsi nyivi tsihin Tatyí Ii yu”, catyi Nyoo tsihin yu.

³⁴ Yuhu tsa yaha nyehe yu tsi ra. Tan cuví yu tsa ndaa tyin juvin ra cuví Sehe Nyoo —catyi ra Juan.

Ra tsa quitsaha nyicún jihna tsi ra Jesús

³⁵ Tsa inga quivi nyii nyico ra Juan nu nyii ra tan yucú ndihi uvi taahan ra tsicá tsihin ra.

³⁶ Tan nyehe ra naha, yahá ra Jesús, tan catyi ra Juan:

—Nyehe jihna ndo, ra ican cuví Mbee Ticatyi Luhlu jana Nyoo —catyi ra.

³⁷ Tsa tsiñi nduvi taahan ra nyicún tsi ra Juan tsa cahán ra, tacan tan cuahan ra naha cuanyicun ra naha tsi ra Jesús.

³⁸ Tacan tan nanyehe ra Jesús ityi tsata ra, tan nyehe ra tyin nyicún ra naha tsi ra, tan catyi ra:

—¿Náa nanducú ndo?

Tacan tan nacahán ra naha tan catyi ra naha:

—Maestro, ¿numaa iyó un?

³⁹ Tan catyi ra Jesús tsihin ra naha:

—Cohon ndo tsihin yu, tan nyehe ndo —catyi ra tsihin ra naha.

Tacan tan cuahán ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaá ra naha ndacan tumaa caa cumi tsa tseñi.

⁴⁰ Iin ra tsa tsiñi tsa cahán ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro.

⁴¹ Tan ra Andrés numi xaan tsinanducu ra tsi yañi ra, ra Simón Pedro, tan catyi ra tsihin ra:

—Nañihí ndi tsi ra tsa cuví Mesías —catyi ra.

Tan tuhun Mesías can cuñi tsi catyi, ra Cristo, o cuñi tucu tsi catyi, ra tsa nacatsi vaha Nyoo tyin quitsi ra cuví ra rey tsa cuenda yo.

42 Tacan tan quih̄in ra Andrés tsi ra Simón yañi ra cuahán tsihin ra nu nyii ra Jesús. Tsa nyehe ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñí tsi catyí tsi “Pedro”, tan tsa nduvi sivi can, cuñí tsi catyí tsi “cava”, [tumaa iin yuu cahnu].

Nu cana ra Jesús tsi ra Felipe tan ra Natanael

43 Tsa inga quivi tyaa ra Jesús cuhva tsa cuhun ra Galilea. Tacan tan nañih̄i ra tsi ra Felipe. Tan catyí ra tsihin ra:

—Naha quitsi nyicun un tsi yu —catyí ra.

44 Ra Felipe ihya, ra ñuu Bet-saida cuví ra. Tan ican iyó tucu ra Andrés tan ra Pedro.

45 Tacan tan tsahan ra Felipe tsinanducu ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cah̄an tucu ra cuv̄i ndusu yuhu Nyoo tuhun tahān tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

46 Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahan ra Felipe tan catyí ra:

—Naha tan nyehe un —catyí ra.

47 Tacan tan tsa cua cuy-tyin ra Natanael nu nyii ra Jesús. Tan nanyehe ra Jesús tyin vatsí ra, tan quitsahā catyí ra:

—¡Jihna ndo! Ihya vatsí iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

48 Tacan tan tsic̄a tuhun ra Natanael tsi ra:

—¿Nacaa tsa tsitó un tsi yuhu?

Tan nacahan ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyii un tsaha yutun higo can —catyí ra Jesús tsihin ra.

49 Tacan tan quitsahā catyí ra Natanael:

—Jutu Mañi yu, yooho cuví Sehe Nyoo. Tan juvin un cuví rey cuenda nyuhu tsa cuví yo nyivi Israel.

50 Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsaha yutun higo? Maa tyin nahnu ca tsa cua nyehe un tan ñavin ca yacan —catyí ra tsihin ra.

51 Tan catyí ra Jesús tsihin ra naha:

—Tsa nditsa catyí yu tsihin ndo tyin nyooho cua nyehe ndo cua nuña andivi tan cuaha xaan ángel Nyoo cua ndaa, tan cua nuu ra naha siqui yuhu Rayi tsa quee nda gloria —catyí ra Jesús tsihin ra naha.

2

Nu iyó vico tindaha ñuu Caná iin ñuu tsa canyii Galilea

¹ Tsa yaha uñi quivi tan tsi-coo iin vico tindaha ñuu Caná tsa canyii Galilea. Tan ican nyii sihi ra Jesús.

² Tan nyivi javaha vico can cana ndihi ñi tsi ra Jesús tan tsihin tandihi ra tsicá tsihin ra tyin cuhun ra naha.

³ Tacan tan cuahán ra naha. Tan tsitsi tsa yucú ra naha nu iyó vico can, tan ndihi vinu ñi javaha vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.

⁴ Tan catyí ra Jesús tsihin ña:

—¿Náa tsa ndihi iñi yo yacan, Miyan? Tyin ñaha ca tsa hora yu —catyí ra tsihin ña.

⁵ Maa tyin sihi ra cahan ña tsihin ra tsa tyihí mesa nu iyó vico can naha ra:

—Javaha nyooho tandihi tsa cua cahan ra tsihin ndo —catyí ña tsihin ra naha.

⁶ Tan nyecú iñu quisi yuu nahnu tsa yihí ndutya tsa tuhvá ra Israel naha ra tsaty-iñú nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutya tsitsi can.

⁷ Tacan tan catyí ra Jesús tsihin ra tsa tyihí mesa can naha ra:

—Jacutu ndo quisi ihya tsihin ndutya —catyí ra tsihin ra naha.

Tacan tan tsitu cuii quisi can jahá ra naha.

⁸ Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tsihin ra naha.

Tan tacan ica ra naha.

⁹ Ra cuví ityi nuu cuenda vico can tsihi ra naha ndutya tsa nanduvi vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can cana ra tsi ra tsa tandaha can.

¹⁰ Tan catyí ra tsihin ra:

—Tandihi nyivi, jihna ca vinu vaha tuhvá ñi tava. Yaha can tan tatun tsa tsihi xaan nyivi, tacan tan tava ñi vinu ndaahvi. Maa tyin yooho tsicumí vaha un vinu vaha. Tan nda vityin tava un can —catyí ra tsihin ra.

¹¹ Tsa javaha ra Jesús ñuu Caná tsa canyii Galilea, yacan cuví tsa iyo tsa jihna ñi javaha ra tan janaha ra tsa cahnu cuví ra tsi nyivi. Tan ra tsicá tsihin ra tsinu iñi ra naha tsi ra tyin ra ican cuví ra tsa jaquitsi Nyoo.

¹² Tsa yaha yacan tan cuahán ra ñuu Capernaum tsihin sihi ra tan tsihin yañi ra. Tan cuahan ndihi ra tsicá tsihin ra. Tan ican tsiyucu ñi juhva quivi.

Nu jacunu ra Jesús tsi nyivi xico nuquehe yuvehe ñuhu cahnu

(Mt. 21.12-13; Mr. 11.15-18; Lc. 19.45-46)

13 Tsa cua tahan tsi quivi vico pascua tsa jacahnú nyivi Israel. Yacan cuenda cuahán ra Jesús ñuu Jerusalén.

14 Tsa tsaꝓ ra ñuu can, quihvi ra nuquehe vehe ñuhu cahnu, tan nyehe ra yucú cuaha nyivi xicó ñi nuquehe can. Yihí ñi xicó ñi indiqui, mbee ticatyí, tan paloma. Tan yucú ndihi tucu nyivi nasamá xuhun.

15 Tsa nyehe ra Jesús tandihi yacan, tacan tan javaha ra iin yoho. Tan tsihin yoho can jacunu ra tsi tandihi nyivi nuquehe vehe ñuhu iin cahnu ñi tsihin mbee tan tsihin indiqui jana ñi. Tan ñi nasamá xuhun can, jatucuatyi ra xuhun ñi nu ñuhu tan janduvá ra mesa ñi.

16 Tan catyí ra tsihin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahvi! —catyí ra tsihin ñi.

17 Tacan tan ra tsicá tsihin ra, nducuhun iñi ra naha tsa catyí nu tutu Nyoo tye-hen: “Cuiñu xaan yu vehe un”, catyí tsi, nducuhun iñi ra naha.

18 Tacan tan ra cuví ityi nuu tsihin nyivi Israel quitsaha tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsaha Nyoo ndatu tsi un tsa javaha un yacan? —catyí ra naha tsihin ra.

19 Tan nacañan ra Jesús tan catyí ra:

—Cani ndo vehe ñuhu ihya, tan tsitsi tsa uñi quivi ñi tan cua janduvita nyico yu itsi inga tsaha —catyí ra tsihin ra naha.

20 Tacan tan quitsaha catyí ra nyecú ican naha ra tsihin ra:

—Uvi xico iñu cuiya jaha tyiñu ra naha tan tsinu vehe ñuhu ihya. ¡Tan yooho catyí un tyin tsitsi tsa uñi quivi ñi tan cua janduvita un itsi inga tsaha! —catyí ra naha tsihin ra.

21 Maa tyin ñavin tuhun vehe ñuhu can cañan ra Jesús, tyin cañan ra tuhun cuñu ñuhu ra.

22 Yacan cuenda tandihi ra tsicá tsihin ra nducuhun iñi ra naha yacan quivi nandoto ra. Tan cutuñi iñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinu iñi ra naha tsa cañan ra Jesús tan tsa nyaá nu tutu Nyoo.

Ra Jesús tsitó ra tsa iyó añima nyivi

23 Tsitsi tsa ndi nyíí ra Jesús ñuu Jerusalén, quivi iyó vico pascua, cuaha xaan nyivi quitsaha tsinú iñi tsa caahán ra tsa cuenda tsa cuaha tsa iyo javaha ra.

24 Maa tyin ra Jesús ña nii cuñí ra nyehé ra tsi tandihi ñi tyin tsitó ra cuhva tsicá iñi ñi.

25 Ña tsiñiñuhu tsa nacatyí tuhun yo tsihin ra nácaa iyó nyivi, tyin tsa tsitó maa ra náa iyó tsitsi añima yo.

3

Nu jacuaha ra Jesús tsi ra Nicodemo

¹ Tsicoo iin ra cuví fariseo tsa nañí Nicodemo. Tan cuví ra iin ra cuví ityi nuu tsihin ra Israel naha ra.

² Ra Nicodemo ihya, tsahan ra nu nyíi ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tava tyiñu tsi un tsa quitsi un jacuaha un tsi ndi. Tyin yoñi nyivi tan cuví javaha ñi tsa iyo tsa javahá un, tatun nduve Nyoo iyó tsihin ñi —catyí ra tsihin ra Jesús.

³ Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsa nyivi inga tsaha, ña cua cuví nyehe ñi nu ndacá ñaha Nyoo —catyí ra.

⁴ Tacan tan tsica tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsa ra inga tsaha? —catyí ra.

⁵ Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñí tsi nacacu tsa ñi tsihin Tatyí Ii Nyoo.

⁶ Tyin nyivi cacu tsihin cuñu ñuhu, cuñu ñuhu ñi cuví ñi. Tan nyivi nacacu tsa tsihin Tatyí Ii Nyoo, Tatyí Ii Nyoo iyó añima ñi.

⁷ Ña cu iyo iñi un tsa caahán yu tsehe tsihin un tyin tandihi nyivi cuñí tsi nacacu tsa ñi.

⁸ Tumaa tsa yihí tatyí tandihi ñi ityi tan tsiñí un cucayú vatsí tsi, maa tyin ña tsitó un numaa ityi quee tsi, tan ndáa ityi cuahán tsi; tacan cuví tandihi nyivi nacacu tsa tsihin Tatyí Ii Nyoo —catyí ra Jesús tsihin ra.

⁹ Tacan tan nducu tuhun nyico ra Nicodemo tsi ra inga tsaha tan catyí ra:

—¿Nacuenda caahán un tacan? —catyí ra tsihin ra.

¹⁰ Nacahan ra Jesús tan catyí ra:

—Yooho tsa cuví un maestro cuenda nyivi Israel, taahán tsi coto un tsehe.

¹¹ Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyooho ña tsinú iñi ndo tsa caahán ndi tsihin ndo.

¹² Tatun ña tsinú iñi ndo tsa caahán yu tuhun nu ñuhu ñayivi ihya tsihin ndo, ¿nacaa cua tsinu iñi ndo tatun cua cahan yu tuhun gloria tsihin ndo?

¹³ Yoñi tsahan gloria tsinyehé nacaa iyó. Intuhun ñi maa yuhu Rayi tsa quee nda gloria nyehé yu nacaa iyó gloria, tyin ndacan quee yu.

¹⁴ Tumaa tsa ticaa ra Moisés iin coo tsa tsinu tsihin caa nu yutun iin nu tsiqui, tacan cua ticaa nyivi tsi yuhu Rayi tsa quee nda gloria nuu cruu.

15 Tacan tan tandihí nyívi tsa tsinú íñi tsi yu, ña cua cunaa ñi. Tan cua coo ñi ñayívi nyito tsa ña cua naa maa.

Nyoo cuñí xaan ra tsi tandihí nyívi

16 'Nyoo cuñí xaan ra tsi tandihí nyívi iyó nu ñuhu ñayívi. Yacan cuenda tsaḥa ra tsa cúu Sehe mañi ra nu cruu tsa cuenda ñi. Tyin tacan tan tandihí ñi tsa tsinú íñi tsi Sehe ra, ña cunaa ñi, tan coo ñi ñayívi nyito tsa ña cua naa maa.

17 Tyin Nyoo jaquitsi ra tsi Sehe ra nu ñuhu ñayívi tyin jacacu ra tsi nyívi, tan ña jaquitsi ra tsi ra tsa jacunaa ra tsi ñi.

18 'Yacan cuenda nyívi tsa tsinú íñi tsi yu tsa cuví yu Sehe Nyoo ña cua cunaa ñi, maa tyin nyívi tsa ña tsinú íñi tsi yu, tsa cunaa ñi tyin ña tsinú íñi ñi tsi yu tsa cuví yu Sehe mañi Nyoo.

19 Nyívi ña tsinú íñi, tsa cunaa ñi. Tyin quívi quitsi yu jandunditsin yu nu ñuhu ñayívi, ña naquihin cuenda ñi tsi yu tyin taahán xaan ca maa íñi maa ñi iyó ñi nu naa tyin maa ñi tsa ña vaha javahá ñi.

20 Tandihí nyívi javahá tsa ña vaha, ña taahán íñi ñi coo ñi nu nditsin, tyin ña cuñí ñi tsa quituvi tsa ña vaha javahá ñi.

21 Maa tyin nyívi taahán íñi tsa nditsa, naquitá ñi nu nditsin tyin tacan tan nyehe nyívi tyin javahá ñi kuhva cuñí Nyoo tyin nyaá ra tsihin ñi —catyí ra Jesús.

Nu caahán ra Juan, ra jacoondutyá tsi nyívi, tuhun ra Jesús inga tsaḥa

22 Tsa yaha yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ican juhva quívi, tyin jacoondutyá ra naha tsi nyívi.

23 Tacan tucu ra Juan nyii ra jacoondutyá ra tsi nyívi nu cuví Enón yatyin ñi nu cuví Salim, tyin ican ñuhú cuha ndutya. Tan tsaá nyívi tan tsicoondutyá ñi.

24 Yacan javahá ra Juan tsa ndi cumañi ca quíhví ra vehe caa.

25 Tacan tan quitsaha caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyívi tsi ñi nuu Nyoo.

26 Tacan tan cuahán ra naha nu nyii ra Juan. Tan catyí ra naha tsihin ra:

—Maestro, ra tsa tsinyii tsihin un inga tsiyo yutya cahnu Jordán, ra tsa caḥan un tuhun tsihin ndi, vityin jacoondutyá ndihí ra tsi nyívi tan tandihí nyívi nyicún tsi ra —catyí ra naha tsihin ra.

27 Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatyin ña tsahá Nyoo tunyee íñi ra tsi yo.

28 Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa caḥan yu quívi catyí catsi yu tyin ra jaquitsi Nyoo ityi nuu ra Cristo cuví yu.

²⁹ Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha ñi tsi ra nyíí ra ican. Tan cusíí ñi ra tsiñí ra tsa caahán ra tsa cua tindaha. Tan tacan tucu yuhu, sîi cuñí yu tyin naquihín nyívi tuhun caahán ra Jesús tan nyicún ñi tsi ra.

³⁰ Maa ra cuví ra cahnu ca cuvi. Tan yuhu cua nduluhlu yu nuu ra tyin tacan taahán maa tsi.

Ra quee nda gloria tan quítsi ra nu ñuhu ñayívi

³¹ Ra tsa quee nda gloria, cahnu ca cuví ra tan ñavin ca tandihí nyívi. Tyin nyívi iyó nu ñuhu ñayívi ihya, cuenda nu ñuhu ñayívi cuví ñi. Tan caahán ñi tuhun tsa iyó nu ñuhu ñayívi. Maa tyin ra tsa quee nda gloria, cahnu cuví ra.

³² Tan caahán ra tsa nyehé ra tan tsa tsiñí ra, maa tyin yoñi tsinú ñi tsa caahán ra.

³³ Tatun yoo tan tsinú ñi yo tsa caahán ra, cua cuví yo tsa ndaa tyin Nyoo ña vatya ra.

³⁴ Tyin ra tsa jaquítsi Nyoo, tuhun Nyoo caahán ra tyin Nyoo ña tyihí cuhva ra Tatyí lí ra tan tsaha ra itsi tsi ra. Tsaha ra naníí Tatyí lí ra tsi ra.

³⁵ Nyoo Jutu yo cuñí ra tsi Sehe ra. Tan nacuhva cuenda ra tandihí maa tsi ra.

³⁶ Nyívi tsa tsinú ñi tsa caahán Sehe Nyoo, iyó ñi ñayívi nyito tsa ña cua naa maa. Maa tyin nyívi tsa ña cuñí tsinu ñi tsi ra, ña cua coo ñi ñayívi nyito. Tan cua tatsi tuñi Nyoo tsi ñi.

4

Nu natuhun ra Jesús tsihin iin ñaha Samaria

¹ Tsa tsitō ra cuví fariseo naha ra tyin cuaha xaan ca nyívi nyicún tsi ra Jesús tan ñavin ca ra Juan. Tan cuaha xaan ñi tsicoondutya.

² Maa tyin ñavin maa ra Jesús jacoondutyá tsi ñi, tyin ra tsicá tsihin ra jacoondutyá tsi ñi.

³ Tan quívi tsa tsitō ra Jesús tyin tsitō ra naha yacan, quee ra Judea can tan cuanuhu ra nda nu cuví Galilea.

⁴ Tsa cuahán ra, yaha ra nu cuví Samaria tyin cuñí tsi yaha ra ican.

⁵ Tacan tan tsaá ra iin ñuu tsa canyíí Samaria tsa nañí Sicar yatyin ñi nu cuví ñuhu ra Jacob nu tsaha ra tsi ra José sehe ra.

⁶ Ican nyaá iin soco pila tsa catyí nyívi tyin tsii ra Jacob cuví. Tsa quitā ra Jesús nu nyaá soco can tan tsinyaa ra yuhu soco can tyin tatu xaan ra tyin cañi xaan ityi tsicā ra tan maa hora cuví.

⁷⁻⁸ Ra tsicá tsihin ra, yoñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaá iin ñaha Samaria tyin cua tava ña ndutya tsitsi soco can. Tacan tan catyí ra Jesús tsihin ña:

—Cuhva luxu ndutya coho yu —catyí ra tsihin ña.

⁹ Tacan tan ñaha Samaria can catyí ña tsihin ra:

—Yooho tsa cuví un iin ra ñuu Israel, ¿nacuvi tyin tsicán un ndutya coho un tsi yuhu

tsa cuví yu ñaha Samaria?
—catyí ña.

(Tacan catyí ña tyin nyivi Israel ña vaha iyó ñi tshihin nyivi Samaria.)

¹⁰ Tacan tan nacahan ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tshihin ña.

¹¹ Tacan tan catyí ña tshihin ra:

—Tatta, cunu xaan soco ihya. ¿Nacaa tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu?

¹² Ra Jacob tsii tsahnu yo, nacoo ra soco ihya tsi ndi. Juvín ihya tsihi maa ra ndutya tan tshihin tandihi sehe ra. Tan juvín ñi ihya tsihi tucu quití jana ra naha. ¿A cahnu ca ra cuví yooho tan ñavin ca ra can? —catyí ña tshihin ra.

¹³ Tacan tan nacahan ra Jesús tan catyí ra tshihin ña:

—Tandihí nyivi tsihi ndutya ihya, cua na ityi nyico iñi ñi.

¹⁴ Maa tyin nyivi tsihi ndutya tsa tsahá yuhu, ña cua na ityi ca iñi ñi. Tyin ndutya tsa tsahá yuhu cua cana tsi tsitsi añima ñi tumaa caná ndutya iin ndohyo, tyin iin ndohyo ña tuhvá tsi ndoco. Tan tacan cua coo ñi ñayivi nyito —catyí ra tshihin ña.

¹⁵ Tacan tan quitsaha caahán ña tshihin ra:

—Yooho tatta, cuhva ndutya can coho yu na ña na ityi ca iñi yu, tan ndi ña quitsi ca yu quitsi tava yu ndutya tsitsi soco ihya —catyí ña tshihin ra.

¹⁶ Tacan tan catyí ra Jesús tshihin ña:

—Cuaahan cua quihin yii un tan quitsi ndo —catyí ra tshihin ña.

¹⁷ Tan nacahan ña tan catyí ña:

—Nduve yii yu iyó.

Tacan tan catyí ra Jesús tshihin ña:

—Nditsa tsa caahán un, tyin nduve yii un iyó.

¹⁸ Tyin tsa uhun yii un tsi-coo, tan ra cumí tsi un vityin ñavin yii un tsi ra. —catyí ra tshihin ña.

¹⁹ Tsa tsiñi ña tsa cahan ra tacan, quitsaha catyí ña tshihin ra:

—Yooho tatta, tuví iñi yu tyin ra cuví ndusu yuhu Nyoo cuví un.

²⁰ Tsii tsahnu ndi, ra ñuu ihya naha ra, jacahnu ra naha tsi Nyoo yucu ihya. Maa tyin nyooho tsa cuví nyivi Israel catyí ndo tyin nda Jerusalén taahán tsi jacahnu yo tsi Nyoo —catyí ña tshihin ra.

²¹ Tacan tan nacahan ra Jesús tan catyí ra tshihin ña:

—Tsinu iñi tsa caahán yu tshihin un. Tyin vatsí hora tsa cua jacahnu ndo tsi Jutu yo Nyoo. Maa tyin ña tsiñiñuhu ca tsa quitsi ndo yucu ihya, a cuhun ndo nda Jerusalén.

²² Nyooho nyivi Samaria, ña tsitó ndo yóo jacahnú ndo. Maa tyin nyuhu tsitó ndi yóo jacahnú ndi. Tan tsitó ndi

tyin cua jacacu iin ra Israel tsi nyivi jaha Nyoo.

23 Maa tyin cua tsa hora, tan hora can iyó yo vityin tyin nyivi tsa nditsa jacahnú tsi Nyoo Jutu yo, cua jacahnu ñi tsi ra tsihin añima ñi tan tsihin tsa nditsa. Tumaa jaquihín ityi maa Tatyí Ii Nyoo tsi ñi. Tyin Nyoo Jutu yo tacan cuñi ra javaha ñi tsa jacahnú tsi ra.

24 Tyin Nyoo Tatyí Ii cuví ra. Tan nyivi jacahnú tsi ra cuñi tsi jacahnú ñi tsi ra tsihin tsa nditsa tumaa jaquihín ityi maa Tatyí Ii tsi ñi —catyí ra tsihin ña.

25 Tan nacahan ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quivi quitsi ra, maa ra cua nacatyí tuhun tandihi tsihin yo —catyí ña tsihin ra.

26 Tacan tan nacahan ra Jesús tan catyí ra tsihin ña:

—Ra tsa caahan un tuhun can, juvin ra caahan tsihin un —catyí ra tsihin ña.

27 Tacan tan tsa nyico ra tsicá tsihin ra, tan iyo xaan cuñi ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñi ra, o ndaca tuhun ra naha tsi ra nacuenda natuhún ra tsihin ñaha can.

28 Tacan tan naco ña quivi ña tan cuanuhu ña nda ñuu. Tan catyí ña tsihin nyivi:

29 —Cohon ndo cunyehe ndo tsi iin ra tsa cahan tandihi cuhva iyó yu. ¿A ñavin

ra Cristo tsa cua jaquitsi Nyoo cuví ra? —catyí ña tsihin ñi.

30 Tacan tan quitá nyivi ñuu can tan cuahan ñi cua nyehe ñi nu nyii ra Jesús.

31 Tan tsa ndi cumañi ca tsa ñi nu nyii ra, ra tsicá tsihin ra, jañiñi ra naha tsi ra na catsi ra luxu. Tan catyí ra naha tsihin ra:

—Maestro, catsi luxu —catyí ra naha.

32 Maa tyin catyí ra Jesús tsihin ra naha:

—Yuhu iyó iin tsa tsatsí yu tan nyooho ña tsitó ndo náa cuví can —catyí ra tsihin ra naha.

33 Tacan tan ra tsicá tsihin ra, quitsaha natuhún tahan ra naha, tan catyí ra naha:

—¿A iyó yóo quitsi quitsi ndaca tsa catsi ra? —catyí ra naha.

34 Maa tyin ra Jesús catyí ra tsihin ra naha:

—Tsa tsatsí yuhu juvin tsi cuví tsa javahá yu cuhva cuñi ra tsa jaquitsi tsi yu, tan javahá yu tyiñu tsaha ra tsi yu.

35 Nyooho catyí ndo: “Ndi cumañi cumi yoo ca tan tahan tsi naquihin vaha yo tsa tatsi yo.” Maa tyin yuhu catyí yu tsihin ndo: Nyehe ndo tyin tsa ndihi tsa tatsi ndo cuaan tan tsa nyecú vaha tsi tsa cua naquihin vaha yo itsi.

36 Ra tsa naquihín vaha can ñihí ra yahví ra. Tan tsa naquihín vaha ra, cuví tsi nyivi tsa cua coo ñayivi nyito tsa ña cua naa maa. Tacan tan ra tsa tatsi tan ra tsa naquihín cusii iñi ra naha.

37 Tan iyó iin cuhva tuhvá nyiví caahán tan catyí ñi tyin siin nyiví tatsí tan siin nyiví naquihín vaha. Tan nditsa yacan.

38 Yuhu jacuhun yu tsi ndo tyin cua cahnu ndo ñiñi tsa iyó nu ña jahá tyiñu ndo, nu jahá tyiñu inga ra. Tan nyooho cucahnu ndo tan cua naquihin vaha ndo ñiñi can —catyí ra Jesús tsihin ra naha.

39 Tan cuaha xaan nyiví ñuu Samaria can quitsahá tsinú iñi ñi tsi ra Jesús tsa cuenda tsa cahán ñaha can, tyin catyí ña: “Cahán ra tsihin yu tandihí cuhva iyó yu”, catyí ña.

40 Cuhva tsa tsaá ñi nu nyí ra Jesús, tan cahán ndaahvi ñi tsihin ra na ndoo ra tsihin ñi. Tan ndoo ra tsihin ñi uvi quiví.

41 Tan cuaha ca nyiví quitsahá tsinú iñi ñi tsa tsiñi ñi tsa caahán ra.

42 Tacan tan quitsahá catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cahán un tsihin ndi, tyin tsiñi maa ndi tsihin soho ndi tsa caahán ra, tan tsitó vaha ndi tyin juvin ra cuví ra Cristo ra jacacú tsi nyiví iyó nu ñuhu ñayiví ihya —catyí ñi.

Nujanduvahá ra Jesús sehe iin ra cumí tyiñu

43 Tsa yahá uvi quiví tan quee ra Jesús nu cuví Samaria tan cuahán ra ityí nu cuví Galilea, nu cacu ra.

44 Vasu ndi maa juvin ñi maa ra cahán tyin iin ra cuví

ndusu yuhu Nyoo, nyiví ñuu ra ña jahá ñi tsa ñayiví tsi ra.

45 Tacan tan tsa tsaá ra Galilea, nyiví iyó ican, vaha caahán ñi tsihin ra, tyin tsahán ñi vico Jerusalén, tan nyehe ñi tsa vaha tsa javahá ra.

46 Tacan tan cuanuhu nyico ra Jesús nda ñuu Caná tsa canyí Galilea nu nanduvi ndutya vinu jahá ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhví nda ñuu Capernaum.

47 Quiví tsa tsitó ra can tyin tsa tsaá nyico ra Jesús nda Galilea tsa tsahán ra nda Judea, tsahán ra tsinyehe ra tsi ra Jesús. Tan tsican ra tumañi iñi tsi ra na cahun ra vehe ra tan janduvaha ra tsi sehe ra, tyin tsa cuñí cúu cuii ña sehe ra.

48 Tacan tan catyí ra Jesús tsihin ra:

—Nyooho ña cua tsinu iñi ndo tatun ña nyehe jihna ndo tsa iyo —catyí ra tsihin ra.

49 Maa tyin ra can catyí ra tsihin ra Jesús:

—Yooho taa, cohon ñi tsihin yu tsa ndi cumañi ca cúu sehe yu —catyí ra tsihin ra Jesús.

50 Tacan tan catyí ra Jesús tsihin ra:

—Cuanuhu yuvehe un. Sehe un nyito ra, tsa nduvahá ra —catyí ra tsihin ra.

Tacan tan ra can tsinu iñi ra tsa cahán ra Jesús tan cuanuhu ra.

51 Tsa tsa cuyatyin ra yuvehe ra, quitá musu ra tan caahán ra naha tsihin ra:

—¡Taa, sehe un nyito ra; tsa nduvahā ra!

⁵² Tacan tan quitsahā tsica tuhun ra tsi ra naha náa hora quitsahā vaha cuñi ra. Tan catyí ra naha tsihin ra:

—Icu cuhva caa iin tsa yahā hora quita cahñi tsi ra —catyí ra naha.

⁵³ Tacan tan tsito ra can, tyin hora can cahan ra Jesús tsihin ra, “Cuanuhu tyin sehe un nyito ra, tsa nduvahā ra.” Tan maa ra can tsihin tandihí nyivi ra quitsahā tsinú iñi ñi tsi ra Jesús.

⁵⁴ Yacan cuví tsa iyo tsa tsinu uvi javahā ra Jesús tsa tsaā nyico ra Galilea tsa yaha tsaḥan ra Judea.

5

Nu janduvahā ra Jesús iin ra cuuhví

¹ Tsa yahā can tan cuahán ra Jesús ñuu Jerusalén inga tsaha tyin nyivi ñuu Israel jacahnú ñi iin vico.

² Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyí. Tan yatyin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yuhu hebreo nañi vehe can Betesda. Tan iyó uhun corredor.

³ Tan ican yucú cuaha nyivi cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can.

⁴ Tyin nda naha nda naha ñi tan nuú iin ángel tan jancandá ra ndutya can. Tan nyivi tsa quihví jihna tsa yahā

ñi nacandá ndutya can, nduvahá ñi vasu ndi maa cuehe cahnu ndohó ñi.

⁵ Tan ican canyí iin ra cuuhví tan tsa iyó oco tsahun uñi cuiya cuuhví ra.

⁶ Tsa nyehe ra Jesús tsi ra ican canyí ra, tuví iñi ra tyin tsa cuaha xaan cuiya cuuhví ra. Tan tsica tuhun ra tsi ra ndaahvi can, tan catyí ra:

—¿A cuñi un nduvaha un?

⁷ Tan ra cuuhví can nacahan ra tan catyí ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahná ñi tsaha tsa cuñi yu quihví yu, inga nyivi quihví jihna —catyí ra cuuhví can tsihin ra Jesús.

⁸ Tacan tan catyí ra Jesús tsihin ra:

—Nduvita, naquihin yuvi un tan çaca un —catyí ra tsihin ra.

⁹ Juvin ñi hora can tan nduvahā ra, naquihin ra yuvi ra, tan nacaca ra. Maa tyin quivi quitatú nyivi cuví quivi can.

¹⁰ Yacan ra cuví ityi nuu tsihin nyivi Israel catyí ra naha tsihin ra tsa nduvahā can:

—Quivi quitatú yo cuví vi-tyin, yacan cuenda ña taahán tsi cuiso un yuvi un —catyí ra naha tsihin ra.

¹¹ Tan ra tsa nduvahā can nacahan ra tan catyí ra:

—Ra tsa janduvahā tsi yu, catyí ra tsihin yu: “Naquihin yuvi un tan çaca un”, catyí ra tsihin yu.

¹² Tacan tan quitsahā tsicá tuhun ra naha tsi ra, tan catyí ra naha:

—¿Yóo ra cahān tsihin un tyin naquihin un yuvi un tan caca un? —catyí ra naha.

¹³ Maa tyin ra tsa nduvahā can ña tsitó ra yóo janduvahā tsi ra. Tyin cuaha xaan nyiví nyecú ican, tan ra Jesús nduve ca ra nyaá tyin tsa cuahán ra.

¹⁴ Yahā can tan nañihí ra Jesús tsi ra tsa nduvahā can tsitsi vehe ñuhu cahnu, tan catyí ra tsihin ra:

—Jihna, vityin tsa nduvahā un, ña javaha ca un tsa ña vaha, tyin coto quitsi inga tundoho cahnu ca siqui un —catyí ra tsihin ra.

¹⁵ Tacan tan tsahān ra tsicahān ra tsihin ra Israel naha ra tyin ra Jesús cuví ra janduvahā tsi ra.

¹⁶ Tsa cuenda tsa janduvahā ra Jesús tsi ra can quiví quitatú nyiví, xaan xaan cuñí ra Israel naha ra nyehe ra naha tsi ra. Tan cuñí ra naha cahñi ra naha tsi ra.

¹⁷ Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

¹⁸ Tan tsa cuenda tsa cahān ra yacan, xaan ca cuñí ra Israel can naha ra. Tan ñihi ca cuñí ra naha cahñi ra naha tsi ra tyin cuñí maa ra naha tyin ña jahá ra Jesús tsa cahnu cuví quiví quitatú nyiví, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

Sehe Nyoo iyó xaan ndatu tsi ra cundaca ñaha ra

¹⁹ Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyehé yu javahá Jutu yu. Tandihí tsa javahá Jutu yu tan javahá tucu maa yu.

²⁰ Tyin cuñí xaan ra tsi yu, tyin Sehe ra cuví tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can.

²¹ Tumaa janandotó Nyoo Jutu yu ndiyí, tan tsahá ra ñayiví coo ñi, tacan tucu yuhu tsa cuví yu Sehe ra, tsahá yu ñayiví coo nyiví cuñí maa yu cuhva yu.

²² Tacan Nyoo Jutu yu, ña jandaa ca ra cuatyí ndi intuhun nyiví tyin tsa tsahā ra ndatu tsi yuhu tsa cuví yu Sehe ra tyin jandaa yu cuatyí nyiví.

²³ Tacan icá Nyoo Jutu yu tsa cuñí ra jacahnu nyiví tsi Sehe ra tumaa tsa jacahnú maa ñi tsi maa ra. Nyiví tsa ña jacahnú tsi yuhu tsa cuví yu Sehe Nyoo, ndi Jutu yu tan ña jacahnú ñi. Tyin maa ra jaquitsí tsi yu.

²⁴ Tan tsa nditsa caahán yu tyin nyiví tyaá soho tsa caahán yu tan tsinú iñi ñi tsi ra tsa jaquitsí tsi yu, iyó ñi ñayiví nyito tsa ña cua naa maa. Tan ña cua cahun ca ñi anyaya tsa catyí cuatyí ñi tyin tsa jacacu Nyoo tsi ñi tan ña yihí ndaha ca tuhun tsihi

tsi ñi, tan tsahá ra ñayivi nyito iyó ñi.

²⁵ Nyivi; tumaa ndiyi cuvi ñi. Tan tsa nditsa caahán yu tsihin ndo tyin vatsi quivi cua cuñi ñi ndusu Sehe Nyoo. Tan nyivi tsa cua tyaa yahvi tsa caahán ra, cua coo ñi ñayivi nyito tsa ña cua naa maa. Tan vityin cuvi quivi tsa caahán yu tuhun.

²⁶ Tyin Nyoo Jutu yu iyó ra ñayivi nyito tsa ña cua naa maa. Tan tsahá ra ndatu can tsi yuhu tsa cuvi yu Sehe ra tyin cuhva yu ñayivi can coo nyivi.

²⁷ Tan tsahá tucu Nyoo ndatu tsi yu tsa jandaa yu cuaty nyivi, tyin Rayi quee nda gloria cuvi yu.

²⁸ Ña iyo cuñi ndo tsa caahán yu tyehen, tyin cua tsaá quivi tsa cuñi ndiyi yucú tsitsi ñaña ndusu Sehe Nyoo.

²⁹ Tan cua quita ñi tsitsi ñaña ñi. Tacan tan nyivi tsa javahá tsa vaha cua nandoto ñi tyin coo ñi ñayivi nyitó. Maa tyin nyivi tsa javahá tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

Nu janahá tsi tyin ra Jesús iyó ndatu tsi ra tsa cuhva ra ñayivi nyito coo nyivi

³⁰ Yuhu ña cuvi javaha yu tsa javahá yu tsa intuhun ñi maa yu. Yuhu jandaá yu cuaty nyivi tumaa cuhva tava tyiñu maa Jutu yu tsi yu. Tan cuhva jandaa yu cuaty, vaha tsi, tyin ña javahá yu cuhva cuñi maa yu, tyin javahá yu

cuhva caahán maa Jutu yu, ra tsa jaquitsi tsi yu.

³¹ Tan tatun juvin ñi maa yu cuvi tsa ndaa tsa cuenda yu, nduve yahvi nyaá tsa ndaa can.

³² Maa tyin iyó inga ra cuvi tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuvi tsa ndaa tan tsa nditsa.

³³ Nyooho tava tyiñu ndo na ndaca tuhun ra naha tsi ra Juan. Tan tuhun tsa cahan ra, tsa nditsa cuvi tsi.

³⁴ Maa tyin yuhu ña tsiñiñuhu tsa cuvi rayi tsa ndaa tsa cuenda yu. Maa tyin caahán yu tuhun tsa cahan ra Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo.

³⁵ Ra Juan cuvi ra tumaa iin lámpara tsa cayú tan jandunditsin tsi. Tan nyooho juhva ñi quivi cusii iñi ndo tsihin ñuhu nditsin can.

³⁶ Maa tyin yuhu iyó iin tsa ndaa vaha ca tsi yu tan ñavin ca tsa cahan ra Juan. Tyin tandihi tsa javahá yuhu, maa Jutu yu catyí tsihin yu na javaha yu can. Tan yacan cuvi tsa ndaa tsa nyehé ndo tyin nditsa tyin maa Jutu yu jaquitsi tsi yu.

³⁷ Tacan tucu Jutu yu, ra tsa jaquitsi tsi yu, cuvi ra tsa ndaa tsa cuenda yu. Nyooho ñaha ca cuñi ndo ndusu ra, tan ndi ñaha ca nyehe ndo tsi ra.

³⁸ Tan ña ndoó tuhun ra tsa caahán yu tsihin ndo tsitsi aña ndo tyin ña tsinú iñi ndo tyin Nyoo jaquitsi tsi yu.

39 Nyooho tsihin cuenda xaan cahví ndo nu tutu Nyoo, tyin cuñí maa ndo tyin nuu tsi cua ñihi ndo ñayivi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi.

40 Tan nyooho ña cuñí ndo quitsi ndo nu nyaá yu tan cuhva yu ñayivi nyito coo ndo.

41 Yuhu ña nducú yu tsa jacahnu nyivi tsi yu.

42 Tyin yuhu tsitó yu tsi ndo tan tsitó yu tyin ña cuñí ndo tsi Nyoo.

43 Yuhu vatsí yu cuenda Jutu yu tan nyooho ña naquihín ndo tsa caahán yu. Maa tyin tatun inga ra cua quitsí tsa cuenda maa ra, ra ican cua tsinu iñi ndo.

44 Nyooho ña cuví tsinu iñi ndo tsi yu tyin cuñí ndo nduvaha ndo nuu nyivi tahan ndo. Tan ña nducú ndo nduvaha ndo nuu Nyoo, tan in-tuhun ñi maa ra cuví Nyoo tsa iyó.

45 Ña caca iñi ndo tyin cua ndacan yu cuatyí tsaha ndo nuu Jutu yu. Nyooho cuñí maa ndo tyin ley tsa tyaa ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaha ndo tyin ña jacuví ndo ley tsa tyaa ra.

46 Tyin tun tsatyin nditsa tsa tsinú iñi ndo tsa cahan ra Moisés, tacan cua tsinu ndihi iñi ndo tsa caahán yuhu. Tyin tuhun yuhu cuví tsa tyaa ra.

47 Maa tyin tatun ña tsinú iñi ndo tuhun tsa tyaa ra, ¿nácaa cua tsinu iñi ndo tsa

caahán yuhu? —catyí ra Jesús tsihin ra cuví ityi nuu tsihin ra Israel naha ra.

6

Nu jacatsi ra Jesús uhun mil rayi

(Mt. 14.13-21; Mr. 6.30-44; Lc. 9.10-17)

1 Tsa yahá yacan, tan cuahán ra Jesús inga tsiyo miñi cahnu tsa nañi Nduhya Ñuhu Galilea. Tan juvin ñi nañi tucu tsi Miñi Tiberias.

2 Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhví.

3 Tacan tan ra Jesús ndaa ra iin yucu tan tsinyaá ra ican tsihin ra tsicá tsihin ra.

4 Tan tsa cuyatyin cuii tahan tsi quivi vico pascua tsa jacahnú nyivi Israel.

5 Tan nyehé ra Jesús tyin cuaha xaan nyivi nyicún tsi ra, tacan tan quitsahá caahán ra tsihin ra Felipe:

—¿Numaa cua jata yo tsa catsi nyivi cuaha ihya? —catyí ra tsihin ra.

6 Caahán ñi maa ra tsihin ra Felipe tyin nducú cuhva ra tsi ra náa cua cahan ra, tyin tsa tsitó maa ra Jesús náa cua javaha ra.

7 Tacan tan nacahan ra Felipe tan catyí ra:

—Xuhun tsa quihin yo tsa jahá tyiñu yo tsa uvi cientu quivi, ndi ña cua cutahan can jata yo luxu tsa catsi nyivi ihya —catyí ra Felipe.

8 Tan inga ra tsa nyicún tsi ra Jesús, ra Andrés, yañi ra

Simón Pedro, catyí ra tsihin ra Jesús:

⁹ —Ihya nyíí iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyívi ihya —catyí ra Andrés.

¹⁰ Tacan tan catyí ra Jesús tsihin ra naha:

—Cahan ndo tsihin tandihi nyívi na cunyecu ñi —catyí ra.

Tan cuaha xaan itya ican tan tsinyecu ñi, uhun mil rayi, [tan sñin maa ñi ñaha tsihin tsa nyihi].

¹¹ Tacan tan quihin ra Jesús paan can tan tsa yaha tsaha ra tyahvi nyoo tsi Nyoo, tan tsaha ra can tsi ra tsicá tsihin ra. Tan ra can naha ra, tsaha ra naha can tsi tandihi nyívi tsa nyecú can. Juvín ñi tacan icá nyico ra tsihin tyaca can. Tan tsatsi ndaha iñi ñi.

¹² Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihin vaha ndo tsa ñahñu tsa ndoo tyin tacan tan ña tiví tsi —catyí ra tsihin ra naha.

¹³ Naquihin vaha ra naha can, tan jacutu ra naha utsi uvi tyica tsihin tsa ñahñu tsa ndoo tsa uhun taahan paan can.

¹⁴ Tacan tan tsa yaha nyehe nyívi can tsa iyo tsa javaha ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvin ra nyaá tsa quitsi maa nu ñuhu ñayívi ihya —catyí ñi.

¹⁵ Maa tyin tsa tuví iñi ra Jesús tyin cuñí ñi tsa quihin ñi tsi ra tsihin tsa ñiñi tyin cuví

ra rey cuenda ñi, tacan tan cuahán nyico ra jiñi yucu nu sucun ca tyin cunyi intuhun ñi maa ra.

Nu tsicá ra Jesús nu ndutya (Mt. 14.22-27; Mr. 6.45-52)

¹⁶ Tsa cunaaha, nuu ra tsicá tsihin ra Jesús yuhu miñi can.

¹⁷ Tan quihvi ra naha tsitsi yutun ndoo tyin cua yaha sava ra naha mahñu miñi can tan cua tsa ra naha ñuu Capernaum. Tsa cunaaha tan ra Jesús ñaha ca maa tsa ra.

¹⁸ Tacan tan tsaá tatyí ñihi. Tan iyo nduvita ndutya miñi can.

¹⁹ Tsa tsa yaha ra naha uhun a iñu kilómetro tsihin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyin tsa cua cuyatyn ra nu cuahán yutun ndoo can, nayuhvi xaan ra naha.

²⁰ Maa tyin catyí ra Jesús tsihin ra naha:

—¡Maa yu cuví, ña nayuhvi ndo!

²¹ Tacan tan tsaha ra naha quihvi ra Jesús tsitsi yutun ndoo can. Tan iin yaha ñi tsaá ra naha yuhu miñi nu cuahán ra naha.

Nu nanducú nyívi tsi ra Jesús

²² Tsa tuví inga quívi tan tsito nyívi tsa ndoo inga tsiyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsito ñi tyin ña cuahán ra Jesús tsihin ra naha.

²³ Maa tyin tsaá taahan ca yutun ndoo tsa quee

ñuu Tiberias yatyin ñi nu nacuhva Jutu Mañi yo tyahvi nyoo tsi Nyoo tan tsatsi nyivi paan.

²⁴ Tacan tan tsa nyehe nyivi tyin nduve ra Jesús tan ndi ra tsicá tsihin ra, quihvi ñi tsitsi yutun ndoo tsa tsaq tan cuahán ñi nda ñuu Capernaum cua nanducu ñi tsi ra.

Ra Jesús cuví paan tsa tsahá ñayivi nyito coo yo

²⁵ Tsa tsaq ñi inga tsiyo miñi can, nañihí ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaq un ihya? —catyí ñi tsihin ra.

²⁶ Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyooho nanducú ndo tsi yu maa tyin ñavin cuenda tsa nyehe ndo tsa iyo tsa javaha yu. Nanducú ndo tsi yu tyin tsatsi ndo tan ndaha iñi ndo.

²⁷ Ña jaha tyiñu ndo cuenda tunyee iñi tsa tsatsi ndo tsa cua ndihi ñi maa, jaha tyiñu ndo cuenda tunyee iñi tsa catsi ndo tsa ña cua ndihi tan tsahá tsi ñayivi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tava tyiñu ra tsi yu tyin yuhu cuví Rayi tsa quee nda gloria —catyí ra Jesús.

²⁸ Tacan tan quitsaha tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñí Nyoo? —catyí ñi.

²⁹ Tacan tan catyí ra Jesús tsihin ñi:

—Tsa cuñí Nyoo javaha ndo, cuví tsa tsinu iñi ndo tsa caahán yuhu, ra tsa jaquitsi ra —catyí ra Jesús tsihin ñi.

³⁰ Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu iñi ndi tsa caahán un?

³¹ Tsi tsahnu ndi tsatsi ñi maná nu tsiqui, tumaa tsa caahán tuhun Nyoo tyehen: “Andivi quee paan tsatsi nyivi jaha Nyoo” —catyí ñi tsihin ra Jesús.

³² Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsaha paan tsa quee andivi tsatsi ñi, tyin maa Nyoo Jutu yu cuví ra tsahá paan nditsa tsa quee andivi.

³³ Tyin paan tsa tsahá Nyoo, yacan cuví ra tsa quee andivi. Tan juvin ra cuví ra tsahá ñayivi nyito coo nyivi iyó nu ñuhu ñayivi —catyí ra Jesús.

³⁴ Tacan tan quitsaha catyí ñi tsihin ra:

—Taa, cuhva paan can catsi ndi tandihi ñi quivi —catyí ñi.

³⁵ Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito aña ndo. Nyivi nyicún tsi yu ña cua cusoco ca ñi, tan ñi tsinú iñi tsa caahán yu ña cua na ityi iñi ñi.

³⁶ Maa tyin tumaa tsa caahán yu tsihin ndo, nyehe vaha ndo tsi yu, maa tyin ña cuñí ndo tsinu iñi ndo

tyin juvin yu cuví ra tsa cuví jatyinyee tsi ndo

³⁷ Tandihí nyívi tsa tsaha Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi.

³⁸ Tyin yuhu tsa quee andívi; vatsí yu vatsí javahá yu kuhva cuñí ra tsa jaquitsí tsi yu. Ña vatsí yu vatsí javaha yu kuhva cuñí ñi maa yu.

³⁹ Tan kuhva cuñí ra tsa jaquitsí tsi yu, yacan cuví tsehe: tsa ña cunaa ndi intuhun nyívi tsa tsahá ra tsi yu, tan janandoto yu tsi ñi nu cua cundihí quívi.

⁴⁰ Jutu yu, ra tsa jaquitsí tsi yu, cuñí ra tyin tandihí nyívi tsa cutuñi ñi tyin Sehe Nyoo cuví tsi yu, tan tsinu ñi ñi tsa caahán yu, cua coo ñi ñayívi nyito tsa ña cua naa maa. Tan juvin ñi yu cua janandoto tsi ñi nu cua cundihí quívi —catyí ra Jesús tsihin ñi.

⁴¹ Tsa cuenda tsa cahan ra Jesús yacan, tan quitsaha caahán nyaa nyívi Israel tsi ra tyin catyí ra: “Yuhu cuví paan tsa quee andívi”, catyí ra.

⁴² Tacan tan quitsaha catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andívi quee ra? —catyí ñi.

⁴³ Tacan tan catyí ra Jesús tsihin ñi:

—Jandihí ndo tsa caahán nyaa ndo.

⁴⁴ Yoñi maa nyívi cuví quitsi quitsi nyicún tsi yu tatun ñavin Jutu yu, ra tsa

jaquitsí tsi yu, caná tsi ñi. Tan cua janandoto yu tsi ñi nu cua cundihí quívi.

⁴⁵ Nu libru tsa tyaá ra cuví ndusu yuhu Nyoo caahán tsi tyehen: “Nyoo cua jacuaha ra tsi tandihí nyívi” catyí tsi. Yacan cuenda nyívi tsa tyaá soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

⁴⁶ Ñavin tsa tyin nyehe ñi tsi Nyoo Jutu yu, tyin yoñi nyehe tsi ra. Intuhun ñi maa yu nyehé tsi ra. Tan juvin yu cuví ra tsa quee nu nyaá ra.

⁴⁷ Tsa nditsa catyí yu tsihin ndo tyin nyívi tsa tsinú ñi tsa caahán yu tsa iyó ñi ñayívi nyito tsa ña cua naa maa.

⁴⁸ Yuhu cuví paan tsa tsahá tsa coo nyito añima ñi.

⁴⁹ Tsii tsaahnu ndo tsatsí ñi maná nu tsíqui, maa tyin juvin ñi tsihi ñi.

⁵⁰ Maa tyin yuhu, tuhun paan tsa quee andívi caahán yu tsihin ndo, tyin nyívi tsa cua catsi paan can, ña cua cúu ñi.

⁵¹ Juvín ñi maa yu cuví paan nyito tsa quee andívi. Nyívi tsa cua catsi paan ihya ña cua cundihí tsa coo ñi, tyin paan tsa cua kuhva yu, yacan cuví cuñu ñuhu yu. Tan cua kuhva yu ñayívi tsa iyó yu tsa cuenda tandihí nyívi iyó nu ñuhu ñayívi —catyí ra Jesús tsihin ñi.

⁵² Tacan tan nyívi Israel can quitsaha natuhún tahan ñi tan catyí ñi:

—¿Nacaa cua kuhva ra tsa catsi yo cuñu ñuhu ra?

53 Tan catyí ra Jesús:

—Tsa nditsa catyí yu tsihin ndo, tyin yuhu cuví Rayíi tsa quee nda gloria, tan tatun nyooho tan ña cua catsi ndo cuñu ñuhu yu, tan ña coho ndo niñi yu, ña cuví coo ndo ñayivi nyitó.

54 Nyivi tsatsí cuñu ñuhu yu tan tsihí ñi niñi yu, iyó ñi ñayivi nyito tsa ña cua naa maa. Tan yuhu cua janandoto yu tsi ñi nu cua cundihi quivi.

55 Tyin cuñu ñuhu yu yacan cuví paan tsa nditsa tsa taahán tsi catsi ñi, tan niñi yu cuví vinu tsa nditsa tsa taahán tsi coho ñi.

56 Nyivi tsatsí cuñu ñuhu yu tan tsihí ñi niñi yu, iin ñi cuví ñi tsihin yu. Tan iin ñi cuví yu tsihin ñi.

57 Jutu yu, ra tsa jaquitsi tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyivi tsatsí cuñu ñuhu yu, cua coo ñi tsihin tunyee iñi tsa iyó tsi yu.

58 Tuhun paan tsa quee andivi caahán yu. Paan ihya ñavin tumaa maná tsa tsatsi tsi tsaahnu yo cuví tsi, tyin juvin ñi tsihí ñi. Nyivi tsatsí paan tsa cuví cuñu ñuhu yu, ña cua cundihi maa tsa coo ñi —catyí ra Jesús.

59 Juvin yacan jacuaha ra Jesús nu ndu iin nyivi tsitsi vehe ñuhu ñuu Capernaum.

60 Cuaha xaan nyivi nyicún tsi ra Jesús. Tan cuhva tsa tsiñi ñi yacan catyí ñi:

—Tuhun tsa caahán ra ihya, yíi xaan naquihin vaha

yo itsi. Yoñi maa cua tsinu iñi tsa caahán ra —catyí ñi.

61 Tacan tan tuví iñi ra Jesús tyin ña cuñi ñi naquihin ñi tsa caahán ra. Tan tsicá tuhun ra tsi ñi:

—¿A ndasi cuñi ndo tsa caahán yu ihya?

62 Tan ¿náa cua javaha ndo tatun nyehe ndo tsi yuhu Rayíi tsa quee nda gloria nandaa nyico yu inga tsaha ityi nu quee yu?

63 Tatyí Ii Nyoo tsahá ñayivi nyito. Tan cuñu ñuhu, ña jatyinyeé tsi tsa coo yo ñayivi can. Tan tsa caahán yuhu tsihin ndo, Tatyí Ii Nyoo cuví tsi tan tsahá tsi tsa coo nyitó añima ndo.

64 Maa tyin yihí ndo ña tsinú iñi ndo tsi yu —catyí ra Jesús.

Tyin nda quivi jihna tan tsa tsitó maa ra yóo ña cua tsinú iñi tsi ra tan yóo cua xico tsi ra.

65 Tan catyí ra:

—Yacan cuenda catyí yu tsihin ndo tyin yoñi nyivi cuví quitsi nyicun tsi yu tatun ñavin maa Nyoo Jutu yu caná tsi ñi —catyí ra Jesús.

66 Nda quivi can, tan cuaha xaan nyivi nyicún tsi ra Jesús nacoo ñi tsi ra. Tan ña tsicá ca ñi tsihin ra.

67 Tacan tan tsicá tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñi ndihi tucu nyooho cuhun ndo? —catyí ra tsihin ra naha.

68 Maa tyin nacahan ra Simón Pedro tan catyí ra:

—Jutu Mañi yu, ¿yóo cunyi-cun ndi? Tan intuhun ñi maa un caahán tuhun ñayivi nyito tsa ña cua naa maa.

⁶⁹ Nyuhu tsinú iñi ndi, tan tsitó ndi tyin yooho cuví ra Cristo Sehe Nyoo nyito.

⁷⁰ Tan nacahan ra Jesús tan catyí ra:

—¿A ñavin yuhu nacatsj tsi tandihi tsa utsi uvi ndo? Tan intuhun ndo yihí nu ña vaha —catyí ra.

⁷¹ Tuhun tsa caahán ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan iñi tsi ra, vasu iin ra tsa utsi uvi can cuví ra.

7

Nu ña tsinú iñi yañi ra Jesús tsi ra

¹ Tsa yaha yacan, tan nyíí ra Jesús tsicá nuu ra nu cuví Galilea. Ña cuñí ra cuhun ra nu cuví Judea tyin ra cuví ityi nuu tsihin nyivi Israel can naha ra cuñí ra naha cahñi ra naha tsi ra.

² Tan tsa cuyatyin quivi vico tsa jacahnú nyivi Israel ndihi ñi cuiya. Tan nañí tsi Vico Tyahva.

³ Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyivi nyicún tsi un tsa iyó ndacan nyehe ñi tyiñu javahá un.

⁴ Tyin tatun cuñí yo tsa coto nyivi tsi yo, ña javahá xeehe yo tsa javahá yo. Tan yooho tatun nditsa tsa javahá un, javaha can nuu tandihi nyivi —catyí tandihi yañi ra.

⁵ Tacan catyí ra naha tyin ndi tsa cuví ra naha yañi ra tan ña tsinú iñi ra naha tsi ra.

⁶ Tacan tan catyí ra Jesús tsihin ra naha:

—Ñaha ca tsa hora tsa cuhun yuhu. Maa tyin nyooho ndáa quivi ñi cuví cuhun ndo.

⁷ Tyin vaha cuñí nyivi nyehé ñi tsi ndo, maa tyin yuhu ndasi cuñí ñi nyehé ñi tsi yu tsa cuenda tyin caahán catsi yu tsihin ñi tyin ña vaha tsa javahá ñi.

⁸ Cuaahan nyooho vico can. Yuhu ña cuhun yu tyin ñaha ca tsa hora tsa taahán tsi cuhun yu —catyí ra.

⁹ Yaha can tan ndoo ra nu cuví Galilea.

Nu nyíí ra Jesús nu iyó vico Tyahva

¹⁰ Tsa yaha cuahán yañi ra Jesús vico can, tsahan cuahán ndihi ra, maa tyin cuahán xeehe ñi ra.

¹¹ Tan ra cuví ityi nuu tsihin nyivi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyíí ra can? —catyí ra naha.

¹² Tan caahán nyivi yucú vico can tuhun ra. Yihí ñi catyí ñi: “Iin ra vaha cuví ra.” Tan inga ñi catyí ñi: “Ña vaha ra, jandaví ñaha ra tsi nyivi”, catyí ñi.

¹³ Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

¹⁴ Tsa cusava iyó vico tan tsa ra Jesús tsitsi vehe ñuhu

cahnu tan quitsahā jacuahā ra tsi nyivi.

¹⁵ Tan ra cuví ityi nuu can iyó cuñí ra naha tan quitsahā natuhun tahan ra naha:

—¿Nacaa tyin tsitó ra ihya tan ña cahvi ra? —catyí ra naha.

¹⁶ Tan nacahan ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsi tsi yu cuví tsi.

¹⁷ Tatun yihí nyooho tsa cuñí javaha cuhva cuñí Nyoo, cua coto ndo tyin cuenda Nyoo jacuahá yu tan ñavin tsa cuenda maa yu.

¹⁸ Nyivi tsa caahán cuenda maa ñi, caahán ñi tyin cuñí ñi tsa jacahnu nyivi tsi ñi. Maa tyin ra nducú tsa jacahnu nyivi tsi Nyoo, ra tsa jaquitsi tsi ra, ra ican caahán tsa nditsa. Tan ña jandavi ñaha ra.

¹⁹ ¿A ña nditsa tyin ra Moisés tсахā ra ley tsi ndo? Maa tyin ndi intuhun nyooho tan ña tyaá yahvi ndo ley can. ¿Nacuenda cuñí ndo cahñi ndo tsi yu? —catyí ra.

²⁰ Tan nacahan nyivi tan catyí ñi tsihin ra:

—Tatyí ña vaha yihí tsi yooho. Yoñi cuñí cahñi tsi un —catyí ñi tsihin ra.

²¹ Tan catyí ra Jesús:

—Tsacatyí tsa javahā yu tsa iyo quivi quitatu yo, yacan ndasi cuñí ndo nyehé ndo tsi yu.

²² Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo

tsi sehe yhi ndo. Vasu ñavin ra quitsahā tsihin tuhun can, maa tyin nyivi cuví nyivi ra ityi tsata, jihna ca ñi javahā tacan. Yacan cuenda javahá ndo can vasu taahán tsi quivi quitatu yo.

²³ Tan vityin, vaha tatun tsa cuenda tsa ña cuñí ndo cumañi ndo ley ra Moisés tan javahá ndo tuhun can vasu quivi quitatú yo cuví. Maa tyin tatun tacan javahá ndo, ¿nacuenda tyin cuxaan ndo tsi yu tsa janduvahā yu tsi ra can quivi quitatú yo?

²⁴ Ña tyaa ndo cuatyí siqui nyivi tatun ña tsitó vaha ndo náa javahá ñi. Cuatu ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

Nu cahān ra Jesús tuhun maa ra

²⁵ Tacan tan juhva nyivi iyó Jerusalén, quitsahā tsicá tuhun ñi:

—¿A ñavin ra ihya nanducú xaan ra naha tyin cua cahñi ra naha tsi ra?

²⁶ Caahán nditsin ra tsihin nyivi. Tan yoñi caahán náa caahán tsihin ra. Vasiqui tsinú ndihi maa iñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsi Nyoo.

²⁷ Yoo tsitó vaha yo nu quee ra ihya, tan quivi quitsi ra Cristo yoñi maa cua coto nu-maa ityi cua quee ra —catyí ñi.

²⁸ Ra Jesús nyii ra tsitsi vehe ñuhu jacuahá ra, tan

tsitó ra tsa natuhún nyiví, yacan cuenda ñihi cahán ra tan catyí ra:

—¡Nyooho cuñí maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsi tsi yu, ra tsa cuví tsa nditsa. Nyooho ña nacotó ndo tsi ra.

²⁹Yuhu nacotó yu tsi ra tyin cuenda ra vatsí yu, tan maa ra jaquitsi tsi yu —catyí ra Jesús.

³⁰Tacan tan cuñí ra naha tyihi ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tiin ra naha tsi ra tsa cuenda tyin ñaha ca tahan tsi quiví tsa taahán maa tsi tiin ra naha tsi ra.

³¹Maa tyin cuaha xaan nyiví tsinu iñi tsi ra. Tan catyí ñi:

—Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

Nu jacuhun ra cuví fariseo naha ra tsi ra vitya tyin tiin ra naha tsi ra Jesús

³²Tsa tsiñi ra fariseo naha ra tsa caahán nyiví tuhun ra Jesús, maa ra naha tan ra cuví ityi nuu tsihin ra jutu naha ra, jacuhun ra naha vitya cuenda vehe ñuhu, na tiin ra naha tsi ra Jesús.

³³Tacan tan catyí ra Jesús:

—Juhva cuii ña quiví cua cunyaa yu tsihin ndo. Yahá can tan cuacunuhu yu nu nyaá ra tsa jaquitsi tsi yu.

³⁴Nyooho cua nanducu ndo tsi yu. Maa tyin ña cua ña ihi ndo tsi yu. Tyin ña cua cuví cahun ndo nu cua cunyaa yu —catyí ra Jesús.

³⁵Tacan tan quitsaha natuhún tahan ra cuví ityi nuu tsihin nyiví Israel naha ra:

—¿Numaa cua cahun ra ihya tsa ña cua ña ihi yo tsi ra? ¿A cahun ra nu iyó ra Israel ñuu Grecia naha ra tyin jacuaha ra tsi nyiví iyó Grecia can?

³⁶¿Náa cuñí tsi catyí tsa caahán ra tsihin yo? Tyin catyí ra: “Cua nanducu ndo tsi yu maa tyin ña cua ña ihi ca ndo tsi yu tyin ña cua cuví cahun ndo nu cua cunyaa yu” —tacan caahán yuhu tahan ra naha tuhun ra Jesús.

Nyiví tsinú iñi tsi Nyoo cua coo Tatyí Ii ra añima ñi

³⁷Quiví ndihi tsicoo vico, yacan cuví quiví tsa ña ihi ca. Tan quiví can nduvita ra Jesús tan ñihi caahán ra tan catyí ra:

—Tatun ndáa nyooho na ityi iñi ndo, ñaha ndo tan tsinu iñi ndo tsa caahán yu.

³⁸Tyin nyiví tsa tsinú iñi tsa caahán yu, cua cunu ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

³⁹Maa tyin tsihin yacan cuñí ra catyí ra tyin ñi tsinú iñi tsi ra cua ñi ihi ñi Tatyí Ii Nyoo, tyin quiví can ñaha ca quitsi Tatyí Ii Nyoo tyin ra Jesús, ñaha ca cunuhu ra nda

gloria nu cua jacahnu Jutu ra tsi ra.

Nu natahvi sava nyivi tsa cuenda ra Jesús

40 Juhva nyivi tsa tsiñi ya-can, catyí ñi:

—Nditsa tsa cuii tyin ra ihya cuví ndusu yuhu Nyoo tsa nyaá tsa cua quitsi —catyí ñi.

41 Tan inga ñi catyí ñi:

—Ra ican cuví ra Cristo ra tsa jaquitsi Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuví ra Cristo?

42 Tyin nu tutu Nyoo catyí tsi tyin ra Cristo cua cuví ra nyivi tata ra rey David, tan ra ñuu Belén tsa canyí nu cuví Galilea cua cuví ra, tumaa ra David —catyí ñi.

43 Tacan tan nyivi can natahvi sava ñi tsa cuenda ra Jesús.

44 Yihí ñi cuñi ñi quihin ñi tsi ra tan tyihi ñi tsi ra tsitsi vehe caa. Maa tyin yoñi tiñ tsi ra.

Ra cuví ityi nuu vehe ñuhu naha ra ña tsinú iñi ra naha tsi ra Jesús

45 Tacan tan ra vitya tsa iyó vehe ñuhu cahnu can, cuanuhu ra naha nu yucú ra fariseo naha ra tsihin ra cuví ityi nuu tsihin ra jutu naha ra. Tan tsicá tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

46 Tan catyí ra vitya can naha ra:

—¿Ndi intuhun tsaha tan yoñi tuhva caahán tumaa

caahán ra can! —catyí ra naha.

47 Tacan tan catyí ra fariseo naha ra tsihin ra vitya can naha ra:

—¿A jandavi ñaha ndihi ra can tsi nyooho?

48 Nyehe ndo tyin ndi intuhun ra cuví ityi nuu tsihin ndi, tan ra cuví fariseo naha ra, tan ña tsinú iñi ra naha tsi ra can.

49 Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

50 Tacan tan ra Nicodemo, ra tsa tsahan nu nyii ra Jesús tsa tsacuaa, cuví ndihi tucu ra fariseo, tan catyí ra tsihin ra naha:

51 —Catyí ley tyin ña cuví tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javahá ra —catyí ra tsihin ra naha.

52 Tacan tan nacahan ra naha tan catyí ra naha tsihin ra:

—¿A juvin ñi ra Galilea cuví ndihi tucu yooho? Cahvi nu tutu Nyoo tan nyehe un, tyin ndi intuhun ra cuví ndusu yuhu Nyoo tan ña nyaá tsi tsa quitsi ra nda Galilea —catyí ra naha.

Ñaha tsa quituvj tsihin rayi tsa ñavin yi ña cuví

53 Tacan tan cuanuhu intuhun intuhun ra naha nda yuvehe ra naha.

8

1 Maa tyin ra Jesús cuahán ra yucu Olivo.

2 Tsa cunditsin inga quivi, cuahán nyico ra Jesús inga tsaha vehe ñuhu cahnu. Tan

tandihí nyívi natuhva ñi nu nyí ra. Tan tsinyaa ra tan quitsaha caahán ra tsihin ñi.

³ Tacan tan ra jacuahá ley vehe ñuhu tan ra cuví fariseo naha ra tsaá ra naha tsihin iin ñaha iyó yí tyin tñin ra naha tsi ña nu tsicoo cuatyí ña tsihin inga rayí. Tan tyaa ra naha tsi ña mahñu nyívi tsa nyecú can.

⁴ Tan quitsaha catyí ra naha tsihin ra Jesús:

—Maestro, tñin ndi tsi ñaha ihya nu tsicoo cuatyí ña tsihin inga rayí.

⁵ Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nácaa catyí un? —catyí ra naha tsihin ra.

⁶ Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí siqui ra. Tacan tan tsinyaa tyayí ra Jesús nu ñuhu tan quitsaha tyaá ra letra nu ñuhú tsihin nundaha ra.

⁷ Maa tyin nducú tuhun ca ra naha tsi ra, tacan tan nduvitá nyityi ra tan catyí ra tsihin ra naha:

—Nyooho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

⁸ Tan tsinyaa tyayí nyico ra tan quitsaha jañihí ca ra tyaá ra letra nu ñuhu.

⁹ Tsa tsiñi ra naha tsa caahán ra tacan, tuví iñi ra naha tyin iyó tucu cuatyí maa ra naha. Tan quitsaha quitá intuhun intuhun ra naha, jihna ca ra tsahnu naha

ra quitá. Cuhva tsa ndihí ra naha quitá cuahán tan ndoo intuhun ña maa ra Jesús tsihin ñaha can mahñu nu nyecú nyívi can.

¹⁰ Tacan tan nduvitá nyityi ra Jesús tan nyehe ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaa cuatyí siqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

¹¹ Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

Ra Jesús cuví tsa nditsin tsa jandunditsin añima nyívi

¹² Tacan tan cahan nyico ra Jesús tsihin nyívi inga tsaha, tan catyí ra tsihin ñi:

—Yuhu cuví ra tsa jandunditsin añima nyívi iyó nu ñuhu ñayívi. Yoo nyívi tsa nyicún tsi yu, cua coo ñi iin ñayívi nyito nu nditsin. Tan ña cua caca nuu ñi nu naa —catyí ra Jesús tsihin ñi.

¹³ Tacan tan ra cuví fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

¹⁴ Nacahan ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi quee yu tan numaa ityi cua cuhun yu. Maa tyin nyooho ña tsitó ndo numaa ityi quee yu tan numaa ityi cua cuhun yu.

¹⁵ Nyooho yatyi xaan caahán ndo tsa caa nyivi. Maa tyin yuhu, ña caahán yu tsa caa ñi.

¹⁶ Tyin tatun cahan yu tsa caa nyivi, tsa nditsa cua cahan yu. Tyin ñavin intuhun ñi maa yu nyehé tsa iyó aña ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu.

¹⁷ Nu ley nyooho nyaá tyin tatun uvi ra tsahá tsa ndaa, cuñí tsi tsinú iñi yo tsa caahán ra naha.

¹⁸ Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsi tsi yu, cuví inga tsa ndaa —catyí ra Jesús tsihin ra naha.

¹⁹ Tacan tan tsicá tuhun ra naha tsi ra:

—¿Numaa nyí jutu un?

Tan catyí ra Jesús:

—Nyooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó ndo tsi yu, coto ndihi ndo tsi Jutu yu —catyí ra.

²⁰ Tuhun ihya cahan ra Jesús tsitsi tsa jacuahá ra tsitsi vehe ñuhu cahnu, nu nyí caja nu tyihí nyivi xuhun. Maa tyin yoñi tyihí tsi ra vehe caa, tyin ñaha ca tahan tsi quivi tsa taahán tsi cuhun ra.

“Nu cuhun yuhu ña cua cuvi cuhun ndo”, catyí ra Cristo

²¹ Tacan tan quitsaha caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siqui ndo. Tyin nu cua cuhun yuhu, nyooho ña cua cuvi cuhun ndo —catyí ra Jesús tsihin ra naha.

²² Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuvi cuhun yo nu cuahán ra —catyí ra naha.

²³ Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi siqui quee yu. Nyooho cuenda ñuhu ñayivi ihya cuví ndo. Maa tyin yuhu ñavin cuenda nu ñuhu ñayivi ihya cuví yu.

²⁴ Yacan cuenda catyí yu tsihin ndo tyin cua cúu ndo tan cua ndoo cuatyí ndo siqui ndo. Tyin tatun ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí ndo siqui ndo quivi cúu ndo —catyí ra Jesús tsihin ra naha.

²⁵ Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cuví yooho?

Nacahan ra Jesús tan catyí ra:

—Tsa yaha cahan yu tsihin ndo nda quivi jihna.

²⁶ Cuaha xaan ca tsa ndi cumañi cahan yu tsihin ndo, tan ndi cumañi cahan yu

cuhva iyó ndo. Maa tyin tsa caahán yu tsihin nyívi iyó nu ñuhu ñayívi, cuví tsi tsa tsiñi yu tsa caahán ra tsa jaquitsi tsi yu. Tan maa ra caahán tsa nditsa —catyí ra Jesús.

²⁷ Maa tyin ra Israel naha ra ña cutuñi iñi ra naha tatun tuhun Nyoo Jutu yo cahan ra tsihin ra naha.

²⁸ Yacan cuenda catyí ra tsihin ra naha:

—Cua tyaa ndo tsi yuhu, ra cuví Rayii tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyiñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu.

²⁹ Tyin Jutu yu, ra tsa jaquitsi tsi yu, nyii ra tsihin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñi ra —catyí ra Jesús.

³⁰ Tsa cahan ra Jesús yacan, cuaha xaan ra naha quitsaha tsinú iñi tsi ra.

Nyívi cuví sehe Nyoo tan nyívi javahá tsa caquiñi

³¹ Tacan tan catyí ra Jesús tsihin nyívi Israel, tsa quitsaha tsinú iñi tsi ra:

—Tatun nyooho tan jañihi ca ndo tyaa yahvi ndo cuhva jacuahá yu tsi ndo, cua tsa ndo cuví ndo nyívi tsa nditsa yihí cuenda yu.

³² Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

³³ Tan nacahan ra naha tan catyí ra naha:

—Nyuhu nyívi tata ra Abraham cuví ndi. Ndi iin tsaha tan ñaha ca cuví ndi musu nyívi. ¿Nacaa tsa catyí yooho tyin quita nuña ndi? —catyí ra naha tsihin ra.

³⁴ Tan catyí ra Jesús:

—Tsa nditsa catyí yu tsihin ndo tyin tandihi nyívi javahá tsa caquiñi, musu cuenda tsa caquiñi cuví ñi.

³⁵ Iin musu ña ndoo cuii ra vehe tsitoho ra. Maa tyin ra cuví sehe tsitoho vehe can, ndoo cuii ra vehe jutu ra.

³⁶ Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuii tyin ña cua cundaca ñaha ca tsa ña vaha tsi ndo.

³⁷ Tsa tsitó yu tyin tata ra Abraham cuví ndo. Maa tyin yihí ndo cuñi ndo cahñi ndo tsi yu, tyin ña naquihín vaha ndo tsa caahán yu.

³⁸ Yuhu caahán yu tsa janahá Jutu yu tsi yu. Tan nyooho javahá ndo tsa caahán ra cuví jutu ndo tsihin ndo —catyí ra tsihin ra naha.

³⁹ Tan nacahan ra naha tan catyí ra naha:

—Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra.

⁴⁰ Maa tyin nyooho, vasu caahán yu tsihin ndo tsa nditsa tsa janahá Nyoo tsi yu, nyooho cuñi ndo cahñi ndo tsi yu. ¡Ra Abraham ña javahá ra tacan!

41 Nyooho javahá ndo tuma javahá jutu ndo —catyí ra tsihin ra naha.

Tacan tan nacahan ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

42 Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñi ndo tsi yu. Tyin yuhu quee yu nu nyaá ra tan tsaá yu ihya. Ña vatsí yu cuenda maa yu, tyin maa Nyoo jaquitsi tsi yu.

43 ¿Nacuenda ña cutuñi iñi ndo tsa caahán yu tsihin ndo? Tsa cuenda tyin ña cuñi ndo tyaa soho ndo tsa caahán yu.

44 Cuihna cuví jutu ndo. Tan sehe nu tsi ndo. Tan cuñi ndo javaha ndo cuhva cuñi nu. Tan nu ña vaha can cuví nu tsahñi nyivi nda quivi jihna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyivi tyin cuñi nu tsa coo ñi cuhva iyó nu tyin vatya xaan nu. Tan jutu nyivi vatya cuví nu.

45 Tan yuhu caahán yu tsa nditsa, maa tyin nyooho ña tsinú iñi ndo tsa caahán yu.

46 ¿Ndáa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú iñi ndo tsi yu?

47 Nyivi cuenda Nyoo tyaa soho ñi tuhun caahán ra. Maa tyin nyooho ñavin nyivi cuenda Nyoo cuví ndo, yacan cuenda ña cuñi ndo tyaa soho

ndo tsa caahán yu —catyí ra Jesús.

Ra Cristo, tsa iyó maa ra nda ndi cumañi ca coo ra Abraham,

48 Tacan tan catyí ra Israel naha ra tsihin ra:

—¿A ña nditsa tyin yooho ra ñuu Samaria cuví un, tan yihí tatyí ña vaha tsi un? —catyí ra naha tsihin ra.

49 Tan nacahan ra Jesús tan catyí ra:

—Nduve tatyí ña vaha yihí tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu.

50 Yuhu ña nducú yu tsa jacahnu nyivi tsi yu, maa tyin iyó iin ra nanducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu.

51 Tsa nditsa catyí yu tyin nyivi tsa tyaa yahvi tsa caahán yu ña cua tsa tuhun tsihiñi añima ñi —catyí ra Jesús tsihin ra naha.

52 Tacan tan nacahan ra Israel can naha ra tan catyí ra naha:

—Vityin tsitó vaha ndi tyin yihí tatyí ña vaha tsi un. Tyin ra Abraham tan tandihí ca ra cuví ndusu yuhu Nyoo tsihiñi ra naha. Tan yooho catyí un tyin nyivi tyaa yahvi tsa caahán un ña cua cúu ñi.

53 ¿A cahnu ca ra cuví yooho tan ñavin ca ra Abraham jutu yo? Maa ra tsihiñi ra tan tacan tucu ra cuví ndusu yuhu Nyoo. ¿Yóo ra cuví yooho cuñi maa un? —catyí ra naha tsihin ra.

⁵⁴ Tan nacah̄an ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyoocho tuhun tyin Nyoo ndo cuví tsi ra.

⁵⁵ Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyoocho. Maa tyin yuhu nditsa tsa nacotó yu tsi ra, tan tyaá yahvi yu tsa caahán ra.

⁵⁶ Ra Abraham tsii tsaahnu yo s̄i xaan cuñi ra tyin cua nyehe ra quivi cua quitsi yuhu nu ñuhu ñayivi. Nyehe ra quitsi yu tan s̄i xaan cuñi ra —catyí ra Jesús tsihin ra naha.

⁵⁷ Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehe un tsi ra Abraham!

⁵⁸ Tan nacah̄an ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

⁵⁹ Tacan tan quih̄in ra naha yuu tyin cua cañi ra naha tsi ra Jesús. Maa tyin iin yaha ñi quih̄vi xeehe ra tan yaha ra mah̄nu ra naha tan quita ra tsitsi vehe ñuhu can cuahán ra.

9

Nu janduvah̄a ra Jesús tsi iin ra cuaa nda cac̄u ra

¹ Cuhva tsa yaha ra Jesús iin nu yaha ra, nyehe ra tsi iin ra cuaa nda cac̄u ra.

² Tan quitsah̄a tsicá tuhun ra tsicá tsihin ra tsi ra:

—Maestro, ¿nacuvi tyin cuaa ra ihya cac̄u ra? ¿A tsa cuenda cuatyí jutu ra tan sihi ra, o tsa cuenda cuatyí maa ra? —catyí ra naha tsihin ra.

³ Tan nacah̄an ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee iñi ra tsi nyivi tsa cuenda ra can.

⁴ Tsa tsinu cah̄ni, cuñi tsi tsa javaha yu tyiñu ra tsa jaquitsi tsi yu. Tyin tsa yatyin cuii cua cuaa tan ña cua cuvi ca jaha tyiñu yo.

⁵ Tsa ndi nyii yu nu ñuhu ñayivi ihya, ñuhu jandunditsín [cuenda nyivi iyó] nu ñuhu ñayivi ihya cuví yu.

⁶ Tsa yaha tsa cah̄an ra Jesús tacan, tan tiv̄i s̄i ra nu ñuhu. Tan jatyīj ra luxu nyahyu tsihin s̄i ra tan tyaa ra tinuu ra cuaa can.

⁷ Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sivi can cuñi tsi catyí: “Jacuh̄un Yu Tsi Un.”

Tacan tan ra cuaa can tsah̄an ra tsinacatya ra nuu ra. Tan kuhva tsa tsaa nyico ra, tsa nyehé ra.

⁸ Tacan tan nyivi iyó yatyin yuvehe ra, tan nyivi tsa nyehe tsi ra tsa ndi cuaá ra catyí ñi:

—¿A ñavin ra ihya cuví ra tuhvá tsinyaá tsicán xuhun? —catyí ñi.

⁹ Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

¹⁰ Tacan tan quitsahá tsicá tuhun ñi tsi ra:

—¿Tan nácaa tyin cuví nyehé un vityin? —catyí ñi.

¹¹ Tan catyí ra:

—Ra tsa nañí Jesús, ra ican jatyi nyahyu tan tyaá ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan yu. Tan tsa yahá nacatya yu nuu yu tan nanyehe yu —catyí ra tsihin ñi.

¹² Tacan tan quitsahá tsicá tuhun ñi tsi ra:

—¿Tan numaa nyii ra can vityin?

Tan catyí ra tsihin ñi:

—Ña tsitó yu —catyí ra.

Nujanahma ra cuvifariseo naha ra tsi ra cuaa tsa nduvaha

¹³ Tacan tan tsindaca ñi tsi ra tsa nduvaha can nuu ra cuví fariseo naha ra.

¹⁴ Tyin quivi tsa jatyi ra Jesús nyahyu tan janduvaha ra tsi ra can, cuví tsi quivi quitatú nyivi.

¹⁵ Yacan cuenda ra cuví fariseo naha ra tsicá tuhun nyico ra naha tsi ra nácaa tyin

nyehé ra. Tan catyí ra tsihin ra naha:

—Tyaá ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

¹⁶ Tacan tan catyí juhva ra fariseo naha ra:

—Ra tsa javaha yacan ñavin cuenda Nyoo cuví ra, tyin ña tyaá yahvi ra quivi quitatú yo —catyí ra naha.

Maa tyin catyí inga ra naha

—¿Nacaa tsa cuví javaha ra tsa iyo ihya tatun ra iyó cuatyi cuví ra? —catyí ra naha.

Tan siin siin tsa caahan ra naha. Tan natahvi sava ra naha.

¹⁷ Tan tsicá tuhun nyico ra naha tsi ra nduvaha can inga tsaha, tan catyí ra naha tsihin ra:

—¿Tan yooho, náa catyí un tuhun ra tsa janduvaha tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

¹⁸ Maa tyin ra cuví ityi nuu tsihin nyivi Israel ña cuñi ra naha tsinu iñi ra naha tsa cuaa ra can tan nanyehe ra. Nda cuanda cana ra naha tsi jutu ra tan tsi sihi ra.

¹⁹ Tan tsicá tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaá ra cacu ra? ¿Nacaa tsa cuví nyehé ra vityin? —catyí ra naha.

²⁰ Nacahan jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quiví cacu ra.

²¹ Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvahā tinuu ra. Nḁaca tuhun maa ndo tsi ra. Tsa iyó tucu maa cuiya ra. Tan cuví nacatyí tuhun maa ra tsihin ndo —catyí ñi tsihin ra naha.

²² Jutu ra tan sihi ra caahán ñi tacan tsa cuenda tyin yuhví ñi tsi ra cuví ityi nuu tsihin nyivi Israel naha ra, tyin tsa natuhun tahan ra naha tyin cua tava cuii ra naha tsi nyivi vehe ñuhu, tun cahan ñi tyin ra Jesús cuví ra Cristo, ra tsa jaquitsi Nyoo.

²³ Yacan cuenda catyí ñi: “Nḁaca tuhun ndo tsi maa ra. Ra tsa ñihi cuví ra.”

²⁴ Tacan tan cana nyico ra naha tsi ra tsa nduvahā can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

²⁵ Tacan tan nacahan ra tsa nduvahā can tan catyí ra:

—Yuhu ña tsitó yu tatun ra iyó cuatyí cuví ra, a ñavin. Intuhun ñi tsa tsitó yu tyin yuhu ra cuaa cuví yu, maa tyin vityin nditsin nyehé yu —catyí ra.

²⁶ Tan tsicā tuhun nyico ra naha tsi ra inga tsaha tan catyí ra naha:

—¿Náa icā ra tsihin un? ¿Nacaa icā ra tan nanyehe un? —catyí ra naha tsihin ra.

²⁷ Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Náa cuenda cuñí ndo tsa cahan yu inga tsaha? ¿A cuñí ndihi ndo cunyicun ndo tsi ra can?

²⁸ Tacan tan nduxaan ra naha tsi ra, tan catyí ra naha:

—Yooho tsa yihí un cuenda ra, maa tyin nyuhu cuenda ra Moisés ra tsa tsicoq tsa naha yihí ndi.

²⁹ Nyuhu tsitó ndi tyin Nyoo cahan tsihin ra Moisés tahan tsa naha. Maa tyin ra can, ndi ña tsitó ndi numaa quee ra —catyí ra naha.

³⁰ Tacan tan nacahan ra tsa nduvahā can tan catyí ra:

—¡Naa tsa iyo cahnu cuví tsehe! Nyooho ña tsitó ndo numaa quee ra, tan jananyehe ra tsi yu.

³¹ Tsitó vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icá ra cuhva cuñí ra, tyaá soho Nyoo tsa caahán ra.

³² Ndi iin tsaha tan ñaha ca cuñi yo tatun iyó iin ra jananyehe tsi iin ra cuaá nda cacu ra.

³³ Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

³⁴ Tacan tan catyí ra naha tsihin ra:

—Yooho ra iyó cuatyí cuví un nda cacu un. ¿Tan cuñí un jacuaha un tsi nyuhu? —catyí ra naha.

Tan tava cuii ra naha tsi ra vehe ñuhu.

Nyivi tsa nduve tuhun Nyoo iyó añima tumaa tsa cuaa ñi

³⁵ Tsitó ra Jesús tyin tava ra naha tsi ra tsa janduvaha ra vehe ñuhu. Tan tsa ñihj tahan ra tsihin ra tan catyí ra tsihin ra:

—¿A tsinú iñi yooho tsa caahán Rayii tsa quee nda gloria? —catyí ra tsihin ra.

³⁶ Tan nacahan ra tan catyí ra:

—Catyí tuhun tsihin yu, taa, yoo ra cuví ra tyin tsinú iñi yu tsi ra —catyí ra tsihin ra.

³⁷ Tan catyí ra Jesús:

—Tsa nyehe un tsi ra. Tan juvin ra natuhún tsihin un —catyí ra tsihin ra.

³⁸ Tacan tan tsicuiñi tsiti ra tsaha ra Jesús tan catyí ra tsihin ra:

—Tsinú iñi yu tsi un, Jutu Mañi yu —catyí ra tsihin ra Jesús.

³⁹ Tan catyí ra Jesús:

—Yuhu vatsí yu tyin catyí tuhun yu tsa iyó añima nyivi iyó nu ñuhu ñayivi ihya. Tyin nyivi cuaa, ñi ña tsitó tuhun Nyoo cua nanyehe ñi tyin coo tuhun Nyoo añima ñi. Tan nyivi cuñi tyin nditsin nyehe ñi, catyí ñi tyin tsitó ñi tuhun Nyoo, coto ñi tyin cuaa ñi tyin ña tsinú iñi ñi tsi yu —catyí ra Jesús.

⁴⁰ Tacan tan juhva ra fariseo tsa nyecú tsihin ra Jesús tsiñi ra naha tsa caahán ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

⁴¹ Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsiñi ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsitó ndo, yacan cuenda ndoó cuatyí ndo siqui ndo —catyí ra tsihin ra naha.

10

Mbee ticatyí jana Nyoo cuví nyivi yihí cuenda ra, tan tsitó ñi tsi ra tsa jaquitsi Nyoo tyin jahá cuenda ra tsi ñi

¹ Caahán nyico ra Jesús tan catyí ra:

—Tsa nditsa catyí yu tsihin ndo, tatun iin ra cua quihvi tsitsi cora mbee ticatyí, tan ñavin yuhu cora quihvi ra, ra ican cuví ñasuhu.

² Maa tyin ra tsa quihvi ityi yuhu cora, ra jahá cuenda mbee can cuví ra.

³ Ra nyii yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tava ra tsi ti ityi tsata cora.

⁴ Tsa yaha tava ra tsi ti, tan cuahán ra ityi nuu tan nyicún ti naha ti tsi ra, tyin nacotó ti ndusu ra.

⁵ Maa tyin tatun nyivi tsa ña nacotó ti ndusu, tsinú ti nuu ñi tan ña cuahán ti cuanyicún ti tsi ñi.

⁶ Tyehen cahan ra Jesús tsihin nyivi. Maa tyin maa ñi ña cutuñi iñi ñi náa tuhun caahán ra tsa caahán ra tacan.

Ra Jesús cuví ra jahá cuenda vaha mbee ticatyí

⁷ Tacan tan catyí ra Jesús tsihin nyívi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihví nyívi yihí cuenda yu tan cuví ñi tumaa mbee ticatyí jana yu.

⁸ Tandihí ra tsa quítsi tsa ndi cumañi quítsi yu, ra suhu cuví ra naha. Maa tyin mbee jana yu ña tyaá yahvi ti naha ti tsa cahán ra naha.

⁹ Yuhu cuví yuvehe gloria. Nyívi tsa cua quihví yuvehe can, cua cacu ñi tan ña cua cuhun ca ñi anyaya. Tan cuví ñi tumaa mbee tsa quihví tan quitá tsitsi cora can. Tan ñihí ti cuhu tsatsí ti.

¹⁰ 'Iin ra ñasuhu, vatsí ra, vatsí suhu ra, vatsí cahñi ra, vatsí jatívi ra. Maa tyin yuhu vatsí yu tyin coo vaha ndo ñayívi nyitó tsa ña cua naa máa.

¹¹ Yuhu cuví ra vaha jahá cuenda mbee. Tyin ra jahá cuenda mbee tsahá ra ñayívi ra tsa cuenda mbee can.

¹² Maa tyin ra cuví musu, tatun nyehé ra vatsí lobo tsa cuví quití xaan, nacoó ra mbee jana tsitoho ra. Tan tsinú ra. Tyin ñavin jana maa ra cuví tsi ti naha ti. Tacan tan cua tiin quití xaan can tsi mbee can. Tan jacunu ti tsi mbee can ityi can tan ityi ihya.

¹³ Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi ti naha ti.

¹⁴ 'Yuhu cuví ra jahá cuenda vaha mbee jana yu.

Tan nacotó yu tsi ti naha ti. Tan nacotó tucu maa ti naha ti tsi yu,

¹⁵ tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayívi yu cuenda mbee jana yu.

¹⁶ Iyó tucu inga mbee jana yu tsa ña yihí tsitsi cora ihya. Cuñí tsi tsa cuhun yu cunaquihin yu tsi ti naha ti. Tan cua tyaá yahvi ti tsi yu. Tan iin ñi nu cua quihí tandihí ti. Tan cua coo intuhun ñi ra cua jaha cuenda tsi ti naha ti.

¹⁷ 'Jutu yu cuñí ra tsi yu tyin tsahá yu ñayívi yu tsacatyí nyívi. Maa tyin yaha can, tan cua nacuhva nyico ra ñayívi yu.

¹⁸ Yoñi cuví quihin nyaá ñayívi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayívi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaá Jutu yu tsi yu —catyí ra Jesús.

¹⁹ Tsa tsiñi nyico ra tsa cuví ityi nuu tsihin nyívi Israel naha ra tsa caahán ra Jesús tacan, natahví sava nyico ra naha inga tsaha.

²⁰ Tan cuaha xaan ra naha catyí:

—¿Nacuenda tyaá yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

²¹ Tan inga tucu ra naha catyí:

—Yoñi nyívi yihí tatyí ña vaha tan cuví cahan ñi tacan. ¿A cuví jananyehe tatyí ña

vaha can tsi iin ra cuaa?
—catyí ra naha.

Nu ña cuñi ra cuví ityi nuu tsihin nyivi Israel tyaa yahvi ra naha tsi ra Jesús

²² Yoo vitsin cuví tan nyivi iyó ñuu Jerusalén jacahnú ñi viçó tsa cuenda nu natsinú cuiya nu nacuhva cuenda ñi vehe ñuhu cahnu.

²³ Tan ra Jesús tsicá nuu ra vehe ñuhu can ityi nu nañi corredor ra Salomón.

²⁴ Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan quit-saha tsicá tuhun ra naha tsi ra:

—¿Ama cua cahan catsi un tsihin ndi tatun juvin un cuví ra Cristo ra tsa jaquitsi Nyoo? Cahán catsi tsihin ndi vityin ihya —catyí ra naha.

²⁵ Tan catyí ra Jesús:

—Tsa yaha cahan yu tsihin ndo, tan ña tsinu iñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu.

²⁶ Maa tyin nyooho ña tsinú iñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo.

²⁷ Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu.

²⁸ Yuhu tsahá yu ñayivi nyito tsa ña cua naa maa coo ti. Tan ña cua cunaa ti. Tan ndi yoñi cuví quihin nyaa tsi ti naha ti tsitsi ndaha yu.

²⁹ Maa Jutu yu tsaha tsi ti naha ti tsi yu. Tan cahnu ca cuví maa ra tan ñavin ca tandihí nyivi. Tan yoñi cuví

quihin nyaa tsi ti tsitsi ndaha ra.

³⁰ Yuhu tan Nyoo Jutu yu, iin ñi cuví ndi —catyí ra Jesús.

³¹ Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra.

³² Tan catyí ra Jesús tsihin ra naha:

—Cuaha xaan tsa vaha javaha yu nuu ndo tsihin tunyee iñi Jutu yu. ¿Tan ndáa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

³³ Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javaha un cua cañi ndi tsi un tsihin yuu, cua cañi ndi tsi un tsa cuenda tyin tsicoo cuatyí un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

³⁴ Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo.

³⁵ Tsitó yo tyin tsa caahán tuhun Nyoo, ña cua cuví catyí yo tyin ña nditsa. Tan Nyoo jacunañi ra nyoo tsi nyivi naquihín tsa caahán ra.

³⁶ Tatun maa Nyoo nacatsi tsi yuhu tan jaquitsi ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu?

37 Tatun ña javahá yu tsa javahá Jutu yu, ña ts̄inu iñi ndo tsi yu.

38 Maa tyin tatun javahá yu, vasu ña cua ts̄inu iñi ndo tsi yu, maa tyin ts̄inu iñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

39 Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

40 Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutyá ra Juan tsa jihna, tan ndoo ra ican.

41 Cuaha nyivi tsahan tsinyehé tsi ra, tan catyí ñi:

—Nditsa, vasu ndi intuhun tsa iyo ña javahá ra Juan, maa tyin tandihi tsa cahan ra cuenda ra ihya tan nditsa —catyí ñi.

42 Tan cuaha xaan nyivi tsa iyó ityi can ts̄inu iñi tsa caahán ra Jesús.

11

Nu tsihi ra Lázaro

1 Ñuu Betania tsicoo iin ra cuuhvi tsa nañi Lázaro. Tan ñuu can iyó ña María tsihin ña Marta tahan ña.

2 Ña María, cuhva ra Lázaro, juvin ña cuví ñaha tsa tyoso ndutya tami tsaha Jutu Mañi yo, tan jana ityi ña tsaha ra tsihin ixi jiñi ña.

3 Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhvi xaan ra.

4 Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhvi ra tyin quivi nduvaha ra cua nyehe nyivi tyin cahnu xaan cuví Nyoo tan tacan tucu Sehe ra —catyí ra Jesús.

5 Cuñi xaan ra Jesús tsi ña Marta tan ña tahan ña, tan ra Lázaro cuhva ñi.

6 Maa tyin quivi tsa tsiñi ra tyin cuuhvi ra Lázaro, ndoo ra uvi quivi ca nu nyii ra.

7 Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

8 Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyivi Israel naha ra cahñi ra naha tsi un tsihin yuu. Tan vityin, cuñi nyico un cuhun un inga tsaha ¿Nacuenda?

9 Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhu tsa jandunditsín nu ñuhu ñayivi ihya.

10 Maa tyin tatun tsacuaa tsicá nuu ra, cuví nduva ihñi ra tyin nduve ñuhu Nyoo jandunditsín nu cuahan ra.

11 Tacan tan quitsaha catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

12 Tacan tan catyí nyico ra tsicá tsihin ra:

—Taa, tatun quixí ra, cuñí tsi catyí can tyin cua nduvaha ra —catyí ra naha.

13 Maa tyin ra Jesús cuñí ra catyi ra tyin ra Lázaro tsa tsihi ra. Tan ra tsicá tsihin ra, cuñí maa ra naha tyin nditsa tsa quixí ra.

14 Tacan tan cahan catsi ra Jesús tsihin ra naha:

—Ra Lázaro tsa tsihi ra.

15 Tan cusí iñi yu tyin yoñi yu nyii ndacan. Tyin tacan vaha ca tsa cuenda nyooho na tsinu iñi ndo tsa caahan yu. Cohon ndo cunyehe yo tsi ra —catyí ra Jesús tsihin ra naha.

16 Tacan tan ra Tomás, tsa jacunañi ra naha “tinihi”, catyí ra tsihin inga ra tsicá tsihin ra Jesús:

—Cohon ndihi yo tyin cúu yo iin caa ñi tsihin ra —catyí ra.

Ra Jesús cuví ra janandotó tsi yo tan tsahá ra ñayivi nyito coo yo

17 Tsa tsaá ra Jesús Betania, ñihi tuhun ra tyin tsa cumi quivi nyii ra Lázaro tsitsi ñuhú.

18 Ñuu Betania can canyii tsi yatyin ñi nu canyii ñuu Jerusalén, tumaa iin cuhva tsa uvi kilómetro sasava.

19 Tan cuaha ra cuví ityi nuu tsihin nyivi Israel cuahan cua nyehe nu nyii ña Marta tan ña María cua jatyinyee ra naha tsi ñi tyin tsihi cuhva ñi.

20 Tan ñihi tuhun ña Marta tyin tsa cua tsaá ra Jesús. Tan cuahan ña cua jatahan ña tsi

ra. Maa tyin ña María ndoo ña yuvehe.

21 Tan catyí ña Marta tsihin ra Jesús:

—Jutu mañi yu, tun tsatyin ihya nyii maa un, ña cua cúu cuhva yu.

22 Maa tyin yuhu tsitó yu tyin Nyoo cua javaha ra tandihi tsa ndacan un tsi ra —catyí ña tsihin ra.

23 Tan catyí ra Jesús tsihin ña:

—Cuhva un cua nandoto ra.

24 Tan catyí ña Marta:

—Nditsa, tsitó yu tyin cua nandoto ra quivi nandoto ndiyi nu cua cundihí quivi —catyí ña.

25 Tacan tan catyí ra Jesús tsihin ña:

—Yuhu cuví ra janandotó ndiyi. Tan tsahá yu tsa coo nyitó nyivi. Nyivi tsinú iñi tsa caahan yu, vasu tsa tsihi ñi maa tyin coo nyico ñi.

26 Tan tandihi ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahan yu ihya? —catyí ra tsihin ña.

27 Tan catyí ña:

—Tsinú iñi yu, Jutu Mañi yu, tyin yooho cuví ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

Nu tsacu ra Jesús nu ñaña ra Lázaro

28 Tsa yahá tsa cahan ña Marta tacan, tan tsahan ña tsiquihin ña tsi ña María tahan ña, tan xeehe ñi cahan ña tsihin ña:

—Tsa tsaá Ra Maestro ihya. Tan caná ra tsi un —catyí ña.

29 Tsa tsiñi ña María tsa caahán ña, numi xaan ña nduvita ña, tan cuahán ña nu nyii ra Jesús.

30 Tan ñaha ca quihvi ra Jesús tsitsi ñuu hora can, ndi nyii ra nu nañihí ña Marta tsi ra.

31 Tan nda yuvehe ña María, yucú ra cuví ityi nuu tsihin nyivi Israel jatyinyeé ra naha tsi ñi. Tan nyehe ra naha tyin numi quita ña. Tan cuñí maa ra naha tyin cuahán ña nu ñaña cua vacu ña. Tan cuahán ndihí ra naha tsata ña.

32 Tan cuhva tsa tsaá ña María nu nyii ra Jesús tsi cuñi tsi ña tsaha ra, tan catyí ña:

—Jutu Mañi yu, tun tsatyin nyii un ihya, ña tsihi ra cuhva yu —catyí ña.

33 Tsa nyehe ra Jesús tyin tsacú ña María tan tsacú ra Israel tsa cuahan tsihin ña, nducuihya xaan cuñi ra.

34 Tan tsica tuhun ra tsi ñi:

—¿Nu maa tinyii ndo tsi ra? —catyí ra.

Tan catyí ñi:

—Jutu Mañi yu, çohon tan nyehe un —catyí ñi tsihin ra.

35 Tan tsacu ra Jesús.

36 Tacan tan catyí ra Israel can naha ra:

—Nyehe ndo tyin yaha xaan cuñi ra tsi ra —catyí ra naha.

37 Maa tyin catyí juhva ra naha:

—Ra ihya jananyehe ra tsi ra cuaa. ¿Nacuvi tyin ña cuví ica ra iin cuhva tan ña cúu ra Lázaro ihya? —catyí ra naha.

Nu janandoto ra Jesús tsi ra Lázaro

38 Nducuihya xaan cuñi nyico ra Jesús inga tsaha tan natuhva ra nu ñaña can. Tyin tsitsi yavi yuu cuví can. Tan ndasí iin yuu yuhu can.

39 Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quivi tsa nyii ra ican —catyí ña.

40 Maa tyin catyí ra Jesús tsihin ña:

—¿A ña caahán yu tsihin un tyin tatun tsinú iñi un, cua nyehe un tsa cahnu cuví Nyoo? —catyí ra tsihin ña.

41 Tacan tan jatsiyo ra naha yuu can. Tan nanyehe ndaa ra Jesús ityi andivi, tan catyí ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu.

42 Yuhu tsitó yu tyin maa ñi maa tsiñi un tsa caahán yu. Maa tyin tyehen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsi tsi yu —catyí ra Jesús tsihin Nyoo.

43 Tsa yaha tsa cahan ra tacan, cana tsa ra, tan catyí ra:

—¡Lázaro, quita nu nyii un juven!

44 Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tu-maa javahá nyivi Israel tsihin

ndiyi. Tan catyí ra Jesús tsihin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tsihin ñi.

Nu nducú cahñi ra naha tsi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Tan cuaha xaan ra cuví ityi nuu tsihin nyivi Israel tsa tsahan tsihin ña María quit-saha tsinú iñi ra naha tsa nyehe ra naha tsa javaha ra Jesús.

⁴⁶ Maa tyin juhva ra naha tsahan ra naha tsijacoto ra naha tsi ra fariseo naha ra tsa javaha ra Jesús.

⁴⁷ Tacan tan ra fariseo can naha ra tan ra cuví ityi nuu tsihin ra jutu naha ra jati-tahan ra naha tsi ra tuhvá ndu iín naha ra tan catyí ra naha:

—¿Nacaa cua javaha yo? Tyin cuaha xaan tsa iyo javaha ra can.

⁴⁸ Tatun cuhva yo tsa javaha ca ra tacan, tandihi nyivi tan cua tsinu iñi ñi tsi ra. Tan ra cumí tyiñu nda ñuu Roma cua quitsí ra naha tan cua cani ra naha vehe ñuhu yo tan ñuu yo —catyí ra naha.

⁴⁹ Maa tyin ra Caifás ra tsahnu tsa cuví ityi nuu tsihin ra jutu naha ra cuiya can, cahān ra tan catyí ra tsihin ra naha:

—Nyooho nduve maa náa tsitó ndo.

⁵⁰ Ndi ña cutuñí iñi ndo tyin vaha ca tsa cúu intuhun ñi rayi tsa cuenda tandihi nyivi ñuu, tan ñavin ca tsa cúu tandihi yo —catyí ra Caifás.

⁵¹ Ra Caifás can ñavin tsa cuñí maa ra tan caahān ra, tyin ra cuví ityi nuu tsihin tandihi jutu cuví ra cuiya can, yacan cuenda maa Nyoo jac-ahān tsi ra nu catyí ra tyin ra Jesús cua cúu ra tsa cuenda tandihi nyivi ñuu Israel.

⁵² Tan ñavin tsa cuenda maa ñi maa nyivi can, maa tyin cua jandu iin ra tsi tandihi nyivi cuví sehe Nyoo tsa iyó tandihi ca ñuu.

⁵³ Tacan tan nda quivi can tan ra cuví ityi nuu tsihin nyivi Israel can naha ra, nducú ra naha cuhva cahñi ra naha tsi ra Jesús.

⁵⁴ Yacan cuenda ña tsicá nuu nditsin ca ra Jesús nu iyó nyivi Israel. Quee ra Judea can. Tan cuahān ra iin ñuu tsa nañí Efraín tsa canyí yatyin ñi nu tsiqui, nu cuví ñuhu ityi. Tan ndoó ra ican tsihin ra tsicá tsihin ra.

⁵⁵ Ña cuaha ca quivi tan tahan tsi vico cuenda nyivi Israel, vico tsa nañí pascua. Tan cuaha xaan nyivi quee ñi ñuu ñi tan cuahān ñi nda ñuu Jerusalén cua javaha ñi tsa tuhvá maa ñi javaha tsa janduvahá ñi tsi ñi nuu Nyoo tsa ndi cumañi ca tahan tsi quivi vico can.

⁵⁶ Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñí nyooho? ¿A cua quitsi ra can vico ihya, o ña cua quitsi ra? —catyí ñi.

⁵⁷ Tan ra cuví fariseo tan ra cuví ityi nuu tsihin jutu, catyí ra naha tyin tatun ndaa nyivi tsitó nu nyii ra Jesús, na catyí

tuhun ñi. Tyin cuquihin ra naha tsi ra tyin cunyi ra vehe caa.

12

Nu tyosó ña María ndutya tami tsaha ra Jesús

(Mt. 26.6-13; Mr. 14.3-9)

¹ Cumañi iñu quivi ca tsa tahan tsi vico pascua, tan tsaá ra Jesús ñuu Betania nu iyó ra Lázaro, ra tsa janandoto ra.

² Ican javaha ñi tsa cuxiñi ra Jesús. Ña Marta tyihí ña coho nu mesa. Tan tsinyaa ra Jesús nu mesa. Tan nyaá ndihi tucu ra Lázaro tsihin ra.

³ Tacan tan quihin ña María tumaa sava litru ndutya tami tsa tsinu tsihin maa ñi maa yucu tsa nañi nardo, iin tsa yahvi xaan nyaá. Tan tyiso ña ndutya tami can tsaha ra Jesús. Yahá can tan jana ityi ña tsaha ra tsihin ixi jiñi ña. Nani cahnú maa tsitsi vehe can tsitu xico ndutya tami can.

⁴ Tan ican nyii tucu ra Judas Iscariote, sehe ra Simón. Cuví ra iin ra tsicá tsihin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu. Tan quitsaha catyí ra Judas can tsihin ñi can:

⁵ —¿Nacuenda ña xico ndo ndutya tami ihya tsi nyivi, tan cuhva ñi cuenda mil tsi ndo tsa cuenda can, (uñi cientu denario) tan jatyinyee ndo tsi nyivi ndaahvi? —catyí ra.

⁶ Caahán ra Judas yacan tyin ra ñasuhu cuví ra, ñavin tsa cundaahvi iñi ra nyehé ra tsi nyivi ndaahvi. Tyin maa ra yihí ndaha yitin nu yihí

xuhun ra naha, tan tuhvá ra suhu tsa tyihí ra naha tsitsi yitin can.

⁷ Tacan tan catyí ra Jesús tsihin ra:

—Jaña tsi ña, tyin ñaha ihya javaha ña tyehen tsa cuenda tsa cua quihvi cuñu ñuhu yu tsitsi ñuhu.

⁸ Nyivi ndaahvi tacan ñi nyecú maa ñi tsihin ndo, maa tyin yuhu ña cua cunyaa ca yu tsihin ndo tacan —catyí ra Jesús tsihin ra Judas.

Nu nducú cahñi ndihi ra Israel naha ra tsi ra Lázaro

⁹ Cuaha xaan nyivi Israel ñihí tuhun ñi tyin ra Jesús nyii ra Betania, tan tsahan ñi ican. Ñavin intuhun ñi ra Jesús cuñí ñi nyehe ñi tyin cuñí ndihi tucu ñi nyehe ñi tsi ra Lázaro, ra tsa janandoto ra Jesús.

¹⁰ Tacan tan ra cuví ityi nuu tsihin jutu natuhun tahan ra naha tyin cua cahñi ndihi ra naha tsi ra Lázaro.

¹¹ Tyin tsa cuenda ra tan cuaha xaan nyivi Israel quitá tsiyo ñi tan quitsaha tsinú iñi ñi tsi ra Jesús.

Nu quihvi ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

¹² Cuaha xaan nyivi tsaá ñi ñuu Jerusalén tsa cuví vico pascua. Tan tsa inga quivi tsito ñi tyin ra Jesús cua tsaá ra ñuu can.

¹³ Tacan tan tsahnya ñi ndaha ndicaha tan cuahán ñi cua jatahan ñi tsi ra Jesús. Tan caná tsaá ñi, tan catyí ñi:

—¡Cahnú xaan cuví Nyoo!
¡Nasoco xaan Nyoo tsi ra

vatsí ihya tsihin tunyee iñi Nyoo! ¡Nasoco xaan Nyoo tsi Rey cuenda yo nyivi Israell! —catyí ñi, caná tsaá ñi.

14 Tan ñihí ra Jesús iin burru tan tsicoso ra tsi ti tumaa catyí maa nu tutu Nyoo tyehen:

15 Ña nayuhvi ndo nyivi ñuu Sión

Nyehe ndo, vatsí Rey ndo.

Yosó ra iin burru —catyí tsi nu tutu Nyoo.

16 Quivi can ra tsicá tsihin ra Jesús, ña cutuñi iñi ra naha tsa nyaá nu tutu Nyoo. Maa tyin tsa yaha cuanuhu ra Jesús nda gloria, nducuhun iñi ra naha tyin tandihi yacan nyaá can nu tutu Nyoo tyin tacan cua tahan ra. Tan tacan tsa cuíi tahan ra.

17 Nyivi tsa nyehe quivi tsa cana ra Jesús tsi ra Lázaro tsitsi ñaña, quivi janandoto ra tsi ra, nacatyí tuhun ñi tsa nyehe ñi.

18 Yacan cuenda cuaha xaan nyivi tsijatahan tsi ra Jesús, tyin tsito ñi tsa iyo tsa javaha ra.

19 Tacan tan ra cuví fariseo catyí ra naha natuhun tahan ra naha:

—Tsa nyehé maa ndo tyin nduve maa náa cuví javahá yo, tyin tandihi nyivi tan cuahán ñi cuanyicún ñi tsi ra —catyí ra naha.

Nu nanducú juhva ra tsa quee Grecia tsi ra Jesús

20 Yucú tucu juhva ra Grecia mahñu nyivi tsa tsahan tsijacahnú vico ñuu Jerusalén.

21 Tacan tan natuhva ra Grecia can naha ra nu nyaá ra Felipe, ra quee ñuu Bet-saida tsa canyii Galilea, tan cahan ndaahvi ra naha tsihin ra tan catyí ra naha:

—Taa, cuñi ndi cahan ndi tsihin ra Jesús —catyí ra naha.

22 Tan tsahan ra Felipe tsicahan ra tsihin ra Andrés. Tan tsahan nduvi ra naha tsicatyí tuhun ra naha tsihin ra Jesús tyin ra Grecia can cuñi ra naha cahan ra naha tsihin ra.

23 Tan nacahan ra Jesús, tan catyí ra:

—Vityin tsa tsaá hora tsa cunuhu nyico yu nda nu quee yu, tan cua jacahnu jutu yu tsi yu, tsa cuví yu Rayii tsa quee nda gloria.

24 Tsa nditsa catyí yu tsihin ndo tyin tatun iin tsiti tan ña cua quihvi tsi ñuhu tan ña tyahyu tsi, intuhun ñi tsiti cua cuví tsi. Maa tyin tatun tyahyu tsi, ndutsaa tsi inga tsaha tan cua coo cuaha ca tsiti tsi.

25 Nyivi tsa cuñi xaan ñayivi iyó ñi, cua cunaa ñi. Maa tyin nyivi ña cuñi ñayivi iyó ñi nu ñuhu ñayivi ihya, cua ñihi ñi ñayivi nyitó tsa ña cua naa maa coo ñi.

26 Ndáa nyooho nyivi cuñi javaha tyiñu nuu yu, naha ndo quitsi nyicun ndo tsi yu. Tan nu cunyaa yu, cunyaa ndihi nyooho tsa jahá tyiñu tyiñu yu. Tyin nyivi jahá tyiñu tyiñu yu, cua jacahnu jutu yu tsi ñi.

Nu caahán ra Jesús nácaa cua cúu ra

27 Vityin tsicá xaan iñi yu. Tan ¿náa cua cahan yu? ¿A catyí yu tsihin Jutu yu na jatsiyo ra tundoho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayivi ihya.

28 Vaha ca cahan yu tsihin Jutu yu tan catyi yu: “Jutu Mañi yu, jachanu sivi un” —catyí ra Jesús.

Tacan tan cahan iin ndusu ityi andivi tan catyí tsi tye-
hen:

—Tsa yahā jachanu yu sivi yu, tan cua jachanu nyico yu inga tsaha —catyí ndusu can.

29 Tan nyivi nyecú ican, tsiñi ñi ndusu can, tan catyí ñi tyin savi cahan. Tan inga ñi catyí tyin iin ángel cahan tsihin ra.

30 Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahan ndusu can, tyin tsa cuenda tsa vaha tsi maa ndo cuví can.

31 Vityin cuví cuhva tsa cua tatsi tuñi Nyoo tsi nyivi iyó nu ñuhu ñayivi. Tan vityin cuví cuhva cua tava cuii Nyoo tsi nu ndacá ñaha nu ñuhu ñayivi ihya.

32 Tan cuhva tsa cua ticaa nyivi tsi yu nu cruu, yacan cuví cuhva cua ixta yu tandihi nyivi cahun ñi tsihin yu —catyí ra Jesús.

33 Caahán ra tacan tsa cuenda tsa cuñi ra cutuñi iñi ñi tyin tacan cua cúu ra.

34 Tan nacahan nyivi tan catyí ñi tsihin ra:

—Tuhvá ndi tsiñi cahví ra naha nu libru ley yo tyin ra cuví Cristo cua coo nyitó ra

tan ña cua cúu maa ra. ¿Nacaa tsa catyí yooho tyin cua ticaa nyivi tsi Rayi quee nda gloria nu cruu? Tan ¿yoo ra cuví Rayi tsa quee nda gloria tsa caahán un tuhun? —catyí ñi, tsicá tuhun ñi tsi ra.

35 Tacan tan catyí ra Jesús tsihin ñi:

—Ñuhu tsa jandunditsin nu nyecú ndo, juhva ña quivi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyivi tsicá nu naa ña tsitó ñi nu maa cuahán ñi.

36 Tsinu iñi ndo tsi yuhu ra cuví ñuhu nditsin, tsitsi tsa ndi nyi yu tsihin ndo. Tacan tan cuví ndo nyivi iyó nu nditsin.

Tsa yahā cahan ra Jesús tacan tan jatsiyo ñi ra tsi ra nuu ñi.

Nu caahán tsi náa cuenda ña tsinú iñi ra cuví ityi nuu tsihin nyivi Israel naha ra tsi ra Jesús

37 Vasu ndi maa cuaha xaan tsa iyo javahá ra Jesús nuu nyivi maa tyin ña tsinú maa iñi ñi tsa caahán ra.

38 Tyin taahán tsi tsa cuví tumaa tsa cahan ra Isaías ra cuví ndusu yuhu Nyoo, nu cahan ra tyeheh:

Jutu Mañi yu, yoñi cuñi tsinu iñi tsa caahán ndi.

Yoñi cutuñi iñi tunyee iñi tsa iyó tsi un, Jutu Mañi yu, catyí ra Isaías tahan tsanaha.

39 Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaa nyico tucu ra Isaías tyeheh:

40 Nyoo jacuaa ra tsi ñi. Tan jandundava ra aña ñi, tan ña cua nyehe ñi tsihin tinuu ñi, tan ña cua cutuñi iñi ñi tsihin aña ñi, tan ndi ña cua nacuhva cuenda ñi tsi ñi tsi ra tan janduvaha ra tsi ñi.

41 Ra Isaías cahan ra tyehen tyin nyehe ra tsa cahnú cuví Jutu Mañi yo Jesús, tan cahan ra tuhun ra.

42 Cuaha xaan nyivi Israel tsinú iñi tsi ra Jesús. Tan nda cuanda juhva ra cuví ityi nuu naha ra. Maa tyin ña jandunditsin ra naha tsi ra naha nuu nyivi tyin yuuhví ra naha tsi ra cuví fariseo naha ra. Coto tava cuii ra can naha ra tsi ra naha vehe ñuhu.

43 Tyin cuñi ra naha nduvaha ra naha nuu nyivi tan ñavin nuu Nyoo.

Tuhun cahan ra Jesús cua tatsi tuñi tsi nyivi

44 Ñihi caahan ra Jesús, tan catyí ra:

—Nyivi tsa tsinú iñi tsi yu, ñavin tsi maa ñi maa yu tsinú iñi ñi, tyin tsinú ndihi iñi ñi tsi ra tsa jaquitsi tsi yu.

45 Tan nyivi tsa nyehé tsi yu, nyehé ndihi ñi tsi ra tsa jaquitsi tsi yu.

46 Yuhu cuví tumaa ñuhu nditsin tan vatsi yu jandunditsin yu nu ñuhu ñayivi ihya, tyin nyivi tsinú iñi tsi yu ña cua ndoo ñi nu naa.

47 Maa tyin tatun yihí ndo tsiñi ndo tsa caahan yu, tan ña javahá ndo tsa caahan yu, ñavin yuhu tatsi tuñi tsi ndo. Tyin ña vatsi yu nu ñuhu

ñayivi ihya tyin tatsi tuñi yu tsi nyivi. Vatsi yu tyin vatsi jacacú yu tsi ñi.

48 Nyivi tsa ña cuñi naquihin vaha tsa caahan yu tan ña cuñi ñi javaha ñi tumaa cuhva cuñi yu, iyó tsa cua tatsi tuñi tsi ñi. Tuhun tsa caahan yu, yacan cua tatsi tuñi tsi ñi nu cua cundihí quivi.

49 Tyin ñavin cuenda maa yu caahan yu. Jutu yu, ra tsa jaquitsi tsi yu, tsaha ra tyiñu tsi yu caahan ra náa cua cahan yu tan náa cua jacuaha yu.

50 Tan tsitó yu tyin tyiñu tsa tsaha ra, tsahá tsi ñayivi nyitó tsa ña cua naa maa coo nyivi. Yacan cuenda, tandihí tsa caahan yu, caahan yu cuhva catyí maa Jutu yu tsa cahan yu.

13

Nu nacatyá ra Jesús tsaha ra tsicá tsihin ra

1 Tsa ndi cumañi ca iin quivi tan tahan tsi vico pas-cua, tsa tsitó maa ra Jesús tyin tsa cua tsa hora tsa cua quita ra nu ñuhu ñayivi ihya tan cunuhu ra nu nyaá Jutu ra. Tacan ñi maa cuñi xaan ra tsi nyivi cuenda ra tsa iyó nu ñuhu ñayivi ihya. Tan vityin cua janaha ra tsi ñi tyin cuñi xaan ra tsi ñi tyin cua cúu ra tsa cuenda ñi.

2 Tan cuxiñi ra Jesús tsihin ra tsicá tsihin ra. Tan quihvi nu ña vaha aña ra Judas Iscariote sehe ra Simón tan natyuhú nu tsi ra na xico ra tsi ra Jesús tan cuhva cuenda

ra tsi ra Jesús tsi nu xaan iñi tsi ra.

³ Maa tyin ra Jesús tsitó ra tyin tsaha Jutu ra tandihi tyiñu tsi ra tyin quihí ndaha ra. Tan tsitó ra tyin nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñi ra.

⁴ Tacan tan nduvita ra tan tava ra jahma tsa nditsi ra ityi tsata, tan tsahñi ra iin toalla tsitsi ra.

⁵ Tacan tan tyihí ra ndutya tsitsi iin tsicoho tan quitsaha nacatya ra tsaha ra tsicá tsihin ra. Tan jana ityi ra tsaha ra naha tsihin toalla can.

⁶ Tan tsa cua nacatya ra tsaha ra Simón Pedro tan catyí ra Simón tsihin ra:

—Jutu Mañi yu, ¿a yooho cua nacatya tsaha yu?

⁷ Tacan tan catyí ra Jesús:

—Vityin ña cutuñi iñi un tsa javahá yu, maa tyin cutuñi iñi maa un nu cuahán ca tsi quivi.

⁸ Maa tyin ra Pedro catyí ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuvi un.

⁹ Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

¹⁰ Maa tyin catyí ra Jesús tsihin ra:

—Nyivi tsa ndi tsityi, ña cuñi tsi tsa ndoo nanñi cahnu cuñu ñuhu ñi. Tsaha ña ñi cuñi

tsi ndoo, tyin tsa ndoo maa nanñi ñi. Nyooho tsa ndoo maa ndo, vasu ña tandihi ndo ndoo —catyí ra Jesús.

¹¹ Cahán ra tsa ña tandihi ra naha ndoo tyin tsitó ra yoo cua xico tsi ra tsi nu xaan iñi tsi ra nahnu.

¹² Tsa yaha nacatya ra Jesús tsaha ra tsicá tsihin ra, tan tsinditsi nyico ra jahma ra, tan tsinyaá nyico ra inga tsaha nu mesa tan catyí ra tsihin ra naha:

—¿A cutuñi iñi nyooho tsa javahá yu tsihin ndo?

¹³ Nyooho caahán ndo tsihin yu, “Maestro tan Jutu Mañi yu”, tan nditsa tyin yacan cuvi yu.

¹⁴ Yuhu tsa cuvi yu Ra Jacuahá tan Jutu Mañi ndo, nacatya yu tsaha ndo, tan tacan cuñi tsi tsa nacatya tahan maa ndo tsaha ndo.

¹⁵ Yuhu tsaha yu iin cuhva tsi ndo tyin javaha ndo tumaa cuhva javahá maa yu.

¹⁶ Tsa nditsa catyí yu tsihin ndo tyin ndi iin musu tan ña cahnu ca cuvi ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuvi ra tan ñavin ca ra tsa tava tyiñu tsi ra.

¹⁷ Tatun cutuñi iñi ndo yacan, tan javahá ndo can, sii xaan cua coo ndo.

¹⁸ Ñavin tsa cuenda tandihi ndo caahán yu. Yuhu tsitó maa yu yoo nacatsi yu. Maa tyin cuñi tsi tsa cuvi tumaa caahán tuhun Nyoo tyehen: “Ra tsa tsatsi paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo.

19 Caahán yu tyehen tsihin ndo tsa ndi cumañi ca cuvi can tyin quivi cua cuvi yacan, cua tsinu iñi ndo tyin yuhu cuví ra tsa iyó nda ndi cumañi ca coo tandihí tsa iyó.

20 Tsa nditsa catyí yu tsihin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuví can. Tan nyivi tsa naquihín vaha tsi yuhu, naquihín vaha ndihí ñi tsi ra tsa jaquitsi tsi yu —catyí ra Jesús.

Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu

(Mt. 26.20-25; Mr. 14.17-21; Lc. 22.21-23)

21 Tsa yahá tsa cahan ra Jesús yacan, tan quitsahá nducuihyá xaan cuñi añima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

22 Tacan tan ra tsicá tsihin ra, quitsahá nyehé nuu tahan ra naha, tan ña tsitó ra naha yóo tuhun caahán ra Jesús.

23 Iin ra tsicá tsihin ra Jesús nyanaá ra tsi ra nu nyaá ra cuxiñi ra. Tan ra ican cuví ra tsa cuñi xaan ra Jesús.

24 Tan ra Simón Pedro javahá ra seña tsi ra can, na ndaca tuhun ra yoó tuhun caahán ra Jesús.

25 Tacan tan ra ican tsinyaá naa ca ra tsi ra Jesús, tan tsica tuhun ra tsi ra:

—Jutu Mañi yu, ¿yoó ra cuví ra tsa caahán un tuhun?

26 Tan nacahan ra Jesús tan catyí ra:

—Cua jatyii yu luxu paan, tan ra tsa cua cuhva yu itsi, ra ican cuví ra —catyí ra.

Tacan tan quihin ra luxu paan tan jatyii ra, tan tsahá ra tsi ra Judas Iscariote, sehe ra Simón.

27 Tsa quihin ra Judas paan can tan quihvi nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, janumi javaha can —catyí ra Jesús tsihin ra Judas.

28 Maa tyin ndi intuhun ra tsa nyecú nu mesa can, ña cutuñi iñi ra naha nacuenta cahán ra tacan tsihin ra can.

29 Ra Judas cuví ra yihí ndaha yitin nu yihí xuhun, yacan cuenda yihí ra naha cuñi maa ra naha tyin cuñi ra Jesús tsa cujata ra tsa tsiñi ñuhu tsi ra naha tsa cuenda vico can, a cuhva ra juhva xuhun can tsi nyivi ndaahvi, cuñi maa ra naha.

30 Tsa yahá quihin ra Judas paan can, tacan tan quitá ra. Tan tsacuaa cuví can.

Tyiñu tsa tsa tava ra Jesús tsi yo: tsa cuñi tahan yo tsi yo

31 Tsa yahá tsa cuahán ra Judas, tan catyí ra Jesús:

—Vityin cua nyehe nyivi tsa cahnu cuví yuhu Rayii tsa quee nda gloria. Tan cua nyehe ñi tsa cahnu cuví Nyoo tsa cuenda yu.

32 Tatun Rayii tsa quee nda gloria jacahnú ra tsi Nyoo, tacan tucu Nyoo cua jacahnu ra tsi ra. Tsa tsa quivi cua jacahnu ra tsi ra.

³³ Sehe yu, ña naha ca cua cunyi yu tsihin ndo. Nyooho cua nanducu ndo tsi yu, maa tyin tumaa tsa cahan yu tsihin ra cuví ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuvi cahun ndo nu cua cahun yu.

³⁴ Tshá yu iin tyiñu tsa tsi ndo: Cuiñi tahan ndo tsi ndo. Tumaa tsa cuiñi maa yu tsi ndo, tacan cuiñi tsi tsa cuiñi tahan ndo tsi ndo.

³⁵ Tatun cuiñi tahan ndo tsi ndo, tandihí nyivi tan cua coto ñi tyin nyivi nyicún tsi yu cuví ndo.

Nu caahán ra Jesús tyin ra Pedro cua cahan ra tyin ña nacotó ra tsi ra

(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro tsica tuhun ra tsi ra Jesús tan catyí ra:

—Jutu Mañi yu, ¿nu maa cua cahun un? —catyí ra.

Tan nacahan ra Jesús tan catyí ra:

—Nu cahun yuhu, ña cua cuvi cunyicún un tsi yu vityin. Maa tyin nu cuahán ca tsi quivi, tan cunyicun un tsi yu —catyí ra Jesús.

³⁷ Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuvi cunyicun yu tsi un vityin? Tan tsa iyó vaha iñi yu tsa cuhva yu ñayivi yu tsa cuenda un —catyí ra.

³⁸ Tan nacahan ra Jesús tan catyí ra:

—¿A nditsa tsa cuhva un ñayivi un tsa cuenda yu? Tsa nditsa catyí yu tsihin un, tyin

tsa ndi cumañi ca vacu tsa tsitooho, yooho cua cahan un uñi tsaha tyin ña nacotó un tsi yu —catyí ra Jesús tsihin ra Pedro.

14

Ra Jesús cuví ityi cahun yo nu nyaá Nyoo Jutu yo

¹ Tan catyí ra Jesús:

—Ña caca xaan iñi ndo. Tsinu iñi ndo tsi Nyoo, tan tsinu ndihí iñi ndo tsi yu.

² Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyí tuhun yu tsihin ndo. Tan cua cahun yu cua janduvaha yu iin nu coo ndo.

³ Tsa yahá tsa cahun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyaa yu.

⁴ Nyooho tsa tsitó maa ndo nu maa cahun yu, tan tsa tsitó ndo ityi.

⁵ Tan catyí ra Tomás tsihin ra:

—Jutu Mañi yu, ña tsitó ndi nu maa cua cahun un. Tan ¿nácaa coto ndi ityi? —catyí ra.

⁶ Tan catyí ra Jesús:

—Yuhu cuví ityi tsa cuahán gloria. Tan yuhu cuví tsa nditsa. Tan juvin ñi yuhu cuví ra tsahá ñayivi coo ndo. Tan tsa cuenda yuhu ñi, tan cuvi tsa ndo nu nyaá Jutu yu.

⁷ Tan tsa nacotó ndo tsi yu, tan tsa cuenda yacan nacotó ndihí ndo tsi Jutu yu. Nda vityin tan nu cuahán ca tsi ityi nuu, cua nacoto ndihí ndo

tsi ra, tyin tsa nyehé ndo tsi ra —catyí ra Jesús.

8 Tacan tan catyí ra Felipe tsihin ra:

—Jutu Mañi yu, cūhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

9 Tan nacahan ra Jesús, tan catyí ra:

—Yooho Felipe, tsa naha xaan nyíi yu tsihin ndo, tan ¿nácaa tsa caahán un tsa ña nacotó un tsi yu? Nyívi tsa nyehé tsi yu, nyehé ndihi ñi tsi Nyoo Jutu yu. Tan ¿nácaa tsa caahán un tsihin yu: “Cūhva jihna nyehe ndi tsi Nyoo Jutu yo”?

10 ¿A ña tsinú iñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyiñu ra tsihin yu.

11 Tsinu iñi ndo tsi yu tyin iin ñi ra cuví yu tsihin Nyoo Jutu yu. Tan Nyoo Jutu yu iin ñi cuví ra tsihin yu. Tatun ña tsinú iñi ndo yacan, cuví tsinu iñi ndo tsi yu tsa cuenda tyiñu Nyoo Jutu yu tsa javahá yu.

12 Tsa nditsa caahán yu tsihin ndo tyin nyívi tsinú iñi tsi yu, cua javaha ndihi ñi tsa javahá yu. Tan cahnu ca tsa cua javaha ñi, tyin yuhu cahun yu nu nyaá Nyoo Jutu yu.

13 Tan tandihi tsa cua ndacan ndo tsi jutu yu tsihin sívi yu, cua ñihi ndo can tyin tacan tan jacahnu cuaha ca

nyívi tsi Nyoo Jutu yu tsa cuenda yuhu tsa cuví yu Sehe ra.

14 Yuhu cua javaha yu náa ndihi tsa ndacan ndo tsa cuenda yu.

Nu caahán ra Jesús tyin cūhva ra Tatyí Ii ra tsi yo

15 Tatun cuñi ndo tsi yu, tyaá yahvi ndo tsa caahán yu.

16-17 Tan ndacan tahvi maa yu tsi Nyoo Jutu yu na jaquitsi ra iin ra cua cūhva tunyee iñi tsi ndo. Tan ra ican cuví Tatyí Ii Nyoo, ra tsa caahán tsa nditsa. Tan iin nyita ñi maa cua cunyaa ra tsihin ndo. Maa tyin nyívi tsa taahán ca iñi tsa iyó nu ñuhu ñayívi ihya, ña cua cuví naquihin ñi Tatyí Ii Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyooho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo.

18 Ña cua nacoó cuii yu tsi ndo. Cua quitsi nyico yu nu yucú ndo.

19 Juhva cuii ña quívi, tan nyívi cuenda nu ñuhu ñayívi ña cua nyehe ca ñi tsi yu. Maa tyin nyooho cua nyehe ndo tsi yu. Tyin yuhu nyito yu, yacan cuenda nyooho cua coo ndihi ndo.

20 Quívi can cua coto ndo tyin yuhu iin ñi cuví yu tsihin Jutu yu. Tan nyooho iin ñi cuví ndo tsihin yu. Tan yuhu iin ñi cuví yu tsihin ndo.

21 Nyívi tsa tyaá yahvi tsa caahán yu, tan javahá ñi cūhva caahán yu, ñi ican cuví ñi tsa cuñi tsi yu. Tan ñi tsa cuñi tsi yu, Jutu yu cua cuñi

ra tsi ñi. Tan cuñí ndihi tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

²² Tan catyí ra Judas, ñavin ra Judas Iscariote, inga ra.

—Jutu Mañi yu, ¿nácaa tsa nyuhu ñi cua janaha un tsi un, tan ñavin tsi tandihi nyivi iyó nu ñuhu ñayivi?

²³ Nacahan ra Jesús tan catyí ra:

—Nyivi cuñí tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi.

²⁴ Nyivi ña cuñí tsi yu, ña javahá ñi tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

²⁵ Caahán yu tandihi tuhun ihya tsihin ndo tsitsi tsa ndi nyii yu tsihin ndo.

²⁶ Maa tyin nu cuahán ca tsi ityi nuu cua jaquitsi Jutu yu Tatyí li ra tsihin sivi yu. Tan cua jatyinyee ra ican tsi ndo, tan cua cuhva ra tunyee iñi tsi ndo, tan cua janaha ra tandihi tsi ndo. Tan cua janducuhun iñi ra tsi ndo tsa tsa yahā cahan yu tsihin ndo.

²⁷ Jandoó yu iin tsa taxin coo añima ndo, tumaa tsa taxin cuñí añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Na çaca xaan iñi ndo tan ña nayuhvi ndo.

²⁸ Tsiñi ndo tsa cahan yu nu catyí yu tyin cua cuhun

yu tan cua quitsi nyico yu nu yucú ndo. Tatun cuñí ndo tsi yu, cua cusii iñi ndo tyin catyí yu tyin cuahan yu nu nyaá Jutu yu. Tyin cahnu ca cuví Jutu yu tan ñavin ca maa yu.

²⁹ Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

³⁰ Ña cuaha ca cua cahan yu tsihin ndo. Tyin vatsi nu ndacá ñaha nu ñuhu ñayivi ihya. Maa tyin ña ndacá ñaha nu tsi yu.

³¹ Tyin tacan tan coto nyivi iyó nu ñuhu ñayivi, tyin yuhu cuñí yu tsi Nyoo Jutu yu, tan javahá yu tyiñu tava ra tsi yu.

'Nduvita ndo, tan çohon ndo, na cua tsiyo yo ihya.

15

Nu cahan ra Jesucristo tyin cuví ra tumaa yoho tsa cuví uvas

¹ Yuhu cuví yoho tsa cuví uvas tsa nditsa. [Tsa cuví uvas cuví tsi tumaa yoho nditsaahan ndivi maa tyin yucu vixi cuví tsi.] Tan Jutu yu cuví ra jahá cuenda yoho can.

² Tsaahnyá ra soco tsa ña tsahá tsiti. Tan nacahnya ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti.

³ Tsa yahā janduvahā Jutu yu tsi nyoocho tsihin tsa jacuahá yu tsi ndo.

⁴ Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuví cuhva tsi tsiti tsa maa ñi maa tsi,

tun ña nyanaá tsi tsata yoho cahnu can, tacan nyooho, ña cua cuvi javaha ndo tsa vaha tatun ña iin ñi cuvi ndo tsihin yu.

⁵ Yuhu cuví yoho cahnu. Tan nyooho cuví soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuví javaha ñi tatun ña nyanaá ñi tsi yu.

⁶ Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmí yo.

⁷ Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuví ndacan ndo náa cuñí maa ndo tsi yu, tan yuhu cua cuhva yu tsa cua ndacan ndo.

⁸ Tatun cuaha tsa vaha javahá ndo, jacahnú xaan ndo tsi Jutu yu cuví can. Tan tsihin yacan janahá ndo tyin cuví ndo nyivi tsa nditsa nyicún tsi yu.

⁹ Yuhu cuñí yu tsi ndo, tumaa tsa cuñí Jutu yu tsi yu. Ña naa iñi ndo cuhva cuñí yu tsi ndo.

¹⁰ Tatun tyaá yahvi ndo tsa caahán yu, ña cua naa iñi ndo tyin cuñi yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa iñi yu tsa cuñí xaan ra tsi yu.

¹¹ Caahán yu tyehen tsihin ndo tyin na cusii iñi ndo tsihin yu. Tan cusii ca iñi ndo.

¹² Tuhun tsa caahán yu tsihin ndo, yacan cuví tsehe:

cuñi tahan ndo tsi ndo, tumaa tsa cuñi maa yu tsi ndo.

¹³ Tatun yaha xaan cuñi tahan yo tsi yo, cana maa iñi yo cuhva yo ñayivi iyó yo tsa cuenda inga yo.

¹⁴ Nyooho cuví ra vaha iñi tsi yu tatun javahá ndo tsa caahán yu tsihin ndo.

¹⁵ Ña caahán ca yu tyin musu yu cuví tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuví ndo, tyin tandihi tsa caahán Jutu yu tsihin yu tan jacotó yu itsi tsi ndo.

¹⁶ Ñavin nyooho nacatsi tsi yuhu tyin maa yu nacatsi tsi ndo. Tan tavá tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan niñi cua coo, tan ña cua tivi maa tsi. Tacan tan cua cuhva Jutu yu tandihi tsa ndacan ndo tsi ra tsihin sivi yu.

¹⁷ Tyehen caahán yu tsihin ndo: Cuñi tahan ndo tsi ndo.

Nyivi taahán iñi tsa iyó nu ñuhu ñayivi, ndasi cuñí ñi nyehé ñi tsi ra Jesús tan tsi nyivi nyicún tsi ra

¹⁸ Tatun ndasi cuñi nyivi taahán iñi tsa iyó nu ñuhu ñayivi ihya nyehe ñi tsi ndo, coto ndo tyin jihna ca maa yu ndasi cuñi ñi nyehe ñi.

¹⁹ Tun tsatyin nyivi cuenda nu ñuhu ñayivi ihya cuví ndo, cua cuñi nyivi tsi ndo tumaa tsa cuñi tahan maa ñi tsi ñi, Maa tyin nyooho tsa nacatsi yu tsi ndo mahñu ñi. Yacan

cuenda ndasi cuñi ñi nyehe ñi tsi ndo, tyin ñavin ca nyivi cuenda nu ñuhu ñayivi ihya cuví ndo.

²⁰ Nducuhun iñi ndo tsa cahan yu tsihin ndo, tyin ndi iin musu tan ña cahnu ca cuví ra tan ñavin ca tsitoho ra. Tatun tyaá yahvi nyivi tsa caahán yu tsihin ñi, tacan cua tyaa yahvi ndihi ñi tsa jacuahá ndo tsi ñi. Tan tatun ndasí icá ñi tsihin yu, ndasi cua ica ndihi ñi tsihin ndo.

²¹ Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsi tsi yu.

²² Tun tsatyin ña quitsi yu cahan yu tsihin ñi, nduve catyi ñi. Maa tyin vityin nduve náa síqui cua tyaa ñi cuatyí ñi, tyin tsa yahá cahan yu tsihin ñi.

²³ Nyivi tsa ndasi cuñi nyehé tsi yu, ndasi cuñi ndihi ñi nyehé ñi tsi Jutu yu.

²⁴ Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehe ñi tandihí yacan. Vasu ndi maa tsa nyehe ñi can maa tyin ndasi cuñi ñi nyehé ñi tsi yu, tan tsi Jutu yu.

²⁵ Maa tyin tandihí yacan cuví, tyin cuñi tsi cundaa tumaá cuhva caahán nu tutu ley tsa jacuahá ñi tsa caahán tyehen: “Nduve vihi náa tsaha, tan ndasi cuñi ñi nyehe ñi tsi yu”, catyí tsi.

²⁶ Maa tyin cua quitsi Tatyí Ii, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quiví cua tsaá yu nu nyaá Jutu yu tan

cua jaquitsi ndi Tatyí Ii nu yucú ndo. Tan cua cahan ra tumañi iñi tsa cuenda yu.

²⁷ Tan nyooho tucu cua cahan ndo tumañi iñi tsa cuenda yu, tyin yucú ndo tsihin yu nda quivi quitsaha jahá tyiñu yu.

16

¹ Caahán yu tyehen tsihin ndo tyin tacan tan ña jandihí ndo tsa tsinú iñi ndo tsi yu.

² Cua tava cuivi nyivi tsi ndo vehe ñuhu. Tan coo quivi cua cahñi ñi tsi ndo, tan cua cuñi ñi tyin tyiñu Nyoo javahá ñi.

³ Tacan cua ica ñi tyin ña nacoto ñi tsi Jutu yu tan ndi tsi maa yu.

⁴ Caahán yu tsehe tsihin ndo tyin quivi tsa cua cuví tumaá cuhva caahán yu tsihin ndo, cua nducuhun iñi ndo tyin tsa yahá cahan yu tuhun ihya tsihin ndo.

Ña cahan yu tyehen tsihin ndo nda jihna tyin ndi nyii maa yu tsihin ndo.

Tyiñu jahá Tatyí Ii Nyoo

⁵ Maa tyin vityin cua cahun yu tyin cunyaa yu tsihin ra tsa jaquitsi tsi yu. Ndi in-tuhun ndo tan ña tsicá tuhun ndo tsi yu nu maa cua cahun yu.

⁶ Tyin tsa nducuihíya cuñi ndo tsa caahán yu tyehen tsihin ndo.

⁷ Caahán yu tsa nditsa tsihin ndo tyin vaha ca tsa cahun yu cuenda tsa vaha tsi maa ndo. Tyin tatun ña cahun yu, ña cua quitsi Tatyí Ii tsa cua cuhva tunyee iñi tsi

ndo. Maa tyin tatun cuhun yu, cua jaquitsi yu tsi ra.

⁸ Tan quiví quitsi ra, cua jacoto ra tsi nyiví iyó nu ñuhu ñayiví ihya tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo.

⁹ Cua jacoto ra tsi ñi tyin iyó cuatyí ñi tyin ña tsinú iñi ñi tsi yu.

¹⁰ Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu.

¹¹ Tan cua coto ñi tyin cua jandaa Nyoo cuatyí ñi tyin tsa yaha cundaa cuatyí nu cuví cuihna, nu ndacá ñaha nu ñuhu ñayiví ihya.

¹² Tan cuaha ca tsa nyaá cahan yu tsihin ndo, maa tyin ña cua cutuñi iñi ndo can vityin.

¹³ Quiví quitsi Tatyí Ii tsa caahán tsa nditsa, maa ra cua janaha tandihí tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandihí tsa tsiñí ra. Tan cua jacoto ra náa cua cuví nu cuahán ca tsi ityi nuu.

¹⁴ Cua jacahnu ra tsi yu, tyin cua naquihin ra tuhun yu tan cua janaha ra can tsi ndo.

¹⁵ Tandihí tsa iyó tsi Jutu yu, tsii maa yu cuví ndihí can. Yacan cuenda caahán yu tyin Tatyí Ii cua naquihin ra tuhun yu, tan cua janaha ra tsi nyooho.

Ra tsicá tsihin ra Jesús cuihyá xaan cuñí ra naha, maa

tyin nu cuahán ca tsi quiví cua cusí iñi ra naha, catyí ra Jesús

¹⁶ Ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

¹⁷ Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tsihin yo tyin ña naha cuii ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra.

¹⁸ ¿Náa cuñí tsi catyí tsa “ñá naha cuii ca” can? Ña cutuñí iñi yo náa tuhun caahán ra —catyí ra naha.

¹⁹ Tan tuví iñi ra Jesús tyin cuñí ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo?

²⁰ Tsa nditsa caahán yu tsihin ndo tyin nyooho cua nducuihya iñi ndo tan cua vacu ndo, maa tyin nyiví cuenda nu ñuhu ñayiví cua cusí iñi ñi. Vasu cuihya cuñí ndo vityin, tucuihya iñi can cua nanduvi tsi tsa síi.

²¹ Cuhva tsa cua cacu sehe iin ñaha, nyehé ña tundocho. Maa tyin tsa yaha cacu lee can, ndi ña ñuhu ca iñi ña tsa uhvi can tsa cuenda tsa síi cuñí ña tyin cacu iin lee sehe ña.

22 Tacan tucu nyooho vityin, cuihya xaan cuñí ndo. Maa tyin cua nyehe nyico yu tsi ndo inga tsaha. Tacan tan cua cusii nyico iñi añima ndo. Tan yoñi cuví quihin nyaa tsa sii can tsi ndo.

23 'Quivi can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandihi tsa ndacan ndo tsi ra tsihin sivi yu.

24 Nda vityin tan ñaha ca ndacan ndo tsa ndacan ndo tsihin sivi yu. Ndacan ndo tan cua ñihi ndo tan cusii xaan iñi ndo.

Ra Jesucristo cuví jaha canaa ra tsa ña vaha iyó nu ñuhu ñayivi

25 'Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuaha yu tsi ndo, maa tyin cua catyi tuhun catsi yu tuhun Jutu yu tsihin ndo.

26 Quivi can tsihin sivi yu cua ndacan ndo tsa ndacan ndo tsi ra. Tan ña tsiñi ñuhu ca tsa cahan ndaahvi yu tsihin Jutu yu tsa cuenda ndo.

27 Tyin maa Nyoo Jutu yu cuñí ra tsi ndo. Cuñí ra tsi ndo tyin nyooho cuñí ndo tsi yu, tan tsinú iñi ndo tyin nu nyaá Nyoo quee yu.

28 Nu nyaá Jutu yu quee yu tyin quitsi yu nu ñuhu ñayivi ihya. Maa tyin vityin cua naco yu ñuhu ñayivi ihya tyin cua cunuhu nyico yu nu nyaá ra —catyi ra Jesús.

29 Tacan tan catyi ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi.

30 Vityin nyehé ndi tyin tsitó un tandihi cuii maa, tan ña tsiñi ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyi ra naha tsihin ra Jesús.

31 Tan catyi ra Jesús:

—Tan vityin ¿a tsinú iñi ndo tsi yu?

32 Maa tyin caahán yu tsihin ndo tyin tsa vatsi hora. Tan vityin cuví hora tsa cua cahun ndo siin siin ityi. Tan cua naco ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu.

33 Caahán yu tandihi tsehe tsihin ndo na coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayivi ihya cua nyehe ndo tundoho, maa tyin janyee ndo iñi ndo, tyin yuhu tsa jahá canaa yu tsa ña vaha tsa iyó nu ñuhu ñayivi ihya.

17

Nu tsicán tahvi ra Jesús tsi Nyoo tsa cuenda ra tsicá tsihin ra

1 Tsa yahá cahan ra Jesús yacan, nanyehé ndaa ra ityi andivi tan catyi ra:

—Jutu Mañi yu, tsa tsaq hora vityin. Jacahnu tsi yu tsa cuví yu sehe un, tyin tacan tan jacahnu tucu maa yu tsi un.

2 Tyin tava tyiñu un tsi yu tsa quihí ndaha yu tandihi

nyiví, tan cuhva yu ñayiví nyitó tsa ña cua naa maa tsi tandihí nyiví tsa tsahá un tsi yu.

³ Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsí un, tacan tan cuví coo ñi ñayiví nyitó tsa ña cua naa maa.

⁴ Tsa jacahnu yu tsi un nu ñuhu ñayiví ihya tan tyiñu tsa tavá tyiñu un tsi yu tsa ndihí tsi javahá yu.

⁵ Tan vityin, Jutu Mañi yu, cua quitsi nuhu nyico yu nu nyaá un, tan cuñí yu tyin nacuhva un tsa cahnu cuví yu tsihin un tsi yu, tumaa tsa tsicoo maa tsi yu nda ndi cumañi ca tsinu ñuhu ñayiví.

⁶ Tandihí ra tsa tsahá un tsi yu naha ra, ra tsa natavá vaha un mahñu nyiví iyó nu ñuhu ñayiví ihya, jacotó yu tsi ra naha yóo ra cuví yooho. Tsi maa un cuví tsi ra naha tan tsahá un tsi ra naha tsi yu. Tan tyaá yahvi ra naha tsa caahán un.

⁷ Vityin tsitó ra naha tyin tandihí tsa tsahá un tsi yu, nu nyaá un quee tsi.

⁸ Tyin catyí tuhun yu tsihin ra naha tsa cahan un tsihin yu, tan naquihín vaha ra naha itsí. Tan tsitó ra naha tyin nditsa tsa quee yu nu nyaá un, tan tsinú ñi ra naha tyin maa un jaquitsí tsi yu.

⁹ Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihí nyiví, maa tyin tsicán tahvi yu tsa cuenda ra tsa

tsahá un tsi yu naha ra, tyin tsi maa un cuví ra naha.

¹⁰ Tandihí nyiví tsa cuví tsi un, tsahá tucu un tsi ñi tsi yu. Tan maa ñi janahá tsa cahnu cuví yu.

¹¹ Yuhu ña cua ndoo ca yu nu ñuhu ñayiví ihya, maa tyin maa ra naha cua ndoo ra naha nu ñuhu ñayiví ihya. Tan yuhu cua cunyaa nyico yu tsihin un. Jaha cuenda tsi ra tsa tsahá un tsi yu tsihin tunyee ñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yo.

¹² Quiví tsinyii yu nu ñuhu ñayiví ihya tsihin ra naha, jaha cuenda yu tsi ra tsa tsahá un tsi yu naha ra tsihin tunyee ñi tsa iyó tsi un. Tan jaha cuenda yu tsi ra naha. Tan ndi intuhun ra naha tan ña tsinaa ra naha. Maa tyin ra tsa tsa nyaá maa tsa cunaa, ra ican ñi cuví ra cuanaa tan quitá cuhva tumaa tsa catyí nu tátu maa un.

¹³ Vityin tsa cua quitsí yu nu nyaá un, maa tyin tsitsi tsa ndi nyii yu nu ñuhu ñayiví ihya, caahán yu tsehe, tyin na cusii ñi ra naha tumaa tsa sii cuñí maa yu.

¹⁴ Yuhu cahan yu tsihin ra naha tsa caahán un, maa tyin nyiví cuenda nu ñuhu ñayiví ndasi cuñí ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayiví cuví ra naha. Tumaa yuhu, ñavin ra cuenda nu ñuhu ñayiví cuví yu.

¹⁵ Ña tsicán yu tsi un tsa tava un tsi ra nyicún tsi yo

naha ra nu ñuhu ñayivi ihya, maa tyin jaha cuenda tsi ra naha coto náa jaha nu ña vaha tsi ra naha.

¹⁶ Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha.

¹⁷ Jacu ii tsi ra naha tsihin tsa nditsa, na javaha ra naha maa ñi maa cuhva cuñí maa un. Tyin tsa caahán un, yacan cuví tsa nditsa.

¹⁸ Tumaa tsa jaquitsi un tsi yuhu nu yucú nyivi iyó nu ñuhu ñayivi, tacan cua jacuhun ndihi tucu yuhu tsi ra tsa nyicún tsi yo, nacahan ra naha tuhun yo tsihin nyivi tsa ñaha ca coto tuhun yo.

¹⁹ Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

²⁰ Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihi tucu yu tsi un tsa cuenda nyivi tsa cua tsinu iñi tsi yu, tsa cuenda tsa cua cahan ra ihya naha ra ityi nuu ca.

²¹ Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yoocho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihi nyivi iyó nu ñuhu ñayivi cua tsinu iñi ñi tyin maa un jaquitsi tsi yu.

²² Yuhu tsahá yu tsa cahnu cuví un tsi ñi nyicún tsi yo. Juvín ñi maa tsa cahnu cuví un tsa tsahá un tsi yu tyin

tsihin yacan na iin ñi cuví ñi, tumaa yoocho tsihin yuhu, iin ñi cuví yo.

²³ Yuhu nyií yu tsihin ñi. Tan yoocho nyaá un tsihin yu tyin tacan tan iin ña nyivi cua cuví ñi. Tan coto tandihi nyivi iyó nu ñuhu ñayivi tyin maa un jaquitsi tsi yu, tan cuñí xaan un tsi ñi nyicún tsi yo, tumaa tsa cuñí maa un tsi yu.

²⁴ Jutu Mañi yu, maa un tsahá tsi ñi tsi yu. Tan cuñí yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsahá un tsi yu, tyin cuñí un tsi yu nda ndi cumañi ca tsinu ñuhu ñayivi.

²⁵ Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu.

²⁶ Tsa cahan yu tsihin ra naha yóo ra cuví un, tan cua cahan nyico tucu yu inga tsaha, tyin tumaa cuhva cuñí un tsi yu, tacan cua cuñí tahan ra naha tsi ra naha. Tan yuhu cunyaa yu añima ra naha.

18

Nu cua tyihi ra Israel naha ra tsi ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Tsa yahá tsa cahan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra.

² Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra.

³ Tan ican tsaá ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaá ra naha ican, nyisó ra naha mityi, tan nyisó ra naha lámpara tan ñuhu yiti.

⁴ Tan ra Jesús tsa tsitó maa ra tandihi tsa cua tahan ra. Quita ra tan tsicá tuhun ra tsi ra naha:

—¿Yóo nanducú ndo?
—catyí ra.

⁵ Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xico tsi ra Jesús tsi nu xaan iñi tsi ra nahnu, nyíi ndihi ra tsihin ra naha.

⁶ Cuhva tsa cahán ra Jesús: “Yuhu cuví”, tandihi ra naha nacaca tsata ra naha tan nduvá ra naha nu ñuhu.

⁷ Tacan tan tsicá tuhun nyico ra Jesús tsi ra naha inga tsaha, tan catyí ra:

—¿Yóo nanducú ndo?

Tan catyí ra naha:

—Ra Jesús ra ñuu Nazaret.

⁸ Tan catyí ra Jesús:

—Tsa cahán yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicá tsihin yu naha ra na cunuhun ra naha —catyí ra Jesús tsihin ra naha.

⁹ Yacan cahán ra Jesús tyin na cundaa tsa cahán ra nda ityi tsata ca nu catyí ra: “Ra tsa tsaha Jutu yu tsi yu, ndi intuhun ra naha tan ña tsinaá ra naha.”

¹⁰ Tacan tan tava ra Simón Pedro mityi tsa ndahá ra tan tsahnya ra soho cuaha iin ra tsa nañ Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra.

¹¹ Maa tyin ra Jesús catyí ra tsihin ra Pedro:

—Natyihi mityi un tsitsi vena un. Tatun Nyoo Jutu yu tan cuñi ra tsa nyehe yu tundoho, taahán tsi tsa nyehe yu can —catyí ra Jesús tsihin ra.

Nu tsindaca ra naha tsi ra Jesús nuu ra cuví ityi nuu tsihin jutu naha ra

(Mt. 26.57-58; Mr. 14.53-54; Lc. 22.54)

¹² Tacan tan andaru can tsihin capitán ra naha, tan vitya cuenda vehe ñuhu naha ra, tiñ ra naha tsi ra Jesús, tan tsahñi ra naha tsi ra,

¹³ tacan tan tsindaca ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu.

¹⁴ Ra Caifás can cuví ra tsa cahán tsihin ra cuví ityi nuu tsihin nyivi Israel naha ra tyin vaha ca tsa cúu intuhun ñi rayi tsa cuenda tandihi nyivi ñuu.

Nu caahán ra Pedro tyin ña nacotó ra tsi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro tan inga ra tsa tsicá tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihví ra can tsihin ra Jesús nuquehe ra jutu can.

¹⁶ Maa tyin ra Pedro ndoo ra ityi tsata vehe. Yacan cuenda quitá ra tsa nacotó ra jutu can, tan cahan ra tsihin ñaha tsa nyaá yuvehe can. Tan jayahá ra tsi ra Pedro ityi tsitsi nuquehe can.

¹⁷ Tacan tan ñaha tsa nyaá yuvehe can tsicá tuhun ña tsi ra Pedro, tan catyí ña:

—¿A ñavin yooho cuví iin ra tsicá tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

¹⁸ Tacan tan ra cuví musu tan ra vitya naha ra tsa yucú ican, jatahan ra naha ñuhú tyin vitsin xaan. Tan nyecú nyityi ra naha tuñu ra naha ñuhú. Tan nyii ndihi tucu ra Pedro tuñu ra ñuhú tsihin ra naha ican.

Nu janahma ra jutu tsaahnu tsi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tacan tan ra jutu tsaahnu can quitsahá tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyivi.

²⁰ Tan catyí ra Jesús tsihin ra:

—Yuhu nuu tandihi nyivi cahan yu. Tan jacuahá yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá tandihi nyivi Israel ndu iin. Tan nduve nu cahan xeehe yu.

²¹ ¿Nacuenda tsicá tuhun un tsi yuhu? Vaha ca ndaca tuhun un tsi nyivi tsa tsiñi tsa cahan yu, tan maa ñi cua catyi tuhun náa cahan yu tsihin ñi tyin maa ñi tsitó náa cahan yu —catyí ra Jesús tsihin ra.

²² Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

²³ Tan catyí ra Jesús:

—Tatun cahan yu iin tsa ña vaha, cahan tsihin yu nda tsa ña vaha cahan yu. Maa tyin tatun cahan yu tsa vaha, ¿nacuvi tyin cañi un tsi yu? —catyí ra Jesús tsihin ra can.

²⁴ Yahá can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

Nu caahán nyico ra Pedro inga tsaha tyin ña nacotó ra tsi ra Jesús

(Mt. 26.71-75; Mr. 14.66-72; Lc. 22.58-62)

²⁵ Tan nyaá nyityi ra Pedro tuñu ra ñuhú. Tan catyí ra naha tsihin ra:

—¿A ñavin yoocho cuví iin ra tsicá tsihin ra can? —catyí ra naha tsihin ra.

Tan ra Pedro tyihí xeehe ra, tan catyí ra:

—Ñavin. Ñavin yu cuví —catyí ra.

²⁶ Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyivi ra tsa tsahnya ra Pedro soho, quitsaha tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyí ra tsihin ra Pedro.

²⁷ Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitoocho.

Nu cutuñi ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yaha can tan quita ra naha tsihin ra Jesús yuvehe ra Caifás tan tsindaca ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihvi ra naha tsitsi vehe tyiñu can tyin ñavin vehe nyivi Israel cuví can. Tyin ica tsa quihvi ñi Israel vehe ndavaha ñi tyin coto ña cua cuvi cuxiñi ñi quivi vico pascua.

²⁹ Yacan cuenda quita ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo siqui ra ihya? —catyí ra Pilato tsihin ra cuví ityi nuu tsihin nyivi Israel naha ra.

³⁰ Tan nacahan ra Israel naha ra tan catyí ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

³¹ Tacan tan catyí ra Pilato tsihin ra naha:

—Quihin ndo tsi ra, tan tatsi tuñi ndo tsi ra tumaa catyí maa ley ndo.

Tan nacahan ra Israel can naha ra tan catyí ra naha:

—Maa tyin nyuhu nyivi Israel nduve ndatu iyó tsi ndi tsa cahñi ndi tsi nyivi —catyí ra naha.

³² Tacan cundaa tsa cahan ra Jesús nácaa cua cúu ra.

³³ Yaha can tan quihvi nyico ra Pilato tsitsi vehe tyiñu can inga tsaha. Tan cana ra tsi ra Jesús tan tsicá tuhun ra tsi ra:

—¿A yoocho cuví rey cuenda nyivi Israel? —catyí ra tsihin ra.

³⁴ Tan catyí ra Jesús:

—¿A tsa cuñi ñi maa un tsicá tuhun un tsehe tsi yu o iyó inga nyivi natyuhu tsi un cuhva cahan un tsihin yu? —catyí ra Jesús tsihin ra Pilato.

³⁵ Tan catyí ra Pilato:

—Ñavin ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsaha cuenda tsi un tsi yu. ¿Náa javaha un? —catyí ra tsihin ra Jesús.

³⁶ Tacan tan nacahan ra Jesús tan catyí ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun tsatyin ndacá ñaha yu nu ñuhu ñayivi ihya,

ra nyicún tsi yu cañi tahan ra naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuví tsi —catyí ra Jesús tsihin ra Pilato.

³⁷ Tacan tan catyí ra Pilato tsihin ra:

—¿Tun tacan, rey cuví maa un? —catyí ra Pilato tsihin ra Jesús.

Tan nacahan ra Jesús tan catyí ra:

—Rey cuví yu tumaa tsa caahán maa un. Yacan cuenda cacu yu tan vatsi yu nu ñuhu ñayivi ihya, tyin cahan yu tsa nditsa. Tandihí nyivi tsa tyaá yahvi tsa nditsa, tyaá soho ñi tsa caahán yu —catyí ra Jesús.

³⁸ Tan catyí ra Pilato tsihin ra:

—¿Tan náa cuví tsa nditsa? —catyí ra.

Tsa yahá tsa tsicá tuhun ra Pilato yacan, quitá ra tsicahan nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi intuhun cuatyí ra ihya.

Nu cua cahñi ra naha tsi ra Jesús

(Mt. 27.15-31; Mr. 15.6-20; Lc. 23.13-25)

³⁹ Maa tyin nyoocho iyó ndo tuhun tsa tsicán ndo na tava yu tsi iin ra nyíí vehe caa tsa iyó vico pascua ihya. ¿A cuñí ndo tava yu tsi ra tsa cuví rey cuenda ndo tsa cuví ndo nyivi Israel? —catyí ra Pilato tsihin ra naha.

⁴⁰ Tacan tan quitsahá caná tsaa tandihí ra naha tan catyí ra naha:

—¡Ña tava un tsi ra can! ¡Tava tsi ra Barrabás! —catyí ra naha.

Tan ra Barrabás can cuví ra iin ñasuhu.

19

¹ Tacan tan quihín ra Pilato tsi ra Jesús tan tava tyiñu ra na cañi andarú tsi ra.

² Tan andarú can javahá ra naha iin corona iñu tan tyihí ra naha jiñi ra Jesús. Tan jacunditsí ra naha iin jahma tunduuhva tsi ra, tahan tsa tuhvá ra cuví rey tsinditsí.

³ Tacan tan natuhvá ra naha nu nyáá ra tan caahán nyaa ra naha tsi ra, tan catyí ra naha:

—¡Nacumi tsi un yoocho Rey cuenda nyivi Israel! —catyí ra naha, tan cañí ra naha nuu ra.

⁴ Tacan tan quitá nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

⁵ Tan quitá ra Jesús yihí corona iñu jiñi ra, tan nditsí ra jahma tunduuhva can. Tacan tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

⁶ Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quitsahá caná tsaa ra naha tan catyí ra naha:

—¡Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan cahñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

⁷ Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñi tsi tsa cúu ra tyin jahá ra tsa Sehe Nyoo cuví tsi ra —catyí ra naha.

⁸ Tsa tsiñi ra Pilato yacan, tan nayuhvi xaan ca ra.

⁹ Tan quihvi nyico ra inga tsaha tsitsi vehe tyiñu, tan tsica tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

¹⁰ Tacan tan catyí ra Pilato tsihin ra:

—¿Nacuenda ña caahan un tsa caahan yu? ¿A ña tsitó un tyin ra cumí tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

¹¹ Tan nacahan ra Jesús tan catyí ra:

—Tun tsatyin ña tsaha Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

¹² Tsa ndihi cahan ra Jesús yacan, tan quitsaha nducú ra Pilato cuhva jaña ra tsi ra, maa tyin ra Israel caná tsa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihi ra tsa caahan tyin rey cuví ra naha, ra xaan iñi tsi rey cahnu cuví ra naha —catyí ra naha.

¹³ Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaa ra Pilato nu nañi Gabata nu tuhvá ra jandaá cuatyí nyivi. Tan tsihin yuhu hebreo cuñi tsi catyí: “Nu canyíi yuu”.

¹⁴ Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡Ihya nyaá rey ndo!

¹⁵ Maa tyin cana tsa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yoñi ca rey iyó. Intuhun ñi maa ra César, ra cuví rey cahnu —catyí ra naha.

¹⁶ Tacan tan tsaha cuenda ra Pilato tsi ra Jesús tsi ra naha na tyaa ra naha tsi ra nu

cruu. Tan quih̄in andaru tsi ra, cuahán ra tsihin ra naha.

Nu tsih̄i ra Jesucristo nu cruu

(Mt. 27.32-44; Mr. 15.21-32; Lc. 23.26-43)

¹⁷ Tan nyisó ra Jesús cruu ra, cuahán ra iin nu nañi: “Yiqui Jiñi Ndiyi”. Tan tsihin yuhu hebreo nañi tsi Gólgota.

¹⁸ Ndacan tyaā ra naha tsi ra nu cruu tsihin nduyu. Tan tyaā ra naha uvi taahan ca ra naha xiin ra. Ticaā ra naha iin ra nu cruu tsa nyaá tsiyo cuaha ra. Tan inga ra tyaā ra naha tsiyo satyin ra. Tan ticaā ra naha tsi ra Jesús mahñu.

¹⁹ Tan tava tyiñu ra Pilato na cunyaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.”

²⁰ Tan cuaha nyivi Israel cahvi ñi tsa caahán can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín.

²¹ Yacan cuenda ra cuví ityi nuu tsihin jutu cahán ra naha tsihin ra Pilato:

—Ña tyaā un: “Rey cuenda nyivi ñuu Israel”, vaha ca tyaā un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

²² Maa tyin catyí ra Pilato:

—Tsa tsa yaha tyaā yu, nandoo maa tsi tacan —catyí ra tsihin ra naha.

²³ Tsa yaha tyaā ra andaru can naha ra tsi ra Jesús nu cruu, naquih̄in ra naha

jahma ra. Tsa cumi taahan ra naha quih̄in luxu luxu jahma ra. Tan ndoo jahma ra tsa quicu cañi ñi tsa tsindasi ra.

²⁴ Tan andaru can natuhún tahan ra naha:

—Ña cua cahnya yo itsi. Jasiqui suuhva jihna yo na nyehe yo yóo cua jaha canaa jahma can —catyí ra naha.

Tacan cuví tumaa caahán nu tutu Nyoo nu catyí tsi tyehen: “Tsatsa tahan ra naha luxu luxu jahma yu tan jasiqui suuhva ra naha tsihin tsi, nyehe ra naha yóo ra jaha canaa itsi.” Tan yacan cuví tsa javaha ra andaru can naha ra.

²⁵ Tan nyaá sihi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasih̄i ra Cleofas, tan ña María quee ñuu Magdala.

²⁶ Tan nanyehe ra Jesús tsi sihi ra, nyaá ña yatyin ñi. Tan nanyehe tucu ra tsi ra tsa tsica tsihin ra, ra tsa cuñi xaan ra. Tan catyí ra tsihin sihi ra:

—Miya, va ra sehe un nyaá tsihin un juvin —catyí ra.

²⁷ Tacan tan catyí ra tsihin ra tsa cuñi xaan ra:

—Tsaā, va sihi un nyaá tsihin un juvin —catyí ra tsihin ra.

Nda quivi can tan quih̄in ra tsi ña, cuahan tsihin ra yuvehe ra. Tan jahā cuenda ra tsi ña.

Nu tsih̄i ra Jesús

(Mt. 27.45-56; Mr. 15.33-41; Lc. 23.44-49)

²⁸ Tsa yaha yacan, tsa nyehe ra Jesús tyin tsa ndih̄i

tyiñu jahā ra. Tacan tan catyí ra:

—Na ityi iñi yu —catyí ra.

Tan tsihin yacan cundaa tsa nyaá nu tutu Nyoo nu caahán tsi nácaa cua cúu ra.

²⁹ Tan ican nyaá iin quiyi nu yihí vinu iya. Tacan tan jatyí ra naha tsa cuví yahma tumaa caa catyí tsihin vinu iya can. Tan tyaa ra naha yacan nu iin yutun hisopo. Tan jandaa ra naha tan tyanaa ra naha can yuhu ra.

³⁰ Tsihi ra Jesús vinu can tan catyí ra:

—Tsa iyó vaha tandihi vi-tyin —catyí ra.

Tacan tan nacañi nuu ra jiñi ra tan tsihi ra.

Nu tutsi ra andaru yoco xaan yiqui naha ra Jesús

³¹ Tsa ndi cumañi intuhun ña quivi tan tahan tsi quivi vico cahnu pascua, tan ra cuví ityi nuu tsihin nyivi Israel ña cuñi ra naha tsa ndoo cuñu ñuhu ra tsa tsihi can naha ra nu cruu quivi quitatú, tyin quivi quitatú, quivi ii cuví tsi tsa cuenda ra naha. Yacan cuenda tsican ra naha tumañi iñi tsi ra Pilato na tava tyiñu ra na cahnu andaru sihin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha.

³² Tacan tan cuahán andaru nu nyecú cruu can. Tan tsahnū ra naha sihin iin ra ticaá iin tsiyo xiin ra Jesús. Tan tsahnū nyico ra naha sihin inga ra tsa ticaa inga tsiyo xiin ra.

³³ Maa tyin cuhva tsa natuhva ra naha nu ticaá ra

Jesús, nyehe ra naha tyin tsa tsihi maa ra. Yacan cuenda ña tsahnū ca ra naha sihin ra.

³⁴ Maa tyin iin andaru can tutsi ra yoco xaan yiqui naha ra Jesús. Tan quita ñiñi tan ndutya.

³⁵ Ra tsa nacatyí tuhun yacan, ra tsa nyehe vaha cuví ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho.

³⁶ Tacan cuví tyin tacan tan cundaa tsa catyí tuhun Nyoo nu catyí tsi: “Ndi intuhun yiqui ra tan ña tahnu.”

³⁷ Tan iyó inga nyico nu catyí tsi nu tutu Nyoo tyehen: “Cua nyehe nyivi tsi ra tsa tutsi ra naha yoco xaan.”

Nu quihvi ñuhu ra Jesús
(Mt. 27.57-61; Mr. 15.42-47; Lc. 23.50-56)

³⁸ Tsa yaha yacan, ra José ra ñuu Arimatea tsican ndatu ra tsi ra Pilato na cuhva ra tsa naquihin ra cuñu ñuhu ra Jesús. Tan ra José can cuví ra iin ra yihí cuenda ra Jesús vasu tsa xeehe ñi tsa cuenda tsa yuuhví ra tsi ra cuví ityi nuu tsihin nyivi Israel. Tacan tan tsaha ra Pilato ndatu tsi ra, tan tsahan ra José tsinaquihin ra cuñu ñuhu ra Jesús.

³⁹ Tsahan ndihi tucu ra Nicodemo, ra tsa tsahan tsicahan tsihin ra Jesús tsa tsa cuaa. Tsa ra tsihin ndutya tami. Tan iin ndutya tami tsa nañi mirra nasaca nuu tsihin inga tsa nañi áloe. Tan quita tsi tumaa oco utsi kilu tsa tandihi tsi.

40 Tacan tan ra José tsihin ra Nicodemo quih̄in ra naha cuñu ñuhu ra Jesús tan cava nuu ra naha tsi ra tsihin jahma cuiñi tsa tyih̄i ra naha ndutya tami can, tumaa iyó maa nyivi Israel tun cua cutsi ñi ndiyi tsitsi ñuhu.

41 Yatyin nu tsah̄ñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsa nu ñaha ca cuyucu ndi in-tuhun ndiyi.

42 Ican ñi tinyi ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi quivi quitatú nyivi Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

1 Tsa naa ca tsa cuv̄i tuingu, ña María quee ñuu Magdala tsah̄an ña nu ñaña ra Jesús. Tan nyehe ña tyin nduve ca yuu ndasí yuhu ñaña can.

2 Tacan tan tsinú xaan ña cuahán ña nu nyi ra Simón Pedro tan inga ra tsic̄a tsihin ra Jesús, ra tsa cuñi xaan ra Jesús. Tan catyí ña tsihin ra naha:

—Quih̄in nyivi cuñu ñuhu Jutu Mañi yo tsitsi ñaña, tan ña tsitó yo nu maa tsindac̄a ñi itsi —catyí ña María tsihin ra Pedro tan tsihin inga ra can.

3 Tacan tan ra Pedro tan inga ra can cuahán ra naha nu ñaña.

4 Tan cuahán nduvi taahan ra naha iin caa ñi, tsinú ra naha. Maa tyin ñihi ca tsinú

inga ra can tan ñavin ca ra Pedro, jihna ca ra can tsā nu ñaña.

5 Quitsah̄a nyehé ih̄ñi ra tsitsi ñaña, tan nyehe ra jahma cuiñi tsa cava nuu cuñu ñuhu ra Jesús, canyii can. Maa tyin ña quih̄vi ra tsitsi ñaña.

6 Yah̄a can tan tsā ndihi ra Simón Pedro tsata ra, tan ra ican quih̄vi ra tsitsi ñaña can. Juv̄in ñi nyehe ndihi ra can jahma can canyii tsi.

7 Tan juvin ñi nyehe ndihi ra tyin jahma tsa tsindas̄i jiñi ra Jesús, ña iin ñi nu canyii can tsihin inga jahma can, yih̄i tahnu can tan cayucú siin can.

8 Tacan tan quih̄vi ndihi inga ra tsic̄a tsihin ra Jesús can, ra tsa tsā tsa jihna nu ñaña can. Tan nyehe ra tsa cuv̄i can, tan tsinū iñi ra.

9 Tyin tsa jihna, ña cutuñi iñi ra naha tsa caahán nu tutu Nyoo, tyin ra Jesús cuñi tsi tsa nandoto ra tsa yaha cúu ra.

10 Tacan tan cuanūhu ra tsic̄a tsihin ra Jesús nda yuvehe ra naha.

Nu quituvi ra Jesús nuu ña María quee ñuu Magdala
(Mr. 16.9-11)

11 Maa tyin tsa tsā nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehe ih̄ñi ña tsitsi ñaña can.

12 Tan nyehe ña uvi taahan ángel nditsí ra naha jahma cuītsin, nyecú ra naha nu tsicavā cuñu ñuhu ra Jesús. Iin ra nyaá ityi nu tsicavā jiñi ra, tan inga ra nyaá ityi nu tsicavā tsaha ra.

13 Tan tsicā tuhun ra ángel can naha ra tsi ña tan catyí ra naha:

—¿Nacuvi tsacú xaan un?

Tan catyí ña:

—Tsacú maa yu tyin quihin nyivi tsi Jutu Mañi yu, tan ña tsitó yu nu maa tinyí ñi tsi ra —catyí ña tsihin ángel can.

14 Ndi caahán ca ña yacan, tan nanyico coo ña tan nyehe ña tsi ra Jesús ican. Maa tyin ña tsitó ña tatun ra Jesús cuví ra.

15 Tacan tan tsicā tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuñí maa ña tyin ra jahá cuenda cora yutun tata can cuví ra. Tan catyí ña:

—Tatta, tatun yooho quihin tsi ra Jesús, cahan tsihin yu nu maa tsindaca un tsi ra, tyin cunaquihin yu tsi ra —catyí ña tsihin ra.

16 Tacan tan catyí ra Jesús tsihin ña:

—¡María! —catyí ra tsihin ña.

Tan nanyehe ña tan cahan ña tsihin ra tsihin yuhu hebreo, tan catyí ña:

—¡Raboni! —Tan cuñí tsi catyí can: “Maestro”.

17 Tan catyí ra Jesús tsihin ña:

—Ña tñin un tsi yu, tyin ñaha ca cuhun yu nu nyaá Jutu yu. Maa tyin cuaahan tan cahan un tsihin tandihí yañi yu tyin cuahan yu nu nyaá Jutu yu, tan juvin ñi Jutu ndihí ndo cuví tsi ra. Cuahan yu nu nyaá Nyoo yu, tan juvin ñi

Nyoo ndo cuví tsi ra —catyí ra Jesús tsihin ña.

18 Tacan tan tsahañ ña María ñuu Magdala can tsijacotō ña tsi ra tsicā tsihin ra Jesús tyin nyehe ña tsi ra tan cahan ra yacan tsihin ña.

Nu quituvi ra Jesús nuu ra tsicā tsihin ra

(Mt. 28.16-20; Mr. 16.14-18; Lc. 24.36-49)

19 Juvin ñi maa quivi can nu quitsaha vitya, tsa cua cuaa tan ndu iin ra tsicā tsihin ra Jesús. Tan ndasi vaha yuvehe nu yucú ra naha tsa cuenda tsa yuuhví ra naha tsi ra cuví ityi nuu tsihin nyivi Israel. Tan ra Jesús quituvi ra tan tsinyaá nyityi ra mahñu ra naha. Tan tsaha ra nacumi tsi ra naha, tan catyí ra:

—Na coo tsa taxin añima ndo —catyí ra.

20 Tsa yaha tsa cahan ra yacan tan janaha ra ndaha ra tan xiin ra tsi ra naha. Tan ra ican naha ra sñi xaan cuñí ra naha tsa nyehe ra naha tsi Jutu Mañi yo.

21 Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumaa tsa tava Jutu yu tyiñu tsi yu, tacan tava nyico tucu yuhu tyiñu tsi nyooho —catyí ra tsihin ra naha.

22 Tacan tan tiví ra tsi ra naha tan catyí ra tsihin ra naha:

—Ñaquihin ndo Tatyí Ii Nyoo.

23 Nyivi tsa jahá ndo tucahnu iñi, iyó tucahnu iñi tsi ñi. Tan nyivi tsa ña jahá ndo tucahnu iñi, nduve tucahnu

iñi iyó tsi ñi —catyí ra Jesús tsihin ra naha.

Nu nyehe ra Tomás tsi Jutu Mañi yo tsa yahá nandoto ra

²⁴ Maa tyin ra Tomás, iin rǫ tsicá tsihin ra Jesús, ra tsa catyí ñi: “ra tinihi”, yoñi ra nyii tsihin ra naha tsa tsaḥan ra Jesús.

²⁵ Yahá can tan nacatyí tuhun ra tsicá tsihin ra Jesús tsihin ra:

—Nyehe ndi tsi Jutu Mañi yo —catyí ra naha tsihin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihví nduyu, tan ña cuaxin yu nundaha yu nu yihí nduyu can, tan ña cuaxin yu ndaha yu yiqui naha ra, ña cua tsinu iñi yu —catyí ra Tomás.

²⁶ Tsa yahá una quiví yucú nyico ra tsicá tsihin ra Jesús tsitsi iin vehe. Tan nyii ra Tomás tsihin ra naha. Tacan tan vasu ndi maa ndasi vaha yuvehe, maa tyin ra Jesús quihví ra tan tsinyaa nyityi ra mahñu ra naha. Tan tsaḥa ra nacumi tsi ra naha tan catyí ra:

—Na coo tsa taxin añima ndo.

²⁷ Tacan tan quitsahá catyí ra tsihin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiqui naha yu. Tan ña cuvi un ra ndava iñi. Tsinu iñi —catyí ra Jesús tsihin ra Tomás.

²⁸ Tacan tan nacahān ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

²⁹ Tan catyí ra Jesús tsihin ra:

—Yooho Tomás, vityin tsinú iñi un tyin nyehé un tsi yu. Si ca cuñi nyivi tsa nduve tsa nyehe tan tsinú iñi ñi —catyí ra Jesús tsihin ra Tomás.

Nu jacoto ra Juan nacuenda tsinu libru ihya

³⁰ Cuaha ca tsa iyo javaha ra Jesús nuu ra tsicá tsihin ra, maa tyin ña tandihí tsi nyaá nu libru ihya.

³¹ Tsinyaa tsa nyaá tyin tacan tan tsinu iñi ndo tyin ra Jesús cuví ra Cristo, ra cuví Sehe Nyoo, tan coo ndo ñayivi nyitó tsa ña cua naa maa.

21

Nu quituvi ra Jesús nuu utsa taahan ra tsicá tsihin ra

¹ Tsa yahá can tan quituvi ra Jesús nuu ra tsicá tsihin ra inga tsaha. Tyehen quituvi ra yatyin ñi yuhu miñi Tiberias:

² Iin ñi nu yucú ra Simón Pedro tan ra Tomás tsa nañi: “ra tinihi”, tan ra Natanael, ra ñuu Caná nu cuví Galilea. Tan yucú ndihí sehe ra Zebedeo naha ra tan uvi taahan ca ra tsicá tsihin ra Jesús.

³ Tan catyí ra Simón Pedro tsihin ra naha:

—Cuahan yu cua tñin yu tyaca —catyí ra.

Tan catyí ra naha tsihin ra:

—Cuhun ndihí ndi tsihin un —catyí ra naha.

Cuahán ra naha tan quihví ra naha tsitsi iin yutun ndoo, maa tyin tsacuaa can ndi in-tuhun maa tyaca ña ñihí ra naha.

4 Tsa cuñi cunditsin tan quituví ra Jesús nu nyiti yuhu miñi can. Maa tyin ra tsica tsihin ra, ña nacoto ra naha tsi ra.

5 Tacan tan catyí ra tsihin ra naha:

—Nyooho ra cuatyí, ¿a ñaha ca ñihi ndo tyaca?

Tan nacahan ra naha tan catyí ra naha:

—Ñaha ca ñihi ndi.

6 Tacan tan nacahan ra Jesús tan catyí ra:

—Cuaxin ndo traya ndo tsiyo cuaha yutun ndoo juvin, tan cua ñihi ndo tyaca —catyí ra Jesús tsihin ra naha.

Tacan icá ra naha. Yaha can tan ndacua ña cuví ca tava ra naha traya can nu ndutya, tsa cuenda tsa cuaha tyaca yihí tsitsi can.

7 Tan ra tsa cuñi xaan ra Jesús catyí ra tsihin ra Pedro:

—Jutu Mañi yo cuví ra! —catyí ra tsihin ra Pedro.

Tsa tsiñi ra Simón Pedro tyin Jutu Mañi yo cuví ra, tsinditsi ra jahma ra, tyin tava ra can tsa cua tin ra tyaca, tan quihvi ra cuahán ra tsitsi ndutya can.

8 Tan inga ra tsa tsica tsihin ra Jesús tsaá ra naha nda yuhu miñi can tsihin yutun ndoo, ixtá ra naha traya can tyin tsitu cuii can tsihin tyaca, tyin yatyin ñi yuhu miñi can yucu ra naha tumaa iin cientu metru ñi.

9 Tsa nuu ra naha nu ñuhu, nyehe ra naha iin nu cayú tuun ñuhu. Tan canyí iin tyaca tsihin paan nuu tuun ñuhu can.

10 Tan catyí ra Jesús tsihin ra naha:

—Ndaca ndo taahan tyaca tsa ndi tin ndo —catyí ra Jesús tsihin ra naha.

11 Tan ndaa ra Simón Pedro nu yutun ndoo tan quitsaha ixtá caa ra traya tyin tsitu cuii can yihí tyaca nahnu. Cientu uvi xico utsi uñi ti yihí tsitsi can. Tan vasu cuaha xaan ti, maa tyin ña taní traya can.

12 Tacan tan catyí ra Jesús tsihin ra naha:

—Ñaha ndo tyin curumusa ndo —catyí ra Jesús tsihin ra naha.

Tan ndi intuhun ra tsica tsihin ra, ña cana iñi ra naha ndaca tuhun ra naha yóo ra cuví ra tyin tsitó ra naha tyin Jutu Mañi yo cuví ra.

13 Tacan tan natuhva ra Jesús tan quihin ra paan can, tan tsaha ra tsi ra naha. Tan juvin ñi tacan icá ra tsihin tyaca.

14 Yacan cuví nu tsinu uñi tsaha quituví ra Jesús nuu ra tsica tsihin ra tsa yaha nandoto ra.

Nu caahán ra Jesús tsihin ra Simón Pedro

15 Tsa yaha tsa curumusa ra Jesús, tan tsica tuhun ra tsi ra Simón Pedro:

—Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacahan ra Pedro tan catyí ra:

—Tacan Jutu Mañi yu, maa un tsitó tyin cuñi yu tsi un —catyí ra Pedro.

Tan catyí ra Jesús tsihin ra:

—Cuhva tsa catsi mbee nyihí jana yu —catyí ra Jesús tsihin ra Pedro.

¹⁶ Tsiçá tuhun nyico ra Jesús tsi ra inga tsaha:

—Simón sehe ra Jonás, ¿a cuñí un tsi yu? —catyí ra Jesús tsihin ra.

Nacahan ra Pedro tan catyí ra:

—Jutu Mañi yu, maa un tsitó tyin cuñí yu tsi un —catyí ra Pedro tsihin ra.

Tan catyí ra tsihin ra:

—Jaha cuenda mbee jana yu —catyí ra Jesús tsihin ra.

¹⁷ Tan tsinu uñi tsaha tsicá tuhun nyico ra tsi ra:

—Simón, sehe ra Jonás, ¿a cuñí un tsi yu? —catyí ra Jesús tsihin ra.

Cuhva tsa tsicá tuhun ra tsi ra tsa tsinu uñi tsaha tatun cuñí ra tsi ra, ra Pedro nducuihya xaan cuñí ra, tan catyí ra tsihin ra:

—Jutu Mañi yu, maa un tsitó nácaa añima yu tan maa un tsitó tyin cuñí yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu.

¹⁸ Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñí un cahun un. Maa tyin tatun tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñí un cahun un —catyí ra Jesús tsihin ra Pedro.

¹⁹ Tsa cahan ra Jesús yacan, cuñí ra cahan ra nácaa cua cúu ra Pedro tan cua jacahnu

ra tsi Nyoo tacan. Yaha can tan catyí ra Jesús tsihin ra Pedro:

—¡Naha quitsi nyicun un tsi yu! —catyí ra tsihin ra.

Nu caahán ra Juan tuhun maa ra

²⁰ Tacan tan natsico coo ra Pedro tan nyehe ra tyin nyicún inga ra tsa tsicá tsihin ra Jesús tsi ra naha, ra tsa cuñí xaan ra Jesús. Juvín ra tsinyanaa tsi ra Jesús tsa cuxiñi ra quivi can. Tan tsicá tuhun ra tsi ra tan catyí ra: “Jutu Mañi yu, ¿yóo ra cua xico tsi un?” catyí ra, tsicá tuhun ra quivi tsa ndi cumañi ca cúu ra Jesús.

²¹ Cuhva tsa nyehe ra Pedro tsi ra, tsicá tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

²² Nacahan ra Jesús tan catyí ra:

—Tatun cuñí maa yu tsa coo ra nda cuanda quitsi yu inga tsaha, ¿náa cuenda yooho? Çohon yooho tsihin yu —catyí ra Jesús tsihin ra Pedro.

²³ Tacan tan iin yaha ñi tsinu tuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñí yuhu tsa coo ra nda cuanda quitsi yu inga tsaha, ¿náa cuenda yooho?”

²⁴ Yuhu cuví ra can, ra tsa cahan ra Jesús tuhun. Tan nyehe yu tandihí cuii maa tsa cuví tan tyaa yu nu libru ihya.

Yuhu tsitó yu tyin tandihí tsa
tyaā yu, tsa nditsa caahán tsi.

²⁵ Iyó cuaha ca tsa javahā
ra Jesús. Tun tsatyin tsicun-
yaā tandihí can nu libru, tsicá
iñi yu tyin ndi ñā cua cuta-
han can nanīi cahnu nu ñuhu
ñayívi.

Tan na cuvi tsi tacan ñi.

Tyiñu Tsa Javaha Ra Apóstol: Ra Tsa Tava Tyiñu Ra Jesucristo

*Nu catyí ra Jesús tyin cua
quitsi Tatyí Ii Nyoo*

¹ Yooho Teófilo, quiví tsa jacuhun yu tutu tsa jihna ñi can tsi un, tyaá yu tandihí tsa quitsaha javahá ra Jesús tan tandihí tsa jacuahá ra nda quiví jihna ñi,

² tan nda quiví nandaá ra andiví. Tan tsa ndi cumañi ca nandaá ra andiví, nacatsí ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra.

³ Tan cuaha xaan tundoho nyehé ra Jesús tan tsihi ra. Tan tsa yahá tsa tsihi ra, nandoto ra tan quituvi ra nu yucú ra tsa tava tyiñu ra. Tan tsitsi tsa uvi xico quiví, cuaha xaan tsaha quituvi ra nu yucú ra naha, tyin na coto ra naha tyin nditsa tsa nyito ra. Tan cahán ra Jesús tsihin ra naha nácaa ndacá ñaha Nyoo tsi yo.

⁴ Tsa ndi nyii ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahán yu tsihin ndo quiví can.

⁵ Nditsa tyin tsihin ndutya jacoondutya ra Juan tsi nyívi.

Maa tyin nyooho ña cuaha ca quiví tan coondutya ndo tsihin Tatyí Ii Nyoo —catyí ra Jesús tsihin ra naha.

Nu nandaá ra Jesús andiví

⁶ Tsa ndu ijin ra tava tyiñu ra Jesús, tan tsicá tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

⁷ Tan nacahán ra Jesús tan catyí ra tsihin ra naha:

—Ña taahán tsi coto nyooho ndáa quiví cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi.

⁸ Tyin quiví tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihí ñuu tsa cayucú Judea tan Samaria, tan nda cuanda nanií cahnu ñuhu ñayiví —catyí ra Jesús tsihin ra naha.

⁹ Tan tsa yahá tsa cahán ra Jesús tuhun ihya, tan tsitsi tsa nyehé ra naha tsi ra, nandaá ra andiví, tan quihvi ra tsitsi vico. Tacan tan ña nyehé ca ra naha tsi ra.

¹⁰ Tan cuhva tsa nyehé ndaá ra naha andiví, quituvi uvi taahan ángel Nyoo tsa nditsí jahma cuitsin yatyin ñi nu nyecú ra naha.

¹¹ Tan catyí ángel can naha ra tsihin ra tava tyiñu ra Jesús:

—Nyooho ra Galilea, ¿nacuenta nyehé ndaa xaan ndo andivi? Ra Jesús tsa nyehe ndo nandaa ihya, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tsihin ra naha.

Nu nacatsi ra tava tyiñu ra Jesús tsi ra Matías tyin jaha tyiñu ra tyiñu tsa javaha ra Judas

¹² Tacan tan quita ra tava tyiñu ra Jesús nu tsiyucu ra naha yucu nu iyó yutun olivo. Tan cuanuhu ra naha ñuu Jerusalén. Tan yatyin ñi canyii ñuu can, tumaa sava hora ñi tan tsa yo. Tyin sava hora ñi cuví caca nyivi quivi quitatú ñi, tyin tacan catyí maa ley tsa tyaa ra Moisés.

¹³ Tsa tsaá ra naha ñuu Jerusalén can, ndaa ra naha nu tsinu uvi pisu vehe nu iyó ra naha. Tan ra tsa yucú can, cuví ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñi tsa nasama ra ndacá ñaha, tan tsihin ra Judas yañi ra Jacobo.

¹⁴ Tan tandihi ra ican naha ra ndu iin ra naha tandihi quivi tan tsiacán tahvi ra naha tsi Nyoo. Tan yucú ndihi tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

¹⁵ Tan tsa tandihi nyivi tsa ndu iin quivi can quitá maa cientu oco ñi. Tacan tan nduvita ra Pedro. Tan catyí ra tsihin ñi:

¹⁶ —Nyooho yañi, tsa nyaá tucu maa tsa taha ra Jesús cuhva ihya tan vityin tsa cunda tsa caha ra David jaha Tatyí Ii Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra.

¹⁷ Tan ra Judas cuví ra iin ra tsa tsinyii tsihin yo. Tan iin caa ñi jaha tyiñu ra tsihin yo.

¹⁸ Maa tyin tsaha ra, tan jata ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacava ra tsihin jiñi ra, tan ndata tsitsi ra tan quita tandihi tsiti ra.

¹⁹ Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñi tsi catyí Ñuhu cuenda tsa Tsati Niñi Nyivi.

²⁰ Tyin nu libru Salmo catyí tsi cuenda ra Judas tyehen: Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javaha ra.

²¹⁻²² Tan vityin yucú ra tsa cutaha tsihin yo quivi tsinyii Jutu Mañi yo Jesucristo tsihin yo; nda quivi jacoondutyá ra Juan tsi ra, tan nda quivi nandaa ra cuahán ra andivi. Tan vityin ñiñi cuñi tsi tsi inga ra cuvi tsandaa tsihin yo tsa cuenda tsa nandoto ra Cristo —catyí ra Pedro.

²³ Tacan tan cana ra naha tsi uvi taahan ra naha. Cana ra naha tsi ra José tsa nañi Barsabás, tan juvin ñi nañi tucu ra Justo; tan cana tucu ra naha tsi ra Matías.

24 Tan tsican tahvi ra naha tsi Nyoo tan catyí ra naha tye-hen:

—Jutu Mañi yu, yooho tsitó un tsa tsicá iñi ndi tsihin añima ndi. Janaha tsi ndi tsitsi tsa uvi taahan ra ihya naha ra, ndáa ra tsa nacatsi maa un,

25 tyin cuiso ra tyiñu tsa jacunaā ra Judas tsa cuenda cuatyí ra, tan cuahán ra nu taahán maa tsi cuhun ra —catyí ra naha, tsican tahvi ra naha tsi Nyoo.

26 Tacan tan tava cuenda ra naha ndáa ra cua tahan tsi cuiso tyiñu can. Tan tahan tsi tsi ra Matías. Ra ican cuví ra tahan tsi cutahan tsihin tsa utsi iin ra tsa tava tyiñu ra Jesús.

2

Nu nuu Tatyí Ii Nyoo

1 Tsaā quivi vico Pente-costés, tan ndu iin tandihi nyivi tsa tsinú iñi tsi ra Jesús.

2 Tan sana iñi ñi tan tsiñi ñi cucayu ityi andivi. Tumaa cucayu tsa vatsí tatyí xaan. Tan iyo xaan cuví tsitsi vehe nu yucú ñi.

3 Tacan tan quituví tumaa iin ñuhu tan tsaā tsi siqui intuhun intuhun ñi.

4 Tan tandihi ñi tsitu ñi tsihin Tatyí Ii Nyoo. Tan quit-saha caahán ñi inga yuhu cuhva tsa jacahan maa Tatyí Ii Nyoo tsi ñi.

5 Tan quivi can cuaha xaan ra ñuu Israel tsaā ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihi ñuu tsa cayucú nu ñuhu ñayivi.

6 Tan tsa tsiñi ra can naha ra tsa iyo xaan cuví nu yucú nyivi cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra yuhu ra naha tsa caahán ñi jahá Tatyí Ii Nyoo.

7 Iyo xaan cuñi ra naha tan quitsaha natuhún tahan ra naha tan catyí ra naha:

—¿A ñavin nyivi ñuhu Galilea cuví tandihi ñi tsa caahán ihya?

8 ¿Nacuenda tyin tsiñi yo caahán ñi cuhva caahán intuhun intuhun yo?

9 Ihya yucú yo tsa cuví yo nyivi quee Partia, Media, Elam, Mesopotamia, Judea, Capadocia, Ponto, Asia,

10 Frigia, Panfilia, Egipto, tan nyivi quee ityi nuu ca Cirene ityi Africa. Tan yucú tucu yo tsa cuví yo nyivi ñuu Roma tan iyó yo ñuu ihya. Tan juhva yo cuví yo nyivi Israel nda quivi cacu yo. Tan inga yo cuví yo nyivi nanduví cuenda nyivi Israel tan nyicún yo ley tsa tyaā ra Moisés.

11 Iyó tucu yo tsa cuví yo nyivi quee Creta tan Arabia. Maa tyin tandihi yo tan tsiñi yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

12 Tandihi ra naha, iyo xaan cuñi ra naha, tan tsicá tuhun tahan ra naha tan catyí ra naha:

—¿Náa cuñi tsi catyí tandihi

tsa cuví ihya? —catyí ra naha.

¹³ Maa tyin inga ra jacuñí nyaa ra naha tsi ñi, tan catyí ra naha tyin tsiñí ñi.

Nu caahán ra Pedro tsihin nyivi

¹⁴ Tacan tan nduvita ra Pedro tsihin tsa utsi iin ca ra tava tyiñu ra Jesús. Tan ñihi cahan ra tan catyí ra:

—Nyooho yañi, tsa cuví ndo ra ñuu Israel, tan tandihi nyooho tsa iyó ñuu Jerusalén ihya. Cuñí tsi tsa coto ndo tuhun ihya. Tan tyaa soho vaha ndo tsa cua cahan yu tsihin ndo.

¹⁵ Tyin cuñí maa ndo tyin tsiñí ndi. Maa tyin ñavin nyixi tsihi ndi, tyin ña tuhvá nyivi coho nyixi hora ihya, tyin ndi jatyaa.

¹⁶ Maa tyin tsa cuví ihya cuví tsa cahan ra Joel, ra cuví ndusu yuhu Nyoo tahan tsanaha. Tyin catyí ra:

¹⁷ Nu cua ndihi quivi, catyí Nyoo,

cua jaquitsi yu Tatyí Ii yu siqui tandihi nyivi.

Tan cua cahan sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi.

Tan nyivi tsahnu cua nyehe ñi ñumaahna jaha yu.

¹⁸ Cua jacuhun yu Tatyí Ii yu siqui ñi tsa jaha tyiñu tsa cuenda yu.

Tan cua cahan ñi tsa cuenda yu, catyí Nyoo.

¹⁹ Tan catyí ra tyin cua janaha ra tsa iyo cua nyehe nyivi ityi andivi.

Tan ityi nu ñuhu ñayivi cua javaha ra tsa iyo, seña niñi, seña ñuhu, tan vico yuhma.

²⁰ Tan ñicanyii cua ndunaa tsi.

Tan yoo cua nducuaaha tsi tumaa cuaaha niñi.

Tandihí tuhun caahán ra ihya cua cuví tsi tsa ndi cumañi ca tahan tsi quivi quitsi Jutu Mañi yo.

Tan quivi cua quitsi ra, iyo xaan cua cuví.

²¹ Tan tandihí nyivi tsa tsicán tahvi tsi ra cua cacu ñi, catyí ra Joel jahá Nyoo.

²² Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyooho ra Israel, tyaa soho ndo tsa cua cahan yu ihya. Ra Jesús, ra ñuu Nazaret, maa Nyoo nacatsi tsi ra, tan tsa janahá Nyoo tsi yo tyin nditsa tsa nacatsi ra tsi ra, tsahá ra tunyee iñi tsi ra tan cuaha xaan tsa iyo tan tsa nyityi tan seña javahá ra. Tan tsa tsitó maa ndo tandihí tsa caahán yu ihya.

²³ Maa tyin quivi nacuhva cuenda ndo tsi ra, javahá ndo tumaa kuhva tyaa maa Nyoo kuhva nda quivi jihna ñi. Tyin tsahá cuenda ndo tsi ra tsi ra caquiñi. Tan ticaa ra naha tsi ra nu cruu. Tsahñi ra naha tsi ra jahá ndo.

²⁴ Maa tyin Nyoo janandoto ra tsi ra. Jacacu ra tsi ra tyin ña cuví cundaca ñaha tuhun tsihi tsi ra.

²⁵ Tyin ra David cahan ra tuhun cahan ra Cristo tahan tsanaha, tan catyí ra:

Tacan ñi nyehé yu tsi Nyoo
Jutu yu ityi nuu yu.

Maa ra nyaá ra ityi xiin cuaha
yu tan nduve náa cuví
jayuhvi tsi yu.

²⁶ Yacan cuenda s̄i xaan cuñí
yu. Tan jacahnú yu tsi
Nyoo tsihin tsa s̄i cuñí
yu.

Tan cuñu ñuhu yu cua quitatu
tsi tyin tsitó yu tyin cua
nandoto yu inga tsaha.

²⁷ Tyin yooho, Nyoo Jutu
yu, ña cua nacoo ihñi
un aña yu nu yucú
aña nyivi tsa tsihi,

tan ndi ña cua cuhva un tsa
tyahyu cuñu ñuhu yu.

Tyin sehe ii maa un cuví tsi
yu.

²⁸ Tan janaha un tsi yu ityi
nu coo yu ñayivi ña cua
naa maa.

Tan cua jacutu un tsi yu tsi-
hin tusi iñi tyin maa
un nyaá tsihin yu, catyí
ra David cahan ra tsa
cahan ra Cristo tahan
tsanaha.

²⁹ Nyooho yañi, tsitó vaha
yo tyin ra David tsii tsaahnu
yo tsihi ra tan quihvi ra tsitsi
ñuhu. Tan ñaña ra ndi nyaá tsi
ihya vityin.

³⁰ Maa tyin ra David cuví
ra iin ndusu yuhu Nyoo. Tan
tsitó ra tyin Nyoo catyí ra tyin
juvin ñi tata maa ra cua cuví
ra Cristo. Tan ra Cristo, cuví
ra cua cundaca ñaha tumaa
tsa tsindaca ñaha ra David.

³¹ Tan ra David tumaa tsa
tyin nyehé ra tsa cua cuví nu
cuahán ca tsi ityi nuu. Tan
cahan ra tuhun tsa cahan ra
Cristo. Tan catyí ra tyin ña
cua ndoo aña yu nu yucú

aña nyivi tsa tsihi. Tan ndi
ña cua tyahyu cuñu ñuhu ra,
catyí ra.

³² Tan ra Jesús can janan-
doto Nyoo tsi ra. Tan tandihi
maa ndi cuví ndi tsandaa tsa
cuenda tsa nandoto ra.

³³ Jutu Nyoo jacahnú ra tsi
ra Jesús, tan tsihin ndaha
cuaha ra cañihi ra tsi ra nda
gloria. Tan ra Jesús naquihin
cuenda ra Tatyí li tsa catyí
Jutu yo Nyoo tahan tsanaha
tyin cuhva ra tsi yo. Tan ya-
can cuví tsa tsaha ra tsi ndi vi-
tyin. Juvín tsi cuví tsa nyehé
ndo tan tsiñi ndo.

³⁴ Tyin ñavin ra David nan-
daa ityi andivi. Maa tyin maa
ra David cahan ra tuhun ra
Jesús, tan catyí ra:

Jutu Mañi yo Nyoo catyí ra
tsihin Jutu Mañi yu ra
Cristo: “Cunya xiin
cuaha yu

³⁵ tsitsi tsa cua caquin yu tsi
ra xaan iñi tsi un tsaha
un”, catyí ra David
jahá Nyoo.

³⁶ Tacan cahan ra Pedro tsi-
hin ra naha, tan catyí tucu ra:

—Nyooho tan tandihi ca
nyivi Israel, coto vaha ndo
tyin tuhun ra Jesús, yacan
cuví tsa caahán yu tsihin ndo
ihya. Ticaa ndo tsi ra nu cruu.
Maa tyin cuví ra Jutu Mañi
yo, tan cuví tucu ra Cristo ra
ndacá ñaha tsi yo jahá Nyoo
—catyí ra Pedro.

³⁷ Cuhva tsa tsiñi ra naha
tsa cahan ra Pedro tuhun
ihya, cuiihya xaan cuñi ra
naha cuví. Tan tsica tuhun
ra naha tsi ra Pedro tan tsi
tandihi ca ra tava tyiñu ra
Jesús, tan catyí ra naha:

—Yañi, ¿nácaa javaha ndi vityin? —catyí ra naha tsihin ra tava tyiñu ra Jesús.

³⁸ Tacan tan catyí ra Pedro tsihin ra naha:

—Intuhun intuhun ndo ndu uvi iñi ndo cuatyí ndo tan nasama ndo cuhva iyó ndo. Tan cõndutya ndo tsihin sivi ra Jesucristo. Tan cua jaha ra tucahnu iñi cuatyí ndo. Tacan tan cua cuhva Nyoo Tatyí Ii ra tsi ndo.

³⁹ Tyin tahañ tsanaha catyí Nyoo tyin cuhva ra Tatyí Ii ra tsi yo, tan tsi sehe yo, tan tsi nyivi tsa cañi iyó. Tyin tandihi nyivi tsa cua nacana Jutu Nyoo cua cuhva ra Tatyí Ii ra tsi ñi —catyí ra Pedro.

⁴⁰ Tsihin tuhun ihya tan tsihin inga ca tuhun, ra Pedro tsaha cuenda ra tsi ra naha tan catyí ra tsihin ra naha:

—Nducu ndo cuhva na jacacu Nyoo tsi ndo, coto cunaa ndo tsihin nyivi caquiñi iyó nu ñuhu ñayivi ihya —catyí ra tsihin ra naha.

⁴¹ Tacan tan tandihi ra tsa tyaã yahvi tuhun cahan ra Pedro tsicoondutya ra naha. Tan quitá tumaa uñi mil nyivi tsa tandihi ñi, tan ndu iin ñi tsihin nyivi yihí cuenda ra Jesucristo.

⁴² Tan tandihi quivi ndu iin tandihi ñi, tan nii iñi ñi tyaá soho ñi tsa jacuahá tandihi ra tava tyiñu ra Jesucristo tsi ñi. Tan iin ñi cuví ñi tsihin tahan ñi, tan tsicán tahvi ñi tan tsatsí ñi paan tan tsihí ñi vinu tyin tacan tan ña cua naa iñi ñi tyin tsihí ra Cristo tsa cuenda cuatyí ñi.

Cuhva iyó nyivi yihí cuenda Jutu Mañi yo Jesucristo quivi can

⁴³ Tan cuaha tsa iyo javaha tandihi ra tsa tava tyiñu ra Jesucristo jaha Nyoo. Tan tandihi ñi iyo cuñi ñi.

⁴⁴ Tandihi ñi yihí cuenda ra Cristo iin caa ñi iyó ñi tsihin tsa iyó tsi ñi.

⁴⁵ Xicó ñi tsa iyó tsi ñi. Tan tsatsá ñi xuhun ñi tsi nyivi tahan ñi cuhva tsa tsiñi ñuhu tsi intuhun intuhun ñi.

⁴⁶ Tandihi quivi tan ndu iin ñi nda vehe ñuhu cahnú. Tan nda yuvehe ñi iin caa ñi tsatsí ñi paan tan tsihí ñi vinu. Tan sii cuñi ñi tsatsí ñi tyin iin ñi cuví ñi.

⁴⁷ Tan jacahnú ñi tsi Nyoo. Tan vaha caahán tandihi nyivi tuhun ñi. Tan iin tan iin quivi tan nducuahá ca nyivi quihví cuenda Jutu Mañi yo Jesús tyin jacacú ra tsi ñi.

3

Nu nduvaha iin ra coxo

¹ Iin quivi cuahán ra Pedro tsihin ra Juan vehe ñuhu cahnú. Cuví tsi cuhva caa uñi tsa tseñi, cuhva tsa tuhvá nyivi Israel cuahán cuandacán tahvi tsi Nyoo.

² Tan iin ra ndaahvi, coxo ra nda quivi cacu ra, nyaá ra yuhu cora vehe ñuhu cahnú can tandihi maa quivi. Tyin tsindacá ñi tsi ra na ndacan ra xuhun tsi nyivi quihví yuhu cora can, tan nañi tsi Yuhu Cora Sii Caá.

³ Tacan tan nyehẽ ra coxo can tsi ra Pedro tsihin ra Juan tsa cua quihví ra naha yuhu

cora can. Tan tsicān ra xuhun tsi ra naha.

⁴Tan nyehe ra Pedro tan ra Juan tsi ra. Tan ra Pedro catyí ra tsihin ra:

—Nyehe tsi ndi —catyí ra.

⁵Tacan tan quitsahā nyehé ra coxo can tsi ra naha. Cuñí maa ra tyin iyó tsa cua cuhva ra naha tsi ra.

⁶Maa tyin ra Pedro catyí ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sivi ra Jesucristo ra ñuu Nazaret, nduvita tan çaca —catyí ra Pedro tsihin ra.

⁷Tacan tan tñin ra Pedro ndaha cuaha ra tan cañihí ra tsi ra. Tan juvin ñi cuhva can nacoq tunyee iñi nduvi taa-han tsaha ra tan jucun tsaha ra.

⁸Tacan tan ra coxo can ndava ra, tan nduvita ra tsinyaā nyityi ra. Tan quitsahā tsicá ra. Tan quihvi ra tsihin ra naha tsitsi cora vehe ñuhu can, tsicá ra, tan ndavá ra, jacahnú ra tsi Nyoo.

⁹Tandihí nyivi nyehe ñi tsi ra tyin tsicá ra tan jacahnú ra tsi Nyoo.

¹⁰Tan iyo xaan cuñí ñi tan yuhví ñi tsa cuenda tsa nduvahā ra can. Tyin nacotó ñi tsi ra. Tyin juvin ra cuví ra tsa tuhvá tsinyaá Yuhu Cora Sii Caá can tsicán ra xuhun tsi nyivi.

Nu caahán ra Pedro tuhun ra Cristo tsihin nyivi nu cuví corredor cuenda ra Salomón

¹¹Ra coxo tsa nduvahā can, ña jaña maa ra tsi ra Pedro

tan ra Juan. Tan tandihí nyivi iyo cuñí ñi, tan tsinú xaan ñi tsaā ñi nu cuví corredor cuenda ra Salomón tyin cua nyehe ñi tsi ra coxo can tyin tsa nduvahā ra.

¹²Tsa nyehe ra Pedro yacan, tan catyí ra tsihin nyivi can:

—Nyooho ra Israel, ¿nacuenda iyo xaan cuñi ndo? Tan ¿nacuenda nyehé xaan ndo tsi nyuhu? ¿A cuñi maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuví janduvahā ndi tsi ra coxo ihya?

¹³Ñavin maa nyuhu janduvahā tsi ra. Nyoo ra cuví Nyoo tsii tsaahnu yo, ra Abraham, ra Isaac tan ra Jacob, ra ican jacahnú tsi Sehe ra tan tsahā ra tunyee iñi tsi ra, ra tsa tsahā cuenda ndo tsi ra Pilato, ra cumí tyiñu. Tan ra Pilato cuñi ra jaña ra tsi ra. Maa tyin nyooho ña tsahā ndo.

¹⁴Tahan tsi tsa ndacan ndo tsa jaña ra tsi ra vaha, tan ra ii can, maa tyin nyooho tsicān ndo tsa jaña ra tsi iin ra tsahñi ndiyi.

¹⁵Tan nyooho tsahñi ndo tsi ra tsa tsahá ñayivi nyito coo yo tsihin Nyoo. Maa tyin Nyoo Jutu yo janandoto ra tsi ra. Tan ña ndoq ra nu yucú añima nyivi tsa tsihi. Tan nyuhu cuví ndi tsandaa tsa cuenda tsa nandoto ra.

¹⁶Tan juvin ra Jesús cuví ra tsa tsahā tunyee iñi tsi ra coxo ihya tan nduvahā tsaha ra, tyin tsinú iñi ndi tyin iyó

tunyeē iñi tsi ra Jesús. Yacan cuenda nduvaha tsaha ra ihya, tan nacotó vaha ndo tsi ra. Tan tandihī nyooho nyehe ndo tyin nduvaha ra tsa cuenda tsa tsinú iñi ndi.

17 "Tsitó yu, —catyí ra Pedro— tyin quivi tsa tsahñi ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuví ityi nuu tsihin ndo, ña tsitó ra naha.

18 Maa tyin tacan jacuvi ndo tan cundaa tsa cahan ra cuvi ndusu yuhu Nyoo tahañ tsanaha, tyin catyí ra naha tyin ra Cristo cua nyehe ra tundoho.

19 Yacan cuenda ndu uvi iñi ndo cuatyí ndo, tan nacuhva cuenda ndo añima ndo tsi Nyoo, na ndatsi cuatyí ndo. Tacan tan sñi xaan cua cuñi añima ndo jaha tunyee iñi Jutu Mañi yo.

20 Tacan tan cua jaquitsi ra tsi ra Jesús ra cuví Cristo, na quitsi ra inga tsaha. Tyin nda quivi jihna ñi tyañ Nyoo cuhva tyin quitsi ra tsa cuenda yo.

21 Taahán tsi tsa ndoó ra Jesucristo gloria tsa vityin nda cuanda quivi cua jan-dutsaa Nyoo tandihī maa tsa iyó. Tumaa cuhva catyí ra cuví ndusu yuhu Nyoo tahañ tsanaha.

22 Tyin tacan catyí ra Moisés tsihin tsii tsaahnu yo: "Cua jaquitsi Jutu yo Nyoo tsi ra tsa cua cahan tuhun ra. Tan juvin ñi nyivi yo cua cuvi ra. Tan cua cahan ra tuhun Nyoo tsihin ndo tumaa caahán yuhu. Tyañ yahvi

ndo tandihī tsa cua cahan ra tsihin ndo.

23 Tyin tandihī nyivi tsa ña cua tyañ soho tsa cua cahan ra, cua cunaa ñi, tyin ña cua cutahan ñi tsihin nyivi tsa nacatsi Nyoo", catyí ra Moisés.

24 "Tan tacan tucu tandihī ra cuvi ndusu yuhu Nyoo nda quivi tsicoo ra Samuel tan nda cuanda vityin, jacoto ra naha tsa cuvi vityin.

25 Tandihī tsa catyí Nyoo tyin cuhva ra tsi yo, cahan ra cuvi ndusu yuhu Nyoo tahañ tsanaha. Tandihī can tsii maa ndo cuvi can. Tan tyiñu tsa ndoo Nyoo tsihin ra Abraham tsii tsaahnu yo, juvin ñi tsa cuenda maa ndo cuvi yacan. Tyin catyí Nyoo tsihin ra Abraham: "Tandihī nyivi tsa iyó nu ñuhu ñayivi cua nasoco yu tsi ñi tsa cuenda nyivi tata un."

26 Tan yacan cuenda quivi janandoto Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo nacoo ndo tsa caquiñi iyó ndo —catyí ra Pedro tsihin ñi.

4

Nu tñn ra cuvi ityi nuu vehe ñuhu cahnu naha ra tsi ra Pedro tan ra Juan

1 Ndi caahán ca ra Pedro tan ra Juan tsihin nyivi, tan tsañ ra cuvi jutu naha ra tsihin ra cuvi ityi nuu tsihin ra jahá cuenda vehe ñuhu, tan tsihin ra cuvi saduceo naha ra.

2 Nduxañ xaan ra naha tyin ra Pedro tan ra Juan

jacuahá ra naha tsi nyivi tan catyí ra naha tyin nditsa tsa cua nandoto nyivi tsa tsa tsihi, tyin ra Jesús nandoto ra.

³ Tacan tan tijn ra naha tsi nduvi taahan ra tava tyiñu ra Jesús can naha ra. Tan tyihí ra naha tsi ra naha vehe caa. Tan ndoo ra naha nda cuanda inga quivi tyin tsa cueñi cuví cuhva can.

⁴ Maa tyin cuaha ñi tsa tsiñi tuhun caahán ra Pedro quit-sahá tsinú ñi ñi. Tan ndu iin ñi tsihin nyivi yihí cuenda ra Jesús. Tan tsa tandihi ñi quitá maa uhun mil cuví tsa maa ñi maa rayii naha ra.

⁵ Tsa tuvi inga quivi, nda ñuu Jerusalén ndu iin tandihi ra cumí tyiñu cuenda nyivi Israel, tan tsihin ra tsahnu, tan tsihin ra cuví maestro cuenda ley tsa tyaá ra Moisés.

⁶ Tan nyii tucu ra Anás ra jutu tsaahnu cuví ityi nuu. Tan nyii tucu ra Caifás, tan ra Juan, tan ra Alejandro. Tan yucú ndihi tucu tandihi rayii tsa cuví nyivi ra jutu tsaahnu cuví ityi nuu.

⁷ Tacan tan tava tyiñu ra naha na cuquihin ra naha tsi ra Pedro tan ra Juan. Tan tsindaca ra naha tsi ra naha nda mahñu nu yucú ra naha. Tan tsicá tuhun ra naha tsi ra naha, tan catyí ra naha:

—¿Yóo tsahá ndatu tsi ndo tsa janduvaha ndo tsi ra can? ¿Yóo tsahá tunyee ñi tsi ndo tsa javaha ndo tyehehen? —catyí ra naha tsihin ra Pedro tan ra Juan.

⁸ Tan ra Pedro tsitú ra tsihin Tatyí Ii Nyoo. Tan nac-

ahan ra tsihin ra naha:

—Nyooho ra ndacá ñaha Israel ñuu yo ihya, tan nyooho ra tsahnu.

⁹ Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihya, tyin cuñi ndo coto ndo nácaa nduvahá ra.

¹⁰ Yacan cuenda cua catyi tuhun ndi tsihin ndo na coto tandihi nyivi Israel. Tyin ra ihya nyaá ra nuu tandihi ndo, tyin nduvahá ra tsihin tunyee ñi tsi ra Jesucristo, ra ñuu Nazaret, ra tsa tsahá cuenda ndo na cúu ra nu cruu. Maa tyin Nyoo janandoto ra tsi ra.

¹¹ Tan juvin ra Jesús cuví yuu tsa tsiñi ñuhu ca tsa ña cuñi ra javahá vehe cuatyíñu ra, tumaa cuhva catyí nuu tutu Nyoo. Tan nyooho cuví ra javahá vehe tan ña cuñi ndo yuu tsa tsiñi ñuhu ca can.

¹² Yoñi inga ra cuví jacacú tsi yo. Tyin intuhun ñi maa ra tsahá Nyoo tyin jacacu ra tsi yo —catyí ra Pedro tsihin ra can naha ra.

¹³ Tan ra cumí tyiñu can naha ra iyo xaan cuñi ra naha tsiñi ra naha tsa caahán ra Pedro tan ra Juan tyin ñi xaan ñi ra naha caahán ra naha, tan ñavin ra cahvi scuela cuví ra naha. Tacan tan nacoto ra naha tsi ra naha tyin ra ícan naha ra cuví ra tsa tsicá tsihin ra Jesús quivi can.

¹⁴ Tan ra tsa nduvahá can, nyaá nyityi ra tsihin ra naha. Yacan cuenda ña cuví cahan ra cumi tyiñu can naha ra tsa ndavaha ñi siqui ra Pedro tan ra Juan.

¹⁵ Tacan tan catyi ra cumi tyiñu naha ra tsihin ra naha:

—Quita nduñi taahan nyoooho tsata vehe.

Tan quita ra naha. Tan ndoo ra cumi tyiñu can naha ra natuhún tahan ra naha.

¹⁶ Tan catyí ra naha:

—¿Náa javaha yo tsihin ra ihya naha ra? Tyin tandihi maa nyivi Jerusalén tsitó ñi tsa iyo tsa javaha ra naha. Tan ña cua cuvi catyí yo tyin ña nditsa.

¹⁷ Maa tyin ña cuñí yo tsa cuaha ca nyivi coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyivi —catyí ra cumi tyiñu naha ra.

¹⁸ Tacan tan cana ra cumi tyiñu tsi ra Pedro tan ra Juan. Tan catyí ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyivi.

¹⁹ Maa tyin ra Pedro tan ra Juan nacahan ra naha tan catyí ra naha:

—Tyihi tuñi ndo iñi ndo tan nyehe ndo tatun vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo.

²⁰ Tyin nyuhu ña cuví tsa jandihí ndi tsa nacatyí tuhun ndi tsa nyehe ndi tan tsa tsiñi ndi —catyí ra naha.

²¹ Tacan tan tyasi nyico ra cumi tyiñu naha ra tsi ra Pedro tan ra Juan. Tan jaña ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihi

nyivi tan jacahnú ñi tsi Nyoo tsa cuenda tsa cuví can.

²² Tyin rayi tsa nduvaha can, tsa yaha uvi xico cuiya ra, tan tacan cuiya tahan ra tundoho tan nduvaha ra jaha Nyoo.

Nu tsican nyivi yihí cuenda ra Cristo tunyee iñi Nyoo

²³ Tan tsa quita ra Pedro tan ra Juan, cuahan ra naha nu yucú nyivi yihí cuenda ra Jesús. Tan nacatyí tuhun ra naha tandihi tsa cahan ra tsahnu naha ra tan ra jutu tsa cuví ityi nuu naha ra tsihin ra naha.

²⁴ Cuhva tsa tsiñi tandihi ñi, tan iin caa ñi quitsaha tsicán tahvi ñi tsi Nyoo. Tan catyí ñi:

—Jutu Mañi yu, yooho javaha un andivi tan ñuhu ñayivi. Javaha un ndutya ñuhu. Tan tandihi ca tsa iyó, maa un javaha.

²⁵ Tan yooho tsihin Tatyí Ii un jacahan un tsi ra David tahan tsanaha. Tan catyí ra:

¿Nacuenda tsa nduxaán nyivi ña tsitó tsi Nyoo?

¿Nacuenda tsicá iñi ñi tuhun tsa nduve yahvi nyaá?

²⁶ Rey naha ra tan tsihin ra tsa ndacá ñaha nu ñuhu ñayivi ihya nduvita ra naha

siqui un, Jutu Mañi yu, tan siqui ra Cristo, ra nyisó tyiñu maa un, catyí ra David.

²⁷ Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi

ra naha tsi ra Jesús Sehe ii un, tsa nacatsj vaha maa un.

²⁸ Tan tacan javahā ra naha, tumaa cuhva tsa catyj maa un tahañ tsanaha tyin cua cuví.

²⁹ Tan vityin, Jutu Mañi yu, nyehe tyin cuñi ra naha casi ra naha tsi ndi. Tan cuhva tsa nii coo iñi ndi tyin tyiñu maa un javahá ndi, Jutu Mañi yu. Tan na ña nayuhvj ndi cahan ndi tuhun maa un.

³⁰ Tan tsihin tunyee iñi maa un tan cua nduvaha nyivi cuuhví, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyj ñi, tsicán tahvi ñi tsi Nyoo.

³¹ Tan cuhva tsa ndihj tsican tahvi ñi tsi Nyoo tan tañ nu yucú ñi. Tan tandihj ñi tsitu ñi tsihin Tatyí Ii Nyoo tan cahan ñi tuhun Nyoo tsihin tsa ña yuuhví ñi.

Nduve tsa cumañi tsi nyivi yihí cuenda ra Cristo

³² Tandihj ñi tsa tsinú iñi, iin ñi cuví ñi, tan iin ñi cuhva tsicá iñi ñi. Ndi intuhun ñi tan ña catyj ñi tyin tsa tsii maa ñi cuví tsa iyó tsi ñi, tyin tsii tandihj ñi cuví can.

³³ Tan tsihin tunyee iñi cahnu, caahán ra tava tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihj ra naha.

³⁴ Tan ndi intuhun ñi tan nduve tsa cumañi tsi ñi tyin tandihj ñi tsa iyó vehe o ñuhu ñi, xicó ñi can. Tan cua ndaca ñi xuhun can

³⁵ tsi ra tava tyiñu ra Jesús. Tan maa ra naha natsatsá

xuhun can tsi intuhun intuhun nyivi cuhva tsa tsiñi ñuhu tsi ñi.

³⁶ Tacan javahā iin ra tsa nañi José. Ra ican cuví ra tata ra Leví. Tan cacu ra ñuhu Chipre tsa canyii mahñu ndutya ñuhu. Tan ra tava tyiñu ra Jesús jacunañi ra naha tsi ra Bernabé. Tan sivi can cuñi tsi catyj: ra jandu iin iñi nyivi.

³⁷ Tan ra Bernabé can xico ra ñuhu ra. Tan tsahā ra xuhun can tsi ra tava tyiñu ra Jesús.

5

Cuatyi ra Ananías tsihin ña Safra

¹ Maa tyin iin ra tsa nañi Ananías tsihin ña Safra, ñasihi ra, xico ñi iin ñuhu.

² Tan tyihj xeehe ñi juhva xuhun. Tacan tan ra Ananías tsindaca ra xuhun tsa ndoo ña tsi ra tava tyiñu ra Jesús. Tan catyj ra tyin tandihj xuhun tsa cuyahvj ñuhu cuví can.

³ Tacan tan catyj ra Pedro tsihin ra:

—Yooho Ananías, ¿nacuenta tsa tsahā un tsa quihvj nu ña vaha añima un? Tyin cuñi un jandavi ñaha un tsi Tatyí Ii Nyoo, tan catyj un tyin tandihj xuhun tsa cuyahvj ñuhu can cuví tsehe, tan ña nditsa un tyin ndoo juhva xuhun can tsi un.

⁴ Tsii un cuví ñuhu can, tan tsii un cuví xuhun tsa ñihj un cuenda ñuhu can. ¿Nacuenta tsa cuñi un jandavi ñaha un tsi Nyoo tan catyj un tyin tandihj xuhun can tsahā un?

Maa tyin ñavin tsi nyuhu jandaví ñaha un, tyin tsi maa Nyoo jandaví ñaha un —catyí ra Pedro tsihin ra Ananías.

⁵ Tsa tsiñi ra Ananías tuhun tsa cahan ra Pedro, nduva ra tan tsihi ra. Tan tsa tsito nyivi tuhun ihya tan nayuhvi xaan ñi.

⁶ Tacan tan tsaq ra cuatyí naha ra tan cava nuu ra naha jahma cuñu ñuhu ra Ananías. Tan tsahan ra naha tsindaca ra naha tsi ra nu ndaa cumi santu.

⁷ Yaha uñi hora tan tsaq ñasihi ra Ananías tan quihvi ña nu yucú ra tava tyiñu ra Jesús, tyin ña tsito ña tsa cuví.

⁸ Tan quitsaha tsicá tuhun ra Pedro tsi ña tan catyí ra tsihin ña:

—¿A tyehen ñi cuví xuhun tsa cuyahvi ñuhu ndo? —catyí ra Pedro tsihin ña.

Tacan tan nacahan ña tan catyí ña tsihin ra:

—Tacan ñi cuví xuhun tsa cuyahvi tsi —catyí ña tsihin ra.

⁹ Tacan tan catyí ra Pedro tsihin ña:

—¿Nacuenta tsa natuhun tahan ndo tan cuñi ndo jandavi ñaha ndo tsi Tatyí li Jutu Mañi yo Nyoo? Ican vatsí ra tsa tsahan tsindaca tsi yí un nu ndaa cumi santu. Tan vityin cua cundaca ndihi ra naha tsi un —catyí ra Pedro tsihin ña Safira.

¹⁰ Tan juvin ñi cuhva can tan nduva ña tsaha ra Pedro, tan cueta tsihi ña. Tan quihvi ra cuatyí can naha ra, tan nyehe ra naha tyin canyí ña tsihi ña. Tan cañihi ra naha tsi ña, tan tsindaca ra naha tsi

ña nu ndaa cumi sandu. Tan tinyi ra naha tsi ña xiin yí ña.

¹¹ Tan tandihi nyivi yihí cuenda ra Cristo, tan tandihi nyivi tsa tsito tuhun can, nayuhvi xaan ñi.

Cuaha xaan tsa iyo tan seña javaha ra tava tyiñu ra Jesús

¹² Cuaha seña tan tsa iyo javaha ra tava tyiñu ra Jesús nu yucú nyivi. Tan tandihi ñi yihí cuenda ra Cristo ndu iñ ñi nu cuví corredor cuenda ra Salomón.

¹³ Tan nyivi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyivi can vaha caahán ñi siqui ñi yihí cuenda ra Cristo.

¹⁴ Tan cuaha xaan nyivi quitsaha tsinú iñi tsi Jutu Mañi yo Jesús, tahan ñi rayi tan ñaha.

¹⁵ Tan nda cuanda tava ñi tsi nyivi cuuhvi ityi cahnu, tsaquín ñi tsi ñi nu tsito. Tyin tatun cua yaha ra Pedro tan yaha tixahñu ra siqui ñi cua nduvaha ñi.

¹⁶ Tacan tucu nyivi iyó yatyin ñi ñuu Jerusalén can, cuandaca ñi tsi nyivi cuuhvi tan nyivi tsa yihí tatyí ña vaha. Tan nduvaha tandihi ñi.

Nu nyehé ra Pedro tan ra Juan tundoho

¹⁷ Tacan tan ra jutu tsahnu tsa cuví ityi nuu, tan ra yihí cuenda ra cuví saduceo naha ra, ndasi cuñi ra naha nyehé ra naha tsi ra tava tyiñu ra Jesús tsa cuenda tsa vaha tsa javaha ra naha

tsihin tunyee iñi tsa tsaḥa Nyoo tsi ra naha.

¹⁸ Tacan tan t̄iñ ra naha tsi ra naha. Tan tyih̄i ra naha tsi ra naha vehe caa.

¹⁹ Maa tyin tsa cuaa can quits̄i iin ángel tsa jaquits̄i Jutu Mañi yo, tan nuñā ra yuvehe caa can. Tan tavā ra tsi ra naha. Tan catyí ra tsihin ra naha:

²⁰ —Cuaahan ndo tan cunyacu nyityi ndo vehe ñuhu cahnu. Tan nācatyi tuhun ndo tsihin nyivi nácaa coo ñi ñayivi nyito tsa iyó ndo —catyí ángel can tsihin ra naha.

²¹ Tsa tsiñi ra naha tsa caḥan ra ángel can, tan cuahán ra naha. Tan tsa tuvi inga quivi can nañih̄i nyivi tsi ra naha vehe ñuhu cahnu. Tan quitsah̄a jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iñ ra jutu tsaahnu tsa cuví ityi nuu tan ra tsa yucú tsihin ra. Tan canā ra naha tsi ra cumi tyiñu cuenda nyivi Israel tyin coo ra naha junta. Tacan tan tavā tyiñu ra naha na cuquihin ra naha tsi ra tavā tyiñu ra Jesús nu yucú ra naha vehe caa can.

²² Maa tyin cuhva tsa tsaā ra vitya naha ra tsitsi vehe caa can, ña nañih̄i ra naha tsi ra naha. Tan cuanuhu ra naha cua nacatyi tuhun ra naha tsihin ra jutu tsaahnu tsa cuví ityi nuu.

²³ Tan catyí ra naha tsihin ra:

—Ndasí yuvehe caa can tan tsaā ndi. Tan andaru, yucú

ra naha yuvehe jahá cuenda ra naha. Maa tyin cuhva tsa nuñā ndi yuvehe can, yoñi maa nañih̄i ndi —catyí ra naha tsihin ra jutu tsaahnu tsa cuví ityi nuu.

²⁴ Tacan tan ra jutu tsaahnu tsa cuví ityi nuu can tsihin ra yih̄i ndaha tsi tandih̄i ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñi ra naha tsa caḥan ra vitya naha ra tsihin ra naha tan iyo xaan cuñí ra naha. Tan natuhun tahan ra naha nácaa javaha ra naha tan cundih̄i tuhun can.

²⁵ Tacan tan tsaā iin ra tan catyí ra:

—Ra tsa tyih̄i ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

²⁶ Tacan tan ra yih̄i ndaha tsi ra jahá cuenda vehe ñuhu can, tsaḥan ra tsihin ra vitya naha ra, tan tsiquihin ra naha tsi ra tavā tyiñu ra Jesús tsihin tsa vii ñi tan ña cañi ra naha tsi ra naha, tyin yuuhví ra naha tsi nyivi coto cañi ñi yuu tsi ra naha.

²⁷ Tsindac̄a ra naha tsi ra tavā tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityi nuu catyí ra tsihin ra tavā tyiñu ra Jesús:

²⁸ —Nyuhu tsa caḥan vaha xaan ndi tsihin ndo tyin ña cahan ca ndo tuhun ra Jesús. Maa tyin nyooḥo ña tyaā soho ndo tsa caḥan ndi. Tan tsa ndih̄i maa tsitsi ñuu Jerusalén jacotó ndo tuhun ra. Tan cuñí

ndo tyaa ndo cuatyí can síqui ndi tyin tsihi ra —catyí ra jutu tsaahnu tsa cuví ityi nuu tsihin ra naha.

²⁹Tacan tan nacahan ra Pedro tan inga ra tava tyiñu ra Jesús, tan catyí ra naha:

—Taahán tsi tyaa yahvi jinha ndi tsi Nyoo tan ñavin ca tsi nyooho.

³⁰Nyoo cuenda tsii tsaahnu yo juvin ra janandoto tsi ra Jesús, ra tsa ticaa ndo nu cruu tan tsahñi ndo.

³¹Tan ra Jesús cuví ra tsa jacahnú xaan Nyoo, tan tyaa ra tsi ra xiin cuaha ra, tyin cua cundaca ñaha ra tandihi maa. Tan intuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi ñi yo cuatyí yo tan jaha ra tucahnu ñi cuatyí yo.

³²Tan nyuhu cuví ndi tsandaa tsa cuenda tandihi yacan. Tan tacan cuví tucu Tatyí Ii Nyoo tsa tsaha Nyoo cunyaa añima nyivi tyaa yahvi tsi ra —catyí ra Pedro tsihin ra naha.

³³Tan tsa tsiñi ra naha tsa cahán ra Pedro, nduxaan xaan ra naha. Tan cuñi ra naha cahñi ra naha tsi ra naha.

³⁴Maa tyin tsihin ra cumi tyiñu can naha ra nyii iin ra cuví fariseo tsa nañi Gamaliel. Tan cuví ra maestro cuenda ley Nyoo tsa tyaa ra Moisés. Tan nyivi tyaa yahvi xaan ñi tsi ra. Tan ra Gamaliel can, nduvita nyityi ra. Tan caahán ra na quita ra tava tyiñu ra Jesús tañi ñi. Tacan tan quita ra naha.

³⁵Tan quitsaha caahán ra Gamaliel can tsihin tandihi ca ra cumi tyiñu naha ra, tan catyí ra:

—Yoo, ra tsa ndacá ñaha tsi nyivi Israel, jaha yo cuenda tsi yo tsihin tsa cua javaha yo tsi ra ican naha ra.

³⁶Nducuhun ñi ndo tyin tsa iyó juhva quivi nduvita iin ra tsa tsinañi Teudas. Tan catyí ra tyin cuví ra iin ra vaha. Tan quita maa tumaa cumi cientu rayi tsinyicun tsi ra. Maa tyin yaha can tsahñi nyivi tsi ra. Tan tandihi ra tsa tsinyicun tsi ra cuanuhu ra naha ñuu ra naha. Tan tsindihí tuhun can.

³⁷Yaha can tan nu cuahán ca tsi ityi nuu, quivi nacahvi ra gobiernu tsi nyivi, tan nduvita ra Judas ra ityi Galilea. Tan cuaha xaan nyivi tsinyicun tucu tsi ra can. Maa tyin juvin ñi tsahñi nyivi tsi ra. Tan tandihi ñi tsa tsinyicun tsi ra cuanuhu ñi ñuu ñi.

³⁸Yacan cuenda jaña yo tsi ra ihya naha ra. Tan ña cua tyihi yo tsi yo tsihin ra naha tyin tatun tuhun iin rayi ñi cuví tsa jacuahá ra naha, cua cundihí tuhun can.

³⁹Maa tyin tatun nditsa tyin tuhun Nyoo cuví tsa jacuahá ra naha, ña cua cuví casi yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

⁴⁰Tandihí ra naha ndoo ra naha vaha tsa ña cua cahñi ra naha tsi ra naha. Tacan tan cana ra naha tsi ra tava tyiñu ra Jesús. Tan catyí ra cumi tyiñu naha ra tsihin ra vitya

naha ra na cañi ra naha tsi ra naha. Tan tyasi ra naha nu cahan ra naha tuhun ra Jesús. Tacan tan jaña ra naha tsi ra naha.

⁴¹ Tan quita ra naha nuu ra cumi tyiñu. Tan sii xaan cuñi ra naha tyin tsañu Nyoo ndatu tyin nyehé ra naha tundoho tsa cuenda ra Jesús.

⁴² Tan ña jandihí ra naha tsa caahán ra naha. Tan tandihí quivi jacuahá ra naha tuhun ra Jesucristo vehe ñuhu tan vehe nyivi.

6

Nu nacatsí nyivi yihí cuenda ra Jesús utsa taahan ra naha tyin jaha cuenda ra naha náa tsa tsiñi ñuhu tsi ñi

¹ Tan nu cuahán ca tsi quivi cuaha xaan nyivi yihí cuenda ra Cristo cuvi. Tacan tan nyivi tsa caahán yuhu griego quit-sahá caahán ñi siqui nyivi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandihí quivi ña jahá vaha ra naha cuenda tsi ñi ndaahvi grecia tsa tsihi yii.

² Tacan tan tandihí tsa utsi uvi taahan ra tava tyiñu ra Jesús jandu iin ra naha tsi tandihí nyivi yihí cuenda ra Cristo. Tan catyí ra naha tsihin nyivi can:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo.

³ Yacan cuenda, nyooho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra

tsa iyó tsa tsiñituñi iñi, ra tsitú tsihin Tatyí Ii Nyoo. Tan cuhva yo tyiñu ihya tsi ra naha.

⁴ Tan nyuhu cua jañihi ndi ndacan tahvi ndi tsi Nyoo, tan cua jacuahá ca ndi tuhun Nyoo —catyí ra naha.

⁵ Tandihí ñi tan ndoo ñi vaha. Tan nacatsi ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí Ii Nyoo. Tan nacatsi tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquía, tan nanduvi ra iin ra Israel.

⁶ Tacan tan tsindaca ñi tsi ra naha nu nyecú ra tava tyiñu ra Jesús. Tan tyiso ndaha ra naha jiñi intuhun intuhun ra naha tan tsican tahvi ra naha tsi Nyoo tsa cuenda ra can naha ra.

⁷ Tan tsityá ca tuhun Nyoo. Tan nducuahá ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyivi Israel natsinu ndihí iñi ra naha tuhun ra Cristo.

Nu tyihí ra naha tsi ra Esteban vehe caa

⁸ Ra Esteban cuví ra iin ra tsa tsitú tsihin tunyee iñi Nyoo. Tan vaha xaan nyivi cuví ra tyin tsitú aña ra tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyivi.

⁹ Tacan tan juhva ra tsa tsicá vehe ñuhu ñuu Israel tsa nañi Vehe Ñuhu Cuenda Nyivi Ndoó Nuña cutahan ra naha tsihin juhva ra ñuu Cirene

naha ra, tan cutahan ndihi juhva ra ñuu Alejandría naha ra, tan ra ityi Cilicia naha ra, tan ra ityi Asia naha ra. Tan quitsahā caahán yuhu tahan ra naha tsihin ra Esteban.

¹⁰ Maa tyin ña cuvī jahā canaa ra naha tsi ra, tyin ra Esteban caahán ra tsihin tsa tsiñituñi jiñi ra tsa tsahā Tatyī Ii Nyoo tsi ra.

¹¹ Tacan tan tyahvī ra can naha ra tsi juhva ra na cahan ra naha cuendu siqui ra Esteban tan catyi ra naha tyin ra Esteban caahán ra ndavaha ñi siqui ra Moisés, tan siqui Nyoo.

¹² Yacan cuenda tandihi nyivi can quitsahā cuvaá ñi tan tsihin ra tsahnu naha ra tan ra cuvī maestro cuenda ley Nyoo. Tacan tan tiin ra naha tsi ra Esteban. Tan tsahan ra naha tsindacā ra naha tsi ra nu ndu iin ra cumi tyiñu cuenda vehe ñuhu nyivi Israel.

¹³ Tan nducū ra naha tsi ra cahan cuendu siqui ra Esteban. Tan maa ra naha catyí ra naha tyehen:

—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyaa ra Moisés.

¹⁴ Tan tsiñi ndi tsa caahán ra tyin ra Jesús, ra Nazaret can, cua cani ra vehe ñuhu cahnu ihya. Tan cua nasama ra kuhva iyó yo tsa jacuahā ra Moisés tsi yo —catyí ra tsa caahán cuendu siqui ra Esteban.

¹⁵ Tacan tan ra cumi tyiñu naha ra tan ra nyecú ican nyehē ra naha tsi ra Esteban

tyin tumaa caá nuu iin ángel, tacan caá nuu ra.

7

Nu caahán ra Esteban tuhun Nyoo tsihin nyivi nducú cahñi tsi ra

¹ Tacan tan ra jutu tsaahnu tsa cuvī ityi nuu tsicā tuhun ra tsi ra Esteban, tan catyí ra:

—¿A nditsa tsa caahán ra ihya naha ra siqui un?

² Tacan tan nacahan ra Esteban tan catyí ra:

—Nyooho yañi, tan nyooho ra tsahnu, tyaa soho ndo tuhun tsa cua cahan yu. Jutu yo Nyoo, ra cahnu ca, quituvī ra nuu tsi tsaahnu yo, ra Abraham, quivi nyií ra ityi Mesopotamia tsa ndi cumañi ca kuhun ra coo ra nda ñuu Harán.

³ Tan catyí ra tsihin ra: “Nacoo ñuu un, tan tsi tandihi nyivi un. Tan cūhun cun inga ñuu tsa cua janaha yu tsi un” catyí Nyoo tsihin ra Abraham.

⁴ Tacan tan ra Abraham quita ra nu iyó nyivi Caldea ityi Mesopotamia, tan cuahán ra nda ñuu Harán. Tan ndacan cuvī nu tsihi jutu ra. Yaha can jaquitsi Nyoo tsi ra ñuhu nu iyó yo ihya vityin.

⁵ Maa tyin nduve ñuhu tsahā Nyoo tsi ra quivi can. Ndi luxu maa nu cuañi ra tan ña tsahā Nyoo. Maa tyin catyí ra tsihin ra Abraham tyin cua kuhva ra. Tan tsa cua cúu ra tan Nyoo cua kuhva ra ñuhu tsi sehe ra. Tacan cahan Nyoo tsihin ra Abraham, vasu tsa ñaha ca coo sehe ra quivi can.

6 Tan inga tucu tuhun cahān Nyoo tsihin ra tyin nyivī tata ra cua coo ñi inga ñuu. Tan cua cuvi ñi musu nyivī ñuu can. Tan maa nyivī ñuu can cua quihī ndaha ñi tsi ñi. Tan cua nyehe ñi tundoho cumi cientu cuiya.

7 Maa tyin cahān tucu Nyoo tsihin ra tyehen: “Nyivī tata un cua nyehe ñi tundoho jaha nyivī ñuu can. Yacan cuenda yuhu cua tatsi tuñi yu tsi nyivī ñuu can. Tan tsa cua yaha yacan tan cua quita nyivī cuvi tata un ñuu can tan cua quitsi ñi ihya. Tan cua jacahnu ñi tsi yu” catyī Nyoo tsihin ra Abraham.

8 “Tacan natuhun Nyoo tsihin ra. Tan ndoo ra tuhun tsihin ra. Tan Nyoo tsahā ra iin kuhva tsa cua javaha ñi coto naa iñi ñi tsa cahān ra. Tsahā cuenda ra tyin tandihī ñi sehe yī ñi tsa cua coo tan cuñí tsi cunyaa tuñi ra itsi naha tsi. Tan tsa yahā una quivī tsa cacū ra Isaac, sehe ra Abraham, tacan javahā ra tsi ra. Tan juvin ñi tacan javahā ndihī tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaā ra tuñi can tsi intuhun intuhun sehe yī ra. Tan ra ican naha ra cuvī tsii tsaahnu yo.

9 “Tan tsa utsi iin taahan ca sehe ra Jacob ndasi cuñi ra naha nyehe ra naha tsi ra José yañi ra naha, tsa cuenda tyin cuñi ca jutu ra naha tsi ra can. Yacan cuenda xico ra naha tsi ra José na cuvī ra iin musu nda Egipto. Maa tyin ra José, ña nacoq Nyoo tsi ra.

10 Tan jacacū ra tsi ra nu nyehé ra tundoho. Tan tsahā ra tsa nyityi jiñi ra tsi ra José. Tan tsahā ra tsa vaha coo ra nuu ra Faraón, ra cuvī rey Egipto. Tan rey can tsahā ra tsa cuvī ra José ra cumi tyiñu ñuu tsa cayucú Egipto can. Tan tsindacā ñaha ndihī tucu ra vehe maa rey.

11 “Tacan tan tsicoq tama nanī cahnu ityi Egipto tan ityi Canaán. Tan nyehe xaan nyivī tundoho. Tan tandihī tsii tsaahnu yo ña ñihī ra naha tsa catsi ra naha.

12 Maa tyin quivī tsitō ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsahān ra naha iin tsaha.

13 Tan tsa tsinu uvi tsaha tsa tsahān ra naha, ra José jacotō ra tsi ra naha tyin yañi ra naha cuvī tsi ra. Tacan tan tsitō ra Faraón yóo tata cuvī ra José.

14 Tacan tan tava tyiñu ra José na quitsi ra Jacob jutu ra, tsihin tandihī nyivī ra. Tan cuvī ñi uñi xico tsahun taahan nyivī.

15 Tan tacan cuvī tsa cuahán ra Jacob cua coo ra ñuhu Egipto can. Yahā can tan tsihī ra ndacan. Tan tsihī ndihī tucu tandihī sehe ra, ra cuvī tsii tsaahnu yo naha ra.

16 Tacan tan tsaā quivī tsa tsindacā ñi yiqui ra Jacob tan yiqui sehe ra nda Siquem. Tan ican quihvī yiqui tandihī ra naha tsitsi ñuhu nu jata ra Abraham iin ñaña tsi sehe ra Hamor tahañ tsanaha.

17 “Maa tyin tsa ndi cumañi

ca quita nyiví Egipto, nyiví ra Abraham tsa iyó Egipto can cuaha xaan ñi cuví. Tan tsa nyanaa yatyin quiví tsa cua cuhva Nyoo ñuhu tsi ñi tumaa tsa cahān catsi ra tsihin ra Abraham.

18 Tacan tan quitsahā ndacá ñaha iin rey tsa ña nacoto tsi ra José.

19 Rey can jandaví ñaha ra nyiví yo. Tan janyehē xaan ra tundoho tsi ñi, tan jañiñi ra tsi ñi na nacoo ñi tsi sehe ñi tsa ndi cacú tyin na cúu tsi.

20 Tan juvin ñi quiví can cacú ra Moisés. Tan tahañ xaan iñi Nyoo tsi ra. Tan uñi yoo jacuahnu síhi ra tsi ra nda yuvehe ña.

21 Yaha can ña cuví ca tyihi xeehe síhi ra tsi ra. Tan nacoo ña tsi ra tsitsi iin tyica yuhu yutya. Tacan tan sehe síhi ra rey Egipto can nañihí ña tsi ra. Tan naquihin ña tsi ra. Tan jacuahnu ña tsi ra, tumaa tsa sehe maa ña cuví tsi ra.

22 Yacan cutuhva ra Moisés tandihí tsa tsitó ñi Egipto. Tan vaha xaan cahān ra tan vaha javahā ra jahā tunyee iñi tsa tsahā Nyoo tsi ra.

23 "Tan tsa quitā uvi xico cuiya ra Moisés cuñi ra cuhun ra cunyehe ra nu iyó nyiví Israel, nyiví ra.

24 Tacan tan iin quiví nyehe ra nu cañi iin ra Egipto can tsi iin ra Israel. Tacan tan tsahñi ra Moisés tsi ra Egipto can tyin cañi xaan ra tsi ra Israel, ra ñuu ra.

25 Cuñi maa ra Moisés can tyin nyiví Israel can cutuñi iñi ñi tyin Nyoo jaquitsi tsi ra tyin jacacu ra tsi ñi. Maa tyin

ña tuví iñi ñi tsa tacan cua cuví.

26 Tacan tan tsa inga quiví can nyehē ra Moisés tsi uvi taahan ra Israel, cañi tahan ra naha. Tan ra Moisés, cuñi ra tsa ña cañi tahan ca ra naha, tan quitsahā catyí ra: "Ña vaha tsa cañi un tsi ra yañi un" catyí ra tsihin ra naha.

27 Tacan tan ra tsa cañi tsi inga ra can tindahñi ra tsi ra Moisés, tan catyí ra tsihin ra: "¿Yóo tava tyiñu tsi un tyin cundaca ñaha un tan cuví un juez tsa cuenda ndi?"

28 ¿A cuñi un cahñi un tsi yu tumaa tsa tsahñi un tsi ra Egipto icu?" catyí ra tsihin ra Moisés.

29 Cuhva tsa tsiñi ra Moisés tsa cahān ra can, tsinu ra. Tan cuahán ra nda ñuu Madián. Ndacan ñihí ra ñasihi ra. Tan ndacan tsicoo uvi taahan sehe ra.

30 "Yahā uvi xico cuiya. Tacan tan iin quiví tsicá nuu ra Moisés nu tsiqui yatyin yucu tsa nañi Sinaí. Tan nyehē ra cayú iin yutun iñu. Tacan tan quituví iin ángel tsitsi ñuhu tsa cayú can.

31 Iyo xaan cuñi ra Moisés tsa nyehé ra yacan. Tan natuhva ra nu cayú iñu can tyin nyehe vaha ra, tan tsiñi ra ndusu Jutu Mañi yo. Tan catyí ndusu can tyehen:

32 "Yuhu cuví Nyoo cuenda tsii tsaahnu un, Nyoo cuenda ra Abraham, tan ra Isaac, tan ra Jacob" catyí ndusu can tsihin ra. Tacan tan ra Moisés quitsahā nihí ra tsihin tsa yuhví ra. Tan ña canā iñi ra nanyehe ra.

33 Tan quitsaha catyí tucu Jutu Mañi yo tsihin ra: “Tava nditsan tsaha un tyin ñuhu nu tsañi un, ñuhu ii cuví tsi.

34 Yuhu nyehé yu tandihi tundoho tsa nyehé nyivi cuenda yu ñuhu Egipto can. Tan tsiñi yu ndusu ñi tsa tsacú tsa ñi. Yacan vatsí nuú yu tyin jacacu yu tsi ñi. Naha, tyin jacahun yu tsi un nda Egipto” catyi Nyoo tsihin ra Moisés.

35 ‘Quivi can ña cuñi nyivi Israel tsi ra Moisés tsa cundaca ñaha ra tsi ñi, tan catyi ñi tsihin ra: “¿Yoo tava tyiñu tsi un tyin cundaca ñaha un tan cuví un juez tsa cuenda ndi?”, catyi ñi tsihin ra. Vasu ña cuñi ñi tsa cundaca ñaha ra tsi ñi, maa tyin Nyoo tava tyiñu ra tsi ra tyin cuví ra nuu tsihin ñi, tan jacacu ra tsi ñi. Tyin tacan catyi ángel tsa quituvi nuu ra nu iñu tsa cayú can.

36 Tan ra Moisés can tava tsi nyivi Israel ñuhu Egipto can tsihin tsa javaha ra tsa iyo tan seña ñuu can, tan nu yaha ñi nda nu Nduya Ñuhu Cuaaha, tan nu tsicá nuu ñi nu tsiqui tsitsi tsa uvi xico cuiya.

37 ‘Tan juven ñi maa ra Moisés can cuví ra tsa cahan tsihin nyivi Israel tan catyi ra tyehen: “Nyoo cua jaquitsi ra tsi iin ra cuví ndusu yuhu ra tumaa jaquitsi ra tsi maa yu. Tan cua cuví ra iin ra Israel tumaa maa yo. Tan taahán tsi tyaa yahvi yo tsi ra” catyi ra Moisés.

38 Tan maa ra Moisés can cuahán ra tsihin nyivi tsii tsaahnu yo nu tsicá nuu ñi nu tsiqui can. Tan ra ican

cuví ra tsa cahan ángel tsihin nda yucu Sinaí. Tan ra ican naquihin cuenda ra tuhun Nyoo nácaa coo nyivi, tan tyaa ra tuhun can nu tutu tyin tacan tan coto yo.

39 ‘Maa tyin nyivi tsii tsaahnu yo ña tyaa yahvi ñi tsi ra. Tava tsiyo ñi tsi ra. Tan cuñi ñi cunuhu ñi nda Egipto.

40 Yacan cuenda cuhva tsa nyii ra Moisés yucu Sinaí, tan cahan nyivi tsihin ra Aarón tan catyi ñi: “Javaha taahan nyoo cuhun ityi nuu ndi. Tyin ña tsitó yo náa tahan ra Moisés, ra tsa tava tsi yo Egipto” catyi ñi.

41 Tacan tan javaha ñi iin indiqui xuhun cuaan. Tan tsahñi ñi quití tyin cuhva cuenda ñi tsi tsitoho can. Tan sii xaan cuñi ñi tsicoo ñi vico cuenda tsitoho tsa javaha ñi tsihin ndaha ñi.

42 Tacan tan Nyoo jatsiyo ra tsi ñi. Tan jaña ndaha ra tsi ñi tyin cua jacahnu ñi ñicanyii, tan yoo, tan tandihi tiñuu tsa iyó ityi andivi. Tyin tyehen tyaa ra cuví ndusu yuhu Nyoo nu libru tahan tsanaha:

Nyooho nyivi Israel, ¿A tsahñi ndo quití tyin cuhva cuenda ndo tsi maa yu tsitsi tsa uvi xico cuiya tsa tsicá nuu ndo nu tsiqui? Ñavin.

43 Tyin jacahnu ndo tsi nyoo tsa nañi Moloc,

tan jacahnu ndihi tucu ndo tsi nyoo tsa nañi Renfán tsa caá tumaa caá iin tiñuu tsa iyó andivi.

Juvin ñi maa ndo javahā tsi-toho can, tan jacahnú tucu ndo.

Yacan cuenda yuhu cua tava yu tsi ndo ñuu ndo, tan cua jacuhun yu tsi ndo iin nu cañi ca ityi nuu ñuu Babilonia, catyī Nyoo tsihin ñi.

44 Nu tsicā nuu tsii tsaahnu yo nu tsiqui can, tsicumī ra naha iin vehe ñuhu tsa tsinu tsihin ñi quiti. Tan tsitsi vehe can tsicumī ra naha tabla yuu tsa nyaá ley Nyoo nuu. Tan ra Moisés tava tyiñu ra na javaha ñi vehe ñuhu can ityi tsata, tumaa cuhva janahā maa Nyoo tsi ra.

45 Yaha can tan ra Josué cuvī ra ityi nuu tsihin ñi. Tacan tan quihin ñi vehe ñuhu can tan vatsi ñi tsihin tsi nu iyó yo ihya vityin. Tyin Nyoo tava ra tsi nyivi tsicoḡ ñuhu ihya tan nacuhva cuenda ra ñuhu ihya tsi ñi Israel, nyivi yo. Tan tsatyiñu ñi vehe ñuhu can nda cuanda quivi tsicoḡ ra rey David.

46 Tan ra rey David ñihī ra tumañi iñi nuu Nyoo. Tan cuñi ra javaha ra iin vehe vaha nu coo Nyoo. Juvin ñi Nyoo jacahnū ra Jacob taḡan tsanaha.

47 Maa tyin ra Salomón javahā ra vehe Nyoo.

48 Vasu ña iyó Nyoo tsitsi vehe ñuhu tsa javahá nyivi. Tumaa caḡan ra cuvī ndusu yuhu Nyoo taḡan tsanaha tyehen:

49 Andivī cuvī tyayu nu nyaá yu ndacá ñaha yu.

Tan ñuhu ñayivi, yacan cuvī nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

50 ¿A ña tsitó ndo tyin maa yu javahā andivī tan ñuhu ñayivi? catyī ra cuvī ndusu yuhu Nyoo jahā Nyoo.

51 Maa tyin nyooho —catyī ra Esteban— tacan ñi tuhvá maa ndo jandavá ndo iñi ndo. Tan ña cuñi ndo naquihin ndo tuhun caahán Nyoo. Tacan ñi ña tyaá yahvi ndo tsi Tatyī Ii Nyoo. Inducu ñi caá ndo tsihin tsii tsaahnu yo.

52 Tsii tsaahnu yo cuxaan ra naha tan tsahñi ra naha tsi tandihī ra cuvī ndusu yuhu Nyoo taḡan tsanaha. Tan ra ican naha ra catyī tyin cua quitsi iin ra vaha. Tan tsa quitsi ra vityin, nyooho xico ñaha ndo tsi ra tsi ra xaan iñi tsi ra, tan tsahñi ndo tsi ra.

53 Nyooho naquihin cuenda ndo ley Nyoo tsa tsahā ángel tsi ndo, maa tyin ña cuñi ndo tyaa yahvi ndo tsa caahán ley can —catyī ra Esteban.

Nu tsihi ra Esteban

54 Tsa tsiñi ra cumi tyiñu vehe ñuhu cahnu naha ra tuhun ihya, xaan xaan cuñi ra naha, ndacua jacahyu nuhu ra naha nyehé ra naha tsi ra Esteban.

55 Maa tyin ra Esteban tsitú ra tsihin Tatyī Ii Nyoo tan nanyehé ra ityi andivī.

Tan nyehe ra tsa cahnu cuví Nyoo. Tan nyehe tucu ra tsi ra Jesús nyaá nyityi ra xiin cuaha Nyoo.

⁵⁶ Tacan tan catyí ra Esteban:

—¡Jihna ndo! Nyehe yu andivi tan ticohó tsi. Tan nyehe yu tsi ra Jesús, Rayi tsa quee nda gloria, nyaá nyityi ra xiin cuaha Nyoo —catyí ra Esteban.

⁵⁷ Maa tyin ra can naha ra tyasi ra naha soho ra naha, tsa ña cua tyaa soho ra naha tsa caahán ra Esteban. Tacan tan iin vaa ñi cana tsaa ra naha. Tan tandihi ra naha cuahán ra naha siqui ra Esteban.

⁵⁸ Tacan tan tava ra naha tsi ra yuhu ñuu. Tan tsahñi ra naha tsi ra tsihin yuu. Tan ra tsa javahá tsa ña vaha can naha ra, nacoo ra naha jahma tsa nyaá tsata ra naha tyin jaha cuenda iin ra tyuvaa tsa nañi Saulo.

⁵⁹ Tan tsitsi tsa cañi ra naha yuu tsi ra Esteban, quitsaha tsicán tahvi ra Esteban tsi Nyoo, tyin tui iñi ra tyin tsa cua cúu ra. Tan catyí ra tyehen:

—Jutu Mañi yu Jesús, naquihin añima yu —catyí ra.

⁶⁰ Yaha can, tan tsicuiñi tsiti ra, tan tsaa cana tsaa ra tan catyí ra:

—Jutu Mañi yu, ña tñin cuenda un cuatyí tsa javahá ra naha —catyí ra.

Tsa yaha cahan ra tacan, tan tsihi ra.

8

Nu tsinya ndaha ra Saulo tsi nyivi yihí cuenda ra Cristo

¹ Tan ra Saulo ña tsinú iñi ra tsi ra Jesús, tan ndoo ra vaha tsa tsahñi ra naha tsi ra Esteban.

Tan juvin ñi quivi can quitsaha nducú xaan nyivi tsi ñi yihí cuenda ra Cristo ñuu Jerusalén tyin cahñi ñi tsi ñi. Tan tandihi ñi yihí cuenda ra Cristo tsinu ñi, cuahán ñi cua coo ñi tandihi ñuu tsa cayucú Samaria, tan tandihi ñuu tsa cayucú Judea. Maa tyin ra tava tyiñu ra Jesús ña quita ra naha. Ndoo ra naha Jerusalén.

² Tan juhva ra tsa nyicún vaha tsi Nyoo ñuu Jerusalén can, tsahan ra naha tsicutsi ra naha cuñu ñuhu ra Esteban nda nu ndaa cumi santu. Tan tsacu xaan ra naha tsa cuenda tsa tsihi ra.

³ Tan ra Saulo can quitsaha nyaá ndaha ra tsi nyivi yihí cuenda ra Cristo. Tan tsahan ra tan iin tan iin vehe ñi. Tan ixta caa ra tsi ñi, tan tsaha cuenda ra tsi ñi tyin cuhun ñi vehe caa, tahan ñi rayi tan ñaha.

Nu caahán ra Felipe tuhun ra Cristo nu cuví Samaria

⁴ Tan tandihi ñi tsa quita ñuu Jerusalén can, caahán ñi tuhun Nyoo nácaa jacacú ra Cristo tsi yo, tandihi ñi ityi nu cuahán ñi.

⁵ Iin ra tsa nañi Felipe tsaa ra iin ñuu canyí Samaria. Tan quitsaha caahán ra tuhun ra Cristo tsihin nyivi iyó ican.

⁶ Tan tandihí ñi ñi cuñí ñi tan tyaá soho ñi tsa caahán ra. Tyin nyehé ñi tsa iyo tsa javahá ra.

⁷ Tyin cuaha xaan nyivi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quitā nahnu tan canā tsaa nahnu cuahán nahnu. Tan cuaha xaan nyivi coxo tan nyivi tsa ña cuví canda tan ña cuví caca, nduvahá ñi.

⁸ Yacan cuenda nyivi ñuu can, sī xaan cuñí ñi.

⁹ Tan Samaria can iyó iin ra tasi nañí Simón. Tuhvá ra jandaví ñaha tsi nyivi. Catyí ra tyin cahnu xaan cuví ra.

¹⁰ Tandihí maa nyivi, ñi cuca tan ñi ndaahvi, tyaá soho ñi tsa caahán ra. Tan catyí ñi:

—Nditsa nditsa, tyin tunyee iñi Nyoo iyó tsihin ra ihya —catyí ñi.

¹¹ Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi.

¹² Tacan tan quitsj ra Felipe. Tan jacotō ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsaha tsinú iñi ñi tsi ra Cristo, rayii tan ñaha. Tan tsicoondutyā ñi.

¹³ Nda cuanda ra Simón can, tan natsinū iñi ra tsi ra Cristo, tan tsicoondutyā ra. Tan quitsaha tsicá nuu ra tsihin ra Felipe. Tan iyo xaan cuñí ra nyehé ra tsa iyo tan seña tsa javahá ra Felipe.

¹⁴ Tacan tan ra tava tyiñu ra Jesús tsa iyó ñuu Jerusalén can ñihj tuhun ra naha tyin

tsinú iñi nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria.

¹⁵ Tan tsa tsaā ra naha, quitsaha tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihin ñi Tatyí Ii Nyoo.

¹⁶ Tyin ñi can, ñaha ca nuu Tatyí Ii Nyoo siqui ñi. Maa tsa tsicoondutyā ñi ñi tsihin sivi Jutu Mañi yo Jesús.

¹⁷ Tacan tan ra Pedro tan ra Juan tyiso ndaha ra naha jiñi ñi, tan naquihin ñi Tatyí Ii Nyoo.

¹⁸ Tan ra Simón can nyehé ra nu tyisó ndaha ra tava tyiñu ra Jesús jiñi ñi, tan naquihín ñi Tatyí Ii Nyoo.

¹⁹ Tan quitsaha caahán ra Simón tan catyí ra:

—¿Najava xuhun cuñí ndo tan cuhva ndo tunyee iñi tsi yu, cuví tyiso ndaha yu jiñi nyivi, tan naquihin ñi Tatyí Ii Nyoo? —catyí ra Simón tsihin ra naha.

²⁰ Tacan tan nacahan ra Pedro tan catyí ra:

—Jaha cuenda coto cuna un tsihin xuhun cun. ¿Nacuenda tsicá iñi un tyin cuví jata yo ndatu tsa tsahá Nyoo tsi yo? Ña cuví.

²¹ Yooho, ña taahán tsi tyihi un tsi un tsihin tyiñu ihya. Tyin añima un ña vaha nuu Nyoo.

²² Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa

cuenda tsa tsicá iñi un tsitsi añima un.

²³ Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsahá coto un tsa vaha —catyí ra Pedro tsihin ra Simón.

²⁴ Tacan tan nacahan ra Simón tan catyí ra:

—Ndaçan tahvi maa ndo tsi Jutu Mañi yo tsa cuenda yu, na ña quitsi tandihi tsa caahán un tsihin yu siqui yu —catyí ra Simón tsihin ra Pedro.

²⁵ Tsa yaha can tan ra tava tyiñu ra Jesús tsaha cuenda ra naha tandihi tsa nyehe ra naha tsa javaha ra Cristo nu tsica ra nu ñuhu ñayivi. Tan cahan ra naha tuhun Nyoo. Tacan tan cuanuhu ra naha nda ñuu Jerusalén. Tan tandihi ñuu tsa cayucú Samaria nu yaha ra naha jacoto ra naha nácaa javahá yo tan cacu yo.

Nu caahán ra Felipe tuhun Nyoo tsihin iin ra ñuu Etiopía

²⁶ Tsa yaha yacan tan cahan iin ángel Nyoo tsihin ra Felipe, tan catyí ra:

—Nduvita tan cahun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yahá nu tsiqui.

²⁷ Tacan tan ra Felipe nduvita ra tan cuahán ra. Tan ityi cuahán ra ñihí tahan ra tsihin iin ra ñuu Etiopía. Tan cuví ra can eunuco [tyin ña cuví coo ñasihi ra]. Tan cuví ra iin ra cumí tyiñu cahnu ñuu Etiopía,

tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnu ra tsi Nyoo nda ñuu Jerusalén.

²⁸ Tan ityi cuanuhú ra nda ñuu ra nyaá ra siqui carreta ra. Tan cahví ra nu libru tsa tyaa ra Isaías, ra cuví ndusu yuhu Nyoo tahan tsanaha.

²⁹ Tacan tan Tatyí Ii Nyoo cahan tsihin ra Felipe:

—Natumva nu carreta can.

³⁰ Tan cuhva tsa natuhva ra Felipe nu carreta can, tsiñi ra tyin cahví ra Etiopía can nu libru tsa tyaa ra Isaías. Tan tsica tuhun ra Felipe tsi ra tan catyí ra:

—¿A cutuñi iñi un tsa caahán tsi? —catyí ra.

³¹ Tacan tan nacahan ra Etiopía can tan catyí ra:

—¿Nacaa cutuñi iñi yu tan yoñi jacuahá tsi yu? —catyí ra tsihin ra Felipe.

Tan tsican ra tsi ra Felipe na ndaa ra tan cunyaa ra tsihin ra.

³² Tan nu cuahán cahví ra, catyí tsi tyehen:

Tsahñi ra naha tsi ra tumaa tuhva ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti,

tacan cuví ra can tyin nyehe ra tundoho tan nduve náa cahan ra.

³³ Janduluhu ra tsi ra nuu ra naha tan yoñi cuñi javaha iin tsa vaha tsihin ra.

Tan tsa cuenda nyivi cuví tata ra, yoñi caahán tsa cuenda ñi.

Tyin ña tsicoq sehe ra tan tsihi ra.

Tacan catyí tsi nu tutu tsa cahví ra can.

³⁴Tacan tan ra Etiopía quitsahá tsicá tuhun ra tsi ra Felipe, tan catyí ra:

—Jaha tumañi iñi tsi yu, tan catyi tuhun un luxu tsihin yu, zyoo tuhun caahán ra ndusu yuhu Nyoo ihya? ¿A tuhun maa ra, o yoo tuhun caahán ra? —catyí ra tsihin ra Felipe.

³⁵Tacan tan ra Felipe quitsahá caahán ra siqui tuhun tsa tsa yaha cahví ra can, tan tsahá cuenda ra tsi ra tyin tuhun ra Jesús caahán ra ndusu yuhu Nyoo can. Tan tsahá cuenda ra tyin ra Jesús cuví ra jacacú tsi yo.

³⁶Tacan tan tsa cua yaha ra naha nu yihí ndutya. Tan ra Etiopía can quitsahá caahán ra tsihin ra Felipe tan catyí ra:

—Ihya yihí ndutya. ¿A ña cuví coondutya yu ihya? —catyí ra.

³⁷Tacan tan nacahan ra Felipe tsihin ra Etiopía, tan catyí ra:

—Tatun tsinú iñi un tsihin tsa ñi añima un, cuví coondutya un —catyí ra tsihin ra.

Tacan tan nacahan ra can, tan catyí ra:

—Tsinú iñi yu tyin Sehe Nyoo cuví tsi ra Jesucristo —catyí ra.

³⁸Tacan tan ra can caahán ra tsihin musu ra na jacuñi ra carreta can. Tan nduvi taañan ra naha nuu ra naha. Tan quihví ra naha tsitsi ndutya.

Tacan tan jacoondutya ra Felipe tsi ra Etiopía.

³⁹Tan cuhva tsa quita ra naha tsitsi ndutya can, tan Tatyí Ii Jutu Mañi yo naquihin ra tsi ra Felipe. Tan ra Etiopía can ña nyehe ra numaa ityi cuahán ra Felipe. Maa tyin sii xaan cuñi ra, cuanuhú ra.

⁴⁰Tan ra Felipe tsaá ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tsihin nyivi nda cuanda tsa tsaá ra ñuu Cesarea.

9

Nu natsinu iñi ra Saulo tsi ra Cristo

(Hechos 22.6-16; 26.12-18)

¹Tan tsicá ra Felipe caahán ra tuhun ra Cristo tsihin nyivi, tan ra Saulo ña jandihí maa ra tsa nducú cahñi ra tsi nyivi yihí cuenda Jutu Mañi yo. Tan tsahan ra nu nyaá ra jutu tsahnu cuví ityi nuu,

²tsindacan ra iin tutu tsi ra jutu, tyin nacuhva ra ndatu tsa cuhun ra vehe ñuhu ñuu Damasco, tan tin ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayi tan ñaha. Ñihi ra Saulo tutu can tan cuahán ra.

³Tan tsa cua tsaá ra ñuu Damasco, sana iñi ra, tan quitsi ñuhu ityi andivi, jandunditsin tsi tani cahnu maa nu cuahán ra.

⁴Tacan tan ra Saulo nduva ra nu ñuhu. Tan tsiñi ra iin ndusu tsa catyí tyehen:

—Saulo, Saulo, ¿nacuvi tyin nyaá ndaha un tsi yu? —catyí ndusu can tsihin ra.

5 Tacan tan nacahan ra Saulo:

—¿Yóo cuví yooho, taa? —catyí ra, tsicá tuhun ra.

Tacan tan nacahan ndusu can tsihin ra, tan catyí tsi:

—Yuhu cuví ra Jesús, ra tsa nyaá ndaha un. Juvín ñi tsi maa un jañicuehé un, tumaa jañicuehé indiqui tsi ti tsa tsañi ihñi ti nu tsa tutsi ra naha tsi ti —catyí ra Jesús tsihin ra.

6 Tacan tan quitsaha ñihí ra Saulo tsihin tsa yuuhví ra. Tan catyí ra:

—Jutu Mañi yu, ¿náa cuñi un tyin javaha yu? —catyí ra.

Tacan tan Jutu Mañi yo nacahan ra tsihin ra tan catyí ra:

—Nduvita tan cahun un tsitsi ñuu Damasco. Tan ican cua cahan iin ra tsa cua cahan tsihin un náa taahan tsi javaha un —catyí ra Jesús tsihin ra Saulo.

7 Tan ra tsa cuahán tsihin ra Saulo, nayuhví xaan ra naha. Tan ña ñihí ra naha náa tuhun cahan ra naha tyin tsiñi ra naha ndusu can maa tyin yoñi nyehe ra naha.

8 Tacan tan ra Saulo nduvita ra. Tan tsa nuña ra tinuu ra, ña cuví maa nanyehé ra tyin cuaa ra jahá Nyoo. Yacan cuenda, ra tsa cuahán tsihin ra tñin ra naha ndaha ra tan tsindaca ra naha tsi ra ñuu Damasco.

9 Ican tsinyij ra uñi quivi. Tan ña cuví maa nanyehé ra. Tan ña tsatsi ra, tan nduve maa náa tsihi ra.

10 Ñuu Damasco can iyó iin ra tsinú ñi tsi Nyoo, nañi ra Ananías. Tan nyehe ra iin tsa

nyehé ra nu cahan Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahan ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

11 Tacan tan Jutu Mañi yo catyí ra:

—Nduvita, tan cahun cun ityi cahnua tsa nañi Ndoó ñi. Tan nanducu un vehe ra tsa nañi Judas. Tan ndaca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu.

12 Tan nyehe ra iin tsa nyehe ra, tan nyehe ra tsi yooho, Ananías, tyin tsaá un nu nyaá ra, tan tyiso ndaha un jiñi ra tyin tacan tan nanyehé ra inga tsaha —catyí Jutu Mañi yo tsihin ra Ananías.

13 Tacan tan nacahan ra Ananías tan catyí ra:

—Jutu Mañi yu, cuaha xaan nyivi caahán ñi tsihin yu tyin nyivi yihí cuenda un ñuu Jerusalén cuaha xaan tsa ña vaha javaha ra Saulo can tsihin ñi.

14 Tan vityin vatsí ra ihya tyin tsaha ra jutu tsaahnu tsa cuví ityi nuu ndatu tsi ra tsa tyihi ra tsi nyivi tsicán tahvi tsi un vehe caa —catyí ra Ananías tsihin Jutu Mañi yo.

15 Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsi vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juvin

ñi cahan ndihí ra tuhun yu tsihin nyiví Israel.

¹⁶ Yuhu cua jacuaha yu tsi ra nácaa tsa cuaha tundoho cua nyehe ra tsa cuenda yu —catyí Jutu Mañi yo tsihin ra Ananías.

¹⁷ Tacan tan cuahán ra Ananías vehe nu nyíí ra Saulo. Tsaá ra yuvehe can tan quihví ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituví nuu un ityi vatsí un, ra ican jaquitsi tsi yu tyin nanyehe un inga tsaha. Tan cua jacutu ra tsi un tsihin Tatyí Ii ra —catyí ra Ananías tsihin ra Saulo.

¹⁸ Tan juven ñi cuhva can tan coyó tsa caá tumaa caa yaa tyaca tsa tyasi tinuu ra Saulo. Tacan tan cuví nanyehe ra. Yahá can tan tsicoondutyá ra.

¹⁹ Yahá can tan nacatsi ra, tan ndunyeé cuñu ñuhu ra inga tsaha. Tan ndoo ra juhva quiví tsihin nyiví tsa yihí cuenda ra Cristo ñuu Damasco.

Nu quitsahá caahán ra Saulo tuhun ra Cristo tsihin nyiví ñuu Damasco

²⁰ Tacan tan numi ñi quitsahá caahán ra Saulo tuhun ra Cristo tsihin nyiví tandihí vehe ñuhu nyiví Israel ñuu Damasco. Tan catyí ra tyin ra Jesús, Sehe Nyoo cuví tsi ra.

²¹ Tandihí maa nyiví tsa tsiñí tsa caahán ra, iyo xaan cuñí ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaa ndaha tsi nyiví tsicán tahví sivi ra Jesús ityi ñuu Jerusalén? ¿A ñavin juven ra cuví ra tsa vatsí tiin tsi nyiví iyó ihya tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

²² Maa tyin ra Saulo ñihi ca caahán ra tuhun ra Cristo tsihin tsa ñi ñi ra. Tan janahá ra tsi nyiví Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

Nu tsinu xeehe ra Saulo nuu ra Israel naha ra

²³ Tsa yahá juhva quiví, tan ra Israel tsa ña tsinú ñi tsi ra Cristo natuhún tahan ra naha tyin cua cahñi ra naha tsi ra Saulo.

²⁴ Ñiñu tan nduvi ndatú ra naha tsi ra yuvehe cahnu ñuu can. Maa tyin ra Saulo tsitó ra tuhun can.

²⁵ Tacan tan nyiví tsa tsinú ñi tsi ra Cristo ñuu can tyihí ñi tsi ra tsitsi iin tyica cahnu. Tan tsacuaa januu ñi tsi ra ityi ventana iin vehe tsa nyaá yuhu cora ñuu can. Tacan tan tsinú ra cuahán ra.

Nu nyíí ra Saulo ñuu Jerusalén

²⁶ Quiví tsa tsaá ra Saulo ñuu Jerusalén, cuñí ra ndu iin ra tsihin nyiví tsa yihí cuenda ra Cristo. Maa tyin tandihí maa ñi tan yuuhví ñi nyehé ñi tsi ra. Tyin ña tsinú ñi ñi tsa yihí ra cuenda ra Jesús.

²⁷ Maa tyin iin ra tsa nañí Bernabé, quihñ ra tsi ra. Tan

tsaha_h cuenda ra tsi ra tsi ra tava_h tyiñu ra Jesús. Tan nacaty_i tuhun ra tsihin ra naha nácaa nyehe_h ra Saulo tsi Jutu Mañi yo ra Cristo ityi ñuu Damasco; tan nacaty_i tuhun ra nácaa caha_n Jutu Mañi yo tsihin ra. Tan nácaa caha_n ra tuhun ra Cristo tsihin tsa ña yuuhví ra nda ñuu Damasco.

²⁸ Tacan tan ndoo_o ra Saulo ñuu Jerusalén tsihin nyivi_i tsa yihí cuenda ra Cristo.

²⁹ Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra.

³⁰ Maa tyin tsito_o ra hermano can naha ra tyin tacan tsicá iñi ra can naha ra. Yacan cuenda tsindaca_h ra hermano naha ra tsi ra Saulo nda ñuu Cesarea. Tacan tan jacuhun_n ra naha tsi ra nda Tarso, ñuu ra.

³¹ Tacan tan nyivi_i yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, sii xaan cuñí ñi tyin ña cuxaán ca nyivi_i tsi ñi. Tan ndunye_e ca iñi ñi tsihin tunyee iñi tsi Nyoo tyin tyaá yahvi vaha ñi cuhva caha_n ra, tyin yuuhví ñi coto ña cua javaha ñi cuhva cuñí ra. Iyó ñi tsihin tsa jatyinyeé Tatyí Ii Nyoo tsi ñi. Tan nducuahá ca ñi tan iin tan iin quivi_i.

Nu nduvaha_h ra Eneas

³² Tacan cuvi_i tan ra Pedro tuhvá ra cuahán cua nyehe nácaa yucú ra hermano naha ra tan iin tan iin ñuu. Tan

tsaha_n tucu ra tsinyehe_h ra nu iyó nyivi_i yihí cuenda ra Jesu-cristo ñuu Lida.

³³ Ican nañihí ra tsi iin ra cuuhví, nañi ra Eneas. Tan tsa una cuiya canyí_i ra tan ña cuvi maa nacandá ra tyin naxii_i cuñu ñuhu ra.

³⁴ Tan ra Pedro catyí ra tsihin ra:

—Yooho Eneas, ra Jesu-cristo janduvaha_h ra tsi un. Nduvita tan natuvi yuvi un —catyí ra tsihin ra.

Tan juvin ñi cuhva can tan nduvita_h ra Eneas.

³⁵ Tan nyehe_h tandihí nyivi_i ñuu Lida can tyin tsa nduvaha_h ra. Tan nyehe_h tucu nyivi_i ñuu Sarón. Tacan tan ñi can, natsinu_u iñi ñi tsi Jutu Mañi yo. Tan naco_o ñi tuhun tsahnu tsa tsinu_u iñi ñi nda ndi cumañi ca coto ñi tuhun ra Cristo.

Nu nandoto_o ña Dorcas

³⁶ Quivi_i can tsico_o iin ñaha tsinú iñi tsi ra Cristo ñuu Jope. Tan nañí ña Tabita, tan tsihin yuhu griego, nañí ña Dorcas. Tan tuhvá ña javahá tsa vaha tsihin nyivi_i, jatyinyeé ña tsi nyivi_i ndaahvi.

³⁷ Tan quivi_i can ña Dorcas quihin_n cuehe tsi ña tan tsihi_i ña. Tan tsa yaha_h jacuty_i ñi tsi ña, tsicaqu_n ñi tsi ña tsitsi cuarto nu tsinu uvi pisu.

³⁸ Yatyin ñi canyí_i ñuu Jope tsihin ñuu Lida, nu nyí_i ra Pedro. Tan nyivi_i tsa yihí cuenda ra Cristo ñuu Jope can tsito_o ñi tyin nyí_i ra Pedro ñuu Lida. Tacan tan jacuhun_n ñi tsi uvi taahan ra na cucana ra naha tsi ra Pedro tyin na cuhun ra

ñuu Jope tsa numi ñi. Tan tsaá ra naha nu nyíí ra tan catyí ra naha tsihin ra:

—Janumi ñi tan cuhun un tsihin ndi nda ñuu Jope —catyí ra naha tsihin ra.

³⁹ Tacan tan ra Pedro nduvitá ra tan cuahán ra tsihin ra naha. Tan cuhva tsa tsaá ra naha, tsindacá ra naha tsi ra nda cuarto nu canyíí ndiyí can. Tan tandihí maa ñiñaha tsa tsihí yíi natuhvá ñi tsata ra, tan tsacú tsaá ñi. Tan janahá ñi jahma tsa quicu ña Dorcas tsa tsicoo ña.

⁴⁰ Tacan tan ra Pedro tava ra tsi tandihí nyívi cuarto can. Tan tsicuiñi tsiti ra tan quitsahá tsicán tahvi ra tsi Nyoo. Tacan tan nanyehe ra tsi ñaha tsa tsihí can canyíí ña. Tan quitsahá catyí ra tsihin ña:

—Hermana Tabita, nduvita —catyí ra tsihin ña.

Tacan tan nanyehe ña. Tan tsa nyehe ña tsi ra Pedro, tsinyaa ña.

⁴¹ Tacan tan ra Pedro tñin ra ndaha ña tan janduvitá ra tsi ña. Tacan tan caná ra tsi ra hermano naha ra, tan tsihin ñiñaha tsa tsihí yíi. Tan nacuhvá cuenda ra tsi ña tsi ñi tyin tsa nandoto ña.

⁴² Yahá can tan tandihí maa nyívi ñuu Jope tsito ñi tyin nandoto ña can. Tan cuaha xaan ñi natsinu iñi tsi Jutu Mañi yo.

⁴³ Tan ra Pedro ndoo ra juhva quívi ñuu can, nyíí ra yuvehe iin ra tsa janduvitá ñi quiti, nañi ra Simón.

¹ Ñuu Cesarea iyó iin ra tsa nañi Cornelio. Tan cuví ra ra yihí ndaha iin cientu andaru. Tan tsa tandihí andaru tsa yihí ndaha ra can nañi tsi Italiano.

² Tan ra Cornelio can yuuhví ra tsi Nyoo. Maa ra tan tsihin tandihí nyívi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyívi ndaahvi ñuu Israel, tan tandihí quívi tsicán tahvi ra tsi Nyoo.

³ Tan iin quívi cuhva caa uñi tsa tseñi, nyehe ra iin tsa nyehe ra. Tan ican cuví nu catsi xaan nyehe ra iin ángel tsa jacuhun Nyoo nu nyíí ra, tan catyí tsi tsihin ra:

—¡Yooho Cornelio! —catyí ángel can tsihin ra.

⁴ Tacan tan nanyehe ra Cornelio tsi ángel can. Tan nayuhví xaan ra. Tan quitsahá tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsahá caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán iñi ra tyin jatyinyee xaan un tsi nyívi ndaahvi.

⁵ Tan vityin cuñi tsi tsa tava tyiñu un na cuquihin tyiñu tsi iin ra tsa nañi Simón Pedro nda ñuu Jope.

⁶ Ra ican cua cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvitá ñi quiti. Tan iyó vehe ra yuhu ndutya ñuhu —catyí ángel can

10

Ra Pedro tsihin ra Cornelio

tsihin ra Cornelio, tan cuahán ángel can.

7 Tsa yaha cuahán ángel can, ra Cornelio cana ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo.

8 Tandihí maa tsa cahan ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Jope.

9 Tuví inga quiví tan cuahán ra can naha ra. Tan tsa ndi cumañi ca tsa ra naha ñuu Jope, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can.

10 Tan tsaá soco tsi ra tan tsisocó xaan ra. Maa tyin tsitsi tsa tsinú tsa catsi ra, quitsaha nyehé ra iin tsa janahá Nyoo tsi ra.

11 Tan nyehe ra tyin ticohó andivi. Tan nyehe ra andivi tyin vatsí nuú iin jahma cahnu xaan ityi nu ñuhu. Tan tandihí tsa cumí tutun tsi nuuhñi nuuhñi ñi.

12 Tan tsitsi jahma can yihí tandihí maa nuu quití tsa cumi taahan tsaha, tan tandihí nuu coo, tan saa.

13 Tacan tan tsiñi ra iin ndusu tsa caahán tsihin ra:

—Pedro, nduvita tan cahñi quití ihya, tan çatsi un —catyí ndusu can tsihin ra.

14 Maa tyin ra Pedro nacaahan ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi

quití tsa catyí ley tyin ña vaha catsi ndi —catyí ra Pedro.

15 Tacan tan quitsaha caahán nyico ndusu can tsihin ra inga tsaha:

—Ña catyi un tyin ña catsi un tsa tsa janduvaha yu —catyí ndusu can tsihin ra.

16 Uñi taahan tsaha nyehe ra yacan jahá Nyoo. Tacan tan jahma cahnu can nandaa nyico can ityi andivi.

17 Tan tsitsi tsa tsicá iñi ra Pedro náa cuñi tsi catyi tsa nyehe ra can, tsaá musu tsa jacuhun ra Cornelio naha ra. Tan tsicá tuhun ra naha nu-maa tahan iyó vehe ra nañi Simón.

18 Tan tsa tsaá ra naha ityi yuvehe tsicá tuhun ra naha tatun ican iyó iin ra tsa nañi Simón Pedro.

19 Tan ra Pedro tsicá xaan iñi ra náa cuñi tsi catyi tsa nyehe ra. Tacan tan Tatyí Ii Nyoo quitsaha caahán tsihin ra, tan catyí tsi:

—Nyehe Pedro, uñi taahan ra vatsí nanducú tsi un.

20 Nduvita tan çuhun cun tsihin ra naha, tan ña çaca iñi un tyin maa yu jaquitsí tsi ra ihya naha ra —catyí Tatyí Ii Nyoo tsihin ra Pedro.

21 Tacan tan ra Pedro nuu ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

22 Tacan tan nacaahan musu ra Cornelio tan catyí ra naha:

—Ra Cornelio, ra yihí ndaha tsi ndi, ra ican jaquitsí tsi ndi. Vaha xaan nyivi cuví

ra. Tan tyaá yahvi xaan ra tsi Nyoo. Tan tandihí maa ra ñuu Israel tsa iyó ityi Judea ihya cuñí ra naha tsi ra tsa cuenda tsa vaha nyívi cuví ra. Tan iin ángel Nyoo cahan tsihin ra tyin na cana ra tsi un, tyin cuhun un yuvehe ra tyin tacan tan tyaa soho ra tuhun tsa cua cahan un tsihin ra —catyí musu ra Cornelio tsihin ra Pedro.

²³ Tacan tan tsaḥa ra Pedro quihví ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quívi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

²⁴ Tsa inga quívi tsaḥa ra naha nda ñuu Cesarea nu ndatú ra Cornelio tsi ra naha tsihin tandihí nyívi ra, tan tsihin tandihí ra vaha iñi tsi ra.

²⁵ Cuhva tsa tsaḥa ra Pedro yuvehe ra Cornelio, quitá ra Cornelio tan caahán ra tsihin ra. Tan tsicuiñí tsiti ra nuu ra Pedro tan quitsaḥa jacahnú ra tsi ra.

²⁶ Maa tyin ra Pedro cañihí ra tsi ra, tan catyí ra tsihin ra:

—Ndúvita tyin tahan ñi cuví yoocho cuví tucu yuhu; ñavin Nyoo cuví yu —catyí ra tsihin ra.

²⁷ Tan tsitsi tsa caahán ra Pedro tsihin ra, tan quihví ra tsitsi vehe tan nanyehé ra tyin cuaha xaan nyívi ndu iin tsitsi vehe can.

²⁸ Tacan tan catyí ra Pedro tsihin ñi:

—Nyoocho tsitó ndo tyin ley nyuhu tsa cuví ndi nyívi Israel, catyí tsi tyin ña taahán tsi tsa ndu iin ndi tsihin nyívi

tsa ñavin nyívi Israel cuví. Tan ndi tsitsi vehe ñi ña cuví quihví ndi. Maa tyin Nyoo janaha ra tsi yu, tan catyí ra: “Yoocho, ña catyí un tsihin nyívi tyin ndi intuhun ñi tan ña vaha ñi” catyí Nyoo tsihin yu.

²⁹ Yacan cuenda quívi tsa cana ndo tsi yu, numi ñi vatsí yu. Tan vityin cuñí yu coto yu nacuenda cana ndo tsi yu —catyí ra Pedro.

³⁰ Tacan tan nacahan ra Cornelio, tan catyí ra:

—Tsa iyó cumi quívi vityin, tumaa cuhva ihya tsa nyaá yu yuvehe tan ña tsatsí yu tan tsicán tahvi yu tsi Nyoo tsa tseñi. Tan quituvi iin rayí nuu yu. Nditsí ra jahma xiñu.

³¹ Tan catyí ra tsihin yu: “Yoocho Cornelio, Nyoo tsiñí ra tsa tsicán tahvi un tsi ra. Tan nducuhun iñi ra tsa javahá un tyin jatyinyeé xaan un tsi nyívi ndaahvi.

³² Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyí ra yuvehe ra tsa nañí Simón, iin ra tsa janduvitá ñi quiti. Tan vehe ra can nyaá tsi yatyin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyí ángel can tsihin yu.

³³ Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsí un. Tan vityin tandihí yo ndu iin yo nuu Nyoo. Tan cuñí ndi tyaa soho ndi tandihí tsa catyí Jutu Mañi yo tsihin un tyin cuhva cuenda un tsi

ndi —catyí ra Cornelio tsihin ra Pedro.

Nu caahán ra Pedro tuhun ra Cristo yuvehe ra Cornelio

34 Tacan tan quitsaha caahán ra Pedro tan catyí ra:

—Vityin cutuñí iñi yu tyin Nyoo cuñí ra tsi tandihí nyívi, tahañ ñi nyívi Israel, tan nyívi tsa ñavin nyívi Israel cuví. Ña tavá tsiyo ra tsi ndi intuhun maa yo.

35 Tyin naquihín ra tsi yo tatun tyaá yahvi yo tsi ra, tan javahá yo tsa vaha.

36 Nyoo cahan ra tsihin nyuhu tsa cuví ndi tata ra Israel, tan jacoto ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihí maa yo.

37 Nyooho tsitó vaha ndo tandihí tsa cuví ñuu nyívi Israel ñuu yu, nácaa quitsaha tsi nu cuví Galilea tsa yaha tsa cahan ra Juan tuhun Nyoo tsihin nyívi, tan jacoondutya ra tsi ñi.

38 Tsitó ndo nácaa tsa Nyoo tunyee iñi Tatyí Ii ra tsi ra Jesús, ra ñuu Nazaret. Tan tsica ra javaha ra tsa vaha, janduvaha ra tsi tandihí nyívi tsa nyehé tundoho jahá nu ña vaha. Tyehen javaha ra Jesús tyin Nyoo nyaá ra tsihin ra.

39 Nyuhu cuví ndi tsandaa tsa cuenda tandihí tsa javaha ra Jesús ñuu Jerusalén tsihin tandihí ca ñuu tsa cayucú Judea. Yaha can tan ticaa ra naha tsi ra nu cruu tan tsahñi ra naha tsi ra.

40 Maa tyin tsa tsinu uñi quívi janandoto Nyoo tsi ra. Tan quituví ra nuu ndi.

41 Ña quituví ra nuu tandihí nyívi. Maa tyin quituví ra nuu nyuhu tyin nacatsí ra tsi ndi nda tsanaha tyin cuví ndi tsandaa cuenda ra. Nyuhu tsatsí ndi tan tsihi ndi tsihin ra tsa yaha tsa nandoto ra.

42 Tan tava tyiñu ra tsi ndi tyin cahan ndi tuhun ra tsihin nyívi. Tan cuví ndi tsandaa tyin Nyoo tava tyiñu ra tsi ra Jesús tyin cuví ra juez tsi nyívi tsa nyito tan nyívi tsa tsihi.

43 Tan tacan tucu nda tsanaha, cahan tandihí ra cuví ndusu yuhu Nyoo tuhun ra Jesús. Tan catyí ra naha tyin tandihí nyívi tsa tsinú iñi tsi ra Jesús, cua jaha Nyoo tucahnu iñi cuatyí ñi tsa cuenda maa ra.

Nu naquihín nyívi Tatyí Ii Nyoo tan ñavin nyívi Israel cuví ñi

44 Ndi caahán ca ra Pedro tan nuu Tatyí Ii Nyoo siquí tandihí ñi tsa tyaá soho tsa caahán ra.

45 Tan ra Israel tsa yihí cuenda ra Jesús tsa tsaá tsihin ra Pedro iyo xaan cuñí ra naha tyin tsaha ndihí tucu Nyoo Tatyí Ii ra tsi nyívi tsa ñavin nyívi Israel cuví.

46 Tyin tsiñí ra naha caahán ñi inga yuhu tan jacahnú ñi tsi Nyoo.

47 Tacan tan quitsaha caahán ra Pedro tsihin ra tsa tsaá tsihin ra:

—Ña cuví casi yo nu coondutya nyívi ihya. Tyin tsa

naquihin ñi Tatyí li Nyoo tu-maa tsa naquihin tucu maa yo —catyí ra tsihin ra naha.

48 Tacan tan tava tyiñu ra Pedro tsi ñi tsa ndi ñihí Tatyí li Nyoo na coondutya ñi tsihin sivi ra Jesucristo. Tacan tan caahán ndaahvi ñi tsihin ra Pedro na ndoo ra taahan quivi tsihin ñi.

11

Nu nacatyí tuhun ra Pedro tsihin ra yihí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu

1 Ra tava tyiñu ra Jesús tan inga ra yihí cuenda ra Jesús tsa iyó Judea, ñihí tuhun ra naha tyin nda cuanda nyivi tsa ñavin nyivi Israel cuví tan naquihín ñi tuhun Nyoo.

2 Tacan tan tsaá nyico ra Pedro ñuu Jerusalén. Tan ra tsa catyí tyin tsiñi ñuhu tsa cunyaa tuñi Nyoo tsi tandihi rayi, xaan xaan cuñi ra naha nyehé ra naha tsi ra Pedro.

3 Tan catyí ra naha tsihin ra:

—¿Nacuenda tsahan un yu-vehe nyivi tsa ñavin nyivi Israel cuví tan tsatsi un tsihin ñi? —catyí ra naha.

4 Tacan tan ra Pedro nacatyí tuhun ra nda nu quitsahá tandihi tsa cuví tsi ra, tan catyí ra:

5 —Yuhu nyí yu ñuu Jope. Tan tsa tsicán tahvi yu tsi Nyoo tan nyehe yu iin tsa janahá Nyoo tsi yu tyin iin jahma cahnu quee ityi andivi. Tan tandihi tsa cumi tutun tsi nuuhñi nuuhñi ñi tan vatsí

nuú tsi ityi nu ñuhu nu nyí yu.

6 Tan nyehe vaha yu tsa yihí tsitsi jahma can. Tan nyehe yu quiti tsa cumi tsaha, quiti cuuhu, coo, tan saa.

7 Tan tsiñi yu iin ndusu tsa caahán tsihin yu: “Ndúvita Pedro. Cahñi quiti ihya tan çatsi un” catyí ndusu can tsihin yu.

8 Tan nacahan yu tan catyí yu tyehen: “Jutu Mañi yu, ña catsi yu, tyin ña tuhvá yu catsi quiti tsa catyí ley tyin ña vaha catsi ndi.”

9 Tacan tan ndusu can nacahan tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yahá janduvahá yu” catyí ndusu can tsihin yu.

10 Uñi tsaha cuví yacan. Yahá can tan nandaá nyico tandihi quiti can tsihin jahma can ityi andivi.

11 Tan juvin ñi cuhva can tsaá uñi taahan ra naha yu-vehe nu nyí yu, quee ra naha ñuu Cesarea tan nanducú ra naha tsi yu.

12 Tan Tatyí li Nyoo cahan tsihin yu na cuhun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihi iñu taahan ra yañi yo ihya naha ra tsihin yu. Tan tsa tsaá ndi nda ñuu Cesarea, quihvi ndi tsitsi vehe iin ra tsa nañi Cornelio.

13 Tan nacatyí tuhun ra can tsihin ndi nácaa nyehe ra tsi iin ángel tsitsi vehe ra. Nyaá nyityi ángel can tan catyí ra

tsihin ra tyin na jacuhun ra musu ra ñuu Jope na cucana ra naha tsi yu.

14 Tyin yuhu cua cuhva cuenda yu tsi ra nácaa cuvi cacu ra tsihin tandihi nyivi ra, catyí ángel can tsihin ra, catyí ra tsihin ndi.

15 Tan javahá ra can tumaa cuhva catyí ángel can tsihin ra. Tan tsa tsaá yu yuvehe ra quitsahá caahán yu tsihin nyivi tsa ndu iin yuvehe ra. Tan quitsi Tatyí Ii Nyoo siqui ñi tumaa tsa nuu tsi siqui yo tsa jihna ñi.

16 Tacan tan nducuhun iñi yu tsa catyí Jutu Mañi yo quivi can. Tan catyí ra tye-hen: “Nditza tyin ra Juan jacoodutya ra tsi nyivi tsihin ndutya. Maa tyin nyooho cua coodutya ndo tsihin Tatyí Ii Nyoo”, catyí ra.

17 Nyoo tsahá ndihi tucu ra Tatyí Ii ra tsi ñi can tumaa tsa tsahá ra Tatyí Ii ra tsi yo quivi tsa natsinu iñi yo tsi Jutu Mañi yo Jesucristo. Tan tsa tacan çyóo ra cuví yuhu tan casi yu tsa javahá Nyoo? —catyí ra Pedro tsihin ra hermano can naha ra.

18 Tacan tan tsa tsiñi ra ñuu Jerusalén tuhun can, ña cahán ca ra naha. Tan jacahnú ra naha tsi Nyoo, tan catyí ra naha:

—Tun tacan cuvi, cuñí tsi catyí tyin Nyoo tsahá ndihi tucu ra ndatu tsi nyivi tsa ñavin nyivi Israel cuví tyin na ndu uvi iñi ñi cuatyí ñi, tan coo ñi ñayivi nyito tsa ña cua naa maa —catyí ra naha.

Nyivi yihí cuenda ra Cristo ñuu Antioquía

19 Quivi tsa tsahñi ra naha tsi ra Esteban, quitsahá nyaá ndaha ra naha tsi inga ca nyivi yihí cuenda ra Cristo. Tan yihí ñi tsinu ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyí mahñu ndutya ñuhu. Tan yihí ñi tsaá ñi ñuu Antioquía. Tan tandihi ñi caahán ñi tuhun ra Cristo tsihin nyivi, maa tyin iin ñi maa tsihin nyivi Israel.

20 Tan tsihin ñi tsa cuahán can, yihí nyivi ñuhu Chipre, tan yihí tucu juhva nyivi ñuu Cirene. Tan tsa tsaá ñi ñuu Antioquía, tan quitsahá caahán ñi can tuhun ra Cristo tsihin nyivi tsa ñavin nyivi Israel cuví. Tan jacoto ñi tuhun vaha Jutu Mañi yo ra Jesús.

21 Tan tunyee iñi Jutu Mañi yo iyó tsihin ñi. Tan yacan cuenda cuaha nyivi nacoo ñi tuhun tsahnu. Tan quitsahá tsinú iñi ñi tsi Jutu Mañi yo.

22 Tacan tan tsaá tuhun can nda ñuu Jerusalén. Tan nyivi yihí cuenda ra Cristo jacuhun ñi tsi ra Bernabé na cuhun ra nda ñuu Antioquía.

23 Tan tsa tsaá ra Bernabé Antioquía can, nyehe ra nácaa nasocó Nyoo tsi ñi. Tan sii xaan cuñí ra. Tan catyí ra tsihin ñi na cunyicun ñi tsi Jutu Mañi yo tsihin tsa ñi iñi ñi.

24 Tacan javahá ra Bernabé tyin cuví ra iin ra vaha. Tsitú ra tsihin Tatyí Ii Nyoo, tan tsinú xaan iñi ra tsi Nyoo. Ya-

can cuenda cuaha xaan nyivi quihvi cuenda Jutu Mañi yo.

²⁵ Tsa yaha can tan cuahan ra Bernabé cua nanducu ra tsi ra Saulo nda ñuu Tarso. Tan tsa nañihi ra tsi ra, tsindaca ra tsi ra nda ñuu Antioquía.

²⁶ Tan tsiyucu ra naha tsihin nyivi yihí cuenda ra Cristo ñuu can iin cuiya tan cuaha xaan nyivi jacuaha ra naha tuhun Nyoo. Tan juvin ñi ñuu Antioquía can cuví nu quitsaha catyí nyivi tyin nyivi Cristiano cuví ñi, o ñi yihí cuenda ra Cristo.

²⁷ Tan quivi can tsa taahan ra cuví ndusu yuhu Nyoo. Quee ra naha ñuu Jerusalén tan tsa ra naha ñuu Antioquía.

²⁸ Tan iin ra can nañi ra Agabo tsicunya nyityi ra tyañu nyivi yihí cuenda ra Cristo tan cahan ra tsa tsa Tatyí Ii Nyoo tsi ra. Tan catyí ra tyin cua quitsi iin tama ni cahnu nu ñuhu ñayivi. Tan tacan cuví quivi tsa cuví ra Claudio rey cahnu.

²⁹ Tacan tan nyivi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó ñi intuhun intuhun ñi, tyin cua jatyinyee ñi tsi nyivi yihí cuenda ra Cristo tsa iyó ñuu tsa cayucú Judea.

³⁰ Tacan javaha ñi tan jacuhun ñi juhva xuhun tsi ra tsa cuví ityi nuu tsihin nyivi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindaca ra naha xuhun can.

12

Nu tsihi ra Jacobo tan nu quihvi ra Pedro vehe caa

¹ Tan quivi can quitsaha nyaá ndaha ra cuví rey Herodes tsi juhva nyivi yihí cuenda ra Cristo.

² Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi.

³ Tan nyehe ra Herodes tyin tahan xaan ñi nyivi Israel tsa javaha ra tacan, tan tava tyiñu ra tyin tiñ ndihi ra naha tsi ra Pedro. Tan cuví tsi quivi vico pascua nu tuhvá nyivi tsatsí paan tsa nduve yutsan iya yihí.

⁴ Tsa yaha tsa tiñ ra naha tsi ra Pedro, tyihí ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihvi tucu inga cumi taahan andaru. Tan tyaa ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua.

⁵ Tan tacan nyii ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyii ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa ni ñi.

Nu jacacu Nyoo tsi ra Pedro vehe caa

⁶ Tan tyaa ra Herodes cuhva tyin inga quivi can cua tava ra tsi ra Pedro nuu nyivi. Tan juvin ñi tsacuaa can, tan ra Pedro quixí xaan ra tyañu

uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe.

⁷Tan sana iñi ra tan quituvi iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tiin ra xiin ra Pedro, jandoto ra tsi ra. Tan catyí ra tsihin ra:

—Janumi. Nduvita —catyí ángel can tsihin ra.

Tacan tan ndatsi cadena tsa nuuhñi ndaha ra.

⁸Tan ángel can catyí ra tsihin ra:

—Nacuhñi vaha tsitsi un tan tyihi nditsan un tsaha un —catyí ángel can tsihin ra.

Tacan javaha ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

⁹Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuví can, tan cuñi maa ra tyin iyó iin tsa janaha Nyoo tsi ra.

¹⁰Maa tyin cuahán ra tsata ángel can tan yaha ra naha iin nu jahá cuenda ra andaru. Tacan tan yaha tucu ra naha inga nu jahá cuenda ra naha. Yaha can tacan tan tsaá ra naha yuvehe caa cahnu nu quitá nyivi. Tan yuvehe can nuña maa tsi. Tan quitá ra naha. Tan tsa yaha yaha ra naha iin ityi, tan nacoó ángel can tsi ra.

¹¹Tacan tan nacoto ra Pedro tyin nditsa, tan quitsaha tsicá iñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsi iin ángel tyin jacacu ra tsi yu ndaha ra Herodes tan ndaha ra ñuu Israel naha ra —cuñi ra Pedro.

¹²Tsicá iñi ra yacan ityi cuahán ra, tan tsaá ra yuvehe ña María sihi ra Juan Marcos. Tan cuaha xaan nyivi yucú ican tsicán tahvi ñi tsi Nyoo.

¹³Tan tsa cañi ndaha ra Pedro yuvehe nuquehe, tan quitá iin ñaha tyuvaa tsa nañi Rode, tsinyehe ña yóo cañi ndaha yuvehe can.

¹⁴Maa tyin cuhva tsa tsiñi ña ndusu ra Pedro, si xaan cuñi ña, tan naa iñi ña nuña ña yuvehe can, tyin tsinú ña cuahán ña cua cahan ña tsihin nyivi tsa yucú tsitsi vehe can. Tan catyí ña tyin ra Pedro nyaá ra yuvehe.

¹⁵Tacan tan quitsaha catyí ñi tsihin ña:

—Iñi yooho ña vaha cuñi —catyí ñi tsihin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavin ra Pedro cuví ra, iin ángel cuenda ra cuví, catyí ñi tsihin ña.

¹⁶Tan ra Pedro jañihí ca ra cañi ndaha ra yuvehe. Tan cuhva tsa nuña ñi yuvehe tan nyehe ñi tsi ra, iyo xaan cuñi ñi tan nayuhvi ñi.

¹⁷Maa tyin javaha ra seña tsihin ndaha ra na cutaxin ñi. Tan nacatyí tuhun ra tsihin ñi nácaa tava Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihya tsihin ra Jacobo tan tsihin

inga ra yañi yo naha ra
—catyí ra Pedro.

Tan quitá ra tan cuahán ra.

18 Cuhva tsa cunditsin, iyo
xaan cuñi ra andaru tsa jahá
cuenda tsitsi vehe caa can
naha ra, tyin ña tsitó ra naha
nácaa quitá ra Pedro.

19 Tacan tan tava tyiñu ra
Herodes na cunanducu ra
naha tsi ra, tan ña nañihí ra
naha tsi ra. Tacan tan tava
tyiñu ra tsi ra naha na cahñi
ra naha tsi ra jahá cuenda
vehe caa can naha ra. Yaha
can tan quitá ra Herodes
Judea can tan cuahán ra cua
coo ra ñuu Cesarea.

Nu tsihi ra Herodes

20 Tan ra Herodes cuxaán
xaan ra tsihin nyivi ñuu Tiro
tan nyivi ñuu Sidón. Maa tyin
cuñi ñi tsa coo vaha ñi tsihin
ra tyin ñuu tsa ndacá ñaha ra,
ican queé tsa tsatsí ñi. Tacan
tan ndu iin ñi tan cuahán
ñi cua cutahan ñi tsihin iin
ra tsa nañi Blasto. Ra ican
cahnu tyiñu jahá ra, tyin jahá
cuenda ra tsi ra Herodes. Tan
tsicán ñi tsa na coo vaha ñi
tsihin ra Herodes.

21 Tacan tan catyí ra
Herodes tyin cuhun ñi nu
nyaá ra iin quivi. Tan tsaá
quivi can tan tsicunditsi ra
jahma si caá ra tsa jahá tyiñu
ra. Tan tsicunyaá ra nu tyayu
ra. Tan cahan ra tsihin ñi.

22 Tacan tan quitsaha caná
tsaa ñi, tan catyí ñi:

—Ra tsa caahán ihya ñavin
rayií cuví ra, tyin Nyoo cuví
ra —catyí ñi.

23 Tan juvin ñi cuhva can
tan tijn cuehe tsi ra Herodes
jahá ángel Jutu Mañi yo tyin

tsaha ra tsa catyi nyivi tyin
Nyoo cuví ra. Tan quihvi tin-
dacu tsi ra, tan tsihi ra.

24 Maa tyin tuhun Nyoo
nducuaḥa ca tsi. Tan jañihí ca
nyivi caahán ñi tuhun Nyoo
tandihí ñi ityi.

25 Quivi tsa ndihí tyiñu jahá
ra Bernabé tsihin ra Saulo
nda ñuu Jerusalén, cuanuhu
ra naha ñuu Antioquía. Tan
cuahán ndihí tucu ra Juan
Marcos tsihin ra naha.

13

Nu quitsaha tsi cá ra Saulo tan ra Bernabé tyiñu Nyoo

1 Tsihin nyivi tsa yihí
cuenda ra Cristo ñuu Antio-
quía yihí ra tsa cuví ndusu
yuhu Nyoo. Tan yucú tucu
ra tsa jacuahá tuhun Nyoo
tsi nyivi. Tan ra ican naha
ra cuví ra ihya naha ra: Ra
Bernabé, ra Simón Tuun,
ra Lucio ra ñuu Cirene, ra
Manaén tsa tsahnú iin nducu
ñi tsihin ra Herodes tsa cuví
rey ityi Galilea, tan ra Saulo.

2 Tan iin quivi yucú tandihí
ra naha tan jacahnú ra naha
tsi Jutu Mañi yo. Tan iyó ny-
itya ra naha. Tacan tan cahan
Tatyí Ii Nyoo tsihin ra naha:

—Tava siin ndo tsi ra Bern-
abé tsihin ra Saulo tsa cuenda
tyiñu tsa caná yu tsi ra naha
—catyí Tatyí Ii Nyoo can tsi-
hin ra naha.

3 Tacan tan tsa ndihí tsi-
coo nyitya ra naha, tan tyiso
ndaha ra naha jiñi ra Bern-
abé tsihin ra Saulo, tan tsican
tahvi ra naha tsi Nyoo tsa
cuenda ra naha. Tan cahan
tsihin tahan ra naha, tsahan
cuahán ra naha.

Nu caahán ra tava tyiñu ra Jesús tuhun Nyoo ñuhu Chipre

4 Yaha can tan jacuhun Tatyí li Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihvi ra naha tsitsi iin yutun ndoo tan cuahán ra naha nda ñuhu Chipre tsa canyí mahñu ndutya ñuhu.

5 Tacan tan tsaá ra naha ñuu Salamina tsa canyí yuhu ndutya ñuhu. Tan quitsaha caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyyee ra tsi ra naha.

6 Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuando tsa tsaá ra naha ñuu tsa nañí Pafos. Tan ican nañihí ra naha tsi iin ra ñuu Israel tsa nañí Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra.

7 Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan cana ra tsi ra Bernabé tsihin ra Saulo, tyin cuñí ra tyaa soho ra tuhun Nyoo tsa caahán ra can naha ra.

8 Tan ra tasi can nañí tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo.

9 Tacan tan ra Saulo tsa nañí tucu Pablo, tsitú ra tsihin Tatyí li Nyoo. Tan ñihi xaan nanyehé ra tsi ra Elimas can.

10 Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñí un jativi un tandihí tsa vaha. Tan tacan ñi tyasí un ityi vaha Jutu Mañi yo.

11 Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuví nyehe un ñuhu ñicanyii juhva quivi —catyí ra Pablo tsihin ra Elimas.

Tacan tan juvin ñi cuhva can cuaa ra. Tan ndoo ra nu naa. Tan nducu ra iin ra tin ndaha ra tyin ña nditsin nyehé ra.

12 Tsa nyehe ra cumí tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñí ra nyehé ra tsa javahá Jutu Mañi yo.

Nu cuahán ra Pablo tan ra Bernabé nda ñuu Antioquia tsa canyí Pisidia

13 Ra Pablo tan ra vaha iñi tsi ra quihvi ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyí Panfilia. Maa tyin ra Juan Marcos naco ihñi ra tsi ra naha tan cuanuhu ra nda ñuu Jerusalén.

14 Yaha can tan quee ra naha Perge can, tan cuahán ra naha ñuu Antioquia tsa canyí Pisidia. Ican quihvi ra naha tsitsi vehe ñuhu nyivi Israel tan cuví tsi iin quivi quitatú ñi. Tan tsinyecu ra naha.

15 Tacan tan quitsaha cahvi nyivi nu libru ley Nyoo tsa tyaa ra Moisés. Tan cahvi tucu ñi libru tsa tyaa ra cuví ndusu yuhu Nyoo tahañ

tsanaha. Yahā can tan ra cuví ityi nu vehe ñuhu naha ra catyí ra naha tsihin ra hermano tsa nyecú ican, tyin tatun cuñí ra naha cahan ra naha tsihin nyívi, cuví cahan ra naha.

¹⁶ Tacan tan nduvitā ra Pablo tan javahā ra iin seña tsihin ndaha ra tyin na cutaxin ñi. Tan catyí ra:

—Tyāa soho nyooho, ra ñuu Israel, tan nyooho nyívi tsa tyaá yahvi tsi Nyoo.

¹⁷ Nyoo cuenda yo, tsa cuví yo nyívi Israel, nacatsi vaha ra tsi tsii tsaahnu yo. Tan quívi tsa iyó ca ra naha Egipto, javahā ra iin ñuu cahnu tsi ra naha. Vasu ñavin nyívi ñuu can cuví ra naha, maa tyin janducuahā ra tsi ra naha. Yahā can tan tava ra tsi ra naha ityi can tsihin tunyee iñi tsa iyó tsi ra.

¹⁸ Tan cunyeē iñi Nyoo tandihí cuhva tsicoo ra naha nu tsicā nuu ra naha nu tsiqui tsitsi tsa uvi xico cuiya.

¹⁹ Tan janaā ra utsa taa-han ñuu nahnu tsa cayucú ñi cahnu Canaán, tyin tsahā ra ñuhu can tsi tsii tsaahnu yo.

²⁰ Yahā can tan quitsahā ndacá ñaha juez tsi nyívi can jahā Nyoo. Tumaa cumi cientu sasava cuiya tsindacā ñaha juez tsi ñi, nda cuanda quívi tsindacā ñaha ra Samuel ra cuví ndusu yuhu Nyoo tsi ñi.

²¹ Tacan tan maa ñi tsican ñi iin rey tsa cundaca ñaha tsi ñi. Tan Nyoo tsahā ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín.

Tan uvi xico cuiya tsindacā ñaha ra tsi ñi.

²² Yahā can tan Nyoo tava ra tsi ra Saúl tsa cuví ra rey. Tan tsahā ra tyiñu can tsi ra David. Tan catyí ra: “Nyehé yu tyin ra David, sehe ra Isaí, cuví ra iin rayí tsa taahán iñi yu cuhva iyó. Tan cua javaha ra tandihí tsa cuñí yu” catyí Nyoo tuhun ra David.

²³ Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsi tsi ra tyin jacacu ra tsi yo tsa cuví yo nyívi Israel, tumaa catyí ra tsihin tsii tsaahnu yo tahañ tsanaha.

²⁴ Tan ndi cumañi ca quitsi ra Jesús, ra Juan, ra jacon-dutyā tsi nyívi, cahan ra tsihin tandihí nyívi Israel. Tan catyí ra tsihin ñi tyin cuñí tsi tsa ndu uvi iñi ñi cuatyí ñi, tan coondutyā ñi.

²⁵ Tan tsa cua ndihí tyiñu jahá ra Juan tan catyí ra: “¿A cuñí maa ndo tyin yuhu cuví ra cahnu xaan tsa ndatú ndo? Ñavin yuhu cuví ra cahnu can. Tyin tsata tsa yaha yuhu tan vatsí inga ra. Tan ndi nditsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví ra”, catyí ra Juan.

²⁶ Tan caahán ca ra Pablo tan catyí ra:

—Yañi, nyooho nyívi tata ra Abraham tan tandihí inga ndo tsa tyaá yahvi tsi Nyoo. Tsa cuenda nyooho cuví tuhun ihya tyin jacuahá Nyoo tsi yo nácaa cacu yo.

²⁷ Nyívi ñuu Jerusalén tan ra cuví ityi nuu tsihin ñi ña tsitó

ñi tyin ra Jesús jacacú ra tsi yo. Tan ndi ña cutuñi ñi ñi tuhun tsa tyaa ra cuví ndusu yuhu Nyoo tahañ tsanaha, vasu jacuahá xaan ñi tuhun can tandihí quivi tsa quitatu ñi, maa tyin ña cutuñi ñi ñi. Tan quivi tsahñi ñi tsi ra Jesús cuví tsi tumaa cuhva catyí ra cuví ndusu yuhu Nyoo.

²⁸ Tyin vasu nduve cuatyí ra Jesús nañihí ñi, maa tyin tsican ñi tsi ra Pilato na tyihí ra tyiñu tyin cahñi ra naha tsi ra Jesús.

²⁹ Tan tsa yaha janyehé ñi tundoho tsi ra tumaa catyí maa tuhun ra nu libru, tan tsihí ra. Tacan tan januu ñi tsi ra nu cruu. Tan tsicutsí ñi tsi ra.

³⁰ Maa tyin Nyoo janandoto ra tsi ra inga tsaha.

³¹ Tan tsitsi tsa cuaha quivi tan quituví ra nuu ra tsa cuahán tsihin ra quivi quita ra ityi Galilea, tan tsaá ra Jerusalén. Tan ra ican naha ra cuví ra tsa caahán tuhun ra tsihin nyivi vityin.

³² Tan yacan cuenda nyuhu caahán ndi tuhun vaha tsa catyí Nyoo tsihin tsii tsaahnu yo tyin cuhva ra tsi yo.

³³ Tyin tsa cuenda tsa vaha tsi maa yo tsa cuví yo nyivi tata ñi, javahá maa Nyoo tsa catyí ra. Tyin janandoto ra tsi ra Jesús tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayivi coo un vityin” catyí Nyoo tsihin ra.

³⁴ Nyoo tyaa ra cuhva tyin janandoto ra tsi ra, tyin tacan

tan ña cua tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahan yu tsihin ra David tyin cua cuhva yu tsi ndo.”

³⁵ Yacan cuenda catyí tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyí tsi.

³⁶ Ra David jahá tyiñu ra tsa cuenda nyivi tsa tsicoo quivi tsicoo ra, tandihí tsa catyí Nyoo tsihin ra tyin javaha ra, javahá ra. Yaha can tan tsihí ra tan tsicutsí ñi tsi ra tumaa tsicutsí ñi tsi jutu ra. Tan tyahyu cuñu ñuhu ra.

³⁷ Maa tyin ra tsa janandoto Nyoo, ña tyahyu cuñu ñuhu ra.

³⁸ Yañi, cuñi tsi tsa coto ndo tyin tsa cuenda cuatyí yo tan quitsí ra Jesús tan tsihí ra tyin jahá ra tucahnu ñi cuatyí yo.

³⁹ Tan tsa cuenda ra Jesús jahá Nyoo tucahnu ñi tsi tandihí ñi tsa tsinú ñi tsi ra, tyin ley Nyoo tsa tyaa ra Moisés ña cuví janduvaha tsi tsi yo nuu Nyoo.

⁴⁰ Jaha ndo cuenda coto ndoo tsa tyaa ra cuví ndusu yuhu Nyoo siqui ndo. Tyin catyí ra naha tyehen:

⁴¹ Nyehe nyooho, ra tsa tsacú nducu, taahán tsi tsa nayuhvi ndo tan taahán tsi cunaa ndo.

Tyin yuhu cuví Nyoo, tan javahá yu iin tsa cahnu quivi tsa iyó ndo vityin.

Maa tyin ña cua tsinu ñi ndo tandihí tsa javahá yuhu vasu nacatyí

tuhun nyiví tsihin ndo,
catyí Nyoo.

⁴² Ndihi cahān ra Pablo tan quitā ra tsata vehe ñuhu can tsihin ra vaha iñi tsi ra. Tacan tan nyiví tsa ñavin nyiví Israel cuví quitsahā catyí ñi tsihin ra, tyin na cahan nyico ra tuhun can tsihin ñi inga vitya quiví tsa quitatú ñi.

⁴³ Cuhva tsa ndihí ndu iin ñi, cuaha xaan nyiví Israel tan nyiví tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cahun ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.

⁴⁴ Tsa inga vitya quiví quitatú ñi, ndu iin nyico ñi. Tan tsa yatyin tandihí ña maa nyiví ñuu can ndu iin tsihin ñi tan tyaá soho ñi tuhun Nyoo.

⁴⁵ Maa tyin kuhva tsa nyehe ra Israel naha ra, cuxaan ra naha tyin nyehé ra naha tyin cuaha nyiví nyicún tsi ra hermano can naha ra. Tan quitsahā caahán ra naha tsi ra Pablo, tan cahān ra naha ndavaha ñi siqui ra.

⁴⁶ Maa tyin ra Pablo tan tsihin ra Bernabé ña yuuhví maa ra naha tan quitsahā caahán ñihi ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyooho tsa cuví ndo nyiví Israel. Maa tyin ña cuñí ndo naquihin ndo tsa caahán ndi. Tan nyooho ña cuñí ndo tsa coo ñayiví nyito tsa ña cua naa maa tsi ndo. Yacan cuenda

cua cahun ndi cucahan ndi tsihin nyiví tsa ñavin nyiví Israel cuví.

⁴⁷ Tyin tacan catyí Jutu Mañi yo tsihin ndi tan catyí ra tyehen:

Tyaā yu tsi un tumaa iin ñuhu tsa jandunditsín nu iyó nyiví nani cahnu nu ñuhu ñayiví.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

⁴⁸ Tsa tsiñi ra tsa ñavin ra Israel cuví naha ra, si xaan cuñí ra naha. Tan quitsahā catyí ra naha tyin tuhun Nyoo vaha xaan tsi. Tan natsinu iñi tandihí nyiví tsa nacatsi maa Nyoo, tyin coo ñi ñayiví nyito tsa ña cua naa maa.

⁴⁹ Tacan tan nducuaḥa ca tuhun Nyoo tandihí ityi ñuu can.

⁵⁰ Maa tyin ra Israel cahān ra naha tsihin juhva ñaha cuca tsa nyicún ley Nyoo tsa tyaā ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsahā nyaá ndaha nyiví tsi ra Pablo tan ra Bernabé, nda cuanda tsa tavā ñi tsi ra naha ñuu can.

⁵¹ Tacan tan naquisi ra naha nyaca tsaha ra naha tumaa iin seña tyin ndoo cuatyí nyiví can siqui maa ñi. Tan cuahán ra naha ñuu Iconio.

⁵² Maa tyin ñi yihí cuenda ra Cristo ñuu Antioquía can si xaan cuñí ñi. Tan tsitú ñi tsihin Tatyí li Nyoo.

14

Nu nyíí ra Pablo tan ra Bernabé ñuu Iconio

¹ Ra Pablo tan ra Bernabé yucú ra naha ñuu Iconio. Tan quihv̄i ra naha tsitsi vehe ñuhu nyiv̄i Israel. Tan vaha xaan cahan ra naha tuhun Nyoo tsihin nyiv̄i can. Tan cuaha xaan ñi natsinū iñi ñi tsi ra Cristo, nyiv̄i Israel tan nyiv̄i tsa ñavin nyiv̄i Israel cuv̄i.

² Maa tyin ra Israel tsa ña tsinú iñi tsi ra Cristo natyuhū ra naha tsi nyiv̄i tsa ñavin nyiv̄i Israel cuv̄i tyin na caca ña vaha iñi ñi nyehe ñi tsi ra yih̄i cuenda ra Cristo.

³ Yacan cuenda ra Pablo tan ra Bernabé ndoo ra naha ican cuaha quiv̄i. Tan tsihin tsa n̄i iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñi ra tsi yo. Tan tsahā Jutu Mañi yo tunyee iñi tsi ra naha tyin javaha ra naha seña tan tsa iyo na coto nyiv̄i tyin nditsa tsa caahán ra naha.

⁴ Maa tyin nyiv̄i ñuu ña iin tsicá iñi ñi, tyin juhva ñi yih̄i cuenda ra Israel naha ra, tan juhva ñi nyicún tsi ra tavā tyiñu ra Jesús.

⁵ Tacan tan ra Israel tan ra tsa ñavin ra Israel cuv̄i, natuhun tahan ra naha tsihin ra cumí tyiñu, tyin cua cahan ra naha ndavaha ñi siqui ra tavā tyiñu ra Jesús, tan cua cañi ra naha yuu tsi ra naha.

⁶ Maa tyin ra Pablo tan ra Bernabé ñih̄i tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Listra, tan nda ñuu Derbe ityi Licaonia. Tan tsicā nuu ra naha ityi ñuu can.

⁷ Tan cahan nyico tucu ra naha tuhun Nyoo nácaa jacacú ra tsi yo.

Nu cañi nyiv̄i yuu tsi ra Pablo nda ñuu Listra

⁸ Nda Listra iyó iin raȳi tsa coxo tyin nda quiv̄i cacū ra tan ña cuv̄i caca ra, tyin pehe nduvi taahan tsaha ra.

⁹ Tan ra pehe tsaha can tyaá soho ra tsa caahán ra Pablo. Tan ra Pablo, tuv̄i iñi ra tyin tsinú iñi ra can tyin cuv̄i nduvaha ra.

¹⁰ Tacan tan ra Pablo caahán ra tsihin tsa ñihi ndusu ra, tan catyí ra:

—Ndūvita tan cūnyaa nyityi un —catyí ra Pablo tsihin ra.

Tan ra ican, intuhun ñi ndavā ra, tan tsinyaa nyityi ra. Tan quitsahā tsicá ra.

¹¹ Tsa nyehé nyiv̄i tyin javahā ra Pablo tacan, quitsahā caná tsa ñi tsihin yuhu Licaonia, tan catyí ñi:

—Ra tsa tsaā nu yucú yo ihya, nyoo cuv̄i ra naha, maa tyin tumaa caá raȳi, caá ra naha —catyí ñi.

¹² Tan catyí ñi tyin ra Bernabé cuv̄i ra nyoo tsa nañi Júpiter, tan ra Pablo cuv̄i nyoo tsa nañi Mercurio, tyin ra ican cuv̄i ra tsa caahán.

¹³ Tan iyó iin ra cuv̄i jutu tsa jahá cuenda vehe ñuhu tsa nyaá yuhu ñuu ñi can nu

jacahnú nyívi tsitoho Júpiter. Tan quítsi ndaca ra indíqui tan ita tyin maa ra tan nyívi cuñí ñi jacahnu ñi tsi ra Pablo tsihin ra Bernabé. Tan cua cahñi ñi indíqui can tyin cua cuhva cuenda ñi tsi ra naha, tyin cuñí ñi tyin nyoo cuví ra naha.

¹⁴ Maa tyin cuhva tsa tuví iñi ra naha tsa tsicá iñi ñi, quítsaha tsaahnyá ra naha jahma ra naha. Tan javaha ra naha tacan tumaa iin seña tyin ña ndoó ra naha vaha. Tan quíhví ra naha tyañu nu tuví nyívi, tan cana tsa ra naha,

¹⁵ Tan catyí ra naha:

—Nyooho tata, ¿nácaa tsa javahá ndo tyehen? Nyuhu juvin ñi rayí ñuu ñayívi ihya cuví ndi. Tumaa cuví nyooho cuví tucu nyuhu. Tan vatsí cahan ndi tsihin ndo tyin na jaña ndo tsa javahá ndo tyehen tyin ña tsiñi ñuhu yacan tsi ndo, tan na cunyicun ndo tsi Nyoo nyito. Juvin ra tsa javaha andívi tan ñuhu ñayívi. Tan javaha ra ndutya ñuhu tan tandíhi maa tsa iyó tsitsi ndutya ñuhu can.

¹⁶ Tan tahañ tsanaha nda cuanda vityín, Nyoo jaña ndaha ra tsi nyívi na javaha maa ñi cuhva cuñí ñi,

¹⁷ vasu tandíhi quívi jacuahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsahá ra tsa coo vaha tsa tatsí yo quívi taahán tsi. Tan tsahá ra tsa catsi yo. Tan tsahá ra tsa cusí cuñí yo —catyí ra naha tsihin nyívi

can.

¹⁸ Maa tyin vasu catyí ra naha tacan, yíi xaan tan tyasi ra naha tsa cahñi ñi indíqui can, tyin cuñí ñi jacahnu ñi tsi ra naha tsihin can.

¹⁹ Tacan tan tsaá juhva ra Israel, ra tsa ña tsinú iñi tsi ra Cristo, ra ñuu Antioquía, tan ra ñuu Iconio. Tan natyuhú ra naha tsi nyívi, na cañi ñi yuu tsi ra Pablo. Tan tacan javaha ñi, tan cuñí maa ñi tyin tsa tsihi ra. Tacan tan ixta caa ñi tsi ra tan tsindaca ñi tsi ra nda yuhu ñuu.

²⁰ Maa tyin ndu iin ra yíhi cuenda ra Cristo nu canyíi ra Pablo. Tan nduvitá nyico ra. Tan quíhví nyico ra inga tsaha tsitsi ñuu can. Tan tsa inga quívi can cuahán ra ñuu tsa nañi Derbe tan cuahán ra Bernabé tsihin ra.

²¹ Tan cahañ tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyívi nacuhva ñi tsi ñi tsi Nyoo. Yaha can tan cuanuhú ra naha ityi quítsi ra naha. Tan yaha nyico ra naha ñuu Listra tan ñuu Iconio inga tsaha, tan tsaá nyico ra naha nda ñuu Antioquía.

²² Tan tandíhi ñuu can jandu iin ra naha iñi nyívi tsa yíhi cuenda ra Cristo. Tan catyí ra naha tsihin ñi na cuhun ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñí yo tsa cundaca ñaha Nyoo tsi yo, cuñí tsi tsa nyehe yo tundoho.

²³ Tan natyiso ra naha tsi ra cua cuví ityi nuu tsihin nyívi

15

t_{sa} y_{ihí} cuenda ra Cristo tan iin tan iin vehe ñuhu. Tan tsi-coo nyitya ra naha tan tsi-can tahvi ra naha tsi Nyoo tsa cuenda ra tsa cua cuvi ityi nuu tsihin nyivi vehe ñuhu can naha ra. Yahā can tan catyí ra Pablo naha ra tsihin ra cuvi ityi nuu vehe ñuhu can naha ra:

—Tsinu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

Nu cuanuhu nyico ra Pablo tan ra Bernabé ñuu Antioquía ityi Siria

²⁴ Yahā can tan yahā ra Pablo tsihin ra Bernabé ñuu tsa cayucú Pisidia, tan tsaā ra naha nda cuanda Panfilia.

²⁵ Cahān ra naha tuhun Nyoo ñuu Perge. Yahā can tan tsahān ra naha ñuu Atalia.

²⁶ Ican quihvi ra naha tsitsi iin yutun ndoo tan cuanuhu ra naha nda ñuu Antioquía. Ican cuvi ñuu nu natyiso ñi tsi ra naha tyin cua javaha ra naha tyiñu Nyoo, tan vityin tsa tsaā nuhu ra naha.

²⁷ Tsa tsaā nyico ra naha ñuu Antioquía jandu iin ra naha tsi nyivi yihí cuenda ra Cristo. Tan nacatyí tuhun ra naha tsihin ñi tandihí tsa javahā Nyoo tsihin ra naha, tan nácaa nuñā Jutu Mañi yo ityi tyin tsinú tucu iñi ñi tsa ñavin nyivi Israel cuvi.

²⁸ Tan naha xaan ndoo ra Pablo tan ra Bernabé tsihin ñi yihí cuenda ra Cristo ñuu can.

Nu jandaa ra tava tyiñu ra Jesús tyiñu nda ñuu Jerusalén

¹ Ndi nyii ca ra Pablo tan ra Bernabé ñuu Antioquía, tan tsaā taahan ra naha quee ra naha nda Judea. Tan quit-sahā jacuahá ra naha tsi ra yihí cuenda ra Cristo. Tan catyí ra naha tyin cuñi tsi tsa cunyaa tuñi Nyoo tsi ra naha, tumaa cuhva catyi ra Moisés, tyin tacan tan cua cacu ra naha.

²⁻³ Tan ñihi xaan cahān yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin cahun ra naha ñuu Jerusalén, cujandaa ra tyiñu can tsihin ra tava tyiñu ra Jesús tan tsihin ra cuvi ityi nuu tsihin nyivi vehe ñuhu ñuu Jerusalén can naha ra. Tacan tan cuahān ra naha. Tan ityi cuahān ra naha, yahā ra naha ityi Fenicia tan Samaria. Tan nacatyí tuhun ra naha tsihin nyivi yihí cuenda ra Cristo nácaa jañá nyivi tsa ñavin nyivi Israel cuvi tuhun tsahnu tsa tsinu iñi ñi, tyin nacuhvá cuenda ñi tsi ñi tsi Nyoo. Tan tandihí ra hermano si xaan cuñi ra naha tsa tsito ra naha yacan.

⁴ Quivi tsaā ra Pablo tan ra Bernabé ñuu Jerusalén, cuahān ra naha nu ndu iin nyivi yihí cuenda ra Cristo. Tan tandihí ñi tan ra cuvi ityi nuu tsihin ñi, tan tsihin ra

tava tyiñu ra Jesús, tsaha ñi yaha ra naha tyin nacatyí tuhun ra naha tsa javaha Nyoo tsihin ra naha.

⁵ Maa tyin juhva ra fariseo tsa tsinú iñi tsi ra Cristo, nduvita ra naha tan catyí ra naha:

—Tandihí ra tsa ñavin ra Israel cuví tan tsinú iñi ra naha tsi ra Jesús, cuñí tsi tsa cunyaa tuñi Nyoo tsi ra naha. Tan cuñí tucu tsi tsa javaha ra naha cuhva catyí ley Nyoo tsa tyaa ra Moisés —catyí ra naha.

⁶ Tacan tan ndu iin ra cuví ityi nuu tsihin ñi yihí cuenda ra Cristo tan ra tava tyiñu ra Jesús tyin natuhun tahan ra naha tuhun can.

⁷ Tsa yaha tsa cahan yuhu xaan ra naha, tan nduvita ra Pedro, tan catyí ra:

—Yañi, tsitó ndo tyin tsitsi tsa tandihí yo, nacatsí Nyoo tsi yuhu ra ndaahví quiví can, tyin cahan yu tuhun ra tsa jacacú tsi yo tsihin nyiví tsa ñavin nyiví Israel cuví, tan na tsinu iñi ñi tsi Jutu Mañi yo.

⁸ Tan Nyoo, ra tsitó añima tandihí nyiví, janaha ra tsi yo tyin cuñí ra tsi ñi ican. Yacan cuenda tsaha ra Tatyí li ra tsi ñi, tumaa tsa naquihin tucu maa yo Tatyí li ra taha tsanaha.

⁹ Nyoo inducu ñi cuñí ra tsi nyiví. Yacan cuenda ña tyaa tsiyo ra tsi ñi ican tan ndi tsi yoo. Janduvahá ra tsi ñi tsa cuenda tsa tsinú iñi ñi tsi ra tumaa maa yo.

¹⁰ Vityin ¿nacuenda ña tsinú iñi ndo tsa javaha Nyoo tsihin ñi can? Tyin ña vaha tsa tyisó yo ley Nyoo tsa tyaa ra Moisés

siqui ñi. Tyin ndi maa tsii tsahnu yo tan ndi maa yo tan ña cuví naquihin vaha yo ley can.

¹¹ Ñavin tacan cacú yo. Yoo tsitó yo tyin cacú yo tsihin tumañi iñi tsa javahá Jutu Mañi yo ra Jesús tsihin yo. Tan tacan tucu ñi can —catyí ra Pedro tsihin tandihí ra can naha ra.

¹² Tacan tan taxin ñi cuví tandihí ra naha. Tan tyaa soho ra naha tsa cahán ra Bernabé tan ra Pablo. Tyin nacatyí tuhun ra naha seña tan tsa iyo tsa javaha Nyoo nu cahan ra naha tuhun ra nu yucú nyiví tsa ñavin nyiví Israel cuví.

¹³ Tsa ndihí cahan ra naha, quitsaha cahán ra Jacobo, tan catyí ra:

—Nyooho yañi, tyaa soho ndo tsa cua cahan yu tsihin ndo.

¹⁴ Tsa catyí tuhun ra Simón Pedro tsihin yo nácaa quitsaha tsahá Nyoo tumañi iñi tsi ñi tsa ñavin nyiví Israel cuví. Tyin nacatsí tucu ra tsi juhva ñi tyin cuví ñi nyiví cuenda ra.

¹⁵ Tan ndu iin tuhun ihya tsihin tuhun tsa cahan ra cuví ndusu yuhu Nyoo taha tsanaha, tumaa cuhva nyaá maa nu tutu Nyoo nu catyí ra:

¹⁶ Yaha tandihí tuhun ihya tan cua quitsi nyico yu nu yucú ndo.

Quiví tsa tsicoo ra David, vaha xaan jacahnú nyiví tsi yu.

Maa tyin yaha can jandihí nyiví tsa jacahnú ñi tsi yu.

Maa tyin cua quitsi nyico
yu inga tsaha tan cua
cañihi yu vehe ñuhu ra
David.

Tyin cua jacahnu nyico nyivi
tsi yu.

17 Tyin tacan tan cuví nan-
ducu tandihi inga ca
nyivi tsi yu,

tandihí ñi tsa ñavin nyivi Is-
rael cuví tan tsinú iñi
tsi yu.

18 Tacan catyi Jutu Mañi
yo, tan jacuahá ra
tuhun ihya tsi nyivi
tsicoo tahan tsanaha
tan tsihin nyivi tsa iyó
vityin.

19 Yacan cuenda catyi yu
tyin ña vaha tsa jatyañu
yo tsi nyivi tsa ñavin nyivi
Israel cuví, ñi tsa nacoo
tuhun tsahnu ñi tan quihvi
ñi cuenda ra Cristo. Ña vaha
catyi yo tyin cuñi tsi tsa tyaa
yahvi ñi ley tsahnu yo.

20 Vaha ñi maa tsihin tsa
jacuhun yo carta tsi ñi. Tan
catyi yo tsihin ñi tyin ña cua
catsi ñi cuñu tsa tsaha cuenda
nyivi tsi tsitoho. Tan ña cuví
coo rayi tsihin ñaha tun ña
tindaha ra. Tan ndi ñiñaha
ña cuví coo ñi tsihin rayi tun
ña tindaha ñi. Rayi tsa iyó
ñasihí ña cuví coo ra tsihin
inga ñaha, tacan tucu ñiñaha
tsa iyó yi, ña cuví coo ñi tsi-
hin inga rayi. Tan catyi tucu
yo tsihin ñi quihvi cuenda ra
Cristo tan ñavin nyivi Israel
cuví ñi tyin ña cua catsi ñi
cuñu quití tsa tsihi tsa cava
ñi jucun tatun ña tsati niñi ti.
Tan ña cua catsi ñi niñi quití.

21 Tyin nda tyembu tsahnu
tan nda cuanda vityin iyó

maa ra jacuahá ley Nyoo tsa
tyaa ra Moisés vehe ñuhu
nyivi Israel. Tan jacuahá
ra naha tuhun can tan iin
tan iin ñuu, tan tahan tahan
una quivi, quivi tsa quitatú
ñi —catyi ra Jacobo tsihin ra
naha.

22 Tacan tan ra tava tyiñu
ra Jesús tan ra cuví ityi nuu
tsihin ñi vehe ñuhu tsihin
tandihí ñi yihí cuenda ra
Cristo, nacatsi ñi tsi taahan
ra naha. Tan yahá can
tan jacuhun ñi tsi ra naha
tyin cuhun ra naha ñuu
Antioquia tsihin ra Pablo
tan ra Bernabé. Tan ra tsa
natiso ñi cuví ra: Judas tsa
nañi Barsabás, tan ra Silas.
Ra ícan cuví iin ra tsa nyisó
tyiñu vehe ñuhu nda ñuu
Jerusalén.

23 Tan tsihin ra naha
jacuhun ñi iin carta. Tan
catyi carta can tyehen:

“Nyuhu ra tava tyiñu ra
Jesús, tan tsihin ra cuví ityi
nuu tsihin ñi vehe ñuhu tan
tsihin ra yañi ndo cuenda ra
Cristo, tandihí ndi tsahá ndi
nacumi tsi nyooho tsa ñavin
ra Israel cuví ndo. Tyin yañi
ndi cuví tsi ndo vasu ñavin
nyivi Israel cuví ndo. Tandihí
nyooho tsa iyó ndo ñuu Antio-
quia, tan nyooho nyivi Siria,
tan tsihin nyooho nyivi Cili-
cia, jaquitsi ndi carta ihya tsi
tandihí ñi ndo.

24 Tsitó ndi tyin quita taa-
han ra ityi nu yucú ndi ihya.
Tan vatsi ra naha nu yucú
ndo. Maa tyin ña catyi nyuhu
tyin quitsi ra naha jatyañu ra
naha tsi ndo. Tan nasamá
ra naha cuhva tsicá iñi ndo

tyin catyí ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaa ra Moisés. Maa tyin ñavin nyuhu cahan tsihin ra naha tyin quitsi cahan ra naha yacan tsihin ndo.

²⁵ Yacan cuenda ndu ijin ndi tan ndoo ndi tuhun cuenda tyiñu can tan tsicá ñni ndi tyin vaha tsa jaquitsi ndi tsi ra hermano ihya naha ra tsihin ra Pablo tan ra Bernabé nu yucú ndo.

²⁶ Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñí nyivi cahñi ñi tsi ra naha, maa tyin ña jandihí ra naha tsa jacotó ra naha tuhun Jutu Mañi yo ra Jesucristo.

²⁷ Yacan cuenda jaquitsi ndi tsi ra Judas tan ra Silas. Tan maa ra naha cua cahan ra naha tsihin yuhu ra naha tsihin ndo, tyin cua cuhva cuenda ra naha tandihí tsa tyaa ndi nu tutu ihya.

²⁸ Tyin ndi Tatyí Ii Nyoo tan ndi nyuhu ña cuñí ndi tyiso ndi tundoho siqui ndo. Maa tyin ñiñi ca cuñí tsi tsa naquihin vaha ndo tuhun ihya:

²⁹ Ña cua catsi ndo cuñu tsa tsaha cuenda nyivi tsi tsi-toho. Tan ña cua catsi ndo niñi quití, ndi cuñu quití tsa tsihi tsa cava ñi jucun tan ña tsatí niñi ti. Ña caca nuu ndo tsihin ñaha. Tan nyooho ñiñaha ña caca nuu ndo tsihin rayii. Tatun na quihin vaha ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyí ra

naha nu carta can.

³⁰ Tan cuahán ra tsa jacuhun ra naha, tan tsaá ra naha ñuu Antioquía. Tan jandu ijin ra naha tsi tandihí nyivi yihí cuenda ra Cristo tan nacuhva cuenda ra naha carta can.

³¹ Tsa cahvi ñi carta can, sii xaan cuñí ñi tyin vaha xaan caahán tsi.

³² Tan ra Judas tsihin ra Silas cuví tucu ra naha ndusu yuhu Nyoo. Tan jandu ijin ra naha ñni nyivi can tsihin tsa cahan ra naha.

³³ Tan tsa yaha tsiyucu ra naha juhva quivi tan cuanuhu nyico ra naha nda nu yucú nyivi tsa jacuhun tsi ra naha. Tan tandihí nyivi yihí cuenda ra Cristo ñuu Antioquía can catyí ñi tyin na cuhun vaha ra naha.

³⁴ Maa tyin ra Silas catyí ra tyin cua ndoo ra.

³⁵ Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihí ca ra naha cahan ra naha tuhun Jutu Mañi yo tsihin nyivi can tan jacuahá ra naha tsi ñi.

Nu tsinu uvi tsaha cuahán ra Pablo tuhun Nyoo, tan nu quitá tsiyo ra nuu ra Bernabé

³⁶ Tan tsa yaha juhva quivi, tan cahan ra Pablo tsihin ra Bernabé:

—Cohon inga tsaha cunyehe yo nu yucú nyivi yihí cuenda Jutu Mañi yo ra Cristo tandihí ñuu nu cahan yo tuhun ra, tyin nyehe yo nácaa yucú ñi —catyí ra Pablo tsihin ra.

37 Tan ra Bernabé cuñi ra tsa cahun nyico ra Juan Marcos tsihin ra naha.

38 Maa tyin ra Pablo ña taahán iñi ra tsa cahun ra Juan tsihin ra naha, tyin nacoq ihñi ra tsi ra naha nda Panfilia quivi tsa tsahan ra tsihin ra naha. Tan ña tsahan ca ra tsijahá tyiñu ra tsihin ra naha.

39 Tan cahan yuhu tahan ra naha, tan ndusiin ra naha. Ra Bernabé cuahán ra tsihin ra Juan Marcos. Tan quihvi ra naha tsitsi iin yutun ndoo tan cuahán ra naha ñuhu Chipre.

40 Tan ra Pablo nacatsi ra tsi ra Silas. Tan tsa yaha tsican tahvi ra hermano naha ra tsi Nyoo tsa cuenda ra naha tyin na jatyinyee Nyoo tsi ra naha, tacan tan cuahán ra naha.

41 Tan yaha ra naha ñuu tsa cayucú Siria tan Cilicia, tan jandu iin ra naha iñi nyivi tsa yihí cuenda ra Cristo tan iin tan iin ñuu.

16

Nu cuahán ra Timoteo tsihin ra Pablo tan ra Silas

1 Ra Pablo tsihin ra Silas tsaá ra naha ñuu Derbe, tan ñuu Listra. Tan ican nañihí ra naha tsi iin ra yihí cuenda ra Cristo. Nañi ra Timoteo. Tan sihi ra cuví ña iin ñaha Israel. Tan yihí ndihi ña cuenda ra Cristo. Maa tyin jutu ra, ra Grecia cuví ra.

2 Tan ra Timoteo vaha xaan tsicá ra tuhun Nyoo, catyí nyivi yihí cuenda ra Cristo ñuu Listra tan ñuu Iconio.

3 Tan ra Pablo cuñi ra tsa cahun ra Timoteo tsihin ra.

Tan tyaa ra naha tuñi Nyoo tsi ra Timoteo jahá ra Pablo. Tyin coto ndasi cuñi nyivi Israel nyehe ñi tsi ra. Tyin tandihí ñi tsitó ñi tyin jutu ra cuví ra ra Grecia.

4 Tacan tan cuahán ra naha tan iin tan iin ñuu. Tan caahán ra naha tsihin nyivi yihí cuenda ra Cristo tsahá cuenda ra naha tuhun tsa tsahá ra tavá tyiñu ra Jesús tan tsihin ra cuví ityi nuu tsihin nyivi vehe ñuhu Jerusalén tsi ra naha.

5 Tacan tan ndu iin iñi nyivi yihí cuenda ra Cristo tan ñihi ca tsinú iñi ñi tsi ra Cristo. Tan iin tan iin quivi tan cuahán nducuahá ca ñi.

Nu janahá Nyoo iin tsa janahá ra tsi ra Pablo cuenda iin ra Macedonia

6 Ña tsahá Tatyí Ii Nyoo tsa cahan ra naha tuhun Nyoo ñuu tsa cayucú Asia. Yacan cuenda yaha sava ra naha ñuhu cuenda Frigia tan Galacia.

7 Tan tsaá ra naha Misia. Tan cuñi ra naha cahun ra naha Bitinia, maa tyin Tatyí Ii ra Jesucristo ña tsahá cahun ra naha.

8 Tacan tan nda sava ñi yaha ra naha ñuu tsa cayucú Misia tan cuahán ra naha ñuu Troas tsa canyíi yuhu ndutya ñuhu.

9 Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin rayi tsa iyó iin ñuu tsa canyíi Macedonia. Nyaá nyityi ra nuu ra tan caahán ndaahvi ra tsihin ra,

tan catyí ra: “Naha ihya, tyin jatyinyee un tsi ndi” catyí ra.

¹⁰ Tan tsa nyehe ra Pablo can, yuhu ra Lucas tsihin ra Pablo tan inga ra janduvaha ndi tsi ndi tan cuahan ndi nda Macedonia can. Tyin tsitó vaha ndi tyin Nyoo cana ra tsi ndi, tyin cahan ndi tuhun ra nácaa jacacú ra tsi yo tsihin nyivi ityi can.

Nu nyiú ra Pablo tsihin ra Silas ñuu Filipos

¹¹ Quihvi ndi iin yutun ndoo ñuu Troas. Tan cuahan ndoo ityi ñi ndi nda Samotracia, iin ñuhu luhlu tsa canyii mahñu ndutya ñuhu. Tan tsa inga quivi tsaá ndi ñuu Neápolis.

¹² Tan ican quee ndi tan cuahan ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahnu ca tsa nuu tandihi ñuu tsa cayucú Macedonia. Tan ican tsiyucú ndi taahan quivi.

¹³ Iin quivi tsa quitatú nyivi, tan quitá ndi ityi tsata ñuu, yatyin iin yutya nu tuhvá nyivi tsicán tahvi tsi Nyoo. Tsinyecu ndi, tacan tan cahan ndi tuhun Nyoo tsihin ñiñaha tsa ndu iin ican.

¹⁴ Iin ñaha nañi ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduuhva. Yacan cuví tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiñi ña tsa caahan ra Pablo. Tan Nyoo nuña ra añima ña na tyaa yahvi ña tsa caahan ra.

¹⁵ Tan tsicoondutya ña tsihin nyivi ña. Tan yaha can tan

cahan ndaahvi ña tsihin ndi, tan catyí ña:

—Tatun nyehé ndo tyin nditsa tsa tsinú iñi yu tsi Jutu Mañi yo, cõhon ndo, ndõo ndo yuvehe yu —catyí ña tsihin ndi.

Tan jañiñi xaan ña tsi ndi na ndoo ndi yuvehe ña.

¹⁶ Tan cuví iin tsaha tsa cuahan ndi nu tsicán tahvi ndi. Tan tsitsi tsa cuahan ndi, tahañ ndi tsi iin ñaha tyuvaa tsa yihí tatyí ña vaha tsi. Yacan cuenda cuví nacoto ña náa ndihi tsa cua cuví ityi nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña.

¹⁷ Tan ñaha tyuvaa can quit-saha nyicún ña tsi ndi, nyuhu tsihin ra Pablo. Tan cana tsaá ña tan catyí ña:

—Rayi ihya ra jahá tyiñu tyiñu Nyoo cahnu, cuví ra naha. Tan caahan ra naha tuhun nácaa cuví cacu yo —catyí ña.

¹⁸ Cuaha quivi javaha ñaha tyuvaa can tacan. Tacan tan ra Pablo ña cunyeec ca iñi ra, tan nanyico coo ra tan catyí ra tsihin tatyí ña vaha tsa yihí tsi ña:

—Tsihin sivi ra Jesucristo, catyí yu tsihin un tyin quita un tsi ñaha tyuvaa ihya —catyí ra.

Tan nu tatyí ña vaha can quitá nu tsi ña juvin ñi cuhva can.

¹⁹ Maa tyin tsa nyehe ra cuví tsitoho ña tyin ña cua cuví ca jaha canaa ra naha xuhun tsihin ña, tñn ra naha tsi ra Pablo tsihin ra Silas tan

tsindac̄a ra naha tsi ra naha nda vehe tyiñu.

²⁰ Tan tsic̄an ra naha cuatyí tsaḥa ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tsihin nyivi ñuu yo tan jativí ra naha ñuu yo.

²¹ Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyivi cuenda ñuu Roma cuví yo —catyí ra naha.

²² Tacan tan nduxaan nyivi tsi ra Pablo tan ra Silas. Tan ra cumí tyiñu can tsahnya ra naha jahma ra Pablo naha ra tan tava tyiñu ra cumí tyiñu na cañi ra vitya tsi ra Pablo naha ra tsihin yutun.

²³ Tsa yahā tsa cañi xaan ra naha tsi ra Pablo tan ra Silas, tan tsindac̄a ra vitya can tsi ra naha vehe caa. Tan tava tyiñu ra vitya tsi ra jaha cuenda tsi ra naha na jaha vaha ra cuenda tsi ra naha.

²⁴ Quihin ra cua jaha cuenda can tyiñu tan tyihí ra tsi ra naha nda tsitsi cuii vehe caa. Tan tyihí vaha ra tsaha ra naha tyañu vitu.

²⁵ Yahā can tan maa ñuu ra Pablo tan ra Silas quitsahā tsicán tahvi ra naha tsi Nyoo. Tan quitsahā tsitá xaan ra naha cantu Nyoo. Tan ra yucú vehe caa can naha ra tyaá soho ra naha.

²⁶ Tan saná iñi ra naha tan quitsi tsa taán ñihi xaan. Tan naquisi tsi tsaha vehe caa can, tan juvin ñi cuhva can tan nuñā tandihi yuvehe, tan ndatsi cadena tsa yihí tsi

tandihí ra tsa yucú vehe caa can naha ra.

²⁷ Tan tsa ndoto ra tsa jahá cuenda vehe caa can, nyehe ra tyin ticohó tandihí maa yuvehe can. Tacan tan tava ra mityi ra tyin cua cahñi ra tsi ra. Tyin tsicā iñi maa ra tyin tandihí ra tsa yucú vehe caa can quita.

²⁸ Maa tyin ra Pablo canā tsaa ra tsi ra, tan catyí ra:

—Ña cahñi un tsi un, tyin tandihí ndi tan yucú ndi ihya —catyí ra tsihin ra.

²⁹ Tacan tan ra jahá cuenda vehe caa can tsic̄an ra ñuhū. Tan tsinu ra quihvi ra nu yucú ra naha. Tan nihí ra tsihin tsa yuuhví ra. Tan tsicuiñi tsiti ra nuu ra Pablo tan ra Silas.

³⁰ Numi xaan tava ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

³¹ Tan ra Pablo tsihin ra Silas nacahan ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihí nyivi un —catyí ra naha tsihin ra jahá cuenda vehe caa can.

³² Tan cahan ra naha tuhun Jutu Mañi yo tsihin ra tan tsihin tandihí nyivi tsa yucú yuvehe ra.

³³ Tan juvin ñi maa tsacuaa can ra jahá cuenda vehe caa can nacatya ra nu uhvi nu cañi ra vitya tsi ra naha. Yahā can tan juvin ñi tsacuaa can

tsicoondutyā ra tsihin tandihi nyivī ra.

³⁴ Tacan tan tsindacā ra tsi ra naha nda vehe ra. Tan tsahā ra tsa catsi ra naha. Tan maa ra tsihin nyivī ra sii xaan cuñí ñi tyin tsinú iñi ñi tsi Nyoo. Tacan tan cuanuhū ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

³⁵ Tsa tuvī inga quivī tan tava tyiñu ra cumí tyiñu tsi ra vitya na cunyehe ra naha nu nyií ra jahá cuenda vehe caa can, tan catyí ra naha tyin na jaña ra tsi ra Pablo tsihin ra Silas.

³⁶ Tacan tan ra jahá cuenda vehe caa can catyí ra tsihin ra Pablo:

—Tsaā tyiñu tsi yu jahā ra cumí tyiñu, tsa jaña yu tsi ndo. Yacan cuenda vityin tsa cuví quita ndo —catyí ra tsihin ra naha.

³⁷ Maa tyin ra Pablo catyí ra:

—Nyuhu tsa cuví ndi ra cuenda ñuu Roma cañi ra naha tsi ndi nu tuvi nyivī. Tan ndi ña tatsi tuñi ra naha tsi ndi tumaa cuhva taahán tsi. Tan tyihī ra naha tsi ndi vehe caa. Tan vityin cuñí ra naha tava xeehe ra naha tsi ndi. Maa tyin ña cuñí ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

³⁸ Tan ra vitya nacatyí tuhun ra tsihin ra cumí tyiñu naha ra. Tan ra ican naha ra nayuhvi xaan ra naha tsa tsitō ra naha tyin ra cuenda ñuu Roma cuví ra Pablo.

³⁹ Tan tsahān ra cumí tyiñu naha ra tsindacān ra naha tucahnu iñi nuu ra Pablo tan ra Silas. Tacan tan ra cumí tyiñu tava ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can.

⁴⁰ Tan tsa quita ra naha vehe caa can, tsahān ra naha vehe ña Lidia. Tan yahā can tan tsinyehe ra naha tsi ra hermano naha ra tan jandu iin ra naha iñi ra naha tan cuahán ra naha.

17

Nu quitsahā caahán yuhu tahan nyivī ñuu Tesalónica

¹ Nu cuahán ra Pablo tsihin ra Silas, yahā ra naha ñuu Anfípolis, tan ñuu Apolonia. Yahā can tan tsaā ra naha ñuu Tesalónica nu nyaá iin vehe ñuhu nyivī Israel.

² Tan tsahān ra Pablo vehe ñuhu can, tumaa cuhva tuhvá maa ra tsaahán tan iin tan iin ñuu. Tan cahān ra tuhun Nyoo tsihin nyivī tsicá vehe ñuhu can uñi taahan quivī quitatú ñi.

³ Tan cahvi ra nu libru Nyoo tan tsahā cuenda ra tuhun ra Cristo tsi ñi nu catyí tsi tyin cua nyehe ra tundoho tan cua cúu ra. Yahā can tan cua nandoto ra. Tan catyí ra tsihin ñi:

—Ra Jesús tsa caahán yu tuhun tsihin ndo juvin ra cuví ra Cristo.

⁴ Tan juhva nyivī Israel can tsinū iñi ñi tsa caahán ra. Tan ndu iin ñi tsihin ra naha. Tan cuaha xaan nyivī Grecia tsa tuhvá jacahnú tsi Nyoo tan natsinū ndihi iñi ñi. Tan

cuaha ñiñaha cuca tsa iyó ñuu can natsinū ndihī iñi ñi tsa caahán ra tuhun ra Cristo.

⁵ Maa tyin ra ñuu Israel tsa ña tsinú iñi, ndasi cuñí ra naha nyehé ra naha tyin cuaha xaan nyivī nycún tsi ra Pablo. Tan jandu iin ra naha tsi taahan ra caquiñi tsa tsicá nuu jutsan ñi maa. Tan quitsahā caahán yuhu tahan nyivī ñuu can jahā ra naha. Tan quihvī ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñí ra naha tsa quita ra Pablo naha ra. Tyin ra caquiñi can cuñí ra naha nacuhva cuenda ra naha tsi ra Pablo naha ra tsi nyivī.

⁶ Maa tyin tsa ña nañihī ra naha tsi ra Pablo tan ra Silas ican, quihin ra naha tsi ra Jasón. Tan ixtā caa ra naha tsi ra. Tan quihin ndihī ra naha tsi taahan ca ra hermano tan cuahán ra naha nuu ra cumí tyiñu ñuu can. Tan canā tsaā ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná iñi tandihī nyivī nanii cahnu ñuhu ñayivī. Tan vityin tsaā ndihī tucu ra naha ihya.

⁷ Tan ra Jasón can tsaḡa ra yuvehe ra na cuyucu ra naha. Tan tandihī maa ra naha tan ña tyaá yahvi ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañí Jesús —catyí ra naha.

⁸ Tsa tsiñi nyivī tan ra cumí tyiñu tsa caahán ra caquiñi can naha ra quitsahā caahán yuhu tahan ñi.

⁹ Maa tyin ra Jasón tan inga ra naha tsaḡa ra naha xuhun tan jañā ra cumí tyiñu tsi ra naha.

Nu cuahán ra Pablo tsihin ra Silas ñuu Berea

¹⁰ Tan juvin ñi tsacuaa can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaā ra naha, tsaḡan ra naha vehe ñuhu nyivī Israel.

¹¹ Tan nyivī Israel tsa iyó ñuu Berea can vaha ca nyivī cuví ñi tan ñavin ca nyivī ñuu Tesalónica tyin tsihin tsa ñi iñi ñi tan naquihin ñi tuhun Nyoo. Tan tandihī quivī nanducú ñi nuu tutu Nyoo, nyehé ñi tatun nditsa tsa caahán ra Pablo.

¹² Yacan cuenda cuaha xaan ñi natsinū iñi ñi tsi ra Cristo tsihin tucu nyivī Grecia tahan ñi ñiñaha cuca tan rayii naha ra.

¹³ Maa tyin tsa tsitoḡ ra Israel tsa iyó ñuu Tesalónica tyin ra Pablo nyii ra Berea caahán ra tuhun Nyoo, tan cuahán ra naha tan natyuhū ra naha tsi nyivī Berea can.

¹⁴ Maa tyin ra hermano numi ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndoḡ ra naha ñuu Berea.

¹⁵ Tan ra tsa cuahán tsihin ra Pablo tsindaḡa ra naha tsi ra nda ñuu Atenas. Tacan tan cuanuhū ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa caḡan ra Pablo tsihin ra naha, tyin na janumi ra naha tan cuhun ra naha nu nyii ra.

Nu nyii ra Pablo ñuu Atenas

¹⁶ Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi añima ra tsa nyehé ra tyin cuaha xaan tsitoho iyó ñuu can.

¹⁷ Yacan cuenda cahan ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihi quivi caahán ra tsihin nyivi tsa cuahán nuyahvi.

¹⁸ Tan ñihí tahan ra tsihin nyivi tsa cahví tuhun tsa jacuahá nyivi tsa nañi epicúreo. Tan ñihí tahan tucu ra tsihin nyivi tsa cahví tuhun tsa jacuahá nyivi tsa nañi estoico. Tan cahan ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahan ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahan ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyivi tatun cua cúu ñi.

¹⁹ Tacan tan tsindaca ra naha tsi ra Pablo iin nu nañi Areópago, nu tuhvá ra cumí tyiñu naha ra ndu iin. Tan catyí ra naha tsihin ra:

—Cuñi ndi coto ndi tuhun tsa tsa jacuahá un.

²⁰ Tyin jacotó un tuhun tsa ña tsitó ndi. Tan cuñi tucu ndi coto ndi náa cuñi tsi catyí tandihi tuhun ihya —catyí ra naha tsihin ra.

²¹ Tyin tandihi nyivi Atenas tan nyivi inga ñuu tsa iyó ican

taahán xaan iñi ñi tyaa soho ñi tan nacatyí tuhun ñi náa ndihi tuhun tsa.

²² Tacan tan ra Pablo ndu-vitá nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo.

²³ Tyin tsahan yu tsinyehé yu nu tuhvá ndo ndu iin. Tan nyehé yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvín Nyoo can cuví tsa caahán yu tuhun tsihin ndo.

²⁴ Nyoo tsa javahá ñuhu ñayivi tan tandihi tsa iyó nu ñuhu ñayivi ihya, tsii maa ra cuví andivi tan ñuhu ñayivi. Tan ña iyó ra tsitsi vehe ñuhu tsa javahá nyivi.

²⁵ Tan ña nyitá iñi ra tsa jatyinyeé nyivi tsi ra. Tyin maa ra tsahá ñayivi coo tandihi yo. Tan tsahá ra tatyí tsa ixtá tatyí yo. Tan maa ra tsahá tandihi tsa tsiñi ñuhu tsi yo.

²⁶ Javahá Nyoo tsi intuhun rayi. Tan tsa yahá can tsi-coo cuaha nyivi tata ra. Tan maa ra naha cuví tsii tsaahnu tandihi yo. Yacan cuenda intuhun ñi ñiñi nyisó tandihi yo. Tan tsahá Nyoo tsa coo yo naní cahnu ñuhu ñayivi. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayivi ihya. Tan catyí tucu ra maa nda cua coo intuhun

intuhun yo.

²⁷ Tacan javahā ra tyin na quitsaha nanducu yo tsi ra. Tumaa iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihi yo tsi ra tyaa ra cuhva. Vasu ndi maa ña cañi nyaá ra tsihin intuhun intuhun yo.

²⁸ Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra.

²⁹ Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinu tsihin xuhun cuaan, a xuhun cuitsin, a tsihin yuu vaha. Tan ndi ñavin Nyoo tsa tsinu tsihin tsa tsiñituñi iñi nyívi cuví ra.

³⁰ Tahān tsanaha Nyoo ña cuxaan ra tsi nyívi tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyívi tandihi ñi ityi tyin na ndu uvi iñi ñi cuatyí ñi tan na nasama ñi cuhva iyó ñi.

³¹ Tyin tsa tyaa ra cuhva tyin cua coo iin quívi tsa cua tatsi tuñi ra tsi nyívi iyó nu ñuhu ñayívi. Tan tsa cua tsa quívi can, ra tsa nacatsi vaha maa ra cua tatsi tuñi tsi ñi jaha ra. Tan tsa janahā ra tsi yo tyin nditsa tsa ra ihya cua tatsi tuñi tsi nyívi, tyin janandotó ra tsi ra can nu tsihi ra —catyí ra Pablo.

³² Tsa tsiñi nyívi tuhun tsa nandotó nyívi tsa tsihi, yihí ñi tsacú nducu ñi, tan yihí tucu nyívi catyí ñi:

—Quitsi un inga tsaha tan cahan un tuhun ihya tsihin ndi —catyí ñi.

³³ Tacan tan cuahán ra Pablo.

³⁴ Maa tyin yihí ñi ndu iin ñi tsihin ra, tan natsinu iñi ñi tsi ra Cristo. Tan iin ra tsa natsinu iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsinu ndihi tucu iñi ña, tan tsihin inga ca ñi.

18

Nu nyii ra Pablo ñuu Corinto

¹ Yahā can tan quita ra Pablo ñuu Atenas tan cuahán ra ñuu Corinto.

² Tan ican nañihi ra tsi iin ra Israel tsa nañi Aquila. Tan ñuu Ponto cacú ra. Tan maa ra tsihin ñasihi ra, ña Priscila, quita ñi Italia nu tsicoo ñi, tyin ra Claudio, ra cuví rey cahnú ñuhu can, tava ra tsi tandihi nyívi Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto.

³ Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin jahá tyiñu ra iin caa ñi tsihin ñi.

⁴ Tan quívi quitatú nyívi Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyívi Israel tan tsihin nyívi tsa ñavin nyívi Israel cuví. Tyin nducú ra cuhva tsa tsinu iñi ñi tsi ra Jesucristo.

⁵ Tan quívi tsaā ra Silas tan ra Timoteo tsa quee ra naha

Macedonia, ra Pablo nacoꝝ ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyivi Israel tyin ra Cristo, tsa ndatú xaan ñi, juvin ra cuví ra Jesús.

6 Maa tyin ñi ican xaan cuñi ñi. Tan quitsaha caahán ñi ndavaha ñi siqui Jutu Mañi yo. Tacan tan ra Pablo naquisi ra jahma ra tumaa iin seña tyin cua ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun cahun ndo anyaya. Ñavin ca cuatyí yuhu tyin tsa cahan yu tsihin ndo tan maa ndo ña tsiñu iñi. Vityin tan ityi nuu ca cua cahun yu cahan yu tuhun ihya tsihin nyivi tsa ñavin nyivi Israel cuví —catyí ra tsihin ñi.

7 Tan quitá ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra.

8 Tan iin ra tsa nañi Crispo, ra cuví ityi nu vehe ñuhu can, natsinu iñi ra tsi Jutu Mañi yo tan tacan tucu tandihi nyivi ra. Tan cuaha ca nyivi iyó ñuu Corinto can, tsa yaha tsa tsiñi ñi tsa caahán ra Pablo, natsinu iñi ñi tsi ra Jesús, tan tsicoondutyá ñi.

9 Tacan tan iin tsacuaa nyehe ra Pablo iin tsa janaha Nyoo tsi ra. Tan cahan Jutu Mañi yo tsihin ra, tan catyí ra:

—Ña nayuhvi un. Jañihi ca cahan un tuhun yu tan ña jandihí un tsa cahan un.

10 Tyin yuhu nyaá yu tsihin un, tan yoñi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyí Jutu Mañi yo tsihin ra Pablo.

11 Yacan cuenda ra Pablo ndoꝝ ra iin cuiya sasava ñuu Corinto can, jacuahá ra tuhun Nyoo tsi nyivi.

12 Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra Pablo. Tan tsican ra naha cuatyí tsaha ra nuu ra Galión.

13 Tan catyí ra naha tsihin ra Galión can:

—Ra ihya natyuhú ra tsi nyivi na jacahnu ñi tsi Nyoo iin cuhva tsa ñavin cuhva catyí ley —catyí ra naha.

14 Tacan tan cuhva tsa cua nacahan ra Pablo, tan nacahan ñi ra Galión, tan catyí ra tsihin ra Israel can naha ra:

—Nyooho ra Israel, cuví jandaa yu cuatyí ra tatun cuatyí cahnú o cuatyí ndiyi cuví.

15 Maa tyin maa ñi maa tuhun caahán cuví tuhun ihya. Tan yuhu ña cuñi yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñi yu cuví yu juez tsa cuenda tuhun ihya —catyí ra Galión can tsihin ra naha.

16 Tan tava ra tsi ra Israel naha ra nu cuví vehe tyiñu ra.

17 Tacan tan tandihi ra Grecia tin ra naha tsi ra Sóstenes, ra cuví ityi nu vehe ñuhu nyivi Israel. Tan cañi ra naha tsi

ra juvin ñi maa nuu ra Galión, ra yihí ndaha tsi nyivi Acaya. Tan ra Galión can ña cahan maa ra.

Nu cuanuhú ra Pablo ñuu Antioquia tan cuahán ra tsa tsinu uñi tsaha cua cahan ra tuhun Nyoo

¹⁸ Tan ra Pablo ndoo ra ñuu Corinto can cuaha quivi. Yahá can tan catyí ra tsihin ra hermano naha ra tyin tsa cua cahun ra. Tan cuahán ra Aquila tan ña Priscila tsihin ra. Tacan tan tsaá ñi ñuu Cencia. Tan ra Pablo xatyá ndii ra jiñi ra tumaa iin seña tyin tsa yahá javahá ra tsa catyí ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria.

¹⁹ Tan tsa tsaá yutun ndoo can nda ñuu Éfeso, quita ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyivi Israel, tan cahan ra tsihin nyivi tsa ndu iin ican.

²⁰ Tan cahan ndaahvi ñi tsihin ra tyin na ndoo ra taahan ca quivi tsihin ñi. Maa tyin ña cuñí ra.

²¹ Tan catyí ra tsihin ñi tyin tsa cuahán ra, tan catyí tucu ra tyehen:

—Cuñí tsi tsa cahun yu ñuu Jerusalén tyin jacahnu yu vico tsa vatsí tahan. Maa tyin tatun Nyoo cuñí, cua quitsi yu inga tsaha nu yucú ndo —catyí ra tsihin ñi.

Tacan tan cuahán ra, quihvi ra tsitsi iin yutun ndoo tsa cuahán nda Siria.

²² Quivi tsa tsaá nyico ra ñuu Cesarea cuenda Siria,

tsahan ra ñuu Jerusalén tsicuhva ra nacumi tsi nyivi yihí cuenda ra Cristo tsa iyó ican. Yahá can tan cuahán nyico ra ñuu Antioquia.

²³ Tan tsa yahá tsinyij ra juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihi nyivi yihí cuenda ra Cristo.

Nu caahán ra Apolos tuhun Nyoo ñuu Éfeso

²⁴ Quivi can tsaá iin ra Israel ñuu Éfeso. Nañi ra Apolos, tan ñuu ra cuví Alejandro. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru.

²⁵ Tan vaha xaan cutuhva ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutyá ra Juan ñi tsitó ra.

²⁶ Tan quitsahá caahán ra tsitsi vehe ñuhu tsihin tsa ñi iñi ra. Tan cuhva tsa tsiñi ra Aquila tan ña Priscila, tava sijn ñi tsi ra tan tsahá cuenda vaha ca ñi tuhun Nyoo tsi ra.

²⁷ Tacan tan quitsahá cuñí ra Apolos cahun ra ityi Acaya. Tan ra hermano jatyinyee ra naha tsi ra. Tan jacuhun ra naha iin carta tsi nyivi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsaá ra. Tacan tan cuahán ra. Tan cuhva tsa tsaá ra Acaya can, jatyinyee xaan ra

tsi nyivi yihí cuenda ra Cristo, ñi tsa natsinu ñi tsa cuenda tumañi ñi tsa javaha Nyoo tsi ñi.

²⁸ Tyin nu tuvi nyivi ñihi xaan cahan yuhu ra Apolos tsihin ra Israel naha ra tyin cuhva tsinú ñi nyivi Israel, ña nditsa. Tan jacuaha ra tsa catyí nu tutu Nyoo tyin ra Cristo, ra tsa ndatú xaan ñi, juvin ra cuví ra Jesús.

19

Nu cuahán nyico ra Pablo

ñuu Éfeso

¹ Tsitsi tsa nyí ra Apolos ñuu Corinto, ra Pablo yaha ra ityi yucu tan tsaá ra nda ñuu Éfeso. Tan ican nañihí ra tsi taahan ra yihí cuenda ra Cristo.

² Tan tsicá tuhun ra tsi ra naha:

—¿A naquihin ndo Tatyí li Nyoo quivi tsa natsinu ñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí li Nyoo.

³ Tacan tan ra Pablo tsicá tuhun ra tsi ra naha:

—¿Nacaa tsicoondutyá ndo? —catyí ra.

Tan nacahan ra naha tan catyí ra naha:

—Cuhva tsa jacoondutyá ra Juan, tacan tsicoondutyá ndi —catyí ra naha.

⁴ Tacan tan catyí ra Pablo tsihin ra naha:

—Ra Juan jacoondutyá ra tsi nyivi tsa ndu uvi ñi cuatyí. Maa tyin catyí tucu ra tsihin ñi tyin cuñí tsi tsa tsinu

ñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

⁵ Tsa tsiñi ra naha tsa cahan ra Pablo tuhun ihya, tacan tan tsicoondutyá ra naha inga tsaha tsihin sivi Jutu Mañi yo Jesús.

⁶ Tan tsa tyiso ndaha ra Pablo jiñi ra naha, tacan tan naquihin ra naha Tatyí li Nyoo. Tan quitsaha caahán ra naha inga yuhu. Tan tsahá cuenda ra naha tuhun tsa tsaha Tatyí li Nyoo tsi ra naha tsi nyivi.

⁷ Tan tsa tandihi ra naha quitá maa utsi uvi taahan ra naha.

⁸ Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi ñi ra. Tan jacuaha ra tsi ñi na nacuhva ñi tsi ñi tsi Nyoo na cundaca ñaha ra tsi ñi.

⁹ Maa tyin yihí ñi jandava ñi aña ñi, tan ña cuñí ñi tsinu ñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyó nyaha ra nu yucú ñi. Tan tsindaca ra tsi ñi tsinú ñi tsi ra Cristo nda iin escuela ra tsa nañí Tiranno. Tan ican caahán ra tuhun ra Cristo tsihin nyivi tandihi quivi.

¹⁰ Tan tacan ñi tsicá ra tsitsi tsa uvi cuiya. Tan tandihi nyivi tsa iyó ñuu tsa cayucú Asia, tsiñi ñi tuhun Jutu Mañi yo ra Jesús, tahan ñi nyivi Israel tan nyivi tsa ñavin nyivi Israel cuví.

11 Tan nahnu tsa iyo javaha ra Pablo jahā Nyoo.

12 Tyin nda cuanda jahma tsa t̄in ra Pablo tan tsindacá ñi tsi nyivi tan quitá cuehe tsi ñi, tan quitá ndihi tucu tatyí ña vaha tsi ñi.

13 Tan iyó juhva ra Israel tsa tsicá nuu tan iin tan iin ñuu tavá ra naha tatyí ña vaha tsi nyivi. Tan cuñí ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

14 Tacan javaha tsa utsa taahan sehe iin ra Israel tsa nañí Esceva. Tan ra Esceva can cuví ra iin ra cuví ityi nuu tsihin ra jutu.

15 Tan tsa cahan ra can naha ra tsihin nu tatyí ña vaha, nacahan nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan ¿yóo ra cuví tucu nyooho? —catyí nu tatyí ña vaha can tsihin sehe ra Esceva naha ra.

16 Tacan tan ra tsa yihí tatyí ña vaha can ndava ra siqui ra can naha ra. Tan tsihin tsa cuaha tunyee ñi nu tatyí ña vaha can tan cuví cunye ra t̄in tahan ra tsihin tandihi ra can naha ra. Tan tsahnya cuatyí ra jahma ra naha. Tan jañicueehē ra tsi ra naha. Tan jacuhun tandii ra tsi ra naha jahā nu tatyí can.

17 Tacan tan tandihi nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsitō ñi tuhun can. Tan yuuhví xaan ñi cuví. Tan jacahnú ñi sivi Jutu Mañi yo Jesús.

18 Tan cuaha xaan nyivi tsa natsinu ñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandihi maa tsa ña vaha tsa icā ñi tahan tsanaha.

19 Tan cuaha ñi tsa cahvi tuhun tasi, tsindaca ñi libru ñi. Tan tsahm̄i ñi libru can nuu tandihi nyivi. Tan tava cuenda ñi nácaa yahvi libru can. Tan yahvi tsa tandihi libru can quitá tsi uvi xico utsi mil xuhun cuitsin.

20 Tan tacan ñi tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee ñi iyó tsi ra.

21 Tan tsa yahā tuhun ihya, ra Pablo tyaa ra cuhva tsa cuhun ra ñuu tsa cayucú Macedonia tan Acaya. Yahā can tan cua cunuhu ra nda ñuu Jerusalén, tyaa ra cuhva. Tan catyí ra tyin yahā can tan cuñi tsi tsa cuhun ra nda ñuu Roma.

22 Tacan tan jacuhun ra tsi uvi taahan ra jatinyeé tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoq maa ra Pablo juhva ca quivi Asia can.

Nu quitsaha cuvaá nyivi Éfeso

23 Tan juvin ñi quivi can quitsaha cuvaá nyivi ñuu Éfeso tsa cuenda tuhun Nyoo,

24 tyin iin ra tsa nañi Demetrio natyuhu ra tsi ñi. Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsitoho Diana tsihin xuhun cuitsin can. Tan cuaha xuhun jahá canaa ra tan tsihin ra jatyinyee tsi ra.

25 Tan cana ra Demetrio can tsi ra tsa jahá tyiñu tsihin ra. Tan cana tucu ra tsi ra tsa jahá tyiñu iin ñi tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo.

26 Maa tyin nyooho nyehé ndo tan tsiñi ndo nácaa javahá nu Pablo can ñuu yo ihya, tan tandihí ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu.

27 Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña. Tan tandihí nyivi ni cahnu Asia tsihin nyivi naní cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

28 Tan cuhva tsa tsiñi ra naha tsa cahan ra, xaan xaan cuñi ra naha. Tan quitsaha caná tsa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

29 Tan cuvaq tandihí nyivi ñuu can. Tan tijn ñi tsi ra Gayo, tan tsihin ra Aristarco, uvi taahan ra tsa quee Macedonia tan tsicá ra naha tsihin ra Pablo. Tan tandihí ñi can ixta caa ñi tsi ra naha nda cuanda nu tuhvá ñi ndu iin.

30 Tan ra Pablo cuñi ra quihvi ra nu yucú ñi tyin cahan ra tsihin ñi. Maa tyin ra hermano ña tsaha ra naha tsa cahun ra.

31 Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tava tyiñu ra naha tsi ra tyin ña taahán tsi tyihi ra tsi ra ican.

32 Tan nu ndu iin nyivi ican, juhva ñi caná tsa iin tuhun, tan inga ñi caná tsa inga tuhun, tyin cuvaá ñi. Tan cuaha xaan ñi ndi ña tsitó ñi nacuenda yucú ñi ican.

33 Tacan tan nyivi Israel tava tyiñu ñi tsi iin ra tsa nañi Alejandro na yaha ra ityi nuu. Tan juhva ñi tsa yucú ican, tsaha cuenda ñi tsi ra nácaa cua cahan ra. Tacan tan javaha ra seña tsihin ndaha ra tyin na cutaxin ñi tyin cuñi ra cahan ra tyin nduve cuatyí nyivi Israel.

34 Maa tyin cuhva tsa tsito nyivi tyin ra Israel cuví ra, tandihí maa ñi cana tsa ñi.

Tan tsitsi tsa uvi hora caná tsaá ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsaá ñi.

³⁵ Tacan tan ra secretario ñuu can cuví jacutaxin ra nyivi, tan caahán ra tsihin ñi, tan catyí ra:

—Nyooho nyivi ñuu Éfeso ihya, tandihi nyivi tsitó ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsitoho ña tsa quee andivi tan nacava nu ñuhu ihya.

³⁶ Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo.

³⁷ Tyin ra tsa tsindaca ndo ihya nduve náa tsa suhu ra naha vehe ñuhu yo. Tan ndi ña caahán ra naha ndavaha ñi siqui nyoo yo.

³⁸ Tatun ra Demetrio tan ra tsa jahá tyiñu tsihin ra, tsicán ra naha cuatyí tsaha iin ra, na cuhun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can.

³⁹ Tan tatun inga tuhun tsicán ndo, cuñí tsi tsa ndaca ndo can tsi ra cumí tyiñu, tumaa cuhva catyí ley.

⁴⁰ Tyin tatun coto ra ndacá ñaha tan cana ra tsi yo tsa cuenda tsa cuví ihya, tan ña cua ñihi yo tuhun cahan yo tatun ndaca tuhun ra tsi yo nacuenda cuvaá yo —catyí ra cuví secretario can.

⁴¹ Tan tsa yaha cahan ra, tacan tan catyí ra tyin na cunuhu ñi nda yuvehe ñi.

20

Nu yaha ra Pablo Macedonia tan cuahán nyico ra nda Grecia

¹ Tsa yaha tsa cuvaá nyivi ñuu Éfeso can, cana ra Pablo tsi tandihi nyivi tsa yihí cuenda ra Cristo, tyin cahan ra juhva tsihin ñi tan cuhva ra tunyee iñi tsi ñi, tyin tsa tsaá quivi tsa cua cuhun ra inga ñuu. Tan cahan ra tsihin ñi. Tacan tan cuahán ra Macedonia.

² Tan tsahan ra tandihi ityi can tan tsihin tuhun caahán ra jandu iin ra iñi tandihi nyivi yihí cuenda ra Cristo tsa iyó ityi can. Tacan tan tsaá ra ityi Grecia.

³ Tan ican ndoo ra uñi yoo. Tan tsa nyaá tsa cua quihin ra yutun ndoo tan cuhun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaa iñi ra tsa cua cuhun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia.

⁴ Tan cuahán ra Sópater, ra ñuu Berea tsihin ra. Tan cuahán ndihi ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahán ndihi ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófimo.

⁵ Ra hermano ihya yaha ra naha ityi nuu tan ndatú ra naha tsi ndi nda ñuu Troas.

6 Tan nyuhu ndatu ndi nda tsa yaha vico pascua nu tuhvá nyivi Israel tsatsi paan tsa nduve yutsan iya yihí. Tacan tan quee ndi ñuu Filipos tsihin yutun ndoo. Tan nu tsinu uhun quivi tan titahan ndi tsihin ra tsa cuahán ityi nuu nda ñuu Troas naha ra. Tan ican ndoo ndi utsa quivi.

Nu caahán ra Pablo tuhun Nyoo ñuu Troas

7 Tan tsa cuvi tumbingu can ndu iin ndi tsihin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun iñi ndi tyin tsihi ra Cristo tsa cuenda cattyí yo. Tan ra Pablo caahán ra tsihin ñi, tan tahan ñuu, tyin tsa nyaá tsa cuhun ndi inga quivi can.

8 Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhu candili cayú.

9 Tan iin ra tyuvaa tsa nañi Eutico nyaá ra ventana tyaa soho ra, maa tyin ña cunyeé iñi ra ñumaahna, tyin ra Pablo, naha xaan caahán ra. Quixí ra Eutico, tan ña tsito ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tsihi ra.

10 Tacan tan ra Pablo nuu ra tan tsaá ra nu canyií ra tyuvaa can. Tan tyihí jucun ndaha ra tsi ra tyuvaa can, tan cattyí ra tsihin tandihí ra hermano naha ra:

—Ña nayuhvi ndo, tyin ra ihya nyito ra —cattyí ra.

11 Tacan tan ndaa nyico ra Pablo tan tsatsi ndi paan tan tsihi ndi vinu. Tan ra Pablo caahán ca maa ra tuhun Nyoo nda cuanda cunditsin. Tsihan cuahán ra.

12 Tan ra tyuvaa can nandoto ra tan cuanuhu ra nda yuvehe ra. Tan sii xaan cuñi ñi cuvi.

Nu quitá ra Pablo ñuu Troas tan cuahán ra nda ñuu Mileto

13 Nyuhu yaha ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihi tahan ndi tsihin ra Pablo, tyin tacan jandaá maa ndi tyiñu tsihin ra, tyin maa ra cuñi ra cuhun ra ityi nu ñuhu tsihin tsaha ra.

14 Tan tsa ñihí tahan nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahán ndi nda ñuu Mitilene.

15 Tsa quitá ndi ñuu can tacan tan yaha ndi ityi nuu iin ñuhu luhlu tsa nañi Quío, canyií tsi mahñu ndutya ñuhu. Tan tsa inga quivi can tsaá ndi inga ñuhu luhlu tsa nañi Samos. Yaha ndi ican tan tsaá ndi ñuu Trogilio nu quitatu ndi. Tan tsa inga quivi tsaá ndi nda ñuu Mileto.

16 Tacan cuvi tyin ra Pablo ña cuñi ra tsa cunyi naha ra ityi Asia. Tan ña cuñi ra cuhun ra ñuu Éfeso tyin numi ñi cuñi ra tsaá ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

Nu caahán ra Pablo tsihin ra ñuu Éfeso naha ra tyin cua cuhun ra tan ña cua quitsi ca ra

17 Tan tsa yucú ndi ñuu Mileto, cana ra Pablo tsi ra cuví ityi nuu tsihin nyivi yihí cuenda Nyoo ñuu Éfeso.

18 Tan tsa tsaá ra naha, tan caahán ra Pablo tsihin ra naha tan catyí ra:

—Maa ndo tsitó ndo nácaa cuhva tsicá yu nda quiví jihna ñi tsa tsaá nuu yu Asia ihya.

19 Tandihí quiví tsa tsinyijí yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuví yu, vasu cuaha tundoho tan tucuiihya iñi nyehe yu. Tan cuaha tundoho quitsi síqui yu jaha nyivi Israel.

20 Maa tyin ña jandihí yu tsa caahán yu tuhun Nyoo tsihin ndo. Tyin yacan cuví tandihí tsa tsiñi ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iín ndo tan nda yuvehe ndo.

21 Tan jacuahá yu tuhun ihya tsi nyivi Israel tan tsi nyivi tsa ñavin nyivi Israel cuví, na nasama ñi cuhva iyó ñi nuu Nyoo tan na tsinu iñi ñi tsi Jutu Mañi yo, ra Jesucristo.

22 Tan vityin cua cuhun yu nda ñuu Jerusalén tyin maa Tatyí Ii Nyoo catyí. Tan ña tsitó yu náa cua cuví tsi yu ndacan.

23 Maa tyin intuhun ñi tsa tsitó yu tyin tandihí ñi nu cuahán yu, Tatyí Ii Nyoo caahán tsihin yu tyin ndatú

vehe caa tsi yu, tan cuaha tundoho cua nyehe yu.

24 Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa síi cuñí yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tava tyiñu ra tsi yu. Tan jañihi ca yu jacuaha yu tuhun vaha nácaa cuñí maa Nyoo tsi yo.

25 Tan vityin tsitó vaha yu tyin tandihí nyooho tsa cahan yu tuhun Nyoo tsihin ndo, ña cua nyehe ca ndo tsi yu.

26 Yacan cuenda cuñí yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo.

27 Tyin ñiñi cuñí yu tan cahan yu tandihí tuhun Nyoo tsihin ndo tan nduve náa tsa tyihí xeehe yu.

28 Yacan cuenda jaha cuenda ndo tsi ndo. Tan jaha cuenda ndihí ndo tsi tandihí nyivi yihí cuenda Nyoo. Tyin maa Tatyí Ii Nyoo tava tyiñu tsi ndo na jaha cuenda ndo tsi nyivi tsicá vehe ñuhu Jutu Mañi yo. Maa ra jata ra tsi ñi tsihin niñi ra.

29 Tan tsitó yu tyin quiví cuhun yu, cua quitsi inga ra naha. Tan cua cuñi ra naha jativi ra naha tsi nyivi yihí cuenda Jutu Mañi yo. Tumaa lobo xaan tsa tsahñí tsi mbee, tacan cua quitsi ra can naha ra.

30 Tan juvin ñi nu yucú ndo, cua nduvita taahan ra. Tan cua jacuaha ra naha tsi ndo tuhun tsa ña nditsa tyin cun-yicun ndo tsi ra naha.

31 Yacan cuenda jahā vaha ndo cuenda. Ndūcuhun iñi ndo tyin tsitsi tsa uñi cuiya ña jandihī yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñí yu, coto nacoo ihñi ndo tuhun Nyoo.

32 "Tan vityin nyooho yañi, tyaá yu tsi ndo ndaha Nyoo. Naquihin vaha ndo tandihī tuhun caahán ra tsihin yo. Tyin jacotó ra tsi yo tyin cuñí xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyivī vaha tsihin tandihī inga nyivī tsa nacuhva cuenda tsi ñi tsi ra.

33 Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo.

34 Nyooho tsitó vaha ndo tyin jahā tyiñu xaan yu tsihin ndaha yu tan ñihī yu tsa tsiñí ñuhu tsi yu tsihin ra tsicá tsihin yu naha ra.

35 Tacan ñi janahá yu tsi ndo tyin cuñí tsi tsa jaha tyiñu ndo tan jatyinyee ndo tsi nyivī iyó náa tsa tsiñí ñuhu tsi ñi. Tan ndūcuhun iñi ndo tsa caahán Jutu Mañi yo Jesús, nu catyī ra tyehen: "Sii ca cuñí nyivī tsa tsahá, tan ñavin ca nyivī tsa ñihī ndaahvi" catyī Jutu Mañi yo.

36 Tsa yahā tsa cahan ra Pablo tuhun ihya, tsicuiñi tsiti ra. Tan tsican tahvi ra tsihin tandihī ra naha.

37 Tan tandihī ra naha nducuihya xaan iñi ra naha tan tsacu xaan ra naha. Tan tsinumi nyaa ra naha tsi ra.

38 Tyin ra Pablo catyī ra tyin cua cuhun ra inga ñuu tan ña cua cuhun ca ra nu yucú ra naha. Tacan tan tsindaca ra naha tsi ra nda nu quihvi ra tsitsi yutun ndoo.

21

Nu cuahán ra Pablo ñuu Jerusalén

1 Tacan tan nacoo ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyií mahñu ndutya ñuhu. Tan tsa inga quivi tsa ndi nda Rodas tsa cuví inga ñuhu luhlu ñi. Tacan tan cuahán ndi nda ñuu Pátara.

2 Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ndi.

3 Tan ityi nu cuahán ndi, nyehe ndi nu canyií ñuhu Chipre ityi ndaha satyin yo. Tan yahā ñi ndi cuahán ndi ityi nuu ca, nda ityi Siria. Tan tsa ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can.

4 Tan tsa nañihī ndi tsi nyivī yihí cuenda Nyoo ñuu can, ndoo ndi tsihin ñi utsa quivi. Tan catyí ñi tsihin ra Pablo tyin ña taahán tsi tsa cuhun ra ñuu Jerusalén tyin tacan cahan Tatyí Ii Nyoo tsihin ñi.

5 Maa tyin tsa quita utsa quivi can, quita ndi ñuu can. Tan nu cua quita ndi tandihī ra hermano naha ra tsihin ñasihī ra naha tan tsihin sehe ra naha tsindaca ñi tsi ndi

nda cuenda yuhu ñuu. Tan nu nyiti yuhu ndutya ñuhu can tsicuiñi tsiiti ndi, tan tsican tahvi ndi tsi Nyoo.

⁶ Tacan tan tsinumj nyaa tahan ndi tsi ndi. Tsahan quihvi ndi tsitsi yutun ndoo. Tan ra hermano can naha ra cuanuhu ra naha yuvehe ra naha.

⁷ Tan tsa quee ndi ñuu Tiro, cuahán ndi nda ñuu Tolemaida. Tan ican tsaha ndi nacumi tsi nyivi yihí cuenda ra Cristo. Tan ndoo ndi tsihin ñi iin quivi.

⁸ Tan tsa inga quivi quita ndi cuahán ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyivi nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra.

⁹ Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuví ñi.

¹⁰ Tan tsa cuaha ñi quivi tsa yucú ndi ican, tan tsaq iin ndusu yuhu nyoo tsa quee nda Judea. Nañi ra Agabo.

¹¹ Quitsj nyehe ra nu yucú ndi. Tan quihj ra cinturón ra Pablo, tsahñi ra tsaha ra tan ndaha ra, tan catyí ra:

—Tatyí Ii Nyoo catyí tsihin yu tyin tyehen cua cunuhñi tsitoho cinturón ihya nda ñuu Jerusalén. Tan cua cuhva cuenda nyivi Israel tsi ra tsi ra inga ñuu naha ra —catyí ra Agabo.

¹² Tsa tsiñi ndi tsa caahán ra, nyuhu tan ra ñuu Cesarea naha ra caahán ndaahvi ndi

tsihin ra Pablo na ña cuhun ra ñuu Jerusalén.

¹³ Maa tyin ra Pablo catyí ra:

—¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cuhun yu tyiñu tsa cuenda Jutu Mañi yo Jesús —catyí ra tsihin ndi.

¹⁴ Tan tsa nyehe ndi tyin ña cuví tsa jahá ndi tsi ra, jaña ndi. Tan catyí ndi:

—Na cuví maa cuhva cuñí Jutu Mañi yo.

¹⁵ Tsa yahá yacan na ica vahá ndi tsi ndi tan cuahán ndi nda ñuu Jerusalén.

¹⁶ Tan cuahán taahan ra ñuu Cesarea ra yihí cuenda ra Cristo, tsihin ndi. Tan cuahán tucu iin ra ñuhu Chipre. Nañi ra Mnasón. Cuaha xaan cuiya tsinú iñi ra tsi ra Cristo. Tan tsindaca ra tsi ndi yuvehe ra tsa iyó ñuu Jerusalén tyin cuyucu ndi.

Nu cua nyehe ra Pablo nu nyí ra Jacobo

¹⁷ Tsa tsaq ndi ñuu Jerusalén, nyivi yihí cuenda ra Cristo sñ xaan cuñi ñi caahán ñi tsihin ndi.

¹⁸ Tan inga quivi can cuahán ndi tsihin ra Pablo cua nyehe ndi nu nyí ra Jacobo. Tan ican yucú tucu tandihí ra cuví ityi nuu tsihin nyivi vehe ñuhu.

¹⁹ Tsaha ra Pablo nacumi tsi ra naha. Yahá can tan nacatyí tuhun ra tandihí nácaa tsatyíñu Nyoo tsi ra nu cahán ra tuhun Nyoo tsihin

nyivi tsa ñavin nyivi Israel cuví.

²⁰ Tsa tsiñi ra naha tuhun ihya, jacahnu ra naha tsi Nyoo, tan catyi ra naha tsihin ra Pablo:

—Vaha yañi, nyehé un tyin cuaha xaan nyivi Israel tsinú iñi tsi ra Cristo. Tan tandihi ñi catyi ñi tyin taahán tsi tsa javaha yo cuhva catyi ley tsa tyaá ra Moisés.

²¹ Tan ñihi tuhun ñi tyin yooho jacuahá un tsi tandihi nyivi Israel tsa iyó inga ñuu tyin na ña cuita ca iñi ñi ley tsa jacuahá ra Moisés, tan catyi tucu un tsihin ñi tyin ña cuñi ca tsi tsa cunyaa tuñi Nyoo tsi sehe yá ñi, tan ndi ña cua javaha ca ñi tuhun tsahnu cuhva tsa iyó maa yo tahañ tsanaha.

²² ¿Nacaa javaha yo vityin? Tyin nyivi cua ñihi tuhun ñi tyin tsaá un ihya.

²³ Vaha taxin ca tsa javaha un tsa cua cahan ndi tsihin un. Ihya iyó cumi taahan rayii tsa nyaá javaha tsa catyi ra tsihin Nyoo tyin cua javaha ra naha.

²⁴ Cuaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndii ra naha jiñi ra naha cuhva catyi ley. Tan tsa javaha un tacan, tan coto tandihi nyivi tyin ña nditsa tsa caahán ñi siqui un, tyin cua nyehe ñi tyin ña nacoó un ley tsa tyaá ra Moisés.

²⁵ Tan tsa cuenda nyivi tsa ñavin nyivi Israel cuví, tan

tsinu iñi ñi tsi ra Cristo, tsa jacahun ndi tutu tsi ñi, tan catyi ndi tsihin ñi tyin ña taahán tsi caca xaan iñi ñi tsa cuenda ley can. Catyi ndi tyin ña cua catsi ñi cuñu tsa jamañi nyivi tsi tsitoho. Ndi ña cua catsi ñi niñi quití, tan ndi cuñu quití tsa cava ñi jucun tan ña tsati niñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayii —catyi ra tsahnu vehe ñuhu can naha ra tsihin ra Pablo.

Nu quitsaha caahán yuhu tahañ nyivi Israel siqui ra Pablo

²⁶ Tacan tan tsa tui inga quivi tan cuahán ra Pablo tsihin tandihi tsa cumi taahan ra can naha ra. Tan jan-duvaha ra tsi ra nuu Nyoo iin caa ñi tsihin ra can naha ra. Tacan tan quihvi ra tsitsi vehe ñuhu cahnu tyin jacoto ra cuví jutu ama cundihí tsa utsa quivi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo.

²⁷ Tacan tan tsa cuñi ndihí tsa utsa quivi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaa xaan tandihi nyivi jahá ra naha, tan tijn ra naha tsi ra Pablo.

²⁸ Tan caná tsa ra naha tan catyi ra naha:

—Nyooho nyivi Israel, jatyinyee ndo tsi ndi. Juvín ra ihya cuví ra tsa tsicá nuu tandihi ñi ityi. Tan jacuahá ra tsi tandihi nyivi. Catyi ra tyin ña vaha cuhva iyó yo. Tan

catyí ra tyin ña vaha ley tsa tyaa ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsí jatíví ra naha —catyí ra naha caná tsa ra naha.

²⁹ Tacan catyí ra naha tyin nda nu quítsi tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfesō tsa nañí Trófimo. Tan cuñí maa ra naha tyin ra Pablo tsindacá tsi ra tsitsi vehe ñuhu.

³⁰ Tan tandihí nyíví ñuu quítsahá cuvaá ñi. Tan tsinú xaan ñi tsaá ñi. Tacan tan tñin ñi tsi ra Pablo. Tan ixtá caa ñi tsi ra cua ndaca ñi ityí tsata vehe ñuhu, tan numi ñi nacasi ñi yuvehe ñuhu can.

³¹ Tsa cuñí cahñi ñi tsi ra, tan ñihí tuhun ra comandante cuenda andaru tyin tandihí nyíví ñuu Jerusalén iyo xaan caahán yuhu tahan ñi.

³² Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyíví. Cuhva tsa nyehe ñi tsi ra comandante can tsihin andaru can naha ra, jaña ñi tsa cañí ñi tsi ra Pablo.

³³ Tacan tan natuhva ra comandante can nu nyíí ra Pablo. Tan tava tyiñu ra tsi andaru naha ra tyin na tñin ra naha tsi ra, tan na cuhñi ra naha tsi ra tsihin uvi taahan cadena. Yahá can tan tsicá tuhun ra comandante can tsi ra yóo ra cuví ra, tan náa

javahá ra.

³⁴ Maa tyin nyíví sñin sñin tuhun caná tsaá ñi. Tan ra comandante can ña cutuñí maa iñi ra tsa cuenda tsatyin ñihi xaan cuvaá jahá ñi. Tan tava tyiñu ra tsi andaru tyin cundaca ra naha tsi ra Pablo nda vehe nu yucú andaru.

³⁵ Cuhva tsa tsaá ra naha nu cuayí vehe can, tan quítsahá nducañá nyíví tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra.

³⁶ Tyin tandihí ñi nyicún ñi tsi ra naha, tan caná tsaá ñi tan catyí ñi:

—¡Na cúu ra! —catyí ñi.

Nu juvin ñi maa ra Pablo jacacú tsi ra nuu nyíví

³⁷ Cuhva tsa cua tyihí ra naha tsi ra Pablo tsitsi vehe can, tan quítsahá caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego?

³⁸ Tun tacan caa, ñavin yooho cuví ra ñuu Egipto tsa quítsi quíví can tan jacañí tahan ra tsi nyíví siqui ra ndacá ñaha tan tava ra cumi mil ra tsahñí ndiyí tsindacá ra tsi ra naha ityí ñuhu ityí —catyí ra comandante can tsihin ra Pablo.

³⁹ Tacan tan ra Pablo catyí ra tsihin ra:

—Yuhu ra Israel cuví yu tan cacú yu ñuu Tarso tsa cuví iin ñuu cahnu ityí Cilicia. Maa tyin jaha tumañi iñi cuhva un ndatu cahan yu luxu tsihin

nyivi —catyí ra Pablo tsihin ra comandante.

⁴⁰ Tacan tan tsa tsaha ra comandante can ndatu tsi ra, nduvita nyityi ra nu cuayi can tan javaha ra iin seña tyin na cutaxin ñi. Tan tsa cutaxin nyivi quitsaha caahán ra tsihin yuhu hebreo, tan catyí ra:

22

¹ —Nyooho tata, tan nyooho yañi, tyaa soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tsihin nyivi can.

² Tsa tsiñi ñi tsa caahán ra tsihin ñi tsihin yuhu hebreo, taxin cuí ña tsinyacu ñi. Tan ra Pablo catyí ra:

³ —Yuhu ra Israel cuví yu tumaa maa ndo. Tan cacu yu ñuu Tarso tsa canyí Cilia. Maa tyin Jerusalén ihya tsahnu yu. Tan ra Gamaliel jacuaha ra tsi yu nácaa tyaa yahvi yu ley tsii tsahnu yo. Tan tacan ñi nducú yu cuhva javahá yu tyiñu nuu Nyoo tsihin tsa ñi iñi yu, tumaa tsa javahá ndo vityin ihya.

⁴ Yuhu, nu quitsi tsi tsinyaa ndaha yu tsi nyivi yihí cuenda ra Cristo. Tan tsindaca yu tsi ñi tsa cúu ñi. Tan cuaha ñi rayi tan ñaha tiñ yu tsa cuhun ñi tsitsi vehe caa.

⁵ Ra jutu tsahnu tsa cuví ityi nuu tsihin ra cuví mandoñi naha ra, cuví ra naha tsandaa tyin ra ican naha ra tsaha tutu tsi yu tyin cuví tin yu tsi ra yañi yo, ra yihí cuenda ra Cristo ñuu Damasco. Tsahan yu

ican tsinanducu yu tsi nyivi tsinú iñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi ñi nda ñuu Jerusalén ihya tyin tatsi tuñi ra tsahnu naha ra tsi ñi.

Nu nacatyí tuhun ra Pablo nácaa natsinu iñi ra tsi ra Cristo

(Hechos 9.1-19; 26.12-18)

⁶ Maa tyin cuhva tsa cuahán yu ityi tsa cua tsaa yu ñuu Damasco, maa ora cuví tsi. Tan sana iñi yu tan ndunditsin tanñi cahnu nu cuahán yu jahá iin ñuhu tsa quitsi ityi andivi.

⁷ Tacan tan nduva yu nu ñuhu. Yahá can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenta nyaá ndaha un tsi yu?” catyí ndusu can tsihin yu.

⁸ Tacan tan tsica tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra.

⁹ Tandihí ra tsa cuahán tsihin yu nyehé ra naha ñuhu can, tan nayuhvi xaan ra naha. Maa tyin ña tsiñi ra naha ndusu tsa cahan tsihin yu.

¹⁰ Tacan tan quitsaha caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cuhun un nda ñuu Damasco. Tan ican cua cahan iin ra tsihin un tandihí tsa taahán tsi javaha un” catyí Jutu Mañi yo tsihin yu.

11 Tan cuaā yu jahā ñuhu can, yacan cuenda ra tsa cuahán tsihin yu t̄in ra naha ndaha yu tan cuahán ndi nda ñuu Damasco.

12 "Tan ican iyó iin ra tsa nañí Ananías. Tan jacahnú xaan ra tsi Nyoo cuhva catyí ley tsa tyaā ra Moisés. Tan tandihí nyiví Israel tsa iyó ñuu Damasco catyí ñi tyin vaha xaan iñi ra.

13 Tsaḥan ra can tsinyeḥe ra tsi yu. Tan cuhva tsa tsaā ra, catyí ra tsihin yu: "Yañi Saulo, nanyeḥe inga tsaḥa" catyí ra tsihin yu. Tan juvin ñi cuhva can tan nanyeḥe yu. Tan cuví nyeḥe yu tsi ra.

14 Tan catyí ra tsihin yu: "Nyoo cuenda jutu yo nacatsi ra tsi un nda tsanaha, tyin coto un cuhva cuñí ra, tan nyeḥe un tsi ra Jesucristo tyin ra vaha cuví ra, tan cuñi un ndusu ra.

15 Tyin yooho cua cahan un tuhun ra nuu tandihí nyiví. Cua nacatyí tuhun un tsa nyeḥe un tan tsa tsiñi un.

16 Tan vityin, ña cuatu ca un. Nduvita tan coondutya un. Tan ndacan tahví un tsi Jutu Mañi yó tyin na jaha ra tucahnu iñi cuatyí un" catyí ra Ananías tsihin yu —catyí ra Pablo tsihin ñi.

Nu nacatyí tuhun ra Pablo nácaa tsaḥa Nyoo tyiñu tsi ra tyin cuhun ra inga ñuu cucahan ra tuhun ra Cristo

17 Yahā can tan vatsí nuhu yu ñuu Jerusalén ihya tan cuhva tsa tsaā yu, tsaḥan yu vehe ñuhu cahnu tsindacan

tahví yu tsi Jutu Mañi yo. Tan janahā ra iin tsa nyeḥe yu.

18 Nyeḥe yu tsi ra. Tan catyí ra tsihin yu: "Janumi. Quita ñi ñuu Jerusalén ihya tyin ña cua tsinu iñi nyiví tuhun yu tsa cahan un" catyí ra tsihin yu.

19 Tacan tan quitsaha caahán yu tsihin ra tan catyí yu: "Jutu Mañi yu, maa ñi tsitó ñi tyin yuhu tsaḥan yu tandihí vehe ñuhu. Tan t̄in yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi.

20 Tan quiví tsa tsihi ra Esteban ra tsa caḥan cuenda un, yuhu nyií ndihí yu ican. Tan ndoo yu vaha tsa tsañi ra naha tsi ra. Tan jahā cuenda yu jahma ra can naha ra" catyí yu tsihin Jutu Mañi yo.

21 Tacan tan catyí ra tsihin yu: "Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyiví tsa ñavin nyiví Israel cuví" catyí Jutu Mañi yo tsihin yu.

Nu nyaá ra Pablo ndaha ra comandante cuenda ñuu Roma

22 Tyaā soho ñi yacan ña tan quitsaha caná tsaā ñi tan catyí ñi:

—¡Cañi ndo tsi ra! Tyin ña taahán ca tsi tsa coo ra ñayiví —catyí ñi.

23 Tan caná tsaā ca ñi. Tan javicó ñi jahma ñi. Tan javitá ñi nyahyu nu tatyí tsa cuenda tsa xaan xaan cuñí ñi.

24 Yacan cuenda ra comandante can catyí ra tsihin ra andarú can naha ra tyin na

cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsa nyivi tsata ra.

²⁵ Maa tyin tsa yaha tsahñi ra naha tsi ra tan cua cañi ra naha tsi ra, tacan tan ra Pablo cahan ra tsihin ra capitán tsa nyaá nyityi ican tan catyí ra:

—¿A iyó ndatu tsi nyooho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaquee yuhu ra juez tsi yu, tan cuñí ndo cañi ndo tsi yu —catyí ra Pablo tsihin ra.

²⁶ Tsa tsiñi ra capitán tsa caahán ra Pablo, tsahan ra tsijacotó ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

²⁷ Tacan tan ra comandante can cuahán ra nu nyii ra Pablo. Tan tsicá tuhun ra tsi ra tatun nditsa tyin ra ñuu Roma cuví ra. Tan ra Pablo catyí ra:

—Juvín.

²⁸ Tacan tan catyí ra comandante can tsihin ra:

—Yuhu cuaha xaan xuhun tyahví yu tan cuví cuu yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

²⁹ Tacan tan andaru tsa cua cañi tsi ra jatsiyó nyaha ra naha tsi ra naha nu nyii ra Pablo. Tan nda cuanda ra comandante tan nayuhví ra tsa

cuenda tsa tsahñi ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

Nu tsahan ra Pablo nu ndu iin ra ñuu Israel naha ra

³⁰ Tan tsa tuví inga quivi can tan ra comandante can cuñí ra coto ra náa cuatyí tyaa nyivi Israel tsi ra Pablo. Tan jaña ra tsi ra Pablo. Tan tava tyiñu ra na ndu iin tandihi ra jutu tsa cuví ityi nuu naha ra, tan tsihin tandihi ra cumí tyiñu cuenda nyivi Israel. Tacan tan tava tyiñu ra na quita ra Pablo vehe caa tan cahun ra nu iyó junta can.

23

¹ Tan ra Pablo nyehe ra tsi tandihi ra tsa ndu iin can naha ra, tan catyí ra tsihin ra naha:

—Nyooho yañi, tandihi quivi nda cuanda vityin nducú yu cuhva javaha yu cuhva cuñí Nyoo. Yacan cuenda vaha cuñí yu —catyí ra Pablo.

² Tacan tan ra Ananías, ra jutu tsaahnu tsa yihí ndaha tsi inga ca ra naha, tava tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra.

³ Tan ra Pablo nacahan ra tan catyí ra:

—¡Jihna ca tsi maa un cua cañi Nyoo, tyin jahá xaan un tyin ra vaha cuví un nyaá un juvín! ¿A cutuñí yu nuu un tumaa cuhva catyí ley? ¿Nacuenda tsa tava tyiñu un na cañi ra naha tsi yu? Tan ñavin tacan catyí ley —catyí ra Pablo.

4 Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsaahnu tyin cahnu cuví ra nuu Nyoo —catyí ra naha tsihin ra Pablo.

5 Tacan tan ra Pablo catyí ra:

—Yañi, ña tsitó yu tatun ra ihya cuví ra jutu tsaahnu. Tyin catyí tuhun Nyoo tyin ña cahan nyaa yo tsi ra yihí ndaha ñuu yo —catyí ra.

6 Tacan tan tuví iñi ra Pablo tyin juhva ra cuenda junta can naha ra, yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahan ra tsihin tsa ñihi ndusu ra tãn catyí ra:

—Nyooho yañi, yuhu ra fariseo cuví yu tumaa jutu yu. Tan tatsí tuñi ndo tsi yu tsatyin tsinú iñi yu tyin nyivi tsa tsihi nandoto ñi —catyí ra Pablo.

7 Cuhva tsa cahan ra tuhun ihya, ra tsa cuví fariseo naha ra tan ra saduceo naha ra, quitsaha caahán yuhu tahan ra naha tan natahvi sava ra naha.

8 Tyin ra saduceo catyí ra naha tyin ña cua nandoto nyivi tsa tsihi. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú iñi ra naha tandihi tuhun ihya.

9 Tandihi ra naha quitsaha caná tsaa ra naha. Tan nduvita juhva ra cuví maestro cuenda ley tsa tyaa ra Moisés

tsa cutahán tsihin ra fariseo naha ra, tan catyí ra naha:

—Nyehé ndo, nduve tsa ña vaha javahá ra ihya, tyin tatun ángel cahan tsihin ra, jaha yo cuenda tyin ña vaha cahan yo siqui Nyoo —catyí ra naha.

10 Tsa tsiñi tandihi ra naha yacan, quitsaha nduvaá nyico ra naha. Nda cua nayuhvi ra comandante can coto cahnya cuatyí ra naha tsi ra Pablo. Yacan cuenda tava tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru.

11 Tan tsacuaa can quituvi Jutu Mañi yo nuu ra Pablo tan catyí ra tsihin ra:

—Jandu iin iñi un, Pablo. Tyin tumaa caahán un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

Nu ndoo ra Israel naha ra tyiñu tyin cua cahni ra naha tsi ra Pablo

12 Tsa inga quivi, juhva ra Israel natuhun tahan ra naha tan ndoo ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahni ra naha tsi ra Pablo. Tan ndaa ra tsa ña cua javaha tacan, na janaa Nyoo tsi ra naha, catyí ra naha.

13 Yaha uvi xico ra naha ndoo ra naha tyiñu ihya.

14 Tsahan ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahan ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyi ndi.

¹⁵ Tan vityin nyooho jacoto ndo tsi ra comandante. Catyi ndo tsihin ra na quitsi ndaca ra tsi ra Pablo nuu ndo ityaan. Catyi ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsa ra ihya, cua cahñi ndi tsi ra —catyi ra naha tsihin ra jutu naha ra.

¹⁶ Maa tyin sehe cuhva ra Pablo tsiñi ra tsa natuhun tahan ra naha. Tan tsahan ra vehe andarú nu nyii ra Pablo tsi catyi tuhun ra tsihin ra.

¹⁷ Tacan tan ra Pablo cana ra tsi iin ra capitán. Tan catyi ra tsihin ra:

—Cuandaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyi ra Pablo tsihin ra capitán.

¹⁸ Tacan tan tsindaca ra capitán can tsi ra luhlu can nuu ra comandante. Tan catyi ra tsihin ra:

—Ra Pablo tsa nyii vehe caa cana ra tsi yu tan catyi ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

¹⁹ Tacan tan ra comandante tñin ra ndaha ra luhlu can tan tava sñin ra tsi ra tan catyi ra tsihin ra:

—¿Náa cuñi un cahan un tsihin yu?

²⁰ Tan ra luhlu can catyi ra tsihin ra:

—Ra Israel ndoq ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo.

²¹ Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuvi cahñi ra naha tsi ra, vaha taxín ca na cúu tandihí maa ra naha, catyi ra naha. Tan vityin ndatú ra naha nácaa cua cahan un —catyi ra luhlu can.

²² Tacan tan catyi ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunuhu ra tsi ra luhlu can.

Nu cacu ra Pablo ndaha ra Israel naha ra tan cuahán ra nuu ra ndacá ñaha tsa nañi Félix

²³ Tacan tan ra comandante cana ra tsi uvi taahán capitán, tan catyi ra tsihin ra naha:

—Janduvaha ndo tsi ndo tyin cahun ndo ñuu Cesarea cuhva caa iin tsa tsacuaa. Cua cahun uvi cientu andarú tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza.

²⁴ Janduvaha ndo cuayu coso ra Pablo. Tan jaha cuenda vaha ndo tsi ra ityi cahun ndo na tsa vaha ra nu

nyaá ra Félix, ra ndacá ñaha —catyí ra comandante tsihin ra capitán can naha ra.

25-26 Tacan tan javahā ra iin carta cundaha ra naha nacuhva ra naha tsi ra Félix. Tan tuhun tsa tyaā ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyivi cuví un. Ihya vatsí nacumi tsi un.

27 'Ra Pablo ihya, tijn ra Israel naha ra tsi ra. Tan cuñí ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuví ra, tsahan yu tsihin andaru tan jacacū yu tsi ra.

28 Tan cuñí yu coto yu náa cuatyí tyaá nyivi tsi ra, tsindaca yu tsi ra nu iyó junta tandihí ra cuví mandoñi nyivi Israel.

29 Tan nyehē yu tyin xaan xaan cuñí nyivi Israel nyehé ñi tsi ra tyin ña tyaá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihi yo tsi ra vehe caa.

30 Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihí ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa javahā ra.

31 Tacan tan quihjin ra naha tsi ra Pablo tumaa cuhva catyí ra Claudio tsihin ra naha, tan juvin ñi tsacuaa

can tsindaca ra naha tsi ra nda ñuu Antipatris.

32-33 Tsa inga quivi, ra tsa cuahán tsihin tsaha, sava ityi ñi tsahan ra naha, tan tsaā nuhu ra nda vehe nu yucū ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaā ra naha, nacuhva ra naha carta can tsi ra Félix, tan tsaha cuenda ndihí ra naha tsi ra Pablo tsi ra.

34 Tsa yaha tsa cahvi ra Félix carta can, quitsaha tsicá tuhun ra tsi ra Pablo nu maa cuví ñuu ra. Tan tsa tsito ra tyin ra Cilicia cuví ra.

35 Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javahā ra Herodes tahanan tsanaha.

24

Nu cutuñí ra Pablo nuu ra Félix

1 Yaha uhun quivi tan ra Ananías, ra jutu tsaahnu tsa yihí ndaha inga ca ra jutu, tsaā ra ñuu Cesarea can tsihin taahan ra cuví mandoñi naha ra, tan tsihin iin ra tsa nañí Tértulo. Ra tsa caahán ndaahvi tsaha nyivi cuví ra. Tsaā ra can naha ra nuu ra Félix tyin cua ndacan ra naha cuatyí tsaha ra Pablo.

2 Tacan tan tava tyiñu ra Félix na quitsi ndaca andaru tsi ra Pablo. Tacan tan quitsaha tsicán ra Tértulo cuatyí

tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyivi ñuu ndi.

³ Nacuhva xaan ndi tyahvi nyoo tsi yooho tata Félix, tyin vaha xaan ñni un.

⁴ Tan ña cuñi yu jatyañu yu tsi un tsihin tsa cuaha tuhun cua cahan yu, yacan cuenda tsiacán yu tumañi ñni tsi un na cuhva un ndatu cahan ndi luxu.

⁵ Tyin tsitó ndi tyin rayii ihya ñavin ra vaha cuví ra. Tandihí ñi ityi jacuvaá ra tsi nyivi Israel. Tan juvin ra cuví ityi nuu tsihin nyivi tsa nyicún tsi ra Jesús ra ñuu Nazaret.

⁶ Tan cuñi ra javaha ra tsa ndavaha ñi tsitsi vehe ñuhu cahnu. Tan yacan cuenda tijn ndi tsi ra, tyin tatsi tuñi ndi tsi ra tumaa cuhva catyi ley maa ndi.

⁷ Maa tyin ra Licias, ra cuví comandante ñihi xaan tyasi ra tan quihin nyaa ra tsi ra tsi ndi.

⁸ Tan catyí ra tyin tun cuñi ndi ndacan ndi cuatyí tsaha ra, cuñi tsi tsa cahan jihna ndi tsihin un. Yacan nyehe maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

⁹ Tacan tan ra Israel tsa yucú ican, catyí ra naha tyin tandihí maa tsa caahán ra Tértulo tan nditsa.

¹⁰ Tacan tan ra Félix janaha ndaha ra nu nyaá ra Pablo tyin nacahan ra. Tan ra Pablo

quitsaha caahán ra tan catyí ra:

—Sii xaan cuñi yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyivi iyó ñuu ihya.

¹¹ Tatun cua nducu tuhun un, cua coto un tyin tsa iyó ñi utsi uvi quivi tsa tsahan yu ñuu Jerusalén tsijacahnü yu tsi Nyoo.

¹² Tan ña cahan yuhu tahan yu tsihin ndi intuhun nyivi. Tan ndi ña jacuvaá yu tsi ñi tsitsi vehe ñuhu cahnu. Nduve maa náa javaha yu tandihí ca vehe ñuhu, tan ndi inga ca ityi tsitsi ñuu.

¹³ Tan cuatyí tsa tyaá ra ihya naha ra siqui yu, ña nditsa. Tyin tandihí maa tsa caahán ra tan ñavin tsa nditsa cuví tsi.

¹⁴ Maa tyin tsa cua catyi yu tsihin un cuví tsehe: tyin yuhu jacahnú yu tsi Nyoo. Juvín ra tsa jacahnü tsii tsaahnu yu. Tan jacahnú yu tsi ra tumaa cuhva jacuahá ra Jesucristo. Tan ra ihya naha ra catyí ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandihí tsa nyaá nu libru ley tsa tyaá ra Moisés, tan tsinú ñni yu. Tan tandihí tsa tyaá ra cuví ndusu yuhu Nyoo tan tsinú ñni yu.

¹⁵ Tan tsinú ñni yu tumaa tsa tsinú ñni ra ihya naha ra tyin nyivi tsa tsihi cua nandoto ñi inga tsaha, tahan ñi nyivi vaha tan nyivi caquiñi.

¹⁶ Tan yacan tacan ñi nducú yu cuhva tsa javaha yu

tsa vaha nuu Nyoo, tan nuu nyivi.

17 Tan tsa yaha juhva cuiya tsa tsica yu tandihi ñi ityi, tsahan tsaq nuhu yu nda Israel ñuu yu tyin nacuhva cuenda yu xuhun tsa tsaha nyivi tsi yu tsi nyivi ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo.

18 Yacan javahá yu tsitsi vehe ñuhu cahnu. Tan tsa yaha tsa janduvaha yu tsi yu tumaa catyí ley ndi, tan juhva ra Israel ra tsa quee ityi Asia, nyehe ra naha tsi yu ndacan. Maa tyin nduve nyivi cuaha yucú, tan nduve náa javaha ñi.

19 Tan ra tsa nyehe tsi yu ndacan naha ra, taahán tsi tsa quitsi maa ra naha cahan ra naha náa cuví tsa javaha yu o náa cuatyí tyaá ra naha siqui yu.

20 Tatun ña tacan, na catyí tuhun ra tsa nyecú ihya naha ra tatun náa iin cuatyí yu nañihí ra naha quivi janahma ra cuví ityi nuu tsihin nyivi Israel naha ra tsi yu.

21 ¿A ñavin cuenda tsatyin cahan yu iin tuhun tsihin ra tsa yucú junta can? Tan catyí yu: “¿A tatsí tuñi ndo tsi yu tsa cuenda tyin tsinú iñi yu tsa nandoto nyivi tsa tsihi?” —catyí ra Pablo.

22 Tan tsa tsiñi ra Félix tsa cahan ra tacan, tan catyí ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante

Lisias tan cua jandaa yu tuhun ihya —catyí ra.

Cahan ra tacan tyin tsitó ra nácaa cuahán tuhun nyivi nyicún tsi ra Cristo.

23 Tacan tan tava tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyii ra, tan cahan ra naha tsihin ra.

24 Tsa yaha juhva quivi tan tsaq nyico ra Félix inga tsaha tsihin ña Drusila ñasiihi ra. Tan ñaha Israel cuví ña. Tan tava tyiñu ra na quitsi ra Pablo tyin cuñi ñi tyaa soho ñi nácaa tuhun tsa tsinú iñi ra tsi ra Jesucristo.

25 Tan ra Pablo quitsaha caahán ra tuhun nácaa taahán tsi javaha yo tsa vaha cuhva cuñi Nyoo, tan ña cuví javaha yo tsa ña vaha tsa cuñi cuñu ñuhu yo. Tan coo quivi cua tatsi tuñi Nyoo tsi tandihi nyivi. Tan ra Félix nayuhvi xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

26 Tan ra Félix cuñi maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra.

27 Tan tsa yaha uvi cuiya, tacan tan nacosó tyiñu tsi ra Porcio Festo tyin cundaca ñaha ra. Tyin tsa quita ra Félix. Tan ra Félix ña cuñi ra tsa cahan nyivi Israel tsi ra,

yacan cuenda nacoꝝ ra tsi ra Pablo vehe caa.

25

Nu jandaá ra Festo cuatyí ra Pablo

¹Tan tsa quihv̄i ra Festo tsa cua jaha tyiñu ra, tacan tan tsa tsinu uñi quivi quit̄a ra ñuu Cesarea can tan cuahán ra nda ñuu Jerusalén.

²Tan tsa tsaꝝ ra ñuu Jerusalén, tacan tan tsaꝝ ra jutu tsa cuví ityi nuu, tan ra cumí tyiñu tsa yihí ndaha tsi nyivi Israel. Tan tsican ra naha cuatyí tsaha ra Pablo.

³Tan tsican ra naha tumañi ñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucahñi ra naha tsi ra Pablo ityi cua quitsi ra.

⁴Maa tyin ra Festo nacahan ra, tan catyí ra:

—Ra Pablo nyii ra vehe caa nda ñuu Cesarea. Tan yuhu tyaá yu kuhva tsa yatyi ñi cua cunuhu nyico yu.

⁵Yacan cuenda, nyooho tsa cuví ndo ra cumí tyiñu ñuu ihya, cuví cahun ndo tsihin yu, tan ndacan ndo cuatyí tsaha ra tatun iyó tsa ña vaha javaha ra —catyí ra Festo tsihin ra naha.

⁶Tacan tan ra Festo ndoo ra ñuu Jerusalén una quivi o utsi quivi ñi tan cuanuhu nyico ra nda ñuu Cesarea. Tan tsa inga quivi tsaꝝ ra tsitsi vehe tyiñu ra tan tsinyaa ra tsa cua tatsi tuñi ra tsi ra iyó cuatyí naha

ra. Tacan tan tava tyiñu ra na quitsi ra Pablo.

⁷Cuhva tsa quihv̄i ra Pablo, nu yucú ra naha natuhva ra Israel tsa quee nda ñuu Jerusalén, tan quitsaha tyaá ra naha cuatyí cahnu siqui ra. Maa tyin nduve tsandaa tava ra naha.

⁸Tacan tan cahan ra Pablo tan catyí ra:

—Yuhu ndi intuhun cuatyí ñaha ca javaha yu, ndi siqui ley nyivi Israel, ndi siqui vehe ñuhu cahnu ñuu Jerusalén, ndi siqui ra cuví rey cahnu tsa nyaá ñuu Roma —catyí ra.

⁹Maa tyin ra Festo cuñi ra coo vaha ra tsihin ra Israel naha ra, yacan cuenda tsica tuhun ra tsi ra Pablo:

—¿A cuñi un cahun un ñuu Jerusalén tyin jandaá yu tyiñu un ndacan? —catyí ra tsihin ra.

¹⁰Tan ra Pablo nacahan ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javaha yu tsi nyivi Israel.

¹¹Tun tsatyin javaha yu iin cuatyí cahnu tsa taahán tsi cúu yu, ña cua nducu yu kuhva cacu yu. Maa tyin ña nditsa maa tuhun tsa caahán ra ihya naha ra. Ndi nyooho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra

cuví rey cahnu tsi yu —catyí ra Pablo tsihin ra Festo.

¹² Tacan tan ra Festo, tsa yahā tsa natuhun tahan ra tsihin ra jatyinyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

Nu nacatyí tuhun ra Festo tuhun ra Pablo tsihin ra Agripa

¹³ Tsa yahā juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyii ra Festo tyin cua cuhva ñi nacumi tsi ra.

¹⁴ Tan ndoo ñi ican juhva quivi, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoꝝ ra tsi iin ra vehe caa ihya.

¹⁵ Tan tsa tsahan yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsican ra naha cuatyí tsaha ra can nuu yu tyin na cuhva yu ndatu tsa cúu ra.

¹⁶ Tan yuhu catyí yu tsihin tandihi ra naha tyin ña tuhvá ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi cuhva jacacu ñi tsi ñi.

¹⁷ Yacan cuenda, tsa quitsi ra cuví ityi nuu tsihin nyivi Israel can naha ra ihya, ña ndatu yu. Tan juvin ñi inga quivi can tan tsahan yu vehe tyiñu. Tan tsa yahā tsicunyaꝝ yu tan canꝝ yu tsi ra can.

¹⁸ Maa tyin ra tyaá cuatyí siqui ra, nduve náa tuhun ñiñi cahān ra naha. Tsa cuñí maa yu tyin cahnu cuatyí cua tyaa ra naha siqui ra.

¹⁹ Maa tyin tuhun tsa cahān ra naha cuví tsa cuenda cuhva iyó maa ra naha cuhva tsinú iñi ra naha. Tan cahān ra naha tuhun ra tsa nañí Jesús. Tan catyí ra naha tyin tsa tsihi ra. Maa tyin ra Pablo catyí ra tyin nyito ra.

²⁰ Tan tsa ña ñihi yu nácaa tatsi tuñi yu tsi ra tsa cuenda tuhun can, tsicā tuhun yu tsi ra tan catyí yu tsihin ra tatun cuñí ra cuhun ra cutuñi ra nda ñuu Jerusalén.

²¹ Maa tyin catyí ra tyin vaha ca tatun cutuñi ra nuu ra Augusto nda ñuu Roma. Yacan cuenda tava tyiñu yu na cunyi ra juhva ca quivi tsitsi vehe caa, nda cuanda cuví jacuhun yu tsi ra nuu ra Augusto —catyí ra Festo tsihin ra Agripa.

²² Tacan tan ra Agripa catyí ra tsihin ra Festo:

—Cuñí tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

²³ Tsa inga quivi can tan tsaꝝ ra Agripa tsihin ña Berenice. Iyo xaan caá ñi quihvi ñi tsitsi vehe, tyin rey cuví ñi. Tan quihvi ndihi tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo.

²⁴ Tacan tan quitsahā catyí ra Festo:

—Yooho Rey Agripa, tan nyooho tata, tsa yucú ndo ihya. Nyehe ndo tsi ra ihya. Tandihí ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandihí ra naha tsa catyí ra naha tsihin yu tyin taahán tsi cúu ra.

²⁵ Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan.

²⁶ Maa tyin nduve náa cuatyí ra nañihí yu, yacan cuenda ña ñihí yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tavā yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu.

²⁷ Tyin ña vaha tsa jacuhún yu tsi ra tatun nduve náa tuhun caahán yu náa cuatyí javahā ra.

26

Nu quitsahā caahán ra Pablo nuu ra rey Agripa

¹ Tacan tan ra Agripa catyí ra tsihin ra Pablo:

—Cuví cahan un vityin —catyí ra tsihin ra.

Tan ra Pablo jandaā ra ndaha ra tan catyí ra tyehen:

² —Sii xaan cuñí yu tyin cuví cahan yu nuu yooho, rey

Agripa, tan cuví catyí yu tsihin un nácaa tandihí cuatyí tsa tyaá ra Israel naha ra siqui yu.

³ Tyin yooho tsitó un tandihí tuhun tsa iyó yo tsa cuví yo nyivi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

Nu catyí tuhun ra Pablo tsihin ra Agripa nácaa ñayivi tsi-coo ra tsa ndi cumañi ca quihvi ra cuenda ra Cristo

⁴ Tandihí nyivi Israel tsitó ñi nácaa tsicoo yu nda ñuu yu quivi tsa ndi luhlu yu. Tan tsitó tucu ñi nácaa tsicoo yu nda ñuu Jerusalén.

⁵ Cuaha xaan cuiya nacotó ñi tsi yu. Tatun cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaá yahvi ley tsahnu yo tan ñavin ca tandihí nyivi.

⁶ Tan vityin cuñí nyivi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyivi tsa tsihi, tumaa catyí ra tsihin tsii tsaahnu yo naha ra tañan tsanaha.

⁷ Tandihí nyivi tsa cuví tata tsa utsi uvi taahan sehe ra Israel ndatú tucu ñi nyehe ñi nu cua janandoto Nyoo tsi nyivi tsa tsihi. Tan yacan cuenda ña jandihí ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaá ra Israel naha ra cuatyí siqui yu vityin, yooho rey Agripa.

8 ¿A ña tsinú iñi nyooho tyin Nyoo cua janandoto ra tsi nyivi tsa tsa tsihi?

Nu tsaha cuenda ra Pablo tsi ra Agripa cuhva tsinyaa ndaha ra tsi nyivi yihí cuenda ra Cristo

9 "Tahan tsanaha juvin ñi maa yu tsica iñi yu tyin vaha tsa tatsi tuñi yu tsi nyivi tsinú iñi tsi ra Jesús, ra ñuu Nazaret.

10 Tan tacan javaha yu nda ñuu Jerusalén tsihin ndatu tsa tsaha ra jutu tsa cuví ityi nuu naha ra. Tan cuaha nyivi tsa tsinú iñi tsi ra Cristo tyihí yu vehe caa. Tan tatun tsahñí ra naha tsi ñi, vaha xaan cuñí yu.

11 Tan cuaha xaan tundoho nyehe ñi jaha yu. Tan nducu yu cuhva jañiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javaha yu tandihi maa vehe ñuhu nyivi Israel. Javaha yu tacan tsa cuenda tsa xaan cuñí yu nyehé yu tsi ñi. Tan tandihi inga ñuu tsahan yu tsinyaa ndaha yu tsi ñi.

Nu nacatyí tuhun nyico ra Pablo nácaa nanduví ra, ra yihí cuenda ra Cristo
(Hechos 9.1-19; 22.6-16)

12 "Tan tsa cuenda yacan cuahán yu nda ñuu Damasco quivi can tyin tsaha ra jutu tsa cuví ityi nuu naha ra ndatu tsi yu.

13 Maa tyin ityi cuahán yu cuhva ora cuví tsi, yooho Rey. Tan quitsi ñuhu ityi siqui. Tan jandunditsin tsi nu cuahán yu tsihin tandihi ra tsa cuahán tsihin yu. Maa

tyin yaha ca nditsin tsi tan ñavin ca ñuhu ñicanyii.

14 Tacan tan tandihi ndi nduva ndi nu ñuhu. Tan tsiñi yu iin ndusu tsa caahán tsihin yu, tsihin yuhu yo, tan catyí tsi tsihin yu: "Saulo, Saulo, ¿nacuenta nyaá ndaha un tsi yu? Tumaa iin quiti tsañi nyaá ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicueehé un", catyí ndusu can tsihin yu.

15 Tacan tan catyí yu: "¿Yóo yooho cuví un taa?" Tan Jutu Mañi yo catyí ra tsihin yu: "Yuhu cuví ra Jesús, juvin ra tsa nyaá ndaha un.

16 Nduvita nyityi. Tyin quituvi yu nuu un ihya tyin tacan tan cua jaha tyiñu un nuu yu, tan cua cuví un tsandaa tsa cuenda tsa nyehé un ihya tan tsa cuenda tsa cua nyehe un ityi nuu ca.

17 Yacan cuenda vityin jacuhún yu tsi un nu iyó nyivi tsa ñavin nyivi Israel cuví tan juvin ñi maa yu cua jacacu yu tsi un ndaha ra Israel naha ra, tan ndaha nyivi tsa ñavin nyivi Israel cuví.

18 Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndihi tucu ñi tsa vaha tsa tsahá Nyoo tsi nyivi tsa nacuhvá cuenda tsi ñi tsi yu", catyí Jutu Mañi yo tsihin yu.

19 Yacan cuenda yooho rey

Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu.

²⁰ Tacan tan tsa jihna ñi quitsahá caahán yu tuhun ra nda ñuu Damasco. Yaha can tan cahán yu tsihin nyívi ñuu Jerusalén tan tandihi ca ñuu tsa cayucú Judea. Tan caahán ndihi yu tsihin nyívi tsa ñavin nyívi Israel cuví. Tan catyí yu tsihin ñi tyin na ndu uvi ñi ñi cuatyí ñi, tan na tyaa yahvi ñi tsi Nyoo na javaha ñi tsa vaha tumaa javahá nyívi tsa tsinú ñi tsi ra Cristo.

²¹ Tan tsa cuenda tuhun ihya tiñ ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu.

²² Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandihi nyívi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuví nu cuahán ca tsi, yacan caahán yu.

²³ Tyin catyí ra naha tyin taahán tsi tsa cua nyehe ra Cristo tundoho. Tan tsa yaha tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyívi tyin cua jacoto ra nácaa cua cacu ñi, tahan ñi nyívi Israel tan nyívi tsa ñavin nyívi Israel cuví —catyí ra Pablo.

Nu nducú ra Pablo cuhva tsa tsinu ñi ra rey Agripa tsi ra

Cristo

²⁴ Cuhva tsa catyí ra Pablo tuhun ihya, ra Festo caná tsa ra, tan catyí ra:

—¡Jiñi yooho ña vaha cuñí, Pablo!, tsa cuenda tsa cuaha xaan cahví un tan ndusaná ñi un —catyí ra Festo tsihin ra.

²⁵ Maa tyin ra Pablo catyí ra tsihin ra:

—Ñavin ñi yu ña vaha cuñí, yooho tata Festo. Tyin tsa caahán yu, maa ñi tsa nditsa tan tsa vaha cuví tsi.

²⁶ Ihya nyaá ra rey Agripa. Tan tsitó vaha ra tuhun ihya. Yacan cuenda ña yñ caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi.

²⁷ Yooho rey Agripa, ¿a tsinú ñi un tuhun tsa tyaa ra cuví ndusu yuhu Nyoo tahañ tsanaha? Yuhu tsitó yu tyin tsinú ñi un —catyí ra Pablo tsihin ra Agripa.

²⁸ Tacan tan ra Agripa catyí ra tsihin ra:

—¿A cuñí yooho tsa natsinu ñi yu tsa caahán un tan quihvi yu cuenda ra Jesús? —catyí ra rey Agripa tsihin ra Pablo.

²⁹ Tacan tan ra Pablo catyí ra:

—Na cuhva Nyoo tsa tsinu ñi un, a vityin a ndi cucuee ca. Maa tyin ñavin yooho ñi, tyin na tsinu ndihi tucu ñi tandihi nyívi tsa yucú tyaa soho tsa caahán yu ihya. In-tuhun ñi tsa ña cuñí yu, tsa quihí cadena ndaha ndo tumaa maa yu vityin —catyí ra Pablo.

³⁰ Tsa yaha tsa cahan ra Pablo tuhun ihya, nduvita rey tan ra ndaca ñaha tan ña Berenice, tan tandihi ra yucu ican naha ra.

³¹ Tan tsa yaha quita ñi, tan quitsaha natuhun tahan ñi:

—Nduve cuatyí ra ihya tsa ñihi xaan. Ña taahan tsi cúu ra. Tan ndi ña taahan tsi cunyi ca ra vehe caa —catyí ñi.

³² Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsican ra tsa cutuñi ra nuu ra cuví rey cahnu —catyí ra.

27

Nu jacuhun ra Festo tsi ra Pablo nda ñuu Roma

¹ Quivi tsa tyaa ra Festo tan ra Agripa cuhva tyin jacuhun ra naha tsi ndi nda ñuu Roma tsa canyií Italia, nacuhva cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañi Julio. Yihí ra batallón andaru, tsa nañi Cuenda Ra Augusto.

² Tan cuahán ndihi tucu ra Aristarco tsihin ndi. Ra tsa quee ñuu Tesalónica tsa canyií ityi Macedonia cuví ra. Tacan tan quihvi ndi tsitsi iin yutun ndoo tsa quee ñuu Adramitio tyin tsa yatyin cuíi cuhun nyico tsi ñuu tsa cayucú Asia yatyin ñi yuhu ndutya ñuhu.

³ Tsa inga quivi tsa ndi puerto Sidón. Tan ra Julio vaha nyivi cuví ra tsihin ra Pablo. Tan tsaha ra tsa cuhun ra Pablo nu iyó ra vaha ñi tsi ra ñuu can tan jatinyee ra naha tsi ra.

⁴ Yaha can tan quita ndi ñuu Sidón tan janda ra naha jahma tsa nyisó yutun ndoo can tan tsihin tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yaha tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can.

⁵ Tacan tan yaha sava ndi nu ndutya ñuhu ityi nuu Cilicia tan Panfilia, tan tsa ndi iin ñuu tsa nañi Mira tsa canyií Licia. Tan quita ndi tsitsi yutun ndoo can.

⁶ Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cuhun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahán ndi.

⁷ Cuaha quivi tsica ndi tyin cuee ñi cuahán ndi. Tsihin tundoho tan tsa ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsaha tsi tsa cuhun ca ndi ityi nuu, tan yaha ndi yatyin ñi ñuu Salmón tsa canyií ñuhu Creta. Tan navico ndi ityi yuhu ñuhu Creta.

⁸ Nducú ndi cuhva tsa cuhun ndi yuhu ndutya ñuhu, maa tyin tsihin tundoho tan tsa ndi nu nañi Buenos Puertos yatyin ñi ñuu Lasea.

⁹ Tsa cuaha xaan quivi yaha tyin cuee xaan tsicá ndi tsa cuenda tatyí tan ica xaan nanduví tsa yaha ndi nu ndutya ñuhu. Tyin tsa yaha quivi vico nu iyó nyitya nyivi

Israel. Tan tsa cua cuyatyin yoo vitsin. Yacan cuenda ra Pablo tsaḥa cuenda ra tsi ra jacacá yutun ndoo can naha ra,

¹⁰ tan catyí ra:

—Tandihí nyooḥo ra yucú ihya, tyaa soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuví iñi yu tyin cua cunaa yutun ndoo tsihin tandihí tsa nyisó tsi, tan nda cuanda maa yo cuví cunaa yo. Vaha ca tatun ndoo yo ihya —catyí ra tsihin ra naha.

¹¹ Maa tyin ra capitán cuenda andaru can tyaa yahví ca ra tsi ra jacacá yutun ndoo tan ra cuví tsiḥo yutun ndoo tan ñavin ca tsi ra Pablo.

¹² Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandihí ra naha:

—Vaha ca tsa quita yo ihya tan nducu yo cuhva cuhun yo nda ñuu Fenice tsa canyii juvin ñi ñuhu Creta ihya. Yacan cuví iin nu vaha cunyaa yutun ndoo tyin ña ñihi xaan yihí tatyí tyin ñuu can canyii tsi tsiyo cana ñicanyii —catyí ra naha.

Nu ñihi xaan yihí tatyí nu ndutyá ñuhu

¹³ Tacan tan quitsaha yihí luxu tatyí tsa quitsi ityi sur. Tan cuñí maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatyin ñi yuhu ñuhu Creta can.

¹⁴ Ña cuaha ñi tsicá ndi tan quitsaha yihí tatyí xaan tsa quitsi ityi norte. Tan tandahá tsi yutun ndoo inga ityi.

¹⁵ Tan ña cuví ca cuhun ndi ityi nuu ca tsa cuenda tatyí can. Tan jaña ndaha ndi na cuhun maa yutun ndoo tsihin tatyí ndáa ityi cuñí maa tsi.

¹⁶ Tan yaha ndi ityi tsata iin ñuhu luhlu tsa nañí Clauda tyin ña ñihi xaan yihí tatyí ityi can. Tan tsihin tundoho naquihin ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutyá.

¹⁷ Tan tsa yaha natyihí ra naha yutun ndoo luhlu can, tacan tan sutya ra naha xuu yutun ndoo cahnu tan tsahñi ra naha yutun ndoo can tsihin taahan yoho tyin coo tunyee iñi itsi. Tan yuuhví ra naha coto tahan ra naha nu yaxin ndutyá tan vicun yutun ndoo can tsitsi nyiti vita iyó yuhu ndutyá ñuhu nu nañí tsi Sirte. Yacan cuenda januu ra naha jahma yutun ndoo can tan tsaḥa ra naha tsa cuhun tsi cuhva tandahá tatyí.

¹⁸ Tan tsa inga quivi juvin ñi ñihi xaan yihí tatyí. Yacan cuenda quitsaha tyihí ra naha carga tsa yihí tsitsi yutun ndoo can nuu ndutyá ñuhu.

¹⁹ Tan tsa tsinu uñi quivi quihin ndi ndaha tyiñu yutun ndoo can tan tyihí ndi nu ndutyá ñuhu.

²⁰ Tan cuaha quivi ña nyeḥe ndi ñicanyii tan ndi tiñuu. Tan

ñihi xaan tandahá tatyí tsi ndi. Yacan cuenda ña tyaá ca ndi cuhva tsa cua cacu ndi.

²¹ Cuaha quívi yahá tan ña tsatsí ndi. Tacan tan catyí ra Pablo tsihin tandihí ra naha:

—Nyehe ndo, vaha ca tun tsatyin tyaá yahvi ndo tuhun tsa cahan yu quívi can, tan ndoo yo ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaá yo.

²² Tan cua cunaa ndihí yutun ndoo ihya, maa tyin ña caca iñi ndo tyin ndi intuhun yo tan ña cua cúu yo.

²³ Tyin Nyoo cuví ra yihí ndaha tsi yu, tan jahatyíñú yu tyiñu ra, juvin ra janahá ra iin tsa janahá tsi yu cuñi. Tan quituví iin ángel nuu yu.

²⁴ Tan catyí ángel can tsihin yu: “Ña nayuhvi un, Pablo. Tyin cuñí tsi tsa cahan un tuhun Nyoo nuu ra rey cahnu Augusto nda ñuu Roma. Tan tsa cuenda un cua jacacu Nyoo tandihí ra yucú tsihin un tsitsi yutun ndoo”, catyí ángel can tsihin yu.

²⁵ Yacan cuenda nyoooho tsa yucú tsitsi yutun ndoo ihya jandu iin ndo iñi ndo. Tyin yuhu tsinú iñi yu tsi Nyoo. Tan tsitó vaha yu tyin cua cuvi tumaa cuhva catyí ángel can tsihin yu.

²⁶ Vasu cua nyee yutun ndoo ihya, maa tyin cua tsaá yo iin ñuhu luhlu —catyí ra Pablo tsihin tandihí ndi.

²⁷ Tan tsa ndihí tsahun quívi tsa tsicá ityi ndi. Iin tsacuaa yucú ndi nu ndutya ñuhu Adria. Tan tsata can

tsata ihya tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuví iñi ra jacacá yutun ndoo can naha ra tyin cua tsaá ndi iin ñuhu.

²⁸ Tacan tan tyihí cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihí cuhva ra naha inga tsaha. Tan iyó oco utsa metru.

²⁹ Tan yuuhví ra naha coto nañi yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cahun ca tsi ityi nuu. Tan tsa cuñí ra naha tsa cunditsin.

³⁰ Tan ra jacacá yutun ndoo can naha ra tyaá ra naha cuhva cunu xeehe ra naha. Tan yacan cuenda quitsahá januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha.

³¹ Maa tyin ra Pablo jacotó ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyoooho ña cua cuvi cacu ndo —catyí ra tsihin ra naha.

³² Tacan tan andaru tsahnya ra naha yoho yutun ndoo luhlu can. Tan jacanacava ra naha can nu ndutya.

³³ Tan tsa naa ca ra Pablo catyí ra tsihin tandihí ra naha:

—Tsa iyó utsi cumi quívi tsa ña tsatsí ndo tan ña quixí ndo.

³⁴ Catyí yu tsihin ndo, çatsi ndo vityin. Ñiñi xaan cuñi tsi tsa catsi yo tyin tacan tan ndunyee cuñu ñuhu yo. Tyin cua cacu yo tan ndi intuhun ixi jiñi yo tan ña cua cunaa.

³⁵ Tan tsa catyi ra Pablo tuhun ihya, quiñin ra iin paan tan nacuhva ra tyahvi nyoo tsi Nyoo nuu tandiñi ra naha. Tacan tan tahvi ra tan quitsaha tsatsí ra.

³⁶ Tacan tan tandiñi ra naha ndu iin ca iñi ra naha tan tsatsi ndiñi ra naha.

³⁷ Tan tsa tandiñi ndi tsa yucú ndi tsitsi yutun ndoo can, quita uvi cientu uñi xico tsahun iin ndi.

³⁸ Cuhva tsa ndiñi tsatsi ra naha kuhva cuñi ra naha tan jacuhun ra naha yitin tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsa tsi yatyin ñi yuhu ndutya.

Nu nyee yutun ndoo

³⁹ Yahá can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaa ra naha kuhva nyehe ra naha tatun cuví jacuhun ra naha yutun ndoo ican.

⁴⁰ Tsahnya ra naha yoho tsa nuuhñi caa vee can. Tan naco ra naha can tsitsi ndutya ñuhu. Tan jandutaya ra naha vitu tsa janavicó yutun ndoo. Tacan tan jandaá ra naha jahma tsa tuhvá ticaá ityi nuu tsi. Tan quitsaha quiñin tatyí jahma

can, tan jacuhún tsi yutun ndoo nda nu iyó nyiti can.

⁴¹ Tan tsa tsi nu tatahán ndutya. Tan nyee jiñi tsi tsitsi nyiti. Tan ña cuví ca tava ra naha itsi. Tan ityi xuu tsi quitsaha tahví cuatyí can tsa cuenda tsa ñihi xaan cañi ndutya ñuhu can.

⁴² Tacan tan andaru cuñi ra naha cahñi ra naha tsi ra cuahán cua cutuñi naha ra tyin coto cunu ra naha.

⁴³ Maa tyin capitán andaru cuñi ra jacacu ra tsi ra Pablo. Yacan cuenda ña tsaha ra tsa cahñi ra naha tsi ra can naha ra. Tan catyi ra tyin ndaa ra tsitó sutya, na cuhun cuee ñi ra naha nu ndutya tan quita ra naha nda ñuhu ityi.

⁴⁴ Tan tandiñi ca ra tsa ña cuví sutya, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahvi cuatyí jahá ndutya ñuhu. Tan tacan cacu tandiñi ndi tan quita ndi ñuhu ityi.

28

Nu nyii ra Pablo ñuhu Malta

¹ Cuhva tsa tsa yahá cacu ndi tan catyí nyivi iyó ñuhu can tyin nu yucú ndi can nañi tsi Malta, o Melita.

² Tan vaha xaan natuhún ñi tsihin ndi. Tan jatahan ñi ñuhu tyin cuún savi tan vitsin xaan. Tan catyí ñi tsihin tandiñi ndi, na natuhva ndi yuhu ñuhu can tyin quita tsa vitsin tsi ndi.

³ Tacan tan ra Pablo naquiñin ra juhva nducu ityi. Tan tsitsi tsa tyihí ra can

nu ñuhu, quitā iin coo tsitsi nducu can, tsa cuenda tsa ihñi. Tan tsatsi yihí ti ndaha ra, tan ticaá tsico ti ndaha ra.

⁴ Cuhva tsa nyehe nyivi ñuhu can tyin ticaá coo can ndaha ra, quitsahā natuhún tahan ñi tan catyí ñi:

—Ra ihya nyivi tsahñi ra, tun cuvi, tyin vasu cacu ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyí ñi.

⁵ Maa tyin ra Pablo naquisi ra tsi coo can, tan canacava ti nu ñuhu, tan nduve náa tahan ra.

⁶ Tandihí ñi ndatú ñi náa cuhva ndaa nu tyaa ti, a náa cuhva cua cúu ra. Maa tyin tsa yahā ndatu xaan ñi, tan nyehe ñi tyin nduve maa náa tahan ra. Tacan tan nasama ñi cuhva tsicá iñi ñi, tan quitsahā catyí ñi:

—Ra ihya cuví iin nyoo —catyí ñi.

⁷ Yatyin ñi can canyí ñuhu ra yihí ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuú ra tsi ndi, tsa uñi quivi tsa yucú ndi vehe ra.

⁸ Tan jutu ra ñihi xaan cuuhví ra tsihin cahñi tan tsa tsiyó ra. Tan tsahan ra Pablo tsinyehé ra nu canyí ra. Tan tsican tahvi ra tsa cuenda ra, tan tyiso ndaha ra jiñi ra. Tacan tan nduvahā ra.

⁹ Yahā can tan quitsahā tsaá cuaha nyivi cuuhví tsa iyó ñuu can. Tan nduvahā ndihí ñi.

¹⁰ Tan tandihí ñi vaha xaan tyanuú ñi tsi ndi. Tan quivi

quihvi ndi tsitsi iin yutun ndoo tsa cua cuhun ndi, tsaha ñi tandihí tsa cua cutyiñu ndi ityi cuhun ndi.

Nu tsaā ra Pablo ñuu Roma

¹¹ Uñi yoo tsiyucú ndi ñuhu Malta can. Tacan tan quihvi ndi tsitsi iin yutun ndoo tsa quee nda ñuu Alejandría tsa canyí nu cuví Egipto. Tan ndoo tsi Malta nda yahā yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux.

¹² Tan tsaā ndi ñuu Siracusa. Tan ican ndoo ndi uñi quivi.

¹³ Tacan tan quitā ndi tan cuahán ndi ityi yuhu ndutya ñuhu nda cuanda tsaā ndi ñuu Regio. Tan tsa inga quivi can ñihi xaan yihí tatyí tsa quitsi ityi sur tan tsica ndi uvi quivi tan tsaā ndi ñuu Puteoli.

¹⁴ Ican ñihí tahan ndi tsihin juhva ra hermano naha ra. Tan catyí ra naha tsihin ndi tyin ndoo ndi iin vitya tsihin ra naha. Yahā can tan cuahán ndi nda ñuu Roma.

¹⁵ Tan nyivi yihí cuenda ra Cristo ñuu Roma can ñihí tuhun ñi tyin cua tsaā ndi. Tan tsahan ñi tsijatahan ñi tsi ndi ityi. Juhva ñi ndatu tsi ndi Nuyahví Apio. Tan inga ñi ñihí tahan ñi tsihin ndi nda nu nañi Tres Tabernas. Tan tsa nyehe ra Pablo tsi ñi, nacuhva ra tyahvi nyoo tsi Nyoo. Tan ndu iin ca iñi ra.

¹⁶ Cuhva tsa tsaā ndi ñuu Roma can, ra capitán can nacuhva cuenda ra tsi ra iyó cuatyí can naha ra tsi ra yihí ndaha vehe caa. Tan tsahā

ra can tsa coo siin ra Pablo. Tan jahá cuenda intuhun ñi andarú tsi ra.

Nu caahán ra Pablo tuhun Nyoo ñuu Roma

17 Tsa yahá uñi quivi tsa tsaá ndi ican, tacan tan tava ra Pablo tyiñu na quitsi ra cuví ityi nuu tsihin nyivi Israel tsa iyó ñuu Roma can naha ra. Tan cuhva tsa ndu iin ra naha, quitsahá catyí ra tsihin ra naha:

—Nyooho yañi, vasu nduve náa javahá yu tsi nyivi Israel tahan yo, tan ndi nduve náa javahá yu siqui tuhun tsahnu cuhva iyó yo, maa tyin tsaahá cuenda ra Israel naha ra tsi yu tsi ra ñuu Roma naha ra. Tan tsinyii yu vehe caa ñuu Jerusalén ndaha ra ñuu Roma naha ra.

18 Tan tsa jaquee yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javahá yu.

19 Maa tyin ra Israel tsa iyó nda ñuu Jerusalén naha ra nduxaan xaan ra naha tan yacan cuenda tsican yu tsa cutuñi yu nuu ra cuví rey cahnu. Vasu nduve cuatyí cua tyaa maa yu siqui ra naha.

20 Yacan cuenda caná yu tsi nyooho tyin nacoto yu tsi ndo, tan catyí tuhun yu tsihin ndo tyin nuuhñi yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyivi Israel —catyí ra Pablo.

21 Tacan tan catyí ra Israel naha ra tsihin ra Pablo:

—Ña tsitó ndi tuhun yooho. Tan yoñi jacoto tsi ndi, ndi tsihin carta, tan ndi ra ñuu yo tsa quee nda Judea ña cahán ra naha tuhun yooho, tan nduve náa cahán ra naha siqui un.

22 Maa tyin cuñi ndi tyaa soho ndi tuhun tsicá iñi un. Tyin tsitó ndi tyin tandihí ñi ityi tan caahán nyivi siqui tuhun tsa ihya —catyí ra Israel naha ra tsihin ra Pablo.

23 Tacan tan natuhun tahan ra naha ndaa quivi cua cuhun ra naha inga tsaha. Tsa tsaá quivi can, tsaá cuaha nyivi nu iyó ra Pablo. Tan quitsahá caahán ra nda tsa tui tan nda cuenda tsacuaa náca ndacá ñaha Nyoo. Tan tsihin ley Nyoo tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javahá ra Pablo tyin cuñi ra tsa tsinu iñi ñi tsi ra Jesús.

24 Yihí ñi tsinú iñi ñi tsa caahán ra. Tan inga ñi ña tsinú iñi ñi.

25 Tan ña iin tsicá iñi ñi, siin siin tuhun caahán ñi. Tan quitsahá tsinuhú ñi. Tan ra Pablo catyí ra tsihin ñi:

—Nditsa tsa cahán Tatyi Ii Nyoo tsihin ra Isaías ra cuví ndusu yuhu ra tahan tsanaha, tyin na cahan ra tsihin tsii tsahnu yo. Tan catyí ra:

26 Cuaahan tan cahan un tyehen tsihin nyivi ihya: Nyooho cua cuñi ndo tuhun Nyoo, maa tyin ña cua cutuñi iñi ndo.

Cua nyehe ndo tsihin tinuu
 ndo tsa cua javaha
 Nyoo, maa tyin ña cua
 nacoto ndo tsa nyehe
 ndo.

²⁷ Tyin añima ñi tsa ndundava
 xaan tsi.

Tsiñí ñi, maa tyin ña tyaa
 yahvi ñi.

Tan ndasí tinuu ñi, tyin tacan
 tan ña cua cuvi nyehe
 ñi.

Tan ña cua cuñi ñi tsihin soho
 ñi.

Tan ña cua cutuñi iñi ñi tsihin
 añima ñi.

Yacan cuenda ña cuñí ñi
 quihvi ñi tsitsi ndaha
 yu na janduvaha yu tsi
 ñi.

Tacan catyí ra Isaías jahá
 Tatyí lí Nyoo tahan
 tsanaha.

²⁸ Coto vaha nyooho tyin
 vityin tan ityi nuu ca cuhun
 yu cua jacoto yu tsi nyivi tsa
 ñavin nyivi Israel cuví tyin ja-
 cacú Nyoo tsi ñi. Tan maa
 ñi cua tyaa soho ñi —catyí ra
 Pablo tsihin ñi.

²⁹ Cuhva tsa catyí ra Pablo
 tyehen, ra Israel cuahán ra
 naha juvin ñi caahán yuhu
 tahan ra naha tsa cuenda
 tuhun tsa cahan ra Pablo tsi-
 hin ra naha.

³⁰ Uvi cuiya ndoo ra Pablo
 vehe nu nyí ra cuenda yoo
 ñuu Roma can. Tan vaha
 caahán ra tsihin tandihí nyivi
 cuahán vehe ra.

³¹ Tan tsihin tsa nii iñi ra
 tan caahán ra tuhun nácaa
 ndacá ñaha Nyoo tsi yo. Tan
 jacuahá ra tuhun Jutu Mañi
 yo ra Jesucristo. Tan yoñi
 tyasí nu caahán ra.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

Nu quitsaha tyaá ra Pablo carta

¹ Yuhu ra Pablo cuví yu iin ra jahá tyiñu tyiñu ra Jesucristo. Cana Nyoo tsi yu, tan nacatsj ra tsi yu tyin caca yu jacoto yu tuhun tsa jacacú ra tsi yo tsi nyivi.

² Tan tuhun ihya cuví tsa cahan Nyoo tsihin ra cuví ndusu yuhu ra tahan tsanaha tyin tyaa ra naha nu tutu ra.

³ Juvín tuhun ihya caahan tyin Jutu Mañi yo Jesucristo, Sehe Nyoo, quitsj ra nu ñuhu ñayivi tan nanduvj ra tumaa maa yo. Tan cuvj ra tata ra rey David.

⁴ Tan Nyoo jacoto ra tsi yo tsihin Tatyí lí ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra.

⁵ Tan tsa cuenda ra Jesucristo tsaha Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó naniñi cahnu nu ñuhu ñayivi tsi ra tan na tyaa yahvi ñi tsi ra.

⁶ Tan juhva ñi ican cuví tucu nyooho tyin tsa nacatsj ra Jesucristo tsi ndo tyin cuví ndo nyivi cuenda ra.

⁷ Jaquitsí yu carta ihya tsi tandihí nyooho tsa iyó ñuu Roma. Nyoo cuñí xaan ra tsi

ndo tan cana ra tsi ndo tyin cuví ndo nyivi ra tan jacahnu ndo tsi ra. Naquihin ndo tsa vaha tan na coo tsa taxin añima ndo jahá Jutu yo Nyoo tan Jutu Mañi yo Jesucristo.

Nu catyí ra Pablo tyin cuñí ra cahun ra ñuu Roma

⁸ Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyooho tyin tandihí ñi ityi caahan nyivi tyin tsinú xaan iñi ndo tsi ra Jesucristo.

⁹ Jahá tyiñu yu tyiñu Nyoo tsihin tsa ñi iñi añima yu. Tan caahan yu tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo.

¹⁰ Tan tsicán yu tsi ra na cuví cuhva cuñí ra, tan quitsi yu nu yucú ndo, tyin tsanaha xaan cuñí yu quitsi yu.

¹¹ Tyin cuñí yu jatyinyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihi ca ndo tsi ra.

¹² Tsa cuñí yu cahan yu tsihin ndo cuví tuhun ihya: tsa jandu iin tahan yo iñi yo tsihin tsa tsinú iñi yo tsi ra.

¹³ Yañi, cuñi yu tsa coto ndo tyin cuaha xaan tsaha cuñí yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñí yu quitsi yu ñuu ndo tyin cuñí yu cahan ca yu tuhun Nyoo tsihin nyivi tyin tacan tan nducuaha ca ñi tsinu iñi tsi ra, tumaa javaha yu tsihin nyivi inga ca ñuu.

14 Tyin tsa ñiñi cuñí tsi cahan yu tuhun tsa jacacú ra Cristo tsi yo tsihin nyivi Grecia tan nyivi inga ñuu; tahan ñi nyivi tsa tsitó xaan tan nyivi soho.

15 Yacan cuenda, cuñí yu cahan yu tuhun ra Cristo tsihin nyooho tsa iyó ndo Roma ihya.

Tuhun Nyoo iyó xaan tunyee iñi itsi

16 Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihi nyivi tsa tsinú iñi tsi ra Cristo. Tsa jihna ñi maa ñi maa tsihin nyivi Israel cahan ndi tuhun ra Cristo, maa tyin vityin caahán ndihi tucu ndi tsihin nyivi tsa ñavin nyivi Israel cuví.

17 Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvin ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyivi tsa janduvahá Nyoo añima, iyó ñi ñayivi tsa tsihin tsa tsinú iñi ñi tsi ra.”

Tandihí nyivi tan iyó cuatyí ñi

18 Nyehé yo tyin Nyoo, ra nyaá gloria, tatsí tuñi ra tsi nyivi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyivi tsa nditsa.

19 Tsitó ñi tsa iyó Nyoo tyin juvin ñi maa ra janahá can tsi ñi.

20 Ña cuví catyí yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihí tsa javahá ra. Tsanaha javahá ra ñuhu ñayivi tan yacan janahá tsi yo tyin iyó Nyoo tan iyó tunyee iñi tsi ra. Nyivi tsa ña cuñí coto tsi Nyoo ña cua coo tucahnu iñi tsi ñi.

21 Vasu ndi maa tsitó ñi tsa iyó Nyoo tsihin tsa nyehé ñi tandihí tsa javahá ra, ña cuñí ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayivi tyaá jiñi ñi. Tan tsa cuenda yacan ndu-soho ñi.

22 Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi.

23 Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyivi tuhvá tsihi, tan nda cuanda tsitoho tsa caá tumaa caá saa, tan coo, tan quití iyó cumi tsaha.

24 Yacan cuenda nacoó Nyoo tsi ñi nu tsa caquiñi tsa javahá ñi. Tan javahá ndihi tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu.

25 Ña cuñí ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahvi ñi tsa javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñí tsi jacahnu yo tacan ñi maa. Na cuví tsi tacan.

26 Yacan cuenda jaña ndaha Nyoo tsi ñi na javaha ñi tsa tsahá ticanuu tsi ñi. Tyin nda cuenda ñiñaha tan tsicoó ñi tsihin ñi nduyi, tan ña vaha tacan.

27 Tan juvin ñi tacan javahá tucu rayi, nacoó ra naha tsa iyó ra naha tsihin ñasihi ra naha, tan iyó ra naha tsihin ra ndusihi naha ra tan tsahá ra naha ticanuu tsi yañi ra naha. Tan tsa cuenda can tatsí tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

28 Tan tsa cuenda tsa ña cuñí ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñí maa ñi.

29 Tyin tandihi nuu tsa ña vaha javahá ñi. Ñiñaha tsicoó ñi tsihin rayi tan ña tindaha ñi. Rayi tsicoó ra naha tsihin ñaha tan ña tindaha ra naha. Maa ñi tsa caquiñi javahá ñi. Cuñi ñi coo cuaha ndaha tyiñu ñi. Javahá ñi tsa ndavaha ñi. Niyiyo iñi ñi tsa iyó tsi inga nyivi. Tsahñi ñi nyivi. Cañi tahan ñi tsihin nyivi ñi. Jandaví ñaha ñi. Quiñi iyó ñi tan caahán ñi cuendu.

30 Caahán ñi ndavaha ñi siqui inga nyivi. Ndasi cuñi ñi nyehe ñi tsi Nyoo. Caahán nyaa ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndi tsi sihi ñi.

31 Ña cuñi ñi cutuñi iñi ñi. Ña javahá ñi tsa catyi ñi tyin cua javaha ñi. Ña cuñi maa ñi tsi ndi intuhun nyivi. Ña tsitó

ñi jahá ñi tucahnu iñi tan ña cundaahví iñi ñi nyehe ñi tsi nyivi.

32 Tsitó vaha ñi tyin Nyoo ña cuñi ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihí ñi tsa javahá ñi can, tan tatun inga nyivi javahá tacan, si xaan cuñi ñi.

2

Tatsí tuñi Nyoo tsi nyivi maa tyin tsihin tsa nditsa

1 Nyoooho tsa nyehé cuatyí tsa javahá inga nyivi, iyó cuatyí ndo tyin jacutuñi ndo tsi ñi tsa cuenda cuatyí javahá ñi. Yoñi jaha ndáa nyoooho cuví ndo. Tyin tsa jacutuñi ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihi ndo cuatyí tsa javahá ñi.

2 Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra.

3 Nyoooho tsa jacutuñi tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo.

4 ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñi ra tsa nasama ndo cuhva iyó ndo.

5 Maa tyin nyoooho jandavá xaan ndo aña ndo. Tan ña cuñi ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi

ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa.

6 Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo.

7 Nyoo cua kuhva ra ñayivi tsa ña cua naa maa coo nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñi ñi coo cuivi ñi tsihin ra. Cua ñihi ñi tandihi yacan tyin nanducú ñi can.

8 Maa tyin cuaha ca tsa uhvi cua janyehe ra tsi nyivi tsa javahá tsa cuñi maa ñi, ñi tsa ña tyaá yahvi tuhun nditsa, tan javahá ñi tsa ña vaha.

9 Cuaha xaan tundoho tan tsa uhvi cua nyehe tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihi ra tsi nyivi tsa ñavin ñi Israel cuví.

10 Maa tyin tandihi nyivi tsa javahá tsa vaha, cua kuhva Nyoo tsa cahnu cuví ra tsi ñi. Cua jacahnu ra tsi ñi tan cua kuhva ra tsa taxin coo añima ñi. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihi ñi tandihi can.

11 Tyin Nyoo inducu ñi cuñi ra nyehé ra tsi iin yo tan tsi inga yo. Ña tavá tsiyo ra ndi intuhun yo.

12 Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua

cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can.

13 Tyin nyivi tsa javahá kuhva catyí ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyí ley can, ña cua cacu ñi.

14 Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi.

15 Tyin tsihin kuhva iyó ñi, janahá ñi tyin iyó ley Nyoo tsitsi añima ñi. Tsa tsiñi tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi.

16 Tacan cua cuví quivi cua jacutuñi ra Jesucristo cuatyí tandihi nyivi jaha Nyoo. Cua cutuñi tandihi maa nyivi tsa javahá xeehe kuhva tsicá iñi ñi. Tumaa catyí tuhun Nyoo tsa caahán yu tsihin ndo.

Nyivi Israel nyicún ñi ley Nyoo tsa tyaá ra Moisés

17 Maa tyin nyooho nyivi Israel cuví ndo, catyí ndo. Tan nyitá iñi ndo ley Nyoo tsa tyaá ra Moisés. Tan nduyaá ñi maa ndo tyin catyí ndo tyin nyivi Nyoo cuví ndo.

18 Tan tsitó ndo kuhva cuñi Nyoo tan ley can janahá tsi tsi ndo tsa nacatsí ndo tsa vaha.

19 Tan cuñi tucu ndo tyin vaha jaquihín ityi ndo tyin nyivi cuaa, ñi tsa ña tsitó ley.

Jandunditsín ndo nu yucú nyívi nu naa, cuñí maa ndo.

20 Tan cuñí tucu ndo tyin tsitó ndo tandihí ley Nyoo tan jaquihín ityi ndo tsi nyívi tsa ña tsitó, ñi tsa ñaha ca caca vaha tsihin Nyoo.

21 Tatun tsitó ndo jacuahá ndo tsi inga nyívi, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhú ndo?

22 Juvín ñi catyí ndo tyin ña vaha coo inga ñaha tsi iin rayí, o inga rayí tsi iin ñaha, ¿nacuenda tyin maa ndo javahá ndo tacan? Ndasí cuñí ndo nyehe ndo tsitoho, ¿nacuenda tyin suhú ndo ndaha tyíñu tsa iyó tsitsi vehe ñuhu can?

23 Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra.

24 Yacan cuenda catyí tuhun Nyoo tyehen: “Nyívi tsa ñavin nyívi Israel cuví, caahán ñi ndavaha ñi síqui Nyoo tsacatyí nyooho.”

25 Nditsa tyin circunción tsa cuví tuñi Nyoo, tsa janahá tyin cuví yo nyívi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can.

26 Maa tyin rayí tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatyin nyisó ra tuñi can.

27 Ra tsa ña nyisó tuñi can,

tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo.

28 Vasu ndi maa cuví ndo nyívi Israel tan nyisó ndo tuñi ra, ña cuví cuví ndo nyívi Nyoo tun nduve ley ra iyó añima ndo.

29 Tyin nyívi iyó ley Nyoo añima, ñi ican cuví nyívi Nyoo. Tyin maa Tatyí li Nyoo tyaá tuñi ra añima ñi, tan ñavin cuñu ñuhu ñi. Tatyí li Nyoo javahá can, ñavin ley tsa tyaá ra Moisés. Nyívi ihya cua cuví nyívi vaha nuu Nyoo, tan ñavin nuu nyívi.

3

1 ¿Nacaa jatyinyee tsa cuví yo nyívi Israel tsi yo? ¿O nácaa jatyinyee tuñi Nyoo tsi yo?

2 Cuaha cuhva jatyinyee tsi tsi yo. Iin cuhva jatyinyee tsi tsi yo tyin Nyoo tsahá ra ley maa ra tsi yo tsa cuví yo nyívi Israel.

3 ¿Náa cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsinú iñi yo tsi ra?

4 ¡Ña cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyívi vatya ñi, ra ican javahá ra tandihí tsa caahán ra. Tyin catyí nu tutu ra tyehen: Jutu Mañi yu, cua nyehe nyívi tyin ña vatya un.

Tan cua coto ñi tyin nditsa tsa caahán un.

5 Tsa caquiñi tsa javahá tandihí yoo, tsa iyó nu ñuhu ñayívi ihya, janahá tyin

Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyí yo tumaa catyí nyiví tyin ña vaha tsa tatsi tuñi Nyoo tsi yo tyin janahá yo tyin vaha ra?

⁶ Nyiví catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

⁷ Tatun javahá nyiví tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa.

⁸ Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyiví tyin Nyoo vaha ra. Yihí ñi catyí ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyí tsa caahán ñi cuendu siqui ndi.

Tandihí yo tan iyó cuatyí yo

⁹ Tan nácaa ¿a vaha ca yoo tsa cuví yo nyiví Israel tan ñavin ca inga nyiví? Ña vaha ca yo. Tyin tsa yaha janaha yu tsi ndo tyin tandihí yo tan iyó cuatyí yo. An cuví yo nyiví Israel, o ña cuví yo nyiví Israel, maa tyin ndacá ñaha cuatyí tsi yo.

¹⁰ Tacan catyí nu tutu Nyoo, nu catyí tsi tyehen:

Ndi intuhun nyiví vaha nduve iyó.

¹¹ Nduve nyiví cuñí cutuñi iñi tuhun Nyoo.

Yoñi cuñí nanducu tsi ra.

¹² Tandihí ñi nacoo ñi tsi Nyoo, tan tandihí ñi tan cuanaa ñi.

Ndi intuhun ñi tan ña javahá ñi tsa vaha.

¹³ Jucun ñi cuví tsi tumaa iin ñaña ndiyí tsa ticohó.

Tan tsihin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

¹⁴ Maa ñi tsa ndvaha ñi caahán ñi.

¹⁵ Yatyí xaan tsahñí ñi tsi tahan ñi.

¹⁶ Janyehé ñi tundoho tan tucuihya iñi tsi nyiví tsihin cuhva iyó ñi.

¹⁷ Tan ña tsitó ñi nácaa coo taxin ñi tsihin Nyoo, tan ndi tsihin nyiví.

¹⁸ Ndi ña tsicá iñi ñi tatun coo iin quiví cua tatsi tuñi Nyoo tsi ñi, catyí tuhun Nyoo nu tutu ra.

¹⁹ Tsitó yo tyin tandihí tsa caahán ley Nyoo tsa tyaa ra Moisés, cuví tsi tsa cuenda nyiví tsa yihí ndaha ley can, tyin tacan tan ña cuvi catyí ñi tyin nduve cuatyí ñi iyó. Maa tyin coto tandihí nyiví iyó nu ñuhu ñayiví tyin cua tatsi tuñi Nyoo tsi ñi tsa cuenda cuatyí ñi.

²⁰ Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

Tsa cuenda tsa tsinú iñi yo tsi Nyoo tan nduvaha yo nuu ra

21 Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuvī ndusu yuhu Nyoo janahá nácaa coo vaha yo tsihin Nyoo.

22 Tyin tsa cuenda tsa tsinú iñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyivi Israel o ñavin.

23 Tandihī yo tan iyó cuatyī yo, tan tsa cuenda yacan ña cuvī quihvi yo nu ndacá ñaha Nyoo.

24 Maa tyin tsahá maa ra tsa vaha ra tsi yo, tan yacan jahá tsa naquihín cuenda ra tsi yo tumaa tsatyin vaha yo, tyin tsa yaha tyahvi ra Cristo Jesús tsa cuenda cuatyī yo. Tan yacan cuenda ña tsicán ca ra yahvi tsi yo.

25 Nyoo jaquitsi ra tsi ra Cristo tyin cúu ra nu cruu tan cati ra ñiñi ra tsa cuenda cuatyī yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuvī, tyin nyehe nyivi tyin Nyoo javahá ra tsa vaha. Tahān tsanaha, Nyoo ña tñin cuenda ra cuatyī nyivi tsa cuenda tyin cua quitsi ra Cristo tan janaa ra cuatyī ñi.

26 Tan tacan cuvī tyin vityin nyehé nyivi tyin Nyoo tacan ñi maa vaha ra, tan naquihín ra tsi tandihī yo tsa tsinú iñi tsi ra Jesús tumaa tsatyin vaha yo.

27 ¿A cuví nduyaa yo vi-

tyin? Ña cuvī. ¿Nacuenda? Tsa cuenda tyin ña cuvī catyi yo tyin javahá yo tandihī tsa catyī ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra.

28 Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyī ley o ña javahá yo itsi.

29 ¿A Nyoo cuenda nyivi Israel ñi cuvī Nyoo? ¿A ñavin juven ñi cuvī tucu ra Nyoo nyivi tsa ñavin ñi Israel cuvī? Juvín ñi cuvī tucu ra Nyoo ñi can.

30 Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyivi Israel, o nduve.

31 Tatun tacan, ¿a cuñí tsi catyi tyin nduve ca yahvi nyaá ley tsahnu can? ¡Ñavin tsa nduve yahvi nyaá tsi! Cahnu cuvī tsi, tan vityin tsihin tunyee iñi maa ra Cristo janahá yo tyin nditsa tsa cahnu cuvī tsi.

4

Cuhva tsicoo ra Abraham janahá tsi tsi yo nácaa nduvahá yo nuu Nyoo

1 ¿Náa catyī yo tsa cuenda ra Abraham, tsii tsaahnu yo? ¿Nacuenda naquihín cuenda Nyoo tsi ra tumaa tsatyin vaha ra?

2 Tun tsatyin naquihín cuenda Nyoo tsi ra tsa

cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo.

³ ¿Náa catyí nu tutu Nyoo? Catyí tsi tyin ra Abraham tsinú iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra.

⁴ Vaha, vityin cua kuhva yu iin kuhva tsi ndo: Ra jahá tyiñu, quihín ra yahvi tsa cuenda tyiñu jahá ra tan ña tuhvá nyivi kuhva maa xuhun tsi ra tun ña jahá tyiñu ra.

⁵ Maa tyin iin ra tsa ña jahá tyiñu tan ñihi ra tsa ñihi ra, ñihi ndaahvi ra itsi cuví can. Tacan cuví nyivi iyó cuatyí tsa ña nducú cacu tsihin tsa javahá ñi kuhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatyin vaha yo tun tsinú iñi yo tsi ra.

⁶ Ra David cahán ra siquí tsa sii cuví tsi nyivi tsa naquihín cuenda Nyoo tumaa tsatyin vaha ñi tan ña tíin cuenda ra cuatyí tsa javahá ñi.

⁷ Tyehen catyí ra David: Sii xaan cuví tsi nyivi tsa jahá Nyoo tucahnu iñi tsi tan ña jahá ra cuenda cuatyí ñi.

⁸ Sii xaan cuví tsi ñi tsa ña tíin cuenda Nyoo cuatyí.

⁹ ¿A cuñí maa ndo tyin tsa cuenda nyivi nyisó tuñi Nyoo ñi cuví tusii iñi ihya, o cuví tucu tsi tsa cuenda nyivi ña nyisó tuñi can? Tsa yahá catyí yo tyin Nyoo jahá ra tyin

vaha ra Abraham tsa cuenda tsa tsinú iñi ra tsi ra.

¹⁰ ¿Ama javahá Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yahá? Ñavin tsa tsa yahá, tyin tsa ndi cumañi ca.

¹¹ Yahá tsa naquihín Nyoo tsi ra Abraham tumaa tsatyin vaha ra, tacan tan tsinyaa tuñi can tsi ra tumaa iin seña tyin tsa yahá nduvahá ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihi yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo.

¹² Nditsa tyin ra Abraham cuví tucu ra jutu nyivi Israel, tandihi ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinú iñi maa ra Abraham, tsii tsahnu yo, quivi tsa ñaha ca cunyaa tuñi can tsi ra.

Tsihin tsa tsinú iñi yo ñihi yo tsa tsahá Nyoo tsi yo

¹³ Nyoo catyí ra tsihin ra Abraham tan tsihin tata ra tyin cua kuhva ra tsa cua cundaca ñaha ñi ñuhu ñayivi tsihin ra. Maa tyin tsa cahán Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihín ra tsi ra tumaa tsatyin vaha ra.

¹⁴ Tun tsatyin maa ñi maa nyivi tsa javahá kuhva catyí ley, cua ñihi tsa cua kuhva Nyoo, nduve náa catyí tsinú

iñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra.

¹⁵ Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo cuhva catyí tsi. Maa tyin tun tsatyin nduve ley iyó, ña cua coo cuatyí yo.

¹⁶ Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihí yoo tsa cuví tata ra Abraham. Ñavin maa ñi nyivi tsinú iñi tsi Nyoo tan tyaá yahvi ley tsa tyaá ra Moisés cua ñihi tsa cua cuhva Nyoo, tyin cua ñihi ndihi tucu nyivi tsa ña nyitá iñi ley, tatun tsinú iñi ñi tsi ra tumaa tsa tsinú iñi ra Abraham. Ra ihya cuví jutu tandihí nyivi tsa tsinú iñi tsi Nyoo.

¹⁷ Tyin catyí ra nu tutu ra tyehen: “Yoocho cua cuví tumaa jutu nyivi cuaha tsa cua coo nu ñuhu ñayivi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú iñi ra tsi Nyoo, tyin Nyoo janandotó ra ndiyi tan caahán ra tuhun tsa ñaha ca coo tumaa tsatyin tsa iyó tsi.

¹⁸ Ra Abraham tsa tsahnu xaan ra quivi tsa catyí Nyoo tyin cua coo sehe ñasihí ra, tan tsitó ra tyin ña cuví ca coo sehe ñi. Maa tyin tsinú iñi ra tan ñihí ra tsa cahān Nyoo tsihin ra. Tan cuví ra jutu nyivi cuaha, tumaa

cahān maa Nyoo tsihin ra: “Tyehen cua nducuaha nyivi tata un”.

¹⁹ Vasu ndi maa tsa yatyin ña iin cientu cuiya ra Abraham, ña jandihí ra tsa tsinú iñi ra. Tahan ñi maa ra tan ña Sara ñasihí ra, ña cuví ca coo sehe ñi, tyin tsa cuyatyin cuii cúu ñi tyin tsahnu xaan ñi.

²⁰ Maa tyin ña ndu uvi iñi ra tsa cua ñihi ra tsa catyí Nyoo tyin cuhva ra tsi ra. Tsinú iñi ra tsihin tsa ñi iñi añima ra. Tan ña jandihí ra tsa nyitá iñi ra tsi Nyoo. Tan jacahnú ra tsi Nyoo,

²¹ tsa cuenda tyin tsitó vaha ra tyin Nyoo iyó tunyee iñi tsi ra tsa javaha ra tsa catyí ra tsihin ra.

²² Yacan cuenda Nyoo naquihín ra tsi ra tsa cuenda tsa tsinú iñi ra tsi ra.

²³ Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú iñi ra tsi ra, ñavin tsa cuenda ra Abraham ñi cuví tsi,

²⁴ tyin tsinyaa tucu tsi tsa cuenda yoo. Tyin naquihín Nyoo tsi yo tsa cuenda tsa tsinú iñi yo tsi ra, tyin juvin ra janandotó tsi ra Jesús, Jutu Mañi yo.

²⁵ Ra Jesús quitsi ra quitsi cúu ra tsa cuenda cuatyí yo, tan nandotó ra tyin tacan tan cuví nduvaha yo nuu Nyoo.

5

Tsa cua ñihi yo tsa cuenda tsa nacoq vaha yo tsihin Nyoo

¹ Tsa yaha nduvaha yo nuu Nyoo tsa cuenda tsa tsinú iñi

yo tsi ra. Tan vityin iyó vaha yo tsihin ra jahá Jutu Mañi yo Jesucristo.

² Tyin tsa cuenda ra Cristo ñihí yo tsa vaha Nyoo tyin tsinú iñi yo tsi ra. Tan iin cuñi yo tyin tsa naquihin yo can. Tan sii cuñi yo tyin cua cuhva ra tsa cahnu cuvi yo tan javaha yo tsa cuñi maa ra tyin javaha yo.

³ Tan ñavin tsa cuenda yacan ñi taahán tsi cusii iñi yo, tyin taahán tucu tsi cusii iñi yo tun nyehé yo tundoho. Tyin tsitó yo tyin tun cun- yee iñi yo nyehé yo tundoho, tacan cua cunyee iñi yo cuatu yo nda cuanda ñihi yo tsa cua cuhva Nyoo tsi yo.

⁴ Tatun cunyeé iñi yo yahá yo tandihi tundoho, sii cuñi Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra.

⁵ Tatun tsitó yo tyin cua quita vaha yo nuu ra, ña taahán tsi nducahan nuu yo nyehé yo tsi ra, tyin Tatyí lí ra tsa tsaha ra coo añima yo janahá tsi tsi yo tyin cuñi xaan ra tsi yo.

⁶ Tsanaha yoo ña ñihí yo cuhva jacacu maa yo tsi yo. Tacan tan quivi taha maa tsi quitsi ra Cristo, quitsi cúu ra tsa cuenda cuatyí yo.

⁷ Tsitó yo tyin ndi intuhun yo tan ña cana iñi yo cúu yo tsa cuenda inga nyivi, vasu ndi maa vaha ñi. Maa tyin tun vaha xaan iñi nyivi can vasiqui cahnya iñi iin yo cúu yo tsa cuenda ñi.

⁸ Maa tyin Nyoo jaquitsi ra tsi ra Cristo, tan yacan janahá tsi yo tyin cuñi xaan ra tsi yo. Quitsi ra quitsi cúu ra tsa cuenda yo vasu ndi maa iyó xaan cuatyí yo.

⁹ Tan tsa cuenda tsa tsihi ra Cristo, nacoó vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quivi cua tatsi tuñi Nyoo tsi nyivi ña tsinú iñi tsi ra.

¹⁰ Tahan tsanaha xaan iñi yo tsi Nyoo, maa tyin vityin iyó vaha yo tsihin ra tsa cuenda tsa tsihi ra Cristo, Sehe ra. Yacan cuenda tsa nyitá vaha iñi yo tyin cua jacacu ra tsi yo tsa cuenda tsa iyó yo ñayivi Sehe ra, tyin tsa iyó vaha yo tsihin ra.

¹¹ Tan ñavin yacan ñi, taahán tucu tsi cusii iñi yo tsihin Nyoo tyin tsa cuenda Jutu Mañi yo Jesucristo tan nduvaha iyó yo tsihin ra.

Ra Adán tan ra Cristo

¹² Tsanaha intuhun ñi rayii tsicoó cuatyí, tan tsa cuenda intuhun ñi ra can tsaá cuatyí nanii ñuhu ñayivi tan tsicoó tuhun tsiihi. Tan tuhun tsiihi can nacuñá can tyin tandihi nyivi tan tsicoó cuatyí ñi.

¹³ Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyivi, maa tyin ña tñn cuenda Nyoo cuatyí ñi tsa cuenda tyin nduve ley iyó.

¹⁴ Maa tyin nda cuanda quivi tsicoó ra Adán tan nda cuanda quivi tsicoó ra Moisés, tsindaca ñaha tuhun tsiihi tsi tandihi nyivi tyin

iyó cuatyí tandihí ñi, vasu ndi maa ña javahá ñi tumaa javahá ra Adán tsa ña tyaa yahvi ra tsa cahān Nyoo tsihin ra. Ra Adán quítsi ra tsihin cuatyí, maa tyin ra Cristo quítsi ra jacacū ra tsi yo.

¹⁵ Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihí cuaha nyívi. Tacan tucu vityin, Nyoo jacacú ra tsi yo tsa cuenda intuhun rayii, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihí nyívi cuví tsi.

¹⁶ Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandihí nyívi. Maa tyin vityin Nyoo ña cuñí ra yahvi tan jacacú ra tsi yo. Naquihín ra tsi yo tumaa tsatyin vaha yo, vasu ndi maa cuaha cuatyí yo tsicoo.

¹⁷ Nditsa tyin quítsaha ndacá ñaha tuhun tsiihí tsi tandihí nyívi jahá cuatyí tsa javahá ra can, maa tyin vityin ña cuví ca quihí ndaha can tsi ñi tsa tsa nduvahá nuu Nyoo, ñi tsa iin nyita ñi naquihín tsa vaha ra. Ñi ican iyó ñi ñayívi tsa tan yihí ndaha ñi tsi ñi tan tsi nu ña vaha jahá intuhun rayii, ra Jesucristo.

¹⁸ Nyoo tatsí tuñi ra tsi tandihí nyívi iyó nu ñuhu ñayívi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra

tan coo yo ñayívi nyito tsa cuenda tsa vaha tsa javahá ra Jesucristo.

¹⁹ Cuñí tsi catyí tyehen: Tsa cuenda tsa ña tyaa yahvi iin rayii tsa cahān Nyoo, cuaha xaan nyívi tsicoo cuatyí. Ra ican cuví ra Adán. Tan vityin cuaha xaan nyívi cua nduvaha nuu Nyoo tsa cuenda tsa tyaa yahvi inga ra tsa cahān Nyoo. Tan ra ican cuví ra Cristo.

²⁰ Nyoo tsahá ra ley tsi ra Moisés tyin tacan tan coto nyívi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu iñi iyó tsi ra tsihin yo.

²¹ Tahān tsanaha, cuatyí yo quítsi ndaca tuhun tsiihí, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayívi nyito tsa ña cua naa maa coo yo tsa cuenda Jutu Mañi yo Jesucristo.

6

Ña cua javaha ca yo tsa caquiñi tyin cua javaha yo cuhva catyí ra Cristo

¹ ¿Náa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu iñi tsi ra tsihin yo?

² Ña vaha. Tyin yoo tsa tsa ndu uví iñi cuatyí tumaa tsa tsihí cuatyí yo cuví can.

Tan yacan cuenda, ña cuví ca javaha yo tsa caquiñi vityin.

³ ¿A ña tsitó ndo tyin tsa tsi-coondutyá yo janahá tsi tyin ndu iin yo tsihin ra Cristo Jesús? Yacan cuñí tsi catyi tyin tsa yaha tsihi yo tsihin ra.

⁴ Tsa quihví yo tsitsi ndutyá tsa tsicoó ndutyá yo cuví tsi tumaa tsa tsihi yo tan quihví ñuhu yo tsihin ra Cristo tsa tsihi ra. Tan tumaa tsa nandotó ra Cristo jaha Nyoo tsihin tunyee iñi ra, tacan nandotó tucu yo tsa quitá yo tsitsi ndutyá tsa tsicoondutyá yo. Tan vityin iyó yo ñayivi tsa tsihin ra.

⁵ Tumaa tsa tsihi ra Cristo, tacan tsihi tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihi yo tsihin ra, tacan cua nandoto tucu yo tumaa nandotó ra.

⁶ Tan tsitó yo tyin tandihi cuhva tsicoo yo tahan tsanaha, tsa yaha tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí.

⁷ Tyin nyivi tsa tsa yaha tsihi, ña cuví ca javaha ñi tsa caquiñi.

⁸ Tan yoo tsa tsa tsihi tsihin ra Cristo, nyitá iñi yo tyin cua coo yo tsihin ra.

⁹ Tsitó yo tyin ra Cristo nandotó ra tsa yaha tsihi ra, tan vityin ña cúu ca ra tyin nduve ca tunyee iñi iyó tsi tuhun tsihi tsa cahni can tsi ra.

¹⁰ Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cúu ca ra.

Vityin iyó ra, tan iyó ra tsa cuenda maa Nyoo.

¹¹ Tan tacan tucu nyooho, ña javaha ca ndo tsa caquiñi. Ña naa iñi ndo tyin tsa yaha tsihi ndo tan tsa tsindihí cuatyí ndo. Tan coo ndo cuhva cuñí Nyoo tsihin tsa iin ñi cuví ndo tsihin ra Cristo Jesús Jutu Mañi yo.

¹² Yacan cuenda ña cuhva ca ndo tsa jaha canaa cuñu ñuhu cuatyí ndo tsi ndo. Ña cuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñí tsi.

¹³ Ña cuhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yaha tsihi yo tan nandotó yo. Cuhva cuenda ndo cuñu ñuhu ndo tsi Nyoo tyin tacan tan javaha ndo tsa vaha.

¹⁴ Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaá ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

Musu tsa javahá tsa vaha

¹⁵ ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin.

¹⁶ Nyooho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahvi. Tun tyaá yahvi yo tsa caquiñi,

musu tsa caquiñi can cuvi yo, tan cua cunaa yo jahá tsa caquiñi can tyin tyaá yahvi yo tsi can. Maa tyin tun tyaá yahvi yo tsi Nyoo, cua cuvi yo nyivi vaha nuu ra.

17 Tyahvi nyoo tsi Nyoo, tyin vasu ndi maa nu quitsi tsi cuvi ndo musu tsa caquiñi maa tyin vityin tyaá yahvi ndo tuhun Nyoo tsa cutuhva ndo tsihin tsa ñi ñi ñi añima ndo.

18 Tsa yahá ndatsi cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo.

19 (Caahán yu tsihin ndo cuhva tsa ña yí ñi cutuñi ñi ndo tyin nyooho ñaha ca cutuñi vaha ñi ndo tuhun Nyoo.) Tumaa tsa tsahá cuenda ndo cuñu ñuhu ndo tsi tsa caquiñi tahañ tsanaha tan javahá ndo tsa ña vaha; tacan tucu vityin cuhva cuenda ndo cuñu ñuhu ndo tsi Nyoo tyin tacan tan coo ndo ñayivi cuiti, tan javaha ndo maa ñi maa tsa vaha nuu ra.

20 Quivi tsiquihí ndaha cuñu ñuhu cuatyí ndo tsi ndo, musu can cuvi ndo, tan ña yihí ndaha tsa vaha Nyoo tsi ndo.

21 Maa tyin nduve náa ñihí ndo tsihin can, tan vityin cahán nuu ndo tsa cuenda tsa javahá ndo tsanaha, tyin maa ñi tuhun tsihí tsahá can.

22 Maa tyin vityin ña ndacá ñaha ca cuatyí tsi ndo tyin tsa tsahá cuenda ndo tsi ndo tsi Nyoo. Tan vaha xaan tyin maa ñi tsa cuñi Nyoo javahá ndo. Tan nu cua ndihí tuhun

cua coo cuii ndo tsihin Nyoo.

23 Nyivi tsa javahá tsa caquiñi, cua cúu ñi. Maa tyin Nyoo tsahá maa ra ñayivi tsa ña cua naa maa coo yo tsa cuenda tsa iin ñi cuvi yo tsihin ra Cristo Jesús, Jutu Mañi yo.

7

Ley tsahnu ña ndacá ñaha ca tsi tsi nyivi yihí cuenda ra Cristo

1 Yañi, nyooho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi.

2-3 Tumaa iin ñaha tsa iyó yí, catyí ley tyin coo ña tsihin yí ña nda cuanda cúu ra. Maa tyin juvin ñi catyí tucu ley tun cúu yí ña tan nandoo ndaahvi ña, ña cua quihí ndaha ca ley can tsi ña. Tan cuvi tindaha ña tsihin inga rayí tan ña cua coo cuatyí ña. Maa tyin tsitsi tsa ndi iyó yí ña, ña cuvi coo ña tsihin inga rayí, tyin tun cua javaha ña tacan, cua coo cuatyí ña nuu Nyoo.

4 Tan tacan tucu nyooho yañi. Tsanaha ley Nyoo tsa tyaá ra Moisés yihí ndaha tsi tsi ndo tumaa yihí ndaha iin rayí tsi ñasihí ra. Maa tyin vityin tsa yahá tsihí ndo tan ña ndacá ñaha ca ley can tsi ndo. Tyin vityin ndacá ñaha inga rayí tsi ndo tan juvin ra cuvi ra Cristo, ra tsa nandoto jahá Nyoo. Tyehen cuvi tsehe tyin tacan tan cuatyíñu Nyoo tsi yo.

5 Tahañ tsanaha tsicoo yo cuhva cuñi cuñu ñuhu yo tan

ley tsahnu tsa tyaá ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsaha cuñí ca yo javaha yo tsa caquiñi tsa cuñí cuñu ñuhu yo. Tan yacan tsaha tuhun tsihi tsi yo.

⁶ Maa tyin vityin ña ndacá ñaha ca ley tsahnu can tsi yo, tyin tsa yaha tsihi cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí Ii Nyoo tsi yo, na jaha tyiñu yo tyiñu Nyoo tan ña javaha ca yo tumaa javaha yo quivi yihí ndaha ley tsahnu tsi yo.

Ley Nyoo janahá tyin iyó cuatyí yo

⁷ ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsahá Nyoo ley can, ña cua coto yu náa cuví cuatyí. Tan ndi ña cua coto yu tyin ña vaha nyiyo iñi yu tsa tsii inga nyivi, tun tsatyin ña catyí ley can tyin ña vaha nyiyo iñi yo.

⁸ Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsito yu ley Nyoo, quivi can quitsaha tsicá iñi yu javahá yu tsa ña vaha. Nu nduve ley iyó, ña tsitó nyivi náa cuví tsa ña vaha.

⁹ Quivi tsa ña tsitó yu náa cuñí tsi catyí ley Nyoo tsa tyaá ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu

tyin nuu Nyoo tsa tsihi yu jaha cuatyí yu.

¹⁰ Catyí ley can tyin tatun tyaá yahvi nyivi itsi, cua coo cuii ñi ñayivi nyito. Maa tyin yuhu tsihi yu nuu Nyoo jaha ley can tyin ña tyaá yahvi yu itsi. Tyin catyí tsi tyin nyivi tsa ña tyaá yahvi itsi, taahán tsi cunaa ñi nuu Nyoo.

¹¹ Cuatyí yu tsatyin can ley can, tan jandavi ñaha can tsi yu, tyin catyí ley tyin tatun ña tyaá yahvi yo itsi, taahán tsi cunaa yo nuu Nyoo.

¹² Ley can ii xaan tsi tyin tuhun tsaha maa Nyoo cuví tsi, tan tandihi tsa catyí ra tyin javaha yo, vaha tsi, tan cuiti xaan tsi.

¹³ Tan ñavin ley vaha ihya jacunaa tsi yu. Tyin tsa ña vaha tsa javaha yu, yacan jacunaa tsi yu. Yacan cuenda cunaa yu nuu Nyoo tyin ley vaha can janahá tsi yu tyin cuatyí cuví tsa javaha yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuví cuatyí javahá yo.

Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

¹⁴ Tan tsitó yo tyin maa Tatyí Ii Nyoo tsaha ley can, yacan cuenda vaha tsi. Maa tyin yuhu iyó cuatyí yu tyin ra ñayivi cuví yu. Javahá yu tsa caquiñi tyin maa cuatyí can ndacá ñaha tsi yu.

¹⁵ Ña cutuñi iñi yu náa taahán yu, tyin tsa vaha tsa cuñi yu javaha yu, ña javahá

yu can. Maa tyin javahá yu tsa ña vaha tsa ña cuñí yu javaha yu.

16 Tan tsa javahá yu tsa ña cuñí yu javaha yu, tsihin yacan nacotó yu tyin ley Nyoo vaha tsi.

17 Yacan cuñí tsi catyi tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha.

18 Yuhu tsitó yu tyin cuñu ñuhu yu nduve tsa vaha iyó. Vasu ndi maa cuñí yu javaha yu tsa vaha, ña cuví javaha yu can.

19 Ña javahá yu tsa vaha tsa cuñí yu javaha yu, jañihí ca yu javaha yu tsa ña vaha tsa ña cuñí yu javaha yu.

20 Tan tatun javahá yu tsa ña cuñí yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

21 Nacotó yu tsa taahán yu: tun cuñí yu javaha yu tsa vaha, yatyi xaan ca javahá yu tsa ña vaha.

22 Tsitsi añima yu taahán xaan iñi yu ley Nyoo.

23 Maa tyin iyó inga ley tan yacan yihí ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yihí ndaha can tsi yu tumaa yihí ndaha ra vitya tsi iin ra nyíí vehe caa.

24 ¡Ndahvi yuhu ra ndaahvi! ¿Yóo cua jacacu tsi yu ndaha tsa ña vahá tsa cuñí cuñu ñuhu yu tan ña cahun yu anyaya?

25 Tsahá yu tyahvi nyoo tsi Nyoo tsa cuenda ra Jesucristo

tyin intuhun ñi maa ra cuví jacacu tsi yu. Vityin cutuñí iñi yu tyin cuñí tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihí tsa ña vaha tsa cuñí cuñu ñuhu yu javaha yu, yacan cua quihí ndaha tsi yu.

8

Tatyí Ii Nyoo jatyinyeé tsi tsi yo tan cuví coo yo ñayivi tsa

1 Maa tyin vityin, Nyoo ña tatsi tuñi ca ra tsi nyivi tsa iin ñi cuví tsihin ra Cristo Jesús, ñi tsa ña iyó ca cuhva cuñí cuñu ñuhu ñi tyin iyó ñi cuhva cuñí Tatyí Ii ra.

2 Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí Ii Nyoo tsi yo. Tan juvin tsi tsahá ñayivi tsa coo yo tsa cuenda tsa iin ñi cuví yo tsihin ra Cristo Jesús.

3 Nyoo javaha ra tsa ña cuvi javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyivi. Yacan cuenda Nyoo jaquitsi ra tsi Sehe ra. Cuví ra tumaa rayi ñuu ñayivi tan tyahvi ra tsa cuenda cuatyí yo tyin tacan tan cundihí tsa javahá yo cuhva cuñí cuñu ñuhu yo.

4 Javaha ra tyehen tyin tacan tan cuví javaha yo cuhva catyí ley tan ñavin cuhva cuñí cuñu ñuhu yo tyin vityin iyó yo cuhva cuñí Tatyí Ii Nyoo.

5 Nyivi tsa iyó cuhva cuñí cuñu ñuhu, maa ñi cuhva cuñí cuñu ñuhu ñi tsicá iñi ñi, maa

tyin nyivi tsa iyó cuhva cuñí Tatyí li Nyoo tsicá iñi ñi cuhva cuñí Tatyí li Nyoo.

⁶ Nyivi tsa tsicá iñi maa ñi maa tsa cuñí cuñu ñuhu ñi, cua cunaa ñi. Maa tyin yoo tsa tsicá iñi cuhva cuñí Tatyí li ra, cua coo yo ñayivi tsa, tan cua coo tsa taxin aña yoo.

⁷ Nyivi tsa tsicá iñi cuhva cuñí cuñu ñuhu ñi, ñi xaan iñi tsi Nyoo cuví ñi can, tyin ña cuñí ñi javahá ñi cuhva catyí ley ra tan ndi ña cuví javaha ñi can.

⁸ Yacan cuenda nyivi tsa nducú tsa cuñí cuñu ñuhu ñi, ña cuví javaha ñi cuhva taahán iñi Nyoo.

⁹ Maa tyin nyooho ña iyó ca ndo cuhva cuñí cuñu ñuhu ndo, tyin iin ñi cuví ndo tsihin Tatyí li Nyoo, tun nditsa tsa iyó Tatyí li Nyoo aña ndo. Nyivi tsa nduve Tatyí li ra Cristo iyó aña, ñavin nyivi cuenda ra Cristo cuví ñi.

¹⁰ Maa tyin tun iyó ra Cristo aña ndo, nyitó aña ndo tyin janduvahá Nyoo tsi ndo nuu ra. Maa tyin cuñu ñuhu ndo tumaa tsa tsihi tsi jahá cuatyí.

¹¹ Nyoo janandoto ra tsi ra Jesús tsa yahá tsihi ra. Tan tacan tucu nyooho, tatun iyó Tatyí li ra aña ndo, cua janandoto ra cuñu ñuhu ndo tsihin Tatyí li ra tsa iyó aña ndo.

¹² Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñí cuñu ñuhu yo.

¹³ Tyin tatun maa ñi maa cuhva cuñí cuñu ñuhu ndo

iyó ndo, cua cunaa ndo nuu Nyoo. Maa tyin tatun tsihin Tatyí li Nyoo tan cuahán jandihí ndo tsa javahá ndo tsa caquiñi tsa cuñí cuñu ñuhu ndo, cua coo nyito ndo.

¹⁴ Tyin tandihí yoo tsa javahá cuhva jaquihín ityí Tatyí li Nyoo, sehe Nyoo cuví tsi yo.

¹⁵ Nyooho ña naquihín cuenda ndo Tatyí li Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí li Nyoo tsa tsahá tsa cuví ndo sehe Nyoo. Tan juvin ñi Tatyí li Nyoo tsahá tsa cahan yo tyehen tsihin Nyoo: "Tyatya". Yacan cuenda ña taahán tsi nayuhvi ndo.

¹⁶ Tan Tatyí li ra tsa naquihín yo ndu iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo.

¹⁷ Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehe ra Cristo tundoho, quivi cua tahan tsi, Nyoo cua jacahnu ra tsi yo iin caa ñi tsihin ra Cristo.

¹⁸ Tsitó yu tyin tundoho tsa nyehé yo vityin, luhlu cuii ñi cuví tsi tan ña cuví jandu inducu yo itsi tsihin tsa si caá tsa cua nyehe yo quivi tahan tsi.

¹⁹ Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñí tsi naha tsi nyehe tsi

naha tsi tsi nyivi cuví sehe ra.

²⁰ Tandihí tsa javahá ra, tsa iyó nu ñuhu ñayivi tan andivi, tsa tiví tsi. Vasu ña cuñí tsi tiví tsi, maa tyin Nyoo tsahá ra tsa tiví tsi tsa cuenda cuatyí tsa javahá nyivi. Maa tyin catyi ra tyin coo quivi cua ndutsaa nyico tsi.

²¹ Tandihí tsa javahá Nyoo tan cua ndutsaa tsi inga tsaha, cua quita nuña tsi tan ña cua tiví ca tsi, tyin cua nasama Nyoo cuhva caá tsi vityin. Tan sii xaan cua cuñí tsi iin caa ñi tsihin tandihí sehe Nyoo tyin ña cua tiví ca tsi.

²² Tsitó yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña.

²³ Tacan tucu yoó tsa naquihín cuenda Tatyí Ii tsa tsahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñí yo tsa tahan ñi tsi quivi tsa nasama Nyoo cuhva iyó cuñu ñuhu yo tan nyehe tandihí tsa javahá ra tyin cuví yo sehe ra.

²⁴ Vasu ndi maa ñaha ca ñihi yo tandihí can maa tyin tsitó yo tyin cua ñihi yo can tyin tsinú ñi yo. Tyin juvin ñi tsihin tsa tsinú ñi yo tan cacú yo. Tatun tsa nyehé yo tsa ndatú yo, nduve yahví nyaá cuatu ca yo can tyin tsa iyó maa can tsi yo.

²⁵ Maa tyin ndita ñi yo tsa cua ñihi yo tsa ña nyehe yo, cuñí tsi tsa cunyeé ñi yo cuatu yo can.

²⁶ Tan juvin ñi tacan

jatyinyeé Tatyí Ii Nyoo tsi yo tun nduve tunyee ñi iyó tsi yo tan ña tsitó yo nácaa ndacan tahvi yo tsi Nyoo cuhva taahán maa tsi. Tatyí Ii tsa iyó ñima yo tsicán tahvi tsi tsi Nyoo tsa cuenda yo tsihin tuhun tsa ña cutuñí ñi yo.

²⁷ Tsitó maa Nyoo náa iyó ñima yo, tan tsitó ra náa tsicán Tatyí Ii ra, tsa cuenda yoo tsa cuví yo nyivi ra tyin tsicán tsi cuhva cuñí maa ra ndacan yo tsi ra.

Tsa cuenda ra Cristo tan cuví jaha canaa yo siqui tundoho

²⁸ Tsitó yo tyin tandihí tundoho tsa nyehé nyivi tsa cuñí tsi Nyoo jatyinyeé can tsi ñi, tyin maa Nyoo cuví ra nacatsi tsi ñi, tumaa cuhva tyaa maa ra cuhva.

²⁹ Tyin nda quivi jihna ñi, tan tsa tsitó Nyoo yóo nyivi cua cunyicun tsi ra. Tan tyaa ra cuhva tyin cuví ñi sehe ra tan coo ñi cuhva cuñí ra. Maa tyin ra Jesucristo cuví ra cua cuví ra tsitsa tsa nuu tandihí ca yañi ra. Tan yañi ra cuví ñi yihí tuhun Nyoo.

³⁰ Tan ñi tsa tyaa Nyoo cuhva tyin cuví ñi sehe ra, cana ra tsi ñi. Tan ñi tsa cana ra, naquihín cuenda ra tsi ñi tumaa tsatyin vaha ñi. Tan ñi tsa naquihín cuenda ra tsahá ra tsa cahnu cuví ñi tsihin ra.

³¹ Yacan cuenda, ¿náa cua catyi yo? Tatun Nyoo tan nyaá ra tumañi ñi tsihin yo, ¿yóo cuví jaha canaa tsi yo? Yoñi.

³² Nyoo ña catyi ra tsa ña cua cuhva cuenda ra Sehe ra,

tyin tsahā cuenda ra tsi ra tyin cúu ra tsa cuenda tandihí yo. Tun tacan tsahā ra Sehe ra tsa cuenda yo, ¿a ña cua cuhva ra tandihí ca tsa tsiñí ñuhu tsi yo? Cuhva ra.

³³ ¿Yóo cuví xico ñaha tsi yo tsa cuví yo nyivi nacatsi Nyoo? Yoñi. Tyin Nyoo tsa naquihin cuenda ra tsi yo tumaa tsatyin vaha yo.

³⁴ ¿Yóo cuví catyi tyin cuhun yo anyaya? Yoñi. Tyin ra Cristo tsa tsihi ra tsa cuenda cuatyí yo, tan nandoto ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo.

³⁵ Nduve náa cuví quihin nyaa tsa cuñí xaan ra Cristo tsi yo. ¿A cuví quihin nyaa tundoho itsi, a tsihi, a tsa caahán nyivi tsi yo tsa cuenda tuhun Nyoo, a tama, a tun nduve jahma yo, a tsa yuhví, a tuhun tsihi? Ndi intuhun tsehe tan ña cuví quihin nyaa can tsa cuñí ra Cristo tsi yo.

³⁶ Tumaa catyí nu tutu Nyoo tyehen:

Jutu Mañi yu, tandihí ñi quivi tan cuñí nyivi cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyí tsi.

³⁷ Vasu ndi maa cuaha tundoho yahá yo, maa tyin tandihí ñi tsaha tsa nyehé yo tundoho tan jahá canaa yo, tyin ra tsa cuñí xaan tsi yo jatyinyeé tsi yo.

³⁸ Yacan cuenda tsitó vaha yo

tyin nduve maa náa cuví quihin nyaa tsa cuñí xaan Nyoo tsi yo. Ndi tuhun tsihi, ndi ñayivi iyó yo, ndi ángel, ndi tatyí ña vaha, ndi tsa cuví vityin, ndi tsa cua cuví ityi nuu ca, ndi intuhun can tan ña cuví jandusin can tsi yo tsihin Nyoo.

³⁹ Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuví jandusin can tsi yo tsihin Nyoo, ra tsa cuñí xaan tsi yo tsa cuenda ra Cristo Jesús Jutu Mañi yo.

9

Nyoo nacatsi ra tsi nyivi Israel

¹ Yuhu tsinú iñi yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí Ii Nyoo jaquihín ityi tsa tsicá iñi yu. Yacan cuenda tsitó vaha yu tyin tsa nditsa caahán yu tun catyí yu

² cuihaya xaan cuñí yu tan uhvi xaan cuñí añima yu

³ tsa cuenda nyivi ñuu yu, ñi Israel. Cuñí xaan yu tsi ñi. Tan nda cuanda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuví cacu ñi tsihin can.

⁴ Tata ra Israel cuví ñi. Tan Nyoo naquihin cuenda ra tsi ñi tumaa tsa sehe ra tsi ñi, Tan janahá ra tsa cahnu cuví ra tsi ñi, tyin tsinyaa ra tsihin ñi. Tan ndoo ra tuhun tsihin ñi, tan tsahá ra ley ra tsi ra Moisés na cuhva ra tsi ñi. Tan janahá ra tsi ñi nácaa cuñí ra tsa jacahnu ñi tsi ra.

Tan catyḡ ra tsihin ñi nácaa cua javaha ra tsa vaha tsihin ñi nu cuahán ca tsi.

⁵ Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juvin ra ndacá ñaha tandihḡ tsa iyó. ¡Na jacahnu yo tsi ra tacan ñi maa! ¡Tan na cuví tsi tacan ñi!

⁶ ¿A catyí yu tyin ña javaha Nyoo tumaa cuhva catyḡ ra tsihin nyivḡ Israel tahan tsanaha? Ñavin. Cuñí tsi coto yo tyin ña tandihḡ nyivḡ Israel tan cuví ñi nyivḡ Israel tsa nditsa.

⁷ Tan tacan tucu ña tandihḡ tata ra Abraham tan cuví ñi tata ra tsa nditsa. Tyin tsa cahan Nyoo tsihin ra, cahan tsi tuhun intuhun ñi sehe ra. Tyin catyḡ Nyoo tsihin ra tyehen: “Tsa cuenda ra Isaac sehe un tan cua coo nyivḡ tata un.”

⁸ Tsehe janahá tsi yo tyin ñavin tsa cuenda tsa cuví ñi nyivḡ tata ra Israel tan cuví ñi nyivḡ Nyoo. Tyin nyivḡ tsa tsinú iñi tsa cahan Nyoo tyin cua javaha ra, ñi ican cuví sehe ra. Tumaa ra Abraham, tyin ra Abraham tsinú iñi ra tsa cahan Nyoo tsihin ra

⁹ Tan tyehen cahan Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyḡ Nyoo tsihin ra.

¹⁰ Tan ñavin yacan ñi. Tyin cahan ndihḡ tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuví tsii tsaahnu yo, ra Isaac.

¹¹⁻¹² Maa tyin tsa ndi

cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyḡ Nyoo tsihin ña Rebeca tyin ra Esaú, sehe nuu ña, cua cuví ra musu ra tsa tsinu uví. Javaha Nyoo tacan tyin nacatsí ra tsi nyivḡ tsa cuñí maa ra nacatsi ra, tan ñavin tsa cuenda tsa javahá ñi.

¹³ Tumaa catyí ra nu tutu ra tyehen: “Cuñí ca yu tsi ra Jacob, tan ñavin ca ra Esaú.”

¹⁴ ¿Tun tacan náa cua catyí yo? ¿A catyí yo tyin ña vaha tsa javahá Nyoo? ¡Ña cuví!

¹⁵ Tyin catyḡ ra tsihin ra Moisés: “Cua cundaahvi iñi yu yóo nyivḡ cuñí maa yu cundaahvi iñi yu.”

¹⁶ Tacan javahá ra; cundaahví iñi ra tsi nyivḡ tsa cuñí maa ra cundaahví iñi ra. Tan ña cundaahví iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahvi iñi yóo cuñí maa ra.

¹⁷ Tumaa catyí nu tutu ra, nu caahán ra tyehen tsihin ra rey ñuhu Egipto: “Tsaha yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandihḡ nyivḡ yóo ra cuví yuhu”, catyḡ Nyoo.

¹⁸ Tan tsihin tsehe tsitó yo tyin Nyoo cundaahví iñi ra tsi nyivḡ cuñí maa ra. Tan jandundavá tucu ra añima nyivḡ cuñí maa ra jandundavá ra añima.

¹⁹ Tan vasiquḡ yooho cua catyí un: “Yoñi cuví javaha tsa cuñí maa ñi javaha ñi tun ña tsaha Nyoo tyin javaha

ñi can.” ¿Nacuenda tyin tyaa Nyoo cuatyí síqui ñi?

²⁰ Maa tyin ña vaha tun tsicá iñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yooho tan nacahan un nu caahán Nyoo? ¿A cuví catyí iin quisi tsihin ra javahá itsi: “Ña taahán iñi yu kuhva javahá un tsi yu”? Ña cuví.

²¹ Tyin nyívi tsa javahá ndaha tyiñu, iyó ndatu tsi ñi tsa javaha ñi náa cuñí maa ñi tsihin ñuhu quisi can. Tan iin ñi ñuhu quisi can tsatyíñu ñi juvin ñi tsihin can javaha ñi quisi vaha tan quisi peehe.

²² Ña cuví catyí yo tyin ña vaha Nyoo tsa cuenda tsa tsatyíñu ra tsi nyívi tsa cua kuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyívi caquiñi.

²³ Javahá ra tacan tyin tacan tan coto yoo tsa cuví yo nyívi tsa cundaahvi iñi ra tyin nda tsanaha tan tsa nacatsi maa ra tsi yo tyin kuhva ra tsa cahnu cuví ra tsi yo.

²⁴ Yacan cuenda nacatsi ra tsi yo. Tan yihí yo cuví yo nyívi Israel, tan nyívi tsa ñavin ñi Israel cuví.

²⁵ Tumaa catyí Nyoo nu tutu tsa tyaa ra Oseas:

Nyívi tsa ñavin nyívi ñuu yu cuví cua catyí yu tyin nyívi yu cuví ñi.

Ñi tsa ña cuñi yu, cua cuñi yu tsi ñi, catyí Nyoo.

²⁶ Tan nu catyí Nyoo: “Nyooho ñavin nyívi yu cuví ndo.” Juvin ñi ican cua catyí ra tsihin ñi: “Yuhu cuví Nyoo nyito, tan nyooho cuví sehe yu.”

²⁷ Maa tyin ra Isaías catyí ra tyehen tsa cuenda nyívi Israel: “Vasu ndi maa cuaha xaan nyívi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu.

²⁸ Tan tsa yatyin cuii cua jandaa Jutu Mañi yo tandihí tsa cahan ra tan cua tatsi tuñi ra tsi tandihí nyívi iyó nu ñuhu ñayivi.”

²⁹ Tumaa catyí tucu ra Isaías tahañ tsanaha:

Tun tsatyin Jutu Mañi yo, ra ndacá ñaha tandihí tsa iyó andivi, tan ña jacacu ra tsi juhva yo, tsa naa tandihí yo,

Tumaa naa nyívi ñuu Sodoma tan ñuu Gomorra tahañ tsanaha.

Nyívi Israel ña ñihí ñi kuhva nduvaha ñi nuu Nyoo,

³⁰ ¿Náa cua catyí yo? Nyívi tsa ñavin ñi Israel cuví, ña nducu ñi kuhva coo vaha ñi tsihin Nyoo, maa tyin Nyoo naquihin cuenda ra tsi ñi tumaa tsatyin vaha ñi tsa cuenda tsa tsinú iñi ñi tsi ra.

³¹ Tan nyívi Israel tsa nducú coo vaha tsihin Nyoo tsihin tsa javahá ñi kuhva catyí ley, ña cuví coo vaha ñi tsihin ra.

³² ¿Nacuenda? Tsa cuenda tyin cuñí ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa

tša catyihj tšaha ñi yuu tan nduva ñi cuví can.

³³ Yuu can caahán Nyoo tuhun nu tutu ra tan catyí ra: Tsaquín nyaa yu iin yuu nda ñuu Sión, tan janduvá tsi tsi nyivi.

Tan yuu can cuví ra Jesu-cristo.

Tan nyivi tša tsinú iñi tsi ra tša cuví yuu can, ña cua nduva ñi, catyí Nyoo nu tutu ra.

10

¹ Yañi, tšihin tša ñi iñi añima yu tan tsicán tahvi yu tša cuenda nyivi Israel tyin cuñí yu tša cacu ñi.

² Tsandaa cuví yu tyin cuñí ñi jacahnú ñi tsi Nyoo, maa tyin ña ñihí ñi cuhva javahá ñi can.

³ Tyin ña tsitó ñi tyin juvin ñi maa Nyoo cuví ra janduvahá tsi nyivi nuu ra, tan tša cuenda tša ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi.

⁴ Tyin ra Cristo tša quítsj ra tan javahá ra tandihí tša catyí ley, tyin tacan tan tandihí nyivi tša cua tsinu iñi tsi ra, naquihin cuenda Nyoo tsi ñi tumaa tsatyin vaha ñi.

⁵ Catyí ra Moisés tyin cuví nduvaha nyivi nuu Nyoo, tatun tyaá yahvi ñi tandihí tša catyí ley, tyin tyaá ra tyehen: “Nyivi tša tyaá yahvi tandihí tša catyí ley, cua coo ñi ñayivi tša ña cua naa maa.”

⁶ Maa tyin tša cuenda tša nduvahá yo nuu Nyoo tšihin tša tsinú iñi yo tsi ra Cristo,

catyí tutu ra tyehen: “Ña catyí un: ¿Yóo cundaa andivi? tyin tun cahan un tacan cuñí tsi catyí tyin januu un tsi ra Cristo nda nu ñuhu ñayivi tan jacacu ra tsi yo.” Ña cahan un tacan tyin ra Cristo tša yahá quítsj ra.

⁷ Tan ndi ña catyí un: “Cuñí tsi tša nuu iin ra nda nu yucú ndiyi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tša yahá nandoto ra.

⁸ Ña catyí un tacan tyin tyehen catyí nu tutu Nyoo: “Tuhun Nyoo yatyin iyó tsi tšihin ndo, iyó tsi yuhu ndo tan tsitsi añima ndo.” Tuhun ihya taahán tsi tsinu iñi ndo tyin juvin ñi tsi jacuahá tucu nyuhu.

⁹ Tatun catyí un tšihin yuhu un tyin ra Jesús cuví Jutu Mañi yo, tan tsinu iñi un tšihin añima un tyin Nyoo janandoto tsi ra tša yahá tšihí ra, cua cacu un.

¹⁰ Tyin tšihin añima yo cuñí tsi tsinu iñi yo tsi ra Cristo tan cuví nduvaha yo nuu Nyoo, tan tšihin yuhu yo cuñí tsi catyí yo tyin tsinú iñi yo, tyin tacan tan cacu yo.

¹¹ Tuhun Nyoo catyí tsi tyehen: “Ndi intuhun nyivi tša tsinú iñi tsi ra tan ña cua tahan ñi ticanuu.”

¹² Tyin Nyoo inducu ñi cuñí ra nyehé ra tsi nyivi Israel tan nyivi inga ñuu. Tyin intuhun ñi maa ra ndacá ñaha tsi tandihí yo. Tan nasocó ra tsi tandihí nyivi tša tsicán tahvi tsi ra.

¹³ Tyin tyehen catyí tuhun Nyoo: “Tandihí nyivi tša

tsicán tahvi tsi Jutu Mañi yo
cua cacu ñi.”

¹⁴ Maa tyin ¿nácaa cua nda-
can tahvi ñi tsi ra tatun ñaha
ca tsinu iñi ñi tsi ra? Tan
¿nácaa cua tsinu iñi ñi tsi ra
tatun ñaha ca cuñi ñi tuhun
ra? Tan ¿nácaa cua cuñi ñi
tuhun ra tatun yoñi cahan
tuhun ra tsihin ñi?

¹⁵ Tan ¿nácaa cuhun nyivi
cahan ñi nácaa coo taxin
nyivi, tatun yoñi jacuhun
tsi ñi? Tumaa catyí nu tutu
Nyoo: “Sií xaan cuví nu tsa
ña caahán tuhun vaha.”

¹⁶ Maa tyin ña tandihi nyivi
tan tyaá yahvi ñi tuhun tsa ja-
cacú Nyoo tsi yo. Tumaa catyí
ra Isaías: “Jutu Mañi yu, yoñi
cuñi tsinu iñi tuhun caahán
ndi”, catyí ra.

¹⁷ Yacan cuenda cuñi tsi tsa
tyaa soho jihna yo tuhun ra
Cristo, tacan tan tsinu iñi yo
tsi ra.

¹⁸ Maa tyin tsicá tucu iñi yu:
¿A ña tsiñi nyivi Israel tuhun
Nyoo? ¿Tsiñi ñi! Tumaa catyí
nu tutu Nyoo:

Jutu Mañi yu, nyivi tsa jacotó
tuhun un tsa jacotó ñi
tuhun un nanñi cahnu
nu ñuhu ñayivi,
tan ña nacoq ihñi ñi ndi in-
tuhun ñuu luhlu, catyí
tsi nu tutu Nyoo.

¹⁹ Tan tsicá nyico tucu iñi yu:
¿A ña cutuñi iñi nyivi Israel
tyin cua cacu nyivi tsa ñavin
ñi Israel cuví? ¿Cutuñi iñi ñi!
Tyin tsa jihna ñi ra Moisés
tyaa ra tuhun cahan Nyoo tsi-
hin ñi Israel nu tutu tyehen:
Nyooho, ndasi cua cuñi ndo
tyin cua cuhva yu tsa
vaha tsi nyivi tsa ñavin
nyivi ñuu yu cuví.

Tan cua cúu ndo tsihi nyehé
ndo tsi ñi, catyí Nyoo.

²⁰ Tan ra Isaías cana iñi ra
cahan ra:

“Nyivi tsa ña nanducu tsi
Nyoo, nañihí ñi tsi ra.

Tan janaha ra tsi ra tsi ñi tsa
ña tsica tuhun tuhun
ra.”

²¹ Tan tyaá tucu ra Isaías
tuhun cahan Nyoo tsihin ñi
Israel tyehen: “Tandihí ñi
quivi cana yu tsi nyivi yu, na
nacuhva cuenda ñi tsi ñi tsi
yu, maa tyin ña tyaá yahvi ñi.
Tan jandava xaan ñi iñi ñi”,
catyí Nyoo.

11

*Nyivi Israel tsa ñihí cuhva
cacu*

¹ ¿A ña cuñi ca Nyoo tsi nyivi
Israel? Ñavin tsa ña cuñi ca
ra tsi ñi, tyin juvin ñi ra Is-
rael cuví tucu yuhu. Tyin tata
ra Abraham tan tata ra Ben-
jamín cuví yu.

² Tahan tsanaha nacatsi
Nyoo tsi ñi Israel tyin cuví
ñi nyivi ra. Tan vityin ñavin
tsa jatsiyó cuí ra tsi ñi. ¿A
ña ñuhú iñi ndo tyin catyí
nu tutu Nyoo tyin ra Elías, ra
cuví ndusu yuhu Nyoo, catyí
ra tyin ña vaha nyivi Israel
tan tsicán tahvi ra tsi Nyoo
tyehen?

³ “Jutu Mañi yu, nyivi Israel
tsahñi ñi tsi ra cuví ndusu
yuhu maa un naha ra, tan
tsani ñi nu jacahnú nyivi tsi
un. Tan intuhun ña maa yu
ndoq, tan cuñi ndihí ñi cahñi
ñi tsi yu”, catyí ra.

⁴ Maa tyin nacahan Nyoo
tan catyí ra tsihin ra Elías:
“Ñavin maa ñi maa un

ndoo. Tyin utsa mil ca nyivi naquihin vaha yu, ñi tsa ña jacahnú maa tsitoho Baal”, catyí Nyoo tsihin ra.

⁵ Tan juvin ñi tacan vityin, ndoo juhva nyivi jacahnú tsi Nyoo. Tan tsa cuenda tsa vaha Nyoo nacatsi ra tsi ñi tyin jaha ra tucahnu iñi tsi ñi.

⁶ Tan ña jahá ra tucahnu iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnu iñi tsi yo tsa cuenda tsa javahá yo tsa vaha, cuñí tsi catyí tyin ña jacacú ra tsi yo tsihin tsa vaha ra.

⁷ Tan ¿nácaa? Nyivi Israel nducu ñi cuhva nduvaha ñi nuu Nyoo, maa tyin ña ñihí ñi cuhva. Juhva ñi ñihí ñi cuhva. Tan ñi tsa ñihí cuhva can cuví ñi tsa nacatsi maa Nyoo. Tan ñi tsa ña ñihí cuhva cacu, ndundavañi ñi.

⁸ Tumaa catyí nu tutu Nyoo tyehen: “Nyoo tsañá ra tsa ña cutuñi iñi ñi. Tan vasu ndi maa iyó tinuu ñi, ña tsañá ra tsa nyehé ñi. Iyó soho ñi, maa tyin ña cutuñi iñi ñi tsa tsiñí ñi. Tacan iyó ñi nda cuanda vityin.”

⁹ Tan juvin ñi catyí tucu ra David tyehen:

Jvahá ñi vico tan cusii iñi ñi, maa tyin yacan cua jativi tsi ñi.

Tan cua tatsi tuñi Nyoo tsi ñi tyin cuví can tumaa iin trampa tsa cuenda ñi.

¹⁰ Tan cua cuaa ñi na ña nyehe ca ñi tsa nditsa.

Tan nacosu tsa vee siqui ñi, catyí ra David tuhun

nyivi Israel tsa ña tsinú iñi tsi Nyoo.

Nacaa nduvahá nyivi tsa ñavin ñi Israel cuví nuu Nyoo

¹¹ Tan vityin tsicá tuhun yu: ¿A tsa cuenda tsa ña tyaa yahvi nyivi Israel tsa cahan Nyoo, tan ndoo cuii ñi tsa ña cua cacu ñi? Ñavin tsa ndoo cuii ñi. Ndoó nuu ñi maa ñi, tyin jacacú jihna Nyoo tsi nyivi tsa ñavin ñi Israel cuví. Tyin tacan tan tsa cua nyehe ñi yacan, ndasi cuñi ñi tan natsinu ndihí iñi ñi tsi Nyoo.

¹² Tatun cuaha nyivi tsa ñavin ñi Israel cuví tan natsinu iñi ñi tsi Nyoo tsa cuenda cuatyí tsa javahá ñi Israel, cuaha ca ñi cua natsinu iñi quivi tsa cua cuví nyico tandihí nyivi Israel nyivi Nyoo.

¹³ Cuñí yu cahan yu juhva tsihin nyooho tsa ñavin ñi Israel cuví. Ra Jesús tava tyiñu ra tsi yu tsa quitsi yu nu iyó ndo. Tan tsitó yu tyin cuñí tsi tsa javaha yu tyiñu ihya tyin cahnu xaan cuví tsi. Cahnu jahá yu itsi

¹⁴ tan caahán yu tuhun Nyoo tsihin ndo tyin na nyehe nyivi ñuu yu, ñi Israel, nácaa tsinú iñi ndo tsi Nyoo, tyin vasiqui tacan tan natsinu ndihí iñi ñi tan cacu ñi.

¹⁵ Tyin tun tsa cuenda tsa ña natiñ cuenda Nyoo tsi nyivi Israel tan nduvahá iyó nyivi inga ñuu tsihin Nyoo, quivi cua naquihin cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi.

16 Iin cuhva tatun vaha quitá paan tsa javahá yo tsa jihna ñi tsihin yutsan paan, vaha tandihí ca yutsan can. Tan tatun iin yoho yutun tan vaha tun, vaha tandihí ca soco tun. Tacan tucu nyívi Israel nyaá yahvi ñi nuu Nyoo tyin tsii tsaahnu ñi yihí ra naha cuenda ra.

17 Tan nyívi Israel cuví ñi tumaa soco yutun olivo. Tan nyooho cuví ndo tumaa soco yutun olivo cuuhu. Tumaa tuhvá nyívi tsaahnya iin soco yutun tan natyaa ñi inga soco yutun, tacan javahá Nyoo tyin jatsiyó ra tsi nyívi Israel tan tyaa ra tsi nyooho tsa cuví ndo nyívi inga ñuu. Tacan cuví tan tsaá ndo cuví ndo nyívi cuenda Nyoo tan naquihín ndo tandihí tsa vaha tsa iyó tsi ra.

18 Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nduchun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

19 Vasiqui cua catyí ndo: “Juvín, maa tyin Nyoo tsahnyá ra soco yutun can tan natyaa ra tsi nyuhu.”

20 Nditsa. Maa tyin jatsiyó nuu ñi ra tsi nyívi Israel tsa cuenda tsa ña tsinú iñi ñi tsi ra. Tan tyacu ra tsi nyooho tsa cuenda tsa tsinú iñi ndo tsi ra. Yacan jaha ndo cuenda tsa ña nduyaa ndo tsihin can.

21 Tyin tatun ña jahá Nyoo tucahnu iñi tsi ñi tsa cuví soco vaha can, ndi nyooho tan ña

cua jaha ra tucahnu iñi tatun ña tsinú vaha iñi ndo tsi ra.

22 Nyehe ndo tyin vaha xaan iñi Nyoo, maa tyin xaan tucu ra tsihin nyívi tsa ña naquihín cuenda tumañi iñi tsa tsahá ra tsi ñi. Vaha iñi ra tsihin nyooho yacan tyaa yahvi ndo tsa vaha tsa tsahá ra tsi yo. Tyin tatun ña tyaa yahvi ndo itsi, cua jatsiyó nyico ra tsi ndo tsaha yutun olivo ra.

23 Tyin tatun natsinu nyico iñi nyívi Israel inga tsaha, cua cunyaa nyico ñi tsaha yutun olivo nu coyo ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha.

24 Nyooho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihín ra tsi ndo tan tyaa tahan ra tsi ndo tsihin yutun olivo vaha tsa cumí ra. Tacan cua javaha ra quívi cua cuñi ra iin yaha ñi cua tyaa tahan nyico ra soco yutun vaha nu tsinyaa jihna maa tsi.

Nyívi Israel cua cacu nda nu ndihí

25 Yañi, cuñi yu tsa coto ndo iin tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaha xaan nyívi Israel ndundava añima ñi, nda cuanda cacu tandihí nyívi inga ñuu tsa nyaa tyin cacu.

26 Tsa yaha cua cacu ñi, tacan tan cua cacu tandihí nyívi Israel tyin catyí nu tutu Nyoo tyehen:

Ra tsa jacacú tsi nyívi, nda
Sión cua quee ra.

Tan cua quihin nyaa ra cuatyí
nyívi ra Jacob.

27 Tuhun ihya cuví tsa cua
ndoo yu tsihin ñi

quívi cua quihin nyaa yu cu-
atyí ñi, catyí Nyoo nu
tutu ra.

28 Cuxaán xaan nyívi Is-
rael tsihin Nyoo tsa cuenda
tuhun vaha ra Cristo tsa cacú
yo. Tyin tacan tan cuví tsinu
iñi nyooho. Tahān tsanaha
nacatsi Nyoo tsi ra Abraham,
tan ra Isaac, tan ra Jacob tyin
tsinu iñi ra naha tsi ra. Tan
cuñi ndihi ra tsi nyívi Israel
tyin tata ra naha cuví tsi ñi.

29 Tyin tsa tsa tsahā Nyoo,
ña quihin nyaa nyico ra can.
Tyin yoo tsa cuví nyívi Nyoo,
ña tuhvá ra cahan tyin ñavin
nyívi ra cuví yo.

30 Tsanaha nyooho ña tyaā
yahvi ndo tsi Nyoo. Maa tyin
vityin tyaá yahvi ndo tsi ra
tan cundaahví iñi ra nyehé ra
tsi ndo tsa cuenda tsa ña tyaá
yahvi nyívi Israel tsi ra.

31 Nyívi Israel ña tyaá yahvi
ñi tsi Nyoo vityin tumaa tsa
ña tyaā yahvi nyooho tsi ra
tahān tsanaha. Maa tyin cua
cundaahvi iñi ra nyehé ra tsi
ñi tumaa tsa cundaahví iñi ra
nyehé ra tsi nyooho.

32 Yihí tsaha tandihi nyívi
tan nacoó ñi tsa tyaá yahvi
ñi tsi Nyoo. Tsahá ra ndatu
tsi ñi tsa javahá ñi tacan, tyin
tacan tan iin caa ñi cua cuví
cundaahvi iñi ra tsi tandihi
yo.

33 ¡Cahnu xaan cuví tsa cuca
tan tsa tsitó Nyoo tan tsa tsiñí

tuñi tsa iyó tsi ra! Yoo ña cuví
nacatyí tuhun yo cuhva tsicá
iñi ra, tan ndi iin sava quívi
ña cua cutuñi iñi yo tandihi
cuhva javahá ra.

34 ¿Yóo cutuñí iñi cuhva
tsicá iñi Jutu Mañi yo? ¿O yóo
jacuahá tsi ra? Yoñi.

35 Tyin yoñi cuví cuhva ji-
hna iin tsa vaha tsi ra, tan
tsa cuenda can tan cuita iñi
ñi tyin cua naquihin ñi yahvi
cuenda can.

36 Tyin tandihi maa tsa iyó,
maa Nyoo javahā itsi, tan iyó
tsi tsa cuenda ra. ¡Na jacahnu
yo tsi Nyoo tacan ñi maa! Tan
na cuví tsi tacan.

12

*Na javaha yo cuhva cuñí
Nyoo tsihin ñayívi iyó yo*

1 Yacan cuenda yañi, tsitó
ndo tyin cundaahví xaan iñi
Nyoo nyehé ra tsi yo, tan
tsa cuenda yacan caahán
ndaahvi yu tsihin ndo. Cuhva
cuenda ndo cuñu ñuhu ndo
tsi Nyoo, tan cuví tsi iin tsa
nyito tsa jamañi ndo, tyin tsa
javahá yo tacan janahá tsi
tyin nditsa tsa jacahnú yo tsi
ra. Yacan cuví tsa taahán iñi
ra.

2 Ña çoo ca ndo cuhva iyó
nyívi ñuu ñayívi ihya. Cuhva
ndo tsa nasama Nyoo cuhva
tsicá iñi ndo, tan cuhva iyó
ndo, tyin tacan tan coto ndo
javaha ndo tsa taahán iñi maa
ra: náa ndihi tsa vaha tan tsa
cuiti.

3 Nyoo, tsa cuenda tsa vaha
iñi ra, tan tava tyiñu ra tsi
yu tyin cuví yu iin ra caca
tyiñu ra Jesucristo. Yacan
cuenda catyí yu tsihin tandihi

nyooho tyin ndi intuhun ndo tan ña çaca iñi ndo tyin vaha xaan ndo. Maa tyin çaca iñi ndo nácaa iyó ndo tan náa cuví tsa vaha tsa tsahá Nyoo tsi ndo iin caa ñi tsihin tsa tsinú iñi ndo tsi ra.

⁴ Tumaa soho yo tan tinuu yo iin ñi cuví tsi tsihin tandihi ca tahan tsi tsa iyó iin cuñu ñuhu. Tan tsa intuhun intuhun tsi sñin sñin tyiñu javahá tsi.

⁵ Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

⁶ Siin siin ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñi maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusu yuhu ra, na tsinu iñi yo tyin tyiñu can tsahá ra tsi yo, tan na javaha yo itsi.

⁷ Tatun tsahá ra ndatu tsi iin yo tsa jatyyinyee yo tsi nyívi, na javaha yo itsi tsihin tsa ñi iñi añima yo. Tatun tsi inga yo tsahá ra tsa jacuahá yo tsi nyívi, na jacuahá yo tsi ñi tsihin tsa ñi iñi yo.

⁸ Tatun tsahá ra tsi inga yo tsa cuví jandu iin yo iñi nyívi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyyinyee yo tsi nyívi tsihin xuhun, na jatyyinyee yo tsi ñi, maa tyin ña cuita iñi yo tyin natyahvi ñi tsi yo. Tatun inga yo ñihí tsa jaquihín ityi yo tsi nyívi yihí

cuenda Nyoo tsihin yo, na jaha yo cuenda cuhva jaquihín ityi yo tsi ñi. Tatun inga yo ñihí tsa jatyyinyee yo tsi nyívi tsa iyó tsa tsiñi ñuhu, na jatyyinyee yo tsi ñi tsihin tsa sñi cuñi yo.

Náa taahán tsi javaha nyívi yihí cuenda ra Cristo

⁹ Cuñi tahan ndo tsi ndo tsihin tsa ñi iñi añima ndo. Ndasí cuñi ndo nyehé ndo tsa ña vaha. Tan çanyicun ndo tsa vaha.

¹⁰ Cuñi tsi tsa cuñi tahan yo tsi yo tumaa tsa cuñi yo tsi nyívi yo. Tan tyaa yahvi tahan ndo tsi ndo tan jaha tahan ndo tsa ñayívi tsi ndo.

¹¹ Ndücu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi iñi añima ndo.

¹² Çoo ndo ñayívi ihya tsihin tsa sñi, tyin tsitó ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndaçan tahvi ndo tsi Nyoo iin nyita ñi.

¹³ Cuhva ndo tsa tsiñi ñuhu tsi nyívi yihí cuenda Nyoo tsihin ndo. Vaha tyannuu ndo tsi nyívi tsaá vehe ndo.

¹⁴ Tatun caahán nyívi ndavaha ñi tsi ndo, vaha çahan ndo tsihin ñi, tan ña çahan ndasí ndo tsi ñi. Ndaçan tahvi ndo tsi Nyoo tsa cuenda ñi, na nasoco ra tsi ñi.

¹⁵ Sñi cuñi ndo tsihin nyívi sñi cuñi. Vācu ndo tsihin nyívi tsa tsacú jahá tucuihaya iñi.

¹⁶ Ña cañi tahan ndo. Iin ñi cuví ndo tsihin tahan ndo.

Ña cahnu jaha ndo tsi ndo; jandundaahvi ndo tsi ndo tumaa iyó nyivi ndaahvi; ña jaha ndo tsa tsitó xaan ndo.

17 Ña javaha ndo tsa ña vaha tsihin nyivi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihi nyivi.

18 Nducu ndo cuhva coo taxin ndo tsihin tandihi nyivi.

19 Yañi, cuñi yu tsi ndo. Tatun javahá nyivi tsa ña vaha tsihin ndo, ña tatsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyivi tan tyahvi tsi ñi”, catyí Jutu Mañi yo.

20 Tan juvin ñi catyí tucu ra: “Tatun nyivi xaan iñi tsi ndo tan tsisocó ñi, cūhva ndo tsa catsi ñi, tan tatun na ityi iñi ñi, cūhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.”

21 Ña cūhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan çasi ndo nu vatsí tsa ña vaha tsihin can.

13

1 Tandihí nyivi cuñi tsi tsa tyaa yahvi ñi tsi ra cumí tyiñu cuenda ra ndacá ñaha naha ra. Tyin tandihí maa ra cumí tyiñu tan Nyoo tsaha tyiñu can tsi ra naha. Ra cumí tyiñu tsa iyó, maa Nyoo tsaha tsi ra naha tsa cuví ra naha tyiñu.

2 Yacan cuenda, nyivi tsa ña tyaa yahvi tsi ra naha, cuñi tsi catyi tyin ña tyaa yahvi ñi tsa caahán Nyoo. Ñi tsa javahá tacan, tsicoo cuatyí ñi tsa cuenda can, tan cua cuñi ñi.

3 Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyivi tsa javahá tsa vaha. Nyisó tyiñu ra naha tsa tatsi tuñi ra naha tsi nyivi tsa javahá tsa ña vaha. Tun ña cuñi un tsa jayuhvi ra cumí tyiñu naha ra tsi un, çoo vaha, tyin tacan tan cua nyehe ra naha tyin vaha iyó un tan vaha nyivi cuví un.

4 Tyin ra cumí tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuvi nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyivi javahá tsa ña vaha, tyin tyiñu can tyaa Nyoo tsi ra naha.

5 Yacan cuenda ñiñi cuñi tsi tsa tyaa yahvi ndo tsi ra cumí tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo.

6 Tan inga tuhun tsa cuenda can tyahví ndo xuhun tsa tavá ra cumí tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

7 Cūhva ndo tsa taahán tsi

tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyivi tsa taahán tsi tyaa yahvi ndo. Jaha ndo tsa ñayivi tsi nyivi tsa taahán tsi jaha ndo tsa ñayivi tsi.

⁸ Ña cunyaa cuenda ndo tsi ndi intuhun nyivi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihi tsa catyí ley Nyoo tsa tyaa ra Moisés tyin javaha yo.

⁹ Catyí ley Nyoo tyehen: “Tun iyó ñasíhi ndo o yíi ndo ña cõo inga ñaha o rayíi tsi ndo. Ña cahñi ndo. Ña suhu ndo. Ña cahan ndo cuendu siqui ndi intuhun nyivi. Ña nyiyo iñi ndo tsa tsii inga nyivi.” Tandihi tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo.

¹⁰ Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihi tsa catyí ley Nyoo tsa tyaa ra Moisés.

¹¹ Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahan tsi cuhva tsa taahán tsi ndoto yo. Tyin vityin tsa yatyin cui ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra.

¹² Tsa yahá tsa tsacuaa, tan tsa cua tuvi. Yacan cuenda cuñi tsi jandihí ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa tsahá Nyoo

tsi ndo; javaha ndo cuhva javahá nyivi iyó nu nditsin.

¹³ Cuñi tsi cuiti coo yo tyin nu nditsin Nyoo iyó yo. Tan ña cõho ndo nyixi, ña javaha ndo vico tan coho ndo nyixi. Nyooho rayíi, ña caca nuu ndo tsihin ñaha. Tan nyooho ñaha ña caca nuu ndo tsihin rayíi. Ña cõo viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi.

¹⁴ Maa tyin cõo ndo tsihin Jutu Mañi yo Jesucristo, tumaa tsinditsi yo jahma tacan na cunditsi yo tsi ra. Tan ña caca iñi ndo javaha ndo cuhva cuñi cuñu ñuhu ndo.

14

Na ña cahan nyaa yo tsi nyivi

¹ Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña cahan ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi.

² Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihi maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihi vaha nyaá tsihin Nyoo.

³ Maa tyin ñi tsa tsatsi tandihí can, taahán tsi naquihin cuenda ñi tsi ñi tsa tsatsi yucu ñi. Tan ñi tsa tsatsi yucu, na ña cahan nyaa ñi tsi inga

ñi can. Tyin Nyoo naquihín cuenda ra tsi ñi can.

⁴ Tan ¿yóo nyivi cuví yooho tan cahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduve quivi cahnu cuví tan quivi ña cahnu cuví. Inducu ñi quivi cuñí ñi, yacan cuenda intuhun intuhun maa yo tan cuñí tsi tyihi tuñi vaha iñi yo.

⁶ Ñi tsa naquihín vaha quivi, naquihín vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihín vaha can, juven ñi jacahnú tucu ñi tsi Nyoo tyin ña naquihín vaha ñi can. Tan ñi tsa tsatsí tandihi can, juven ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsahá ra tsa catsi ñi. Tan ñi tsa ña tsatsí tandihi, ña tsatsí ñi tsa cuenda tsa jacahnú ñi tsi Jutu Mañi yo tan juven ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsihi yo.

⁸ Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsihi yo, tsihi yo tsa cuenda Jutu Mañi yo tan naquihín ra añaima yo. Yacan

cuenda tsii maa Jutu Mañi yo cuví tsi yo vasu ndi maa nyito yo o tsihi yo.

⁹ Tyin ra Cristo tsihi ra tan nandoto ra tyin cundaca ñaha ra tsi nyivi nyito tan nyivi ña nyito.

¹⁰ Maa tyin yooho, ¿nacuenda nyehé nyaa un tsi ra yañi un? ¿O nacuenda ña naquihín cuenda un tsi ra?, tan tsitó vaha un tyin tandihi yo tan cua tahan tsi quivi cuhva cuenda yo tsi yo nuu ra Cristo tyin tatsi tuñi ra tsi yo.

¹¹ Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñí tsi cuiñi tsiti tandihi nyivi nuu yu.

Tandihi ñi tan cua nacoto ñi tsi yu tsa cuví yu Nyoo.

Tan nuu tandihi nyivi cua jacahnú ñi tsi yu, catyí Nyoo.

¹² Yacan cuenda intuhun intuhun yo tan cua nacuhva cuenda yo tyiñu javahá yo tsi Nyoo.

Ña janacava ndo tsi yañi ndo nu cuatyí

¹³ Yacan cuenda, ña taahán tsi cahan nyaa ca ndo tsi nyivi. Maa tyin nducu ndo cuhva tsa ña janacava ndo tsi ñi nu cuatyí coto jandhi ñi tsa tsinú iñi ñi tsi ra Cristo.

¹⁴ Yuhu tsitó yu tyin cuví catsi yo tandihi tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandihi,

tša cuenda maa ñi ña cuví catsi ñi can.

¹⁵ Maa tyin tatun tša cuenda tša tsatsí ndo tan ndasi cuñi yañi yo, ña nditsa tša cuñi ndo tsi ra. Ña cuhva ndo tša tiví yañi yo tsihin tša tsatsí ndo tyin ra Cristo tsihi ra tša cuenda ra.

¹⁶ Ña cuhva ndo tša cahan nyiví ndavaha ñi siqui tša tsaha Nyoo ndatu tyin catsi yo.

¹⁷ Tatun ndacá ñaha Nyoo tsi yo ña ñiñi xaan náa tsatsí yo o náa tsihi yo. Tša ñiñi ca cuví tša vaha iyó yo nuu ra, tan tsihin tša siñi cuñi yo, tan taxin iyó añima yo jahá Tatyí li ra.

¹⁸ Nyiví jahá tyiñu tyiñu ra Cristo tacan, siñi cuñi Nyoo nyehé ra tsi ñi, tan tacan tucu nyiví siñi cuñi ñi nyehé ñi tsi ñi.

¹⁹ Yacan cuenda cuñi tsi jañiñi yo tsi yo tan coo vaha yo tsihin nyiví. Tyin tacan tan cuví jatyinyee tahan yo tsi yo na cuahnu ca yo tsihin tuhun Nyoo.

²⁰ Ndi intuhun ndo tan ña jatívi ndo tyiñu jahá Nyoo tsitsi añima inga nyiví tsihin tša tsatsí ndo. Nditša tyin tandihi tša tsatsí yo tan vaha tsi. Maa tyin ña vaha tša catsi yo iin tša tsatsí yo tatun tsihin can janacava yo tsi nyiví nu cuatyí.

²¹ Yacan cuenda, vaha tša ña catsi yo cuñu, ndi ña coho yo vinu tatun ndasi cuñi yañi yo nyehe ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tša javahá yo.

²² Cuhva tša tsinú iñi yo tša cuenda tandihi yacan ña cahan yo tuhun can tsihin inga nyiví. Na coto intuhun ñi maa yo can tsihin Nyoo. Siñi xaan cuñi yo tatun ña uvi tsicá iñi yo javahá yo tša tsahá Nyoo ndatu tyin javahá yo.

²³ Maa tyin nyiví tša tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihi tša javahá yo tsihin tša ña tsiñu iñi yo tyin tsahá Nyoo ndatu javaha yo can, cuatyí cuví.

15

Na javaha yo tša taahán iñi nyiví yihí tuhun Nyoo tsihin yo, tan ñavin tša taahán iñi ñi maa yo

¹ Yoo tša vaha cuanyicún tsi Nyoo, cuñi tsi tša jatyinyee yo tsi nyiví tša ñaha ca tsinú vaha iñi tsi ra. Jatyinyee yo tsi ñi na tsinu ca iñi ñi. Tan na ña nducu yo maa ñi maa tša taahán iñi maa yo.

² Intuhun intuhun yo cuñi tsi tša javaha yo cuhva taahán iñi inga nyiví tatun cuví tsi tša vaha cuenda ñi, tyin tacan tan cuví cuahnu ca ñi tsihin tuhun Nyoo.

³ Tyin ndi ra Cristo tan ña javahá ra cuhva taahán iñi maa ra, maa tyin tahan ra tumaa catyí nu tutu Nyoo tyehen: “Tandihi tša ndavaha ñi tša cahan nyiví siqui Nyoo, siqui ra Cristo ndoo can”, catyí tsi.

⁴ Tyin tandihi tša tsinyaa nu tutu Nyoo tahan tsanaha,

tsinyaꞗ tsi tsa cuenda tsa cu-tuhva yo itsi. Tan juvin tsi jatyinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iin tsi iñi yo.

⁵ Tan juvin ñi maa ra tsahá tsa cunyeé iñi yo cuatu yo, tan tsahá ra tsa vaha cuñí añima yo. Na jatyinyee ca ra tsi yo coo vaha yo tan iin ñi cuvi yo tumaa taahán iñi ra Cristo Jesús.

⁶ Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

Nyivi tsa ñavin ñi Israel cuví, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacahnu yo tsi Nyoo.

⁸ Tan catyí yu tsihin ndo: ra Cristo quitsi ra quitsi jatyinyee ra tsi nyuhu tsa cuví nyivi Israel, tyin tacan catyi Nyoo tsihin tsii tsaahnu ndi tyin cua javaha ra. Tan tacan janahá ra Cristo tyin tandihí tsa catyi Nyoo tyin cua javaha ra, javahá ra itsi.

⁹ Quitsi ra Cristo tyin tacan tan jacahnu tucu nyivi tsa ñavin ñi Israel cuví tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehe tandihí nyivi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

¹⁰ Tan inga tucu nu catyí tsi tyehen:

Nyooho tsa ñavin ñi Israel cuví, sii cuñi ndo tsihin ñi Israel, nyivi Nyoo.

¹¹ Tan inga tucu nu catyí tsi tyehen:

Jacahnu ndo tsi Jutu Mañi yo, nyooho nyivi tsa ñavin ñi Israel cuví.

Çata tandihí ndo yaa tan jacahnu ndo tsi ra.

¹² Ra Isaías tyaa tucu ra nu tutu Nyoo tyehen:

Cua cacu iin ra tsa cuvi tata ra Isaí.

Cua quitsi ra cua cundaca ñaha ra tsi nyivi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

¹³ Juvín ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusii iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí Ii ra tan cuita vaha iñi ndo tyin cua ñihi ndo tsa cua cuhva ra tsi ndo.

¹⁴ Yañi, tsitó vaha yu tyin nyooho vaha iñi ndo tan cutuñí vaha iñi ndo, tan tsitó vaha ndo cuhva cuhva cuenda tahan ndo tsi ndo.

¹⁵ Maa tyin nu carta ihya ñihi xaan caahán yu siqui juhva tsa tyaa yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahá ra tsa vaha ra tsi yu

¹⁶ tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuví. Tan tyiñu

tsa javahá yu cuví tsa caahán yu tuhun Nyoo nácaa jacacú ra tsi nyívi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuví ñi iin ofrenda tsa taahán ñi ra, tyin tsa nduvahá ñi nuu ra jahá Tatyí li ra.

17 Yuhu tsa tsinú ñi yu tsi ra Cristo Jesús, sɪɪ cuñi yu jahá tyiñu yu tyiñu Nyoo tyin tsitó yu tyin tyiñu vaha javahá yu.

18 Yuhu ña caná ñi yu cahan yu tsa ña javahá ra Cristo tsihin yu. Maa tyin tsahá cuenda yu tsi ndo tyin nyívi tsa ñavin ñi Israel cuví, tsinú ñi ñi tsi Nyoo tyin Nyoo tsatyíñu ra tsi yu tan vityin tyaá yahvi ñi tsi ra tsa cuenda tsa tsinú ñi ñi tuhun cahan yu tan nyehe ñi tsa javahá yu

19 tsihin tunyee ñi seña tan tsa iyo tsa javahá yu jahá Tatyí li Nyoo. Tsihin tandihí yacan cunyeë cahan yu tuhun ra Cristo tan nácaa jacacú ra tsi yo tsihin nyívi. Quitsahá yu nda Jerusalén tan inga ca ñuu nda cuanda tsaá yu ñuu tsa cayucú Ilirico.

20 Tacan nducú yu cuhva caahán yu tsa jacacú ra Cristo tsi yo nu ñaha ca coto nyívi tuhun ra, tyin ña cuñi yu jahá tyiñu yu nu tsa yaha cahan inga ra tuhun ra Cristo.

21 Tumaa catyí nu tutu Nyoo tyehen:

Nu nduve maa tuhun Nyoo
iyó, cua tsa tuhun
Nyoo

tan cua cutuñi ñi nyívi iyó
can itsi, catyí tsi.

Nu tyaá ra Pablo cuhva tyin cuhun ra ñuu Roma

22 Yacan cuenda ña cuví quítsi yu quítsi nyehe yu nu yucú ndo, vasu ndi maa cuaha xaan tsaha cuñi yu quítsi yu.

23 Maa tyin vityin tsa ndihí jahá tyiñu yu ityi ñuu ihya. Tan tsa cuaha xaan cuiya cuñi yu quítsi yu nu yucú ndo tan ndoo yu juhva quívi tsihin ndo.

24 Nyehe jihna yo tatun cuví yaha yu nu yucú ndo quívi cua cuhun yu España. Tsa yaha tsa cunyi yu juhva quívi tsihin ndo, nyehe yo tatun cuví jatyinyee ndo tsi yu tan tsa yu nu cuhun yu.

25 Maa tyin vityin cuahán yu ñuu Jerusalén tan nyisó yu ofrenda tsa cuenda nyívi yihí cuenda ra Cristo tsa iyó ndacan.

26 Tyin nyívi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva xuhun jacuhun ñi tsi nyívi ndaahvi tsa iyó Jerusalén, ñi yihí cuenda ra Cristo.

27 Tyehen cuñi ñi javahá ñi. Tan nditsa tyin taahán tsi javaha ñi tacan. Tyin nyívi Israel, ñi tsinú ñi tsi ra Cristo, tsahá ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatyinyee ñi tsi ñi Israel tsihin tsa iyó tsi ñi.

28 Yacan cuenda, tatun tsa yaha jandaa yu tyiñu ihya, tan tsa yaha nacuhva cuenda yu xuhun ihya tsi nyívi Jerusalén, tacan tan cuhun yu nda España tan cua

yaha yu nu yucú ndo.

²⁹ Tsitó vaha yu tyin quivi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

³⁰ Yañi, Tatyí Ii Nyoo tsaḥa tsa cuñí ndo tsi yu tan tsi ra Jesucristo, yacan cuenda caahán ndaahvi yu tsihin ndo ndacan tahvi ndo tsi Nyoo tsa cuenda yu tan tsa cuenda tyiñu jahá yu.

³¹ Nḁacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tñin cuenda vaha ñi ofrenda tsa ndahá yu.

³² Tan ndacan tahvi ndo na cuvi cuhva cuñi Nyoo tan cuvi quitsi yu quitsi nyehe yu nu yucú ndo tsihin tsa siñi cuñi yu tan cuvi quitatu vaha yu.

³³ Tan Nyoo, ra tsahá tsa taxin coo añima yo, na cunyaa ra tsihin tandihi ndo. Tan na cuvi tsi tacan.

16

Nu tsahá ra Pablo nacumi tsi nyivi vaha iñi tsi ra

¹ Jacotó yu tsi ndo tyin ña hermana Febe jatyinyeé xaan ña tsi nyivi yihí cuenda Nyoo ñuu Cencrea.

² Naquihin vaha ndo tsi ña tumaa naquihín Jutu Mañi yo tsi yo, tumaa taahán tsi javaha ñi yihí cuenda Nyoo. Jatyinyeé ndo tsi ña tsihin tandihi tsa tsiñi ñuhu tsi ña, tyin maa ña cuaha xaan nyivi

jatyinyeé ña, tan nda cuanda maa yu.

³ Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús.

⁴ Tsahnya iñi ñi ñayivi ñi quivi jacacu ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandihi tucu nyivi tsa ñavin ñi Israel cuvi, ñi tsa yihí cuenda Nyoo, tsahá ñi tyahvi nyoo tsi ñi.

⁵ Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juvín ra cuvi ra tsa tsinuj jihna iñi tsi ra Cristo ityi Acaya.

⁶ Cuhva ndo nacumi tsi ña María. Jahá tyiñu xaan ña nu yucú ndo.

⁷ Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucu tsihin yu vehe caa. Cahnu tyiñu jahá tyiñu ra naha cuenda Jutu Mañi yo tsihin tandihi ca ra jahá tyiñu cuenda Nyoo. Tan jihna ca ra naha natsinuj iñi tsi ra Cristo tan ñavin ca yuhu.

⁸ Cuhva ndo nacumi tsi ra Amplias ra vaha iñi tsi yu cuenda Jutu Mañi yo.

⁹ Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu.

¹⁰ Cuhva ndo nacumi tsi ra Apeles. Nyehé yo tyin nditsa tsa tsinú iñi ra tsi ra Cristo.

Tan tsahá tucu yu nacumi tsi nyivi ra Aristóbulo.

¹¹ Cuhva ndo nacumi tsi ra Herodión ñuu yu tan tsi nyivi ra Narciso, ñi tsa tsinú iñi tsi Jutu Mañi yo.

¹² Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo.

¹³ Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu.

¹⁴ Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha.

¹⁵ Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpas tan tsi tandihi ñi yihí cuenda Nyoo tsa yucú tsihin ñi.

¹⁶ Cuhva tahan ndo nacumi tsi ndo. Tandihi nyivi yihí cuenda ra Cristo tsa iyó ityi ihya jaquitsi ñi nacumi tsi ndo.

¹⁷ Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñí jasiin tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cuhva ndo tuhun ra Cristo. Ña cutahan ndo tsihin ñi can.

¹⁸ Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñí maa ñi javahá ñi. Tan

jandahví ñaha ñi añima nyivi ndaahvi tsihin tsa vita caahán ñi.

¹⁹ Tandihí nyivi tsitó ñi tyin tyaá yahvi ndo tsi Nyoo. Yacan cuenda sii xaan cuñí yu tsihin ndo, tan cuñí yu tsa yatyi javaha ndo tsa vaha. Maa tyin ña yatyi javaha ndo tsa ña vaha.

²⁰ Nyoo ra iyó tandihí tsa taxin añima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuañi ndo siqui nu. Na nasoco Jutu Mañi yo Jesucristo tsi ndo.

²¹ Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihí ra ñuu yu can jaquitsí ra naha nacumi tsi ndo.

²² Yuhu ra Tercio javahá yu tutu ihya tsa cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

²³ Jaquitsí tucu ra Gayo nacumi tsi ndo. Vehe ra iyó yu. Juvin ñi ihya ndú iin tandihí ñi yihí cuenda Nyoo. Ra Erasto ra cuví tesorero ñuu ihya, jaquitsí ra nacumi tsi ndo, tan yañi yo ra Cuarto tucu.

²⁴ Na ndoo Jutu Mañi yo Jesucristo tsihin tandihí ndo. Tan na cuví tsi tacan ñi.

Nu ndihí caahán ra Pablo tan jacahnú ra tsi Nyoo

²⁵ Tan vityin na jacahnu yo tsi Nyoo, tyin maa ra cuví ra cua cuhva tsa ndu iin iñi

añima ndo, tyin tacan tan ña jandihí ndo tsa tsinú iñi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tsihin tuhun tsa ñuhu xeehe tahán tsanaha nda ndi cumañi ca tsinu ñuhu ñayivi.

²⁶ Maa tyin vityin jacuahá Nyoo tsi yo tsa cuenda tutu tsa nacoꝝ ra cuví ndusu yuhu ra, ra tsahá cuenda tuhun ra tahán tsanaha. Catyí Nyoo, ra tsa ña cua cundihí maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaa yahvi ñi tsa caahán ra.

²⁷ Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

*Nu tyaá ra Pablo iin carta
tsa cuenda nyivi yihí cuenda
Nyoo ñuu Corinto*

¹ Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo,

² jaquitsí ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduvi ndo nyivi vaha cuenda ra, tsihin tandihi nyivi tsa jacahnú tsi Jutu Mañi yo Jesucristo tandihi ñi ityi. Tyin cuví ra Nyoo cuenda ñi tan cuenda tucu maa yo.

³ Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo aña ndo.

*Nacaa nasocó Nyoo tsi
nyivi yihí cuenda ra*

⁴ Tandihí ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús.

⁵ Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan

ndo tuhun ra. Tan tsahá ndihí tucu ra tsa coto xaan ndo.

⁶ Tan tandihí tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo cuhva iyó ndo.

⁷ Tan yacan cuenda nduve tsa cumañi tsi ndo tyin iyó tandihí tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo.

⁸ Nyoo cua jaha cuenda ra tsi ndo nda cuenda naa ñuhu ñayivi tyin tacan tan yoñi cuví tyaa cuatyí tsi ndo quivi cua quitsi Jutu Mañi yo Jesucristo.

⁹ Nyoo tacan ñi maa javahá ra cuhva catyí ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

*Nyivi yihí cuenda Jutu Mañi
yo, ña vaha quita sin ñi*

¹⁰ Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusin ndo. Tan iin ñi cuhva caca iñi ndo, tan iin ñi tuhun quihí iñi ndo.

¹¹ Caahán yu tacan tsihin ndo, yañi, tyin catyí nyivi ra Cloé tsihin yu tyin iyó tsihi nu yucú ndo.

¹² Tyin nyooho sin sin cuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu.”

¹³ ¿A cuñi ra Cristo tsa quita sin yo? ¿A maa yu tsihi nu

cruu tsa cuenda ndo? ¿A tsi-coondutyā ndo tsihin sivi yu? Ñavin.

¹⁴ Tyahví nyoo tsi Nyoo tyin ra Crispo tan ra Gayo ñi jacoondutyā yu tan ña jacoondutyā yu tsi ndi intuhun ca nyooho,

¹⁵ yacan ña cuvi cahan ndo tyin tsicoondutyā ndo tsihin sivi yu.

¹⁶ Aan, jacoondutyā tucu yu tsi nyivi ra Estéfanas, maa tyin ña nducuhún iñi yu tun jacoondutyā yu tsi inga ndo.

¹⁷ Tyin ra Cristo ña tava tyiñu ra tsi yu tsa jacoondutyā yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya caahán yu, tyin coto catyí nyivi tyin nduve yahvi nyaá tsa tsihi ra Cristo cuenda cuatyí yo.

Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi

¹⁸ Nyivi tsa cua cuhun anyaya tsiñi ñi tuhun tsa tsihi ra Cristo nu cruu, tan ña tsinú iñi ñi tsi ra, yacan cuenda cuñi maa ñi tyin nduve yahvi nyaá tsa tsihi ra. Tan tsa cuenda yoo tsa cua cacu, tunyee iñi Nyoo cuví tsa tsihi ra.

¹⁹ Tyin tacan catyí maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyí Nyoo.

²⁰ Nduve yahvi nyaá ra tsa tsitó xaan, tan ra maestro, tan ra caahán náa ndihi

tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduvi can jahā Nyoo.

²¹ Nyoo tsihin tsa tsiñi tuñi tsa iyó tsi ra tyaa ra cuhva tyin ña cuvi nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaa tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñi ñi tyin nduve yahvi nyaá tsi.

²² Nyivi Israel cuñi ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi.

²³ Maa tyin nyuhu jacotó ndi tuhun ra Cristo, ra tsa tsihi nu cruu. Tan tsa tsiñi nyivi Israel tuhun ra ndasi xaan cuñi ñi. Tan ñi tsa ñavin ñi Israel cuví, cuñi ñi tyin nduve yahvi nyaá tsi.

²⁴ Maa tyin tsa cuenda nyivi tsa nacatsi Nyoo, cuví ñi nyivi Israel, a nyivi Grecia, ñi ican cutuñi iñi tyin ra Cristo iyó tandihi tunyee iñi Nyoo tsi ra, tan tsahá ra tsa cutuñi iñi ñi tsa tsiñi tuñi Nyoo.

²⁵ Vasu ndi maa inga nyivi cuñi tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñi tucu ñi tyin ña ñihi tunyee iñi Nyoo. Maa tyin ñihi ca tsi tan ñavin ca tunyee iñi tsa iyó nu ñuhu ñayivi ihya.

²⁶ Yañi, cuñi tsi tsa cutuñi iñi ndo tyin Nyoo nacatsi

ra tsi ndo vasu ndi maa ña cuaha ndo cuví nyívi tsitó, tan nyívi cahnu cuví o nyívi ndacá ñaha nu ñuhu ñayívi ihya.

²⁷ Nacatsí ra tsi nyívi tsa catyí nyívi tyin soho xaan ñi, tyin cuhva ra ticanuu tsi nyívi tsitó xaan. Tan nacatsí ra tsi nyívi nduve tunyee íñi iyó tsi tyin cuhva ra ticanuu tsi nyívi cuñí tyin iyó xaan tunyee íñi tsi ñi.

²⁸ Tan nacatsí ra tsi nyívi ndaahvi tsa cuñí nyívi tyin ña tsiñi ñuhu ñi, tan nyívi tsa ña cuñí nyívi nyehe ñi, tan janduluhú ra tsi nyívi jahá tyin cahnu cuví ñi.

²⁹ Javahá ra tacan tyin tacan tan yoñi cuvi nduyaa nuu ra.

³⁰ Tan juvin ñi maa ra jandu iin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jata ra tsi yo tsihin niñi ra, quihin nyaa ra tsi yo ndaha nu ña vaha tan cacu yo tan nduvaha yo jahá ra tan jacu í ra tsi yo.

³¹ Yacan cuenda na javaha yo cuhva catyí tuhun Nyoo nu catyí tsi tyehen: “Ña cuví nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

2

Tuhun ra Cristo, ra tsihi nu cruu

¹ Maa tyin yañi, quívi tsa quítsi yu cahan yu tuhun Nyoo tsihin ndo, ña cahan yu tuhun tsa tsiñi tuñi tsa iyó

nu ñuhu ñayívi ihya tumaa caahán ra tsitó xaan naha ra.

² Tyin maa ñi maa tuhun ra Jesucristo, nácaa tsihi ra nu cruu tsa cuenda cuatyí yo tyaa íñi yu tan cahan yu tsihin ndo.

³ Tan tsa tsaa yu nu yucú ndo ñihi nihi yu jahá tsa yuhví yu.

⁴ Tan tsa cahan yu tsihin ndo, ña cahan yu tsihin tuhun sii caa tumaa caahán ra tsitó xaan naha ra. Maa tyin tsihin tunyee íñi Tatyí Ii Nyoo cahan yu tsihin ndo.

⁵ Tyin tacan tan tsinu íñi ndo tsi Nyoo tsa cuenda tunyee íñi maa ra, tan ñavin tsa cuenda tsa tsiñi tuñi tsa iyó nu ñuhu ñayívi ihya.

Juvin ñi maa Tatyí Ii Nyoo tsahá tsa nacoto yo tsi Nyoo

⁶ Maa tyin nditsa caahán ndi tuhun tsa tsiñi tuñi tsihin nyívi tsa ñihi nyaá tsihin tuhun Nyoo. Maa tyin ñavin tsa tsiñi tuñi tsa iyó nu ñuhu ñayívi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahán ndi tsa tsiñi tuñi Nyoo

⁷ tsa tsicumí xeehe ra tsa ndi cumañi ca javaha ra ñuhu ñayívi ihya. Tyaa ra cuhva tsa jacacu ra tsi yo tan cunyecu cuii yo tsihin ra nda gloria.

⁸ Tan ndi intuhun ra ndacá ñaha nu ñuhu ñayívi ihya tan ña cutuñi íñi ra naha can. Tun tsatyin cutuñi íñi ra naha can, ña cua tyaa ra naha tsi Jutu Mañi yo, ra ndacá ñaha gloria, nu cruu.

⁹ Maa tyin cuví tsi tumaa catyí maa tuhun Nyoo:

Yoñi nyehe tan yoñi tsiñi tan
tsicá iñi tuhun vaha

tsa javahá Nyoo tsa cuenda
nyivi cuñi tsi ra, catyí
tsi.

10 Maa tyin Nyoo tsahá ra
Tatyí Ii ra tsi yo tan jacotó
Tatyí Ii ra tuhun ihya tsi yo,
tan juvin ra jacotó tandihi
ca tuhun xeehe tsa tsicá iñi
Nyoo tsi yo.

11 Intuhun intuhun yo tsitó
yo nácaa tsicá iñi yo, maa tyin
inga nyivi ña tsitó ñi tsa tsicá
iñi yo. Tan tacan tucu in-
tuhun ñi Tatyí Ii Nyoo tsitó ra
tsa tsicá iñi maa Nyoo.

12 Yoo ñavin tsa tsiñi tuñi tsa
iyó nu ñuhu ñayivi naquihin
yo, tyin naquihin yo Tatyí
Ii Nyoo, tan juvin ra jacotó
tandihi tsa ñihí yo jahá Nyoo.

13 Tan tsa caahán ndi tsihin
ndo ihya, tuhun tsa jacuahá
maa Tatyí Ii Nyoo tsi ndi
cuví. Ñavin tsa cutuhva maa
ndi tsihin tsa tsiñi tuñi jiñi
ndi. Nacatyí tuhun ndi tsa
jacuahá Tatyí Ii Nyoo tsi ndi
tsi nyivi tsa yihí Tatyí Ii Nyoo.

14 Maa tyin nyivi tsa nduve
Tatyí Ii Nyoo iyó tsihin, ña
naquihin vaha ñi tan ndi ña
cutuñi iñi ñi tsa jacuahá Tatyí
Ii Nyoo tsi ñi. Tan cuñi maa
ñi tyin nduve yahvi nyaá tsi,
tyin nduve Tatyí Ii Nyoo iyó
tsihin ñi.

15 Maa tyin nyivi yihí Tatyí
Ii Nyoo cuví cutuñi iñi ñi. Tan
tsitó ñi tatun vaha a ña vaha
náa iin tuhun. Maa tyin ña
cuví catyí inga nyivi tatun
vaha a ña vaha tsa iyó añima
ñi.

16 Tyin tuhun Nyoo catyí
tsi: “Yoñi tsitó tsa tsicá iñi
Jutu Mañi yo Nyoo. Yoñi cuví
jacuahá tsi ra”, catyí tuhun
Nyoo. Maa tyin yoó tsitó yo
tsa tsicá iñi ra tyin iyó tsa tsiñi
tuñi ra Cristo tsi yo.

3

*Ña taahán tsi cunyicun yo
tsi iin rayihí tuhun Nyoo tsihin
yo, na cunyicun yo tsi Nyoo*

1 Yañi, quivi tsa quitsi yu nu
yucú ndo ña cuví cahan yu
tsihin ndo tumaa caahán yu
tsihin nyivi jaquihín ityi Tatyí
Ii Nyoo. Cahán yu tsihin ndo
tumaa caahán yu tsihin nyivi
ña tsitó tsi Nyoo, tyin ndi lee
xaan ndo tsihin ra Cristo.

2 Cahán yu tsihin ndo tsihin
tuhun tsa ña yá ñi cutuñi iñi
ndo. Tumaa tsahá yo letsí
coho lee tsa ñaha ca cuví catsi
nyayu, tacan javahá yu tsihin
ndo, tyin nyoocho ñaha ca cuví
cutuñi vaha iñi ndo. ¡Tan ndi
vityin tan ña cutuñi iñi ndo!

3 Tyin ndi tsicá ca iñi ndo
tsa cuñi cuñu ñuhu ndo.
Nyiyó iñi ndo, tan iyó tsihi
nu yucú ndo, tan ndusín
ndo. Ndi tsicá iñi ndo tuhun
tsicá iñi nyivi cuenda nu ñuhu
ñayivi ihya, tan javahá ndo
tumaa cuñi cuñu ñuhu ndo.

4 Tyin yihí ndo catyí ndo:
“Cuenda ra Pablo yihí yu.”
Tan inga ndo catyí ndo:
“Cuenda ra Apolos yihí yu.”
Yacan cuñi tsi catyí tyin
javahá ndo tumaa javahá
nyivi iyó ityi tsata.

5 Tyin ¿yóo ra cuví yuhu,
ra Pablo? Tan ¿yóo ra cuví

ra Apolos? tyin cañi tahan ndo tsaha ndi. ¿A ñavin musu Nyoo ñi cuví ndi? Juvín. Tan cahan ndi tuhun Nyoo tsihin ndo tan natsinu iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyí maa Nyoo tyin javaha ndi.

⁶ Yuhu tatsi tuhun Nyoo aña ndo, tan ra Apolos tyosó. Maa tyin Nyoo jacuahnu ra tuhun ra aña ndo.

⁷ Tan yacan cuenda ndi ra tsa tatsi tan ndi ra tsa tyosó, nduve ra cuví ra. Maa tyin Nyoo cuví ra tandihí tyin maa ra jacuahnú tuhun ra aña yo.

⁸ Ra tsa tatsi tan ra tsa tyosó, iin ñi ra cuví ra naha. Tan Nyoo cua tyahvi tsi intuhun intuhun ra naha cuhva tyiñu jahá ra naha.

⁹ Tan nyuhu, cuví ndi musu tan jahá tyiñu ndi tyiñu Nyoo. Tan nyoo ho cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo.

¹⁰ Tsañu Nyoo tsa vaha tsi yu tyin yuhu cuví yu tumaa iin ra cuví ityi nuu tsa samá vehe. Tyin tsaquin yu cuhva vehe can tan tyihí yu tsaha tsi tsitsi ñuhu. Tan inga ra tsa cua sama ityi siqui cuví ra jacuahá, tan cuñi tsi jahá ra cuenda náca jacuahá ra tuhun Nyoo.

¹¹ Tan yoñi cuví caquin inga cuhva tyin tsa canyí cuhva can. Tan yacan cuví ra Jesucristo.

¹² Tan siqui cuhva can cuví sama ra jacuahá tsihin

xuhun cuaan, tsihin xuhun cuitsin, tsihin yuu vaha. Tan cuví tucu javaha ra vehe tsihin yutun, tsihin vitsin, a tsihin tiyama.

¹³ Maa tyin quivi nacuhva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhu can cua nducu cuhva tsi tyiñu javaha ra naha.

¹⁴ Tan vehe tsa ña cua cayu, cua ndoo tsi. Tan ra tsa javaha vehe can cua naquihin ra yahvi tsa taahan tsi tsi ra.

¹⁵ Maa tyin tun ndihí tyiñu javaha ra naha cayu, nduve náa cua ñihi ra naha. Vasu cua cacu maa ra naha tumaa cacu iin ra tsa cuñi cayu tan tsinu ra nu cayú ñuhu.

¹⁶ ¿A ña tsitó ndo tyin vehe ñuhu Nyoo cuví ndo, tan iyó Tatyí Ii Nyoo tsitsi aña ndo?

¹⁷ Tatun iin nyivi jativi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

¹⁸ Ndi intuhun ndo tan ña jandavi ñaha ndo tsi ndo. Tyin tatun cuñi ndo tyin tsitó xaan ndo tsihin tsa tsiñi tuñi tsa iyó nu ñuhu ñayivi ihya, cuñi tsi tsa jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo.

¹⁹ Tyin tsa tsiñi tuñi tsa iyó nu ñuhu ñayivi ihya nduve yahvi nyaá can nu Nyoo. Tyin catyí tuhun Nyoo: “Janacavá ra tsi ra tsitó, juvín ñi maa nu tsa nyityi javaha ra.”

²⁰ Tan catyí tucu tsi: “Jutu Mañi yo tsitó ra tyin tsa tsicá

iñi ra tsitó, nduve yahvi nyaá can.”

²¹ Yacan cuenda ndi intuhun ndo tan ña taahán tsi cu iyo iñi ndo nyehe ndo tsi iin ra jacuahá tsi ndo tyin maa Nyoo tsaha tsi ra naha tsa jacuahá ra naha tuhun vaha tsi ndo tan tsaha ndihi ra tandihi tsa iyó tsi ndo.

²² Yuhu ra Pablo, ra Apolos, ra Pedro, maa Nyoo tsaha tsi ndi tsa cahan ndi tuhun ra tsihin ndo. Tan ñuhu ñayivi ihya, tan ñayivi iyó yo, tan tuhun tsihi, tan tsa cuví vityin, tan tsa cua cuví nu cuahán ca tsi, tandihi maa tuhun ihya tsaha Nyoo tsi ndo.

²³ Tan inga tucu tuhun tyin cuví ndo tsa tsii ra Cristo, tan ra Cristo, tsii Nyoo cuví ra.

4

Ñajacahnu yo tsi yo tan ndi tsi yañi yo

¹ Yacan cuenda ña taahán tsi nyehe ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tava tyiñu Nyoo tsi ndi tsa jacuaha ndi tuhun xeehe ra.

² Tan ra tsa tava tyiñu Nyoo cuñí tsi tsa tyaá yahvi ra tandihi tsa caahán ra tsihin ra.

³ Yacan ña ndihí iñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu.

⁴ Vasu ndi maa tuví iñi yu tyin nduve cuatyí yu, maa tyin ña cuñí tsi catyí tyin nduve cuatyí yu nuu Nyoo. Tyin maa Jutu Mañi yo cua

catyí tun iyó cuatyí yu o nduve.

⁵ Yacan cuenda, ña cahan ndo tsi yu. Cúatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

⁶ Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehe ndo cuhva iyó yu, tan cuhva iyó ra Apolos tyin ña cahanu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyí tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihi nyivi.

⁷ Ndi intuhun ndo tan ña cahanu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsaha can tsi ndo.

⁸ Tan cuñí ndo tyin tsa tsitó maa ndo tandihi tuhun Nyoo, yacan nduve ca tsa cumañí tsi ndo. Tan cuñí tucu ndo tyin cuví ndo rey, tan ña tsiñí ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu.

⁹ Nyuhu tsa cuví ndi ra tsicá tyiñu ra Cristo, tumaa tsa nacoo Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi.

10 Nyiví tsicá ñni maa ñi tyin tsa cuenda ra Cristo tan ndu-soho ndi. Tan nyooho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee ñni iyó tsi ndi tan nyooho iyo xaan cuñi ndo tyin iyó tunyee ñni tsi ndo. Tun ndasi cuñi nyiví nyehé ñi tsi nyuhu, jaha xaan ca ñi tsa ñayiví tsi nyooho.

11 Nda cuanda vityin nyehé ndi tundoho; tsisocó ndi, tan na ityi ñni ndi, cumañi jahma ndi, nduve vehe ndi iyó, tan nyiví jacuu ñi tsa uhvi tsi ndi.

12 Tan tsitatú ndi tsa jahá tyiñu ndi tsihin ndaha ndi. Caahán nyiví tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé ñni ndi.

13 Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuanda vityin ihya.

14 Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu.

15 Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahan tuhun ra Cristo Jesús tsihin ndo nda jihna ñi tan natsinu ñni ndo tsi ra.

16 Tan tsa cuenda tsehe

tsicán yu tsi ndo tsa javaha ndo tumaa javahá maa yu.

17 Yacan cuenda jaquitsi yu tsi ra Timoteo, sehe yu cuenda Jutu Mañi yo, nu yucú ndo. Nii xaan ñni ra nyicún ra tsi Nyoo, tan cuñi xaan yu tsi ra. Maa ra cua janducuhun ñni tsi ndo cuhva iyó yu tsihin ra Cristo tan cuhva jacuahá yu tandihi ñi vehe ñuhu nu cuahán yu.

18 Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo.

19 Maa tyin tun Jutu Mañi yo tan cuñi ra, yatyí cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee ñni Nyoo tsi ra tsa cahnu xaan jahá tsi naha ra, o tatun caahán ñi maa ra naha.

20 Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi ra naha. Maa tyin cua tuvi ñni yo tyin nditsa iyó tunyee ñni Nyoo tsi ra naha.

21 ¿Náa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

5

Nu tavá tyiñu ra Pablo tyin cutuñi iin ra tsicoq tsihin sihi quiin

1 Ñihi tuhun yu tyin iin ra nyí tsihin ndo iyó ra tsihin sihi quiin ra. Tan yacan cuví cuatyí cahnu xaan, tyin ndi nyiví iyó ityi tsata tan ña javahá ñi tacan tyin tsitó ñi tyin ña vaha.

² Taahán tsi cuiihyá cuñí ndo tsa cuenda cuatyí can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo.

³⁻⁴ Vasu nduve yu nyii tsihin ndo, maa tyin tumaa tsa nyii ñi yu tsihin ndo tyin ñuhú ñi yu tsi ndo, tan tsihin sivi Jutu Mañi yo Jesucristo jandaá yu tyiñu ra tsa javahá cuatyí can. Yacan cuñí tsi tsa ndu iin ndo. Tan jaha ndo tuhun tyin nyii yu tsihin ndo. Tan cunyaa tunyee ñi Jutu Mañi yo Jesús tsihin ndo.

⁵ Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá tsa caquiñi ihya, tyin vasiqui tacan tan cua jandihí ra tsa javahá ra can. Tacan tan quivi quitsi Jutu Mañi yo Jesucristo cacu añima ra.

⁶ Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaá tsi tandihí yutsan paan? Tan tacan ñi cuñí yo cuví tucu yacan.

⁷ Tava ndo yutsan iya tsahnu tsa jatívi tsi ndo. Tacan tan cuví ndo tumaa paan tsa tuhvá nyivi javahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuví tucu nyooho tyin maa ra Cristo cuví mbee ticatyí luhlu tsa tsihi tsa cuenda cuatyí yo.

⁸ Yacan cuenda taahán tsi

catsi coo yo tyin tsihi ra Cristo tsa cuenda yo. Tan jandoó yo tsa caquiñi tsa javahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa ñi ñi yo tyin cuví tsi tumaa paan tsa nduve yutsan iya yihí.

⁹ Nu inga carta tsa jaquitsi yu tsi ndo, catyí yu tyin ña taahán tsi cunyanaa ndo tsi ra tsicá nuu tsihin ñaha.

¹⁰ Tan tsa caahán yu tye-hen tsihin ndo, ñavin tsa cunu ndo nu nyivi tsa iyó ityi tsata, ñi tsa iyó tsihin rayii a ñaha, ñi tsa nyiyó ñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñí tsi tsa quita ndihí ndo nu ñuhu ñayivi ihya.

¹¹ Maa tyin tsa cuñí yu catyí yu tsihin ndo ña cunyaa naa ndo tsi nyivi tsa catyí: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayii, o nyiyó ñi ñi, o jacahnú ñi tsitoho, o caahán ñi cuendu, o tsihi ñi nyixi, o suhú ñi. Ñi tsa javahá iin tsa ña vaha ihya, ndi ña cunyecu ndo catsi ndo tsihin ñi.

¹²⁻¹³ Tyin yoo ña taahán tsi tatsi tuñi yo tsi nyivi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñí tsi tatsi tuñi ndo tsi nyivi yihí cuenda Nyoo. Yacan cuenda tavá ndo tsi ra iyó cuatyí nu yucú ndo.

6

Ña cua ndacan yo cuatyí tsaha iin yañi yo cuenda Nyoo

nuu ra cumí tyiñu

¹ ¿Nacuenda tyin tsicán ndo cuatyí tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndáa ra iyó cuatyí?

² ¿A ña tsitó ndo tyin juvin ñi maa yo cua jandaa cuatyí tandihí nyivi iyó nu ñuhu ñayivi ihya nu cuahán ca tsi? Tan tatun maa yo cua jandaa cuatyí can, ¿nacuvi tyin ña cuví jandaa ndo cuatyí nyihi ihya?

³ ¿A ña tsitó ndo tyin cua jandaa yo cuatyí nda cuanda ángel? Tun tacan, ¿a yí jandaa yo cuatyí nyihi tsa iyó nu ñuhu ñayivi? ¿Ña yí jandaa yo can!

⁴ Yacan cuenda tatun iyó tisihi nu yucú ndo, ¿nacuenta tyin cuahán ndo nuu ra cumí tyiñu tsa ña yihí tuhun Nyoo?

⁵ Caahán yu tyehen tsihin ndo na nducahan nuu ndo. ¿A nduve cuii vasu intuhun ra jandaa cuatyí yañi ndo nu yucú ndo?

⁶ Tyin cuahán ndo cua ndacan ndo cuatyí tsaha yañi ndo cuenda Nyoo nuu iin ra cumí tyiñu tsa ña tsinú ñi tsi Nyoo.

⁷ Ña vaha tsa iyó tisihi nu yucú ndo. Vaha taxin ca cunyeen ñi ndo tatun javaha nyivi tsa ña vaha tsi ndo. Tan jaña ndo na suhu maa ñi tsa tsii ndo.

⁸ ¿Maa tyin nyoocho javahá ndo tsa ña vaha tan suhú ndo nda cuanda tsa tsii yañi ndo!

⁹⁻¹⁰ ¿A ña tsitó ndo tyin nyivi

quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha tsa tsicá nuu tsihin rayí, ndi ñi jacahnú tsi-toho, ndi ra iyó ñasihi tan iyó inga ñaha tsi ra, tacan tucu ñiñaha tsa iyó yí tan iyó inga rayí tsi ñi, ndi ra ndusihi, ndi ñi nduyí, ndi ñi suhú, ndi ñi nyiyó ñi, ndi ñi caahán cuendu, ndi ñi tuhva tsihí nyixi, tan ndi ñi tsit; o jandavi ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi.

¹¹ Tyin tacan javahá juhva nyoocho. Maa tyin tsa ndatsi cuatyí ndo tan ndu ij ndo tan nduvahá ndo nuu Nyoo jahá Jutu Mañi yo Jesucristo tan Tatyí Ii Nyoo.

Cuñu ñuhu yo cuví vehe ñuhu Nyoo

¹² Catyí tsi tyin nuña maa javaha yo tandihí náa cuñí maa yo. Tan nditsa tucu maa, maa tyin ña tandihí tan vaha. Cuví javaha yo náa cuñí maa yo, maa tyin cuñí tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo.

¹³ Catyí nyivi tyin Nyoo javahá ra tsa tsatsí yo tsa cuenda tsitsi yo. Tan javahá ra tsitsi yo tsa cuenda tsa tsatsí yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu ñuhu yo ña nditsa tsa javahá ra itsi tyin coo yo tsihin ñaha a tsihin rayí, tyin cuenda Jutu

Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo.

14 Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

15 ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jativí yu tsihin iin ñaha tsicá nuu? Ña taahán tsi javaha yu tacan.

16 ¿A ña tsitó ndo tyin tun iin rayíi tan iyó ra tsihin iin ñaha tsicá nuu intuhun ña cuñu ñuhu nanduví ra tsihin ña? Tyin nu tutu Nyoo catyí tsi tyehen: “Tsa nduvi ñi, iin ña nyívi cuví ñi.”

17 Maa tyin tatun iin nyívi tan nacuhva ñi aña ñi tsi Jutu Mañi yo, iin ñi cuví ñi tsihin ra tyin quihví Tatyí li ra aña ñi.

18 Jandihí ndo tsa iyó ndo tsihin ñaha a tsihin rayíi tun ñavin ñasihi ndo a ñavin yíi ndo cuví. Tyin tandihí inga nu cuatyí tsa javahá nyívi ña jativí can cuñu ñuhu ñi. Maa tyin tsa tsicá nuu ñi tsihin ñaha a tsihin rayíi, jativí can cuñu ñuhu ñi.

19 ¿A ña tsitó ndo tyin cuñu ñuhu yo cuví vehe ñuhu Tatyí li tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo.

20 Tyin Nyoo yahvi xaan jatá ra tsi yo. Yacan cuenda

taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiñi tuñi iñi yo tyin nduvi taahan tuhun ihya tsii maa Nyoo cuví.

7

Nu tsahá cuenda ra Pablo nácaa taahán tsi coo nyívi tindahá

1 Tan vityin cua cahan yu tsa tsicá tuhun ndo tsi yu nu carta tsa jaquitsí ndo tsi yu. Nditsa tyin vaha tsa ña tindaha yo.

2 Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayíi. Yacan cuenda cuñí tsi tsa coo ñasihi tsa intuhun intuhun ra naha, tacan tucu ñiñaha taahán tsi coo yíi tsa intuhun intuhun ñi.

3 Na javaha rayíi cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yíi ña.

4 Ñiñaha ña cuví cundaca ñaha ñi maa ña cuñu ñuhu ña, tyin tsii yíi ña cuví cuñu ñuhu ña. Tacan tucu maa yíi ña, ña cuví cundaca ñaha ñi maa ra cuñu ñuhu ra tyin tsii ñasihi ra cuví cuñu ñuhu ra.

5 Ña vaha tun ña cuhva iin ndo tsi ndo tsi inga ndo. Tatun cuñí ndo coo ndo oración, vaha ca natuhun tahan jihna ndo tyin ña cua coo tsihin tahan ndo quívi tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayíi inga ñaha o ñaha nducu ña inga rayíi tan javaha ndo tsa ña vaha jaha nu ña vaha.

⁶ Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuví tindaha ndo tatun cuñí ndo.

⁷ Tsa cuenda yuhu, vaha ca coo ndo tumaa iyó maa yu. Maa tyin sin sin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

⁸ Tsahá cuenda yu tuhun ihya tsi tandihi nyooho tsa ñaha ca tindaha tan nyooho ñi tsihi yí tyin vaha ca cuví tsi ndo tun ña tindaha ndo tumaa maa yu.

⁹ Maa tyin tatun ña cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

¹⁰ Maa tyin caahán yu tsehe tsihin nyooho ñiñaha tsa tsa tindaha: ña nacoo ndo yí ndo tyin tuhun caahán yu ihya, ñavin tsa cuñí maa yu cuví, tyin maa Jutu Mañi yo tsaha itsi tyin cuhva cuenda yu tsi ndo.

¹¹ Maa tyin tatun iin ñaha tan nacoo ña yí ña, cuñí tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yí ña. Tan tacan tucu rayí, ña taahán tsi nacoo ra ñasihi ra.

¹² Tan cuñí yu cahan yu inga tuhun ihya tsihin inga ndo, maa tyin ñavin Nyoo tsaha itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoo ña vaha tsa cunyaa ña tsihin ra,

nduve ndatu tsa nacoo ra tsi ña.

¹³ Tan tatun iin ña hermana, tan ña tsinú iñi yí ña tsi Nyoo, ndoo ra vaha tsa cunyaa ra tsihin ña, nduve ndatu tsa nacoo ña tsi ra.

¹⁴ Tyin tsa yaha nasoco Nyoo tsi rayí tsa ña tsinú iñi can tsa cuenda tsa iin ñi cuví ra tsihin ñaha tsa tsinú iñi. Tan tsa yaha nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuenda sehe ñi ña cuví tsi naha tsi tumaa cuví sehe nyívi tsa ña tsinú iñi tsi Nyoo, tyin tsa nasoco ndihi Nyoo itsi naha tsi.

¹⁵ Maa tyin tatun rayí an ñaha tsa ña tsinú iñi tsi Nyoo, tan cuñí ñi nacoo ñi tsi tahan ñi tsa tsinú iñi tsi Nyoo, na nacoo maa ñi. Tacan tan ra hermano a ña hermana ndoo nuña ñi. Tyin maa Nyoo cuñí tsa coo vaha yo tsihin tsa nduve tsihi.

¹⁶ Tyin ña tsitó iin ñaha tatun cacu yí ña. Tan ndi rayí ña tsitó ra tatun cacu ñasihi ra.

¹⁷ Tan catyí yu tsihin ndo coo ndo tsihin ndatu tsa tsaha Jutu Mañi yo tsi ndo tan cuhva iyó ndo quívi cana ra tsi ndo. Tan tsehe cuví tsa jacuahá yu tandihi vehe ñuhu tan iin tan iin ñuu.

¹⁸ Tatun tsa yaha tsinyaa tuñi Nyoo cuñu ñuhu ndo tan cana Nyoo tsi ndo ña caça iñi ndo tsa cuenda yacan. Maa tyin tun ña tyaa ñi tuñi can tsi ndo, tan cana Nyoo tsi ndo, nduve cuenda; ña javaha ca ndo can.

¹⁹ Ña ñiñi xaan tsa coo tuñi

can tsi yo, o tsa ña coo tsi. Tyin tsa ñiñi ca, cuví tsa tyaá yahvi yo tuhun caahán Nyoo.

20 Tan intuhun intuhun ndo taahán tsi jahá tyiñu ndo juvin ñi tyiñu tsa tuhvá ndo javahá quivi tsa cana Nyoo tsi ndo.

21 Tyin tatun musu cuví ndo quivi tsa cana Nyoo tsi ndo, ña caça iñi ndo. Maa tyin tatun tsahá tsi cuhva tsa ndoo nuña ndo, nducu ndo cuhva.

22 Iin ra tsa cuví musu tan quihvi ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihvi ra cuenda Jutu Mañi yo, vityin cuví ra musu tsa cuenda ra.

23 Nyoo yahvi xaan jata ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo.

24 Tan catyí yu tsihin ndo, yañi, jaha tyiñu ndo tyiñu tsa tuhvá ndo javahá quivi cana Nyoo tsi ndo.

25 Tan tsa cuenda nyivi tsa ñaha ca tindaha, nduve tuhun tsaha Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsaha ra tucahnu iñi tsi yu tan maa ra yihí ndaha tsi yu.

26 Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó.

27 Maa tyin tatun tsa iyó ñasihhi ndo, ña nducu ndo cuhva tsa nacoo ndo tsi ñi. O

tatun nduve ñasihhi ndo iyó, vaha ca ña tindaha ndo.

28 Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñi yu tsa nyehé ndo tundoho.

29 Yañi, cuñi yu cahan yu tuhun ihya tsihin ndo: Juhva cuii ña quivi iyó yo. Yacan vityin tan ityi nuu tandihi ra tsa iyó ñasihhi cuñi tsi tsa jaha tyiñu ra naha tyiñu Nyoo tumaa tsa nduve ñi ñasihhi ra naha iyó.

30 Tan nyoocho tsa iyó tucui-ihya iñi, ña tyaá yahvi ndo tucuihya iñi can. Tan nyoocho tsa siñ cuñi, ña tyaá yahvi ndo tusi iñi can. Tan nyoocho tsa jata ndaha tyiñu taahán tsi coo ndo tumaa tsa nduve ndaha tyiñu ndo.

31 Tan nyoocho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndihi ñuhu ñayivi ihya.

32 Cuñi yu tyin nyoocho ña caça xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñi maa Jutu Mañi yo.

33 Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasihhi ra.

34 Tan tacan tucu ñiñaha, siin siin cuhva iyó ñi, tyin

ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jac-ahnu ña tsi Nyoo tsihin cuñu ñuhu ña, tan tsihin tsa nii iñi añima ña. Maa tyin ñaha tsa iyó y#i, maa ñi cuhva coo vaha ña tsihin y#i ña nducú ña.

35 Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñi yu tsi ndo. Maa tyin coo ndo iin ñayivi cui#i tsihin tsa nduve tsa jatyañú tsi ndo. Tan javaha ndo iin ñi tyiñu Nyoo.

36 Maa tyin ndáa nyooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñi tsi; ñavin cuatyí cuví can.

37 Maa tyin ndáa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa.

38 Ñi tsa cuñi tindaha sehe ñi, vaha javahá ñi. Tan ñi tsa ña cuñi tindaha sehe ñi, vaha ca javahá ñi.

39 Maa tyin ley Nyoo catyí tsi na cundacá ñaha ray#i tsi ñasihi ra tsitsi tsa ndi iyó ra. Tatun tsa tsihi ra, tacan tan cuví ndoo nuña ña tan tindaha ña yoo tsihin cuñi maa ña. Maa tyin tun cua tindaha ña, na tindaha ña tsihin ra yihí tuhun Nyoo.

40 Maa tyin sii xaan ca cua cuví tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñi yu tyin maa Tatyí Ii Nyoo, tsa#i tuhun ihya tsi yu, tan tsa#i cuenda yu tsi ndo.

8

Nu jacuahá ra Pablo tyin ña vaha janacava yo tsi nyivi nu cuatyí

1 Tan vityin cua cahan yu tsihin ndo cuenda nyayu tsa jamañi nyivi nu tsitoho. Tandihí yo tan cuñi yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñi yo tan nduyaá yo tsihin can. Tan ndi nduve nu jatyinyee can tsi yo. Maa tyin tsa cuñi tahan yo tsi yo jacuahnú tsi tsi yo tsihin Nyoo.

2 Ra tsa cuñi tyin tsitó xaan ra, nduve náa tsitó ra.

3 Maa tyin Nyoo tsitó ra ndáa nyivi cuñi tsi ra tsihin tsa nii iñi añima ñi.

4 Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó.

5 Vasu ndi maa juhva nyivi catyí ñi tyin iyó cuaha nyoo tsa ndacá ñaha nu ñuhu ñayivi ihya tan andivi,

6 maa tyin tsa cuenda yoo, intuhun ñi Nyoo Jutu yo iyó. Tan juvin ra javaha tandihí cuii maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javaha tandihí maa tsa iyó, nda cuanda tsi maa yo.

7 Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá iñi ñi tyin nyito tsitoho

can. Tan cuñí ñi tyin nyayu, tsa jamañi nyivi tsi tsitoho can, ica tsi. Tan cuñí ñi tyin tun catsi ñi nyayu can cua coo cuatyí ñi nu Nyoo.

8 Maa tyin Nyoo nduve cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo.

9 Maa tyin nyooho tsa tsitó tyin nduve cuatyí tsa catsi yo nyayu tsa jamañi nyivi nuu tsitoho, jaha ndo cuenda coto janacava ndo tsi ñi tsa ndi quihvi tuhun Nyoo nu cuatyí, tyin ñi ican tsicá iñi ñi tyin tun catsi ñi tsa jamañi nyivi nu tsitoho, cua coo cuatyí ñi nuu Nyoo.

10 Tyin tatun yooho tsa tsitó un tuhun ihya, tan cunyaa un catsi un tsa iyó vehe tsitoho, tan iin ra yañi yo tsa ndi quihvi cuenda Nyoo tan nyehe ra tyin tsatsí un tsa jamañi nyivi nu tsitoho, cua cuñí ndihi ra catsi ra.

11 Tan cua tiví añima ra tyin cuñí maa ra tyin tsicoo cuatyí ra. Tan ra ican tsihi ra Cristo tsa cuenda ra. Tan yooho tsa tsitó un, siqui un cua cuhun cuatyí can.

12 Tyin tun janacava yo tsi yañi yo tsa ndi quihvi cuenda Nyoo, tsicoo cuatyí yo nuu ra Cristo.

13 Yacan cuenda tatun janacava yu tsi iin yañi yo nuu cuatyí tsihin tsa tsatsí yu nyayu, vaha ca tsa ña cua catsi ca yu nyayu ndi sava ca quivi, tyin ña cuñí yu tsa janacava yu tsi yañi yo nuu

cuatyí.

9

Tsa taahán tsi javahá iin ra tava tyiñu ra Jesucristo

1 Nditza tsa cuví yu iin ra tava tyiñu ra Jesucristo. Tan yoñi nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juvin ñi maa ndo cuví tsandaa tsa cuenda tyiñu javahá yu, tyin tsinú iñi ndo tuhun ra tsa jacoto yu tsi ndo.

2 Vasu yihí nyivi ña tsinú iñi ñi tyin ra Jesucristo tava tyiñu tsi yu, maa tyin nyooho taahán tsi tsinu iñi ndo, tyin juvin yu cahan tuhun ra tsihin ndo tan natsinu iñi ndo tsi ra. Yacan cuenda juvin ndo cuví tsandaa.

3 Tyehen cuví tsa cua cahan yu tsihin nyivi tsa caahán nyaa tsi yu.

4 Iyó ndatu tsa quihín yu tandihi tsa tsahá ñi catsi yu tan tsa tsahá ñi coho yu.

5 Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javaha yañi ra Jesús, tan ra Pedro, tan tandihi ca ra tava tyiñu ra Jesucristo.

6 ¿O tsicá iñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiñi ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo?

7 Ra tsa cuví andaru iyó yahví ra naha. Tan ra tsa tatsí yava nducuaa tsatsí ra tucuaa tsa queé nu nducuaa

ra. Tan ra tsa jahá cuenda indiqui tsihí ra letsi ti.

⁸ Tan ña cuñi ndo tyin tuhun ihya tsa tsiñi tuñi jiñi maa yu cuví, tyin nu ley Nyoo tsa tyaa ra Moisés catyí tsi tyehen:

⁹ “Ra tsa tatsí trigu ña taahán tsi tyihi ra yoho yuhu indiqui tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Nditsa tyin Nyoo ña cahan ra tyehen tsa cuenda indiqui ñi.

¹⁰ Maa tyin na cutuñi iñi yo tyin tumaa ra tahví ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha.

¹¹ Tan tacan cuví tucu nyuhu, quitsi cahan ndi tuhun Nyoo tsihin ndo, tumaa tsa quitsi tatsi ndi tsiti tsitsi añima ndo cuví can. Tan taahán tsi tsa jatyinyeé ndo tsi ndi tsa cuenda tsa jacotó ndi tuhun Nyoo tsi ndo.

¹² Tatun jatyinyeé ndo tsi inga ra tsa ña quitsi tyihi tuhun Nyoo nu yucú ndo, taahán tsi tsa cuaha ca jatyinyee ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihi. Ña tsicán ndi tsa tsiñi ñuhu tsi ndi tsi ndo tyin coto jandihí ndo tsa tyaa yahvi ndo tuhun ra Cristo tsa jacuahá ndi.

¹³ Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tavá siin ra naha juhva cuñu quití tyin catsi ra naha.

Tan tandihi ca cuñu can cua cahmi ra naha tumaa catyí maa Nyoo tsihin ra naha.

¹⁴ Tan juvin ñi tacan caahán Jutu Mañi yo, tyin taahán tsi jatyinyee ñi yihí cuenda Nyoo tsi ra caahán tuhun Nyoo tsihin ñi.

¹⁵ Maa tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaa yu tuhun ihya tyin cuñí yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndihi tsa sii cuñí yu caahán yu tuhun ra Cristo tsihin ndo vasu ndi maa nduve náa jatyinyeé ndo tsi yu.

¹⁶ Ña cuví nduyaa yu tsihin tsa caahán yu tuhun Nyoo tyin maa ra Cristo tava tyiñu tsi yu tsa cahan yu tuhun ra. Maa tyin ndahvi yu tun ña cahan yu tuhun Nyoo ihya.

¹⁷ Yacan cuenda tatun cahan yu tsihin tsa ñi iñi yu, cua ñihi yu yahvi yu. Vasu ña cuñí yu cahan yu, tsa ñiñi cuñí tsi cahan yu, tyin tyiñu tsaha maa Nyoo tsi yu cuví tsi.

¹⁸ Tan tsa sii cuñí yu caahán yu tuhun ra Cristo yacan cuví yahvi yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

¹⁹ Vasu ñavin musu cuví yu, maa tyin nanduví yu musu tandihi nyivi tyin tacan tan cuví jaha canaa yu cuaha ca nyivi cuenda ra Cristo.

²⁰ Tatun nyii yu nu yucú ra Israel naha ra, nanduví yu tumaa maa ra naha tyin ra can

naha ra iyó ra naha cuhva catyí ley Nyoo tsa tyaá ra Moisés. Tan tsa cuñí yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu.

²¹ Maa tyin tatun cuñí yu jaha canaa yu tsi nyívi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñí tsi catyí tyin ña tyaá yahvi yu ley Nyoo tyin tyaá yahvi yu ley ra Cristo.

²² Tatun nyíi yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyee ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyívi, tyin tacan tan tyaá soho ñi tuhun Nyoo tsa caahán yu tsihin ñi tan cacu ñi.

²³ Javahá yu tacan tyin tacan tan cacu nyívi tan nasoco ndihí tucu maa Nyoo tsi yu.

²⁴ Tsitó ndo tyin tatun cua cunu suuhva nyívi, tandihí ñi tsinú, maa tyin intuhun ñi ñi jaha canaa. Tacan tucu maa yo, cuñí tsi tsa ñihi cunyicun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo.

²⁵ Tandihí nyívi tsa tsinú suuhva, nacoó ñi tandihí tsa jatyañú tsi ñi tyin cuñí ñi jahá canaa ñi. Tan nyívi can cua

jaha canaa ñi intuhun corona ndaha yutun tsa iin yaha ñi na ityí. Maa tyin yoo nducú yo cuhva jaha canaa yo tsa ña cua tiví maa.

²⁶ Tsa cuenda yuhu ña tsinú soho ñi yu, tan ndi ña cañi tahan soho ñi yu.

²⁷ Maa tyin ñihi ndacá ñaha yu tsi cuñu ñuhu yu. Tan jañiñí yu tyaá yahvi yu tsi Nyoo, coto juvin ñi maa yu tsa yaha jacuahá yu tsi inga nyívi, tan ndoo yu.

10

Nu jacuahá ra Pablo tyin ña vaha jacahnú yo tsitoho

¹⁻² Yañi, ña cuñí yu tsa naa iñi ndo tsa cuví tsi tsii tsaahnu yo tahan tsanaha. Nyoo jacuhun ra iin vico ityí nuu ñi. Tan yaha sava ñi nu ndutya ñuhu iin caa ñi tsihin ra Moisés, ra cuví ityí nuu tsihin ñi. Tan tsa tacan, tumaa tsa tsicoondutya ñi tsihin vico tan tsihin ndutya ñuhu tan ndu iin ñi tsihin ra Moisés.

³ Tan Nyoo tsahá ra iin ñi tsa tsatsj tandihí ñi.

⁴ Tan tsihi ñi ndutya tsa quitá tsata cava tsa cuahán tsihin ñi tan cava can cuví ra Cristo, tan tandihí ñi iin ñi ndutya can tsihi ñi.

⁵ Maa tyin vasu cuaha tsa iyo javahá Nyoo nyehe ñi, cuaha ñi ña tyaá yahvi ñi tuhun cahan ra tsihin ñi. Tan tsihi ñi nu tsiqui can.

⁶ Tandihí tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi cañ.

⁷ Yacan cuenda ña j̄acahnu ndo tsitoho, tumaa javah̄a juhva ñi can, tyin catyí nu tutu Nyoo tyehen: “Tsinyecu ñi, tsatsi ñi, tan tsihi ñi. Yaha can tan nduvita ñi, tsahan quitsaha tsañí ñi [jacahnú ñi indiqui xuhun cuaan tsa javah̄a ñi].”

⁸ Ña coo ndo tsihin iin ñaha tun ñavin ñasihi ndo cuví. Tacan tucu ñiñaha ña taahán tsi coo ñi tsihin rayi tumaa javah̄a nyivi can. Tan tsihi oco uñi mil ñi tsa iin quivi.

⁹ Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javah̄a juhva ñi can. Tan tsihi ñi tsa caan coo tsi ñi.

¹⁰ Tan ña cahan ndo ndavaha ñi siqui Nyoo, tumaa tsa cahan juhva ñi can. Tan jaquitsi ra ángel ra tsahñi tsi ñi.

¹¹ Tandih̄i yacan tahañ tsi tsaahnu yo tsa tsicoo tahañ tsanaha. Tan tsinyaá tsi nu libru Nyoo tyin tacan tan yoo tsa iyó yo nu cua ndihi ñuu ñayivi ihya vityin coto yo tyin ña taahán tsi javaha yo tandih̄i tsa javah̄a ñi can.

¹² Tan nyoocho tsa cuñi tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha].

¹³ Tundoho tsa nyehé ndo, cuñi maa ndo tyin intuhun ñi maa ndo nyehé can. Maa tyin inducu ñi nyehé tandih̄i ca nyivi. Cuita iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuví cunyeé iñi ndo. Tyin tun nyehé ndo tundoho, nducú ra

cuhva tsa quita ndo tsitsi tundoho can tan cunyeé iñi ndo.

¹⁴ Yacan cuenda yañi, ña j̄acahnu ndo tsitoho.

¹⁵ Caahán yu tsihin ndo tumaa caahán yu tsihin ra tsa cutuñi iñi. Yacan cuenda jaha ndo cuenda tsa caahán yu tsihin ndo tan nyehé ndo tun nditsa a ña nditsa tsa caahán yu.

¹⁶ Quivi tsa nducuhún iñi yo tyin tsihi ra Cristo nu cruu, tsihi yo vinu tan tsatsi yo paan. Tan vinu can cuñi tsi catyi tyin iin ñi cuví yo tsihin ra Cristo tsa cuenda ñiñi ra. Tan paan can cuñi tsi catyi tyin iin ñi cuví yo tsihin ra tsa cuenda cuñu ñuhu ra.

¹⁷ Tyin vasu cuaha yo, maa tyin tandih̄i yo tan tsatsi yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

¹⁸ Tyih̄i tuñi iñi ndo cuhva iyó nyivi Israel. Tsatsi ñi quiti tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra.

¹⁹ Ñavin caahán yu tyin iyó yahvi nyaá tsitoho tsa jacahnú nyivi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can.

²⁰ Tsa caahán yu cuví: Tun jamañi nyivi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha.

²¹ Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu

mesa Nyoo tan juvin ñi cuhva can catsi yo nu mesa nu ña vaha.

²² Ña cuhva yo tisihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

Tun cua javaha yo náa javaha yo, na javaha yo tsa cuenda tsa vaha tsi inga ca nyivi

²³ Nditsa tsa caahán nyivi: “Cuví javaha yo náa cuñí maa yo.” maa tyin ña tandihi can tan jacuahnú can tsi yo tsihin Nyoo tan ndi ña cuví can tsa vaha tsi yo.

²⁴ Ña cuví caca iñi yo tsa cuenda maa ñi maa yo, tyin cuñí tucu tsi tsa caca iñi yo tsa cuenda inga ca nyivi tan nducu yo tsa vaha tsi ñi.

²⁵ Catsi nyooho tandihi cuñu tsa cuyahví nu nuyahvi. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo.

²⁶ Tyin ñuhu ñayivi tan tandihi tsa iyó nuu tsi, tsii maa Nyoo cuví.

²⁷ Tan tatun iin nyivi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñí ndo cuhun ndo, vaha maa cuhun ndo, catsi nyooho tandihi tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho.

²⁸⁻²⁹ Maa tyin tatun ndáa nyivi caahán tyehen tsihin ndo: “Nyayu ihya, nyayu tsa jamañi nyivi nuu tsitoho cuví tsi”; ña catsi ndo tyin coto

nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñí tsi tsa jahá yu cuenda tsi yu tsa catyi tsa tsicá iñi inga ca nyivi?”

³⁰ ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsi yu”, catyi ndo.

³¹ Vaha maa, tun tsatsi ndo, tan tsihi ndo, o javahá ndo inga ca tsa javahá ndo; javaha nyooho maa tyin cuhva taahán iñi Nyoo.

³² Tan ña javaha ndo tsa cuví janduva tsi inga ca nyivi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo.

³³ Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyivi tan nácaa cuví cacu añima ñi.

11

¹ Nyehe ndo tumaa javahá yu cuhva javahá ra Cristo, tacan taahán tucu tsi javaha nyooho cuhva javahá yuhu.

Nacaa taahán tsi javaha ñiñaha nu iyó culto

² Yañi, sñi xaan cuñí yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo.

³ Maa tyin cuñí yu tsa coto ndo tyin ra Cristo cuví jiñi tsihin intuhun intuhun rayiñi tyin juvin ra cuví ityi nuu tsihin ra, tan rayiñi cuví jiñi tsihin ñasiñi ra, tumaa cuví Nyoo jiñi tsihin ra Cristo.

4 Tatun iin rayii tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra.

5 Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya ndii jiñi ña cuví can. Tan tsahá ña ticanuu tsi yii ña tyin juvin ra cuví jiñi tsihin ña.

6 Tatun iin ñaha tan ña tyasí ña jiñi ña, vaha taxin ca xatya ña tandihí ixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña.

7 Ña taahán tsi tsa casi rayii jiñi ra. Tyin cuhva caá Nyoo caá ra, tyin ndacá ñaha ra tsi ñasihi ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi yii ña tsihin tsa tsahá ña tsa cundaca ñaha ra tsi ña.

8 Tyin quivi javahá Nyoo tsi rayii, ña javahá ra tsi ra tsihin yiqui naha ñaha. Tyin tsihin yiqui naha rayii javahá ra tsi ña.

9 Tan tsacatyí rayii, tan tsinu ñaha, tan ñavin tsacatyí ñaha tan tsinu rayii.

10 Yacan cuenda ñiñaha cuñí tsi tsa cundasi jiñi ñi. Tyin cuñi tsi catyi tyin ndacá ñaha yii ñi tsi ñi. Tan cuví tsi tsa vaha tsi ra ángel naha ra.

11 Maa tyin tyaá Nyoo cuhva tyin tsiñi ñuhu rayii tsi ñaha. Tan tsiñi ñuhu ñaha tsi rayii.

12 Nditsa tyin ñaha tsinu ña tsihin yiqui naha rayii jahá

Nyoo. Maa tyin nda cuanda quivi can tan quitsahá tsahá Nyoo tsa coo sehe yii ña. Tan nda cuanda vityin juvin ñi maa Nyoo tsahá tsa coo nduvi taahan ñi, rayii tan ñaha.

13 Tyihí tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu?

14 Tsitó yo tyin ticanuu cuví tsi tsa cuenda rayii tatun nañi jiñi ra.

15 Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi.

16 Maa tyin tatun yóo cuñi cañi tahan tsa catyi tuhun ihya, cuñí tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

Nu caahán ra Pablo tsihin nyivi Corinto tyin ña vaha cuhva tsatsí ñi Santa Cena

17 Yañi, inga tuhun cua cahan yu tsihin ndo tyin ña sii cuñí yu tsihin ndo; tyin tsa javahá ndo nu ndu iin ndo, ña tsahá tsi tsa vaha tsi ndo, tan jatívi tsi tsi ndo.

18 Tyin catyí nyivi tsihin yu tyin cuhva tsa ndu iin ndo tsa cua coo ndo culto, tan natahví sava ndo. Tan tsicá tucu iñi yu tyin vasiqui nditsa tsa caahán ñi.

19 ¡Vasiqui cuñí maa ndo tyin tsihin tsa natahví sava ndo tan quituvi ndaa nyooho tsinú vaha iñi tsi Nyoo!

20 Maa tyin tatun tacan ñi iyó tsihi nu yucú ndo, ñavin Santa Cena cuví can.

21 Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda cuanda ndu iín tandihi nyivi. Tan yihí ndo cuaha tsatsí ndo, tan nda cuanda tsiñi ndo tsihin vinu. Tan yihí nyivi ña ñihí ñi tsa catsi ñi jahá ndo.

22 ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyivi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

Ra Pablo tsahá cuenda ra tsi ñi, nácaa taahán tsi coo ñi Santa Cena

(Mt. 26.26-29; Mr. 14.22-25; Lc. 22.14-20)

23 Tyin Jutu Mañi yo jacuahá tuhun ihya tsi yu. Tan juvin yacan tsa yahá jacuahá yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihin ra iin paan.

24 Tan tsa yahá nacuhva ra tyahvi nyoo tsi Nyoo tan tsahnū ra paan can. Tan catyí ra: “Catsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyí ra Jesús.

25 Tan tsa yahá tsa cuxiñi ra naha tan quihin ra Jesús vasu vinu tan catyí ra: “Tsihin vinu ihya ndoó Nyoo tyiñu tsihin ndo vityin, tyin vinu

tsa yihí tsitsi vasu ihya, niñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun iñi ndo tsi yu”, catyí ra Jesús tsacuaa can.

26 Tan tahan ñi tsa ndu iín yo tan tsatsí yo paan tan tsihi yo vinu jacotó yo tsi nyivi tyin tsacatyí cuatyí yo tsihi Jutu Mañi yo. Tan tacan jacotó yo tsi nyivi nda cuanda quivi quitsi nyico ra.

Ra Pablo tsahá cuenda ra tsi yo nácaa taahán tsi coo yo Santa Cena

27 Tatun tsatsí yo paan tan tsihi yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsihi ra Cristo nu cruu tan tsa tsatí niñi ra.

28 Yacan cuenda cuñi tsi jaha yo cuenda tatun vaha cuahán yo tsihin Nyoo tsa ndi cumañi ca catsi yo paan tan coho yo vinu.

29 Tyin Nyoo tatsí tuñi ra tsi yo tun tsatsí yo tan tsihi yo tan ña tsicá iñi yo tsa cuenda tsa tsihi ra Cristo.

30 Tan tsa cuenda yacan cuaha xaan ndo cuuhví ndo tan nduve tunyee iñi iyó tsi ndo, tan juhva nyivi tahan ndo tsa yahá tsihi ñi.

31 Maa tyin tatun jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo.

32 Maa tyin tatun tatsí tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyivi iyó cuenda nu ñuhu ñayivi ihya.

33 Tan tacan nyoocho yañi, tatun cua ndu iin ndo tsa cua catsi ndo Santa Cena, cūatu

tahan ndo tsi ndo tan çatsi ndo tan çoho ndo iin caa ñi.

³⁴ Maa tyin tatun ndáa nyooho tsisocó ndo, çatsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quivi tsa quitsi nyehe yu nu yucú ndo tan jandaa yu inga ca tuhun.

12

Ndatu tsa tsahá Tatyí Ii Nyoo tsi yo

¹ Yañi, cuñí yu tsa coto ndo náa ndihi ndatu tsahá Tatyí Ii Nyoo tsi tsa intuhun intuhun yo.

² Tsitó ndo tyin quivi tsa ñaha ca nacoto ndo tsi Nyoo, tsahá ndo tsa cundaca ñaha tsitoho tsa ña cuví cahan tsi ndo.

³ Yacan cuenda cuñí yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyí ra tyin ra Cristo cuví Jutu Mañi yo.

⁴ Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá itsi yo.

⁵ Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo.

⁶ Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyeé tsi tandihi yo tan javahá yo can.

⁷ Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee

yo tsi tandihi ca nyivi yihí cuenda ra.

⁸ Tsi juhva yo tsahá Tatyí Ii Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo.

⁹ Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí Ii ra tsahá tunyee iñi tsi inga yo tsa janduvaha yo tsi nyivi cuuhví.

¹⁰ Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyivi. Tan tsi inga yo tsahá ra tsa cuví nacoto yo tun Tatyí Ii Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyivi.

¹¹ Tan tandihi yacan tsahá intuhun ñi maa Tatyí Ii Nyoo. Maa tyin siin siin tsa tsahá ra tsi tsa intuhun intuhun yo, nácaa cuñí maa ra.

Tandihí yo tan cuví yo intuhun ñi cuñu ñuhu tsihin ra Cristo

¹² Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihi tsi tan cuví tsi intuhun ñi cuñu ñuhu. Tan tacan cuví tucu maa yo tsihin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo.

¹³ Tan tacan tucu tandihi yo, a cuví yo nyivi Israel, a

ñi Grecia, a ñi iyó tsitoho, a ñi nduve tsitoho, maa tyin tsa tsicoondutyā yo tan nanduvī yo intuhun ña cuñu ñuhu ra Cristo tyin tsaha ra intuhun ñi maa Tatyī Ii ra coo tsihin tandihī yo.

14 Tyin cuñu ñuhu yo ña cuví cuví tsi intuhun ñi maa tinuu tyin cuñí tsi tsa cunyecú tandihī ca tsa cutahan tsihin tsi tan cuví tsi cuñu ñuhu nīi.

15 Tun tsatyin cuví cahan tsaha yo tan catyí tsi: “Yuhu nduve yahvi nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can.

16 O tun tsatyin cuví cahan soho yo tan catyí tsi: “Yuhu nduve yahvi nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can.

17 Tun tsatyin nanīi cuñu ñuhu yo cuví tsi tinuu tan nduve soho yo, ¿nácaa cua cuñi yo? O tun tsatyin nanīi cuñu ñuhu yo cuví tsi soho, ¿nácaa cua tahñi yo?

18 Maa tyin Nyoo tyaa ra tan iin tan iin can nu cuñí maa ra.

19 Tatun nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can.

20 Maa tyin tsa ndu iin soho, tinuu, jiñi, ndaha, tan tandihī ca maa, tacan tan cuví tsi intuhun cuñu ñuhu.

21 Tinuu yo ña cuví catyī tsi tsihin ndaha yo: “Ña tsiñí ñuhu yooho tsi yu.” Tan ndi jiñi yo tan ña cuví catyī tsi

tsihin tsaha yo: “Ña tsiñí ñuhu yooho tsi yu.”

22 Ña vaha tsa cahan tsi tacan tyin vasu iin tsa lihli tsa cuñí maa yo tyin ña tsiñí ñuhu tsi yo, yacan cuví tsa tsiñí ñuhu ca.

23 Tan nu cuñí yo tyin ña sii caá, tyasí yo. Tan nu ña taahán tsi nyehé nyivi, yacan tyasí vaha ca yo.

24 Tan nu sii caá, ña tyasí yo. Tacan javaha Nyoo cuñu ñuhu yo, tyin tacan tan jacahnú ca yo nu cuñí maa yo tyin ña sii caa.

25 Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusīn tsi.

26 Tatun luxu cuñu ñuhu yo nyehé tundoho, nyehé ndihī tanīi ca cuñu ñuhu yo tundoho. Tan tatun sii cuñí luxu tsi, sii cuñí tanīi tsi.

27 Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo.

28 Tan Nyoo natyisó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyisó ra tsi ra caca tyiñu ra. Tsa tsinu uvi, natyisó ra tsi ra cuví ndusu yuhu ra. Tan tsa tsinu uñi, natyisó ra tsi ra jacuaha. Yaha can, tan natyisó ra tsi ra tsa javaha tsa iyo, tan natyisó tucu ra tsi ra tsa janduvaha nyivi cuuhví, tan ra tsa jatyinyee tsi nyivi, tan ra jaha cuenda vehe ñuhu, tan ra caahán inga yuhu tsa ña tsitó ra.

29 Ña tandihī yo tan tsicá yo

tyiñu ra Cristo. Ña tandihí yo tan cuví yo ndusu yuhu ra. Ña tandihí yo tan cuví yo ra jacuahá. Ña tandihí yo tan javahá yo tsa iyo.

³⁰ Ña tandihí yo tan tsahá Nyoo tunyee iñi tsa janduvahá yo tsi nyívi cuuhví. Ña tandihí yo tan caahán yo inga yuhu tsa ña tsitó yo. Ña tandihí yo tan cuví nacotó yo tan nacatyí tuhun yo náa cuñí tsi catyí tsa caahán inga nyívi.

³¹ Nducu ndo cuhva naquihin ndo tsa vaha ca tsa tsahá Nyoo. Maa tyin cua janaha yu iin cuhva vaha ca tsi ndo.

13

Nu janahá ra Pablo nácaa taahán tsi cuñi yo tsi nyívi

¹ Tatun yuhu tan cuví cahan yu cuaha ñi yuhu tsa caahán nyívi iyó nu ñuhu ñayívi ihya, tan cuví cahan tucu yu yuhu tsa caahán ángel, maa tyin tatun ña cuñí yu tsi Nyoo tan ndi tsi nyívi, cuví yu tumaa tyombo tsa nañí ñi maa o iin caa tsa tsacú ndaxin ñi maa.

² Tatun cuví cuhva cuenda yu tuhun caahán Nyoo, tan cuví coto yu tandihí tuhun xeehe, tan tsitó yu tandihí tuhun, maa tyin tatun ña cuñí tucu yu tsi Nyoo tan ndi tsi nyívi, nduve náa catyí javaha yu tandihí yacan. Tatun tsinú xaan iñi yu tsi Nyoo nda cuanda cuví cahan yu tsihin yucu na cahun tsi inga ityi, tan cua cahun tsi, maa tyin tatun ña cuñi yu tsi Nyoo tan

ndi tsi nyívi, nduve náa ra cuví yu.

³ O tatun cuhva yu tandihí tsa iyó tsi yu tsi nyívi ndaahvi, tan cuhva yu nda cuanda ñayívi yu tyin cucayu cuñu ñuhu yu, maa tyin tatun ña cuñi yu tsi Nyoo tan ndi tsi nyívi, nduve náa cua jatyinyee can tsi yu.

⁴ Tatun nditsa tsa cuñí yo tsi Nyoo tan tsi nyívi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo.

⁵ Tatun nditsa tsa cuñí yo tsi Nyoo tan tsi nyívi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoó tsihi tsitsi añima yo.

⁶ Tatun nditsa tsa cuñí yo tsi Nyoo tan tsi nyívi, ña sii cuñí yo náa ndihí tsa ña vaha javahá ñi, maa tyin cusii iñi yo tsihin tsa vaha tan tsa nditsa.

⁷ Tatun nditsa tsa cuñí yo tsi Nyoo tan tsi nyívi, cunyeé iñi yo nyehe yo tundoho jahá ñi, tan tsinú iñi yo tyin cua javaha ñi tsa vaha tan ndatú yo tsa nasama ñi cuhva iyó ñi, tan ña cundihí iñi yo.

⁸ Tsa cuñí yo tsi Nyoo tan tsi nyívi ña cua cundihí maa tsi, maa tyin coo quívi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiñi ñuhu ca can tsi yo.

⁹ Nyoo tsahá ra tsa coto yo luxu ñi vityin tan tsahá tucu

ra luxu ñi tsa cuhva cuenda yo tsi nyivi,

¹⁰ maa tyin quivi quitsi nyico ra Cristo, cua cundihi tsa tsitó yo luxu ñi tyin cua coto yo tandihi maa.

¹¹ Quivi tsa luhlu yu caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin quivi tsahnü yu nacoö yu tsa yu cuhva javahá ra nyihi.

¹² Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndihi tsi yaa. Maa tyin quivi cua quitsi ra Cristo, cua coto yo tandihi maa. Luxu ñi tsitó yu vityin, maa tyin quivi quitsi nyico ra, tandihi cuii maa tan cua coto yu, tumaa nacotó maa ra tsi yu vityin.

¹³ Iyó uñi taahan tsa ña cua ndihi maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandihi tsa cahan Nyoo tyin cuhva ra tsi yo, tan tsa cuñi yo tsi Nyoo tan tsi nyivi. Tan tsitsi tsa nduñi taahan tsehe, tsa tsiñi ñuhu ca cuví tsa cuñi yo tsi Nyoo tan tsi nyivi.

14

Nu jacuahá ra Pablo nácaa cahan yu inga yuhu tsa ña tsitó yo

¹ Jañihi ca ndo cuñi ndo tsi Nyoo tan tsi nyivi. Tan ndücu ndo cuhva naquihin ndo ndatu tsa tsahá Tatyí Ii Nyoo tsi yo. Ndücu jihna ndo tsa cuhva cuenda ndo tuhun Nyoo tsi nyivi.

² Tyin tun caahán yo inga yuhu tsa ña tsitó yo, tsihin

Nyoo caahán yo, tan ñavin tsihin nyivi. Tyin ndi intuhun ñi tan ña cutuñi iñi ñi, tyin tuhun xeehe caahán yo jahá Tatyí Ii Nyoo.

³ Maa tyin tun tsahá cuenda yo tuhun Nyoo tsi nyivi, cutuñi iñi ñi tan ñihi ca tsahnú ñi tsihin tuhun Nyoo. Tan ndu iin ca iñi ñi jahá yo tan ndunyeé ca iñi ñi.

⁴ Tatun caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahán Nyoo tsihin yo tsihin nyivi, tandihi ñi tsahnú.

⁵ Yuhu cuñi yu tsa cahan tandihi ndo inga yuhu tsa ña tsitó ndo. Maa tyin vaha xaan ca tun cuvi cuhva cuenda ndo tsa caahán Nyoo, tyin jatyinyeé ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatun iin ndo cuví nacoto ndo nácaa caahán inga ndo tsihin inga yuhu, nacatyi tuhun ndo tsihin ñi. Tacan tan cuví jatyinyee tsi tsi tandihi ñi.

⁶ Yacan cuenda yañi, tatun yuhu tan tsa yu nu yucú ndo, tan cahan yu inga yuhu, ña cua jatyinyee tsi tsi ndo. Maa tyin tun cahan yu tsa janahá Nyoo tsi yu, o tsa jacotö ra tsi yu, o tsa tsahá ra tyin cuhva cuenda yu tsi ndo, o tsa jacuaha yu tsi ndo, cua jatyinyee tsi tsi tandihi ndo.

⁷ Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo.

8 Tan tatun nu iyó cuatyí tan ña vaha tiví ra cutu, yoñi cua coto náa cuhva cua cañi tahan ra naha.

9 Tan tacan tucu yoo, tatun caahán yo inga yuhu tsa ña cutuñi iñi nyívi, ña cua coto ñi náa caahán yo. Tan cua catyí ñi tyin jiñi yo ña vaha cuñi, yacan caahán maa yo.

10 Cuaha xaan yuhu caahán nyívi nu ñuhu ñayívi ihya. Tan intuhun intuhun nuu yuhu tan iyó iyó ñi tsa cuñi tsi catyí.

11 Maa tyin tun ña cutuñi iñi yu yuhu tsa caahán inga nyívi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyívi inga ñuu tsa cuenda yu.

12 Yacan cuenda nyooho tsa cuñi xaan naquihin ndatu tsa tsahá Tatyí Ii Nyoo, nducu ndo cuhva naquihin ndo tunyee iñi tsa cuvi jatyinyee vaha ca tsi nyívi yucú vehe ñuhu.

13 Tacan tucu nyooho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyívi náa cuñi tsi catyí.

14 Tyin tatun tsicán tahvi yu tsi Nyoo tsihin iin yuhu tsa ña cutuñi iñi yu, añima yu tsicán tahvi tsi Nyoo, maa tyin tsa tsiñi tuñi jiñi yu ña cutuñi iñi tsi.

15 Yacan cuenda cuñi tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñi iñi yu. Tan cuñi tsi tsa cata yu yaa tsihin yuhu tsa ña cutuñi iñi yu. Tan

cata ndihi tucu yu yaa tsihin yuhu tsa cutuñi iñi yu.

16 Tyin tatun jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñi iñi nyívi tsa ña tsitó náa cuví yacan. Tan ña cua cuvi jacahnu ñi tsi Nyoo tsihin un.

17 Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyee tsi tsi inga nyívi tyin ña cutuñi iñi ñi tsa caahán un.

18 Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca tandihi nyooho.

19 Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñi iñi ndo.

20 Tsahnu çaca iñi ndo, yañi. Tan ña lee xaan çaca iñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi.

21 Catyí Nyoo nu libru ley ra tyehen: “Cua cahan yu tsihin nyívi ihya tsihin yuhu nyívi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo.

22 Yacan cuenda tsa caahán yo inga yuhu cuví tsi tumaa iin seña tsa cuenda nyívi tsa ña tsinú iñi tsi ra Cristo. Maa

tyin tsa tsahá cuenda yo tsa caahán Nyoo, cuví tsi cuenda nyívi tsa tsinú iñi tsi ra.

²³ Tyin tatun tandihi ndo caahán ndo inga yuhu nu ndu iin ndo, tan quihvi iin nyívi tsa ña yihí cuenda Nyoo, o ñi tsa ña cutuñí iñi tuhun Nyoo, cua catyi ñi tyin jiñi ndo ña vaha cuñí.

²⁴ Maa tyin tatun tandihi ndo tsahá cuenda ndo tsa caahán Nyoo tan quihví iin nyívi tsa ña yihí cuenda Nyoo, a ñi tsa ña cutuñí iñi tuhun Nyoo, cua coto ñi tyin iyó cuatyí ñi tsa cuenda tsa cutuñí iñi ñi tsa caahán ndo.

²⁵ Tan tandihi tsa iyó tsitsi añima ñi cua nacoto ñi, tan cua cuiñi tsiti ñi jacahnu ñi tsi Nyoo. Tan cua catyi ñi tyin nditsa nditsa cuii tsa nyaá Nyoo tsihin ndo.

Nacaa javahá yo culto iin cuhva vaha

²⁶ Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuaha ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhun ndo naa cuñí tsi catyí inga yuhu can. Maa tyin tandihi yacan taahán tsi cuví tsi iin tsa tsahá tunyee iñi maa Nyoo tsi tandihi ndo tsa yihí ndo cuenda ra.

²⁷ Tatun cua cahan ndo inga yuhu nu ndu iin ndo, cuñí tsi tsa cahan uvi ndo a uñi ñi ndo, maa tyin intuhun intuhun ñi ndo cahan; ña

cahan tandihi ndo juvin ñi cuhva tsa caahán inga ndo. Tan inga tucu tuhun cuñí tsi tsa nacatyí tuhun inga ndo tsa caahán ndo.

²⁸ Maa tyin tun yoñi cuví nacatyí tuhun tsa caahán ndo, vaha taxin ca, ña cahan ndo tsihin inga yuhu nu ndu iin ndo. Cahan ndo tsihin Nyoo tsihin inga yuhu tun cuñí ndo, maa tyin ndihi cuhva tsiñi ñi maa ndo.

²⁹ Tacan tucu tatun tsahá cuenda yo tsa caahán Nyoo. Cahan uvi ndo, a uñi ñi ndo. Tan tandihi ca ndo jahá ndo cuenda tun vaha tsa caahán yañi ndo.

³⁰ Maa tyin tatun jacoto Nyoo náa inga ca tuhun tsi inga nyívi tsa yucú tsiñi tuhun caahán ndo, tacan tan ra tsa nyaá caahán can, cuñí tsi jandihí ra tsa caahán ra tan cahan inga ñi.

³¹ Tan tacan tandihi nyooho tsa naquihín tuhun tsa tsahá Nyoo cuví nacatyí tuhun intuhun intuhun ndo, tyin tacan tan cutuhva tandihi nyooho tsa ndu iin vehe ñuhu tan ndu iin ca iñi ndo.

³² Nyooho tsa tsahá cuenda tsa caahán Nyoo, cuví cuatu nuu ndo nda cuanda ndihi cahan inga nyívi,

³³ tyin Nyoo ña cuñí ra tsa tavi tahan ña cahan ndo, tyin maa ra catsi iyó ra.

Quihin ndo cuhva iyó inga ca vehe ñuhu nu ndu iin nyívi yihí cuenda ra Cristo,

³⁴ tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yii ñi tumaa catyí

ley Nyoo. Tan tacan taahán tucu tsi javaha nyooho.

³⁵ Tatun náa cuñí ñi coto ñi, na ndaca tuhun ñi tsi yíi ñi nda yuvehe ñi, tyin ña vaha tsa cahan ñiñaha nu ndu iín ndo.

³⁶ Tatun sñin cuhva tsicá iñi ndo, cuñí tsi nducuhún iñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo.

³⁷ Tatun ndáa nyooho cuñí tyin ndusu yuhu Nyoo cuví ndo, o cuñí ndo tyin Tatyí Ii Nyoo jaquihín ityi tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuví.

³⁸ Maa tyin tatun ña cuñí ndo naquihín ndo tuhun ihya, ndi nyuhu tan ña cua naquihin ndi tuhun caahán nyooho.

³⁹ Tan tacan, yañi, nducu ndo cuhva cuhva cuenda ndo tuhun Nyoo tsi nyívi. Tan ña çasi ndo nu cahan nyívi inga yuhu.

⁴⁰ Maa tyin javaha ndo tandihí tsihin tsa vii tan tsa catsi.

15

Naca nandoto ra Cristo

¹ Vityin yañi, cuñí yu tsa nducuhun iñi ndo tuhun ra Cristo, tsa jacacú tsi yo, tsa cahan yu tsihin ndo quívi can. Tan naquihín ndo itsi tan nñi iñi añima ndo tsinú iñi ndo.

² Tan juvin tsa cuenda tuhun ra Cristo cacú añima

ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduve yahvi nyaá tsa natsinu iñi ndo tsi ra Cristo.

³ Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyí yu tyin tsihí ra tsacatyí cuatyí yo, tumaa catyí nu libru Nyoo tyin cua cuví.

⁴ Tan quihví cuñu ñuhu ra tsitsi ñuhu. Maa tyin tsinu uñi quívi nandoto ra tumaa catyí nu libru Nyoo.

⁵ Tan tsa yahá tan quituví ra nuu ra Pedro tan quituví ndihí ra nuu tandihí ra tsicá tyiñu ra.

⁶ Yahá can tan quituví ra nuu yaha ca uhun cientu nyívi yihí cuenda ra. Tan juhva ñi can tsa tsihí ñi, maa tyin ndi iyó cuaha ca ñi nda cuanda vityin.

⁷ Yahá can tan quituví ra nuu ra Jacobo. Tacan tan quituví ndihí ra nuu tandihí ra tsicá tyiñu ra.

⁸ Tan nu ndihí ña quituví ndihí ra nuu yuhu, tsa cuví yu tumaa iin lee tsa cacú yutya.

⁹ Tyin tsa nuu tandihí ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaa ndaha xaan yu tsi nyívi yihí cuenda ra.

¹⁰ Maa tyin Nyoo vaha iñi ra tsihin yu. Yacan cuenda tsahá ra ndatu tsa cuví yu ra tsicá tyiñu ra tan ña cuatu tsahá ra tyiñu tsi yu, tyin cuaha ca tyiñu javahá yu tsi-

hin tsi tan ñavin ca tandihí ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can.

¹¹ Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuví tuhun tsa tsinú iñi ndo.

Nu jacuahá ra Pablo tyin nditsa tsa cua nandoto ndiyi

¹² Tsa caahán ndi tsihin ndo yacan cuví tsa nandoto ra Cristo tsa yaha tsihi ra tan ¿Nacuenda yihí ndo catyí ndo tyin ña nandoto ndiyi?

¹³ Tyin tatun ña cua nandoto ndiyi, ndi ra Cristo tan ña nandoto ra quivi can.

¹⁴ Tun tsatyin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra.

¹⁵ Tan tun tsatyin ña nditsa tsa janandoto Nyoo tsi ra Cristo, cuví ndi iin ra vatya tyin catyí ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo tsi ra Cristo.

¹⁶ Tyin tun ña cua nandoto ndiyi, ndi ra Cristo tan ña nandoto ra.

¹⁷ Tan tatun ña nandoto ra Cristo, ndi iyó cuatyí ndo, tan nduve yahvi nyaá tsinú iñi ndo tsa jaha ra tucahnu iñi cuatyí ndo.

¹⁸ Tan ndi nyivi tsa tsihi tsa yihí cuenda ra ña cacu ñi tun ña nditsa tsa nandoto ra.

¹⁹ O tun nu ñuhu ñayivi ihya ñi jatyinyeé ra tsi yo, tan

ña cua quitsi ra inga tsaha, nduve yahvi nyaá tsinú iñi yo tan cuví yo nyivi soho ca tsa nuu tandihí ca nyivi.

²⁰ Maa tyin tsitó vaha yo tyin nditsa tsa nandoto ra Cristo. Tan juvin ra cuví ra tsa nandoto jihna ca tsitsi tsa tandihí ca ndiyi tsa cua nandoto.

²¹ Tyin tsacatyí cuatyí ra Adán tan tsicoo tuhun tsihi. Tan yacan tsihi nyivi nda cuenda vityin. Maa tyin tsa cuenda tsa nandoto ra Cristo cua nandoto tandihí nyivi yihí cuenda ra.

²² Tyin tumaa tsa tandihí yo tsihi tyin cuví yo tata ra Adán, tacan tucu cua nandoto tandihí yo tan coo yo ñayivi nyito tyin cuví yo nyivi ra Cristo.

²³ Maa tyin cua nandoto yo quivi taahán tsi tsi yo. Jihna ca ra Cristo nandoto. Tan quivi quitsi ra inga tsaha cua nandoto ñi yihí cuenda ra.

²⁴ Yaha can tan cua naa ñuhu ñayivi ihya tan ña cua cundaca ñaha ca ra cumí tyiñu naha ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee iñi tsa iyó tsi tandihí nahnu, tan cua nacuhva cuenda ra can tsi Nyoo Jutu ra.

²⁵ Tyin ra Cristo cua cundaca ñaha ra nda cuanda quivi cuhva Nyoo tsa cuví jaha canaa ra tsi tandihí nu xaan iñi tsi ra nahnu.

²⁶ Tan nu tsa cua janaa ra nu ndihí ña, nu ican cuví tuhun tsihi.

27 Tyin tsa tsaha Nyoo tsa quihí ndaha ra tandihí maa tsa iyó. Maa tyin nu catyí tyin tandihí nacuhva cuenda Nyoo tsi ra Cristo, ña cuñí tsi catyí tyin quihí ndaha ndihí ra tsi maa Nyoo tyin maa Nyoo cuví ra tsaha tsa quihí ndaha ra tandihí maa tsa iyó.

28 Maa tyin quiví jaha canaa ra Cristo tandihí can, tacan tan maa ra, tsa cuví ra Sehe Nyoo, cua nacuhva cuenda nyico ra tandihí tsa tsaha Nyoo tsi ra. Tyin tacan tan cundaca ñaha Nyoo tandihí maa tsa iyó.

29 Tun tsatyin ña nandoto ndiyí, ¿nacuenda tyin juhva nyiví tsicoondutyá ñi tsa cuenda ndiyí? ¿Tan nacuenda javahá ñi tyehen tun ña tsinú iñi ñi tyin coo quiví cua nandoto ndiyí?

30 Tan tacan tucu maa ndi, tun ña cua nandoto ndi, ¿nacuenda tyin ndoó ndi vaha tsa nyehé ndi tundoho ndihí quiví ñi?

31 Tandihí ñi quiví nducú nyiví tsi yu cahñi ñi, tan tsa nditsa cuví tsi, yañi, tumaa tsa nditsa tsa siñ cuñí yu tsihin ndo, tsa cuenda tsa tsinú iñi ndo tsi Jutu Mañi yo Jesu-cristo.

32 Nduve náa catyí tsa nyehé yu tundoho tsa cuñi cahñi nyiví tsi yu ñuu Éfeso tun ña cua nandoto yo. Tatun tacan, nditsa maa tsa caahán nyiví: “Catsi yo, coho yo tyin tyaan isa cua cúu yo”, catyí ñi tsa ña tsitó.

33 Tan catyí tucu ñi tyin: “Tun cutahán yo tsihin nyiví

caquiñi jativí ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyiví tsi ndo.

34 Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyehen tsihin ndo na nducahan nuu ndo.

Nu jacuahá ra Pablo nácaa cua janandoto Nyoo tsi yo quiví quitsi nyico ra Cristo

35 Maa tyin yihí ndo cua ndaca tuhun ndo: “¿Nacaa cua nandoto ndiyí? ¿Nacaa cuñu ñuhu ñi cua cuví?”

36 ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñí tsi tsa tyahyu jihna tsi? Tacan tan cana nuu tsi.

37 Tyin tsa tatsí yo nuñi, ñavin tsa cuví maa tsi itu tan tatsí yo. Tyin nuñi cuví tsi tatsí yo tan tacan ñi cuñí tucu yo tsihin náa inga ca tsiti.

38 Nyoo javahá ra nácaa cuñí maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuví nanduvi tsi inga ca tsiti.

39 Tan tacan tandihí cuñu ñuhu, ña inducu caá tsi, tyin cuñu ñuhu nyiví, siñ caá tsi, tan cuñu ñuhu quiti nahnu, siñ caá tucu can, tan cuñu ñuhu saa, siñ caá tucu yacan, tan tyaca siñ caá tucu can.

40 Tan tacan tucu tsa iyó andiví, siñ caá tsi. Tan siñ caá tucu tsa iyó nu ñuhu

ñayivi ihya. Siñ xaan caá tsa iyó nda andivi, tan siñ tyaqui tucu tsa iyó nu ñuhu ñayivi ihya.

41 Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu.

42 Tan tacan tucu tuhun tsa cua nandoto ndiyi. Tuhvá yo tsicutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo.

43 Cuñu ñuhu tsa iyó tsi yo vityin nduve tunyee iñi iyó tsi can, nacuhví can, tan tsihi can. Maa tyin cua nandoto iin tsa siñ caá tan iyó ca tunyee iñi tan ña cua cúu ca can.

44 Tsa tsihi yo tsicutsí yo cuñu ñuhu tsa naquihin yo nu ñuhu ñayivi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayivi. Tan iyó tucu cuñu ñuhu cuenda gloria.

45 Catyí tutu Nyoo tyin ra Adán ra tsa tsicoo tsa jihna ñi, tsahá Nyoo ñayivi coo ra. Tan ra Cristo cuví ra tumaa ra Adán maa tyin ñavin cuñu ñuhu tsahá ra tsi yo tyin tsahá ra ñayivi nyito coo yo, tyin juvin ra cuví Tatyí Ii.

46 Tsa jihna ñi taahán tsi coo yo tsihin cuñu ñuhu c- atyi yo, yaha can tan coo yo cuenda Tatyí Ii Nyoo.

47 Rayi tsa tsinu tsa jihna ñi, tsihin nyaca ñuhu tsinu ra. Tan cuví ra cuenda ñuhu ñayivi. Maa tyin ra Cristo cuví ra tumaa rayi tsa tsinu uvi

tan cuví ra cuenda gloria.

48 Tandihí yo iyó cuñu ñuhu yo tumaa tsicoo cuñu ñuhu ra Adán tsa tsinu tsihin nyaca ñuhu. Maa tyin tsa cua nandoto yo cuñu ñuhu yo cua nandovi tsi tumaa cuñu ñuhu ra Cristo ra iyó nda andivi.

49 Tumaa ndacu yo tsi rayi, ra tsa tsinu tsihin nyaca ñuhu, tacan tucu cua ndacu yo tsi ra Cristo ra iyó nda gloria.

50 Tan cuñí yu cahan yu tsihin ndo, yañi, tyin cuñu ñuhu yo ña cuví quihvi tsi nu ndacá ñaha Nyoo, tyin iin tsa yatyi tiví ña cuví quihvi can nu yihí tsa ña tuhvá tiví.

51 Tan cuñí tucu yu tsa coto ndo iin tsa xeehe tsa yoñi maa tsitó. Ña tandihí yo cua cúu, maa tyin tandihí yo tan cua nasama cuhva caá yo.

52 Tan nu cua ndihí tiví ángel trompeta, cua nandoto ndiyi iin yaha cuiñi ñi tumaa tsa ndaahvá tinuu yo. Tyin cua tiví ra trompetá tan cua nandoto nyivi tsihi tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo.

53 Tyin cuñí tsi tsa nasama Nyoo cuñu ñuhu yo tsihin iin tsa ña cua naa maa.

54 Tan quivi cua nasama cuñu ñuhu yo tan cua ñihi yo iin tsa ña cua tiví maa, cua cundaa tsa caahán tuhun Nyoo nu catyí tsi tyehen:

“Nyoo jahá canaa ra tsi tuhun tsihi.”

55 Yooho, Tuhun Tsihi, ¿náa tunyee iñi tsa tsicoo tsi un tyin cahñi un tsi ndi?

¿Náa jaha canaa un, yooho
Tuhun Tsihi?

⁵⁶ Tyin cuatyí yo tsahá can tsa
cahñi tuhun tsihi tsi yo, tyin
ley tsahnu tsahá tunyee ñi tsi
can.

⁵⁷ Maa tyin tyahví nyoo tsi
Nyoo, yañi, tyin jaquitsi ra tsi
Jutu Mañi yo Jesucristo tan
tsahá ra tunyee ñi tsi yo tsa
jaha canaa yo tsi nu tuhun
tsihi can.

⁵⁸ Yacan cuenda yañi,
cunyaa naa vaha ndo tsi
Nyoo tsihin tsa ñi ñi ñi ñi
ndo. Tan jañihi ca ndo jaha
tyiñu ndo tyiñu Jutu Mañi yo.
Tyin tun jahá tyiñu yo tyiñu
Jutu Mañi yo, ña jahá tyiñu
cuatu yo.

16

*Nu tsahá cuenda ra Pablo
tsi nyivi nácaa taahán tsi
jatyinyee ñi tsi inga ñi yihí
cuenda Nyoo*

¹ Tan tuhun tsa jatyinyee
ndo xuhun tsi nyivi ndaahvi,
ñi yihí cuenda Nyoo, javaha
ndo tumaa tsahá cuenda yu
tsi nyivi tsicá vehe ñuhu ñuu
tsa cayucú Galacia.

² Jandu iin ndo xuhun tsa
taahán tsi cuhva ndo tsi ñi
tahan tahan una quivi nácaa
tsahá maa Nyoo tsi ndo. Tan
ña cuatu ndo nda tsaa yu.

³ Tan nacatsi ndo ndáa ra
cuñi maa ndo tyin cundaca
xuhun can. Tan tsa tsaa yu,
cua javaha yu iin carta tyin
cundaha ndihi ra naha tan
jacuhun yu tsi ra naha tyin
cundaca ra naha can tsi ñi
tsicá vehe ñuhu Jerusalén.

⁴ Tan tatun tahan tucu tsi
tsa cuhun yu, cuhun ra naha
tsihin yu.

*Nu caahán ra Pablo ndáa
ndihi nu cua cahan ra tuhun ra
Cristo*

⁵ Tsa cua quitsi yu nu yucú
ndo ñuu Corinto, cua yaha yu
ityi Macedonia.

⁶ Tatun cuhva tsi cuhva
cua ndoo yu tsihin ndo nda
cuanda yaha yoo vitsin,
tacan tan cuví jatyinyee ndo
luxu tsi yu tan cuhun yu inga
ñuu.

⁷ Ña iin yaha ñi cua yaha
yu nu yucú ndo tyin cuñi yu
ndoo yu juhva quivi tsihin
ndo tatun Jutu Mañi yo tan
cuñi ra.

⁸ Maa tyin cua cunyi yu
ñuu Éfeso ihya nda cuanda
yaha quivi vico Pentecostés
tsa jacahnú nyivi Israel.
Tacan tan cua quitsi yu nu
yucú ndo.

⁹ Cua ndoo yu juhva quivi
ihya tyin tsahá xaan tsi cuhva
caahán yu tuhun Nyoo tsihin
nyivi vasu ndi maa cuaha ñi
ña taahán ñi ñi tuhun ra.

¹⁰ Tatun tsaa ra Timoteo nu
yucú ndo, na cunyi ra tsihin
ndo. Tan vaha tyannuu ndo
tsi ra tyin juvin ñi tyiñu Jutu
Mañi yo jahá tyiñu ra tumaa
maa yu.

¹¹ Tan vaha cuñi ndo nyehé
ndo tsi ra. Tan jatyinyee ndo
tsi ra na quitsi ra nu nyii yu
tyin ndatú yu tsi ra tsihin
inga ca ra yañi yo naha ra.

¹² Tan ra Apolos yañi yo,
cahan ndaahvi xaan yu tsihin
ra na quitsi ra nu yucú ndo
tsihin inga ca ra yañi yo naha
ra. Maa tyin ña cuñi ra quitsi

ra. Catyí ra tyin quitsi maa ra nda cuhva tsi cuhva tsi ra.

Nu tsahá ra Pablo nacumi tsi tandihi nyivi yihí cuenda Nyoo ñuu Corinto

¹³ Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo.

¹⁴ Tandihí tsa javahá ndo, javaha ndo tsa cuenda tsa cuñí ndo tsi Nyoo tan tsi nyivi yihí cuenda ra.

¹⁵ Yañi, tsitó ndo tyin jihna ca nyivi ra Estéfanos natsinu iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano.

¹⁶ Tan cuñí yu tsa jaha ndo tsa ñayivi tsi nyivi tsa iyó tumaa iyó nyivi ra Estéfanos, tan tsi tandihí ca ñi tsa jatyinyeé tan jahá tyiñu cuenda Nyoo.

¹⁷ Tan sii xaan cuñí yu tyin quitsi ra Estéfanos, ra Fortunato, tan ra Acaico. Tan jatyinyeé ra naha tsi yu tyin nyooho ña cuví quitsi ndo tyin cañi xaan ñuu ndo.

¹⁸ Maa tyin maa ra naha quitsi ra naha. Tan jandunyeé ca ra naha iñi yu tsihin tuhun Nyoo, tumaa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

¹⁹ Tan vatsí nacumi tsi ndo jahá tandihí nyivi yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi.

²⁰ Vatsí nacumi tsi ndo jahá tandihí ra yañi yo, tan cuhva ndo nacumi tsi tsa intuhun intuhun ndo nu yucú ndo juvin.

²¹ Tan yuhu ra Pablo tsahá yu nacumi tsi ndo tan tyaá yu itsi tsihin ndaha yu.

²² Tatun ndáa nyivi ña cuñí tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, naha!

²³ Tan na nasoco Jutu Mañi yo Jesucristo tsi tandihí ndo.

²⁴ Tan catyí yu tsihin ndo tyin yuhu cuñí yu tsi tandihí ndo tsa cuenda ra Cristo Jesús.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta cuenda nyivi yihí cuenda Nyoo ñuu Corinto

¹ Yuhu ra Pablo, cuví yu iin ra tavá tyiñu ra Cristo Jesús tyin maa Nyoo nacatsi tsi yu. Yuhu tan ra Timoteo, yañi yo, jaquitsí ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihi ca nyivi yihí cuenda Nyoo tsa iyó inga ñuu tsa cayucú nani cahnu Acaya.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña ndo.

Nu nyehé xaan ra Pablo tundoho nu tsicá ra caahán ra tuhun ra Cristo

³ Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusí ra iñi yo tandihi ñi tsaha.

⁴ Nyuhu nyehé xaan ndi tundoho maa tyin maa ra jandusí iñi ndi. Tyin tacan tan cuvi jandusí ndi iñi nyivi nyehé tundoho tumaa jandusí maa ra iñi ndi.

⁵ Tyin nyehé ndi tundoho tsa cuenda ra Cristo, tan juvin ñi tsa cuenda ra jandusí Nyoo iñi ndi.

⁶ Yacan cuenda tatun nyehé ndi tundoho tsa cuenda tsa jacoto ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusí Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi.

⁷ Tyin tsitó vaha ndi tyin jandusí ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

⁸ Yañi, cuñi ndi tsa coto ndo tyin cuaha xaan tundoho nyehé ndi tsa tsiyucu ndi ñuhu Asia. Ñihi xaan nducu cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñi maa ndi tyin cua cúu ndi tsa ndi cumañi ca quita ndi ican.

⁹ Tsa nyehé ndi tyin tsa cuñi cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñi iñi ndi tyin cuñi tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi.

¹⁰ Nyoo jacacu tsi ndi quivican, tan juvin ra jacacú tsi ndi nda cuanda vityin. Tan tsitó ndi tyin tacan ñi maa cua jacacu ra tsi ndi,

11 tun nyooho tan ña jandihí ndo tsa jatyinyeé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihí tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

Nu caahán ra Pablo nacuenda ña tsahán ra ñuu Corinto

12 Iyó iin tuhun tsa tsahá tsa sii xaan cuñí ndi tan tuhun ihya cuví tsa cuíti iyó ndi, tan ndaa iyó ndi tsihin tandihí nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi.

13-14 Nu tutu tsa tsa yaha jaquitsi ndi tsi ndo, tyaá ndi maa ñi maa tuhun tsa cuví cahvi ndo tan cuví cutuñi ñi ndo. Vityin tsa tsa cutuñi ñi ndo juhva. Tan cuñí ndi tsa cutuñi vaha ca ñi ndo tandihí tuhun can tyin tacan tan sii cua cuñi ndo tsihin ndi quivi quitsi Jutu Mañi yo Jesucristo. Tan sii cua cuñi tucu nyuhu tsihin nyooho.

15-16 Tsa cuenda tsa tsitó vaha yu tyin tacan cua cuvi: tyaá yu cuhva tyin tsa cua cuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cuhun yu Macedonia tyin tacan tan cuví cusii ñi ndo. Tan tsicá tucu ñi yu tyin yaha can tan cuví jatyinyeé ca ndo tsi yu tan cuhun yu Judea. Tyehen tyaá

yu cuhva javaha yu, maa tyin ña cuvi.

17 ¿A cuñí maa ndo tyin ña tyaá yu cuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyí ñi tyin vaha, maa tyin tsitsi añima ñi catyí ñi tyin ña vaha. Caahán ñi nduvi tuhun can tsa iin ñi cuhva.

18 Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu.

19 Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra.

20 Tan tsa cuenda ra ñihí yo tandihí tsa vaha tsa catyí Nyoo tyin cuhva ra tsi yo. Yacan cuenda tsa jacahnú yo tsi Nyoo, catyí yo tyehen: “Na cuví tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo.

21 Nyoo cuví ra tsahá tunyee ñi tsi nyuhu tsa cuenda ra Cristo, tan tsahá ndihí tucu ra tunyee ñi tsi nyooho. Nacatsi ra tsi yo,

22 tan tsahá ra Tatyí Ii ra coo añima yo, tan cuví tsi tumaa iin tuñi tsa tyaá ra tsi yo tan janahá tsi tsi yo tyin cua ñihí yo tsa cua cuhva ra tsi yo.

23 Ñaha ca maa quitsi nyico yu nu yucú ndo, tyin ña cuñí yu janducuihya yu ñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe

maa Nyoo náa cuñí ra tsihin yu.

²⁴ Caahán ndi tandihi tuhun ihya tsihin ndo tsa cuenda tsa cuñí ndi jatyinyee tahan yo tsi yo tan coo ca tusii iñi Nyoo tsi ndo. Ña cuñí ndi quíhi ndaha ndi tsi ndo tyin nyooho tsa tsinú vaha maa iñi ndo tsi Nyoo.

2

¹ Yacan cuenda ña cuñí yu quitsi yu tyin tacan tan ña cuhva ca yu tucuihya iñi tsi ndo.

² Tyin tatun yuhu tan janducuihyá yu iñi ndo, yoñi cua jandusii iñi tsi maa yu. Tyin nyooho ña cuvi ca jandusii ndo iñi yu tun tsa yaha janducuihya yu iñi ndo.

³ Yacan cuenda carta ñi jaquitsi yu tsi ndo. Ña cuñi yu quitsi yu tyin ña cuñi yu janducuihya ndo iñi yu tsihin cuhva iyó ndo. Tyin taahán tsi jandusii ndo iñi yu. Tyin tatun sii cuñi yuhu, tsitó yu tyin tandihi yo tan sii cuñi yo.

⁴ Quivi tsa tyaa yu carta can tsa cuenda ndo, tsicá xaan iñi yu. Cuihya xaan cuñi yu tan nda cuanda tsacu yu. Jaquitsi yu carta can tsi ndo maa tyin ñavin tsa cuenda tsa janducuihya yu iñi ndo. Jaquitsi yu can tsa cuenda tsa cuñi yu tsa coto ndo tyin cuñi xaan yu tsi ndo.

Nu tsahá cuenda ra Pablo tsi nyivi nácaa taahán tsi jaha ñi tucahnu iñi

⁵ Ra tsa tsahá tucuihya iñi, ñavin yuhu ñi janducuihya ra iñi. Tyin janducuihya tucu

ra luxu iñi nyooho. Caahán yu tyehen tyin tacan tan ña cuñi ndo tyin ña cuvi coo tucahnu iñi tsi ra javahá tacan.

⁶ Tsa iyó vaha ñi. Ña cahan ca ndo tsi ra can. Ña tatsi tuñi ca ndo tsi ra.

⁷ Vityin taahán tsi jaha ndo tucahnu iñi tsi ra tan naquihin ndaahvi ndo tsi ra, tyin tacan tan ña cuihya xaan ca cuñi ra.

⁸ Yacan cuenda cuñi yu tsa cahan ndo tsihin ra tan janaha ndo tsi ra tyin ndi cuñi ndo tsi ra.

⁹ Jaquitsi yu carta can tsi ndo quivi can tyin cuñi yu coto yu tatun cua tyaa yahvi ndo tsa tsahá cuenda yu tsi ndo.

¹⁰ Tan vityin nyivi tsa jahá nyooho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo.

¹¹ Tyin tacan tan ña cuvi jaha canaa nu ña vaha tsi yo. Tyin tsitó vaha yo nácaa cuñi nu jandavi ñaha nu tsi yo.

Ra Pablo ña ndoo ra ñuu Troas tyin ña nañihi ra tsi ra Tito

¹² Quivi tsaá yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo.

¹³ Maa tyin tuñu xaan cuñi yu, tyin ña nañihi yu tsi ra Tito, yañi yo. Yacan cuenda vatsi yu ityi Macedonia ihya

tan ña ndoo yu ndacan cahan yu tsihin nyivi.

Nu caahán ra Pablo tuhun ra Cristo tsihin tsa ñi ñi ñi aña

¹⁴ Maa tyin tyahvi nyoo tsi Nyoo tyin tacan ñi jahá canaa yo tsihin tunyee ñi ra Cristo Jesús tan tsahá ra tsa caahán ndi tuhun ra tsihin nyivi. Tan tuhun ra tsa caahán ndi, cuví tsi tumaa iin xico tami tsa caná tandihí ñi ityi nu cuahán ndi.

¹⁵ Tyin nyuhu cuví ndi tumaa xico tami ra Cristo tsa cuenda Nyoo. Tan tandihí ñi ityi cuahán ndi tan ñihí nyivi xico tami can, tahan ñi nyivi tsa cua cacu tan ñi tsa ña cua cacu.

¹⁶ Maa tyin tsa cuenda nyivi tsa ña cua cacu, ndasi caná tsi, tan cuñi maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú ñi ñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin ¿yoo cuví jaha tyiñu tyiñu ihya?

¹⁷ Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñi ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi ñi ñi aña ndi tyin iin ñi cuví ndi tsihin ra tan maa Nyoo tava tyiñu tsi ndi tsa cahan ndi tyin cuenda ra Cristo yihí ndi.

3

Tuhun tsa tsa ndoo ra Cristo tsihin yo

¹ Tsa caahán ndi tuhun ihya, ¿a cuñi maa ndo tyin caahán ndi tacan tsa cuñi ndi nduyaa ndi? Ñavin. ¿A cuñi tsi cuhva ndi iin carta tsa catyi tyin vaha nyivi cuví ndi? ¿O cuñi tsi ndacan ndi carta tsi ndo tumaa javahá juhva nyivi?

² Ña cuñi tsi. Tyin tsa tyaa Nyoo tsi ndo aña ndi, tan maa ndo cuví carta tsa cuenda ndi. Yacan cuenda ña tsiñi ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo.

³ Tan catsi nyehé ñi tyin cuví ndo carta tsa tyaa ra Cristo tsa cuenda ñi, tan nyuhu nacuhva cuenda ndi carta can tsi ñi. Tan ña tyaa ra Cristo itsi tsihin tyinta maa tyin tyaa ra itsi tsitsi aña ndo tsihin Tatyí Ii Nyoo nyito. Tan ñavin nu yuu tsinyaa tsi.

⁴ Caahán ndi tyehen tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatyinyeé ra Cristo tsi ndi.

⁵ Ña cana ñi ndi caca ñi ndi tyin javahá ndi náa javahá ndi tsihin tunyee ñi maa ndi. Tyin tsitó ndi tyin tandihí tsa javahá ndi tan maa Nyoo javahá can.

⁶ Tan tsahá ra tunyee ñi tsi ndi tsa cahan ndi tuhun ra Cristo, tan tuhun ihya cuví tuhun tsa tsa tsahá ñayivi tsa coo yo tyin iyó Tatyí Ii

ra ańima yo. Ley tsa tsaha Nyoo tsi ra Moisés ńa tsaha tsi ńayivi tsa coo yo tyin janaha ńi tsi tsi yo tyin iyó cuatyí yo tan taahán tsi cúu yo.

⁷Ley tsahnu can tsinyaa nu yuu tsihin letra, tan cahnu xaan cuví tsi. Yacan cuenda tsa tsaá ra Moisés tsihin tsi nu yucú nyivi Israel, nayuhvi xaan ńi nyehe ńi nuu ra tyin xińu xaan nuu ra cuví. Maa tyin tsindihí tsa xińu can. Tatun tacan cuví quivi quitsi ley tsa tsahá tuhun tsihi,

⁸Iyaha ca cahnu cuví tuhun tsa ndoó Nyoo tsihin yo tsa tsahá Tatyí li ra tsi yo!

⁹Tatun cahnu cuví ley tsahnu tsa jacuhún tsi yo anyaya, yaha ca cahnu cuví tuhun tsa ndoó Nyoo tsihin yo tyin janduvahá tsi tsi yo nuu ra.

¹⁰Nditsa tyin cahnu cuví ley tsahnu can. Maa tyin vityin tsitó yo tyin yaha ca cahnu cuví tuhun ra Cristo tsa jacacú tsi yo nuu Nyoo.

¹¹Tyin tatun cahnu cuví tsa tsicoó juhva ńi tyembu, yaha ca cahnu cuví tsa ńa cua cundihí maa.

¹²Tsitó vaha ndi tyin ńa cua cundihí tsi. Yacan cuenda caahán ndi tsihin tsa ńi ńi ańima ndi. ńa cahan nuu ndi tan ńa yuhvi ndi caahán ndi.

¹³Tan ńa javahá ndi tumaa javaha ra Moisés. Tyin ra Moisés tyasi ra nuu ra tsihin jahma, tyin tacan tan ńa nyehe nyivi Israel nu cua naa tsa xińu nuu ra.

¹⁴Quivi can ńa cutuńi ńi ńi. Nda cuanda vityin tan ńa cutuńi ńi ńi. Tyin tatun

cahvi ńi ley tsahnu ńa cutuńi ńi ńi itsi tyin ndasí tsa tsińi tuńi jińi ńi tumaa tsindasí nuu ra Moisés quivi can. Yońi maa cuví jatsiyo yacan tyin intuhun ńi maa ra Cristo cuví jatsiyo can.

¹⁵Nda cuanda vityin tan ńa cutuńi ńi ńi ley tsa tyaa ra Moisés tun cahvi ńi itsi. Tyin ndasí tsa tsińi tuńi ńi ńi.

¹⁶Maa tyin tatun nacuhva cuenda ńi tsi ńi tsi Jutu Mańi yo, maa ra cua nuńa tsa tsińi tuńi ńi ńi.

¹⁷Tyin Jutu Mańi yo, Tatyí li cuví ra. Tan tatun iyó Tatyí li Jutu Mańi yo ańima yo, tsitó yo tyin ńa yihí ndaha ca ley tsahnu tsi yo.

¹⁸Yacan cuenda tandihí yo tan ńa ndasí ca nuu yo. Tan vityin cuví yo tumaa inu, tyin cuví nyehe nyivi tsa cahnu cuví Jutu Mańi yo jahá yo. Tan cuahán nduvahá ca yo jahá Tatyí li ra.

4

¹Nyoo nyehe ndaahvi ra tsi ndi, tan tava tyińu ra tsi ndi tsa cahan ndi tuhun ra tsihin nyivi yacan cuenda ńa ndu uvi ńi ndi.

²Tandihí tsa javahá ndi, ńa tuhvá ndi javahá xeehe itsi, tan ndi ńa javaha ndi tsa tsahá ticanuu. ńa tsicá nuu ndi jandaví ńaha ndi tsi nyivi. Maa ńi maa tuhun Nyoo jacuahá ndi. ńa sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ńi nyivi, na jaha vaha ńi cuenda tyin tandihí tsa caahán ndi, tan

nda maa nuu Nyoo javahá ndi, tan maa ñi maa tsa nditsa cuví tsi.

³ Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyivi ndasí tsa tsiñi tuñi iñi, ñi tsa cua cunaa.

⁴ Nu ña vaha, nu ndacá ñaha tsi nyivi iyó nu ñuhu ñayivi ihya, juvin nu tyasí tsa tsiñi tuñi iñi ñi, tyin tacan tan ña tsinu iñi ñi tsi Nyoo, tan ña nyehe ñi tsa nditsin ra, tan ña cutuñi iñi ñi nácaa jacacú ra Cristo tsi yo, ra iin ñi cuví tsihin Nyoo.

⁵ Ñavin tuhun maa ndi caahán ndi. Tyin tuhun ra Jesucristo caahán ndi tsihin nyivi tyin juvin ra cuví Jutu Mañi yo. Tan nyuhu musu ñi ndo cuví ndi tyin cuñí ndi tsi ra.

⁶ Nyoo catyi tyin ndunditsin nu naa quivi tsinu ñuhu ñayivi. Tan juvin ñi ra jandunditsín tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

Iyó yo ñayivi tsa tsihin tsa tsinú iñi yo tsi Nyoo

⁷ Tsa cuca Nyoo, tsa cuví tunyee iñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisi ñuhu tan naquihín yo itsi. Juvin tsi janahá tsi nyivi tyin maa Nyoo tsahá tunyee iñi ra tsi yo tan ñavin tunyee iñi maa yo cuví tsi.

⁸ Yacan cuenda vasu ndi maa nyehé xaan ndi tundoho

tandihí ñi nu cuahán ndi, ña ndu uví iñi ndi. Yihí tsaha ña tsitó ndi nácaa quita ndi nu tundoho nyehé ndi, maa tyin nyitá iñi ndi tyin cua quita vaha ndi.

⁹ Vasu ndi maa nyaá ndaha nyivi tsi ndi, maa tyin ña nacoo ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyivi, maa tyin ña tsihi ndi.

¹⁰ Tandihí ñi nu cuahán ndi tan nyicún tuhun tsihi tsi ndi tsa cuenda tsa caahán ndi tuhun ra Jesús. Tyin tacan tan nyehe nyivi tyin iyó ndi ñayivi ra.

¹¹ Tsitsi tsa ndi iyó ndi nu ñuhu ñayivi ihya tandihí ñi quivi tan ndatú ndi tuhun tsihi tyin tandihí ñi quivi tan nducú nyivi cahñi ñi tsi ndi tsa cuenda ra Cristo. Tan tsihin tsa taahán ndi janahá tyin iyó ñayivi ra añima ndi.

¹² Yacan cuenda nyuhu tandihí ñi tsaha nyicún tuhun tsihi tsi ndi tyin caahán ndi tuhun ra Cristo tsihin nyivi. Maa tyin nyooho, iyó ndo ñayivi ra Cristo tsa cuenda tuhun ra tsa cahan ndi tsihin ndo.

¹³ Tsinú iñi ndi tsi Nyoo tumaa tsinu iñi ra David tsi ra. Tumaa catyi ra nu libru Salmos: “Tsinú iñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú iñi ndi tsi Nyoo, yacan cuenda caahán ndi tuhun ra.

¹⁴ Tyin tsitó ndi tyin Nyoo, ra janandoto tsi Jutu Mañi yo Jesucristo, cua janandoto ndihí ra tsi ndi. Tan cua ndu

iin ndo tsihin ndi, tsahan cua cundaca ra tsi yo iin caa ñi nda gloria.

¹⁵ Tandihí tuhun ihya cuví tsa cuenda tsa vaha tsi nyooho tan tsa vaha tsi cuaha ca nyívi. Tyin tun cuaha ndo naquihin tsa vaha Nyoo, cuaha xaan ndo cua nacuhva tyahvi nyoo tsi ra, tan cua jacahnu ndo tsi ra.

¹⁶ Yacan cuenda ña ndu uví maa iñi ndi, vasu ndi maa cuahán ndutsahnú cuñu ñuhu ndi, tyin ñayívi tsaa tsa iyó ndi ndutsaá tsi tan iin tan iin quívi.

¹⁷ Tundoho tsa nyehé ndi nu ñuhu ñayívi ihya, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria.

¹⁸ Yacan cuenda ña tyaá iñi ndi tsa cuví nyehe yo. Tyin nyitá iñi ndi tsa ña cuví nyehé yo. Tyin tsa cuví nyehé yo juhva cuii ñi tyembu tsicoó can. Maa tyin tsa ña cuví nyehé yo, ña cua cundihi maa tsa iyó tsi.

5

¹ Tsitó yo tyin quívi cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihi maa tsa cuenda intuhun intuhun yo. Tan ican cua cuyucu añima yo. Iyó can nda gloria tan ñavin ra ñuhu ñayívi ihya javahá can.

² Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñí yo cahun yo coo yo tsitsi

cuñu ñuhu vaha tsa cua cuhva Nyoo tsi yo.

³ Cuhun añima yo tsitsi tsa tsahá Nyoo. Tan cua cunditsi yo itsi tumaa nditsí yo jahma tyin tacan tan ña cua cutandii añima yo.

⁴ Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñí yo. Maa tyin ña ndaahvi cuñí yo tsa cuenda tsa cuñí yo quita añima yo tsitsi cuñu ñuhu yo tan cutandii tsi. Ndaahvi cuñí yo tsa cuenda tsa cuñí yo coo añima yo tsitsi tsa ña cua cundihi maa, tyin tacan tan coo cuii yo. Tan cua cundihi tsa tañi ñi tsicoo jaha tsa ña cua cundihi maa.

⁵ Tan Nyoo tyaá ra cuhva tyin tacan cua javaha ra tsihin yo. Tan tsahá jihna ñi ra Tatyí li ra tsi yo tyin tacan tan cuita iñi yo tyin cua cuhva ra tandihí ca tsa cua cuhva ra tsi yo.

⁶ Yacan cuenda nyitá iñi ndi tsi Nyoo tsihin tsa ñi iñi añima ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria.

⁷ Vasu ndi maa ña cuví nyehe yo tsi ra, maa tyin iyó yo nu ñuhu ñayívi ihya tsihin tsa tsinú iñi yo tsi ra.

⁸ Nyitá iñi ndi tsi ra tan cuñí ndi quita ndi tsitsi cuñu ñuhu ihya tan cahun ndi coo ndi tsihin Jutu Mañi yo.

⁹ Yacan cuenda tsitsi tsa ndi iyó ndi tsihin cuñu ñuhu ihya, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa

vasu nduve ca ndi tyin tsa cuahán ndi tsihin Jutu Mañi yo nda gloria.

¹⁰ Tyin tandihí yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javahá yo quívi tsicoo yo tsitsi cuñu ñuhu yo cuenda nu ñuhu ñayívi ihya.

Nu tsahá cuenda ra Pablo nácaa cuví coo vaha yo tsihin Nyoo

¹¹ Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa caahán ra. Yacan cuenda nducú ndi cuhva cahan ndi tsihin nyívi na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñi ndi tsa coto tucu nyooho.

¹² Caahán ndi tyehen, maa tyin ñavin tsa cuñi ndi nduyaa ndi tyin caahán ndi tsa cuenda tsa cuñi ndi tsa nducuhun iñi ndo tyin caahán ndi tsa nditsa, tan cusí ca iñi ndo tan ñihi ndo cuhva cahan ndo tsihin inga ca ra tsa nduyaá naha ra. Catyí ra naha tyin vaha iyó ra naha tsihin Nyoo, maa tyin tsitsi aña ra naha maa ñi tsa ña nditsa iyó.

¹³ Tatun caahán ndi tuhun Nyoo, catyí juhva nyívi tyin jiñi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñi ndi, tsa cuenda nyooho vaha cuñi ndi.

¹⁴ Tan tsitó ndi tyin intuhun ñi ra Cristo tsihi tsa cuenda tandihí nyívi ñuu ñayívi. Tacan tan tsihi tandihí yo. [Tsa tsihi yo cuñi tsi catyí tyin nacoó yo tsa javahá yo cuhva cuñi maa yo.] Tan tsa tyehen tsitó yo tsa tsihi ra Cristo tsa cuenda tsa cuñi xaan ra tsi yo, jañiñi tsi tsi yo tsa cahan yo tuhun ra tsihin nyívi.

¹⁵ Ra Cristo tsihi ra tsa cuenda tandihí yo tyin tacan tan coo yo cuhva cuñi maa ra tan ñavin cuhva cuñi maa yo tyin tsihi ra tan nandoto ra tsa cuenda tandihí yo.

¹⁶ Vityin tan ityi nuu, ña caca ca iñi yo nyehe yo cuhva iyó nyívi tumaa tsicá iñi nyívi ña tsitó tsi Nyoo. Tsicoo quívi tacan tsicá iñi yo nyehe yo tsi ra Cristo cuñi yo tyin ra ñuhu ñayívi ñi cuví ra. Maa tyin vityin ña tsicá ca iñi yo tacan.

¹⁷ Tyin quívi nacuhva cuenda yo tsi yo tsi ra Cristo, jandutsaa ra aña yo. Tan nanduví yo nyívi tsa jahá ra. Tan tandihí tuhun tsa tsicá iñi yo nu quítsi ca tsi, ña tsicá ca iñi yo can vityin ihya tyin tsahá ra tsa tsiñi tuñi tsa tsi yo.

¹⁸ Maa Nyoo javahá tandihí yacan tyin vityin iyó vaha yo tsihin ra jahá ra tsa cuenda ra Cristo Jesús. Tsahá cuenda ra tsi yo tyin cuñi tsi jacoto yo tsi nyívi nácaa javaha ñi tan cuví coo vaha ñi tsihin ra.

¹⁹ Tyin maa ra tsa yaha nduvahá iyó ra tsihin ñi tsa cuenda tsa tsihi ra Cristo tsa cuenda cuatyí ñi. Nyoo jahá

ra tyin nduve ca cuatyí ñi nuu ra. Tan tava tyiñu ra tsi yo tsa jacoto yo tuhun ihya tsi ñi.

²⁰ Yacan cuenda cuví ndi ra tava tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin sivi ra Cristo, na nduvaha coo ndo tsihin Nyoo.

²¹ Ra Cristo ña javaha ra ndi intuhun cuatyí. Maa tyin Nyoo jaquitsi ra tsi ra nu ñuhu ñayivi ihya; quitsi cúu ra tsa cuenda tandihi cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvaha yo jahá tsa vaha Nyoo.

6

¹ Yañi, iin caa ñi jahá tyiñu yo tyiñu Nyoo. Yacan cuenda caahán ndaahvi xaan ndi tsihin ndo tyin cuatyíñu ndo tandihi tsa vaha tsa tsahá ra tsi intuhun intuhun ndo.

² Tyin catyí Nyoo nu tutu ra tyehen:

Quivi tahañ tsi tsa jacacu
yu tsi un, tsiñi yu tsa
cahan un
tan jatyinyee yu tsi un, catyí
Nyoo.

Jaha ndo cuenda tyin vityin cuví quivi taahán tsi. Tan vityin cuví quivi jacacú Nyoo tsi yo.

³ Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyivi tyiñu Nyoo tsa javahá ndi.

⁴ Tan cuñi ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé ñi ndi náa ndihi tsa

taahán ndi, náa tundoho, tan náa tsihi.

⁵ Vasu ndi maa cañi nyivi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan ñi ndi. Tan ñihi xaan jahá tyiñu ndi nda cuanda tsicoó nyito ndi, tan tsisocó ndi.

⁶ Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan ñi ndi nyehé ndi tandihi maa nuu tundoho tan ña tsiihi ndi tsihi. Vaha ñi ndi, tan cuñi xaan ndi tsi nyivi tyin iyó Tatyí Ii Nyoo añima ndi.

⁷ Caahán ndi maa ñi maa tuhun Nyoo tsa nditsa. Iyó tunyee ñi ra tsihin ndi. Tan tsatyíñu ndi tandihi tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha.

⁸ Yihi quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihi tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi.

⁹ Iyó tsaha jahá ñi tyin ña nacotó ñi tsi ndi, tan yihí tsaha jacahnú tucu ñi tsi ndi. Iyó quivi tsa yatyin ña cúu ndi, maa tyin ña tsiihi ndi tan ndi iyó ca ndi. Iyó quivi tatsí tuñi nyivi tsi ndi, maa tyin ña tsahñi tucu ñi tsi ndi.

¹⁰ Vasu ndi maa cuihya cuñi ndi iyó tsaha, maa tyin ña tsindihí tsa si cuñi ndi.

Iyó tsaha ndaahvi ndi, maa tyin cuaha nyivi janducucá ndi tsihin tuhun Nyoo. Vasu nduve náa iyó tsi ndi, maa tyin tandihi maa tsa iyó tan tsii maa ndi cuví.

¹¹ Nyooho nyivi ñuu Corinto; caahán catsi ndi tsihin ndo tsihin tsa ñi ñi añima ndi tyin nditsa tsa cuñi xaan ndi tsi ndo.

¹² Nyuhu, ña ndasi cuñi ndi nyehe ndi tsi ndo. Maa ndo cuví ndo ndasi cuñi nyehe tsi ndi.

¹³ Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo añima ndo, tumaa tsa javaha maa yu tsihin ndo. Tan ña ndasi ca cuñi ndo nyehe ndo tsi ndi, tyin maa ndi ña ndasi cuñi ndi nyehé ndi tsi ndo.

Vehe Nyoo nyito cuví yo tyin iyó ra añima yo

¹⁴ Ña ndu iin ndo tsihin nyivi ña tsinú ñi tsi Nyoo tyin ña nacatsi tahan añima ndo tsihin añima ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa.

¹⁵ Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú ñi tsi ra, ña cuví ndu iin yo tsihin nyivi ña tsinú ñi tsi ra. Tyin tun ndu iin yo tsihin ñi ña cua nacatsi tahan coo yo tsihin ñi.

¹⁶ Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña jachanu ndo tsitoho tyin vehe Nyoo nyito cuví yo, tumaa catyi maa ra tuhun yo tahan tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuvi Nyoo ñi, tan maa ñi cua cuvi nyivi yu, catyi ra.

¹⁷ Yacan cuenda catyi ra:

Quita ndo mahñu nyivi ña tsinú ñi tsi yu.

Ña cutahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

¹⁸ Tan cuvi yu jutu ndo.

Tan cuvi ndo sehe yu, catyi Jutu Mañi yo, ra iyó tandihi tunyee ñi tsi.

7

¹ Yañi, yacan cuví tsa tsahá Nyoo tsi yo, yacan cuenda cuñi tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca ñi yo tsa ña vaha. Cuñi coo yo tyin tyaá yahvi yo tsi Nyoo.

Nu nacatyí tuhun ra Pablo nácaa nasamq cuhva iyó nyivi yihí cuenda Nyoo ñuu Corinto

² Yañi, caahán ndaahvi yu tsihin ndo, vaha cuñi ndo nyehe ndo tsi ndi tyin nduve maa náa javaha ndi tsi ndi intuhun ndo. Tan ndi ña jativí ndi tsi ndi intuhun ndo. Tan ña jandavi ñaha ndi tsi ndi intuhun ndo.

³ Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyi yu tsihin ndo nda nu quitsi ca tsi, tyin nditsa tsa cuñi yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuví yo tsihin ra;

o tatun cúu yo, iin ñi cua cuvi tucu yo tsihin ra.

⁴ Tsitó vaha yu tyin cua javaha ndo tsa vaha, yacan cuenda sii xaan cuñí yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca iñi añima ndi. Tan sii xaan ca cuñí ndi.

⁵ Nda quivi tsaá ndi Macedonia ihya, tan ñaha ca maa quitatu ndi. Tyin cuaha xaan tisihi tan tundoho nyehé ndi tandihi ñi ityi cuahán ndi. Cañi tahan nyivi tsihin ndi. Tan tsicá xaan iñi ndi tyin ña tsitó ndi tun cua quita vaha tyiñu jahá ndi.

⁶ Maa tyin Nyoo, tacan ñi maa jandu iin ra iñi yo tun cuiihya cuñi yo. Tan jandu iin xaan ra iñi ndi quivi tsaá ra Tito nu yucú ndi ihya.

⁷ Tan ñavin tsa cuenda tsa tsaá ñi ra, maa tyin sii cuñí tucu ndi tsa cuenda tsa jandu iin xaan ndo iñi ra. Nacatyí tuhun ra tsihin ndi tyin cuñí xaan ndo nyehé ndo tsi ndi. Tan catyí tucu ra tyin tsacú xaan ndo tsa cuenda tsa cuiihya cuñí ndo. Tan ñuhú xaan iñi ndo tsi yu. Tsa tsito yu yacan, sii xaan ca cuñí yu cuvi.

⁸ Quivi can tsicá xaan iñi yu tyin tsaha yu tucuiihya iñi tsi ndo tsihin carta tsa jaquitsi yu tsi ndo. Tan ndu uví iñi yu tsa jaquitsi yu carta can tsi ndo. Maa tyin juhva ñi quivi nducuiihya iñi ndo. Tan vityin ña tsicá ca iñi yu tsa cuenda tucuiihya iñi tsa tsaha yu tsi ndo.

⁹ Tan vityin sii xaan cuñí

yu. Ñavin tsa cuenda tsa tsicoo ndo tucuiihya iñi, tsa cuenda tsa ndu uví iñi ndo cuatyí ndo jahá tucuiihya iñi can. Tan cunyeé xaan iñi ndo nyehé ndo tucuiihya iñi cuhva taahán maa iñi Nyoo. Yacan cuenda vaha javaha ndi tsa tsaha ndi tucuiihya iñi tsi ndo.

¹⁰ Tyin tun cunyeé iñi yo nyehé yo tucuiihya iñi cuhva cuñí maa Nyoo, cua nasama cuhva iyó yo tacan tan cua cacu yo. Yacan cuenda na sii cuñi yo tun nyehé yo tucuiihya iñi cuhva cuñí maa Nyoo. Tyin tucuiihya iñi tsa iyó tsi nyivi tsa ña tsitó tsi Nyoo maa ñi anyaya ñihí ñi tsihin can.

¹¹ Nyooho cunyeé iñi ndo nyehé ndo tucuiihya iñi tumaa cuhva taahán iñi maa Nyoo. Tan vityin, nyehé ndo tyin cuaha xaan tsa vaha ñihí ndo tsa cuenda tucuiihya iñi can. Jandaá vaha ndo cuatyí ra can. Cuxaan ndo tsi ra. Tan nayuhví tucu ndo tsi Nyoo. Tsaha cuenda vaha ndo nácaa cuahán tyiñu can. Yaha can tan nda cuanda cuñi ndo nyehé ndo tsi yu. Tan tatsi tuñi ndo tsi ra can. Tan tsa cuenda tsa javaha ndo tumaa cuñí maa Nyoo, cuñí tsi catyí tyin nduve cuatyí ndo tsa cuenda yacan.

¹² Yacan cuenda quivi jaquitsi yu carta can tsi ndo ña jaquitsi yu itsi tsa cuenda tsa tsicá xaan iñi yu cuenda ra tsa javaha cuatyí can. Tan ndi ñavin tsa cuenda ra tsa tahan ticanuu can. Maa tyin

tša cuenda maa ndo, tyin cuñi yu tša coto ndo nácaa ñuhú iñi ndo tsi ndi nuu Nyoo tan nácaa cuñi ndo jatyyinyeé ndo tsi ndi.

¹³ Yacan cuenda nduvaha cuñi añima ndi. Tan sñi xaan cuñi ndi tyin tsitó ndi tyin cuñi ndo tsi ndi.

Tša nyehé ndi tyin sñi xaan cuñi ra Tito, ndusi ca iñi ndi tyin tsaha xaan ndo tunyee iñi tsi ra. Tan vaha xaan naquihñ cuenda ndo tsi ra.

¹⁴ Catyi yu tshin ra Tito tša ndi cumañi ca quitsi ra nu yucú ndo tyin cua tyaa soho vaha ndo tuhun tša jaquitsi yu tshin ra. Tan vityin sñi cuñi yu tyin cundaa tša cañan yu tshin ra. Tyin maa ñi maa tša nditsa tuhva yu caahán. Tan tacan tucu ndunditsa tša cañan yu tshin ra.

¹⁵ Cuñi xaan ra tsi ndo tša nducuhún iñi ra tyin javaha ndo tandihí cuñi maa tša cañan ra tshin ndo. Tan tša tsa ra nu yucú ndo, ndaahvi jahá ndo tsi ndo nuu ra. Tan vaha xaan cañan ndo tshin ra. Tan vaha xaan tyaa yahvi ndo tsi ra.

¹⁶ Tan sñi xaan cuñi yu tyin tsitó yu tyin tacan ñi javahá ndo tša vaha.

8

Najatyinyeéyo tsi nyivi yihí cuenda Nyoo tshin tša ñi iñi añimayo

¹ Vityin yañi, cuñi ndi nacatyí tuhun ndi tshin ndo nácaa jatyyinyeé xaan Nyoo tsi nyivi yihí cuenda ra, ñi iyó ñuu tša cayucú Macedonia ihya.

² Vasu ndi maa cuaha xaan tundo ho nyehé ñi, maa tyin sñi cuñi ñi tshin Nyoo. Ndaahvi xaan ñi, maa tyin cuaha tša iyó tsi ñi tsahá ñi, tumaa tsatyyin cuca ñi.

³ Tan cuví yu tsandaa tyin nyehé yu tyin tsaha ñi cuaha tša iyó tsi ñi tshin tša ñi iñi ñi tan nda cuanda yaha ca tsahá ñi.

⁴ Caahán ndaahvi xaan ñi tshin ndi na cuhva ndi ndatu tša jatyyinyeé ndihí ñi tsi nyivi yihí cuenda Nyoo tša iyó ñuu Jerusalén.

⁵ Cuaha ca javaha ñi tan ñavin ca tša tsica iñi maa ndi. Tyin tša jihna ñi, nacuhva cuenda ñi tsi ñi tsi Nyoo tshin tša ñi iñi añima ñi. Tacan tan nacuhva cuenda tucu ñi tsi ñi tsi nyuhu tša quihí ndaha ndi tsi ñi tumaa cuñi maa Nyoo.

⁶ Tša nyehé yu tyin tacan javahá nyivi Macedonia, tacan tan catyi yu tshin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tša quitsaha tavá ndo jahá ra.

⁷ Tyin nyoo ho vaha xaan javahá ndo tandihí tyiñu. Tsinú xaan iñi ndo tsi Nyoo. Vaha xaan caahán ndo tuhun ra. Vaha cutuñi iñi ndo. Tan tshin tša ñi iñi añima ndo javahá ndo tyiñu ra. Tan cuñi xaan ndo tsi ndi. Tan juvin ñi tacan taahán tucu tsi jatyyinyeé ndo tsi nyivi ndaahvi, tša yihí cuenda Nyoo.

⁸ Ña jañiñi yu tsi ndo tša javaha ndo tša caahán yu. Caahán yu tyehen tshin ndo tša cuenda tša cuñi yu tša

nyehe ndo tsa vaha javahá nyivi yihí cuenda Nyoo Macedonia. Tyin tacan tan javaha ndihi ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan iñi ndo.

⁹ Tyin tsa tsitó maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsi ra nu ñuhu ñayivi ihya tan jandundaahvi ra tsi ra tsa cuenda tsa cuñi ra tsi yo tyin tacan tan cuvi janducuca ra tsi yo.

¹⁰ Yuhu cuñi yu tsa vaha tsa cuenda ndo, yacan cuenda cua cahan yu tsihin ndo tsa tsicá iñi yu tsa cuenda tuhun ihya. Nyooho cuvi nyivi tsa quitsaha jandu iin jihna xuhun cuyava. Ñavin nyivi tava tyiñu tsi ndo javaha ndo tacan. Javahá ndo tacan tyin tacan tsicá iñi maa ndo.

¹¹ Yacan vityin cuñi yu tsa jañihi ca ndo javaha ndo tumaa javahá maa ndo nda nu quitsaha nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo.

¹² Tyin tatun iin nyivi tan cuñi ñi cuhva ñi tandihi cuhva iyó tsi ñi tan cuhva ñi can tsihin tsa ñi iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñi ra tsi yo cuhva yo tun nduve náa iyó tsi yo.

¹³ Caahán yu tyehen tsihin ndo, maa tyin ñavin tsa cuenda tsa cuñi yu tsa jatinyee ndo tsi nyivi tan ndoo ndaahvi ndo tan ñi ican

coo tsa coo tsi ñi.

¹⁴ Tyin vityin tsa iyó luxu tsi ndo, taahán tsi jatinyee ndo tsi nyivi ndaahvi tsihin can. Tyin tacan tan inducu ñi coo tandihi yo. Tan inga tsaha, maa ñi cua jatinyee tucu tsi maa ndo tun cumañi tsa cumañi tsi ndo. Tyehen taahán tsi jatinyeeé tahan yo tsi yo tsihin tsa iyó tsi yo tyin tacan tan ña nyehe ndi in-tuhun yo tundoho.

¹⁵ Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativi ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyí tsi nu tutu Nyoo.

Nu tyaá ra Tito naha ra cuhva cahun ra naha ñuu Corinto

¹⁶ Tyahvi nyoo tsi Nyoo tyin tsaha ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo.

¹⁷ Tsa cahán yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñi tucu maa ra ñuhú iñi ra tsi ndo. Yacan cuenda vityin vatsí ra nu yucú ndo tsihin tsa iyó iñi maa ra.

¹⁸ Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihi nyivi yihí cuenda Nyoo.

¹⁹ Tan inga tucu tuhun tyin nacatsi vaha nyivi yihí cuenda Nyoo tsi ra yañi yo ihya tyin cahun ndihi ra tsihin ndi cundaca ndi xuhun tsi nyivi ndaahvi iyó ñuu

Jerusalén. Cuñí xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatyinyee ndi tsi tandihi nyivi yihí cuenda Nyoo.

²⁰ Tsihin cuenda xaan javahá ndi tyiñu ihya, tyin tacan tan ña cahan nyivi tsi ndi tsa cuenda tsa tavá ndi xuhun cuenda nyivi ndaahvi.

²¹ Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

²² Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin ñi xaan iñi ra. Tan cuaha ñi tsaha janahá ra tyin cuñi xaan ra tsi Jutu Mañi yo. Tan vityin tsa tsa tsitó ra tuhun ndo, sií cuñi ra tyin tsitó ra tyin cua javaha ndo tsa vaha nuu Nyoo.

²³ Tatun yóo tsicá tuhun tuhun ra Tito, çatyí ndo tsihin ñi tyin ra vaha iñi tsi yu cuví ra, tan jahá tyiñu ra tsihin yu, tan jatyinyeé ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihya naha ra, çatyí ndo tyehen tsihin ñi:

—Maa nyivi yihí cuenda Nyoo jaquitsi tsi ra naha. Tan vaha xaan jahá tyiñu ra naha tyiñu ra Cristo —çatyí ndo.

²⁴ Yacan cuenda janaha ndo tsi ra ihya naha ra nu tuvi tyin nditsa tsa cuñi ndo

tsi ra naha. Tyin tacan tan coto tandihi nyivi yihí cuenda Nyoo tyin nditsa tsa caahán yu tyin vaha javahá ndo.

9

Nu tsahá cuenda ra Pablo nácaa taahán tsi jatyinyee yo tsi nyivi ndaahvi yihí cuenda Nyoo

¹ Tan cuenda xuhun tsa jandu iin ndo tsa cuenda nyivi ndaahvi yihí cuenda Nyoo, ña ñiñi xaan cuñi tsi cahan yu tuhun can tsihin ndo.

² Tyin tsitó yu tyin cuñi xaan ndo javaha ndo tsa vaha. Yacan cuenda sií cuñi yu nacatyí tuhun yu tuhun ndo tsihin nyivi iyó Macedonia, tyin nyoocho tsa iyó ñuu Corinto tsa canyíí Acaya, nda cuyava tan quitsahá cuñi ndo jatyinyeé ndo tsi nyivi ndaahvi. Tan tsa cuenda yacan cuaha xaan nyivi yihí cuenda Nyoo Macedonia ndu iin ca iñi ñi tan cuñi ndihi tucu maa ñi jatyinyeé ñi tsi nyivi ndaahvi.

³ Vasu ndi maa tsitó yu tyin vaha tsicá iñi ndo, maa tyin jaquitsí yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñi ndo javaha ndo tsa vaha. Tyin tacan tan ña cua çatyí nyivi Macedonia tyin ña nditsa yu tsa caahán yu.

⁴ Tyin coto cusana quitsi iin ra Macedonia tsihin yu, tan nyehe ra tyin nduve xuhun

jandu ijin ndo. Tan tahan yu ticanuu tsa cuenda tsa nduve náa javahá ndo. Tan vihi ca maa ndo. Tyin tsa yaha catyí yu tyin cuñí xaan ndo jatyinyee ndo tsi nyívi ndaahvi.

⁵ Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iin ndo xuhun tsa tyihí ndo cuhva tyin cuhva ndo. Tyin tacan tan quívi quitsi yu tandihí tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñi tsi ndo.

⁶ Ndúcuhun iñi ndo tuhun tsa catyí tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra.

⁷ Tan intuhun intuhun yo cuñí tsi cuhva yo cuhva iyó iñi maa yo. Ñavin uvi caca iñi yo tan cuhva yo o cuhva yo tsa cuenda tyin jañiñi nyívi tsi yo. Tyin Nyoo cuñí ra tsi nyívi tsahá tsihin tsa sií cuñí ñi.

⁸ Nyoo cuví cuhva ra tandihí nuu tsa vaha tsi ndo, tyin tacan tan ña cumañi náa cumañi tsi ndo. Tan cuví jatyinyee tucu maa ndo tsi inga ca nyívi.

⁹ Tumaa catyí tuhun Nyoo tyehen:

Iin ra vaha tsahá ra, tsihin tsa nií iñi ra, tsa iyó tsi ra tsi nyívi ndaahvi.

Tan tumañi iñi tsa javahá ra, ña tsinaá tsi nuu Nyoo, catyí tsi.

¹⁰ Nyoo, ra tsahá tsiti tatsí yo, tsahá tucu ra tandihí tsa tsatsí yo. Tan cua cuhva tucu ra cuaha ca tsiti tsa tatsi ndo tan vaha cua cuvaha tsi jaha ra. Tan tsa tacan tsahá ndo ca jatyinyee ca ra tsi ndo javaha ndo tsa vaha tsihin nyívi.

¹¹ Tan coo ca tandihí nuu tsa cuca tsi ndo, tyin tacan tan cuvi jatyinyee ca ndo tsi nyívi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi.

¹² Tyin tsa jatyinyee yo tsi nyívi yihí cuenda Nyoo tsihin tsa tsahá yo tsa tsiñi ñuhu tsi ñi, tsahá tucu yo tsa nacuhva ñi tyahvi nyoo tsi Nyoo.

¹³ Tan cua jacahnu ñi tsi Nyoo. Tyin tsihin tsa jatyinyee ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyee xaan ndo tsi maa ñi tan tsi tandihí ca nyívi.

¹⁴ Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi ndo tsa cuenda tsa vaha tsa tsahá ndo tsi ñi jahá Nyoo.

¹⁵ Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

10

Ra Pablo iyó ndatu tsi ra tsa jaha cuenda ra tsi nyívi tsa jacoto ra tuhun Nyoo

¹ Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin

yihí ndo catyí ndo tyin tun tsahá cuenda yu tsi ndo tsihin carta, ñihi xaan caahán yu tsihin ndo, maa tyin tun nyíi yu tsihin ndo, ndaahvi xaan jahá yu tsi yu, catyí ndo.

² Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quivi quitsi yu nu yucú ndo tyin tsitó yu tyin cuñí tsi tsa cuxaan ñihi yu tsi juhva ndo. Tyin yihí ndo catyí ndo tyin javahá yu tumaa javahá ra ña yihí cuenda ra Jesucristo.

³ Nditsa tyin ra ñuu ñayivi cuví ndi. Maa tyin ña cañí tahan ndi tumaa cañí tahan nyivi iyó nu ñuhu ñayivi ihya.

⁴ Tyin tsa xaan tsa tsaty-íñú ndi tsa cañí tahan ndi, ñavin tsa xaan tsa iyó nu ñuhu ñayivi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siqui tandihi ca tunyee iñi tsihin tsi tan nda cuanda tunyee iñi tsa iyó tsi tatyí ña vaha.

⁵ Tan tacan cuví jaha canaa ndi tsi tandihi tsa caahán ndasi nyivi siqui tuhun Nyoo, tan tandihi tsa ña vaha tsa tyasí nu tyaa yahvi nyivi tuhun Nyoo. Tan tsahá ndi tsa cundaca ñaha ra Cristo tandihi cuhva tsicá iñi ndi tyin tacan tan tyaa yahvi ca ndi tsi ra.

⁶ Quivi cutuhva tandihi nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaa ndi cuhva tsa tatsi tuñi ndi tsi ndo.

⁷ Nyooho jahá ndo cuenda

cuhva iyó nyivi. Tan ña jahá ndo cuenda nácaa iyó añima ñi. Tatun tsitó vaha ndo tyin cuenda ra Cristo yihí ndo, taahán tsi coto ndihi tucu ndo tyin cuenda ra yihí tucu nyuhu.

⁸ Ña cahán nuu yu caahán yu tsa tsaha Nyoo ndatu tsi yu tsa quihí ndaha yu tsi ndo, vasu ndi maa yahá caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñí yu jativi yu tsi ndo.

⁹ Ña cuñí yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo.

¹⁰ Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaá nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu.

¹¹ Maa tyin nyooho tsa caahán tacan cuñí tsi coto ndo tyin tumaa caahán yu nu carta, tacan cua javaha tucu yu tsa tsaá yu nu yucú ndo.

¹² Nditsa ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahvi nyaá caahán ra naha can tyin javahá ra naha cuhva javahá inga nyivi tan ñavin cuhva cuñi Nyoo. Tan cuñí ra naha tyin vaha tsa jandu inducú ra naha tsi ra

naha tsihin inga nyivi.

¹³ Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsi tsi ndi ñuu Corinto nu yucú ndo.

¹⁴ Tun tsatyin ña jihna ca maa ndi cahan tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindacá tuhun ra Cristo nu yucú ndo.

¹⁵ Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuví jacuaha cuaha ca ndi tuhun ra Cristo tsi ndo, maa tyin tandihí ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi.

¹⁶ Tan tsicá iñi ndi cuhun ndi cucahan ndi tuhun ra Cristo nu ña tsitó nyivi tuhun ra. Tyin tacan tan ña cua catyí nyivi tyin nduyaá ndi tsihin tyiñu javahá inga ra naha.

¹⁷ Nyooho tsa cuñi nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo.

¹⁸ Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

tsi nyivi ñuu Corinto na jaha cuenda ñi tsi ñi na ña jandaví ñaha ra vatya naha ra tsi ñi

¹ Vaha xaan tun ña cundihi iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihi iñi ndo tsihin yu vasu ndi maa tuhun maa yu cuví tsi.

² Yuhu cuiñú xaan yu tsi ndo. Tan maa Nyoo tsahá tsa cuiñu yu tsi ndo, tyin juvin yu cahan tuhun ra Cristo tsihin ndo nda jihna. Tan cuñi yu tsa cuñi ndo tsi intuhun ñi maa ra tumaa cuñi iin ñaha yoco tsi ra tsa cua cuví yí ña. Tyin iin ñaha yoco cuñi ña tsi intuhun ñi maa ra tsa cua cuví yí ña.

³ Maa tyin tsicá xaan iñi yu tsa cuenda ndo, coto tahan ndo tumaa tahan ña Eva. Tyin ña Eva jandaví ñaha nu coo tsi ña tsihin maña nu. Tan yuhu ña cuñi yu tsa jandaví ñaha nyivi tsi ndo tan nasama ndo cuhva tsicá iñi ndo tuhun ra Cristo, tan jandihí ndo tsa jacahnú ndo tsi intuhun ñi maa ra.

⁴ Tyin nyooho yatyi xaan nasamá ndo cuhva tsinú iñi ndo tuhun ra Jesús tun siin cuhva caahán nyivi tuhun ra. Tyin ñavin tuhun ra Jesús tsa jacoto ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsi tahan tsihin tuhun Tatyí lí Nyoo tsa naquihin ndo nda jihna. Yatyi xaan natsinú iñi ndo tuhun caahán nyivi tan ñavin tuhun, tsa jacacú ra Cristo tsi yo, tsa cahan ndi tsihin ndo.

⁵ Ra tsa catyí, “Nyuhu cuví ndi ra vaha caahán tuhun ra

11

Nu tsahá cuenda ra Pablo

Cristo”, tsicá iñi yu tyin ña cahnu ca cuví ra can naha ra tan ñavin ca maa yu. Tan nyooho nyicún ndo tsi ra naha.

⁶ Vasu ndi maa ña ñihí vaha yu cuhva caahán yu, maa tyin cutuñí vaha iñi yu tuhun Nyoo. Tan yacan cuví tsa jacuahá ndi tsi ndo tsihin tandihí cuhva javahá ndi.

⁷ ¿O cuñí maa ndo tyin ña vaha javahá yu tsa ña quihín yu yahví quiví cahan yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnu xaan jaha ndo tsi yu tan nducahnu maa ndo nuu Nyoo.

⁸ Nyívi tsa tsicá tuhun Nyoo vehe ñuhu inga ñuu jatyinyee tsi yu tsihin xuhun. Tan xuhun tsa tsahá ñi tsi yu tsatyíñu yu can quiví quitsí yu quitsí cahan yu tuhun ra Cristo tsihin ndo.

⁹ Vasu ndi maa yihí tsaha cumañí tsa cumañí tsi yu tsa tsinyí yu tsihin ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandihí tsa cumañí tsi yu. Tacan jahá cuenda yu tsi yu tyin ña cuñí yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu.

¹⁰ Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyívi iyó nanií Acaya.

¹¹ ¿Nacuenda caahán yu tye- hen cuñí maa ndo? ¿A tsa

cuenda tsa ña cuñí yu tsi ndo? Ñavin. Tyin nda maa Nyoo tan tsitó ra tyin cuñí xaan yu tsi ndo.

¹² Ña cua jandihí yu javahá yu tsa tuhvá yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha.

¹³ Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra naha tan jahá ra naha tyin ra tsicá tyiñu ra Cristo cuví ra naha.

¹⁴ Tan tsa javahá ra ican naha ra ñavin tsa iyo cuñí yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu.

¹⁵ Yacan cuenda ña iyo cuñí yo tun ra nyicún tsi nu tan jahá ra naha tyin javahá ra naha tsa vaha. Coó quiví cua tatsi tuñi Nyoo tsi ra naha tsa cuenda tsa ña vaha tsa javahá ra naha.

Tundoho tsa nyehé ra Pablo nu tsicá ra caahán ra tuhun Nyoo

¹⁶ Inga tsaha caahán yu tsihin ndo: Ndi intuhun ndo tan ña caca iñi ndo tyin sana iñi yu tsa caahán yu tyeheh. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndihí tucu yuhu luxu.

¹⁷ Caahán yu tumaa caahán ra sana iñi tyin tacan tan cuvi nduyaa yu. Ñavin maa Jutu Mañi yo catyí tsihin yu tsa javahá yu tyeheh.

18 Cuaha xaan ra naha catyí ra naha tyin cahnu cuví ra naha tan nduyaá ra naha tsihin tsa iyó nu ñuhu ñayivi ihya. Yacan cuenda cua jacahnu ndihi tucu yuhu tsi yu.

19 Nyooho catyí ndo tyin tsitó xaan ndo. Tun nditsa ndo, ¿nacuenda tyin yatyi xaan tyaá soho ndo tsa caahán ra sana iñi can naha ra?

20 Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñí ra naha tsi ndo tsa cuví ndo musu ra naha. Suhú ra naha tsa tsii ndo. Ndacá ñaha ra naha tsi ndo. Ndasi cuñi ra naha nyehé ra naha tsi ndo. Tan nda cuanda cañi ndaha ra naha nuu ndo.

21 ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu.

22 Catyí ra can naha ra tyin nyivi Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyivi Israel; juvin ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu.

23 Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehen caahán yu tumaa caahán ra sana iñi, maa tyin nditsa tsa ñihi ca

jahá tyiñu yu tan ñavin ca ra can naha ra. Tan cuaha ca tsaha cañi nyivi tsi yu tsihin yoho tan ñavin ca ra can naha ra. Cuaha ca tsaha tsinyi yu vehe caa. Tan cuaha tsaha cuñi cúu yu, maa tyin ña tsihi yu.

24 Uhun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha tsata yu.

25 Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa caahán yu tsihin. Tan tsa uñi tsaha tsa nyee yutun ndoo tsitsi ndutyá, iin tsaha ndoo yu nu ndutyá ñuhu iin quivi tan iin tsa cuaa.

26 Tandihí ñi tsaha tsa caahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tahán yu. Quita ñasuhu nuu yu ityi caahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juvin ñi tacan javahá nyivi inga ñuu tsihin yu. Cuaha tsa tahán yu tsitsi ñuu, nu tsiqui, nu ndutyá ñuhu. Cuaha tsa tahán yu jahá ra catyí tyin yañi yo cuví tsi ra naha tan ña nditsa ra naha.

27 Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihí yu ndutyá coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañi jahma tsi yu.

28 Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandihi nyivi yihí cuenda Nyoo, nyooho tan nyivi inga ñuu tucu.

29 Tyin tun iin ndo tan vita cuñí ndo, tacan vita cuñí tucu yuhu. Tatun javahá iin ndo tsa ña vaha jahá nyivi, cahán nuu yu tan xaan cuñí yu.

30 Tatun cuñí tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu.

31 Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu.

32 Quivi tsinyij yu ñuu Damasco ra cumí tyiñu tsa jahá tyiñu tyiñu ra rey Aretas, tyacu ra andar yuhu cora ñuu can, tyin jaha cuenda ra naha coto quita yu tan tñin ra naha tsi yu tan cundaca ra naha tsi yu vehe caa.

33 Maa tyin nyivi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumí tyiñu ñuu can.

12

Tsa nyehe ra Pablo nda nu tsinu uñi gloria jahá Nyoo

1 Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu

Mañi yo tsi yu tan tsa nyehe yu jahá ra.

2 Nacotó yu iin ra yihí cuenda ra Cristo tsa tsahan andivi. Tsa iyó utsi cumi cuiya tsa quihin Nyoo tsi ra tsahan ra nda nu tsinu uñi andivi. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó.

3-4 Tsitó yu tyin tsindaca Nyoo tsi ra nda paraiso nu iyó nyivi tsihi tsa tsinu iñi tsi Nyoo. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahan ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyivi tsa nacatyí tuhun ñi tuhun can.

5 Cuví nduyaa yu tsihin tsa janahá Nyoo tsi yu quiwi can. Maa tyin ña nduyaa yu tsihin tsa javahá yu tyin nduyaa yu maa ñi maa tsihin tsa nduve tunyee iñi maa yu iyó tsi yu.

6 Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñí yu cahan yu can coto cahnu xaan jaha nyivi tsi yu. Vaha ca nanyehe maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

7 Nyoo ña cuñí ra tsa nduyaa yu tsihin tsa janahá ra tsi yu. Yacan cuenda tsaha ra tsa nyehé xaan yu tundoho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yu. Tyin tacan

tan ña cuvi nduyaa yu tsihin tsa janaha Nyoo tsi yu.

⁸ Tan tsican yu uñi tsaha tsi Jutu Mañi yo na quihin nyaa ra tundoho can siqui yu.

⁹ Maa tyin catyí Jutu Mañi yo tyehen tsihin yu: “Yuhu cuñi xaan yu tsi un, tan yacan ñi cuví tsa tsiñi ñuhu tsi un. Tyin nyivi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyí ra. Yacan cuenda sii xaan cuñi yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin yu.

¹⁰ Yacan cuenda sii xaan cuñi yu tsa nduve tunyee iñi maa yu iyó tsi yu. Vasu ndi maa caahán nyivi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuví tsi yu, maa tyin sii xaan cuñi yu tsa nyehé yu tundoho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

Tsicá iñi ra Pablo tuhun nyivi yihí cuenda Nyoo ñuu Corinto

¹¹ Tsa caahán yu tuhun maa yu nanduví yu tumaa ra sana iñi. Maa tyin maa ndo cuñi tsa cahan yu tacan tyin ña jahá ca ndo tsa ñayivi tsi yu. Maa ndo taahán tsi vaha cahan tuhun yu, vasu ndi maa ña cahnu xaan cuví yu. Tatun yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñi maa ra naha tyin vaha

xaan ca ra naha tan ñavin ca inga ra tsicá tyiñu Nyoo.

¹² Yuhu cunyeé xaan iñi yu nyehe yu tandihi tundoho quivi tsinyii yu jahá tyiñu yu tyiñu Nyoo nu yucú ndo. Cuaha xaan tsa iyo javaha yu jahá Nyoo tyin tacan tan coto ndo tyin nditsa tsa cuví yu ra tava tyiñu ra.

¹³ ¿A vaha ca tyaá nuu yu tsi inga nyivi tsa iyó inga ñuu tan ñavin ca nyooho? Ñavin. Inducu ñi tyaá nuu yu tsi tandihi ndo. Intuhun ñi tsa ña javaha yu tsihin ndo tsa tsinyii yu tsihin ndo cuvi tsa ña tsican yu xuhun cuita catsi yu tsi ndo. Ña taahán tsi ndacan yu tucahnu iñi tsi ndo tyin tsitó ndo tyin vaha javaha yu.

¹⁴ Vityin tsa iyó vaha tandihi tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu yu tsa iyó tsi ndo tyin maa yu cua jatyinyee tsi ndo. Tyin iin ra iyó sehe, ñavin sehe ra tsahá tsa tsiñi ñuhu tsi ra. Tyin maa ra taahán tsi cuhva tsa tsiñi ñuhu tsi sehe ra. Tan tacan yuhu.

¹⁵ Sii xaan cuñi yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayivi yu tsa cuenda ndo. Tan tsicá tucu iñi yu tyin tun jañihí ca yu cuñi yu tsi ndo, nyooho ña cuñi vaha ndo tsi yu.

¹⁶ Tandihí ndo tan tsitó ndo tyin ña tsaha yu tundoho tsi ndo. Tan vasu ndi maa tsitó

ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahā ndo cuenda.

¹⁷ ¿O cuñí maa ndo tyin cahan yu cuendu tsihin ra jaquitsí yu nu yucú ndo tan jandaví ñaha ra naha tsi ndo jahā yu?

¹⁸ ¿A jandaví ñaha ra Tito tan inga ra naha tsi ndo quiví quitsí ra naha nu yucú ndo jahā yu? Ña jandaví ñaha ra naha tsi ndo tyin nyuhu ña tuhvá ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí Ii Nyoo iyó tsi nduvi ndi?.

¹⁹ Vasiqui tsicá iñi maa ndo tyin tandihí tsa caahán ndi, tan caahán ndi can tsa cuñí ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihí tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñí xaan ndi tsi ndo.

²⁰ Tsicá iñi yu coto ña cua tahan iñi yu cuhva yucú ndo quiví tsa yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsa yu nu yucú ndo

tan ña cuiti ña ndaa yucú ndo.

²¹ Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihí ndo ña jandihí ndo tsa javahá ndo tsa ña vaha tsa quitsahā javahá ndo nu quitsí ca tsi tyin rayíi ndi tsicá nuu ra tsihin ñaha tan ñaha ndi tsicá nuu ña tsihin rayíi tan náa ndihí ca maa tsa ña vaha.

13

Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha cuahán ñi tsihin Nyoo

¹ Tsinu uñi tsaha cuví tsi tsa cua quitsi yu ihya. Nda tacan tan cuví cundaa tyiñu ñi tsa javahá tsa ña vaha. Maa tyin cuñí tsi uvi o uñi taahan ra cua cuví tsandaa.

² Tyin quiví quitsí yu nu yucú ndo, catyí yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyí tucu yu inga tsaha tsihin ñi, tan tsihin tandihí ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo.

³ Taçan tan cua coto ndo tsa cuñí xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra añima ndo. Tyin iyó xaan tunyee iñi ra tsi ndo.

4 Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuvi jatyinyee ndi tsi nyooho.

5 Nducu cuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo añima ndo tun nditsa tsa tsinú iñi ndo tsi ra?

6 Maa tyin cuñí yu tsa coto ndo tyin nyuhu ña vatya ndi.

7 Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuñí ndi catyi nyivi tyin vaha ndi. Caahán ndi tyehen tyin cuñí ndi tsa javaha ndo maa ñi maa tsa vaha. Nduve cuenda ndi tun catyí nyivi tyin vaha ndi o ña vaha ndi.

8 Tyin nyaá tsi siqui ndi tsa javaha ndi tsa vaha. Ña cuví tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa.

9 Yacan cuenda si cuñí ndi tsa nduve tunyee iñi iyó tsi ndi, tan nyee cuñí nyooho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo na cunyicun vaha ca ndo tsi ra nda cuanda ña cumañi ca tsa cumañi tsi ndo.

10 Jaquitsí yu carta ihya tsi ndo tsa ndi cumañi ca quitsi yu nu yucú ndo tyin

janduvaha ndo tsi ndo. Tyin tacan tan ña cua cuñi tsi cuxaan yu tsi ndo quivi tsa yu nu yucú ndo. Tyin nditsa tsa tsaha Nyoo ndatu tsi yu tsa quihí ndaha yu tsi ndo. Maa tyin ña tsaha ra ndatu can tsi yu tsa janducuiiya ndihí ca yu iñi ndo. Ñihí yu ndatu can tsa cuenda tsa jatyinyee yu tsi ndo.

11 Yañi, nu ndihí caahán yu ihya, catyí yu tsihin ndo, nducu ndo cuhva ña cumañi tsa cumañi tsi ndo nuu Nyoo. Si cuñi ndo. Jandu iin ndo iñi ndo. Coo mañi tahan ndo. Tan Nyoo, ra cuñí xaan tsi ndo tan tsahá tsa taxin coo añima yo, na cunyaa ra tsihin ndo.

12 Cuhva tahan ndo nacumi tsi ndo tsihin tsa si cuñí ndo nyehé ndo tsi ndo.

13 Tan jaquitsí tandihí nyivi yihí cuenda Nyoo ñuu ihya nacumi tsi ndo.

14 Naquihin ndo tsa vaha coo añima ndo jaha Jutu Mañi yo Jesucristo. Tan na coto ndo tyin Nyoo cuñí xaan ra tsi ndo. Tan nacoto tucu ndo tyin iyó Tatyí li ra tsihin ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Cayucú Galacia

Nu tyaá ra Pablo iin carta tsa cuenda nyivi yihí cuenda Nyoo ñuu cayucú Galacia

¹ Yuhu ra Pablo cuví yu iin ra tsa tava tyiñu ra Jesucristo. Ñavin nyivi jaquitsi tsi yu tyin maa ra Jesucristo tan maa Nyoo Jutu yo jaquitsi tsi yu tan tsaha ra tyiñu ihya tsi yu. Tan juvin ra cuví ra tsa janandoto tsi ra Cristo tsa yaha tsihi ra.

² Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ñuhu iyó ñuu cayucú Galacia.

³ Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo tsi yo coo aña ndo.

⁴ Maa ra Jesucristo nacuhva cuenda ra tsi ra nu cruu tsacatyí cuatyí yo Tan javaha ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ñuhu ñayivi ihya.

⁵ Yacan cuenda na jacahnu yo tsi maa Nyoo tacan ñi maa. Tan na cuví tsi tacan.

Nduve ca inga cuhva cuví cacu yo

⁶ Iyo xaan cuñí yu tyin nyooho numi xaan nacoó ndo tsi Nyoo. Juvín ra nacana tsi ndo tyin coo vaha ndo tsihin ra tsa cuenda tsa javaha ra Cristo tsa cuenda yo. Tan vityin sin tuhun tsinú iñi ndo. Cuñí maa ndo tyin cua jacacu yacan tsi ndo.

⁷ Maa tyin nduve ca inga cuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñí ra naha jativi ra naha tuhun Nyoo tsa jacacú ra Cristo tsi yo.

⁸ Tun iyó yóo caahán tuhun ra Cristo tsihin ndo tan ña nacatsí tahan can tsihin tuhun tsa cahan ndi tsihin ndo, na cahun ñi anyaya. Yoñi jaha, vasu maa ndi cuví, o iin ángel quee andivi cuví.

⁹ Tsa yaha cahan yu tuhun ihya tsihin ndo, maa tyin cuñí yu cahan nyico yu itsi tsihin ndo inga tsaha. Tatun yóo nyivi caahán tuhun Nyoo tsihin ndo tan sin cuhva caahán ñi, na jacahun Nyoo tsi ñi anyaya.

¹⁰ Ña caahán yu tacan tsihin ndo tsa cuenda tsa cuñí yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñí yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

Nacaa quitsaha tsicá ra Pablo tyiñu Nyoo

¹¹ Cuñí yu tsa coto ndo yañi, tyin tuhun ra Cristo tsa

caahán yu tsihin ndo, ñavin tuhun nyivi cuví tsi.

12 Ñavin nyivi tsaḥa tuhun ihya tsi yu. Tyin juvin ñi maa ra Cristo jacotó itsi tsi yu.

13 Nyooḥo tsiñi ndo nácaa javaha yu quivi can. Tan tsitó ndo tyin tsinyaḥ ndaha xaan yu tsi nyivi yihí cuenda Nyoo quivi tsa tsinyii yu cuenda ñi Israel ñuu yu. Tan nducu yu kuhva jandu uvi yu iñi ñi tsinú iñi tsi ra Cristo.

14 Tan tsicoḥ yu kuhva iyó ñi Israel, tan yuhu cuvi ra cuahán ityi nuu ca tan ñavin ca juhva ra yihí tahan tsihin yu tsa iin ñi cuiya ndi. Tyin yuhu cuñi xaan ca yu javaha yu kuhva javaha tsi tsaahnu ndi.

15 Maa tyin tsa ndi cumañi ca cacu yu tan Nyoo tsa nacatsi maa ra tsi yu tyin cuñi xaan ra tsi yu. Tan nda tsa tsaḥ maa quivi tsa tyaḥ ra kuhva, tan nacana ra tsi yu.

16 Tacan tan janaha ra tsi Sehe ra tsi yu tan nacoto yu tsi ra, tyin tacan tan cuvi cahán yu tuhun ra nácaa jacacú ra tsi yo tsihin nyivi tsa ñavin nyivi Israel cuví. Tan quivi can ña nducu yu nyivi jacuaha tsi yu nácaa taahán tsi javaha yu.

17 Tan ndi ña tsaḥan yu ñuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsaḥan yu nda Arabia. Tacan tan cuanuhu nyico yu inga tsaha nda ñuu Damasco.

18 Tsa yaha uñi cuiya tan tsaḥan yu nda Jerusalén, tan

nacoto yu tsi ra Pedro. Tan ndoo yu tsihin ra tsaḥan quivi.

19 Maa tyin ña nyeḥe yu tsi inga ra tsa tava tyiñu ra Cristo. Intuhun ñi ra Jacobo yañi Jutu Mañi yo, nyeḥe yu.

20 Tan nda nuu Nyoo tan caahán yu tsihin ndo tyin tuhun tsa tyaá yu nu tutu ihya, tsa nditsa cuví tsi.

21 Tsa yaha tsa tsaḥan yu ñuu Jerusalén tan tsaḥan yu nda Siria tan nda Cilicia.

22 Tan ra yañi yo tsa yucú vehe ñuhu ra Cristo tsa iyó ñuu tsa cayucú Judea, ña nacotó ra naha tsi yu.

23 Maa tyin ñihí tuhun ra naha tsa caahán nyivi tuhun yu, tyin catyí ñi: “Ra tsa tsinyaḥ ndaha tsi yo quivi can, vityin caahán ndihi ra tsihin nyivi na tsinu iñi ñi tsi ra Cristo. Tan quivi can cuñi ra jativi ra tuhun ra Cristo”, catyí ñi, ñihí tuhun ra naha.

24 Tan jacahnu ra naha tsi Nyoo tsa cuenda tsa javaha Nyoo tsihin yu.

2

Ra cuví ityi nuu tsihin nyivi vehe ñuhu ñuu Jerusalén, ndoo ra naha vaha kuhva jahá tyiñu ra Pablo

1 Tsa yaha utsi cumi cuiya, tan tsaḥan yu ñuu Jerusalén inga tsaha tsihin ra Bernabé. Tan tsaḥan ndihi tucu ra Tito tsihin ndi.

2 Tsaḥan yu ndacan tyin maa Nyoo janaha tsi yu tyin taahán tsi tsa cahun yu. Tan ndacan quitá sñn yu tsihin ra cuví ityi nuu tsihin nyivi

vehe ñuhu naha ra. Tan tsaha cuenda yu tsi ra naha nácaa tuhvá yu caahán tuhun ra Cristo tsihin nyivi tsa ñavin ñi Israel cuví. Tyin tacan tan coto yu tun ndoo ra naha vaha tsihin cuhva jacuahá yu. Tyin tun ña ndoo ra naha vaha, cuatu xaan jahá tyiñu yu.

³ Maa tyin ndoo ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuví ra.

⁴ Nditsa tyin juhva ra naha cuñi ra naha tsa cunyaa tuñi can tsi ra Tito. Tan ra ican naha ra quihvi xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu cuhva iyó nuña yo jahá ra Cristo cuví ra naha. Tan cuñi ra naha tyin taahán tsi tsa cundaca ñaha ley tsahnu tsi yo.

⁵ Maa tyin ndi luxu tan ña tsaha ndi tsa cundaca ñaha ra can naha ra tsi ndi. Tyin ña cuñi ndi tsa jaña ndo tuhun nditsa tsa jacacú ra Cristo tsi yo.

⁶ Maa tyin ra cuví ityi nuu tsihin nyivi vehe ñuhu, nduve tuhun tsa tsaha ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yoñi jaha. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo.

⁷ Ra cuví ityi nuu vehe ñuhu naha ra, nduve inga tuhun tsaha cuenda ra naha tsi yu tyin nacotó ra naha tyin maa

Nyoo jaquitsi tsi yu tyin cahan yu tuhun ra Cristo tsihin nyivi tsa ñavin nyivi Israel cuví. Tumaa tsa jaquitsi ra tsi ra Pedro tyin cahan ra tsihin nyivi Israel.

⁸ Tyin juvin ñi maa Nyoo tava tyiñu tsi ra Pedro tyin cahan ra tuhun ra Cristo tsihin nyivi Israel. Tan tava tyiñu tucu ra tsi yuhu tyin cahan yu tuhun ra tsihin nyivi tsa ñavin nyivi Israel cuví.

⁹ Yacan cuenda ra cuví ityi nuu naha ra, ra Jacobo, ra Pedro tan ra Juan, nacotó ra naha tyin Nyoo tsahá ra tunyee iñi tsi yu tsa cahan yu tuhun ra Cristo tsihin nyivi. Tan tsaha ra naha ndaha ra naha tiñi ndi, tsihin ra Bernabé tyin ndoo ra naha vaha tsa cahan ndi tuhun ra Cristo tsihin nyivi tsa ñavin nyivi Israel cuví, tan maa ra naha cahan tucu ra naha tsihin nyivi Israel.

¹⁰ Tan cahan ra naha iin tuhun tsihin ndi, na nducuhun iñi ndi tsi nyivi ndaahvi tan na jatinyee ndi tsi ñi. Tan yacan cuví tsa nducú xaan yu cuhva javahá yu tandihi ñi quivi.

Nu nduxaŋ ra Pablo tsi ra Pedro tyin ña vaha tsa javahá ra

¹¹ Maa tyin quivi tsahan ra Pedro ñuu Antioquía, nuu nuu ra tan cuxaŋ yu tsi ra tyin ña vaha tsa javahá ra.

¹² Tyin tsa jihna ñi vaha javahá ra tyin tsatsi ra tsihin ñi tsa ñavin nyivi Israel cuví. Maa tyin tsa tsa juhva ra Israel naha ra tsa jaquitsi

ra Jacobo, tacan tan quitsaha jatsiyó ra tsi ra tan ña cuñí ca ra catsi ra tsihin ñi ican. Javaha ra tacan tyin yuuhví ra cotó cuxaan ra tsa tsaá can naha ra tsi ra tyin ndi nyitá iñi ra can naha ra tuñi Nyoo.

13 Tacan tan inga ra Israel tsa yihí cuenda ra Cristo, ndu iin ra naha tsihin ra Pedro. Tan javaha ndihi ra naha tsa ña vaha can. Tyin javaha ra naha tumaa javaha ra Pedro vasu tsitó ra naha tyin ña vaha can. Tan nda cuenda ra Bernabé tan ndu iin ra tsihin ra naha.

14 Tan nyehe yu tyin ña vaha javahá ra naha. Ñavin tumaa cuhva catyí tuhun ra Cristo. Yacan cuenda cahan yu tsihin ra Pedro nuu tandihi ra yucú ican: “Yooho cuví un iin ra Israel. Tan iyó un tumaa iyó nyivi tsa ñavin nyivi Israel cuví. ¿Nacaa tsa cuñí un jañiñi un tsi nyivi tsa ñavin nyivi Israel cuví na coo ñi cuhva iyó ñi Israel? [Tan ndi maa un tan ña javahá un tacan]”, catyi yu tsihin ra.

15 Maa yo nda ndi cacu yo tan cuví yo ra ñuu Israel ña javahá xaan yo cuatyí tumaa javahá ñi tsa ñavin nyivi Israel cuví.

16 Maa tyin tsitó yo tyin ña cuvi janduvaha yo tsi yo nuu Nyoo tsihin tsa nducú yo cuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi iñi yo tsi ra Jesucristo. Yacan cuenda tsinú iñi yo tsi ra, tyin tacan tan coo vaha yo tsihin ra, tan

ñavin tsa cuenda tsa nducú yo cuhva tyaa yahvi yo tsa catyí ley can. Tyin ndi intuhun yo tan ña nduvahá yo nuu Nyoo tsihin tsa nducú yo cuhva javaha yo cuhva catyí ley tsahnu can.

17 Maa tyin vityin tatun nducú yo cuhva nduvaha yo nuu Nyoo tsa cuenda ra Cristo, cuñí tsi catyi tyin nacoto yo tyin iyó tucu cuatyí yo tumaa iyó cuatyí ñi tsa ñavin nyivi Israel cuví. Tatun tacan, ¿a cuñí tsi catyi tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan.

18 Maa tyin tun cua cuita nyico iñi yo ley tsa tsa yahá nacoó yo, yacan nditsa cua coo cuatyí yo.

19 Tyin ley can janahá tsi tsi yu tyin taahán tsi cúu yu tsa catyi cuatyí yu, tan yacan cuenda ña nducu ca yu cuhva cacu yu tsihin ley can, tyin tacan tan cuvi coo yu tsa cuenda Nyoo.

20 Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó aña yu vityin. Tan cuhva iyó yu vityin, iyó yu tsihin tsa tsinú iñi yu tsi ra tsa cuví ra Sehe Nyoo. Tyin maa ra cuñí ra tsi yu, tan tsihi ra tsacatyí cuatyí yu.

21 Ña cuñí yuhu tyaa tsiyo yu tunyee iñi tsa tsaha Nyoo tsi yo. Tyin tun tsatyin cuví cacu yo jaha ley tsahnu, nduve nacatyí tsihi ra Cristo.

3

Naquihín yo Tatyí Ii Nyoo tsa cuenda tsa tsinú iñi yo tsi ra Cristo

¹ ¡Náa tsa soho iyó nyooho, nyivi Galacia! ¿Yóo tsa jativí tsi ndo tan ña tyaa yahvi ca ndo tsa nditsa? Catsi xaan tsahá cuenda ndi tuhun ra Jesucristo tsi ndo. Tan cutuñi vaha iñi ndo nacuenda tsihi ra nu cruu.

² Intuhun ñi tsa cuñi yu nducu tuhun yu tsi ndo. ¿A naquihín ndo Tatyí Ii Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo tuhun ra Cristo tan tsinú iñi ndo tsi ra?

³ ¿Nacaa tsa soho xaan iyó ndo vityin? Tan quivi jihna ñi vaha xaan tyaa yahvi ndo tsi Nyoo tsihin tunyee iñi Tatyí Ii ra. Tan vityin, ¿nacaa cuñi ndo coo ndo tsihin tunyee iñi maa ndo?

⁴ ¿A tsa cuatu ñi nyehe ndo nácaa jatyinyee Tatyí Ii Nyoo tsi ndo nu nyehe ndo tundoho? Ñavin tsa cuatu ñi cuví yacan, cuñi yuhu.

⁵ ¿Nacaa tsahá Nyoo Tatyí Ii ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñi ndo tuhun ra Cristo tan tsinú iñi ndo tsa caahán ra.

⁶ Ra Abraham, tsinu iñi ra tsa cahan Nyoo tsihin ra, yacan cuenda Nyoo naquihín tsi ra tumaa tsatyin vaha ra.

⁷ Yacan cuenda taahán tsi coto ndo tyin nyivi tsa nditsa cuví tata ra Abraham, juvin

ñi cuví ñi tsa tsinú iñi tsi Nyoo.

⁸ Tan tsanaha ndoo tuhun Nyoo nu tutu. Tan catyí tsi tyin nu cuahán ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú iñi ñi tsi ra. Yacan cuenda catyí Nyoo tsihin ra Abraham tsanaha: “Tandihí maa nyivi cua nasoco yu tsi ñi tsa cuenda un”, catyí Nyoo tsihin ra.

⁹ Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinu iñi tucu maa ra.

¹⁰ Nyivi tsa nyitá iñi ley tsa tyaa ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandihí nyivi tsa ña tyaa yahvi tandihí ley tsa nyaá nu libru ley Nyoo, cua tatsi tuñi Nyoo tsi ñi.”

¹¹ Tan nditsa tyin yoñi nduvahá jaha Nyoo tsa cuenda tsa nyitá iñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú iñi ra, juvin ra cua coo ñayivi tsa ña cua naa maa”, catyí tuhun Nyoo.

¹² Tan ley ra Moisés ña catyí tsi tun taahán tsi tsinu iñi yo. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

¹³ Ley can catyí tyin taahán tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tava nuña ra tsi yo. Tan maa ra naquihín tandihí cuatyí yo. Tyin catyí tuhun Nyoo:

“Tandihi maa ra tsa ticaá nu yutun, tatsí tuñi Nyoo tsi ra.”

14 Tacan cuvī tyin tsa cuenda ra Cristo Jesús tan nasocó Nyoo tsi nyivi tsa ñavin nyivi Israel cuvī, tumaa catyī ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihín yo Tatyí li tsa catyī Nyoo tyin cuhva ra tsi yo.

Ley tsahnujanahá tsi tsi yo tyin iyó cuatyí yo, maa tyin ña jacacú tsi tsi yo

15 Yañi, cua cahan yu iin cuhva tsihin ndo, cuhva iyó yo nu ñuhu ñayivi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahā tyihī ra firma ra, yoñi ca cuví quihin nyaa can. Tan yoñi ca cuví natyiso juhva ca siqui can.

16 Tan Nyoo catyī ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandihi ra cuví tata ra, tyin in-tuhun ñi ra cua cuhva ra. Tan juvin ra can cuví ra Cristo.

17 Tsa caahán yu, cuví tsehe: Nyoo natuhun tahan ra tsihin ra Abraham. Tan ndoq vaha ra tuhun tsihin ra. Tacan tan yahā cumi cientu oco utsi cuiya tan tsa ley tsa tyaa ra Moisés. Maa tyin ña cuví can ley can tuhun tsa ndoq Nyoo tsihin ra Abraham. Tan ña cuví casi tsi nu naquihín yo tsa catyí Nyoo tyin cuhva ra tsi yo.

18 Tun tsatyin tsa cuenda ley ra Moisés tan naquihín yo

tsa taahán tsi tsi yo, cuatu xaan ndoq Nyoo tuhun tsihin yo. Maa tyin tsitó yo tyin ñihī ra Abraham tsa ñihī ra tyin tsaḥā Nyoo tsa catyī ra tyin cuhva ra tsi ra.

19 Tatun tacan, ¿nacuenta vaha ley ra Moisés? Tsa jihna ñi Nyoo catyī ra tyin cuhva ra tsa vaha tsi ra Abraham. Yahā can tan tsaḥā ra ley can tsi ra Moisés tan janahá tsi tyin iyó cuatyí yo. Tan ángel Nyoo tsaḥā cuenda ley can tsi ra Moisés. Tan ra Moisés tsaḥā cuenda can tsi nyivi. Tan ndoq tsi nda cuanda quivi tsa quitsi ra Cristo, ra cuví tata ra Abraham. Juvín ra cuví ra tsa catyí Nyoo tyin cua cuhva tsa vaha tsi yo.

20 Tan juvin ñi maa Nyoo cahan tsihin ra Abraham quivi can. Tan ña tsiñi ñuhu tsa nducu siin ra iin ra nacatyí tuhun tsihin ra Abraham.

21 ¿A cuñi tsi catyí tyin ley tsa tyaa ra Moisés ña nacatsi tahan tsi tsihin tsa catyí Nyoo tyin cuhva ra tsi yo? Ñavin. Tun tsatyin cuvi coo yo ñayivi nyito jaha ley can, cuvi nduvaha yo nuu Nyoo tsa cuenda tsi. Maa tyin ña cuví.

22 Tyin catyí nu tutu Nyoo tyin iyó cuatyí tandihi nyivi. Tyin tacan tan nyivi tsa tsinú iñi tsi ra Jesucristo cuví ñihī ñi ñayivi nyito tsa catyí Nyoo tyin cuhva ra tsi yo.

23 Tsa ndi cumañi ca tsinú iñi yo tsi ra Cristo, ley can yihī ndaha tsi yo tumaa tsa tsinyijí yo vehe caa. Tacan cuví nda

cuanda janaha Nyoo tsi yo nácaa tan tsinu iñi yo tsi ra.

²⁴ Tan ley can cuví tsi tumaa iin nyívi jahá cuenda tsa nyihi. Tyin jahá cuenda tsi tsi yo nda cuanda quívi quítsi ra Cristo. Tan cuví tsinu iñi yo tsi ra tan nduvaha yo nuu Nyoo.

²⁵ Tan vityin tsa tsaá quívi tsa tsinú iñi yo tsi ra Cristo, yacan cuenda ña jahá cuenda ca ley can tsi yo.

²⁶ Tyin tandihi yo cuví yo sehe Nyoo tyin tsinú iñi yo tsi ra Cristo Jesús.

²⁷ Tan tandihi yo tsicoon-dutya yo tan ndu iin yo tsihin ra Cristo, tan nanduví yo tumaa maa ra.

²⁸ Ña ñiñi xaan ca tsa cuví yo nyívi Israel, a cuví yo nyívi Grecia; a cuví yo musu, a ñavin musu cuví yo; a cuví yo rayi, a ñaha. Yoñi ca caahán tuhun yacan, tyin tsa iin ñi cuví yo tsihin ra Cristo, intuhun ña nyívi cuví yo tsihin ra.

²⁹ Tan tatun cuenda ra Cristo yihí ndo, nditsa tsa tata ra Abraham cuví ndo. Tan ñihí ndo tsa catyi Nyoo tsihin ra Abraham tyin cuhva ra tsi ra.

4

¹ Cua cahan yu iin cuhva tsihin ndo. Tatun iin ra luhlu tan tsihí jutu ra, tan nacoó jutu ra tandihi tsa cuca ra tsi ra, ra luhlu can cua cutyiñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandihi tsa cuca jutu ra.

² Iyó ra jahá cuenda tsi ra nda cuanda tsa cuiya ra tsa catyi jutu ra tyin cua naquihin ra ndaha tyiñu tsa nacoó ra tsi ra.

³ Tan tacan cuví maa yo. Tsa ndi cumañi ca quítsi ra Cristo, cuví yo musu cuhva iyó nyívi iyó nu ñuhu ñayivi ihya.

⁴ Maa tyin quívi tahañ tsi, Nyoo jaquítsi ra tsi Sehe ra. Tan jacacu iin ñaha tsi ra. Tan tsindaca ñaha ley tsahnu Nyoo tsi ra.

⁵ Jaquítsi Nyoo tsi ra tyin jacacu ra tsi yo tsa ña quihin ndaha ca ley tsi yo. Tyin tacan tan naquihin cuenda Nyoo tsi yo tumaa sehe ra.

⁶ Tan tsa cuenda tsa nanduví yo sehe ra, Nyoo jaquítsi ra Tatyí li ra Cristo cunyaa aña yo. Tan tsa cuenda Tatyí li ra caná tsa yo tsi Nyoo tan catyi yo: "Tyatya".

⁷ Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

Tsicá iñi ra Pablo tsa cuenda nyívi yihí cuenda Nyoo

⁸ Tan quívi tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví.

⁹ Maa tyin vityin tsa nacotó ndo tsi Nyoo. Vaha ca catyi yu, maa Nyoo nacotó ra tsi ndo. ¿Nacaa tsa cuñi ndo quihin nyico ndo tuhun ndaahvi tsa nduve tunyee iñi iyó tsi, tan cuvi nyico ndo musu?

10 Nyooho ndi jacahnú ca ndo quívi vico, quívi nduyu-tyá yoo, tan vico tandihí ñi cuiya.

11 Yuuhví xaan yu coto iin tsa cuatu ñi cuví tyiñu jahá yu tsihin ndo.

12 Yañi, caahán ndaahvi yu tsihin ndo cõo ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñí yu tsa caca iñi ndo tyin jatívi ndo tsi yu.

13 Tan tsa tsitó ndo tyin quívi quítsi jihna yu ñuu ndo iyó iin cuehe tsi yu, yacan cuenda ndoõ yu juhva quívi tsihin ndo, tan cahan yu tuhun ra Cristo tsihin ndo.

14 Tan vasu ndi maa tsa cuuhví yu tsihin cuehe can vaha naquihin cuenda ndo tsi yu tan ña tyaá tsiyo ndo tsi yu. Naquihin cuenda ndo tsi yu tumaa tun cuví yu iin ángel tan tumaa tun ra Cristo cuví yu.

15 Tan vityin ¿numaa cuahán tsa sii xaan cuñi ndo tsihin yu quívi can? Tyin yuhu cuví yu tsandaa tyin quívi can, nda cuanda cuñi ndo tava ndo tinuu ndo tan cuhva ndo tsi yu, tun tsatyin cuví nduvaha yu tsihin yacan.

16 Tan vityin, ¿a nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

17 Nyívi can, cuñí xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñí ñi tsa cunyícan ndo

tsi ñi tan ña tsinu ca iñi ndo tuhun caahán yu.

18 Vaha tsa cuñi yo tsi nyívi, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyíi ñi yu tsihin ndo.

19 Nyooho ra cuatyí sehe yu, nyehé nyico yu tundoho tan tsa uhvi tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehe yu tundoho nda cuanda cuahnu ndo tsihin tunyee iñi maa ra Cristo.

20 Vaha xaan tun tsatyin cuví cunyí yu tsihin ndo vityin ihya. Tyin tacan tan cuví nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

Na coo yo tsa cuenda Nyoo tan ñavin tsa cuenda ley tsahnu

21 ¿A ñaha ca cahvi ndo tsa caahán ley tsa tsahá Nyoo tsi ra Moisés? tyin cuñí ndo cundaca ñaha can tsi ndo, catyí tuhun ndo tsihin yu tun ñaha ca cahvi ndo can.

22 Catyí tsi tyin ra Abraham tsicoõ uvi taahan sehe ra. Tsi-coõ iin sehe ra tsihin ña Agar tsa cuví musu ñasiihi ra. Tan tsicoõ inga sehe ra tsihin ña Sara ñasiihi vaha maa ra.

23 Cacú sehe ñaha tsa cuví musu can tumaa cacú tandihí ca maa lee. Maa tyin sehe ñasiihi ra Abraham cacú ra tumaa catyí maa Nyoo tsihin ra tyin cua cuví.

24 Tan tuhun can iyó tsa cuñí tsi catyí tsi tsihin yo.

Nduvi taahan ñi ñaha can cuví ñi tumaa nduvi taahan tuhun tsa ndoo Nyoo tuhun tsihin yo. Intuhun tuhun can cuví cuenda yucu Sinaí. Tan nyívi yihí cuenda ley can cuví ñi tumaa ña Agar, tyin iin musu ñi cuví ña tsihin sehe ña.

²⁵ Tumaa ña Agar, tan tumaa yucu Sinaí tsa canyíí Arabia, tacan cuví ñuu Jerusalén nda quívi vityin. Tyin nyívi ñuu can yihí ndaha ley tsahnu tsi ñi. Tan cuví ñi tumaa musu ley can.

²⁶ Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuví tumaa sihi yo.

²⁷ Tan catyi tuhun Nyoo tyehen:

Cúsií iñi yooho, ñaha tsa ña cuví coo sehe. Yooho tsa nduve sehe iyó.

Caña tsaa tsihin tsa sií cuñí un, tyin ña tsitó un tsa uhvi cacú sehe un.

Cusií iñi tyin cua cuhva cuaha ca yu sehe un

tan ñavin ca ñaha iyó yí, catyi tuhun Nyoo.

²⁸ Yañi, yoo cuví yo tumaa ra Isaac, sehe ra Abraham tyin cacú ra cuhva catyi maa Nyoo tsihin jutu ra.

²⁹ Ra sehe ñaha tsa cuví musu can, xaan iñi ra tsi ra Isaac sehe ñasihi ra Abraham. Tacan cuví tucu vityin ihya. Ra tsa cuñí tyin javaha yo tsa catyi ley, xaan iñi ra naha tsi yo tsa cuví yo nyívi cacú tsaa tsihin Tatyí Ii Nyoo.

³⁰ Tan ¿náa catyi tuhun Nyoo? Catyi tsi: “Tava tsiyo tsi ñaha tsa cuví musu can tsihin sehe ña, tyin ña cuví naquihin sehe ña tsa taahán tsi tsi sehe ñaha tsa ñavin musu cuví”, catyi tuhun Nyoo.

³¹ Yacan cuenda, yañi, ña cuví yo tumaa cuví sehe ñaha tsa cuví musu can. Tyin cuví yo tumaa cuví sehe ñasihi ra Abraham, tyin ñavin musu cuví yo. [Tan Nyoo naquihín cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

5

Na tyaa yahvi yo tuhun ra Cristo tan ña cuhva yo cundaca ñaha ley tsahnu tsi yo

¹ Ra Cristo tsa yahá jacacu ra tsi yo ndaha ley tsahnu can. Yacan cuenda jaha ndo cuenda tsi ndo, coto nanduvi ndo musu inga tsaha.

² Tyaa soho ndo, yuhu ra Pablo caahán tsihin ndo. Tatun cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuví jatyinyee ra Cristo tsi ndo.

³ Cuñi yu cahan yu tsihin ndo inga tsaha tuhun ihya: Tandihí ra tsa cuñí cacú tsihin tsa cunyaa tuñi Nyoo tsi ra naha, cuñí tsi javaha ra naha tandihí maa tsa catyi ley ra Moisés.

⁴ Tandihí nyooho tsa nducú nduvaha nuu Nyoo tsihin tsa javaha ndo cuhva catyi ley can, tsa quitá tsiyo ndo nuu ra Cristo. Tan jaña ndaha ndo

tša vaha tša tsahá Nyoo tsi ndo.

⁵ Maa tyin yoo tsihin tša jatyinyeé Tatyí Ii Nyoo tsi yo tan tsinú iñi yo tsi ra Cristo, tan nyitá iñi yo nduvahá yo nuu Nyoo.

⁶ Tyin tatun iin ñi cuví yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuví tša tsinú iñi yo tsi ra Cristo. Tan tsihin tša tsinú iñi yo cuví coo yo, tan cuñí tahan ca yo tsi yo.

⁷ Nyooho vaha xaan cuahán ndo quivi can. ¿Tan vityin yóo jandu uvi iñi ndo? Tan ña tyaá yahvi ca ndo tša nditsa.

⁸ Tuhun tša janahá ñi can, ñavin tuhun Nyoo, ra tša cana tsi yo, cuví can.

⁹ Tyin tumaa ndaá yutsan paan jahá luxu ñi yutsan iya, tacan cuví iin nyivi caquiñi, cuaha ca nyivi cuví jativi ñi.

¹⁰ Nyoo cua tatsi tuñi ra tsi nyivi jandu uvi iñi ndo. Nduve cuenda ra yóo ñi cuví ñi. Maa tyin yuhu tsitó vaha yu tyin Jutu Mañi yo cua jatyinyee ra tsi ndo tan ña cua tyaa iñi ndo inga cuhva tša ña janaha yu tsi ndo.

¹¹ Tan tša cuenda yuhu, yañi, tun tsatyin catyí yu tyin ra tsinú iñi tsi ra Cristo cuñí tsi tša cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tša caahán yu tuhun ra Cristo, ra tša tsihi nu cruu tsacatyí cuatyí yo.

¹² Maa tyin ra tša cuñí

jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuvi ca jandu uvi iñi ra naha tsi ndo.

¹³ Nyooho, yañi, cana Nyoo tsi ndo tša ña cundaca ñaha ca ley tsi ndo. Tan ñavin tša cuenda tša iyó nuña ndo tan cuví javaha ndo náa ndihi tša cuñí cuñu ñuhu ndo. Maa tyin taahán tsi tša jatyinyee tahan ndo tsi ndo tša cuenda tša cuñí tahan ndo tsi ndo.

¹⁴ Tyin iyó iin ley Nyoo, tan catyí tsi: “Cuñi tahan ndo tsi ndo tumaa cuñi ndo tsi maa ndo”, catyí tsi. Tan tatun nditsa tša cuñí tahan yo tsi yo, tša javahá ndihi yo tandihi ca tša caahán ley tsahnu.

¹⁵ Jaha ndo cuenda tyin tatun caahán nyaa tahan ndo tsi ndo tan ndasi cuñí ndo nyehe tahan ndo tsi ndo, cua tivi nu yucú ndo.

Cuhva cuñí cuñu ñuhu yo tan cuhva iyó yo tsihin Tatyí Ii Nyoo

¹⁶ Tša cuñí yu cahan yu tsihin ndo cuví tuhun ihya: Coo ndo tsihin tunyee iñi Tatyí Ii Nyoo. Tacan tan ña cua javaha ca ndo tša ña vaha tša cuñí cuñu ñuhu ndo.

¹⁷ Tyin tša javahá yo tša ña vaha tša cuñí cuñu ñuhu yo, ñavin cuhva cuñí Tatyí Ii Nyoo javahá yo. Tyin Tatyí Ii Nyoo cuñí tsi tša javahá yo tša vaha. Tan cuñu ñuhu yo ña cuñí tsi javahá tsi cuhva cuñí Tatyí Ii Nyoo. Tša cuñí Tatyí Ii Nyoo cañi tahan can tsihin tša cuñí cuñu ñuhu yo. Yacan

cuenda yíi javaha yo tsa cuñí yo javaha yo.

¹⁸ Maa tyin tatun tsahá yo tsi yo tsa jaquihin ityi Tatyí li Nyoo tsi yo, ña cua cundaca ñaha ca ley tsahnu tsi yo.

¹⁹ Ña yíi nacoto yo tsi nyívi javahá cuhva cuñí cuñu ñuhu ñi. Yíhí rayíi, iyó ñasihí ra naha tan iyó inga ñaha tsi ra naha. Tan yíhí ñiñaha iyó yíi ñi tan iyó inga rayíi tsi ñi. Tan yíhí rayíi quixí ra tsihin ñaha tan ña cuñí ra tindaha ra tsihin ña, tan juvin ñi tacan javaha juhva ñiñaha.

²⁰ Yíhí ñi jacahnú ñi tsitoho. Yíhí ñi tasi ñi. Yíhí ñi ndasi cuñí ñi nyehe ñi nyívi. Yíhí ñi cañí tahan ñi. Yíhí ñi cuiñu ñi. Tan yíhí ñi iin yaha ñi cuxaan ñi. Yíhí ñi tsicá iñi ñi maa ñi tsa vaha tsi maa ñi. Tan yíhí ñi natahví sava ñi nu yucú ñi tyin cañí tahan ñi. Tan tacan tan quita síin ñi.

²¹ Tan yíhí ñi nyiyó iñi ñi tsa iyó tsi inga nyívi. Tan yíhí ñi tsahñí tahan ñi. Tan yíhí ñi tuhva ñi tsiñi. Tan yíhí ñi cuaha xaan tsatsí ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahan yu tsihin ndo quívi can. Tyin tandihí ñi tsa javahá yacan, ña cua cuvi naquihin cuenda ñi nu ndacá ñaha Nyoo.

²² Maa tyin tsa tsahá Tatyí li Nyoo tsi yo, cuví tsa cuñí yo tsi Nyoo tan tsi nyívi, tsa síi cuñí yo, tsa taxin cuñí añima yo, tsa nyee xaan iñi yo, tsa vaha iñi yo, tsa vaha nyívi

cuví yo, tsa ña cundihí iñi yo javahá yo tsa vaha tsihin nyívi, tsa tsinú iñi yo tsi ra Cristo.

²³ Tan inga tsa tsahá Tatyí li Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñí cuñu ñuhu yo. Tatun javahá yo tandihí tsa vaha ihya, ndi intuhun ley tan ña cua cuvi catyi tsi tyin iyó cuatyí yo.

²⁴ Tan yoo tsa yíhí cuenda ra Cristo Jesús, tsa yaha jandihí yo tuhun tsa javaha yo tsa ña vaha tsa cuñí cuñu ñuhu yo.

²⁵ Tan tumaa tsa iyó yo ñayívi nyito tsa cuenda Tatyí li Nyoo, tacan cuñí ndihí tucu tsi tsa tyaá yahvi yo tsa janahá ra tsi yo.

²⁶ Na ña cahnu jaha yo tsi yo. Tan ña jacañi tahan yo tsi nyívi. Tan na ña nyiyo iñi yo tsa tsii inga nyívi.

6

Taahán tsi jatyinyee tahan yo tsi yo

¹ Yañi, tatun nyehé ndo javahá iin ra yañi yo cuatyí, nyoocho tsa ñihi nyaá Tatyí li Nyoo tsihin, jatyinyee ndo tsi ra na nduvaha ra inga tsaha. Maa tyin cuñí tsi cahan vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndihí nu ña vaha tsi ndo.

² Na jatyinyee tahan yo tsi yo náa tundoho taahán yo. Tyin tatun javahá yo tacan, cuñí tsi catyi tyin tyaá yahvi yo tsi ra Cristo.

3 Tatun ndáa yo cuñi maa yo tyin cahnu nyivi cuvi yo, tan nduve náa cuvi yo, juvin ñi tsi maa yo jandavi ñaha yo.

4 Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusii ñi yo. Tan ña taahán tsi nyehe yo náa javahá inga nyivi.

5 Tyin intuhun intuhun maa yo tan taahán tsi cunyeey ñi yo cuisó yo tsa taahán tsi tsi yo.

6 Tan cuñi tsi tsa jatyinyee ndo tsi ra jacuahá tuhun Nyoo tsi ndo. Cuhva ndo náa tsiñi ñuhu tsi ra.

7 Tan ña jandavi ñaha ndo tsi juvin ñi maa ndo. Tyin Nyoo yoñi cuvi vacu nducu tsi ra. Tyin tandihi tsa tatsi nyivi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi.

8 Tacan tucu tatun iin nyivi tan javahá ñi tsa ña vaha tsa cuñi cuñu ñuhu ñi, juvin ñi maa tsa javahá ñi cua jativi tsi ñi. Maa tyin tatun javahá ñi cuhva cuñi Tatyí Ii Nyoo, Tatyí Ii Nyoo cua cuhva ñayivi nyito tsa ña cua naa maa coo ñi.

9 Yacan cuenda janyee ndo ñi ndo javaha ndo tsa vaha. Tyin tatun ña jandihí yo tsa javahá yo tacan, cua naquihin yo tsa vaha na tahan tsi quivi.

10 Yacan cuenda tandihí ñi tsaha tsa cuvi javaha yo tsa vaha, na javaha yo itsi tsihin tandihí ñi nyivi. Tan tsa jihna ñi taahán tsi javaha yo tsa

vaha tsihin nyivi yihí cuenda Nyoo.

Sii xaan cuñi ra Pablo tyin nyehe ra tundoho tsa cuenda ra Cristo

11 Nyehe ndo tsa nahnu letra tyaá yu tsihin ndaha yu nu tutu ihya vityin.

12 Ra tsa jañiñi tsi ndo tsa cunyaa tuñi Nyoo tsi ndo, tacan javahá ra naha tyin cuñi ra naha na catyi nyivi tyin vaha xaan ra naha. Tan ña cuñi ra naha nyehe ra naha tundoho tsa cuenda ra Cristo, ra tsa tsihi nu cruu tsa cuenda yo.

13 Tyin ndi maa ra tsa nyisó tuñi Nyoo tan ña tyaá yahvi ra naha tandihí tsa caahán ley. Cuñi ra naha tsa cunyaa tuñi Nyoo tsi nyoocho. Tyin tacan tan cuvi jacahnu ra naha tsi maa ra naha tyin javahá ndo cuhva caahán ra naha.

14 Maa tyin yuhu ña cuñi yu cu iyo ñi yu tsi yu tsa cuenda náa ndihí tuhun. Maa tyin cu iyo ñi yu tyin tsihi Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñi ca yu tsa iyó ñuu ñayivi ihya tyin ña ndaca ñaha ca yacan tsi yu.

15 Tyin tatun nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuvi, tsa nanduví yo iin nyivi tsaa tsa cuenda ra.

16 Tandihí nyoocho tsa iyó tacan, naquihin ndo tsa taxin coo añima ndo. Tan na cundaahvi ñi Nyoo nyehe ra tsi

tandihí ndo, tyin nditsa tsa
cuví ndo nyívi cuenda ra.

¹⁷ Vityin tan nu cuahán tsi
ityi nuu, ndi intuhun ndo tan
ña cua cuhva ca ndo tisihi
tsi yu. Tyin tandihí paa tsa
nyecú cuñu ñuhu yu, cuñí tsi
catyi tsi tyin nditsa tsa cuví
yu iin ra tsicá tyiñu Jutu Mañi
yo Jesús.

¹⁸ Yañi, na nasoco Jutu
Mañi yo Jesucristo tsi tandihí
ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

Nu quitsaha javahá ra Pablo carta

¹ Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsí yu carta ihya tsi ndo.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Tsa iin ñi cuví yo tsihin ra Cristo, Nyoo nasocó xaan ra tsi yo

³ Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihí nuu tsa vaha tsa iyó gloria tsa cuenda tsa iin ñi cuví yo tsihin ra Cristo.

⁴ Tsa ndi cumañi ca javaha ra ñuhu ñayivi tan nacatsi ra tsi yo tyin ndu iin yo tsihin ra Cristo. Tyin tacan tan cuiti coo yo nuu ra tan ña coo ca cuatyí yo.

⁵ Tsa cuenda tsa cuñí ra tsi yo, tyaá ra cuhva tañan tsanaha tyin nanduvi yo sehe ra tsa cuenda ra Jesucristo. Tacan javaha ra tyin tacan cacu iñi maa ra.

⁶ Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra.

⁷ Nyoo cuñí xaan ra tsi yo. Tan yacan cuenda tyahvi ra tsihin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo.

⁸ Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsiñi tuñi ra coo tsi yo.

⁹ Tan tsahá ra tsa nacotó yo tuhun tsa tyihí ra cuhva tañan tsanaha tyin javaha ra tsihin ra Cristo. Tan tandihí tuhun can tsicumí xeehe ra tan ña jacotó ra can tsi nyivi tañan tsanaha.

¹⁰ Maa tyin tsa cua tahan tsi quivi cundaa tuhun tsa tyihí ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

¹¹ Tan tsa cuenda tsa iin ñi cuví yo tsihin ra Cristo, ñihí ndihí yo tsa ñihí ra, tyin maa Nyoo cuñí tacan. Yacan cuenda nacatsi ra tsi yo, tyin tacan tyihí ra cuhva tyin javaha ra tyin maa ra javahá tandihí cuhva nyehé ra tyin vaha.

¹² Javaha ra tyehen tyin nyuhu tsa natsinu jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra.

¹³ Tan tacan tucu nyooho natsinu iñi ndo tsi ra Cristo, tan ndu iin ndo tsihin ra quivi tsa tsiñi ndo tuhun Nyoo tsa

cuví tsa nditsa, tan nácaa jacacú ra tsi yo. Tan tsahá ra Tatyí li ra coo añima ndo, tuma catyí ra tyin cua javaha ra tan yacan cuñí tsi catyí tyin cuví ndo nyívi yihí cuenda ra.

¹⁴ Nyoo jihna ca Tatyí li ra tsahá ra tsi yo tyin tacan tan cuita iñi yo tandihí ca tsa cua cuhva ra tsi yo quívi jandu iin ra tandihí nyívi tsa cua cacu. Tyin tacan tan jacahnu yo tsi ra, tyin cahnu xaan cuví ra.

Nu tsicán ra Pablo tsi Nyoo na cuhva ra tsa tsiñi tuñi tsi nyívi tsa tsinú iñi

¹⁵⁻¹⁶ Yacan cuenda, tsa ñihí tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñí tahan xaan ndo tsi ndo tsa yihí ndo tuhun Nyoo.

¹⁷ Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyí li ra, tacan tan nacoto vaha ca ndo tsi ra.

¹⁸ Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenda caná ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi nyívi cuenda ra, si xaan caá can tan cuca xaan can.

¹⁹ Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tsihin yoo

tsa tsinú iñi tsi ra. Tan juvin ñi maa tsihin tunyee iñi cahnu can

²⁰ Janandoto Nyoo tsi ra Cristo. Tan tyaá ra tsi ra xiin cuaha ra nda gloria.

²¹ Tan yacan cuví nu jacahnú xaan ca Nyoo tsi ra Cristo tan ñavin ca tandihí ca ra ndacá ñaha nu ñuhu ñayívi ihya tan nda andívi. Tyin yoñi yóo ra cahnu ca cuví ñuu ñayívi ihya tan ndi ñayívi tsa cua coo, tyin intuhun ñi maa ra Cristo cuví ra cahnu ca cuví.

²² Tan tandihí cuíi maa tsa iyó tsahá Nyoo tyin cundaca ñaha ra Cristo. Tan tsahá Nyoo tsa cuví ra jiñi tsihin nyívi tsa yihí cuenda ra.

²³ Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juvin maa ra janduní ra tandihí tsa iyó.

2

Jacacú Nyoo tsi yo tsa cuenda tsa cuñi ra tsi yo

¹ Nyoo tsahá ra ñayívi nyito coo ndo quívi ndu iin ndo tsihin ra Cristo. Maa tyin tsa ndi cumañi ca tsinu iñi ndo tsi ra Cristo ña nyito añima ndo tyin ndi iyó cuaha cuatyí ndo.

² Tan quívi can ndi javahá ndo cuhva javahá nyívi ña tsitó tsi Nyoo. Ndi tyaá yahvi ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyívi tsa ña tyaá yahvi tsi Nyoo.

³ Tan juvin ñi tacan tsicoo tucu yo quívi can, tyin javahá

yo tsa ña vaha tsa cuñi cuñu ñuhu yo tan cuhva tsicá ñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihí ca nyivi tsa javahá tsa ña vaha.

⁴ Maa tyin Nyoo cundaahvi xaan ñi ra nyehe ra tsi yo tsa cuenda tsa cuñi xaan ra tsi yo.

⁵ Tan vasu tsa tsihi añima yo jahá cuatyí yo, Nyoo janandotó ra añima yo tan tsahá ra ñayivi nyito coo yo nu jandu iin ra tsi yo tsihin ra Cristo. Tan cacú yo jahá tsa cuñi xaan Nyoo tsi yo.

⁶ Tan tsa janandotó ra tsi yo iin caa ñi tsihin ra Cristo Jesús tyaa ra tsi yo tsihin ra nda gloria.

⁷ Tan javahá Nyoo tyehen tyin tacan tan nu cuahán ca tsi ityi nuu cua coto tandihí ca tsa cua coo tyin vaha xaan ñi ra tsihin yo tan cahnu xaan tumañi ñi tsahá ra tsi yo tsa cuenda ra Cristo Jesús.

⁸ Tyin tsa cuenda tsa vaha tsa tsahá Nyoo tsi yo tan cacú yo. Tan ñihí yo tumañi ñi ihya jahá tsa tsinú ñi yo tsi ra Cristo. Tan ñavin tsihin tsa javahá yo tan ñihí yo can, tyin maa Nyoo tsahá can tsi yo.

⁹ Ñavin tsihin tsa javahá yo tsa vaha tan cuví cacu yo. Yacan cuenda ndi intuhun yo tan ña taahán tsi cu iyo ñi yo tyin cacú yo tsihin tsa javahá yo tsa vaha.

¹⁰ Nyoo janduvahá ra añima yo tsihin tsa ndu iin yo tsihin ra Cristo Jesús. Tacan javahá ra tyin tacan tan

javaha yo tsa vaha, tyin nda tsanaha tan tyaa ra cuhva tyin coo yo tacan.

Cuví yo nyivi Israel, a cuví yo nyivi inga ñuu, maa tyin tsa cuenda ra Cristo iin ñi nyivi cuví tandihí yo

¹¹ Catyí ra Israel naha ra tyin ña vaha nyooho tsa ñavin nyivi Israel cuví, tyin ña tsinyaa tuñi Nyoo cuñu ñuhu ndo tumaa maa ra naha. Cuñi maa ra naha tyin vaha ra naha nuu Nyoo tan nyooho ña vaha ndo.

¹² Tan nducuhun tucu ñi ndo tyin nu quitsi tsi tahan tsanaha, nduve ra Cristo iyó añima ndo. Tan ndi ña iin ñi cuví ndo tsihin nyivi Israel. Tan ña tsitó ndo tuhun tsa ndoo Nyoo tsihin ra Abraham tan tsihin nyivi tata ra. Tyin iyó soho ñi maa ndo quivi can, tan nduve Nyoo nyaá tsihin ndo. Yacan cuenda nduve náa cua ñihi ndo.

¹³ Tyin ndi luxu tuhun Nyoo tan ña tsitó ndo tahan tsanaha, maa tyin vityin ndu iin ndo tsihin ra Cristo Jesús tyin quitsi ra tsati ra ñi ra tsa cuenda ndo.

¹⁴ Tyin juvin ra Cristo tsahá tsa taxin coo yo tan jandu iin ra tsi nyooho tsa ñavin nyivi Israel cuví tsihin nyuhu tsa cuví nyivi Israel. Vityin iin ña nyivi cuví yo, tyin jandihí ra tsa xaan cuñi yo nyehé tahan yo tsi yo.

¹⁵ Tan tsa quitsi ra Cristo tsihi ra nu cruu, tsindihí tuhun tsahnu tsa iyó ndi tsa tyasi nu ndu iin ndi tsihin

ndo, tan jandu iin ra tsi ndo tsihin ndi. Tan vityin iin ña nyivi cuví yo nuu ra, tan iyó yo tsihin tsa taxin.

¹⁶ Tan tsihin tsa tsihi ra nu cruu tsindihí tsa ña caahán tsihin tahan yo, tan nacoq vaha yo tsihin Nyoo jahá ra, iin ña nyivi cuví yo vityin.

¹⁷ Ra Cristo quitsi ra cahán ra tyin cuví coo vaha yo tsihin Nyoo tan tsihin tahan yo: Cahán ra tsihin ndi tsa cuví ndi nyivi Israel tsa tsa tsitó maa tuhun Nyoo tan tsihin nyooho tsa ña tsitó ndi luxu maa tuhun Nyoo tahan tsanaha.

¹⁸ Tan tsa cuenda tsa quitsi ra Cristo tsihi ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí li ra iyó añima yo: a cuví yo nyivi Israel, o ñavin nyivi Israel cuví yo.

¹⁹ Yacan cuenda nyooho ñavin ca nyivi inga ñuu cuví ndo, tyin iin ña nyivi cuví ndo tsihin nyivi yihí cuenda Nyoo. Tan cuví ndo nyivi maa ra.

²⁰ Tan cuví ndo tumaa iin vehe. Tan nyecú ndo nu sama ra tava tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús.

²¹ Tan tsata yuu tsa cuví ra Cristo, si xaan cua quita vehe tsa ndi cuahán tsinú, tyin tandihí maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo.

²² Tan tacan tucu nyooho ndu iin ndo tsihin tandihí

nyivi yihí cuenda ra Cristo jahá Tatyí li ra, tyin tacan tan cua cuví ndo vehe nu coo Nyoo.

3

Nyoo tava tyiñu tsi ra Pablo tyin cahan ra tuhun ra Cristo tsihin nyivi tsa ñavin nyivi Israel cuví

¹ Yacan cuenda yuhu ra Pablo nyii yu vehe caa ihya tyin jacotó yu tuhun ra Cristo Jesús tsi nyooho tsa ñavin nyivi Israel cuví.

² Taahán tsi coto ndo tyin cahnu xaan tunyee iñi tsahá ra tsi yu tsa cuenda tsa vaha tsi ndo, tyin jacotó yu tuhun ra tsi ndo.

³ Tan Nyoo janahá ra tuhun xeehe tsa tsicumí ra tsi yu, tan tyaá yu juhva tuhun can nu carta ihya tyin coto ndo.

⁴ Tan tsa cua cahvi ndo tuhun tsa tyaá yu ihya cua coto ndo nácaa tsahá Nyoo tyin cutuñi iñi yu tuhun ra Cristo tsa tsicumí xeehe ra.

⁵ Tyin nu quitsi tsi tahan tsanaha, ña janahá Nyoo tuhun xeehe can tsi nyivi, tumaa tsa janahá Tatyí li ra tuhun can tsi ra tava tyiñu ra Jesucristo tan ra cuví ndusu yuhu Nyoo.

⁶ Tan tuhun xeehe can, cuñí tsi catyi tyehen: Nyivi tsa ñavin nyivi Israel cuví cua ñihi ndihí ñi tsa cua ñihi nyivi Israel tyin iin ña cuñu ñuhu cuví yo vityin tsa cuenda tsa jacacu ra Cristo tsi yo. Tan cua ñihi yo tsa catyi Nyoo tyin cuhva ra tsi yo tyin natsinu iñi yo tsi maa ra Cristo Jesús.

⁷ Nyoo tsaha ra tsa vaha tsi yu tan jatyinyeé ra tsi yu tyin tacan tan jacoto yu tuhun vaha ihya tsi nyivi.

⁸ Yuhu luhlu xaan ra cuví yu tan ñavin ca tandihi nyivi tsa yihí cuenda Nyoo. Maa tyin Nyoo tsaha ra tumañi iñi cahnu ihya tsi yu tyin cahan yu tuhun ra Cristo tsihin nyivi tsa ñavin ñi Israel cuví. Tyin na coto ñi tsa cuca tsa cua cuhva ra Cristo tsi ñi.

⁹ Tava tyiñu Nyoo tsi yu na jacoto yu tsi tandihi nyivi nácaa tyaa ra cuhva tsa cua javaha ra tsa ndi cumañi ca javaha ra tandihi tsa iyó, tyin tsanaha ña jacoto ra tuhun tsa tsicumí xeehe ra tsi nyivi.

¹⁰ Tacan cuví tan vityin tandihi ra ndacá ñaha nda andivi cua nyehe tsa vaha tsa javahá Nyoo tsihin yo tsa cuví yo nyivi yihí cuenda ra. Tan cua coto ra naha tyin iyó xaan tsa tsiñi tuñi tsi Nyoo.

¹¹ Tandihi tuhun ihya nacatsí tahan tsi tsihin tsa tyaa Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo.

¹² Tan tsa cuenda tsa tsinú iñi yo tsi ra Cristo, tsaha Nyoo ndatu tsi yo tsa cunyanaa ca yo tsi ra. Yacan cuenda ña yuhví yo natuhvá yo nu nyaá ra.

¹³ Tan tsa cuenda tsa tsaha ra ndatu can tsi yo caahán ndaahvi yu tsihin ndo na ña ndu uvi iñi ndo tsa nyehé yu tundoho tsa cuenda ndo. Tyin tsa tyehen nyehé yu tundoho tsa cuenda ndo, tsa vaha tsi maa ndo cuví can.

Tsicán tahvi ra Pablo tyin na nacoto vaha ca nyivi tsi ra Cristo

¹⁴ Tan tsa cuenda tsa nducuhun iñi yu tumañi iñi tsa javahá Nyoo, Jutu ra Jesucristo Jutu Mañi yo tsihin yo, tsicuiñi tsiti yu nuu ra.

¹⁵ Tyin juvin ra cuví Jutu tandihi nyivi: ñi tsa cuahán andivi, tan ñi tsa yucú nu ñuhu ñayivi ihya.

¹⁶ Tan tsicán yu tsi ra na jandunyee xaan ra iñi ndo tsihin Tatyí Ii ra tsa iyó añima ndo.

¹⁷ Tan na coo ra Cristo añima ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihi nyivi, tyin nyanaá vaha ndo tsi Nyoo.

¹⁸ Tacan tan cua cutuñi vaha iñi ndo tsihin tandihi ñi yihí cuenda ra nácaa tsa cahnu xaan tsa cuñi ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyivi nácaa tsa cuñi ra tsi ndo.

¹⁹ Tsicán yu tsi Nyoo na coto ndo nácaa tsa cahnu xaan tsa cuñi ra tsi ndo. Nyoo nyaá maa ra tsihin ndo.

²⁰ Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá iñi yo. Tyin juvin ñi tsihin tunyee iñi maa ra tsa tsahá ra tsi yo, javahá ra tandihi.

²¹ Yoo tsa cuví yo nyivi tsinú iñi tsi Nyoo, na jacahnu yo tsi ra tacan ñi maa, tsa cuenda

tsa javahā ra Cristo Jesús. Tan na cuvi tsi tacan.

4

Iin ñi cuví tandihí yo tsa yihí yo cuenda ra Cristo jahá Tatyí Ii Nyoo

¹ Yacan cuenda yuhu, tsa nyií yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyivi tsa nacana Nyoo. Tyin nacana ra tsi ndo na cuvi ndo nyivi ra.

² Yacan cuenda jandundaahvi ndo tsi ndo nuu nyivi, tan vita cuhun iñi ndo. Tan ña cutyixin ndo tsihin ñi, tan ña cundihi iñi ndo nyehé ndo tsi ñi tyin tacan tan coto ñi tyin cuñí ndo tsi ñi.

³ Tyin tsa taxin tsa tsahá Nyoo coo añaima yo jandu iín tsi tsi yo tan yacan cuenda nducu vaha ndo cuhva tan iin ñi cuvi ndo tsihin tsa jatyinyee Tatyí Ii Nyoo tsi ndo.

⁴ Tandihí yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihí yo intuhun ñi Tatyí Ii Nyoo iyó tsihin yo, tan catyí Nyoo tsihin tandihí yo tyin nditsa tsa cua ñihi yo ñayivi nyito coo yo.

⁵ Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutyā yo.

⁶ Iyó intuhun ñi Nyoo tan maa ra cuví ra Jutu tandihí yo. Tan ndacá ñaha ra tsi tandihí yo, tan iyó ra añaima

tandihí yo, tan tsatyíñú ra tsi tandihí yo, tan jahá tyiñu yo tyiñu ra.

⁷ Tan tsahá ra Cristo ndatu tsi tsa intuhun intuhun yo cuhva cuñí maa ra.

⁸ Yacan cuenda catyí tsi nu tutu Nyoo tuhun ra Cristo tye-hen:

Cunyeē ra jahā canaa ra tsi nu xaan iñi tsi ra, tan quihñ nyaa ra tsi nyivi tsa yihí ndaha nu tan nandaā ra andivi tsihin ñi.

Tan tsahā ra ndatu tsi yo tsa jaha tyiñu yo tyiñu ra, catyí tsi.

⁹ ¿Tan náa cuñí tsi catyí tsa “nandaā ra”? Cuñí tsi catyí tyin nuu jihna ra nu ñuhu ñayivi.

¹⁰ Ra tsa nuu can, juvin ñi ra cuví ra tsa nandaā nda gloria. Tyin tacan tan jandunñi ra tandihí maa tan cunyaa ra tsihin yo tandihí ñi ityí.

¹¹ Tan juvin ñi maa ra Cristo tsahā ndatu tsi yo. Tsi juhva yo tavā tyiñu ra tsi yo tsa caca yo tyiñu ra. Tan tsi inga yo tsahā ra tsa cuví yo ndusu yuhu ra. Tan tsi inga yo tsahā ra tyin jacoto yo tsi nyivi nácaa jacacú ra tsi yo. Tan tsi inga yo tsahā ra tsa jaha cuenda yo tsi ñi yihí cuenda ra, tan tsi inga yo tsahā ra tsa cuví jacuaha yo tuhun ra tsi ñi.

¹² Tacan tsahā Nyoo ndatu can tsi yo tyin jatyinyee tahan yo tsi yo tan tsi inga ca nyivi tyin tacan tan cuahnu ca yo tsihin ra Cristo.

13 Nda cuanda ndu iin tandihí yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsaá yo cuvi yo tumaa cuví maa ra Cristo.

14 Tacan tan ña cua cuvi ca yo tumaa tsa nyihi. Tyin tsa nyihi yatyi xaan tsinú iñi tsi náa luxu tsa ñihí tuhun tsi. Tan na ña cuvi yoo tacan tyin coto jandavi ñaha nyivi tsi yo.

15 Maa tyin tyehen cua javaha yo: cua cuñi yo tsi nyivi tan cua cahan yo tsa nditsa tsihin ñi. Tan ndunyeecaa añima yo tsihin tandihí tsa vaha tsa iyó tsi Nyoo. Tan cuahnu yo tan cuvi yo tumaa maa ra Cristo, ra cuví ityi nuu tsihin yo.

16 Tan tsa cuenda ra Cristo tandihí yo tsa cuví yo cuñu ñuhu ra, iin ñi cuvi yo. Tumaa yihí tahan iin cuñu ñuhu, tan tsa iin tsa iin nu yihí tahan tsi vaha jahá tyiñu tsi. Tan tacan jatyinyeé tsi tsi nanií cuñu ñuhu can, na coo vaha tsi tan cuahnu tsi. Tan tacan tucu yoo, tsahnú yo tsihin tsa cuñí tahan yo tsi yo tan jatyinyeé tahan yo tsi yo.

Tsahá ra Cristo ñayivi nyito coo yo

17 Tuhun ihya cuví tsa tsahá cuenda yu tsi ndo, catyí Jutu Mañi yo. Ña coo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatyinyeé tsi ñi tsicá iñi ñi.

18 Tan ña cutuñí iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava añima ñi.

19 Ña cahán ca nuu ñi javahá ñi tsa ña vaha. Tan nacuhva cuenda ñi tsi ñi tsi tsa caquiñi. Maa ñi tsa ña vaha cuñí ñi javaha ñi.

20-21 Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhva ndo tsa nditsa cuví tuhun maa ra Cristo.

22 Yacan cuenda ña coo ca ndo cuhva tsicoo ndo quivi can, tan ña javaha ca ndo tsa caquiñi tsa cuñí cuñu ñuhu ndo, tyin tsanaha, jandavi ñaha xaan can tsi ndo.

23 Nacuhva cuenda ndo tsi ndo tsi Nyoo na nasama ra cuhva tsicá iñi ndo.

24 Tan coo ndo ñayivi nyito tyin vityin nyivi tsa cuví ndo jahá Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cuiti iyó ndo.

25 Yacan cuenda ña cahan ca ndo cuendu. Cahan ndo maa ñi tsa nditsa tsihin nyivi tyin iin ña cuñu ñuhu cuví tsa tandihí yo.

26 Tatun cuxaan ndo, jaha ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihí tsihi tsi ndo nduvi.

27 Tan ña cuhva ndo ndatu tsi nu ña vaha tsa nducu cuhva nu tsi ndo.

28 Ra tsa tuhva suhu quivi can, na ña suhu ca ra vityin. Na jaha tyiñu ra tsihin ndaha ra. Tacan tan coo tsa tsii ra, tan cuvi jatyinyeé ra tsi nyivi tsa iyó tsa tsiñí ñuhu tsi ñi.

29 Ña cahan ndo tsa ndavaha ñi. Cahan ndo, maa

ñi tsa vaha tsa cua jatyinyee tsi nyivi tsa tsiñi tsa caahán ndo.

³⁰ Tan ña cūhva ndo tucuihya iñi tsi Tatyí li Nyoo tyin Tatyí li ra cuví tuñi tsa tyaá ra añima yo nda cuando ndihi jacacu ra tsi yo quivi cua quitsi ra.

³¹ Ña cūhun iñi ndo tisihi. Tan ña cūxaan ndo. Tan ña cūvi ndo nyivi tyixin. Tan ña cāhan nyaa ndo tsi nyivi, tan ndi ña cāhan ndo tsa ndavaha ñi.

³² Maa tyin cūvi ndo nyivi vaha, tan cūndaahvi iñi ndo tsi nyivi. Tan jāha ndo tucahnu iñi tsi ñi, tumaa jāha Nyoo tucahnu iñi tsi maa ndo tsa cuenda ra Cristo.

5

Nacaa taahán tsi coo nyivi yihí cuenda Nyoo

¹ Ndūcu ndo cūhva coo ndo tumaa iyó maa Nyoo, tyin sehe ra cuví tsi yo, tan cuñi xaan ra tsi yo.

² Cuñi yo tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuví jutu mbee ticatyí luhlu nuu Nyoo, tacan jamañi ra Cristo tsi ra tsa cuenda yo. Tan sii xaan cuñi Nyoo tsihin ra tsa cuenda tsa javaha ra tacan.

³ Vityin tsa cuví yo nyivi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cūñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya.

⁴ Ña cāhan ndo tuhun tsa tsahá ticanuu tsi yo. Tan ndi ña cāhan ndo tsa nduve yahvi nyaá. Tyin ña taahán tsi cāhan yo tacan. Vaha ca cūhva ndo tyahvi nyoo tsi Nyoo.

⁵ Tyin tsa tsitó ndo tyin tandihi nyivi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasihi ra cuví ña, a ñaha iyó tsihin rayi tan ñavin yii ña cuví ra, tan nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitoho cuví can, tyin maa ñi yacan tsicá iñi ñi tan ña jacahnú ñi tsi maa Nyoo.

⁶ Ña cūhva ndo tsa jandavi ñaha nyivi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihi tsa ña vaha can cua tatsi tuñi Nyoo tsi nyivi tsa ña tyaá yahvi tsi ra.

⁷ Yacan cuenda ña cūtahan ndo tsihin ñi.

⁸ Nyooho tsicoo ndo nu naa quivi can. Tan vityin ña taahán ca tsi coo ndo nu naa tyin Jutu Mañi yo tsa tava ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo.

⁹ Tyin Nyoo jandunditsin ra añima yo tan janduvaha ra añima yo, yacan cuenda javaha ndo tsa vaha tan cāhan ndo maa ñi maa tsa nditsa.

¹⁰ Jañiñi ndo cutuhva ndo cūhva taahán iñi Jutu Mañi yo.

¹¹ Ña javaha ndo cūhva

javahá nyívi iyó nu naa. Tyin nduve náa tsa vaha ñihí ñi tsihin can. Vaha ca jacoto ndo tsi ñi tyin ña vaha tsa javahá ñi.

¹² Tyin cahán nuu yo cahan yo tsa javahá xeehe ñi.

¹³ Maa tyin quívi quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandihi tsa yihí xeehe.

¹⁴ Yacan cuenda iyó nu catyí tsi:

Ndoto yoocho tsa quixí un, nduvita mahñu nu yucú ndiyi.

Tan ra Cristo cua jandunditsin ra ñuhu nu cuahán un, catyí tsi.

¹⁵ Yacan cuenda jaha ndo cuenda cuhva iyó ndo. Tan ña coo ndo tumaa iyó ra soho. Coo ndo tumaa iyó ra tsitó.

¹⁶ Tan nducu ndo cuhva cahan ndo tuhun Nyoo tsihin nyívi tandihi ñi cuhva tsa nuña ndo, cahan ndo tyin vi-tyin maa ñi maa tsa caquiñi javahá ñi.

¹⁷ Yacan cuenda ña soho coo ndo. Nducu ndo cuhva cutuñi iñi ndo cuhva cuñi maa Jutu Mañi yo.

¹⁸ Ña coho ndo nyixi tan cuvi ndo ra tsiñi tyin cuvi jatívi yacan tsi ndo. Maa tyin cuhva ndo tsi ndo cundaca ñaha Tatyí Ii Nyoo.

¹⁹ Cahan ndo tsihin tahan ndo maa ñi tsa vaha, tan jacahnu ndo tsi Nyoo. Cata ndo salmo cuenda ra; cata ndo yaa Nyoo; cata ndo tsa tsahá Tatyí Ii tsi ndo; jacahnu

ndo tsi Jutu Mañi yo tsihin tandihi aña ndo.

²⁰ Tacan ñi nacuhva ndo tyahvi nyoo tsi Nyoo Jutu yo tsa cuenda tandihi maa, a sii cuñi ndo, o nyehé ndo tundoho. Nacuhva ndo tyahvi nyoo tsi ra tsihin ndatu tsa tsaha Jutu Mañi yo Jesucristo tsi yo.

Nacaa taahán tsi coo yo tsihin nyívi yo

²¹ Tyaa yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaá yahvi ndo tsi Nyoo

²² Nyoocho tsa iyó yii, tyaa yahvi ndo tsa caahán yii ndo tumaa tsa tyaá yahvi ndo tsa caahán Jutu Mañi yo.

²³ Tyin rayii cuví ityi nuu tsihin ñasihi ra, tumaa cuví ra Cristo ityi nuu tsihin nyívi yihí cuenda ra. Juvín ñi maa ra jacacú tsi yo tsa cuví yo cuñu ñuhu ra.

²⁴ Yacan cuenda tumaa tsa cuví ra Cristo ityi nuu tsihin nyívi yihí cuenda ra, tacan taahán tsi tyaá yahvi ñaha tsi yii ña.

²⁵ Tan nyoocho rayii, cuñi tsi tsa cuñi ndo tsi ñasihi ndo tumaa cuñi ra Cristo tsi yo tsa yihí yo cuenda ra, tan tsaha ra ñayívi ra tsa cuenda yo.

²⁶ Tacan javaha ra tan jandundií ra aña yo tsihin tuhun caahán ra tsa cuví tumaa ndutya, tan nacatya ra tsi yo quívi tsa natsinu iñi yo tsi ra.

²⁷ Ndo coo aña yo tumaa ndoó iin jahma, ña nyayu ca

tsi, ña tiyi ca tsi. Tyin ra Cristo jandundií ra tsi yo tsa cuví yo nyívi yihí cuenda ra. Tyin tacan tan cuví nacuhva cuenda ra tsi yo tsi Nyoo, tyin vaha yo, tan nduve ca cuatyí yo.

²⁸ Tacan taahán tsi cuñi rayii tsi ñasihi ra, tumaa tsa cuñí ra cuñu ñuhu maa ra. Tyin tatun cuñí ra tsi ñasihi ra, cuñí ra tsi maa ra.

²⁹ Tyin ndi intuhun yo tan ña cuví tsa ña cuñí yo cuñu ñuhu yo, tyin jacatsí yo tan jacunditsí yo cuñu ñuhu yo. Tan ra Cristo juvin ñi tacan javahá ra tsihin nyívi yihí cuenda ra.

³⁰ Tyin cuñu ñuhu ra cuví yo. Tan intuhun intuhun yo cuví yo juhva cuñu ñuhu ra tan yiquí ra.

³¹ Catyí tuhun Nyoo: “Rayii taahán tsi nacoó ra tsi jutu ra tan tsi sihi ra, tan ndu iin ra tsihin ñasihi ra. Tan intuhun ña cuñu ñuhu cua cuví tsa nduvi ñi.”

³² Xeehe xaan tan cahnu xaan tuhun ihya, tan catyí yu tyin cuñí tsi catyí tyin ra Cristo ndu iin ra tsihin nyívi yihí cuenda ra tumaa ndu iin iin rayii tsihin ñasihi ra.

³³ Tan inga tucu tuhun, cuñí tsi catyí tyin intuhun intuhun ndo taahán tsi tsa cuñí ndo ñasihi ndo, tumaa cuñí ndo tsi maa ndo. Tan nyooho ñiñaha, tyaa yahvi ndo tsi yii ndo.

6

¹ Nyooho tsa nyihi, tyaa soho ndo tsa caahán jutu ndo

tan sihi ndo. Tyin tacan taahán tsi javaha ndo.

²⁻³ Tyin nu tutu Nyoo catyí tsi tyehen: “Jaha tsa ñayivi tsi jutu un tan sihi un”, tan tuhun ihya cuví tsa jihna ñi catyí Nyoo tyin javaha yo tan cua ñihi yo tsa cua cuhva ra tsi yo. Tyin tyaa ra cuhva tyin tun javaha yo tacan, sii xaan cua coo yo tan cuaha xaan quivi cua coo yo nu ñuhu ñayivi ihya.

⁴ Tan nyooho tsa iyó sehe, ña javaha ndo tsa ña vaha tsi sehe ndo tan cuxaan iñi tsi tsi ndo. Maa tyin jacuaha ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

⁵ Tan nyooho tsa cuví musu, tyaa yahvi ndo tsi ra yihí ndaha tsi ndo nu ñuhu ñayivi ihya. Jaha ndo tsa ñayivi tsi ra naha tsihin tsa nii iñi añima ndo. Tan nducu ndo cuhva tyaa yahvi ndo tsi ra naha tumaa tyaa yahvi ndo tsi ra Cristo.

⁶ Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyí tsitoho ndo tyin vaha xaan ndo. Jaha tyiñu vaha nyooho tumaa tsatyin tyiñu ra Cristo javahá ndo. Tacan tan cua javaha ndo cuhva cuñí Nyoo tsihin tsa nii iñi añima ndo.

⁷ Jaha tyiñu ndo tsihin tsa sii cuñí ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi.

⁸ Tyin tsitó ndo tyin Jutu Mañi yo cua tyahvi ra tsi intuhun intuhun ndo tun

javahá ndo tsa vaha, vasu ndi maa musu cuví ndo o ñavin musu cuví ndo.

⁹ Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña sñn caá iin nyivi tan inga ñi nuu ra.

Tunyee iñi tsa tsahá Nyoo tsi yo tsa yihí yo cuenda ra

¹⁰ Tan vityin ço ndo tsihin tunyee iñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee iñi iyó tsi ra.

¹¹ Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu.

¹² Yacan jaha vaha ndo cuenda tsi ndo tsihin tunyee iñi Nyoo tyin cañi tahan yo, maa tyin ñavin tsihin ra ñuu ñayivi, tyin cañi tahan yo tsihin nu ña vaha tsa ña cuví nyehe yo. Tan nu ican yihí ndaha tsi nyivi caquiñi.

¹³ Yacan cuenda jaha cuenda vaha ndo tsi ndo tsihin tandihí tsa jatyinyee Nyoo tsi yo. Tyin tacan tan cunyee iñi ndo quivi nducu cuhva nu ña vaha tsi ndo. Tan ña cua nduva ndo jaha nu.

¹⁴ Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan çaça

vaha ndo ityi tsa nditsa cuví ityi Nyoo tyin yacan cuví tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra.

¹⁵ Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyivi.

¹⁶ Tan çasi vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo.

¹⁷ Ra andaru iyó iin caa ndasí jiñi ra tan jacacú can tsi ra, tacan cuví tsa jacacú Nyoo tsi yo. Cuatyíñu vaha ndo tuhun Nyoo tyin yacan cuví tumaa mityi tsahá Tatyí Ii Nyoo tsi ndo.

¹⁸ Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí Ii ra tsi ndo. Yacan cuenda ña ndu uvi iñi ndo tan ço nyito vaha ndo, ndaçan tahvi ndihí ndo tsi Nyoo tsa cuenda tandihí nyivi yihí cuenda ra.

¹⁹ Tan ndaçan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyivi. Tyin tsanaha yihí xeehe tuhun ihya tan vityin cua nacoto ñi

itsi.

²⁰Tan tsa cuenda tsa jacotó yu tuhun ra Cristo, nyíi yu vehe caa ihya vityin. Nďacan tahvi ndo tsa cuenda yu, na ña nayuhví yu, tan cahan yu cuhva taahán maa tsi cahan yu.

Nu jacuhún ra Pablo tsi ra Tíquico nu yucú nyívi yihí cuenda ra Cristo

²¹Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Níi xaan íñi ra jahá tyiñu ra cuenda Jutu Mañi yo, tan cuñí xaan yo tsi ra.

²²Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin íñi ndo.

²³Na cuhva Nyoo Jutu yo tan Jutu Mañi yo Jesucristo tsa taxin coo aíma tandihí ra yañi yo naha ra tan na tsinu ca íñi ra naha tsi ra tan na cuñi ra naha tsi nyívi.

²⁴Tan na nasoco xaan Nyoo tsi tandihí nyoocho tsa cuñí tsi Jutu Mañi yo Jesucristo. Ña jandihí ndo tsa cuñí ndo tsi ra.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Filipos,

Nyíí ra Pablo vehe caa, tan javahá ra iin carta tan jacuhun ra tsi nyivi yihí cuenda Nyoo ñuu Filipos

¹ Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandihí ndo tsa yucú ndo ñuu Filipos tan cuví ndo nyivi cuenda Nyoo tan iin ñi cuví ndo tsihin ra Cristo. Tan yacan jaquitsí ndi carta ihya tsi tandihí ndo tsihin ra cuví ityi nuu tsihin nyivi vehe ñuhu naha ra, tan tsihin ra jahá tyiñu vehe ñuhu naha ra.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña.

Nu tsicán tahvi ra Pablo tsa cuenda ñi yihí cuenda Nyoo ñuu Filipos

³ Tandihí ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo.

⁴ Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa sñi cuñí aña yu.

⁵ Tyin nda quivi jihna tsa tsiñi ndo tuhun ra Cristo tan nda vityin tan ña jandihí ndo

tsa jatyinyeé ndo tsi yu. Tyin iin caa ñi jacotó yo tuhun ra Jesucristo tsi nyivi.

⁶ Tsitó vaha yu tyin tumaa tsa quitsahá javahá Nyoo tsa vaha tsitsi aña ndo, tacan cua javaha ca ra nda cuenda quivi quitsi ra Jesucristo inga tsaha.

⁷ Taahán tsi tsa caca iñi yu tacan tsa cuenda ndo, tyin cuñí xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyíí yu vehe caa ihya, tan vasu ndi maa cuhun yu nuu ra cumí tyiñu naha ra, maa tyin jacotó yu tuhun Nyoo tsi ra yucú vehe caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo.

⁸ Nyoo tsitó ra tyin cuñí xaan yu tsi tandihí nyooho tumaa tsa cuñí maa ra Jesucristo tsi ndo.

⁹ Tan tsicán tahvi xaan yu tsi Nyoo na cuñi ca ndo tsi ra tan na cundahvi ca iñi ndo tsi nyivi. Tan nacoo ca tsa nyityi Nyoo tsi ndo, tan cutuñi ca iñi ndo,

¹⁰ tyin tacan tan cuví ñihi ndo tsa vaha tsi Nyoo. Tan ña cua coo ca cuatyi ndo tan cuví coo vaha ndo tsihin tuhun Nyoo nda cuenda quivi quitsi ra Cristo.

¹¹ Maa ra cua jatyinyee tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahnu xaan ra cuví ra.

Maa ñi maa tyiñu Nyoo javahá ra Pablo tyin iyó ra Cristo aña ra

12 Yañi, cuñi yu tsa coto ndo tyin tandihi tundoho taahán yu, jatyinyeé xaan tsi tyin nducuaha ca nyivi tsinú iñi tuhun Nyoo.

13 Tan tandihi andaru tsa iyó vehe ra cuví rey tan tandihi nyivi iyó ihya tsitó ñi tyin nyii yu vehe caa tsa cuenda tsa nyicún yu tsi ra Cristo.

14 Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatyinyeé Nyoo tsi yu nu nyii yu vehe caa. Yacan cuenda jañihí ca ra naha caahán ra naha tuhun Nyoo tsihin nyivi.

15 Tan nditsa tyin yihí ra naha, caahán ra naha tuhun ra Cristo tsa cuenda tyin cuñi ra cunyicun nyivi tsi maa ra naha. Tan yihí tucu ra naha caahán ra naha tuhun ra Cristo tsihin nyivi maa tyin tsihin tsa ñi iñi ra naha.

16-17 Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsi tsi yu ihya. Tyin cahan yu tuhun ra tan jacotó yu tsi nyivi tyin nditsa tsa jacacú ra tsi yo. Tan tsa cuenda tsa cuñi ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa ñi iñi ra naha tan caahán ra naha tuhun ra Cristo, tyin cuñi ra naha na cunyicun cuaha nyivi tsi ra naha tan cuñi ra naha vacu nducu ra naha tsi yu nu nyii yu vehe caa ihya.

18 Tan ña ndihi iñi yuhu tatun juhva ra naha caahán ra naha tuhun ra Cristo tsihin

tsa ña ñi iñi ra naha. Maa tyin yuhu sñi xaan cuñi yu tyin tuhun ra Cristo caahán tandihi ra naha, cuví ñi tsa ñi iñi ra naha caahán ra naha o ñavin.

Tan ndusi ca cuñi yu

19 tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatyinyeé xaan Tatyí li ra Cristo tsi yu.

20 Tsitó vaha yu tyin Nyoo cua jatyinyee ra tsi yu tan ña cua nducahan nuu yu, tan ña cua nayuhvi yu cahan yu tuhun ra Cristo tsihin tsa ñi iñi yu. Tan ña ndihi iñi yu, an coo ca yu ñayivi, o cúu yu, maa tyin cuñi yu cahan yu tuhun ra, tahan ñi cuhva tsa tuhvá yu caahán, na nyehe nyivi cuhva iyó yu tan coto ñi tyin ra Cristo cahnu xaan ra cuví ra.

21 Tyin tsa cuenda yuhu ñayivi tsa iyó yu vityin, ñayivi ra Cristo cuví. Maa tyin tatun cúu yu, cua ñihi yu tsa sñi caa tsa iyó gloria.

22 Tan tatun coo ca yu, vaha xaan. Tyin tacan tan cuví jañihi ca yu jahá tyiñu yu tyiñu Jutu Mañi yo. Tan cua cuví tsi tsa vaha tsa cuenda ra. Yacan cuenda ña tsitó yu nda ityi cahun yu, a cúu yu, a cahun yu cucahan ca yu tuhun Nyoo tsihin nyivi, ña tsitó yu.

23 Yi xaan cuñi yu tan quihin yu ndáa ityi cahun yu tyin tsa cuñi yu cahun yu cunyaa yu tsihin ra Cristo. Tyin vaha ca yacan.

24 Maa tyin tsa cuenda ny-

ooho, vaha ca tsa ña cúu naha yu tyin tacan tan cuví cunyaa yu tsihin ndo tan coto ca ndo tuhun Nyoo.

²⁵ Yacan cuenda tsitó yu tyin cua ndoo yu juhva ca quívi ihya. Tyin cuñí tsi tsa jatyinyeé ca yu tsi ndo tan cuvi cahun ndo ityi nuu ca tan cusii ca iñi ndo tsihin tsa tsinú iñi ndo tsi Nyoo.

²⁶ Tacan tan cua nyehe ndo tsi yu inga tsaha, tan sii xaan ca cua cuñi ndo tsa cuenda yu tyin iin caa ñi iyó yo tsihin ra Cristo.

²⁷ Cuñí tsi tsa coo yo cuhva taahán tsi coo nyívi yihí cuenda ra Cristo. Vasu nyaá yu tsihin ndo, a cañi nyíi yu, maa tyin cuñí yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu iñi nyívi tuhun ra Cristo.

²⁸ Maa tyin nyívi xaan iñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacu nyooho jahá Nyoo.

²⁹ Tyin tsahá ra ndatu tsa tsinú iñi tandihi yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo.

³⁰ Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo nácaa nyehe yu tundoho, tan vityin tsitó tucu ndo tyin ña jandihí yu tsa caahán yu tuhun Nyoo.

2

Cuca xaan ra Cristo, maa tyin quítsi cúu ra tumaa iin ra ndaahvi

¹ Nditsa tyin ra Cristo jandu iin xaan ra iñi yo tsa iin ñi cuví yo tsihin ra. Tan vaha cuñí yo tsa cuenda tsa cuñí ra tsi yo. Tan nditsa tucu tyin iyó Tatyí Ii Nyoo tsihin yo. Tan nditsa tucu tsa ndaahvi cuñí yo nyehé yo tsi nyívi tahan yo. Tatun nditsa tandihí yacan,

² Cuhva ndo tsa cusii ca iñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñí ra Cristo tsi yo. Tan iin ñi cuhva caca iñi ndo. Tan iin ñi tsa vaha javaha ndo.

³ Ña javaha ndo maa ñi tsa jatyinyee tsi maa ndo, javaha ndo tsa vaha tsi inga nyívi. Tan náa javaha ndo, ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin vaha ca inga nyívi tan ñavin ca maa yo.

⁴ Tan intuhun intuhun yo caca iñi yo tsa cuenda tsa vaha tsi inga nyívi, tan ñavin tsa cua jatyinyee tsi maa ñi maa yo.

⁵ Caca iñi yo tumaa tsicá iñi maa ra Cristo Jesús.

⁶ Tyin nu quítsi tsi tsanaha tsa ndi cumañi ca quítsi ra nu ñuhu ñayívi, cuví ra tahan ñi maa cuví Nyoo. Maa tyin ña tsicá iñi ra tsa nacoo ra yacan.

⁷ Tan tyaa tsiyo ra tandihí tunyee iñi ra tan tandihí tsa cuca ra. Tan quítsi ra nanduví ra iin nyívi ndaahvi

nu ñuhu ñayivi ihya quivi tsa cacu ra.

⁸ Tan tsa nanduvi ra iin rayii, tan ndaahvi jahā ra tsi ra tan tyaa yahvi vaha ra tsi Nyoo nda cuanda tsahā ra tsa cahñi nyivi tsi ra nu cruu. Tumaa iin ra caquiñi, tacan jahā ñi tsi ra, tan taħan ra ticanuu tyin tsahñi ñi tsi ra nu cruu.

⁹ Yacan cuenda Nyoo jacahnú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuvi tan ñavin ca tandihi sivi.

¹⁰ Tyin tatun tsiñi yo sivi ra Jesucristo, tandihi yo tan cua cuiñi tsiti yo. Tan tandihi tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihi yacan cua jacahnu tsi ra.

¹¹ Tyin tandihi tsa iyó, cua nacoto tan cua cahan tyin ra Jesucristo cuvi ra ndacá ñaha tsi tandihi maa tsa iyó. Tacan tan cua nyehe tsi tyin cahnu xaan ca cuvi maa Nyoo Jutu yo.

Nyivi yihí cuenda Nyoo cuvi ñi tumaa iin ñuhu tsa jandunditsín nu ñuhu ñayivi ihya

¹² Yacan cuenda, yañi tsa cuñi xaan yu, tumaa tsa tyaa yahvi ndo tsi yu quivi tsa tsinyij yu tsihin ndo, tacan ñi taahán tsi tyaa yahvi ndo tsi yu vasu ndi maa tsa cañi nyii yu vityin. Nducu ndo cuhva na nyehe nyivi tyin nditsa tsa jacacú Nyoo tsi yo. Tan jahā vaha ndo cuenda cuhva coo ndo tsihin ra.

¹³ Tyin maa Nyoo tyihj tsa vaha aña ndo. Tan jatyinyeé ra tsi ndo tyin tacan

tan cuvi tyaa yahvi ca ndo tsa caahán ra tan javahá ndo cuhva cuñi ra.

¹⁴ Tatun cua javaha ndo náa tsa cua javaha ndo, nducu jihna ndo cuhva tsa ña cahan yuhu tahan ndo. Tan ña cañi tahan ndo.

¹⁵ Tacan tan ña cua coo cuateyi ndo. Taahán tsi cuvi ndo nyivi cuiti iyó, taahán tsi cuvi ndo nyivi nduve cuateyi, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñi tsi tsa cuvi ndo tumaa iin ñuhu tsa jandunditsín nu naa nu ñuhu ñayivi ihya.

¹⁶ Cahan yo tuhun Nyoo tsihin nyivi tyin yacan tsahá ñayivi nyito tsa iyó yo. Javaha ndo tacan, tan quivi cua quitsi ra Cristo, yuhu ñi vaha cua cuñi yu tsa cuenda ndo, tyin ña jacoto cuatu yu tuhun Nyoo tsi ndo.

¹⁷ Tan vasu cahñi nyivi tsi yu tsa catyi tuhun Nyoo, maa tyin cua cuvi tsi iin tsa cua jamañi yu tsi Nyoo tan tsihin tsa tsinú iñi ndo tsi ra. Tan iin caa ñi cusii iñi yo tsihin ra.

¹⁸ Tan yacan cuenda taahán tsi tsa cusii iñi ndo tsihin yu.

Nu jacuhun ra Pablo tsi ra Timoteo tan ra Epafrodito ñuu Filipos

¹⁹ Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehe ra nu yucú ndo. Tan quivi tsaa ra inga tsaha nu nyii yu sii xaan cua cuñi yu. Tyin cua nacatyí tuhun ra tsihin yu nácaa yucú ndo.

20 Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yoñi inga ra tsa tsicá iñi tacan.

21 Tyin tandihi ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñí ra Cristo Jesús.

22 Maa tyin tsitó ndo tyin ra Timoteo, vaha cuahán ra tsihin Nyoo, tan tsa cuenda yuhu, cuví ra tumaa sehe yu. Tan jatyinyeé xaan ra tsi yu tsa caahán ndi tuhun ra Cristo tsihin nyivi.

23 Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumí tyiñu, tatun ña naha ca cunyi yu ihya.

24 Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

25 Tan ra Epafrodito, yañi yo tsa jaquitsi ndo tsa jatyinyee tsi yu tsihin tyiñu tsa javahá yu, iin caa ñi cuví ndi andaru ra Cristo tsihin ra. Tan vityin cua jaquitsi nuhu yu tsi ra inga tsaha nu yucú ndo.

26 Cuñí xaan ra quitsi nuhu ra nu yucú ndo, tyin tsicá xaan iñi ra tsa tsitó ndo tyin nacuhvi ra.

27 Nditsa ñihi xaan nacuhvi ra tan tsa cua cúu maa ra cuví. Maa tyin Nyoo cundahvi iñi tsi ra, tan tsii tucu yuhu tyin na ña nducuihya xaan ca iñi yu.

28 Yacan cuenda, yuhu cuñí xaan yu tsa quitsi nuhu ra

nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra.

29 Yacan cuenda, naquihin ndo tsi ra tsihin tsa sii cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayivi tsi ra yañi yo naha ra tsa iyó tumaa cuhva iyó ra.

30 Tyin tsa yatyin maa cúu ra tsa cuenda tsa javahá ra tyiñu ra Cristo. Tyin vasu ndi maa cuuhvi xaan ra, maa tyin ña cuñí ra jandihí ra tsa jatyinyeé ra tsi yu. Tyin maa ndo ña cuví quitsi ndo tan jatyinyee ndo tsi yu tyin cañi xaan yucú ndo.

3

Nu janahá ra Pablo nácaa nduvaha yo nuu Nyoo

1 Tan vityin yañi, cusii iñi ndo tsihin Jutu Mañi yo. Tsa cuenda yuhu nduve tisihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi.

2 Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñí tsi cunyaa tuñi Nyoo tsi yo, tacan tan cacu yo.

3 Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi añima yo quivi nacuhva cuenda yo tsi yo tsi

ra. Tan jacahnú yo tsi ra tsihin Tatyí li ra tsa iyó añima yo. Tan cusí iñi yo tyin cuenda maa ra Cristo Jesús yihí yo. Tan ña nyitá iñi yo tyin cacu yo tsihin náa cunyaa cuñu ñuhu yo.

⁴Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yaha cacu tan ñavin ca tandihí ra tsa javahá yacan vityin.

⁵Tyin una quiví yu tan tsinyaá tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihí yu. Juvín ñi tata nyiví caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quiví can, tyin ra fariseo cuví yu.

⁶Tan tsa cuenda tsa cuñi yu tyaa yahvi yu ley, tan tsinyaá ndaha xaan yu tsi ñi yihí cuenda ra Cristo. Tan tyaa yahvi yu tandihí maa ley tsahnu, tyin nducú xaan yu cuhva tyaa yahvi yu tsa caahán ley can.

⁷Maa tyin tandihí tsa cuñi maa yu tyin cahnu xaan cuví quiví can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu.

⁸Tan inga tucu tuhun, tandihí tsa javahá yu, tsitó maa yu tyin nduve ca yahvi nyaá yacan tyin tsa nacoto yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda

ra Cristo tandihí tsa javahá yu quiví quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihí can. Tyin cuñi yu coto vaha ca yu tsi ra Cristo.

⁹Tan cuñi yu ndu iin ca yu tsihin ra. Tsinú iñi yu tyin jacacú ra tsi yu, yacan cuenda nduvahá iyó yu nuu Nyoo. Ñavin tsa cuenda tsa tyaa yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú iñi yo, ra Cristo naquihín cuenda ra tsi yo.

¹⁰Tsa coto vaha ca yu tsi ra Cristo, yacan cuví tsa cuñi yu. Tyin Nyoo janandoto ra tsi ra Cristo tsihin tunyee iñi ra. Tan cuñi yu tyin coo ca tunyee iñi can tsi yu. Tan cuñi yu cunyeé iñi yu tundoho tsa taahán tsi nyehé yu tsa cuenda ra. Tan cuñi yu nacuhva cuenda yu tsi yu tumaa maa ra Cristo nacuhva cuenda ra tsi ra tan tsihí ra.

¹¹Tyin nducú xaan yu cuhva nandoto yu tsa yaha cúu yu.

Nacaa cunyicun ñihi ca yo tsi Nyoo

¹²Ña catyí yu tyin nduve ca tsa cumañí tsi yu, tan vaha xaan yu. Maa tyin cuahán yu ityi nuu ca. Tyin cuñi yu naquihin yu tsa cahan ra Cristo tyin cuhva ra tsi yu. Tyin jihna ca maa ra cahan tsihin yu.

13 Yañi, ña catyí yu tsihin ndo tyin tsa ñihí yu tandihí tsa vaha can. Maa tyin iyó intuhun ñi tsa javahá yu; nacoó yu ityi tsata tandihí tsa javahá yu, tan jañiñí yu cuhun yu ityi nuu ca.

14 Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catyí ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

15 Tacan taahán tsi caca iñi tandihí nyívi tsa ñihi nyaá tsihin Nyoo. Maa tyin tatun ñavin tacan tsicá iñi ndáa nyoo, Nyoo cua cuhva ra tsa cutuñí iñi ndo.

16 Maa tyin iyó iin tsa cuñí tsi tsa tyaa yahvi vaha yo, tuhun tsa tsa yahá jacoto Nyoo tsi yo.

17 Yañi, javaha ndo cuhva iyó yu tan cuhva caahán yu. Tan nyehe vaha ndo cuhva iyó nyívi iyó cuhva janahá ndi tsi tandihí nyívi.

18 Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihaya cuñí yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnu cuví tsa tsihí ra Cristo nu cruu jahá ra naha.

19 Maa tyin quívi quitsi ra Cristo inga tsaha, ra ican naha ra cua cuhun anyaya. Tyin javahá ra naha cuhva cuñí cuñu ñuhu ra naha. Tan cahnu jahá ra naha tsi ra

naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayívi ihya.

20 Maa tyin yoo nda gloria cuví nu iyó ñuu yo. Tan ndatú yo quívi quitsi nyico Jutu Mañi yo Jesucristo, ra jacacú tsi yo.

21 Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihí tsa iyó.

4

Tacan ñi maa na cusí iñi yo tsihin Jutu Mañi yo

1 Yañi, cuñí yu tsi ndo. Tan cuñí xaan yu nyehe yu tsi ndo. Sí xaan cuñí yu tsihin ndo. Tan tsitó yu tyin ña cahán cuatu yu tuhun Nyoo tsihin ndo. Tyin ní xaan iñi ndo nyicún ndo tsi ra. Tan jañihi ca ndo cunyicun ndo tsi ra.

2 Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñí Jutu Mañi yo.

3 Tan yooho, yañi, tsa iin caa ñi jahá tyiñu tsihin yu, cuñí yu tyin jatyinyee un tsi ñi cuhva yo ihya. Tyin juvin ñi jatyinyee xaan tsi yu nu cahán yu tuhun Nyoo, maa tyin ñavin intuhun ñi yu jatyinyee ñi, tyin jatyinyee ndihí ñi tsi ra Clemente tan tsi tandihí ca ra tsa cutahán tsihin ndi. Tan sívi tandihí ñi

tsa nyaá nuu tutu Nyoo nda gloria.

⁴ Cusiñi ñni ndo tsihin Jutu Mañi yo tandihi ñi quivi. Tan caahán yu tsihin ndo inga tsaha, cusiñi ñni ndo tsihin ra.

⁵ Coo vaha ndo tyin tacan tan nyehe tandihi nyivi tyin nditsa tyin nyivi vaha cuvi ndo. Tan nducuhun ñni ndo tyin tsa yatyn cua quitsi Jutu Mañi yo.

⁶ Tan ña caca ñni ndo náa taahán ndo. Iin nyita ñi ndacan tahvi ndo tsi Nyoo náa ndihi tundoho tsa iyó ndo. Tan ndacan ndo tsi ra nacuhva ra tandihi tsa tsiñi ñuhu tsi ndo. Tacan tan ña naco ndo tsa tsahá ndo tyahvi nyoo tsi ra.

⁷ Tan Nyoo cua kuhva ra tsa taxin coo añima ndo. Tan cahnu xaan tsa vaha cuvi yacan. Tan yoñi cuvi cutuñi ñni nácaa tsa cahnu tsi. Tan tsa taxin iyó tsi Nyoo cua jaha cuenda añima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

Na caca ñni yo maa ñi maa tsa vaha

⁸ Nu cua ndihi tuhun, yañi, caca ñni ndo maa ñi tsa nditsa, maa ñi tsa ndaa, tsa cuiti iyó, tan tsa ndoo iyó. Ña caca ñni ndo tsa caquiñi. Caca ñni ndo tsa sii caa, maa ñi tsa vaha, tan maa ñi kuhva cuvi jacahnu ndo tsi Nyoo.

⁹ Javaha ndo tsa jacuaha yu tsi ndo. Tuhun tsa cahán yu tsiñi ndo, tan tsa javaha yu nyehe ndo, yacan taahán tsi javaha ndo. Tan Nyoo ra

tsahá tsa taxin coo añima yo, cua cunyaa ra tsihin ndo.

Nu jatyinyee nyivi ñuu Filipos tsi ra Pablo tsihin tsa iyó tsi ñi

¹⁰ Sii xaan cuñi yu. Tan jacahnú yu tsi Jutu Mañi yo tsa cuenda tsa jatyinyee xaan ndo tsi yu inga tsaha. Tan tsitó yu tyin ndihi ñi tsaha tan cuñi ndo jatyinyee ndo tsi yu. Maa tyin tsicoo juhva quivi ña tsaha tsi kuhva tsa jatyinyee ndo tsi yu.

¹¹ Ñavin tyin iyó tsa tsiñi ñuhu tsi yu tan caahán yu tsihin ndo, tyin yuhu tsa cutuhva maa yu tsa cusiñi ñni yu tsihin náa tsa iyó tsi yu.

¹² Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa caan maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha.

¹³ Tandihi tan cuvi jaha yu tsihin tunyee ñni tsa tsahá ra Cristo tsi yu.

¹⁴ Tan nyooho yañi, vaha xaan tsa javaha ndo tyin jatyinyee ndo tsi yu quivi tsa tsicoo yu tundoho.

¹⁵ Tsa tsitó nyooho nyivi Filipos nácaa cuvi quivi quitsaha caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyooho cuvi nyivi tsa jatyinyee tsi yu tsihin xuhun, tyin vaha xaan cuñi ndo tsa cahán yu tuhun Nyoo tsihin ndo.

16 Tan tsitsi tsa nyíi yu ñuu Tesalónica, ñavin intuhun ñi tsaha jatyinyee ndo tsi yu.

17 Ñavin tsa tsicá iñi yu tsa jatyinyee ndo tsi yu, tyin tsa cuñí yu tsa jatyinyee ndo tsihin tyiñu Nyoo, tacan tan cuaha ca cua nasoco Nyoo tsi ndo.

18 Tan vityin, nduve tsa cumañí tsi yu. Nda cua ndoó ca tsa jaquitsí ndo tsi yu tsihin ra Epafrodito. Tan tsa tsahá ndo can cuví tsi tumaa xico tami, xico vaha tsa tsaá nuu Nyoo. Yacan cuví tsa taahán iñi ra.

19 Tan Nyoo cua cuhva ra tandihí tsa tsiñí ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo.

20 Na jacahnu yo tsi Nyoo Jutu yo tacan ñi maa. Tan na cuvi tsi tacan ñi.

Nu jacuhún ra Pablo nacumi tsi nyivi ñuu Filipos

21 Tsahá yu nacumi tsi tandihí ndo tsa yihí ndo cuenda ra Cristo ñuu Filipino. Tan jaquitsí tucu ra yañi yo tsa yucú tsihin yu ihya nacumi tsi ndo.

22 Tan nyivi cuenda Nyoo tsa yucú vehe ra ndacá ñaha ñuu Roma ihya, tan tandihí ca nyivi yihí cuenda Nyoo ñuu ihya jaquitsí ñi nacumi tsi ndo.

23 Na nasoco maa Jutu Mañi yo Jesucristo tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Nuu Colosas

Nu quitsaha javahá ra Pablo carta

¹⁻² Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi nuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu tsicán tahvi ra Pablo tsa cuenda nyivi yihí cuenda ra Cristo

³ Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo.

⁴ Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo.

⁵ Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo.

⁶ Tan juvin ñi maa tuhun ra Cristo tsa cahan ra Epafras tsihin ndo, yacan nacutyá tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhva cuenda maa ndo tsi ndo. Tyin quivi tsa tsiñi ndo tuhun ra Cristo tsito ndo tyin nditsa tsa cuñí Nyoo tsi ndo.

⁷ Yacan janaha ra Epafras tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo.

⁸ Tan juvin ra catyí tuhun tsihin ndi tyin cuñí xaan ndo tsi nyivi tahan ndo, tyin maa Tatyí Ii Nyoo tsahá tsa vaha can coo añima ndo.

⁹ Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí Ii ra tan coto vaha ndo náa ndihí tsa cuñí ra tyin javahá ndo.

¹⁰ Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan naco tsa vaha ca ndo tsi ra.

¹¹ Tan tsicán tucu ndi tsi ra na jatyinyee ca ra tsi ndo tsihin tunyee iñi cahnu tsa iyó tsi ra tan ña cundihí iñi ndo tsa yaha ndo tandihí tundoho, tan na cusí iñi ndo.

¹² Tan na cuhva ndo tyahvi

nyoo tsi Nyoo Jutu yo, tyin maa ra tsa janduvahā ra tsi yo tyin tacan tan cuvi ñihi yo tsa cua ñihi nyivi tsicá nu nditsin, tan cuñi tsi catyi nyivi tsa cuiti iyó nuu ra.

13 Tyin Nyoo tavā ra tsi yo nu naa tan nacuhvā cuenda ra tsi yo tsi Sehe ra tsa cuñi xaan ra tyin cundaca ñaha ra tsi yo.

14 Tan jatā ra tsi yo tsihin niñi Sehe ra tan jahā ra tuc-ahnu iñi tsi yo.

Tsa cuenda tsa tsihi ra Cristo nu cruu tsacatyí cuatyí yo tan nduvahā iyó yo tsihin Nyoo

15 Nyoo ña nyehé yo tsi ra. Maa tyin nanduví ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinú ñuhu ñayivi tan tsa iyó maa ra Cristo.

16 Tan maa ra javahā tandihí tsa iyó andiví tan nu ñuhu ñayivi jahā Nyoo. Javahā ra tsa cuví nyehe yo tan tsa ña cuví nyehe yo. Javahā ra tandihí tatyí vaha tan tatyí ña vaha tsa ndacá ñaha andiví tan nu ñuhu ñayivi ihya. Tan tandihí yacan javahā ra tyin cuatyíñu ra cuhva cuñi ra.

17 Tan tsa iyó maa ra tsa ndi cumañi ca coo tandihí maa tsa iyó. Tan tandihí tsi jahá tyiñu vaha tsi jahá ra.

18 Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandoto

tsa jihna ca, tyin tacan tan quihí ndaha ra tandihí tsa iyó.

19 Tyin Nyoo cuñi ra tsa cuví ra Cristo tumaa cuví maa ra.

20 Tan tsahā ra tsi ra Cristo tsa cúu ra nu cruu tyin tacan tan cuví coo vaha tandihí tsa iyó tsihin ra, tahan ñi tsa iyó nu ñuhu ñayivi tan andiví.

21-22 Tahān tsanaha javahā ndo tsa ña vaha tan xaan cuñi ndo nyehe ndo tsi Nyoo. Maa tyin Nyoo jaquitsi ra tsi ra Cristo, Sehe ra tan tsahā cuenda ra cuñu ñuhu ra tan tsihi ra nu cruu. Tan janacoo vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiti vaha cua coo ndo nuu ra.

23 Yacan cuenda jañihi ca ndo tsinú iñi ndo. Tan cuita iñi ndo tyin cua tsa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha tani cahnu ñuhu ñayivi. Tan yuhu ra Pablo jatyinyeé yu caahán yu tuhun ihya tsihin nyivi.

Nu catyí ra Pablo tyin nyaá siquí ra tsa janahá ra tuhun ra Cristo tsi tandihí nyivi tsicá vehe ñuhu

24 Vityin siñi cuñi yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra cuaha xaan tundoho nyehe ra tsa cuenda yo tsa cuví yo cuñu ñuhu ra. Tacan tan cua

jaquita ndihí yu tundo ho tsa nyehe ra.

²⁵ Yuhu cuví iin ra caahán tuhun ra Cristo tyin tacan jatyinyeé yu tsi tandihí nyívi yihí cuenda ra. Tyin maa ra Nyoo catyí tsa cahan yu tandihí tuhun ra tsa cuenda tsa vaha tsi ndo.

²⁶ Jacuahá yu tuhun tsa tsicumí xeehe Nyoo tahañ tsanaha, tsa ndi cumañi ca javaha ra ñuhu ñayivi. Tan vityin tsahá ra tsa nacoto nyívi yihí cuenda ra itsi.

²⁷ Tan nyoo ho tsa ñavin nyívi Israel cuví cuñí ndihí ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añima nyoo ho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

²⁸ Tuhun maa ra Cristo caahán ndi. Tan tsahá cuenda ndi tuhun ihya tsi tandihí nyívi. Tan jacuahá ndi tsi tandihí ñi na cutuñi ñi ñi, tan cutsa vaha ñi tyin iin ñi cuví ñi tsihin ra Cristo.

²⁹ Tan tsa cuenda tsa cuñí yu tsa cuahnu vaha ñi ñihi xaan jahá tyiñu yu tsihin tunyee ñi ra Cristo tsa tsahá ra tsi yu.

2

¹ Tan cuñí yu tsa coto ndo tyin tsicá ñi yu tsa cuenda ndo. Tan tsicán tahvi xaan yu tsi Nyoo tsa cuenda tandihí ndo tan tsa cuenda nyívi ñuu Laodicea, tan tsa cuenda tandihí nyívi tsa ñaha ca nyehe tsi yu.

² Tsicán yu tsi ra na jandu iin ra ñi añima ndo, tan jandu iin ra tsi ndo tsihin tsa cuñí tahan ndo tsi ndo. Tan na cuhva ra tsa cutuñi vaha ñi ndo nacuenta jacuitsi ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuví tsa tsicumí xeehe Nyoo tahañ tsanaha, tan vityin jacotó ra itsi tsi yo.

³ Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi ñi yo tsi Nyoo.

⁴ Caahán yu tyehen tsihin ndo tyin tacan tan ña jandavi ñaha nyívi tsi ndo tsihin tuhun tsa si natuhún ñi.

⁵ Vasu nduve yu nyii tsihin ndo, maa tyin ñuhú xaan ñi yu tsi ndo. Tan si xaan cuñí yu tsa nducuhún ñi yu cuhva iyó nu yucú ndo tyin vaha xaan icá ndo. Tan tsinú vaha xaan ñi ndo tsi ra Cristo.

⁶ Yacan cuenda tumaa natsinu ñi ndo tsi ra Cristo quívi nañihí ndo tsi ra, tacan cuñí tsi coo ndo tsihin ra.

⁷ Tan cunyaa naa vaha ndo tsi ra, na cuhva ra tunyee ñi ra tsi ndo. Tan ndu iin ca ñi ndo jahá tsa tsinú ñi ndo tsi ra, tumaa cutuhva ndo. Tan iin nyita ñi nacuhvá ndo tyahvi nyoo tsi Nyoo.

Ñayivi nyito tsa tsahá ra Cristo tsi yo

⁸ Jaha ndo cuenda tsi ndo coto jandavi ñaha nyívi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyívi tsitó ñi tan tsiñú ñi ñi cuhva tsicá ñi nyívi.

⁹ Yacan ña tsjnu iñi ndo tsa caahán ñi tyin ra Cristo juvin ra cuví Nyoo tan cuví tucu ra nyivi.

¹⁰ Tan tsitü ndo tsihin Nyoo tyin iin ñi cuví ndo tsihin ra Cristo. Tan maa ra ndacá ñaha tandihi tsa ndacá ñaha nu ñuhu ñayivi tan tandihi tatyí tsa ña nyehé yo.

¹¹ Tan tsa iin ñi cuví ndo tsihin ra Cristo, nda quivi natsinü iñi ndo tsi ra, tan nanduví ndo nyivi ra. Maa tyin ña nanduví ndo nyivi ra tsa cuenda tsa tsinyaá tuñi ra cuñu ñuhu ndo, tyin jacacü ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuví tuñi tsa tyaa ra Cristo tsi ndo:

¹² Quivi tsicoondutyá ndo tsitsi ndutyá, tumaa tsa tsihi ndo tsihin ra Cristo tan quihvi ndo tsitsi ñuhu cuví can. Tacan tan nandoto tucu ndo tsihin ra tyin tsinú iñi ndo tyin Nyoo janandoto tsi ra tsihin tunyee iñi ra.

¹³ Tahān tsanaha cuví ndo tumaa nyivi tsihi jahā cuatyí ndo, tyin nduve Nyoo nyaá añima ndo tan ña tsinyaá tuñi Nyoo cuñu ñuhu ndo. Maa tyin vityin Nyoo jahā ra tuc-ahnu iñi tandihi cuatyí ndo. Tan tsahā ra tsa coo ndo ñayivi nyito tsihin ra Cristo.

¹⁴ Tyin ley tsahnu jaquituví tsi cuatyí yo. Tan catyí tsi tyin taahán tsi cahun yo anyaya tyin ña tyaá yahvi yo itsi. Maa tyin ra Cristo tsihi ra nu cruu jahā Nyoo tan tsindihí tsa cahun yo anyaya.

¹⁵ Tan tsa tsihi ra nu cruu jahā canaa ra tsi nu ña vaha

tan tandihi ca tatyí ña vaha tsa ndacá ñaha. Tacan tan tsindacā ra tsi nu nuu tandihi nyivi tan nuu ángel tyin na nyehe ñi tyin cahnu ca cuví maa ra, yacan cuenda jahā canaa ra.

Na nanducú yo tsa vaha tsa tsahá Nyoo

¹⁶ Yacan cuenda ña taahán tsi tyaa nyivi cuatyí tsi ndo tsa cuenda tsa tsatsí ndo a tsa cuenda tsa tsihi ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutyá yoo, o quivi quitatú ñi.

¹⁷ Tandihi tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yahā quitsi ra, tan juvin ra jacacú tsi yo.

¹⁸ Ña cuhva ndo tsa casi nyivi nu naquihin ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can.

¹⁹ Ñi ican ñavin ra Cristo ny-icún ñi. Maa tyin yoo tsa ny-icún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iin ra tsi tandihi yo. Tan jacuahnú ra tsi yo tsihin tunyee iñi ra tumaa cuhva cuñi maa Nyoo.

²⁰ Tumaa tsa tsihi cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi

ihya tsi ndo. ¿Nacuenda tyin iyó ca ndo tumaa iyó nyivi tsa ña nacotó tsi Nyoo? Tan tyaá yahvi ndo tsa caahán ñi tsa javahá tuhun tsahnu.

²¹ Tyin catyí ñi tsihin ndo tyehen: “Ña tñin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo.

²² Maa tyin ña taahán tsi casi ñi nu javahá ndo yacan tyin tsa jacuahá ñi, maa ñi tsa tsicá iñi nyivi cuví can. Tyin tsa tsatsí yo tsa iin yaha ñi cuví can, tan ña cuví jatívi can tsi ndo nuu Nyoo.

²³ Ñi tsa javahá tandihí can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

3

¹ Tsaḥa Nyoo ñayivi nyito coo yo tyin nandotó ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo.

² Caca iñi ndo yacan, tan ña caca xaan iñi ndo tuhun tsa iyó nu ñuhu ñayivi ihya.

³ Tyin vityin ña javahá ca ndo tsa javahaḥa ndo tahan tsanaha, tyin tsa tsihiḥi ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo.

⁴ Tan quivi cua quitsi nyico ra Cristo, ra tsa tsahá ñayivi

nyito tsa iyó yo, tacan tan cua nyehe nyivi tyin maa ra cahnu ca cuví ra. Tan cua nyehe tucu ñi tsi nyooho iin caa ñi tsihin ra.

Nacaa tsicoḥ yo nu quitsi tsi ityi tsata tan nácaa cuñi tsi coo yo tsihin Nyoo vityin

⁵ Yacan cuenda jandihí ndo tandihí tsa ña vaha tan tsa caquiñi tsa cuñi cuñu ñuhu ndo. Tan ña cusu ndo tsihin iin ñaha tun ñaha ca tindaha ndo, tahan ñi rayiḥi tan ñaha. Tan ña cuñi ndo coo cuaha ndaha tyiñu ndo tyin tun tsicá iñi ndo yacan, tsi-toho jacahnú ndo tan tyaá tsiyo ndo tsi Nyoo cuví can. Tyin tacan javahá nyivi tsa ña yihí tuhun Nyoo, maa tyin nyooho ña taahán tsi javaha ndo tacan.

⁶ Tsa cuenda tandihí tsa caquiñi ihya cuxaan xaan Nyoo tsi nyivi tsa ña tyaá yahvi tsa caahán ra. Tan cua tatsi tuñi ra tsi ñi.

⁷ Tan juvin ñi tacan javahaḥa tucu maa yo quivi tsa ña nacotó yo tsi Nyoo.

⁸ Maa tyin vityin ña javaha ca ndo tandihí tsa ña vaha can: ña cuxaan ca ndo. Ña xaan cuñi ndo nyehe ndo tsi nyivi tahan ndo, tan ña jacuñi nyaa ndo tsi ñi, tan ña cahan ndo cuendu siqui ñi. Tan ña cahan ca ndo tsa ndavaha ñi.

⁹ Ña cahan tahan ca ndo cuendu siqui iin ndo tan inga ndo. Tyin tsa nacoḥ ndo tandihí tsa ña vaha tsa javahaḥa ndo tahan tsanaha.

¹⁰ Tyin vityin tsa nanduvi yo nyivi tsa tan iyó yo ñayivi

nyito. Tan ndutsaá ca yo tumaa caá Nyoo, ra javaha tsi yo, nda cuanda coto vaha ca yo tsi ra.

11 Ña ñiñi tsa cuví yo nyivi Israel, o nyivi Grecia, o nyivi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyivi catsi iñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandihi yo tsihin ra Cristo, tyin maa ra cuví tandihi tan iyó ra tsihin tandihi yo.

12 Nyoo cuñí ra tsi yo tan nacatsi vaha ra tsi yo tyin cuví yo nyivi ra. Yacan cuenda coo ndo ñayivi nyito tumaa taahán tsi coo nyivi yihí cuenda ra; cundaahvi iñi ndo nyehé ndo tsi nyivi tahan ndo; cuvi ndo nyivi vaha tan ndaahvi jaha ndo tsi ndo nuu Nyoo; ndumasu ndo; cunye e iñi ndo nyehe ndo tandihi tsihi tan tundoho tsihin tsa si cuñí ndo.

13 Ña cundihí iñi ndo tsihin nyivi tahan ndo. Jaha ndo tucahnu iñi tsi ñi tatun náa javaha ñi tsi ndo. Tumaa ra Cristo jaha ra tucahnu iñi tsi maa ndo, tacan cuñí tsi javahá tucu maa ndo tsihin nyivi.

14 Tyin tsa cuñí tahan yo tsi yo, yacan cuví tsa ñiñi ca cuñí tsi. Tyin yacan cuví tsa jandu iin tsi yo.

15 Tan cuhva ndo tsa cundaca ñaha tsa taxin Nyoo aña ndo, tan na jaquihin ityi tsi tsi ndo. Tyin tsa

cuenda yacan, cana Nyoo tsi ndo tan jandu iin ra tsi ndo tsihin ra Cristo. Tan cuhva ndo tyahvi nyoo tsi Nyoo.

16 Tan na cutu aña ndo tsihin tuhun ra Cristo, tan jacuaha tahan ndo tuhun ra tsi ndo. Tan jandu iin tahan ndo iñi ndo tsihin tandihi tsa tsiñi tuñi tsa tsaha Nyoo tsi ndo. Cata ndo yaa tan salmo. Tan cata ndo yaa tsa tsahá Tatyí li Nyoo tsi ndo tsihin tsa ñi iñi aña ndo. Tan tacan ñi nacuhva ndo tyahvi nyoo tsi Nyoo.

17 Tatun náa tyiñu cua javaha ndo, o náa cua cahan ndo, javaha ndo can tsihin sivi Jutu Mañi yo Jesús. Tan juvin ñi cuhva can nacuhva ndo tyahvi nyoo tsi Nyoo tsa cuenda maa ra Cristo.

Nu tsahá cuenda ra Pablo nácaa nducú yo cuhva coo vaha yo tsihin nyivi

18 Nyooho tsa iyó yí cuhva ndo tsa cundaca ñaha yí ndo tsi ndo. Tacan taahán tsi coo ndo, tyin yihí ndo cuenda Jutu Mañi yo.

19 Tan nyooho rayí, cuñi ndo tsi ñasihi ndo. Tan ña cundihí iñi ndo nyehé ndo tsi ñi.

20 Nyooho tsa nyihi tyaa yahvi ndo tsi jutu ndo tan tsi sihi ndo, tyin si xaan cuñí Jutu Mañi yo tun javahá ndo tacan.

21 Nyooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihya xaan iñi tsi.

22 Tan nyooho tsa cuví musu, tyaa yahvi ndo tsi ra yihí ndaha tsi ndo. Ñavin tsa

nyehé ñi ra tsi ndo tan tyaa yahvi ndo tsi ra naha, tan catyi ra naha tyin vaha xaan ndo. Tyaa yahvi nyooho tsi ra naha tsihin tsa ñi ñi añima ndo vasu ña nyehé ra naha, tyin Nyoo nyehé ra.

²³ Tandihí ñi tyiñu javahá ndo, javaha ndo can tsihin tsa sii cuñí ndo tumaa tsa jahá tyiñu ndo cuenda Jutu Mañi yo tan ñavin cuenda nyivi.

²⁴ Tyin tsitó ndo tyin maa Jutu Mañi yo ra Cristo cua cuhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa.

²⁵ Tan tatun javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña siin caá iin yo tan inga yo nuu Nyoo, tyin tandihí yo tan inducu ñi caá yo.

4

¹ Nyooho tsa iyó musu, cuñí tsi cuví ndo nyivi vaha tsihin musu ndo. Ndūcuhun ñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

² Ndaçan tahvi ndo tsihin tsa ñi ñi ndo. Çoo nyito ndo tan nacuhva ndo tyahvi nyoo tsi Nyoo tsa cuenda tandihí maa.

³ Ndaçan tahvi ndo tsa cuenda ndi, tyin na nuña Jutu Mañi yo añima nyivi tan tyaa soho ñi tuhun xeehe ra Cristo tsa caahán ndi tsihin ñi. Tsacatyí tuhun ihya nyii yo vehe caa.

⁴ Ndaçan tahvi ndo tsa cuenda yo na cuví jacuaha yo tsi nyivi cuhva cuví cutuñi

vaha ñi ñi tuhun ra Cristo, tumaa taahán maa tsi javahá yu.

⁵ Cuiti çoo ndo tsihin nyivi tsa ña yihí tuhun Nyoo, tyin tacan tan cuvi cahan ndo tuhun Nyoo tsihin ñi.

⁶ Tan maa ñi tuhun vaha cahan ndo tsihin ñi. Tan taahán tsi coto ndo nácaa cua nacahan ndo tatun nducu tuhun ñi náa nducu tuhun ñi tsi ndo.

Nu tsahá ra Pablo nacumi tsi nyivi yihí cuenda Nyoo ñuu Colosas

⁷ Ra Tíquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu.

⁸ Yacan cuenda jaquitsí yu tsi ra nu yucú ndo na jandu iin ra ñi ndo tan catyi tuhun ra tsihin ndo nácaa yucú ndi.

⁹ Tan vatsí ndihí ra Onésimo, ra ñuu ndo, tsihin ra. Vaha xaan tsinú ñi ra tsi ra Cristo, tan cuñí xaan yo tsi ra. Cua catyi tuhun maa ra naha tsihin ndo tandihí tsa cuví nu nyii yo ihya.

¹⁰ Ra Aristarco, ra nyii tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacotó yu tsi ndo tyin tun tsa ra Marcos nu yucú ndo, vaha cahan ndo tsihin ra.

¹¹ Vatsí tucu nacumi tsi ndo jahá ra Jesús, ra tsa nañi tucu Justo. Tan tsitsi tsa tandihí ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iin xaan ra naha ñi yu.

¹² Vatsí tucu nacumi tsi ndo jahá ra Epafras, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan çoto vaha ca ndo nácaa taahán tsi javaha ndo tandihi cuhva cuñí ra.

¹³ Yuhu cuví tsandaa tyin ra Epafras tsicán tahvi xaan ra tsa cuenda ndo, tan tsa cuenda nyivi tsa yucú ñuu Laodicea tan ñuu Hierápolis.

¹⁴ Vatsí tucu nacumi tsi ndo jahá ra Lucas, ra tsa cuví doctor tsa cuñí xaan yo, tan ra Demas tucu.

¹⁵ Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndihi ndo nacumi tsi ña Ninfas tan tsi tandihi nyivi yihí cuenda Nyoo tsa ndu iín yuvehe ña.

¹⁶ Tatun ndihi cahvi ndo carta ihya, tan jacuhun ndo itsi tsi nyivi yihí cuenda Nyoo nda ñuu Laodicea na cahvi ndihi ñi itsi. Tan na cuhva ñi carta tsa jacuhun yu tsi ñi, cahvi ndo.

¹⁷ Cahan ndo tsihin ra Arquipo tan çatyí ndo: “Javaha vaha tyiñu tsa tsaha Jutu Mañi yo tsi un tyin javaha un.”

¹⁸ Yuhu ra Pablo tyaá yu nacumi ihya tsi ndo. Na ña naa iñi ndo tyin nyí yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaa ra Pablo tan ra cutahán tsihin ra iin carta cuenda nyivi yihí tuhun Nyoo

¹ Yuhu ra Pablo ra Silvano tan ra Timoteo, jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxín tsa tsahá ra naha coo añima ndo.

Vaha xaan tsinú iñi nyivi Tesalónica tsi Nyoo

² Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo.

³ Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñí ndo tsi ra. Tan tsihin tsa ñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo.

⁴ Tyin tsitó ndi tyin Nyoo cuñí xaan ra tsi ndo, nyooho yañi, tan maa ra nacatsí vaha tsi ndo.

⁵ Tyin quivi cahán ndi tuhun Nyoo, nácaa jacacú ra

tsi yo, tsihin ndo, cahán ndi tuhun tsihin tunyee iñi Tatyí li Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehe ndo nácaa tsicoo ndi quivi tsiyucu ndi tsihin ndo. Tsicoo ndi tacan tsa cuenda tsa vaha tsi maa ndo.

⁶ Tan quitsaha iyó ndo cuhva iyó ndi, tan cuhva iyó Jutu Mañi yo. Tyin naquihin cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin sii xaan cuñí ndo tyin maa Tatyí li tsahá can tsi ndo.

⁷ Tan tsa tacan iyó ndo, jatyinyeé xaan ndo tsi tandihí nyivi yihí cuenda Nyoo tanii cahnu Macedonia tan tanii cahnu Acaya ihya, tyin nyehé ñi cuhva iyó ndo tsihin Nyoo.

⁸ Ñavin Macedonia tan Acaya ñi, maa tyin tandihí ñi ityi nu tsiñi nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñí tsi cahan ndi tuhun Nyoo tsihin ñi.

⁹ Tyin juvin ñi maa ñi nacatyí tuhun tsihin ndi nácaa tsa vaha xaan naquihin cuenda ndo tsi ndi. Nacatyí tuhun ndihí tucu ñi tsihin ndi nácaa jandihí ndo tsa jacahnú ndo tsitoho tan quitsaha jahá tyiñu ndo tyiñu Nyoo nyito.

¹⁰ Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua quee ra andivi. Ra ican cuví ra tsa janandoto Nyoo. Tan maa ra cuví ra

jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

2

Tyiñu jahá ra Pablo ñuu Tesalónica

¹ Nyoooho yañi, tsitó ndo tyin ñavin tsa cuatu quitsi ndi cahān ndi tuhun Nyoo ñuu ndo.

² Tyin tsitó ndo nácaa nyehe ndi tundoho jahā nyivi ñuu Filipo tsa ndi cumañi ca tsaā ndi ñuu ndo. Tan vasu nyehe xaan ndi tundoho ñuu can, maa tyin quivi tsaā ndi ñuu ndo cahān ndi tuhun Nyoo tsihin ndo tsihin tsa ña yuhvi ndi. Tan vasu xaan xaan cuñi nyivi ñuu ndo, maa tyin jatyyeē xaan Nyoo tsi ndi tan n# iñi ndi jacoto ndi tsi ndo cuhva jacacú ra tsi yo.

³ Tyin tuhun tsa tsaha cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsicā iñi ndi. Tan ndi ñavin tsa cuñi ndi jandavi ñaha ndi tsi ndo.

⁴ Nduve tsa ña vaha cahān ndi, tyin Nyoo nyehé ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahān ndi tumaa tava tyiñu maa ra tsi ndi. Tyin ña cuñi ndi tsa vaha cahan nyivi tuhun ndi, maa tyin cuñi ndi tsa vaha cahan Nyoo tuhun ndi, tyin maa ra nyehé ra cuhva iyó yo.

⁵ Tan tsitó ndo tyin ndi iin tsaha tan ña cahān ndi tsihin tuhun tsa tyaqui xaan tsa cuñi ndi jandavi ñaha ndi tsi ndo. Tan ndi ñavin tsa cuñi

ndi jaha canaa ndi xuhun tan cahān ndi tuhun Nyoo tsihin ndo. Maa Nyoo cuví tsandaa tyin nditsa tsa caahān ndi ihya.

⁶ Tan ndi iin tsaha ña nducu ndi cuhva jacahnu nyivi tsi ndi, ndi nyoooho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñi ndi tsa javaha ndo tacan tsihin ndi.

⁷ Tan vita cahān ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñi ndi jatyyeē ndi tsi ndo.

⁸ Cuñi xaan ndi tsi ndo, tan yacan cuenda ñavin tuhun Nyoo ñi cuñi ndi cuhva ndi tsi ndo, tyin cuñi ndi cuhva tucu ndi nda cuenda ñayivi iyó ndi tsa cuenda tsa cuñi ndi tsi ndo.

⁹ Nyoooho yañi, nducuhún iñi ndo nácaa jahā tyiñu ndi tan tsatsi ndi quivi tsiyucu ndi tsihin ndo. Jahá tyiñu ndi tsinu cahñi tan tsacuaa tyin ña cuñi ndi jatyañu ndi tsi ndo tsitsi tsa caahān ndi tuhun Nyoo tsihin ndo.

¹⁰ Tan nyoooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahā ndi quivi tsiyucu ndi tsihin ndo tsa cuví ndo nyivi tsinú iñi tsi ra Cristo. Maa tyin maa ñi maa cuhva cuñi Nyoo javahā ndi, tan yacan cuenda ña cuví cahan ndo tsi ndi.

¹¹ Tan tsitó tucu ndo nácaa jandu iin ndi iñi intuhun intuhun ndo tsihin tuhun tsa tsaha cuenda ndi tsi ndo.

Tsahá ndi tunyee iñi tsi ndo tumaa iin rayi tsa iyó sehe tsahá ra tunyee iñi tsi sehe ra.

¹² Tan catyi ndi tsihin ndo, catsi coo ndo tumaa taahán tsi coo nyivi yihí cuenda Nyoo. Tyin maa Nyoo caná tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

¹³ Yacan cuenda iin nyita ñi tsahá ndi tyahvi nyoo tsi Nyoo, tyin quivi tsiñi ndo tuhun ra tsa cahán ndi tsihin ndo, naquihin cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayivi cuví tsi. Tan nditsa tsa tuhun Nyoo cuví tsi, tyin quitsahá tsinú iñi ndo tsi Nyoo tan nasama cuhva iyó ndo.

¹⁴ Yahá can tan nyehe tucu maa ndo tundoho jahá nyivi ñuu ndo. Tumaa tsa nyehe nyivi yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahá nyivi Israel.

¹⁵ Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahanan tsanaha. Ñi Israel can tsinyaá ndaha ñi tsi ndi. Ñavin cuhva cuñi Nyoo iyó ñi. Tan xaan iñi ñi tsi tandihi maa nyivi.

¹⁶ Tatun cuñi ndi cahan ndi tuhun Nyoo tsihin nyivi tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasi ñi nu caahán ndi, nducaha ca cuatyí ñi. Tan vityin nu ndihi tuhun

tatsí tuñi xaan Nyoo tsi ñi.

Nu cahán ra Pablo tyin cuñi ra cunyehe ra nu yucú nyivi Tesalónica inga tsaha

¹⁷ Nyooho yañi, tsa yaha tsa quita ndi ñuu ndo juhva quivi, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa ñi iñi ndi cuñi ndi cunyehe ndi nu yucú ndo inga tsaha.

¹⁸ Tan nducu ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu cuhva quitsi ndi, maa tyin tandihi ñi tsaha tsa cuñi ndi quitsi ndi, ña tsaha nu ña vaha.

¹⁹ Maa tyin ¿náa ndatú ndi? Tan ¿yóo cuenda cusii iñi ndi, tan vaha cuñi ndi? ¿A ñavin tsa cuenda maa ndo cua cusii xaan iñi ndi nuu Jutu Mañi yo Jesucristo quivi quitsi ra inga tsaha?

²⁰ Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tyiñu ndi. Tan sii xaan cuñi ndi tsa cuenda yacan.

3

¹ Tan ña cunyeé ca iñi ndi tsa cuñi ndi coto ndi nácaa cuahán tsinú iñi ndo tsi Nyoo. Tan tyaa ndi cuhva tsa ndoo intuhun ñi maa yu ñuu Ateñas.

² Tan jaquitsi yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsi ndi tsi ra nu yucú ndo na jandu iin ca ra iñi ndo tan

cuhva ca ra tunyee iñi tsi ndo na tsinú ca iñi ndo tsi Nyoo.

³ Tyin tacan tan ndi in-tuhun ndo tan ña ndu uvi iñi ndo tsihin tsa nyehé ndo tundoho. Tyin nyooho tsitó ndo tyin nyaá tsa nyehe yo tundoho.

⁴ Tyin nda ndi yucú ca maa ndi tsihin ndo, tan cahān ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuvi.

⁵ Ña cunyeē ca iñi yu tsa cuñi yu coto yu nácaa yucú ndo. Yacan cuenda jaquitsi yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhvi yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuvi, tsa cuatu ñi jahā tyiñu ndi nu yucú ndo.

⁶ Maa tyin vityin tsa tsaā nuhu ra Timoteo tsa quitsi ra nu yucú ndo. Tan nacatyi tuhun ra tsihin ndi tyin ñi xaan iñi ndo tsinú iñi ndo tsi Nyoo. Tan cuñi tahan xaan ndo tsi ndo. Tan catyí ra tyin ñuhú xaan iñi ndo tsi ndi tan cuñi xaan ndo nyehe ndo tsi ndi; tumaa tsa cuñi tucu maa ndi nyehe ndi tsi ndo.

⁷ Yacan cuenda, nyooho yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñi ndi tsa tsitó ndi tyin nyooho vaha tsinú iñi ndo tsi Nyoo tan ña nacoó ndo tsi ra.

⁸ Tyin tumaa tsa ndutsaa ñayivi iyó ndi cuñi ndi tsa tsitó ndi tyin nyooho vaha

tsinú iñi ndo tsi Nyoo.

⁹ Ndi ña ñihí ca ndi cuhva cuhva ndi tyahvi nyoo tsi Nyoo tsa cuenda ndo. Tyin sñi xaan cuñi ndi nuu Nyoo tsa cuenda tyin vaha cuahán ndo tsihin ra.

¹⁰ Tsicán tahvi xaan ndi tsi Nyoo tsinu cahñi tan tsacuaa, tyin cuñi xaan ndi quitsi nyehe ndi tsi ndo. Tacan tan cuvi jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi ndo tsi ra.

¹¹ Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuvi quitsi ndi nu yucú ndo.

¹² Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihí ca nyivi tumaa tsa cuñi maa ndi tsi ndo.

¹³ Tyin tacan tan cuiti coo ndo tsihin ra tyin tsa yaha janduvaha ra añima ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tsihin tandihí nyivi yihí cuenda ra.

4

Nacaa taahán iñi Nyoo coo yo

¹ Vityin nyooho yañi, tsihin sivi ra Jesús caahán ndaahvi xaan ndi tsihin ndo tan tsicán ndi tsi ndo tsa ña jandihí ndo tsa iyó ndo tumaa tsa janaha ndi tsi ndo. Jañihi ca ndo nducu ndo cuhva coo vaha

ndo nuu Nyoo tumaa taahán iñi maa ra.

² Tyin nyoooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi.

³ Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo kuhva nduvaha añima yo nuu ra. Tan nyoooho, rayi, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayi tun ñavin yi ñi cuví ra.

⁴ Tan nyoooho yañi, intuhun intuhun ndo cuñi tsi coto ndo nácaa coo vaha ndo tsihin ñasihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha.

⁵ Ña caca caquiñi iñi ndo nyehe ndo tsi ñasihi ndo, ña javaha ndo tumaa javahá nyivi ña yihí tuhun Nyoo.

⁶ Ndi intuhun ndo tan ña jandavi ñaha ndo tsi inga ca rayi tan coo ndo tsihin ñasihi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahán ndi tsihin ndo.

⁷ Tyin Nyoo cana ra tsi yo tsa coo yo kuhva cuñi maa ra, tan ña javaha yo tsa caquiñi.

⁸ Yacan cuenda nyivi ña cuñi tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí li ra tsi yo.

⁹ Maa tyin tuhun tsa cuñi tahan yo tsi yo ña tsiñi ñuhu tsa tyaa yu itsi nu carta ihya. Tyin tsa janaha maa Nyoo tsi

yo nácaa taahán tsi cuñi tahan yo tsi yo.

¹⁰ Tan nyoooho tsa tsitó maa ndo tuhun can tyin cuñi ndo tsi tandihí nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi.

¹¹ Nducu ndo kuhva coo taxin ndo. Tan ña tyihi ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahán ndi tsihin ndo quivi can.

¹² Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

Nacaa cua cuví quivi quitsi Jutu Mañi yo Jesús inga tsaha

¹³ Nyoooho yañi, cuñi ndi tsa coto ndo nácaa taahán nyivi tsa tsa tsihi, tyin tacan tan ña nducuihaya iñi ndo tumaa cuihaya cuñi nyivi ña cua nandoto tsa ña cua coo tsihin Nyoo.

¹⁴ Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

¹⁵ Yacan cuenda catyí ndi tsihin ndo tumaa jacuaha Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhan tan nacoo yo tsi nyivi tsa tsihi.

16 Tyin juvin ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tsihin ángel. Tan cua navacu trompeta Nyoo. Tacan tan nyívi tsa tsinú iñi tsi ra Cristo tan tsihi ñi, jihna ca ñi cua nandoto.

17 Yahá can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuii yo tsihin ra.

18 Yacan cuenda jandu iin tahan ndo iñi ndo tsihin tuhun ihya.

5

1 Nyooho yañi, ña ñiñi cuñí tsi jacoto yu tsi ndo ama cua cuvi tandihi tsa tsa yaha cahan yu tuhun tsihin ndo.

2 Tyin tsa tsitó maa ndo tyin ña cua coto yo náa cuhva, náa quívi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihví ñasuhu yuvehe yo tsa tsacuaa tacan cua cuvi.

3 Tyin quívi tsa catyí nyívi tyin taxin ñi caa, tan nduve maa tsa yuuhví ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhví tsitsi ña. Tan tacan cua tahan nyívi quívi quitsi Jutu Mañi yo, tyin ña cua cuvi ca cunu xeehe ñi.

4 Maa tyin nyooho yañi, quívi quitsi Jutu Mañi yo ña cua tahan ndo tumaa taahán nyívi, tun sana iñi ñi tan quihví ñasuhu yuvehe ñi tyin

nyooho ñavin ca nu naa iyó ndo.

5 Tyin tandihi yo tsitó yo nácaa taahán tsi coo yo tyin jandunditsín Nyoo añima yo, tan ña iyó ca yo nu naa tumaa iyó nyívi ña nacotó tsi Nyoo.

6 Yacan cuenda catsi coo ndo coonyito ndo tan ña cusu ndo tumaa iyó nyívi ña nacotó tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha.

7 Tyin nyívi quixí, quixí ñi tsacuaa, tan nyívi tuhva tsihi nyixi, tsiñí ñi tsacuaa.

8 Maa tyin yoo tsa cuví yo nyívi iyó tsinu cahñi, na catsi coo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñí yo tsi tandihi nyívi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo.

9 Tyin Nyoo ña nacatsi ra tsi yo tsa tatsi tuñi ra tsi yo, nacatsi ra tsi yo tyin jacacu Jutu Mañi yo Jesucristo tsi yo jaha ra.

10 Tyin ra Jesucristo tsihi ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihi yo, a nyito yo, maa tyin tandihi yo cua coo yo iin caa ñi tsihin ra.

11 Yacan cuenda jandu iin ndo iñi nyívi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

Nu tsahá cuenda ra Pablo tsi nyivi yihí cuenda Nyoo

12 Nyooho yañi, caahán ndaahvi xaan ndi tsihin ndo, jaha ndo tsa ñayivi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha.

13 Cuñí tsi tsa jaha xaan ndo tsa ñayivi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

14 Tavá tucu ndi tyiñu tsi ndo yañi, jachan ndo tsi nyivi ña cuñí jaha tyiñu. Tan jandu iin ndo iñi nyivi tsa ndu uvi xaan iñi. Tan jatyinyee ndo tsi nyivi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihi iñi ndo tsihin nyivi.

15 Jaha ndo cuenda coto javaha ndo tsa ndavaha ñi tsihin nyivi javahá tsa ña vaha tsihin ndo. Nducu ndo cuhva javaha ndo tsa vaha tsihin nyivi yihí tuhun Nyoo tsihin ndo tan tsihin tandihi ca nyivi.

16 Cusi iñi ndo tandihi ñi quivi.

17 Tan ña jandihí ndo tsa tsicán tahvi ndo tsi Nyoo.

18 Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñí maa Nyoo javaha yo tsa cuví yo nyivi tsinú iñi tsi ra Cristo Jesús.

19 Ña ndahva ndo ñuhu Tatyí Ii Nyoo tsa iyó añima ndo.

20 Ña vacu nducu ndo tsa caahán ra cuví ndusu yuhu Nyoo.

21 Nyehe jihna ndo tun tandihí tsa caahán ra tan vaha tsi tumaa tsa taahán tsi nyehe ndo tandihí inga ca tuhun. Tan naquihin ndo tsa vaha.

22 Ña tyihí ndo tsi ndo nu iyó tsa ña vaha.

23 Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsíni tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quivi quitsi Jutu Mañi yo Jesucristo inga tsaha.

24 Ra tsa cana tsi yo, cuví cuita iñi yo tsi ra, tyin maa ra cua javaha tandihí maa tsa caahán yu ihya.

Nu ndihí cahán ra Pablo tan tsahá ra nacumi tsi nyivi

25 Yañi, ndacan tahvi ndo tsa cuenda ndi.

26 Tan cuhva ndo nacumi tsi tandihí nyivi yihí cuenda Nyoo.

27 Tavá tyiñu yu tsi ndo tsihin sivi Jutu Mañi yo na cahvi ndo carta ihya nuu tandihí nyivi tsa yihí cuenda Nyoo.

28 Tan maa Jutu Mañi yo Jesucristo nasoco tsi ndo.

Tan na cuví tsi tacan ñi.

Carta Tsinú Uvi Tsa Jacuhun Ra Pablo Tsi Nyívi Yihí Cuenda Nyoo Ñuu Tesalónica

Nu tyaq ra Pablo, tan ra cutahán tsihin ra, tsa tsinu uvi carta tsa cuenda nyívi yihí tuhun Nyoo ñuu Tesalónica

¹ Yuhu ra Pablo, ra Silvano tan ra Timoteo jaquitsí ndi carta ihya tsi ndo tsa cuví ndo nyívi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu cahān ra Pablo nácaa cua tatsi tuñi Nyoo tsi nyívi iyó cuatyí quívi quítsi ra Cristo

³ Nyooho yañi, cuñí tsi tsa nacuhva ndi tyahvi nyoo tsi Nyoo tsa cuenda ndo tandihi ñi quívi, tyin tacan taahán maa tsi javahá ndi tyin ñihi xaan cuahán tsinú iñi ndo tsi Nyoo tsa iin iin quívi, tan cuñí xaan ndo tsi nyívi yihí tuhun Nyoo tsihin ndo.

⁴ Yacan cuenda sñi xaan cuñí ndi caahán ndi tuhun ndo tsihin nyívi yihí cuenda Nyoo inga ca vehe ñuhu. Tyin nyooho cunyeexaan iñi ndo nyicún ndo tsi Nyoo tan vaha xaan tsinú iñi ndo tsi ra vasu ndi maa nyehé xaan ndo tundoho jahá nyívi.

⁵ Tandihí yacan janahá tyin Nyoo cuíti xaan jacutuñí ra tyin cua catyi ra tyin taahán maa tsi cuhun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

⁶ Tan tsa cuenda maa Nyoo, taahán tsi janyehe ra tundoho tsi nyívi tsa janyehe xaan tundoho tsi ndo.

⁷ Tan nyooho tsa nyehé xaan tundoho jahá nyívi, cua cuhva ra quitatu ndo iin caa ñi tsihin ndi quívi cua quítsi nyico Jutu Mañi yo Jesucristo tsa quee ra andiví tsihin ñuhu tan tsihin ángel tsa iyó tunyee iñi maa ra.

⁸ Tyin tatsi tuñi ra tsi nyívi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo.

⁹ Ñi ican cua janyehe Nyoo tundoho tan ña cua cundihí maa tsa nyehe ñi tundoho, ña cua nyehe ñi tsi Jutu Mañi yo Jesucristo tan ña cua nyehe ñi tsa cahnu cuví ra tsihin tunyee iñi tsa iyó tsi ra

¹⁰ quívi cua quítsi ra. Tyin quívi can nyívi yihí cuenda ra, ñi tsinú iñi tsi ra, cua jacahnu ñi tsi ra. Tan iyo xaan cua cuñi ñi nyehe ñi tsi ra. Tan tyañu nyívi can, cua cuyucu tucu nyooho tyin tsinú iñi ndo tuhun tsa cahān ndi tsihin ndo.

¹¹ Yacan cuenda tsicán tahvi ndi tsi Nyoo tsa cuenda ndo tandihí ñi quívi, na jatyinyee ra tsi ndo. Tacan tan catyi ra tyin taahán tsi tsi ndo tsa cuví ndo nyívi cana maa ra. Tan tsicán tahvi tucu

ndi tsi ra na jatyinyee ra tsi ndo tan cuvi javaha ndo tsa vaha tsa cuñí ndo javaha ndo. Tan na quita vaha tandihi tyiñu ra tsa javahá ndo tsihin tunyee iñi tsahá ra tsi ndo tyin tsinú iñi ndo tsi ra.

¹² Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi iñi tsa tsahá ra tsi yo jahá Nyoo.

2

Ra tsa nduve ley Nyoo iyó
añima

¹ Nyoooho yañi, vityin cuñí yu cahan yu tsihin ndo tsa cuenda quivi quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan ndi tsihin ndo,

² ña numi xaan sama ndo cuhva tsicá iñi ndo. Tan ña nayuhvi ndo tatun quita tuhun jaha tatyí ña vaha tyin tsa tahanan tsi quivi quitsi Jutu Mañi yo; vasu ndi maa nyivi caahán can, a jaquitsí ñi carta tsi ndo tan catyí ñi tyin yuhu jaquitsí carta can tsi ndo. Ña tsinu iñi ndo tandihi yacan.

³ Ndi iin tsaha tan ña cuhva ndo jandavi ñaha nyivi tsi ndo. Tyin tsa ndi cumañi ca tahan tsi quivi quitsi Jutu Mañi yo, cuaha xaan nyivi, xaan cua cuñi ñi nyehe ñi tuhun Nyoo, tan cua quituvi rayi tsa nduve ley Nyoo iyó añima, ra tsa nyaá maa cuhun anyaya.

⁴ Ra ican cuví ra xaan iñi tsi Nyoo. Cua cañi tahan ra tsihin tandihi tsa nyisó sivi

Nyoo; tan cua cañi tahan ra tsihin tandihi tsa jacahnú tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jaha ra tyin Nyoo cuví ra.

⁵ ¿A ña nducuhún iñi ndo tyin nda ndi nyii ca yu tsihin ndo tan cahan yu tuhun ihya tsihin ndo?

⁶ Maa tyin nyoooho tsitó ndo náa tsa tyasí tan ñaha ca quituvi ra. Nda tahan maa tsi quituvi ra tan cua quituvi ra.

⁷ Vityin tsa iyó tatyí tsa ña tsahá tyaá yahvi nyivi tsi Nyoo, maa tyin ndi nyii xeehe nu, tyin iyó iin ra tsa ña tsahá quituvi nu. Maa tyin quivi cua quita ra tan cundihi tsa tyasí ra, tacan tan cua quituvi nu.

⁸ Tacan tan cua quituvi ra tsa nduve ley Nyoo iyó añima, maa tyin Jutu Mañi yo Jesús cua cañi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahnu cuví ra quivi quitsi ra inga tsaha.

⁹ Ra ña vaha can, nu ña vaha cua jaquitsi tsi ra. Tan cua cuhva nu tandihi tsa nyityi nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyivi.

¹⁰ Cua cuatyíñu ra tandihi nuu tsa ña vaha tan tsihin yacan cua jandavi ñaha ra tsi nyivi tsa ña cua cacu. Tyin ñi can ña cuñi ñi naquihin cuenda ñi tuhun Nyoo tsa nditsa tan cacu ñi.

¹¹ Tan yacan cuenda cua cuhva Nyoo ndatu tsa jan-

davi ñaha tatyí ña vaha can tsi ñi. Tan cua tsinu iñi ñi tsa ña nditsa.

¹² Tacan tan cua tatsi tuñi ra tsi tandihi ñi tyin ña cuñi ñi tsinu iñi ñi tuhun nditsa. Tyin taahán ca iñi ñi javahá ñi tsa ña vaha.

Nu cahan ra Pablo tuhun nyivi tsa nacatsi Nyoo tyin cacu ñi

¹³ Maa tyin tandihi quivi cuñi tsi cuhva ndi tyahvi nyoo tsi Nyoo tsa cuenda nyooho yañi. Tyin cuñi xaan Jutu Mañi yo tsi ndo. Tan nacatsi ra tsi ndo nda jihna, [nda ndi cumañi ca tsinu ñuhu ñayivi], tyin tsihin tsa janduvahá Tatyí Ii ra añima ndo tan tsihin tsa tsinú iñi ndo tuhun nditsa cuvi cacu ndo.

¹⁴ Yacan cuenda cana Nyoo tsi ndo quivi tsa cahan ndi tuhun ra tsihin ndo tyin tacan tan ñihi ndo tsa cahnu cuvi Jutu Mañi yo Jesucristo coo tsi ndo.

¹⁵ Yacan cuenda nyooho yañi, jandu iin ndo iñi ndo. Tan ña naa iñi ndo tandihi tsa tsaha cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ña naa iñi ndo tandihi tuhun tsa tyaa ndi nu carta tsa jaquitsi ndi tsi ndo.

¹⁶ Jutu Mañi yo Jesucristo tan Nyoo Jutu yo, juvin ra cuñi tsi yo; tan tsahá ra tunyee iñi tsi yo tandihi tyembu, tan tsahá ra naha tsa cuita iñi yo coo yo tsihin ra. Tandihi yacan tsahá ra tsi yo quivi tsahá ra tsa vaha tsa iyó tsi ra tsi yo.

¹⁷ Na cuhva ra tsa sii cuñi añima ndo. Tan jandu iin ra iñi ndo, tacan tan cua cahan ndo tan javaha ndo tandihi tsa vaha.

3

Nu tsicán ra Pablo na ndacan tahvi nyivi tsi Nyoo tsa cuenda ra naha

¹ Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsa tuhun Jutu Mañi yo tandihi ñi ityi. Tan na tyaa yahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi.

² Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihi ñi tan tsinú iñi ñi tsi Jutu Mañi yo.

³ Maa tyin Jutu Mañi yo javahá ra tsa catyí ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tñn nu ña vaha tsi ndo.

⁴ Tan nditá xaan iñi ndi tsi Jutu Mañi yo tyin tsitó ndi tyin jatyinyee ra tsi ndo tan javahá ndo tsa catyi ndi tyin javaha ndo. Tan tsitó tucu ndi tyin ña cua jandihí ndo tsa javaha ndo tacan.

⁵ Tan na jatyinyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa Nyoo tsi yo tsihin ñi, tan cunyee ca iñi ndo nyehé ndo tundoho, tumaa tsa cunyeē iñi maa ra Cristo nyehē ra tundoho.

Taahán tsi tsa jaha tyiñu yo

6 Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunya naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa jacuahá ndi tsi ndo.

7 Tyin tsitó maa ndo nácaa taahán tsi coo ndo tumaa tsi-coo maa ndi tsa tsiyucu ndi tsihin ndo. Tyin nyuhu ña tsica nuu utsan ndi tyin jaha tyiñu ndi.

8 Tan tandihi tsa tsatsi ndi, maa ñi maa tyahvi ndi tsi ndo. Tyin jaha tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo.

9 Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jaha tyiñu ndi tyin cuñi ndi janaha ndi nácaa taahán tsi coo ndo.

10 Tyin quivi tsiyucu ndi tsihin ndo, cahán ndi tsihin ndo tyin nyivi ña cuñi jaha tyiñu, na ña catsi ñi.

11 Caahán ndi yacan tyin ñihí tuhun ndi tyin yihí ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo.

12 Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jaha tyiñu ndo, tan coo tsa catsi ndo.

13 Nyooho yañi, ña cundihi iñi ndo javaha ndo tsa vaha.

14 Tatun iyó iin ra ña cuñi tyaa yahvi tuhun caahán ndi nu carta ihya, jaha ndo cuenda ndáa ra cuví ra, tan ña cunyanáa ndo tsi ra na

nducahan nuu ra.

15 Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

Nu ndihi cahán ra Pablo

16 Jutu Mañi yo ra iyó tsa vaha tsi, juvin ñi maa ra cuhva tsa vaha coo aña ndo tandihi ñi quivi tan tandihi ñi tsaha vasu ndi maa nyehé ndo tundoho. Tan Nyoo ndoo tsihin tandihi ndo.

17 Yuhu ra Pablo tyaá yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihi carta yu. Tan tyehen tyaá yu.

18 Tan na nasoco Jutu Mañi yo Jesucristo tsi tandihi ndo.

Tan na cuvi tsi tacan ñi.

Carta Tsa Jihna Ñi Tsa Jacuhun Ra Pablo Tsi Ra Timoteo

Nu tyaq ra Pablo iin carta tsa cuenda ra Timoteo

¹ Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo.

² Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinū iñi un tuhun ra Cristo tsa jacoto yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

Nu tsaha cuenda ra Pablo tyin jaha cuenda yo tsi yo tan ña cunyicun yo tsa ña nditsa

³ Quivi quitā yu ñuu Éfeso tan vatsi yu Macedonia nu nyii yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyi yu tsihin un tyin catyi un tsihin ñi na ña jacuaha ñi tsa ña nditsa. Tan vityin juvin ñi tacan caahán nyico yu tsihin un.

⁴ Cahan tsihin ñi na ña tyaá iñi ñi cuendu, na ña tyaá iñi ñi tuhun nyivi tsicoo tahan tsanaha. Tyin tun, maa ñi yacan tyaá iñi ñi maa cua cahan

yuhu tahan ñi ñi. Tan ña cua jatyinyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuvi quita vaha tsi.

⁵ Tatun javahá yo tsa tava tyiñu Nyoo tsi yo tyin javaha yo, cua cuñi tahan yo tsi yo, tsihin tsa ñi iñi añima yo tsa janduvahā Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinú iñi yo tsi Nyoo.

⁶ Maa tyin yihí nyivi nacoq ihñi ñi yacan, tan tsinaq ñi jahá tsa caahán yuhu tahan ñi.

⁷ Cuñi ñi cuvi ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan ñi xaan iñi ñi jacuahá ñi tuhun can.

⁸ Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi.

⁹ Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaá soho tsa caahán Nyoo, nyivi iyó cuatyí, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sibi ñi, tan tsa cuenda tandihí nyivi tsahñi nyivi.

¹⁰ Iyó ley can tsa cuenda nyivi iyó tsihin rayi a ñaha tan ñavin yi ña a ñasihi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya, tan iyó tsi tsa cuenda

nyivi tsa catyí: “Naha Nyoo”, tan ña nditsa tsa caahán ñi. Tan juvin ñi iyó tucu ley can tsa cuenda nyivi caahán ndavaha ñi siqui tuhun Nyoo tsa cutuhva yo.

¹¹ Tuhun Nyoo ihya, iin ñi cuví tsi tsihin tuhun cahnu xaan tsa jacacú ra Jesús tsi yo. Nyoo tava tyiñu ra tsi yu tsa jacuaha yu tuhun ihya tsi nyivi. Tan intuhun ñi maa ra taahán tsi jacahnú yo.

Tsahá ra Pablo tyahvi nyoo tsi Nyoo tyin nyehé ndaahvi ra tsi ra

¹² Tsahá xaan yu tyahvi nyoo tsi Jutu Mañi yo Jesucristo tyin tsaha ra tunyee iñi tsi yu, tan nyehe ra tsi yu tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra.

¹³ Tacan javaha ra tsihin yu, vasu ndi maa nu quitsi tsi quivi, yuhu cahān nyaa xaan yu tsi ra. Tan tsinyaā ndaha yu tsi nyivi yihí cuenda ra, tan tsacu nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yu náa javahá yu.

¹⁴ Tacan tsaha Jutu Mañi yo Jesucristo tsa vaha ra tsi yu. Tan tsinú xaan iñi yu tsi ra jahā ra. Tan cuñi xaan yo tsi nyivi tyin iin ñi cuví yo tsihin ra Cristo Jesús.

¹⁵ Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyehen: Ra Cristo Jesús quitsi ra nu ñuhu ñayivi

ihya tyin jacacú ra tsi nyivi iyó cuatyí. Tan yuhu cuví iin ra caquiñi ca tan ñavin ca tandihi nyivi.

¹⁶ Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuanda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa.

¹⁷ Yacan cuenda na jacahnu yo tsi ra yihí ndaha tsi yo tandihi ñi quivi, ra nduve tuhun tsihí iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandihi. Na cuví tsi tacan.

¹⁸ Yooho Timoteo sehe yu, tava tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsaha cuenda ra yañi yo naha ra tsi un quivi cahān ra naha tuhun un jahā Nyoo.

¹⁹ Ña jandihí un tsa tsinú iñi un tsi Nyoo tan ña jandihí un tsa javahá un tumaa catyí maa Nyoo tyin javaha un, nacoto vaha tsitsi añima un tyin vaha cuahán un tsihin Nyoo. Tyin juhva ra naha nacoo ra naha tandihi yacan, yacan cuenda ña tsinú ca iñi ra naha tumaa taahán maa tsi.

²⁰ Tacan javaha ra Hime-neo tan ra Alejandro. Yacan cuenda tsaha cuenda yu tsi ra naha tsi nu ña vaha, tyin

tacan tan coto ra naha tyin ña vaha cahan yo ndavaha ñi siqui tuhun Nyoo.

2

Nu jacuaha ra Pablo nácaa taahán tsi ndacan tahvi yo tsi Nyoo

¹ Tsahá cuenda yu tsi tandihi nyivi yihí cuenda Nyoo tyin ñiñi xaan cuñí tsi ndacan tahvi yo tsi Nyoo tsa cuenda tandihi nyivi. Tan nacuhva yo tyahvi nyoo tsi Nyoo tsa cuenda ñi.

² Na ndacan tahvi yo cuenda ra ndacá ñaha naha ra tan cuenda tandihi ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayivi vaha nuu Nyoo tan nuu nyivi. Tacan tan cua jaha ñi tsa ñayivi tsi yo.

³ Tyin tacan taahán iñi Nyoo, ra tsa jacacú tsi yo.

⁴ Tyin cuñí ra tsa cacu tandihi nyivi. Tan cuñí ra tsa coto ñi tuhun nditsa.

⁵ Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ícan cuví ra Cristo Jesús. Tan cuví ra iin nyivi tumaa maa yo.

⁶ Juvín ra Jesucristo tsihi tsa cuenda tandihi nyivi. Tyahvi ra tsa cuenda cuatyí tandihi yo tyin tacan tan cuví cacu yo. Tan cundaq can quivi tyaa maa Nyoo cuhva.

⁷ Tsa cuenda yacan, tava tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuaha yu tsi nyivi tsa

ñavin nyivi Israel cuví nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

⁸ Yacan cuenda cuñí yu tsa ndacan tahvi rayi naha ra tsi Nyoo tandihi ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha caca iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo.

⁹ Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyivi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan.

¹⁰ Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyivi nacuhva cuenda tsi ñi tsi Nyoo.

¹¹ Tan cunyecu taxin ñi tyaa soho ñi tuhun Nyoo. Tan jaha ñi tsa ñayivi tsi ra tsahá cuenda tuhun Nyoo tsi ñi.

¹² Tyin ña tsahá yu jacuaha ñiñaha nuu nyivi cuaha. Ndi ña tsahá yu tsa cundaca ñaha ñi tsi rayi. Taxin ñi na cunyecu ñi.

¹³ Tyin jihna ca ra Adán javaha Nyoo, yaha can tan javaha ra tsi ña Eva.

¹⁴ Tan ñavin tsi maa ra Adán jandaví ñaha nu ña vaha, tyin tsi ña Eva ñasihi ra jandaví ñaha nu tan tsicoo cuatyí ña.

¹⁵ Maa tyin ñiñaha nduve tsa cua tahan ñi tsa cua cacu sehe ñi, tatun jacuahnú vaha ñi tsi sehe ñi, tan tsinú vaha iñi ñi tsi Nyoo tan cuñí ñi tsi ra tan tsi nyívi, tan catsi coo ñi nuu Nyoo tan nuu nyívi.

3

Nacaa taahán tsi coo ra cuví ityi nuu tsihin nyívi vehe ñuhu

¹ Tuhun ihya tuhun nditsa cuví tsi: Tatun iin ndo cuñí ndo cuví ndo ityi nuu tsihin nyívi vehe ñuhu, vaha xaan tyiñu cuñí ndo javaha ndo.

² Maa tyin ñiñi cuñí tsi tyin ra cuví ityi nuu tsihin nyívi vehe ñuhu cuñí tsi cuví ra iin ra catsi iyó tyin tacan tan ña cuví tyaa nyívi cuatyí tsata ra. Tan cuñí tsi tsa coo intuhun ñi ñasihi ra. Tan cuñí tsi tsa cuví ra iin ra tsitó vaha cuhva coo, iin ra vaha nuu nyívi. Tan cuñí tsi vaha cahan ra tsihin nyívi tsaá yuvehe ra, tan cuví ra iin ra tsitó vaha jacuaha tsi nyívi.

³ Iin ra cuví ityi nuu tsihin nyívi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi. Cuñí tsi tsa cuví ra iin ra vaha iñi, iin ra ña tuhvá cañi tahan. Tan cuví ra iin ra ña nyiyo iñi xuhun.

⁴ Cuñí tsi tsa cuví ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaa yahvi

vaha sehe ra tsi ra, tan jahá ñi tsa ñayívi tsi ra.

⁵ Tyin tatun ña tsitó ra cundaca ñaha ra nyívi vehe ra, ¿nácaa cua quíhi ndaha ra nyívi tsicá vehe ñuhu Nyoo?

⁶ Tan iin ra ndi tsa xaan tsihin tuhun Nyoo ña taahán tsi cuví ra ityi nuu tsihin nyívi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnu xaan jahá nu tsi nu.

⁷ Tan cuñí tucu tsi tsa cuví ra iin nyívi vaha nuu nyívi tsa ña yihí tuhun Nyoo, tyin tacan tan ña ñihi ñi náa cuatyí tyaa ñi tsata ra tan ña cuví jaha canaa nu ña vaha tsi ra.

Nacaa taahán tsi coo ra jahá tyiñu vehe ñuhu

⁸ Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuví ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi.

⁹ Cuñí tsi tsa cutuñi vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo.

¹⁰ Tan cuñí tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu.

¹¹ Tan tacan tucu ñiñaha, cuñí tsi cuví ñi nyívi vaha nuu nyívi. Ña cahan ñi cuendu. Catsi coo ñi. Tan tyaa nuu vaha ñi tandihi tyiñu.

12 Ra jahá tyiñu vehe ñuhu na coo intuhun ñi ñasihi ra. Tan cuñi tsi tsa coto vaha ra cundaca ñaha ra tsi sehe ra tan nyivi vehe ra.

13 Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa niñi ra caahán ra tuhun Nyoo tyin tsinú vaha iñi ra tsi ra Cristo Jesús.

Nu caahán ra Pablo siqui tuhun xeehe cuhva tsinú iñi yo

14-15 Vasiqui numi ñi cua quitsi nyehe yu nu nyii un. Maa tyin tun ña cuvi quitsi yu tsa numi ñi, yoñi jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuví yo nyivi cuenda Nyoo. Tyin maa yo cuví vehe ñuhu Nyoo nyito. Tan cuñi tsi tsa jañihi ca yo janaha yo tuhun Nyoo tsi nyivi. Tan naquihin vaha yo tyin tuhun nditsa cuví tsi.

16 Tsa nditsa tyin yaha xaan cahnu cuví tuhun xeehe tsa jaquituví Nyoo, tyin coo yo tumaa iyó maa ra:

Nyoo nanduví ra rayii tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.

Tan catyí Tatyí Ii Nyoo tyin ra nduve cuatyí cuví ra.

Tan nyehe ra cuví ángel naha ra tsi ra.

Taniñi cahnu nu ñuhu ñayivi caahán nyivi tuhun ra.

Tan tsinú iñi nyivi tsi ra taniñi cahnu nu ñuhu ñayivi.

Tan cuanuhú ra nda gloria.

4

Nu catyí ra Pablo tyin nu cuahán ca tsi quivi yihí nyivi ña cua tsinu ca iñi ñi tsi ra Cristo

1 Maa tyin caahán catsi Tatyí Ii tan catyí ra tyin nu cua ndihi tyembu yihí nyivi ña cua tsinu ca iñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandaví ñaha. Tan cua cunyicun ñi ndusu yuhu nu ña vaha.

2 Cua tyaa soho ñi tuhun caahán nyivi jandaví ñaha. Tan ñi can ña tuví iñi ñi náa javahá ñi tyin tsa ndundava xaan añima ñi. Tumaa tsa cayu añima ñi jahá iin caa ihñi tan ndundava tsi.

3 Cua casi ñi nu tindaha nyivi. Tan cua catyí ñi tyin ña vaha catsi yo juhva nuu nyayu. Vasu tsitó yo tyin tandihí nuu tsa tsatsí yo, Nyoo javahá itsi. Tan tandihí yoo tsa tsinú iñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra.

4 Tyin tandihí tsa javahá Nyoo tan vaha tsi. Tan ña taahán tsi catyí yo tyin ña vaha tsi. Tan cuví catsi yo tandihí tsi tun tsahá yo tyahvi nyoo tsi Nyoo tsa cuenda tsi.

5 Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

Nacaa iyó ra vaha jahá tyiñu tyiñu ra Jesucristo

6 Tatun jacuahá un tandihí tsa caahán yu ihya tsi tandihí nyivi yihí tuhun Nyoo tsihin yo, cua cuvi un iin musu vaha ra Cristo Jesús. Tan tuhun

tsa tsinú iñi yo, tsihin tandihi tuhun ra Cristo tsa nyicún yo, cua jatyinyee tsi tsi un tan cuahnu ca un tsihin tuhun Nyoo.

⁷ Maa tyin ña tyaa yahvi un tsa cuví xembulu, tuhun sana, tan tuhun tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñi maa Nyoo.

⁸ Tsa jañiñi yo coo tunyee iñi cuñu ñuhu yo, juhva ñi jatyinyeé tsi tsi yo. Maa tyin tsa jañiñi yo javahá yo tandihi cuhva cuñi Nyoo, jatyinyeé tsi tsi yo iin cahnu ñi, tyin jatyinyeé tsi tsi yo nu ñuhu ñayivi ihya. Tan jatyinyeé tucu tsi tsi yo tsa coo vaha yo nu cua tsaa yo nda gloria.

⁹ Tan nditsa, tyin tsa nditsa cuví tsi tan tandihi yo taahán tsi tsa tsinú iñi yo itsi.

¹⁰ Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihi nyivi, tan jihna ca yoo tsa tsinú iñi yo tsi ra jacacú ra.

¹¹ Tuhun ihya jacuaha un tsi nyivi yihí cuenda Nyoo, tan jañiñi un tsi ñi na cutuhva ñi itsi.

¹² Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tyuvaa xaan un. Jacuaha tsi ñi tsihin cuhva iyó un, tan tsihin cuhva caahán un. Jacuaha tsi ñi tsihin tsa cuñi un tsi Nyoo tan tsi nyivi, tsi-

hin cuhva tsicá iñi un, tsihin cuhva tsinú iñi un, tan tsihin cuhva javahá un maa ñi maa tsa vaha.

¹³ Tan tsitsi tsa ndi cumañi ca tsaa yu nu nyii un, cahvi tuhun Nyoo tsihin ñi yihí tuhun Nyoo. Cuhva cuenda ñihi tsi ñi, tan jacuaha tsi ñi nácaa cunyicun vaha ñi tsi Nyoo.

¹⁴ Jaha cuenda vaha tunyee iñi tsa tsahá Nyoo tsi un quivi tyiso ndaha ra nyisó tyiñu vehe ñuhu naha ra jiñi un tan cahan ra naha tsa tsahá cuenda Nyoo tsi ra naha.

¹⁵ Tyaa vaha iñi tuhun can tan javaha cuhva catyí tsi. Tacan tan cua nyehe tandihi nyivi nácaa cuahán un ityi nuu ca tsihin Nyoo.

¹⁶ Jaha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatun javahá un tacan, cua cacu un, tan cua cacu tucu nyivi tyaa soho tuhun jacuahá un.

5

Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo

¹ Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha.

² Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí,

cuhva cuenda tsi ñi tumaa tsa cuhva un cuví tsi ñi. Javaha tandihí tsa caahán yu ihya tsihin tsa vaha tsicá ñi un.

³ Jatyinyee tsi ñiñaha ndaahvi tsa tsihi yíi tatun nduve nyívi ñi cuví jatyinyee tsi ñi.

⁴ Maa tyin tatun iyó iin ñaha tsihi yíi tan iyó sehe ña, a sehe yañi ña, cuñí tsi cutuhva jihna maa ñi can jatyinyee ñi tsi ña. Na nducuhun ñi ñi nácaa jahá cuenda sihi ñi tsi ñi tsa ndi nyihi ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán ñi maa Nyoo.

⁵ Tan ñaha tsa tsihi yíi tan ndoo ndaahvi intuhun ña maa ña, iin ña Nyoo tyaá ñi ña tan tsicán tahvi ña tsi ra tsinu cahñi tan tsacuaa.

⁶ Maa tyin ñaha tsihi yíi tsa cusíi ñi tsihin tsa iyó nu ñuhu ñayívi ihya, vasu nyito ña maa tyin tsihi ña cuenda Nyoo.

⁷ Jacoto tucu tuhun ihya tsi ñi cuhva yo tyin tacan tan ña ñihi nyívi cuhva cahan ñi ndavaha ñi tsi ñi.

⁸ Maa tyin tatun yihí yo iyó nyívi yo tan ña tsicá ñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyívi vehe yo, tumaa tsa ña tsinú ñi yo tsi Nyoo cuví can. Tan cahnu ca cuatyí yo iyó tan ñavin ca nyívi tsa ña tsinú ñi tsi Nyoo.

⁹ Nu tutu tsa nyaá sívi ñi tsihi yíi, na cunyaa sívi ñi tsahnu tsa iyó ndaahvi, tatun tsa yahá uñi xico cuiya ñi, tan intuhun ñi yíi ñi tsicoo.

¹⁰ Tan tatun tsitó vaha nyívi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsahá ñi tsa catsi nyívi tsaá yuvehe ñi, tan jahá tyiñu ñi tyiñu nyívi yihí cuenda Nyoo tsihin tsa ñi ñi añima ñi, tan jatyinyee ñi tsi nyívi nyehé tundoho. Tun tacan javahá ñi tandihí tsa vaha, cuví cunyaa sívi ñi.

¹¹ Maa tyin ña tyaa ndo sívi ñiñaha tsa ñaha ca quita uñi xico cuiya, coto coo quívi tan cuñi ñi coo nyico yíi ñi tan cuñi ñi tindaha ñi inga tsaha tan jandihí ñi tsa jahá tyiñu ñi tyiñu ra Cristo.

¹² Tan coo cuatyí ñi tyin ña javahá ñi cuhva cahan ñi tsa cua javaha ñi.

¹³ Tan inga tucu tyiñu tatun tsicá nuu jutsan ñi maa ñi tan iin tan iin vehe nyívi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi.

¹⁴ Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nyaa nyívi xaan ñi tsi yo tsi yo.

¹⁵ Caahán yu tandihí tuhun ihya tsihin un tyin yihí ñi tsa nacoo ñi tsi Nyoo tan nyicún ñi tsi nu ña vaha.

¹⁶ Tatun ñi yihí cuenda Nyoo tan iyó iin nyívi ñi tsa tsihi yíi, cuñí tsi tsa jatyinyee maa ñi tsi ñi can, tan ña tyiso ñi itsi síqui vehe ñuhu. Tyin tacan tan cuví jatyinyee vehe

ñuhu tsi inga ñi tsihi yí tsa nduve ca maa nyivi iyó.

17 Ra tsahnu ra nyisó tyiñu vehe ñuhu, cuñi tsi tsa jaha xaan nyivi vehe ñuhu tsa ñayivi tsi ra, tan tsa jihna ñi na jaha ñi tsa ñayivi tsi ra caahán tuhun Nyoo tan jacuahá ra naha tsi ñi.

18 Tyin tuhun Nyoo catyí tsi tyehen: “Ña tyihi un yoho yuhu indiqui nu jahá tyiñu ti, tacan tan cuvi catsi ti luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

19 Tatan tyaá nyivi cuatyí tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi.

20 Maa tyin nyivi tsa jañihí ca javahá tsa ña vaha, cuñi tsi tsa cahan ndo tsihin ñi nuu tandihi nyivi yucú vehe ñuhu. Tacan tan nayuhvi tandihi ca ñi tan ña javaha ñi tsa ña vaha.

21 Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsi ra. Tan caahán yu tsihin un tyaa yahvi tsa caahán yu ihya, inducu ñi cuñi un nyehe un tsi tandihi nyivi.

22 Ña numi xaan cuhva un tyiñu tsi iin ra cuvi ra ityi nuu tsihin nyivi vehe ñuhu. Coto cahun cuatyí javaha ra siqui un. Jaha cuenda vaha tsi un tsihin tandihi tsa javahá un tan ña cuhva un ndatu tsi nu ña vaha tsa nducu cuhva nu tsi un.

23 Tan tsa cuenda tsa uhvi tsitsi un, ña coho ca un maa ñi maa ndutya, coho luxu vinu na nduvaha tsitsi un.

24 Yihí nyivi quituvi cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi.

25 Tan tacan tucu tatun javahá yo tsa vaha, ña cuxeehe tsi. Vasu ña quituvi tsi tsa numi ñi, maa tyin ña cuví ndoo xeehe tsi.

6

1 Nyivi yihí cuenda Nyoo tsa cuví musu, cuñi tsi tyaa yahvi vaha ñi tsi tsitoho ñi. Tyin tacan tan ña ñihi nyivi cuhva cahan ñi ndavaha ñi siqui Nyoo, tan siqui tuhun ra tsa jacuahá yo.

2 Tan tatan iin musu tan yihí tsitoho ra cuenda Nyoo, taahán tsi tsa jaha ra tsa ñayivi tsi ra ican tyin yañi ra cuenda Nyoo cuví tsi ra. Cuñi tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñi ra tsi ra ican. Jacuaha yacan tsi nyivi yihí cuenda Nyoo tan cuhva cuenda tsi ñi na javaha ñi cuhva catyí tsi.

Cuhva iyó yo tsihin Nyoo tan na cusii iñi yo tsihin tsa tsaha ra tsi yo

3 Tatan iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo,

4 cuví ra iin ra nduyaá ñi maa, iin ra ña tsitó. Tan tsa caahán yuhu ra siqui iin tsa ñavin ñi tsa cahan yo tuhun, cuví can tumaa cuehe tsi ra.

Tan tsa cuenda yacan cacú tsihi tan nyiyo ñi nyivi tsa iyó tsi inga ñi, tan tsa caahán nyaa tahan ñi tsi ñi, tacan tan ndasi cuñi nyivi nyehe tahan ñi tsi ñi.

⁵ Tan maa ñi cañi tahan nyivi jahá can tyin quiñi tsicá ñi ñi, tyin ña tsitó ñi tsa vaha. Cuñi maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can.

⁶ Nditsa tyin tsa javahá yo kuhva catyi Nyoo tan sii cuñi yo tsihin tsa tsaha ra tsi yo, cuví tsi tumaa iin tsa cuca iyó tsi yo.

⁷ Tyin nduve náa tsaá tsihin yo quivi cacú yo nu ñuhu ñayivi ihya. Tan nduve náa cahun tsihin yo quivi cúu yo.

⁸ Maa tyin tatun iyó tsa catsi yo tan iyó jahma cunditsí yo, na cusii ñi yo, tan na ndoo yo vaha tsihin yacan.

⁹ Maa tyin nyivi cuñi nducuca, nducú kuhva nu ña vaha tsi ñi. Tan nacava ñi tsitsi xayí nu. Jandusohó nu tsi ñi tsihin tsa cuñi ñi coo çuaha tsa coo tsi ñi. Tan jativí can tsi ñi. Tan nu ndihi tuhun cua tiví ndihi ñi tan cua cahun ñi anyaya.

¹⁰ Tyin tsa cuñi xaan yo xuhun, yacan cuví yoho tandihi ca nuu tsa ña vaha. Tan yihí nyivi tsa cuenda tsa cuñi xaan ñi xuhun, tan jandihí ñi tsa tsinú ñi ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

Nacaa cañi tahan yo tsihin nu ña vaha tsihin tsa tsinú ñi

yo tsi Nyoo

¹¹ Maa tyin yooho cuví un iin rayii cuenda Nyoo. Quita tsiyo nuu tandihi tsa caquiñi. Coo cuiti vaha nuu Nyoo. Çanyicun tsi Nyoo tsihin tsa ñi ñi un. Cuñi tsi nyivi. Çunyeey ñi tsihin tsa vita ñi un nyehe un tandihi tsa cua tahan un. Tan ña cahnu jaha un tsi un.

¹² Cañi tahan vaha tsihin nu ña vaha tsihin tsa tsinú ñi un tsi Nyoo. Ña jaña ndaha un ñayivi nyito tsa ña cua naa maa tsa tsaha Nyoo tsi yo. Tyin tsa cuenda can, cana Nyoo tsi un, tan tacan catyi un quivi cahan catsi un nuu tandihi ra cuví tsandaa naha ra, catyi un tyin tsinú ñi un tsi Nyoo.

¹³ Tan vityin nuu Nyoo, ra tsa tsahá ñayivi coo tandihi tsa iyó, tan nuu ra Cristo Jesús ra tsa tsaha cuenda vaha tuhun nditsa nuu ra Poncio Pilato, caahán yu tsihin un,

¹⁴ Javaha tandihi tsa catyi yu tsihin un tyin javaha un tyin tacan tan ña cuví cahan nyaa nyivi tsi un nda tahan tsi quivi quitsi Jutu Mañi yo Jesucristo.

¹⁵ Nda tsa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan intuhun ñi maa ra cuví Nyoo, ra iyó xaan tunyee ñi. Rey cahnu cuví ra nuu tandihi ca ra cuví rey. Tan ra ndacá ñaha cahnu cuví ra nuu tandihi ca ra ndacá ñaha.

¹⁶ Intuhun ñi maa ra cuví ra tsa nduve tuhun tsiihí iyó tsi. Tan iyó ra nu nditsin nu ña

cuví cutuhva nyívi. Tan ndi intuhun nyívi ñaha ca nyehe tsi ra. Tan ndi ña cuví nyehe ñi tsi ra. Na jacahnu yo tsi maa ra. Tan na cundaca ñaha ra tsi yo tandihí tyembu. Tan na ña cundihí maa tsa ndacá ñaha ra tsi yo. Na cuví tsi tacan.

¹⁷ Tan cahan tsihin nyívi tsa iyó tsa cuca ñuu ñayívi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihí can. Na cuita iñi ñi tsi Nyoo nyito, tyin maa ra cuví ra tsahá tandihí tsi yo. Tan cuví cusii iñi yo tsihin tsi.

¹⁸ Cahan tsihin ñi cuca na javaha ñi tsa vaha tan nducua ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa ñi iñi ñi tan ñavin tsihin tsa cuihya cuñi ñi.

¹⁹ Tacan tan coo tsa cuca tsa ña cuanaa maa tsi ñi, tan jatyinyee tsi tsi ñi nu cuahán quívi ityi nuu. Tan coo ñi ñayívi nyito tsa ña cua naa máa.

Nu ndihí tsahá cuenda ra Pablo tsi ra Timoteo

²⁰ Yooho Timoteo, jaha cuenda vaha tyiñu tsa tsahá Nyoo tsi un. Ña tyaa soho un tuhun nu ñuhu ñayívi ihya, tuhun nduve yahvi nyaá. Ña tyaa yahvi un tuhun tsa catyí nyívi tyin tsitó xaan ñi tan ña nditsa.

²¹ Tyin tsa cuenda yacan, yihí nyívi tsa nacao ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsahá ra tsi un.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Ra Timoteo

Nu tyaq ra Pablo inga carta tsa cuenda ra Timoteo

¹ Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo. Tyin cuñí ra tsa jacoto yu tsi nyivi tyin tsahá ra ñayivi nyito coo tandihí ñi tsa iin ñi cuví tsihin ra Cristo Jesús.

² Jaquitsí yu carta ihya tsi yooho Timoteo. Tan cuñí xaan yu tsi un tyin tumaa cuví sehe yu cuví tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

Nu caahán ra Pablo tsihin ra Timoteo na catyi tuhun ra tsihin nyivi tyin cuenda ra Cristo yihí ra

³ Tandihí ñi quivi nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsi tsaahnu yu tyiñu Nyoo tsanaha. Tan vaha cuñí añima yu tyin vaha iyó yu nuu ra.

⁴ Nducuhún xaan iñi yu nácaa tsacu un quivi quita yu nu nyii un. Tan vityin cuñí xaan yu nyehe yu tsi un inga tsaha tan cusii iñi yu.

⁵ Tan nducuhún xaan iñi yu tyin tsinú ñi vaha iñi un tsi Nyoo. Tumaa tsa tsinu iñi ña Loida tsitan un tan ña Eunice sihi un. Ñi ican vaha xaan tsinu iñi ñi tsi Nyoo, tan tsitó yu tyin tacan tsinú iñi maa un tsi Nyoo vityin.

⁶ Yacan cuenda tsahá cuenda yu tsi un jandu iin ca iñi un tan cuatyíñu ndatu tsa tsahá Nyoo tsi un tsa cahan un tuhun ra. Yacan cuví ndatu tsa tsahá ra tsi un quivi tyiso ndaha yu jiñi un.

⁷ Nyoo ña tsahá ra tatyí ña vaha tsa jayuhvi tsi yo. Tsahá ra Tatyí Ii ra tsi yo tyin coo tunyee iñi cahnu tsi yo, tan cuñí tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yo tsi yo.

⁸ Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyii yu vehe caa tsa cuenda ra. Cuatyíñu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsi síqui yo tsa cuenda tuhun Nyoo.

⁹ Tyin juven ra jacacu tsi yo. Tan cana ra tsi yo tyin coo yo ñayivi ii. Ñavin tsa cuenda tsa vaha tsa javahá yo tan cana ra tsi yo. Cana ra tsi yo tyin tacan tyaq maa ra cuhva javaha ra nda ndi cumañi ca tsinu ñuhu ñayivi. Tyin nda quivi can tyaq ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús.

¹⁰ Tan vityin tsitó yo tsa vaha can tyin tsa quitsi ra Je-

sucristo jacacu ra tsi yo. Tan quihin nyaa ra tandihi tunyee ini tuhun tsihi. Cahān ra tuhun vaha, tan tava nditsin ra tuhun tsa coo yo ñayivi nyito tsa ña cua naa maa.

¹¹ Nyoo tava tyiñu ra tsi yu tsa cahan yu tuhun can tsihin nyivi. Tava tyiñu ra tsi yu tsa caca yu tyiñu ra, tan jacuaha yu tuhun can tsi nyivi tsa ñavin nyivi Israel cuvi.

¹² Yacan cuenda nyehé yu tandihi tundoho. Maa tyin ña nducahān nuu yu tsa tacan nyehé yu tundoho, tyin tsitó yu yoo tsinú ini yu. Tyin nacuhva cuenda yu tsi yu tsi ra, tan tsitó vaha yu tyin cuvi jaha cuenda ra tsi yu nda cuanda quivi quitsi ra inga tsa.

¹³ Cuanyicun tuhun vaha tsa tsaha cuenda yu tsi un. Tan coo tsihin tsa tsinú vaha ini un tsi Nyoo. Cuñi tsi ra, tan tsi nyivi. Tyin tacan taahān tsi coo yoo tsa iyó iin caa ñi tsihin ra Cristo Jesús.

¹⁴ Tan na jatyinyee maa Tatyi li tsa iyó añima yo tsi un tan jaha cuenda vaha un tsa vaha tsa tsaha Nyoo tsi un.

¹⁵ Tsa tsitó un tyin nacoq ihñi ra Figelo tan ra Hermogenes tsi yu tan tandihi ca maa ra iyó ityi Asia.

¹⁶ Maa tyin ra Onesíforo na cundaahvi ini Jutu Mañi yo tsi ra tan tsi nyivi ra tyin cuaha xaan tsaha quitsi ra jatyinyee ra tsi yu. Tan ña cahān nuu ra tsa tyehen nyii yu vehe caa.

¹⁷ Tan quivi tsinyii ra ñuu Roma ihya, ña jandihī maa

ra tsa nanducú ra tsi yu nda cuanda tsa nañihī ra tsi yu.

¹⁸ Maa Jutu Mañi yo na cundaahvi ini ra nyehe ra tsi ra quivi cua jacutuñi ra tsi yo. Tsitó maa un nácaa jatyinyee xaan ra Onesíforo tsi yo quivi tsiyucu yo ñuu Éfeso.

2

In andaru vaha ra Jesucristo

¹ Tan yoocho sehe yu, janyee ini tsihin tunyee ini Nyoo tsa tsahá ra Cristo Jesús tsi un tsa cuenda tsa iin ñi cuvi yo tsihin ra.

² Tuhun tsa tsiñi un cahan yu nuu nyivi cuaha, jacuaha yacan tsi nyivi tsa ñi ini tsinú ini tsi Nyoo, ñi tsa cuvi jacuaha tsi inga nyivi.

³ Tan cunyee ini nyehe tundoho tumaa iin andaru vaha ra Jesucristo.

⁴ Ndi intuhun ra cuvi andaru tan ña cuvi jatyañu xaan ra tsi ra tsihin inga ca tyiñu. Tyin cuñi tsi tsa javaha ra maa ñi maa tsa caahān ra cuvi ityi nuu tsihin ra.

⁵ Tan tacan tucu ra jasiquí tsihin balón, ña cuvi jaha canaa ra tatun ña cunyee ini ra jasiquí ra tumaa taahān maa tsi.

⁶ Iin ra jahá tyiñu tsitsi cuhu, taahān tsi tsa jaha tyiñu jihna ra, tacan tan cuvi catsi jihna ca maa ra tsa quitá nu jahá tyiñu ra.

⁷ Tyihi tuñi vaha ini tsa caahān yu tsihin un ihya, tan maa Jutu Mañi yo cua cuhva tsa cutuñi ini un tandihi tsi.

8 Nducuhun iñi tsi ra Jesucristo, ra tsa nandoto tsa yaha nyehe ra tundoho tan tsihi ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsaha cuenda ra tsi yu tyin cahan yu tsihin nyivi.

9 Tan tsa cuenda tuhun can cunyeé iñi yu nyehé yu tandihi tundoho nda cuanda nuuhñi yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñi tsi.

10 Yacan cuenda cunyeé iñi yu nyehé yu tandihi tundoho tsa cuenda tsa vaha tsi tandihi ca nyivi tsa nacatsi maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihi yo nu sii caá tsa ña cua ndihi maa coo yo.

11 Tuhun ihya tuhun nditsa cuví tsi tan cua cundaa tsi: Tatun tsihi yo cuenda cuñu ñuhu yo, coo nyito tucu yo tsihin ra.

12 Tatun nyehé yo tundoho tsa cuenda ra, cua cundaca ñaha ndihi yo tsihin ra.

Tatun catyí yo tyin ñavin cuenda ra yihí yo, cua catyi tucu maa ra tyin ñavin nyivi yihí cuenda ra cuví yo.

13 Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

Tatun jahá tyiñu vaha yo, cua quita vaha yo

14 Janducuhun iñi tuhun ihya tsi ra jacuahá tuhun Nyoo, tan catyi tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan jatíví ra naha tsi nyivi tyaa soho tsa caahán ra naha.

15 Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyíñu vaha un tuhun nditsa cuhva taahán maa tsi, ña cua nducahan nuu un.

16-17 Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyivi. Tyin cuví can tumaa cuehe xaan tsi ñi. Tan yaha ca cuhva cua tiví ñi jahá can. Yacan cuví tsa tahañ ra Himeño tan ra Fileto.

18 Tyin quita tsiyo ra naha ityi vaha tan catyí ra naha tyin tsa yaha nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyivi tsa tsinú iñi tsi Nyoo.

19 Vasu yihí juhva ñi tacan quita tsiyo ñi, maa tyin Nyoo tsaquin ra tsa nditsa, tan yacan cuví tsa ña cua nasama maa. Tan nyaá iin seña tsa catyí: “Jutu Mañi yo nacotó ra tsi nyivi yihí cuenda ra tsa nditsa.” Tan catyí tucu tsi: “Tandihí ñi nyisó sivi ra Cristo na quita ñi nu iyó tsa ña

vaha.”

²⁰ Tsitsi iin vehe cahnu, ñavin maa ñi maa ndaha tyiñu tsinu tsihin xuhun cuaan tan xuhun cuitsin iyó tsatyíñú nyívi. Tyin tsatyíñú tucu ñi tsa tsinu tsihin vitu tan tsihin ñuhu quisi. Yihí can tsatyíñú ñi can cuenda tyiñu nahnu, tan yihí can ndáa tahan ñi maa tsi tsatyíñú ñi can.

²¹ Tacan tucu maa yo tatun jahá vaha yo cuenda tsi yo, cuví yo iin nyívi tsa tsatyíñú Nyoo. Tan cuví yo tumaa iin vasu xuhun cuaan tsa ndoo vaha, tacan tan cuví cuatyíñú ra tsi yo tsa cuenda tandihi tyiñu vaha.

²² Ña caca iñi un tumaa tsicá iñi ra cuatyí iyó nu ñuhu ñayívi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yooho çoo iin ñayívi cuiti. Tsinu vaha iñi tsi Nyoo. Cuñi tsi Nyoo tan tsi nyívi. Çoo vaha tsihin tandihi nyívi yihí cuenda Nyoo, tandihi ñi tsa tsicán tahvi tsi Jutu Mañi yo, ñi iyó aña vaha.

²³ Tan ña tyaa soho un tsa nduve yahvi nyaá tsa caahán yuhu tahan nyívi. Tyin tsitó un tyin tsihin yacan nducua ca tisihi.

²⁴ Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyívi cuví ra tsihin tandihi nyívi. Tan cuñi tsi tsa ñihi vaha ra cuhva jacuaha ra tuhun Nyoo tsi nyívi. Tan cuñi tucu tsi tsa cunyeetse iñi ra tisihi tsahá nyívi.

²⁵ Tan tsihin tsa vita iñi ra

cuñi tsi janaha vaha ra cuhva coo nyívi ndava iñi. Tan cuatu ra tatun ndu uvi iñi ñi tan coto ñi tsa nditsa.

²⁶ Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñi nu tsihin ñi.

3

Nacaa cua coo nyívi nu cua ndihi quivi

¹ Tan cuñi tucu tsi çoto un tyin nu cua ndihi tyembu cua coo quivi tsa yii xaan cua coo yo.

² Tyin cua coo nyívi nyiyo iñi, maa ñi tsa tsii maa ñi cua cuñi ñi coo. Tan cua cuñi xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndi tsi nyívi ñi. Ña cua tyaa yahvi ñi tsi Nyoo.

³ Ña cua cuñi ñi tsi nyívi ñi. Ña cua cuhva maa ñi coo taxin nyívi. Cua cahan ñi cuendu. Ña cua cuví cundaca ñaha ñi cuñu ñuhu ñi. Xaan xaan ñi cua cuví. Tan ña cua cuñi ñi nyehe ñi tsa vaha.

⁴ Cua xico ñi tsi nyívi ñi. Tan cua cana iñi ñi javaha ñi náa ndihi tsa cuñi maa ñi. Tan cahnu cua jaha ñi tsi ñi. Tan maa ñi maa tsa cuñi maa ñi cua nanducu ñi, tan ña cua nanducu ñi tsi Nyoo.

⁵ Cua cunyicun ñi tsi Nyoo tumaa tsa tsinú iñi ñi cua jaha ñi tsi ñi, maa tyin ña nditsa. Tyin tyasí ñi nu janahá Nyoo

tunyeé iñi ra tyin ña tsinú iñi ñi tsi ra.

Ña cutahan un tsihin nyivi javahá tacan.

⁶ Tyin tyañu ñi ican iyó ra tsa quihví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñí ñi.

⁷ Cuahán ñi cua tyaa soho ñi tuhun tsa, maa tyin ña cuví maa cutuñi iñi ñi tsa cuví tsa nditsa.

⁸ Tan nyivi cua coo, cua cuví ñi tumaa ra Janes tan ra Jambres, ra tasi tsa tsicoo tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyivi cua coo nu cuahán ca tsi ityi nuu. Cua cahan ñi ndavaha ñi siqui tuhun Nyoo. Quiñi xaan cua caca iñi ñi. Tan ña cua quita vaha ñi tsihin cuhva tsinu iñi ñi.

⁹ Maa tyin tsa cua janaha ñi, ña cua cuví nducuaha can tyin ña xeehe caa tyin iin tsa nduve yahvi nyaá cua cuví can, tumaa tsa javahá tucu ra Janes tan ra Jambres.

Nu ndihí tavá tyiñu ra Pablo tsi ra Timoteo

¹⁰ Maa tyin yooho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenda iyó yu tacan, tan nácaa tsinú iñi yu tsi Nyoo. Tan tsitó tucu un nácaa cunyeé iñi yu tsa cuxaán nyivi tsi yu, tan nácaa cuñi yu tsi ñi.

¹¹ Tan tsitó un nácaa cunyeé iñi yu nyehé yu tundoho tsa tsinyaa ndaha nyivi tsi yu. Tsitó un tsa tahan yu, tandihí tundoho tsa nyehe yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacu ra tsi yu tsitsi tandihí tundoho can.

¹² Tsa nditsa tyin tandihí yoo tsa cuñi coo cuhva cuñi ra Cristo Jesús cua janyehe nyivi tundoho tsi yo.

¹³ Maa tyin nyivi caquiñi tan nyivi jandaví ñaha, quiñi xaan ca cua coo ñi. Tyin cua jandaví ñaha ñi tsi nyivi tan cua jandaví ñaha tucu maa nyivi tsi ñi.

¹⁴ Maa tyin yooho jañiñi tsi un tan coo un tsihin tsa cuthva un. Tyin tsitó un yóo jacuahá tsi un tan tsitó un tyin tsa nditsa cuví tsa cuthva un.

¹⁵ Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi iñi un tan cacu un tsa cuenda tsa tsinú iñi un tsi ra Cristo Jesús.

¹⁶ Tandihí tuhun tsa nyaá nuu tutu Nyoo, maa Nyoo tsahá tsi. Tan jatyinyeé xaan tsi tsi yo tsa nacoto yo nácaa taahán tsi tsinú iñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo.

¹⁷ Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuví yo iin ra cuiti yihí cuenda Nyoo tan javaha yo tandihí

tsa vaha.

4

¹ Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyí nyívi nyito tan nyívi tsihí quívi cua quítsi ra cundaca ñaha ra tsihin tunyee iñi tsa iyó tsi ra.

² Čahan tuhun Nyoo tsihin nyívi. Tan ña jandihí un tsa jañiñi un javaha un tacan. Čahan tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Čuhva cuenda tsi ñi, čahan tsihin ñi tatun ña vaha javahá ñi, tyin tacan tan cunyicun vaha ñi tsi ra Cristo. Tan čunyee iñi cuatu nda nasama ñi cuhva iyó ñi. Tan jacuaha tsi ñi nácaa taahán tsi coo ñi.

³ Tyin coo quívi ña cua cunyee ca iñi nyívi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi.

⁴ Tan cua tyaa tsiyo ñi tsa nditsa. Tan cua tyaa soho ñi tsa ña nditsa.

⁵ Maa tyin yooho jaha cuenda tsi un tsihin tsa vaha tsicá iñi un. Čunyee iñi nyehe tundoho. Čahan tuhun Nyoo tsihin nyívi. Vaha javaha un tyiñu tsa tsahá Nyoo tsi un.

⁶ Yuhu tsa yatyin cua nacuhva cuenda yu ñayívi iyó yu tsa cuenda tuhun Nyoo, tyin tsa cuyatyin cúu yu.

⁷ Tsa yahá cañi tahan yu tumaa taahán maa tsi, tan tsa ndihí javahá yu tyiñu tsa tsahá Nyoo tsi yu tumaa iin ra tsinú suuhva, tun tsa tsaá ra nu taahán tsi cucuiñi ra. Tan

tacan ñi maa tsinú iñi yu tsi Nyoo.

⁸ Tan vityin nu cuahán ca quívi, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsicoo yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyívi tsa ndatú tsi ra quívi cua quítsi ra. Tyin intuhun ñi maa ra cuví ra tatsí tuñi vaha.

Inga tyiñu tavá ra Pablo tsi ra Timoteo

⁹ Janumi tan quítsi ñi un, quítsi nyehe un nu nyíi yu.

¹⁰ Tyin ra Demas nacoo ihñi ra tsi yu tyin cuñi ca ra tsa iyó ñuu ñayívi ihya. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Dama-cia.

¹¹ Intuhun ña ra Lucas nyíi tsihin yu. Nanducu tsi ra Marcos tan quihin tsi ra quítsi tsihin un quívi quítsi un. Tyin cuví jatyinyee ra tsi yu tsihin tyiñu Nyoo.

¹² Jacuhun yu tsi ra Tíquico ñuu éfeso.

¹³ Quívi quítsi un yaha un naquihin un jahma vixin yu tsa nacoo yu ñuu Troas vehe ra Carpo. Tan naquihin un tandihí libru yu, cundaha un quítsi tsihin un. Tsa ñiñi ca cuñi tsi cundaha un, yacan cuví tandihí tutu yu.

¹⁴ Ra Alejandro, ra cañi caa, cuaha xaan tsa ña vaha javahá ra tsi yu. Maa Jutu Mañi yo cua natyahvi tsi ra tsa cuenda tandihí tsa javahá ra.

15 Jaha cuenda vaha tsi un coto náa javaha ra tsi un. Tyin xaan xaan cuñí ra cuenda tuhun Nyoo tsa caahán yo.

16 Tsa jihna ñi jacacu yu tsi yu nuu ra cumí tyiñu naha ra, yoñi maa jatyinyee tsi yu. Tandihí ra naha nacoq ihñi ra naha tsi yu. Na jaha Nyoo tucahnu iñi tsi ra naha tsa cuenda yacan.

17 Vasu ndi maa tandihí ra naha nacoq ihñi tsi yu, maa tyin Jutu Mañi yo jatyinyee xaan ra tsi yu. Tan tsaḥa ra tunyee iñi tsi yu tan cuví cahan catsi yu tuhun ra nuu nyívi. Tan tsiñi tandihí nyívi tsa ñavin ñi Israel cuví tsa cahan yu. Tan jacacu Nyoo tsi yu tan ña tsatsi ndicaha can tsi yu.

18 Tan maa Nyoo cua jacacu tsi yu ndaha tandihí tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihí ñi tyembu. Tan na cuví tsi tacan.

Nu ndihí cahan ra Pablo tan tsaḥa ra nacumi tsi nyívi

19 Cuhva nacumi tsi ña Prisca tan tsi ra Aquila tan tsi nyívi ra Onesíforo.

20 Tan jacotó ndihí yu tsi un tyin ndoq ra Erasto ñuu Corinto. Tan ndoq ra Trófimo ñuu Mileto tyin cuuhví ra.

21 Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihí ca nyívi yihí cuenda Nyoo tsihin yo.

22 Na quihí ndaha Jutu Mañi yo Jesucristo tsi un. Tan Nyoo nasoco tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Ra Tito

Nu tyaa ra Pablo carta tsa cuenda ra Tito

¹ Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsi Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo kuhva cuñi Nyoo.

² Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin kuhva ra ñayivi nyito coo yo. Tan ña jandavi ñaha ra.

³ Tan vityin tsa tahañ tsi quivi tsa tyaa Nyoo kuhva tyin coto yo tuhun ra. Maa ra cuvi ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi.

⁴ Jaquitsi yu carta ihya tsi un, Tito, tyin nditsa tyin cuvi un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehe ra tsi un.

Tyiñu tsaha ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

⁵ Nacoq yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuvi ityi nuu tsihin nyivi vehe ñuhu intuhun intuhun ñuu, tumaa tsa catyi maa yu tsihin un.

⁶ Tyin ra tsahnu cuvi ityi nuu tsihin nyivi vehe ñuhu, cuñi tsi cuvi ra iin ra iyó intuhun ñi ñasihí, tan tsinú iñi tandihí sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaa cuatyí siqui sehe ra. Tun tacan iyó ra, cuvi cuvi ra ityi nuu tsihin nyivi vehe ñuhu.

⁷ Tyin ra cuvi ityi nuu tsihin ñi yihí cuenda Nyoo, maa Nyoo tsaha tyiñu can tsi ra. Yacan cuenda ñiñi cuñi tsi tsa cuvi ra iin ra cuiti iyó nuu Nyoo. Iin ra cahnu jahá tsi ña cuvi cuvi ra ityi nuu tsihin nyivi vehe ñuhu, ndi iin ra ndihí iñi, ndi iin ra tuhvá tsihí, ndi iin ra nducú tsihi, ndi iin ra jaha canaa xuhun tsihin iin kuhva ña vaha.

⁸ Maa tyin cuñi tsi cuvi ra iin ra siñ cuñi tatun tsaa nyivi yuvehe ra. Tan taahán tsi kuhva ra nu ndoo ñi cusu ñi, Cuñi tsi cuvi ra iin ra javahá tsa vaha, iin ra tsicá iñi tsa vaha, iin ra tsa nacuhva cuenda vaha tsi ra tsi Nyoo, iin ra tsitó cundaca ñaha tsi maa ra.

⁹ Cuñi tsi cunycun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra kuhva jacuaaha ra tsi nyivi caahán tyin ña nditsa tuhun caahán

yo.

¹⁰ Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandaví ñaha. Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra.

¹¹ Cuñí tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñí ra naha xuhun.

¹² Tan juvin ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyehen: “Nyivi Creta, vatya xaan ñi. Cuví ñi tumaa cuví quití. Cuaha xaan tsatsí ñi tan jutsan xaan ñi”, catyi ra.

¹³ Tan nditsa tsa cahan ra. Yacan cuenda cuñí tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo.

¹⁴ Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñí coto tsa nditsa.

¹⁵ Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñí ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñí ñi, tyin nda cuenda cuhva tsicá iñi ñi tan tsa tsiñi tuñi iñi tan ña vaha.

¹⁶ Catyi ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá

iñi ñi tan ndava iñi ñi. Tan ña cuví javaha ñi tsa vaha.

2

Tuhun vaha tsa tsaha Nyoo tyin jacuahá yo

¹ Maa tyin yooho, jacuahá tsa vaha tsa nacatsí tahan tsihin tsa jacuahá Nyoo tsi yo.

² Jacuahá tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñí tsi tsa cuñi ra naha tsi Nyoo tan tsi nyivi. Tan cunyeey iñi ra naha tandihi náa tundoho nyehé ra naha.

³ Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi.

⁴ Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi.

⁵ Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuví ñi nyivi vaha. Na cuhva ñi tsa cundaca ñaha yí ñi tsi ñi, tyin tacan tan ña cuví cahan nyivi ndavaha ñi siqui tuhun Nyoo tsa cuenda cuhva iyó ñi.

⁶ Tacan tucu ra cuatyí naha ra. Cuhva cuenda tsi ra naha na catsi coo ra naha.

⁷ Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuahá tsi ra naha

tsihin tsa vii tan tsihin tsa vaha.

⁸ Maa ñi tuhun vaha cahan un tyin tacan tan yoñi cuvi tyaa cuatyí siqui un. Tan ra xaan iñi tsi ndo naha ra ña cua ñihi ra naha cuhva cahan ra naha ndavaha ñi siqui ndo tan cua nducahan nuu ra naha.

⁹ Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsitoho ra naha. Na javaha ra naha tandihi tsa caahán tsitoho ra naha. Tan na ña nacahan ra naha nu caahán tsitoho ra naha.

¹⁰ Tan na ña suhu ra naha tsa tsi tsitoho ra naha. Na jaha vaha ra naha cuenda tandihi ndaha tyiñu tsitoho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

¹¹ Tyin Nyoo janahá ra tsa vaha tsa iyó tsi ra tsi nyivi tan cuñi ra jacacu ra tsi tandihi ñi.

¹² Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyivi tsa ña tsitó tsi ra, tan nacoo tucu yo tsa cuñi ñi can. Tan cuiti coo yo nu ñuhu ñayivi ihya, na cundaca ñaha vaha yo tsi yo tumaa cuñi maa Nyoo.

¹³ Tan janahá tucu ra tsi yo nácaa cuatu yo tsa vaha tsa cua ñihi yo quivi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quivi quitsi ra cuví Nyoo yo, ra cahnu cuví, ra jacacú tsi yo.

¹⁴ Tсахá ra ñayivi ra tsa cuenda yo tyin tacan tan jacacu ra tsi yo ndaha tandihi

tsa caquiñi. Tan nacatyá ra tsi yo na cuvi yo nyivi vaha, tan cuvi yo tsi maa ra, tan javaha yo maa ñi maa tsa vaha.

¹⁵ Yacan cuñi tsi jacuaha un tsi nyivi. Jandu iin iñi ñi. Tan cahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñihi nyivi nácaa cahan nyaa ñi tsi un.

3

Cuhva taahán tsi javaha nyivi yihí cuenda Nyoo

¹ Janducuhun iñi tsi nyivi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi.

² Tan ña cahan ñi ndavaha ñi siqui nyivi. Ña cañi tahan ñi tsihin nyivi. Na cuvi ñi nyivi vaha. Na masu jaha ñi añima ñi tsihin tandihi nyivi.

³ Tyin nda cuanda maa yo tan ña vaha javahá yo nu quitsi tsi. Soho xaan tsicoo yo. Ndava xaan iñi yo. Ña tsicá yo ityi vaha tyin jandavi ñaha xaan nu ña vaha tsi yo. Tan tsindacá ñaha tandihi tsa ña vaha tsa cuñi cuñu ñuhu yo tsi yo. Tan javahá yo tandihi cuhva cuñi maa yo. Tan cuñi yo coo tandihi tsa iyó tsi inga nyivi tsi yo. Ndasí tsicá iñi yo nyehe yo tsi nyivi yo. Tan tacan tucu maa nyivi ndasi cuñi ñi nyehe ñi tsi yo.

⁴ Maa tyin Nyoo vaha xaan iñi ra tan jacacu ra tsi yo. Tsihin yacan janahá ra tsi yo tyin cuñi ra tsi tandihi nyivi.

⁵ Ñayin tsa cuenda tsa vaha javahá yo tan jacacū ra tsi yo, tyin jacacū ra tsi yo tsa cuenda tsa cundaahvi iñi ra nyehē ra tsi yo. Tan tsihin niñi ra Jesús nacatyā ra cuatyī yo, tan nacacū tsaā yo jahā Tatyī li ra, tan tsahá ra ñayivi nyito coo yo.

⁶ Tan tsa cuenda ra Jesucristo, ra jacacū tsi yo, tsahá xaan Nyoo tsa coo Tatyī li ra añima yo.

⁷ Tsihin tsa vaha maa ra tan janduvahā ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo.

⁸ Tandihī tuhun ihya tuhun nditsa cuvī tsi. Tan cuñi yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandihī nyivi tatun tyaá yahvi ñi itsi.

⁹ Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ican cuñi ñi coto ñi nácaa vatsí tata nyivi. Ña tyihī un tsi un tsihin nyivi cañi tahan tsa cuenda ley tsa tyaa ra Moisés tsanaha. Tyin nduve náa jatyinyee yacan. Tan nduve tsa tsiñi tuñi tsahá can.

¹⁰ Tatun iyó nyivi cuñi natahvi sava tsi nyivi tsicá vehe ñuhu, çana tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña

tyaá yahvi ñi tsa caahán un, çasi nu caca ñi vehe ñuhu.

¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyī ñi. Tan juvin ñi maa ñi jacunaa tsi ñi tsa tacan javahá ñi.

Tyinu tava ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyii un. Tan quivi tsaā ra, nducu cuhva tan cūhun un nda ñuu Nicópolis tyin ndacan cua ñihi tahan yo. Tyin tyaá yu cuhva tsa ndoo yu ndacan yoo vitsin.

¹³ Nducu cuhva jatyinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan cūhva tsa tsiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha.

¹⁴ Na cutuhva nyivi yihī cuenda Nyoo javaha ñi tsa vaha tan jatyinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndihī cahan ra Pablo

¹⁵ Tandihī ra yucú tsihin yu, tsahá ra naha nacumi tsi un. Tan cuhva nacumi tsi tandihī nyivi cuñi tsi yo tsa cuenda tsa iin ñi cuvī yo cuenda Nyoo. Tan Nyoo nasoco tsi tandihī ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Filemón

Nu quitsaha tyaá ra Pablo carta cuenda ra Filemón

¹ Yuhu ra Pablo, nyíi yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyí tucu ra Timoteo tyin jaquitsí ndihí ra nacumi tsi un. Cuñí xaan ndí tsi un tsa cuenda tsa iin ñi tyiñu ra Cristo jahá tyiñu yo.

Nu quitsaha tyaá ra Pablo carta cuenda ra Filemón

² Tan tyaá yu carta ihya tsa cuenda ña Apia tan ra Arquipo tyin jatyinyeé xaan ñi tsi yo tsihin tyiñu jahá yo, tan tyaá tucu yu itsi tsa cuenda tandihí nyívi ndu iin yuvehe un.

³ Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo aña ndo.

Ra Filemón tsinú xaan iñi ra tsi ra Jesús tan cuñí xaan ra tsi nyívi

⁴ Tandihí ñi tsaha tsa tsicán tahvi yu tsi Nyoo tan ndu-cuhún iñi yu tsi un,

⁵ tyin ñihí tuhun yu tyin tsinú xaan iñi un tsi ra Jesús tan cuñí xaan un tsi tandihí nyívi yihí cuenda ra.

⁶ Tan tsicán yu tsi Nyoo tsa cuenda tandihí nyívi tsa natsinú iñi tsi ra Jesús jahá un tsihin tsa tsinú iñi un, tyin na

cutuñi iñi ñi tandihí tsa vaha tsa iyó tsi yo tsa cuenda ra Jesucristo.

⁷ Tan sii xaan cuñí yu tan iin xaan cuñí yu tsa cuenda tsa cuñí xaan un tsi nyívi tsa yihí cuenda ra Cristo tan jandu iin xaan un iñi ñi.

Nu tsicán ra Pablo tumañi iñi tsi ra Filemón tsa cuenda ra Onésimo

⁸ Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu.

⁹ Maa tyin yuhu cuñí xaan yu tsi un, yacan cuenda ña cua tava tyiñu yu tsi un tyin cuñí yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyíi yu vehe caa ihya tsa cuenda ra Cristo.

¹⁰ Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahán yu tuhun ra Cristo tsihin ra nu nyíi yu vehe caa ihya.

¹¹ Tahan tsanaha cuví ra musu un tan ña jahá tyiñu vaha ra. Maa tyin vityin vaha xaan cua jatyinyee ra tsi yo, tahan ñi tsi yooho tan yuhu.

¹² Yacan jaquitsí nyico yu tsi ra yuvehe un tan cuñí yu tsa naquihin cuenda un tsi ra tumaa tsa maa yu cuví ra.

¹³ Tsicá tucu iñi yu tsa ndoo ra nu nyíi yu vehe caa ihya tan jatyinyee ra tsi yu cahán yu tuhun Nyoo tsitsi tsa nduve un.

¹⁴ Maa tyin ña cuñí yu jan-doo yu tsi ra tyin ña tsitó yu

nácaa cua cahan un. Tan ña cuñi yu jañiñi yu tsi un tun ña cuhva un tsa cunyi ra. Vaha ca jaquitsi nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu.

¹⁵ Vasiqui maa Nyoo cuñi tsa cunu ra nuu un juhva quivi tan vityin cua tsa nyico ra yuvehe un tan coo cui ra tsihin un.

¹⁶ Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñi xaan yu tsi ra, yacan yooho taahán tsi tsa cuñi ca un tsi ra tan ñavin ca yuhu, tyin vityin ñavin musu ñi un cua cuvi tsi ra tyin cuvi tucu ra yañi un tsa cuenda ra Cristo.

¹⁷ Tun nditsa un tsa cuñi un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un.

¹⁸ Tatun javaha ra iin tsa ña vaha tsi un o nyaá cuenda ra tsi un, tyahvi maa yu can.

¹⁹ Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayivi iyó un tsi yu.

²⁰ Yañi, javaha tumañi iñi ihya tsi yu, tumaa ra yihí cuenda ra Cristo; na cusii iñi yu tan na ndu iin iñi añima yu tsihin tsa cua javaha un.

²¹ Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu,

tan cuaha ca tsa cua javaha un.

²² Tan cuñi tucu yu tyin janduvaha un nu cusu yu yuvehe un tyin nyitá iñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

Nu ndihí tyaq ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra

²³ Ra Epafras tsa nyii ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un.

²⁴ Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu.

²⁵ Na nasoco xaan Jutu Mañi yo Jesucristo tsi ndo.

Tan na cuvi tsi tacan ñi.

Carta Tsa Tsinyaa Tsa Cuenda Nyivi Israel, Ñi Caahán Yuhu Hebreo

Caahán Nyoo tshin yo tshin yuhu Sehe ra

¹ Tahan tsanaha cuaha xaan tsaha, tan cuaha xaan cuhva cahan Nyoo tshin tsii tsahnu yo. Tsa jihna ñi tsatyinũ ra tsi ra cuvi ndusu yuhu ra. Juvín ra can naha ra tsaha cuenda tsi nyivi tuhun caahán Nyoo.

² Tan vityin, nu cua ndihi tyembu ihya tsatyinũ ra tsi Sehe ra tsa caahán ra tshin yo. Iin ñi cuvi ra tshin Sehe ra tan javaha ra tandihi tsa iyó. Tan nacuhva cuenda ra tandihi can tsi Sehe ra.

³ Tan maa Sehe ra janahá ra tsa sii caá ra, tyin juvín ra Sehe ra cuvi tixahũ ra tyin juvín ñi cuhva caá maa ra caá ra Sehe ra. Tan tshin tunyee iini tuhun caahán ra, yihí ndaha ra tandihi tsa iyó. Tsa yaha tsa nacatya ra cuatyí yo, tan tsinyaa ra xiin cuaha Nyoo nda gloria.

Cahnu ca cuvi Sehe Nyoo tan ñavin ca ángel

⁴ Sehe Nyoo cahnu xaan ca cuvi ra tan ñavin ca ángel. Tan cahnu ca tyiñu ñihí ra jahá tyiñu ra tan ñavin ca ángel.

⁵ Tyin Nyoo ña catyí ra ndi iin tsaha tshin ndi intuhun ángel tyehen:

Yooho cuvi Sehe yu.

Tan tsahá yu ñayivi coo un vityín.

Tan ndi ña cahan ra tuhun ndi intuhun ángel tyehen:

Yuhu cua cuvi Jutu ra.

Tan maa ra cua cuvi Sehe yu.

⁶ Maa tyin quivi jaquitsi Nyoo tsi Sehe mañi ra nu ñuhu ñayivi, catyí ra:

Tyin tandihi ángel ra taahán tsi jacahnu ra naha tsi Sehe ra.

⁷ Tan cahan tucu ra tuhun ángel tan catyí ra:

Ángel yu cuvi ra naha tumaa iin tatyí jahá yu,

jahá tyiñu ra naha tyiñu yu, tan cuvi tucu ra naha tumaa ñuhu, catyí Nyoo.

⁸ Maa tyin tuhun Sehe ra catyí ra tyehen:

Nyoo cuvi un, tan ña cua cundihí maa tsa ndacá ñaha un. Tan tsa ndacá ñaha un ndaa tsi tan nditsa tsi.

⁹ Tyin cuñi un tsa vaha tan ndasi cuñi un nyehé un tsa ña vaha.

Yacan cuenda yuhu, tsa cuvi yu Nyoo un, tsahá yu cuaha ca tsa sii cuñi un, tan ñavin ca tsi ra cutahán tshin un naha ra.

¹⁰ Tan catyí tucu Nyoo tshin Sehe ra tyehen:

Yooho cuvi Jutu Mañi tandihi nyivi. Quivi jihna ñi juvín un javaha ñuhu ñayivi,

tan tshin ndaha un javaha un andivi.

¹¹ Ñuhu ñayivi tan andivi tan tandihi maa tsa iyó cua cundihí tsi, maa tyin yooho, ña cua cundihí

un, tyin tacan ñi iyó
maa un.

Tandihí maa can cua ndut-
sahnu can tumaa
ndutsahnú jahma.

¹² Tan cua quíhi tahnu can tu-
maa tyihí tahnu yo iin
jahma.

Tan cua nasama can tumaa
nasamá nyívi jahma ñi.

Maa tyin yooho iin ñi maa
ra cuví un tan ña cua
nasama un.

Tan ña cua cundihí maa ñayívi
un tyin tacan ñi iyó
maa un, catyí Nyoo tsi-
hin Sehe ra.

¹³ Nyoo ndi iin tsaha ña cahān
ra tsihin ndi intuhun ángel tu-
maa cahān ra tsihin Sehe ra
tyehen:

Cunyaa xiin cuaha yu ihya
tsitsi tsa nacuhva cuenda yu
tsi nu xaan iñi tsi un
nahnu tsi un.

¹⁴ Tandihí ángel, tatyí cuví ra
naha. Tava tyiñu Nyoo tsi ra
naha tsa caca ra naha tyiñu ra
tan jatyinyee ra naha tsi nyívi
tsa cua cacu.

2

*Cahnu xaan cuví tsa ja-
cacú Nyoo tsi yo*

¹ Yacan cuenda cuñí tsi
tyaa yahvi xaan ca yo tuhun
nditsa tsa tsiñi yo, coto nacoo
ihñi yo itsi.

² Tahān tsanaha tsaha
cuenda ángel ley Nyoo tsi ra
Moisés. Tan janaha Nyoo
tyin nditsa tan taahán tsi tyaa
yahvi nyívi itsi. Tan nyívi
tsa tsicoo cuatyí tan ña tyaa
yahvi ley can, tatsí tuñi ra tsi
ñi tumaa catyí maa ley can.

³ Tun tacan tahān ñi can
quívi can ñácaaa cua javaha

yoo vityin, tan cuví cacu yo
tatun ña tyaa yahvi yo tsa ja-
cacú Nyoo tsi yo?, tan cahnu
xaan ca cuví tuhun ihya. Ju-
vin ñi maa Jutu Mañi yo Je-
sucristo cuví ra tsa cahān ji-
hna tyin cuví cacu yo. Yahā
can tan cahān nyívi tsa tsiñi
tsa cahān ra. Nyehe ñi tyin
nditsa tan nacatyí tuhun ñi
itsi tsihin yo.

⁴ Tan sīn tyin Nyoo janaha
catsi ra tsi yo tyin nditsa tsa
jacacú ra tsi yo. Janahá ra
can tsi yo tsihin tsa javaha
ra cuaha tsa iyo. Tan tsaha
tucu ra Tatyí Ii ra tsi yo tyin
jatyinyee tsi tsi yo tsa javaha
yo tyiñu tsa cuñí ra javaha
yo. Tan tsihin tandihí yacan
janahá ra tsi yo tyin nditsa tsa
jacacú ra tsi yo.

*Ra Jesucristo quitsi ra cuví
ra rayi nu ñuhu ñayívi ihya*

⁵ Nyoo ña tsaha ra tsa cun-
daca ñaha ángel ñuhu ñayívi
tsaa tsa cua coo tsa caahān yo
tuhun vityin.

⁶ Tyin iyó iin nu tyaa iin ra
nu tutu Nyoo tyehen:

Nyoo Jutu yu zyóo ra cuví
rayi nu ñuhu ñayívi
ihya tyin ñuhú iñi un
tsi ra?

¿Tan yóo ra cuví ra tyin cu-
tuñu iñi un tsa cuenda
ra?

⁷ Tyin ndaahvi ca jahā un tsi
ra juhva tyembu, tan
ñavin ca ra ángel naha
ra.

Maa tyin jacahnú un tsi ra.
Tan jahā un tsa ñayívi
tsi ra.

Tan tsaḥa un tsa quih̄i ndaha
ra tandih̄i tsa javaha
un.

⁸ Tandih̄i can tyaa cuenda un
ndaha ra.

Tan nduve maa náa ña tsaḥa
cuenda Nyoo quih̄i ndaha ra.

Tan ñaha ca nyehé yo tyaa
yahvi tandih̄i yacan tsi ra.

⁹ Maa tyin nyehé yo tsi ra
Jesús tyin nduluhl̄u ra jah̄a
Nyoo juhva tyembu tan ñavin
ca ra ángel naha ra. Tan
janduluhl̄u Nyoo tsi ra tsa
cuenda tsa cuñi xaan ra tsi
yo. Tan tsaḥa ra tsi ra Jesús
quitsi ra quitsi cúu ra tsa
cuenda tandih̄i yo. Tan vityin
jah̄a xaan Nyoo tsa cahnu tsi
ra tan jacahnú xaan ra tsi
ra tsa cuenda tundoho tsa
nyeḥe ra quivi can.

¹⁰ Tandih̄i maa tsa iyó, tsa
cuenda maa Nyoo cuví tsi.
Maa ra javaha itsi. Tan cuñi
ra cuhva ra tandih̄i tsa sii caá
tsa iyó andivi tsi tandih̄i sehe
ra. Yacan cuenda janyeḥe ra
tundoho tsi ra Jesucristo, ra
tsa jacacú tsi yo, tan tsihin
yacan janduvaha ra tsi ra.

¹¹ Ra Cristo tsa jacacú tsi
yo, Sehe Nyoo tsi ra. Tan
juvin ñi sehe Nyoo nanduv̄i
yoo tsa tsinú iñi tsi ra. Ya-
can cuenda ña cahán nuu ra
Cristo tsa caahán ra tyin yañi
ra tan cuhva ra cuví tsi yo,
tyin iin ñi Jutu yo tsihin ra.

¹² Tyin catyí ra Cristo nu
tutu Nyoo tyehen:
Cua cahan yu tuhun un tsihin
yañi yu.

Tan cua jacahnu yu tsi un tsi-
hin yaa nu ndu iín yo.

¹³ Catyí tucu ra tyehen:
Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe
Nyoo, tsa tsaḥa ra tsi
yu, catyí ra.

¹⁴ Yoo tsa cuví yo nyivi ñuhu
ñayivi, iyó cuñu ñuhu yo tan
niñi yo. Tacan cuv̄i ra Cristo,
tyin tun tsa ña tsicoo cuñu
ñuhu ra tan niñi ra, ña cua
cuví cúu ra tan janaa ra tsi
nu ña vaha, nu tsa tsaḥñi tsi
nyivi.

¹⁵ Tacan javaha ra tan ja-
cacu ra tsi nyivi tsa tsicoo yu-
uhví jah̄a tuhun tsihi. Cuv̄i
ñi tumaa musu nu ña vaha
tyin tandih̄i ñi quivi tsicoo yu-
uhví ñi.

¹⁶ Tan tsa nditsa vaha tyin
ñi quitsi ra quitsi jatyinyee ra
tsi ángel. Tyin quitsi ra quitsi
jatyinyee ra tsi nyivi tata ra
Abraham.

¹⁷ Yacan cuenda ñiñi cuñi
tsi tsa cuví ra tumaa yoo tsa
cuví yo yañi ra tan cuhva
ra tyin tacan tan cuví ra iin
ra cundaahvi iñi tsi yo, tan
cuví ra jutu tsaahnu cuví ityi
nuu tsa cuenda yo nuu Nyoo
tyin jandaá ra tandih̄i maa
tan quih̄in nyaa ra cuatyí yo
tsihin tundoho tsa nyeḥe ra.

¹⁸ Tan tsa cuenda tsa nyeḥe
ra tundoho quivi nducu
cuhva nu ña vaha tsi ra, tsitó
ra nácaa cuñi yo tun nyehé yo
tundoho. Yacan vityin nyaá
ra tsa jatyinyee ra tsi yo tun
nyehé yo tundoho tsa nducú
cuhva nu ña vaha tsi yo.

3

*Cahnu ca cuví ra Jesús tan
ñavin ca ra Moisés*

¹ Nyooho, yañi, tsa jandu ií Nyoo, tan tsa nacatsj ra tyin coo ndo tsihin ra nda gloria, nyehe vaha ndo cuhva iyó ra Cristo Jesús, juvin ra jaquitsj Nyoo tyin caca ra tyiñu ra tan cuví ra jutu tsaahnu cuví ityi nuu tsa cuenda yoo tsa tsinú ñi tuhun ra.

² Ra Cristo javahá ra tandihí tsa cahán Nyoo tyin javaha ra, tumaa javahá tucu ra Moisés tyiñu tsa tsahá Nyoo tsi ra tsa jaha cuenda ra vehe Nyoo tsa cuví nyivi Israel.

³ Ra Jesucristo cahnu ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnu ca ra cuví ra tan ñavin ca maa vehe tsa javahá ra.

⁴ Tyin maa ñi iyó ra javahá intuhun intuhun vehe, maa tyin Nyoo cuví ra tsa javahá tandihí maa tsa iyó.

⁵ Ra Moisés tyaá yahvi ra tsi Nyoo tan javahá ra tyiñu tsa tsahá Nyoo tsi ra tyin jahá cuenda vaha ra vehe Nyoo tsa cuví nyivi Israel, tan juvin ñi jacotó tucu ra tsi nyivi tsa cua javaha Nyoo nu cuahán ca tsi.

⁶ Maa tyin ra Cristo, Sehe Nyoo, tyaá yahvi tucu maa ra tsi Nyoo tan juvin ra cuví ra ndacá ñaha vehe Nyoo vityin. Vehe can cuví yoo tun iin ñi cuñí yo nyicún yo tsi Nyoo tan nyitá vaha ñi yo tsi ra nda cuanda nu ndihí, tan tacan ñi sñi cuñí yo ndatú yo tsa cua ñihi yo.

Nyivi tsinú ñi tsi Nyoo, quitatú ñi tsihin ra

⁷ Yacan cuenda cuñí tsi jaha cuenda vaha yo tsi yo tumaa catyí Tatyí Ii Nyoo tyehen:

Tatun tsiñí ndo tsa caahán Nyoo tsihin ndo vityin,

⁸ ña jandava ndo aña ndo, tumaa javahá nyivi tsa ña tyaá yahvi tsi Nyoo quivi nducú cuhva ñi tsi ra nu tsicá ñi nuu tsiqui.

⁹ Tyehen catyí Nyoo:

Tsii tsaahnu ndo nducú cuhva ñi tsi yu,

vasu ndi maa nyehe ñi tsa javahá yu tsitsi tsa uvi xico cuiya.

¹⁰ Yacan cuenda cuxaán yu tsihin nyivi can,

tan catyí yu tyehen: “Ña iin maa cuñí nyivi ihya tan ña cuñí ñi cunyicun ñi ityi janahá yu tsi ñi.”

¹¹ Yacan cuenda cuxaán yu tsihin ñi, tan cahán catsi yu tsihin ñi, tyin ña cua quitatu ñi tsihin yu, catyí Nyoo.

¹² Yacan cuenda yañi, jaha ndo cuenda tsi ndo tan ña caca uvi ñi ndo tsitsi aña ndo coto jandihí ndo tsa tsinú ñi ndo tsi Nyoo nyito tan coto nacoo ndo tsi ra.

¹³ Maa tyin jandu iin tahan ndo ñi ndo tandihí ñi quivi, tsitsi tsa tsahá tsi cuhva tsi ndo vityin. Tyin tacan tan ña cua ndundava aña ndo, tan ndi intuhun ndo tan ña cua jandavi ñaha tsa caquiñi tsi ndo.

¹⁴ Tyin tun ña jandihí yo tsa nyitá ñi yo tsi Nyoo nda

cuanda naa ñuhu ñayivi tu-
maa javahá yo nda quivi quit-
sahá yo, cua ñihi yo tsa vaha
iin caa ñi tsihin ra Cristo tyin
cunyeé iñi yo ndatú yo tsi ra.

¹⁵ Yacan tacan cuñí tsi jaha
yo cuenda tsi yo tumaa catyí
tutu Nyoo:

Tatun tsiñí ndo tsa caahán
Nyoo tsihin ndo vityin

Ña jandava ndo añima ndo,
tumaa javahá nyivi tsa
ña tyaa yahvi tsi Nyoo
—catyí tutu Nyoo.

¹⁶ ¿Yóo nyivi cuví ñi tsiñí tsa
cahán Nyoo tan ña tyaa soho
ñi? Nyivi ihya cuví nyivi Is-
rael tsa tava ra Moisés Egipto
tahan tsanaha. Juvín ñi can
ña tyaa soho.

¹⁷ Tan ¿yóo nyivi cuxaän
Nyoo tsitsi tsa uvi xico cuiya?
Juvín ñi maa ñi tyin tsicoo cu-
atyí ñi. Tan tsihi ñi nu tsiqui,
juvín ñi maa nu tsicá ñi.

¹⁸ ¿Tan yóo tsihin cahán
catsi Nyoo tyehen?:

—Ña cua quitatu ndo tsihin
yu.

Juvín ñi tsihin ñi tsa ña tyaa
soho can.

¹⁹ Ihya nyehé yo tyin ña
cuví ñihí ñi quitatu ñi tsihin
Nyoo tyin ña tsinu iñi ñi tsi ra.

4

¹ Yacan cuenda, tsitsi tsa
ndi iyó ndatu tsa quitatu yo
tsihin Nyoo, jaha ndo cuenda
tsi ndo tyin tacan tan ndi in-
tuhun ndo tan ña cua ndoo
ihñi ndo.

² Vityin yoo tsiñí tucu yo
tuhun Nyoo tsa jacacú ra tsi
yo, tumaa tsa tsiñí tucu maa
nyivi Israel can. Tsiñí ñi itsi,

maa tyin nduve nacatyí tsa
tsiñí ñi itsi tyin ña tsinu iñi ñi
itsi.

³ Yoo tsa tsinú iñi tsi Nyoo,
quitatú yo tsihin ra. [Maa
tyin ña quitatu nyivi tsa ña
tsinú iñi tsi ra] tyin catyí ra:

Yuhu cuxaän yu tsihin ñi tan
cahán catsi yu tsihin ñi
tyin ña cua quitatu ñi
tsihin yu, catyí ra.

Vasu ndi maa [tacan cahán
Nyoo tsihin ñi ican], maa tyin
[tsa iyó tuhun tsa cuvi qui-
tatu yo tsihin Nyoo nda quivi]
ndihí jaha tyiñu ra javahá ra
ñuhu ñayivi.

⁴ Tyin yihí nu tutu Nyoo
caahán tsi tyehen tuhun tsa
tsinu utsa quivi nu ndihí
vitya:

Tsa ndihí jaha tyiñu Nyoo,
quitatú ra tsa tsinu
utsa quivi.

⁵ Tan catyí tucu tsi tyehen:

Ña cua quitatu ñi tsihin yu,
catyí Nyoo.

⁶ Nyivi tsa tsiñí jihna tuhun
tsa jacacú Nyoo tsi yo ña
cuví quitatu ñi tsihin ra, tsa
cuenda tsa ña tyaa yahvi ñi
tsa cahán ra tsihin ñi. Maa
tyin vityin ndi iyó ndatu tsa
quitatu inga nyivi tsihin ra.

⁷ Tsa yahá tsa ña tyaa yahvi
nyivi Israel tsa cahán Nyoo,
tan tyaa ra inga quivi cuví
quitatu yo tsihin ra, tan
quivi can cuví tyembu vityin.
Tacan caahán Nyoo nu tutu
ra nu tyaa ra David tyehen:

Vityin tatun nyoocho tan tsiñí
ndo tsa caahán yu,

Ña jandava xaan ndo añima
ndo, catyí Nyoo.

⁸ Tun tsatyin tsaha ra Josué nu quitatu nyivi Israel, ña cua cahan Nyoo tsa cuenda inga quivi.

⁹ Yacan cuenda cuví quitatu nyivi yihí cuenda ra tsihin ra.

¹⁰ Tyin nyivi quitatú tsihin Nyoo, ña tsicá iñi ñi tsa cuenda tyiñu jahá ñi tyin quitatú añima ñi tumaa quitatú Nyoo quivi ndihí jahá tyiñu ra.

¹¹ Cuñí tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javaha nyivi tsicoo tsanaha tsa ña cuñi tsinu iñi tsi ra.

¹² Tyin tuhun Nyoo, nyito tsi, tan iyó tunyee iñi itsi. Tan xaan ca tsi tan ñavin ca miyti tsa xaan nduvi tsiyo yuhu. Tan jasiñ tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo.

¹³ Nduve maa tsa javaha Nyoo tan cuví cunu xeehe can nuu ra, tyin tandihí maa tan nyehé ra. Tan juvin tsi ra cua cuhva cuenda yo tsa javahá yo.

Ra Jesús cuví jutu tsaahnu cuví ityi nuu tsa caahán ndaahvi tsihin Nyoo tsa cuenda yo

¹⁴ Ra Jesús Sehe Nyoo, juvin ra cuví jutu tsaahnu cuví ityi nuu tsa cuenda yo, tyin quihvi ra nu nyaá Nyoo nda gloria tan caahán ndaahvi ra tsaha yo. Yacan cuenda na ña

jandihí yo tsa tsinú iñi yo tsi ra.

¹⁵ Tyin ra tsa cuví jutu tsa cuenda yo cuví naquihin ndaahvi ra tsi yo tatun cuihya cuñí yo, tyin tsitó ra nácaa cuñí yo tun nyehe yo tundoho tyin maa ra nyehe tucu maa ra tandihí nuu tundoho quivi nducu cuhva nu ña vaha tsi ra, maa tyin ña tsicoo cuatyí ra.

¹⁶ Yacan cuenda cuñí tsi nanducu yo tsi Nyoo tan ndacan yo tsi ra tsihin tsa ña yuhví yo na cundaahvi iñi ra nyehe ra tsi yo tan cuhva ra tunyee iñi tsa iyó tsi ra tsi yo, tan jatyinyee ra tsi yo quivi nyehé yo tundoho.

5

¹ Tandihí ñi jutu tsaahnu tsa cuví ityi nuu tsa nacatsi Nyoo tsitsi tsa tandihí nyivi Israel, nacatsi ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quití tsa cuenda cuatyí ñi.

² Tan vatsí tsaha juvin ñi ndaahvi cuñí ra cuví jutu quivi nducú cuhva nu ña vaha tsi ra, yacan cuenda cuví cundaahvi iñi ra nyehé ra tsi nyivi ña cutuñí vaha iñi tuhun Nyoo tan nyivi ña nyicún vaha tsi Nyoo.

³ Tan yacan cuenda tsahñí ra quití tan jamañí ra can nuu Nyoo tsa cuenda cuatyí maa ra tan tsa cuenda cuatyí nyivi.

⁴ Ndi intuhun maa nyivi tan ña cuví cuví ñi jutu tun ñavin maa Nyoo nacatsí tsi ñi. Tyin maa Nyoo cuví ra nacatsí tsi

ra cua cuvi jutu, tan tsahá ra ndatu tsi ra tsa cuvi ra jutu, tumaa javahá ra tsihin ra Aarón tahanan tsanaha.

⁵ Tan tacan tucu ra Cristo, ñavin maa ra tyaa tyiñu can tsi ra, tyin maa Nyoo tsahá tsa cuvi ra jutu tsaahnu tsa cuvi ityi nuu, tumaa catyí ra:

Yooho cuví Sehe yu.

Yuhu tsahá yu ñayivi coo un vityin, catyí Nyoo tsihin ra Cristo.

⁶ Tumaa catyí tucu ra tsihin ra nu inga nu caahán tsi tye-hen:

Ña cua cundihi maa tsa cuvi yooho jutu,

tumaa cuví ra Melquisedec.

⁷ Quivi tsicoo ra Cristo nu ñuhu ñayivi ihya, tsican tahvi ra tsi Nyoo, tsacu xaan ra cahán ra tsihin Nyoo tyin juvin ra cua jacacu tsi ra ndaha tuhun tsihi tsihin tun-yeé iñi tsa iyó tsi ra. Tsiñi Nyoo tuhun caahán ra tsa cuenda tyin javahá ra tandihi tsa catyi Nyoo tyin javaha ra.

⁸ Yacan cuenda vasu ndi maa Sehe Nyoo tsi ra Cristo, cutuhva ra tyaa yahvi ra tsi Nyoo tsihin tsa nyehe ra tundoho.

⁹ Tsa yahá tsa javahá ra tandihi cuhva cuñi Nyoo tyin javaha ra, tacan tan tsahá Nyoo tsi ra tsa jacacú ra tsi tandihi nyivi tsa tyaa yahvi tsa caahán ra tyin tacan tan coo cuii ñi tsihin Nyoo.

¹⁰ Tyin maa Nyoo tavá tyiñu tsi ra tsa cuví ra jutu tsaahnu cuví ityi nuu, tumaa cuví ra Melquisedec.

Na ña jandihi yo tsa tsinú iñi yo tsi Nyoo

¹¹ Cuví cahan cuaha yo siqui tuhun ihya, maa tyin yii xaan nacatyí tuhun yu nácaa cuahán tsi, tyin nyooho ña cuñi ndo cutuñi iñi ndo.

¹² Tsa naha xaan yihí ndo cuenda ra Cristo, yacan tsa taahán tsi jacuaha ndo tsi inga nyivi. Maa tyin nyooho cuví ndo tumaa cuví lee tsa tyaxín tsa ñaha ca cuvi catsi tyin cuñi tsi tsa tyaa soho nyico ndo tuhun tsa tsiñi ndo tsa jihna ñi.

¹³ Tyin nyivi cuñi tyaa soho tuhun tsa ña yii cuví ñi tumaa lee tsa tyaxín tyin ñaha ca cutuñi vaha iñi ñi nácaa coo vaha ñi tsihin Nyoo.

¹⁴ Maa tyin nyivi tsa cutuñi vaha iñi tan tsahnú ñi tsihin tuhun Nyoo, juvin ñi cuví tumaa iin nyivi tsa tsatsí nyayu tyin nacotó ñi ndáa tsa vaha tan ndáa tsa ña vaha.

6

¹ Yacan cuenda ña ndoo yo vaha maa ñi maa tsihin tuhun ra Cristo tsa cutuhva yo tsa jihna ñi; na cahun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yahá cutuhva yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra.

² Tan na ña ndoo yo vaha tsihin tuhun tsa cutuhva yo cuenda tsa tsicoondutyá yo, tan tsa tyisó ndaha yo siqui nyivi tsinú iñi tsi Nyoo

na nasoco ra tsi ñi, tan tsa cuenda tsa cua nandoto tandihí nyiví tsa yaha cúu ñi, tan tsa cuenda tucu tsa cua cutuñi tandihí nyiví nuu Nyoo tan yihí ñi cua cuhun cuii ñi anyaya. Na ña ndoo yo vaha tsihin yacan ñi.

³ Nacuhun ca yo ityi nuu tatun Nyoo tsaha ra ndatu.

⁴ Tyin nyiví tsa tsa yaha naquihin cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí li Nyoo añima ñi.

⁵ Tan tsitó ñi tyin vaha tuhun Nyoo. Tan tsa nyehe ñi juhva nácaa cua cuví tsa cua coo yo nu ñuhu ñayiví tsa, tyin ñihí ñi tunyee iñi tsa iyó tsi Nyoo.

⁶ Tatun tsa naquihin cuenda ñi tandihí yacan, yaha can tan jandihí ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa tyaa ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyiví.

⁷ Añima nyiví cuví tsi tumaa ñuhu nu jahá tyiñu nyiví, tyin tandihí ñi tsaha tsa cuún savi, nacohó ñuhu can ndutya savi can. Tatun vaha ñuhu can, vaha tsicoó tsa tatsí nyiví, tan nasocó Nyoo ñuhu can.

⁸ Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itsi. Tacan cua tahan nyiví tsa jandihí tsa tsinú iñi tsi Nyoo.

⁹ Yañi, vasu ndi maa caahán

ndi tacan, maa tyin tsitó vaha ndi tyin nyoocho nasocó Nyoo tsi ndo tyin jacacú ra Cristo tsi ndo.

¹⁰ Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñí xaan ndo tsi nyiví yihí cuenda ra, tan nyehé tucu ra tyin tsa yaha xaan jatyinyee ndo tsi ñi, tan ndi jatyinyee ca ndo tsi ñi vityin.

¹¹ Cuñí ndi tsa jañihi ca ndo ndu iin iñi ndo nda cuanda quitsi Jutu Mañi yo, tyin tacan tan ñihi ndo tandihí tsa ndatú ndo.

¹² Ña cuñí ndi tsa jutsan xaan jaha ndo tsi ndo, maa tyin cuñí ndi tsa coo ndo tumaa iyó nyiví tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatú ñi, tan ñihí ñi tsa catyí Nyoo tyin cuhva ra tsi yo.

¹³ Tyin quiví tyihí Nyoo cuhva tyin cuhva ra tsa cua cuhva ra tsi ra Abraham, tsatyiñu ra juvin ñi sivi maa ra, tyin ña cuví cuatyíñu ra náa inga ca sivi tyin nduve nyiví cahnu ca cuví tan ñavin ca maa ra.

¹⁴ Tan catyí ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuví jaha yu”, catyí ra tsihin ra.

¹⁵ Ra Abraham ñihí ra tsa catyí Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé iñi ra ndatú ra can.

¹⁶ Iin nyiví tun tyihí ñi cuhva tsa cuhva ñi tsa cua

cuhva ñi tsi yo, tsatyíñu ñi sivi iin nyivi cahnu ca cuví tan ñavin ca maa ñi. Tsihin yacan ndoó ñi tuhun tsihin yo.

¹⁷ Nyoo tsatyíñu ra juvin ñi sivi maa ra quivi catyi ra tyin cuhva ra tsa cuhva ra tsi nyivi ra. Javaha ra tacan tyin cuñi ra tsa coto ñi tyin cua jandaa ra tsa cahan ra tsihin ñi tan ña cua nasamá tuhun cahan ra.

¹⁸ Tan iyó uvi taahan tsa ña cuví nasama. Iin tsi cuví tsa cuhva Nyoo tsa catyi ra tyin cuhva ra tsi yo, tan inga tsi cuví tsa tsatyíñu ra juvin ñi sivi maa ra. Nyoo ña vatya ra. Yacan cuenda tandihi yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihi yo tsa catyi ra tyin cuhva ra tsi yo.

¹⁹ Tumaa iin yutun ndoo tsa tsicá nuu ndutya ñuhu nuuhñi tsi tsihin iin caa vee coto cahun tsi tsihin tatyí, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuví tsi tumaa tsa nuuhñi yo tsihin Nyoo ra nyaá Nu Ii Xaan inga tsiyo nu natahvi sava jahá jahma.

²⁰ Ican quihvi ra Jesús tyin tacan tan nuña ra ityi cahun yo nu nyaá Nyoo. Tan ña cua cundihí maa tsa cuví ra Jesús jutu tsaahnu cuví ityi nuu, tumaa cuví ra Melquisedec.

7

Ra Jesús cuví ra jutu tumaa cuví ra Melquisedec

¹ Ra Melquisedec tsa caahán yu tuhun ihya, juvin ra cuví rey ñuu Salem, tan cuví tucu ra jutu cuenda

Nyoo, ra cahnu ca cuví tan ñavin ca tandihí tsa iyó. Quivi tsa vatsí nuhu ra Abraham naha ra tsa yaha tsahan ra naha tsicañi tahan ra naha tsihin ra cuví rey naha ra, tan jahá canaa ra naha, ra Melquisedec jatahan ra tsi ra naha tan nasoco ra tsi ra Abraham.

² Tan cuaha tsa ñihí ra Abraham nu tsahan ra tsicañi tahan ra. Tsitsi tsa utsi utsi nuu tsa ñihí ra, tsaha ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuví tucu ra rey ñuu Salem, tan Salem cuñi tsi catyi “tsa taxin”. Yacan cuenda cuví ra: “Rey tsahá tsa taxin.”

³ Ra Melquisedec nduve jutu ra tan sihi ra. Ña caahán tsi tun iyó nyivi ra, tan ndi ña caahán tsi ama cacu ra, tan ama tsihi ra. Yacan cuenda cuví jandu inducu yo tsi ra tsihin Sehe Nyoo, tyin ña tsindihí maa tsa cuví ra jutu.

⁴ Nyehé yo ihya vityin tyin cahnu xaan cuví ra Melquisedec, tyin tsaha ra Abraham juhva tsa ñihí ra nu tsicañi tahan ra tsi ra.

⁵ Tun tsatyin tata ra Abraham cuví ra Melquisedec, tan cuví ra jutu, ña iyo cua cuñi yo tsa tsaha ra Abraham juhva tsa ñihí ra tsi ra, tyin tsa yaha cuaha cuiya tan tsaha Nyoo ley tsi nyivi tata ra Abraham. Tan catyi ley can tyin taahán tsi cuhva juhva tsa ñihí ñi tsi ra jutu tsa cuví tata ra Leví naha ra, vasu ndi maa iin ñi nyivi cuví ñi tsihin

ra naha tyin juvin ñi tata ra Abraham cuví ra naha.

⁶ Ra Melquisedec, vasu ndi maa ñavin tata ra Leví, tan tata ra Abraham cuví ra, maa tyin naquihín cuenda ra juhva tsa ñihí ra Abraham. Tan nasoco ra Melquisedec tsi ra Abraham, ra tsa catyí Nyoo tsihin tyin cua cuhva ra tsa cuhva ra.

⁷ Tan tsitó catsi yo tyin cahnu ca cuví ra tsa nasocó, tan ñavin ca ra tsa nasoco ra.

⁸ Nyehé yo tyin cahnu ca cuví ra Melquisedec tan ñavin ca tandihí ra tsa quihín cuenda intuhun intuhun tsitsi tsa utsi utsi tsa ñihí nyívi, tyin rayíi ñuhu ñayívi ihya ñi cuví ra naha, tan tuhvá ra naha tsiihí. Maa tyin caahán tsi nu tutu Nyoo tan catyí tsi tyin ra Melquisedec nyito ra.

⁹ Ra Leví tsihin sehe ra, tata ra Abraham cuví ra naha. Juvín ra naha cuví jutu tsa naquihín tsa intuhun intuhun tsitsi tsa utsi utsi tsa ñihí nyívi. Cuví catyí yo tyin tandihí ra can naha ra tyahví ndihí ra naha tsi ra Melquisedec quívi tyahví ra Abraham tsi ra.

¹⁰ Cuví catyí yo tyin tyahví ndihí tata ra Leví tsi ra Melquisedec quívi ñihí tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quívi can.

¹¹ Ra jutu tata ra Leví tsa cuví tucu tata ra Aarón, juvín ra naha jacuahá ley tsahnu Nyoo tsi yo. Vaha vityin; tun tsatyin cuví janduvahá ra jutu can naha ra tsi nyívi ny-

icún ley can, ña ñiñi cuñí tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec.

¹² Tyin tun nasamá Nyoo tsi ra cuví jutu, nasamá tucu ra ley ra.

¹³ Jutu Mañi yo tsa caahán tutu Nyoo tuhun, tata inga ra sehe ra Israel cuví ra. Tan ndi intuhun tata ra can tan ña cuví ra naha jutu.

¹⁴ Tsitó vaha yo tyin Jutu Mañi yo tata ra Judá tsi ra, tan ra Moisés ña cahan ra tuhun tata ra Judá quívi cahan ra tuhun ra cuví jutu naha ra.

¹⁵ Nditsa tsa nasama Nyoo tsi ra jutu tyin jaquitsí ra iin jutu tumaa ra Melquisedec.

¹⁶ Ra jutu ihya ña quitsí ra tumaa catyí ley tsahnu, tyin ley can catyí tsi tyin maa ñi tata ra Leví taahán tsi cuví jutu, tan ra can ñavin tata ra Leví cuví ra. Maa tyin iyó tunyee iñi tsi ra tsa coo cuii ra, yacan cuenda juvín ra jaquitsí Nyoo.

¹⁷ Tyin tyehen caahán Nyoo tuhun ra:

Yooho ña cua ndihí maa tsa cuví un jutu,

tyin cuví un jutu tumaa ra Melquisedec.

¹⁸ Yacan cuenda naco Nyoo ley tsahnu can tyin ña cuví jatyinyeé tsi tsi nyívi, tan ña cuví cacu nyívi jahá tsi.

¹⁹ Ley can ña cuví janduvahá tsi tsi nyívi nu Nyoo. Yacan cuenda tsaha ra inga tsa vaha ca tsi yo. Tan tsa vaha ihya jatyinyeé tsi tsi yo tsa cuví natuhún yo tsihin Nyoo. Yacan cuenda nyitá iñi yo tuhun

can, tan tuhun can cuví ra Cristo.

²⁰ Nyoo cahan catsi ra tyin tacan cua cuvi, tan tacan cuvi.

²¹ Tandihí ca maa ra jutu tsa iyó vityin naha ra nduve náa cahan Nyoo tuhun ra naha. Maa tyin quivi tsaha Nyoo tsi ra Cristo tsa cuví ra jutu, cahan catsi ra tsihin ra tumaa caahán nu tutu ra tyehen:

Cahan catsi Jutu Mañi yo,
tan ña nasama ra tsa
cahan ra nu catyi ra
tyehen:

“Yooho ña cua ndihí maa tsa
cuví un jutu,
tyin cuví un jutu tumaa ra
Melquisedec”, catyi
Nyoo.

²² Tsa cuenda tsa javaha ra Cristo, tan tsitó yo tyin vaha ca tyiñu ndoo Nyoo tsihin yo tan ñavin ca tsa jihna ñi can.

²³ Jutu tsa cuví tata ra Leví cuaha xaan ra naha tsa cuenda tyin tun tsihi iin ra, nacosó inga ra.

²⁴ Maa tyin ra Jesús nduve tuhun tsihi iyó tsi ra, yacan cuenda ña tsindihí tsa cuví ra jutu.

²⁵ Tan tsa cuenda yacan cuví jacacu ra tsi nyivi tsa nanducú tsi Nyoo. Tan tsahá ra tsa coo cuii ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

²⁶ Ra Jesús cuví jutu tsaahnu cuví ityi nuu tsa tsiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quitá tsiyo ra nu iyó nyivi iyó

cuatyí tan nandaá ra ityi siqui andivi.

²⁷ Ra Jesús ñavin tumaa inga ra jutu tsaahnu can naha ra cuví ra, tyin ra ican naha ra cuñí tsi cahñi ra naha quiti tan jamañi ra naha nuu Nyoo tandihí ñi quivi. Jihna ca jamañi ra naha quiti tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyivi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo.

²⁸ Ley Nyoo tsa naquihin cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quiti ley can, cahan catsi Nyoo tan ndoo ra iin tuhun tsa tsihin yo. Tan tsaha ra tsi Sehe ra tsa cuví ra jutu tsaahnu cuví ityi nuu ca. juvin ra cuví ra vaha tan ña cua cundihí maa tsa vaha ra.

8

Quivi tsihi ra Jesús tsa cuenda yo tan ndoo Nyoo tuhun tsa tsihin yo

¹ Yacan tuhun ihya cuví tsa ñiñi ca caahán yu: Ra jutu tsaahnu tsa iyó tsi yo ndi in-tuhun cuatyí ra nduve iyó, tan juvin ra tsinyaá nu tyayu tsa nyaá xiin cuaha Nyoo nda gloria.

² Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javaha tan ñavin vehe ñuhu tsa javaha nyivi. Tyin vehe ñuhu tsa javahá

nyivi cuví tsi tixahñu tsa vaha tsa iyó nda gloria.

³ Tandihí ra jutu naha ra, cuñí tsi cahñi ra naha quiti tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyivi. Yacan cuenda cuñi tsi jamañi ra Jesucristo tsa jamañi ra nuu Nyoo.

⁴ Tun tsatyin nyí ra nu ñuhu ñayivi ihya, ndi ña cuvi cuvi ra jutu. Tyin nu ñuhu ñayivi ihya, iyó ra jutu tsa jamañi nuu Nyoo tsa catyí ley tsa tyaa ra Moisés tyin jamañi ra naha.

⁵ Ra jutu tsa iyó nu ñuhu ñayivi ihya naha ra, jahá tyiñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yo tyin tixahñu ñi cuví tsi, tyin tañan tsanaha quivi tsa cua javaha ra Moisés vehe ñuhu jahma, catyi Nyoo tsihin ra tyehen: “Jaha cuenda vaha, tan javaha tandihí tumaa janaha yu tsi un quivi tsahan un yucu Sinai”, catyi Nyoo tsihin ra.

⁶ Maa tyin ra Cristo ra cuví jutu tsahnu cuví ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoó Nyoo tuhun vaha xaan ca tsihin yo, tan vaha ca tsa tsahá ra tsi yo.

⁷ Tun tsatyin cuví cacu yo jahá tuhun tsa ndoo jihna Nyoo tsihin yo, ña cuñí tsi tsa ndoo ra inga tuhun tsaa tsihin yo.

⁸ Maa tyin Nyoo nyehe ra

tyin ña vaha javahá nyivi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsaa quivi

cua ndoo yu tuhun tsaa tsihin nyivi Israel tan nyivi Judá.

⁹ Maa tyin ñavin tumaa tuhun tsa ndoo yu tsihin tsiit saahnu ñi,

quivi tin yu ndaha ñi tan tava yu tsi ñi ñuhu Egipto.

Ña javaha ñi tuhun ndoo yu tsihin ñi,

yacan naco ihñi yu tsi ñi, catyí Nyoo Jutu yo.

¹⁰ Tuhun tsaa tsa cua ndoo yu tsihin nyivi Israel nu cuahán ca tsi ityi nuu, cuví tsehe, catyí Nyoo Jutu yo:

Cua tyihi yu ley yu tsitsi tsa tsiñi tuñi jiñi ñi,

tan cua tyaa tucu yu itsi añima ñi.

Tacan tan cua cuvi yu Nyoo ñi,

tan maa ñi cua cuvi nyivi yu.

¹¹ Tacan tan ña ñiñi ca tsa jacuahá ñi tsi inga ñi, na nacoto ñi tsi yuhu tsa cuví yu Nyoo ñi.

Tyin tandihí ñi tan cua nacoto ñi tsi yu,

ñi nyihi tan nda cuanda ñi tsahnu.

¹² Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyí Nyoo Jutu yo.

¹³ Quivi tsa cañan Nyoo tyin cua ndoo ra tuhun tsaa tsihin yo, tsa jandutsahnu ra

tuhun tsa jihna ñi can. Tan tuhun tsa ndutsahnú tsa cua cundihi tsi.

9

Nu janahá tsi nácaa iyó vehe ñuhu tsa iyó nu ñuhu ñayivi tan vehe ñuhu nu cuví nda gloria

¹ Quivi ndoo Nyoo tuhun tsa jihna ñi tsihin nyivi, tsaha ra cuhva nácaa jacahnu ñi tsi ra, tsitsi vehe ñuhu tsa tsicoo nu ñuhu ñayivi ihya tahan tsanaha.

² Tyehen tsicoo vehe ñuhu can: Tsitsi vehe tsa jihna ñi nyaá candileru, tan nyaá mesa nu yucu paan ii. Tan yacan tsinañi Vehe Ii.

³ Tan vehe tsa tsinu uvi tsinañi Vehe Ii Xaan.

⁴ Tsitsi vehe can tsinyaa altar xuhun cuaan nu tsahmi ra jutu cutu. Tan tsinyii tucu tsatun cuenda tsa ndoo Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyii yatsin xuhun cuaan nu yihí maná. Tan tsinyii yutun tsa tsindahá ra Aarón tsa quitá ita nuu. Tan tsiyucu tucu yuu nu nyaá tsa utsi ley Nyoo.

⁵ Tan siqui tsatun can tsinyaa tsa caá tumaa caá ángel, tan cuñi tsi catyí tyin nyaá Nyoo ican. Nditsin ángel can tyasi nu tuhvá Nyoo jahá tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

⁶ Tacan tsicoo vehe ñuhu can. Tandihí ñi quiivi quihví ra jutu naha ra tsitsi Vehe Ii, tan jacahnú ra naha tsi Nyoo.

⁷ Maa tyin Vehe nu Ii Xaan, intuhun ñi maa ra jutu tsaahnu cuví ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñi tsi cundaha ra ñiñi quití tyin jamañi ra itsi tsi Nyoo tsa cuenda cuatyí maa ra tan cuenda cuatyí nyivi, ñi tsa javahá soho ñi maa cuatyí.

⁸ Tan tsa tacan tsicoo yacan Tatyí Ii Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe Ii cuñi tsi catyí tyin ñaha ca nuña ityi quihví ndaa nyivi tahan ñi maa tsi tsitsi Vehe nu Ii Xaan.

⁹ Tandihí yacan cuví can tumaa tixahñu tuhun tsa tsa ndoo Nyoo tsihin yo vityin. Tahan tsanaha jamañi nyivi tsa jamañi ñi nu Nyoo maa tyin ña jatyinyee can tsi nyivi tsa jacahnú tsi Nyoo tsihin can, tsa caca vaha iñi ñi.

¹⁰ Tyin tandihí tsa javahá nyivi can caahán tsi maa ñi tsa cuenda tsa tsahá Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsahá ra tsa javahá ñi tacan tsa numi ñi, nda tahan maa tsi quiivi cuhva ra tsa vaha ca.

¹¹ Vityin tsa yahá quitsi ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyivi. Yacan cuñi tsi catyí tyin ñavin vehe ñuhu iyó nu ñuhu ñayivi ihya cuví nu

quihv̄i ra.

12 Ra Cristo quihv̄i ra tsitsi Vehe Ii Xaan. Maa tyin ña quihv̄i ra tsihin tsa jamañi ra niñi mbee lee, o niñi indiqui lee. Quihv̄i ra tsihin niñi maa ra, tan iin tsaha ñi quihv̄i ra tan ña cuñi ca tsi tsa cuenda quihv̄i ñi ra tyin jamañi ra niñi maa ra. Tsihin yacan jacacú cuii ra tsi yo.

13 Ra jutu naha ra tuhv̄a ra naha quit̄i niñi toro, niñi mbee, tan nyaa nu cayú indiqui lee tsi nyivi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá añima ñi.

14 Tun tacan jatyinyee niñi quit̄i can tsi nyivi, cuñi tsi catyi tyin jniñi ra Cristo cahnu ca tunyee iñi iyó itsi! Tyin nduve cuatyí ra tsicoq tan jamañi ra juvin ñi tsi maa ra nuu Nyoo jahá Tatyí Ii tsa ña cua cúu maa. Tan niñi ra quih̄in nyaa tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsihi tsi yo, tan cuví jaha tyiñu yo tyiñu Nyoo nyito.

15 Yacan cuenda ra Jesucristo cuví ra caahán ndaahvi tsaha yo tsa cuenda tuhun tsa tsa ndoo Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javahá yo quivi yih̄i ndaha tuhun jihna ñi can tsi yo. Tyin tacan tan yoo, tsa cana Nyoo cuví naquihin cuenda yo ñayivi tsa ña cua naa maa coo yo, tsa catyi ra tyin cuhva ra tsi yo.

16 Tun iin nyivi tsihi tan nacoq ñi iin tutu nu tsahá cuenda ñi yoo nyivi cua naquihin tsa iyó tsi ñi, nyivi tsa cua naquihin ndaha tyiñu can cuví naquihin ñi can, maa tyin cuñi tsi janaha ñi iin tutu cuví tsandaa tyin nditsa tsa tsa tsihi ra tsa javahá tutu can.

17 Maa tyin tun ndi nyito ra jatsii ndaha tyiñu can, ña cuví naha naquihin ñi ndaha tyiñu ra.

18 Yacan cuenda quivi ndoo Nyoo tuhun tsahnu can tsihin nyivi Israel, tsahñi ra jutu naha ra quit̄i tan tsati niñi ti naha ti.

19 Tsa ndihi tsahá cuenda ra Moisés ley Nyoo tsi tandihi nyivi, tan quih̄in ra jahma cuaaha tsa tsinu tsihin ixi mbee ticatyí tan iin soco yutun luhlu tsa nañi hisopo, jatyi ra can tsitsi nu yih̄i niñi indiqui lee tan niñi mbee luhlu tsa saca nuu tsihin ndutya. Tacan tan quit̄i ra niñi can nu libru nu nyaá ley Nyoo tan quit̄i ndihi tucu ra can tsi nyivi.

20 Tacan tan catyi ra tsihin ñi tyehen: “Niñi ihya cuví tsandaa tsa cuenda tsa ndoo Nyoo tuhun tsihin yo”, catyi ra.

21 Tan juvin ñi quit̄i tucu ra Moisés niñi can vehe ñuhu jahma can tan tandihi ndaha tyiñu tsa tsatyíñu ra jutu naha ra tsa jacahnú ra naha tsi Nyoo.

22 Tacan javahá ra naha tyin catyi ley Nyoo tyin tsa yatyin tandihi tsa iyó tan cuñi tsi nduvaha can nuu Nyoo tsi-

hin niñi. Juvín ñi catyí tucu tsi tyin tun ña cati niñi ña cua jaha Nyoo tucahnu iñi tsi nyivi.

Niñi ra Cristo nacatyá cucatyí yo

23 Javaha ra jutu naha ra tacan tyin cuñí tsi tsa nduvaha tandihi ndaha tyiñu tsa cuví tixahñu tsa iyó nda gloria tsihin niñi quití. Maa tyin tandihi tsa iyó nda gloria, cuñí tsi nduvaha can tsihin niñi vaha ca, ñavin tsihin niñi quití ñi.

24 Ra Cristo ña quihví ra tsitsi vehe ñuhu tsa javaha nyivi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tsihin Nyoo tsa cuenda yo.

25 Ra jutu tsaahnu cuví ityi nuu cuenda nyivi Israel quihví ra naha tsitsi Vehe Ii Xaan iin tsaha ñi tsa iin iin cuiya tyin jamañi ra naha niñi tsa ñavin niñi maa ra naha cuví. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo.

26 Tun tsatyin tacan, cuñí tsi tsa cuenda quitsi ñi ra nyehe ra tundoño tan cúu ra nda tsa tsinu ñuhu ñayivi tan nda cuenda vityin. Maa tyin vityin tsa tsa cuyatyin cundihí ñuhu ñayivi ihya, iin tsaha ñi quitsi ra Cristo, tan jamañi ra tsi ra tyin tacan tan cuví quihin nyaa ra cuatyí yo.

27 Tumaa cua tahan yo: iin tsaha ñi cua cúu yo. Yaha can tan cua cutuñi yo.

28 Tacan iin tsaha ñi tsihi ra Cristo, tan quihin nyaa ra cucatyí cuaha xaan nyivi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cucatyí, tyin cua quitsi ra quitsi jacacu ra tsi nyivi ndatú tsi ra.

10

1 Ley Nyoo tsa tyaa ra Moisés cuví tsi tumaa iin tixahñu tsa vaha ca tsa cua quitsi. Tsa catyí ley can, ña cuví janduvaha tsi tsi nyivi nanducú tsi Nyoo tyin maa ñi maa niñi quití jamañi ra jutu tsaahnu cuví ityi nuu naha ra tan iin tan iin cuiya. Tan ña cuví cacu yo tsihin yacan.

2 Tun tsatyin cuví janduvaha ley can tsi nyivi, cua cundihí tsa jamañi ra jutu naha ra niñi quití tandihi ñi cuiya. Tyin tun tsa nduvaha nyivi tsa tsaha quití can iin tsaha tsa cuenda tandihi maa, ña cua caca ca iñi ñi tun iyó cuatyí ñi tan ña cuñí ca tsi tsa jamañi ra jutu niñi quití tsa cuenda ñi inga tsaha.

3 Maa tyin tsa jamañi ra jutu naha ra niñi quití tan iin tan iin cuiya, janducuhún iñi tsi tsi nyivi tyin iyó cuatyí ñi.

4 Tyin niñi indiqui tan niñi mbee lee, ña cuví nacatya can cuatyí nyivi.

5 Yacan cuenda catyí tutu Nyoo tyin ra Cristo cahan ra tyehen tsihin Nyoo:

Ña cuñí un tsa jamañi nyivi quití nuu un,

yacan cuenda tsaha un tsa coo cuñu ñuhu yu.

6 Tyin ña taahán iñi un tsa cahmi ñi quití tan jamañi ñi nuu cun tan quihin nyaa un cuatyí ñi.

7 Tacan tan catyí yu: “Nyoo Jutu yu, va yu ihya, vatsí yu vatsí javahá yu kuhva cuñí maa un tumaa nyaá tuhun yu nu libru ley maa un”, catyí ra Jesucristo.

8 Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyivi quití nuu ra. Ndi tsa cahmi ñi quití tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñí tsi jamañi nyivi quití nuu ra, catyí ra.

9 Yahá can tan catyí tucu ra: “Nyoo Jutu yu, va yu ihya, vatsí yu vatsí javaha yu kuhva cuñí maa un.” Tuhun ihya cuñí tsi catyí tyin quitsí ra jatsiyó cuii ra tsa jamañi nyivi tan jamañi ra tsa vaha ca.

10 Tsa cuenda tsa javahá ra Jesucristo kuhva cuñí jutu ra tan janduvahá jutu ra tsi yo. Tsa javahá ra cuvi tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyivi.

11 Tandihí ñi quivi tan jamañi ra jutu cuenda nyivi Israel naha ra quití nuu Nyoo, tan cuaha xaan tsaha jamañi ra naha iin ñi maa nuu quití maa tyin ña cuvi quihin nyaa can cuatyí nyivi.

12 Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí

yo. Tacan tan tsinyaa ra nu tyayu nyaá xiin cuaha Nyoo.

13 Tan ndatú ra nda cuanda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu.

14 Tyin tsihin tsa jamañi ra tsi ra iin tsaha ñi tan janduvahá ra tsi nyivi yihí cuenda ra yoso cuahán quivi.

15 Tatyí Ii Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

16 Tuhun tsaa tsa cua ndoo yu tsihin nyivi quivi can, tyehen cua cuvi tsi, catyí Jutu Mañi yo:

Cua tyihi yu ley yu tsitsi añima ñi,

tan cua tyaa yu itsi tsitsi tsa tsiñi tuñi iñi ñi, catyí ra.

17 Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

18 Yacan cuñí tsi catyí tyin tsa yahá jahá Nyoo tucahnu iñi tsi yo. Yacan cuenda ña cuñí ca tsi cahñi yo quití, tan jamañi yo nuu Nyoo tsa cuenda cuatyí yo.

Cuñí tsi nanducu yo tsi Nyoo

19 Yacan cuenda yañi, vi-tyin cuvi quihvi yo tsitsi Vehe Ii Xaan nu nyaá Nyoo, tsa cuenda niñi ra Jesucristo tsa tsatí. Tsihin niñi can nacatya ra cuatyí yo.

20 Tan nuñá ra ityi tsaa, tan iin ityi kuhun yo nu coo nyito yo. Tyin kuhva tsa tsihi ra tan ndatá jahma tsa tyasí tsa ña

nyehē ndo tsi nyiví tsiyucu vehe caa. Cunyee ñi ndo nyehē ndo tundoho tsihin tsa sñi cuñí ndo quiví quihñi nyaa nyiví ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundihi maa can.

³⁵ Yacan cuenda ña jandihí ndo tsa nyitá ñi ndo tsi ra Cristo, tyin nu cuahán ca tsi tan cua ñihi ndo tsa vaha ca tyin tsinú ñi ndo tsi ra.

³⁶ Cuñí tsi coo tsa taxin añima ndo tsitsi tsa cunyee ñi ndo tyin tacan tan cuví javaha ndo cuhva cuñí Nyoo, tan naquihin ndo tsa catyí ra tyin cuhva ra tsi yo.

³⁷ Tyin nu tutu Nyoo catyí tsi tyeheh:

Ña naha ca
tan quitsi ra tsa nyaá quitsi,
tan ña cua cucuee ca
ra.

³⁸ Tan catyí Jutu Mañi yo tyeheh: “Nyiví naquihín cuenda yu tumaa tsatyin vaha ñi, tsihin tsa tsinú ñi ñi tsi yu tan cua coo nyito ñi.

Maa tyin tatun jandihí ñi tsa tsinú ñi ñi, ña sñi cua cuñi yu tsihin ñi”, catyí Nyoo.

³⁹ Maa tyin yoo ña javahá yo tumaa javahá nyiví jandihí tsa tsinú ñi tsi Nyoo, tyin yoo tacan ñi maa tsinú ñi yo tsi ra tan tsa cuenda tsa tsinú ñi yo cua cacu añima yo.

11

Cuhva cuñí tsi tsa tsinu ñi yo tsi Nyoo

¹ Tsa tsinú ñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú ñi yo tsi Nyoo.

² Juhva nyiví yo tsa tsicoo tahañ tsanaha quita vaha ñi nuu Nyoo tyin tsinu ñi ñi tsi ra.

³ Tsa cuenda tsa tsinú ñi yo tsi Nyoo, tan tsitó yo tyin javaha ra ñuhu ñayiví tsihin tuhun caahán ra. Tan tsitó yo tyin tahañ tsanaha tsinu tandihí tsa nyehé yo vityin tsihin tsa ña nyehé yo.

⁴ Tsa cuenda tsa tsinu ñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihin cuenda Nyoo tsi ra tumaa tsatyin vaha ra, tan naquihin cuenda tucu ra tsa jamañi ra. Vasu ndi maa ña nyito ca ra Abel, maa tyin tsiñi yo nácaa tsinu ñi ra.

⁵ Tsa cuenda tsa tsinu xaan ñi ra Enoc tsi Nyoo, tan naquihin Nyoo tsi ra tyin tacan tan ña nyehe ra tuhun tsihí. Tan ña nañihí ca nyiví tsi ra, tyin cuanuhu ra tsihin Nyoo. Catyí tsi nu tutu Nyoo tyin tsa ndi cumañi ca naquihin Nyoo tsi ra, maa ñi maa cuhva taahán ñi Nyoo javaha ra.

⁶ Maa tyin ña cuvi javaha yo tsa taahán ñi Nyoo tatun ña tsinú ñi yo tsi ra. Tyin tatun cuñí yo nanducu yo tsi ra, cuñí tsi tsinu jihna ñi yo tyin iyó ra, tan tsahá ra tsa vaha tsi nyiví nanducú tsi ra.

7 Tahān tsanaha jacoto Nyoo tsi ra Noé nāa cua cuvī ityi nuu. Vasu ndi maa ñaha ca coo can nyehé ra Noé, tsinū iñi ra tan javahā ra yutun ndoo tan ican cacū ra tsihin nyivi vehe ra. Nyivi tsa ña tyaa yahvi tsa cahan Nyoo, tatsj tuñi ra tsi ñi. Maa tyin jacacū ra tsi ra Noé tan nduvahā ra nuu ra tsa cuenda tsa tsinū iñi ra tsi ra.

8 Ra Abraham tsinū iñi ra tan tyaa yahvi ra tsi Nyoo quivi canā Nyoo tsi ra. Quita ra nu ñuhu ra tan cuahán ra nu ñuhu tsa cua kuhva cuii Nyoo tsi ra. Vasu ndi maa ña tsitó ra nu maa cuahán ra, maa tyin quitā ra nu ñuhu ra tan cuahán ra.

9 Tsa cuenda tsa tsinū iñi ra Abraham tsi Nyoo, tsicoo ra nu ñuhu tsa ñaha ca nacuhva cuenda Nyoo tsi ra. Tsicoo ra tsitsi vehe jahma ñi. Juvín ñi tacan tsicoo tucu ra Isaac, sehe ra, tan ra Jacob, sehe ra Isaac. Tyin juvín ñi catyi tucu Nyoo tsihin nduvi taahan ra can naha ra tyin cua kuhva ra ñuhu can tsi ra naha.

10 Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua kuhva Nyoo tsi ra. Tan ñuu tsa ndatú ra maa Nyoo tsaquín kuhva tsaha tsi tan samā itsi.

11 Tan juvín ñi tsa cuenda tsa tsinū iñi ña Sara tsa cahan Nyoo tsihin ña, tsicoo iin sehe ña. Vasu ndi maa tsa tsahnu xaan ña, cuvī tsicoo sehe ña tyin maa Nyoo tsahā tunyee iñi ra tsi ña. Tacan cuvī tyin tsinū iñi ña tyin cua cundaa tsa cahan Nyoo tsihin ña.

12 Yacan cuenda vasu ndi maa tsa cuñi cúu cuii ña ra Abraham, maa tyin tsicoo sehe ñasihi ra. Yaha can tan tsicoo cuaha nyivi tata ra. Tan yoñi maa cuvī nacahvi tsi ñi tyin cuaha xaan ñi, tumaa cuaha tiñuu iyó andivi tan tumaa cuaha nyiti iyó yuhu ndutya ñuhu.

13 Tandihí nyivi can tan nyivi tata ñi tsihi ñi tsa ndi cumañi ca naquihín cuenda ñi tsa catyi Nyoo tsihin ñi tyin kuhva ra tsi ñi. Vasu ndi maa ña ñihí ñi can, tsinū iñi ñi tyin cua kuhva Nyoo can. Yacan cuenda sñi cuñi ñi tyin tsitó ñi tyin coo quivi cua nyehe ñi can. Tan sñi tucu cuñi ñi caahán ñi tyin yahá ñi maa ñi nu ñuhu ñayivi ihya.

14 Tan tsa caahán ñi tacan, cuñi tsi catyi tyin ndi tsicá ñi nanducú ñi iin nu vaha ca coo ñi.

15 Tun tsatyin ñuhú iñi ñi ñuu ñi nu quitā ñi, cuvī cunuhu nyico ñi iin yaha ñi.

16 Maa tyin ña tsinuhū ñi ñuu ñi tyin cuñi ñi coo ñi ñuu vaha ca, tuhun ihya cuñi tsi catyi tyin cuñi ñi coo ñi nda andivi. Tan tsa tacan nducú ñi coo ñi nda gloria, ña cahán nuu Nyoo tsa cuvī ra Nyoo ñi tyin tsa janduvahā ra iin ñuu nu coo ñi.

17 Tsa cuenda tsa tsinū iñi ra Abraham tsi Nyoo, tyaa yahvi ra tsa cahan Nyoo tsihin ra tan jamañi ra tsi ra Isaac, sehe mañi ra, quivi nducū kuhva Nyoo tsi ra tun nditsa tsa tsinú iñi ra tsi ra. Javahā ra tacan vasu ndi maa catyi Nyoo tyehen tsihin ra:

18 “Tsa cuenda ra Isaac tan cua coo nyivi tata un.”

19 Vasu ndi maa cahan ra tacan tsihin ra Abraham, ra Abraham ña nayuhvi ra tsa cuhva cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quivi can tsa nyaá ra Abraham tsa cahñi ra tsi ra Isaac, sehe ra. Maa tyin Nyoo nacuhva cuenda nyico ra tsi ra Isaac tsi ra. Tan cuvi can tumaa tsa janandoto Nyoo tsi ra.

20 Juvín ñi tsa cuenda tsa tsinu tucu iñi ra Isaac tsi Nyoo, tan catyi ra tyin ra Jacob tan ra Esaú, sehe ra, cua ñihi ra naha tsa vaha nu cuahán ca tsi.

21 Tsa cuenda tsa tsinu iñi ra Jacob tsi Nyoo, tan catyi ra tyin nduvi taahan sehe ra José cua ñihi ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnu ra tsi Nyoo tyin tsa tsahnu xaan ra.

22 Juvín ñi tsa cuenda tsa tsinu iñi ra José tsi Nyoo, catyi ra tsa tsa cuñi cúu ra tyin cua quita nyivi ra, ñi Israel, ñuhu Egipto. Tan tsaha cuenda tucu ra tsi nyivi tyin quivi quita ñi na quihin ñi yiqui ra cahun tsihin ñi.

23 Tsa cuenda tsa tsinu iñi jutu ra Moisés tan sihi ra tsi Nyoo, tyihj xeehe ñi tsi ra uñi yoo tyin nyehe ñi tyin sii xaan caá ra. Ña nayuhvi ñi tsa cahan ra rey tyin cuñi tsi cúu tandihi sehe yi nyivi [tsa cuenda tyin tsitó ñi tyin cua jacacu Nyoo tsi ra].

24 Tsinu tucu iñi ra Moisés tsi Nyoo. Yacan cuenda quivi tsahnu ra, ña cuñi ca ra cuvi ra sehe ñaha cuvi sehe ra rey ñuhu Egipto.

25 Tan nacoo ra ñuhu Egipto can tyin ña cuñi ra cusii iñi ra tsihin tsa javaha ra tsa caquiñi. Tan nacatsj ra tsa cua nyehe ra tundoho tsihin nyivi Nyoo tan ñavin ca tsa cusii iñi ra tsihin tsa tsindihí ñi maa.

26 Tsa cuenda ra Moisés, vaha ca tsa cuca ra Cristo tan ñavin ca tandihi tsa cuca tsa iyó Egipto. Yacan cuenda sii cuñi ra nyehe ra ticanuu tsa cuenda ra Cristo tyin tsitó ra tyin cua ñihi ra tsa cua cuhva Nyoo tsi ra.

27 Juvín ñi tsa cuenda tsa tsinu iñi ra Moisés tsi Nyoo, ña nayuhvi ra quita ra ñuhu Egipto, vasu ndi maa cuxaan ra rey tsi ra. Tan cunyeë xaan iñi ra tyin tumaa tsatyin nyehe ra tsi Nyoo tsa ña nyehe yo.

28 Juvín ñi tsa cuenda tsa tsinu iñi ra tava tyiñu ra na jacahnu tandihi nyivi Israel vico tan cahñi ñi iin mbee ticatyí luhlu. Tan tava tyiñu tucu ra na cahyi ñi niñi mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu nyivi Egipto, ña cahñi ra ndi intuhun sehe nuu maa ñi.

29 Tsa cuenda tsa tsinu iñi ñi Israel tsi Nyoo tan yaha sava ñi nu Ndutya Ñuhu Cuaaha tumaa nu ñuhu ityi. Ra Egipto naha ra cuñi ndihi tucu ra naha yaha ra naha, maa tyin ña cuvi yaha

ra naha tyin nacası Nyoo ndutya ñuhu can sıquı ra naha tan tsihi ra naha jaha ndutya can.

³⁰ Juvın ñi tsa cuenda tsa tsinu iñi ñi tsico nduvi ñi utsa tsaha tsata ñuu Jericó, tan tandihi cuii maa nu sama tsaha ñuu can tani.

³¹ Juvın ñi tsa cuenda tsa tsinu iñi ña Rahab, ñaha sıi iñi tsica nuu tsa tsico Jericó, tan ña tsihi ña quıvi tsihi tandihi nyıvi ñuu ña. Ña tsihi ña tyin jatınyee ña tsi ra Israel ra tsa tsahan naha ra tsınyehę ñuu ña. Tandıhi ca ñi tsihi ñi tsa cuenda tsa ña tyaa yahvi ñi tsi Nyoo.

³² ¿Náa ca cua cahan yu vityin? Tyin ña cuyatyı yu cahan yu tuhun tandıhi ra naha, tumaa ra Gedeón, ra Barac, ra Sansón, ra Jefe, ra David, tan ra Samuel, tan ra cuvı ndusu yuhu Nyoo naha ra taha tsanaha.

³³ Tsa cuenda tsa tsinu iñi ra naha tsi Nyoo, tan yihı ra naha jaha canaa ra naha tsi inga ñuu nahnu. Tan yihı ra naha vaha xaan tsindaca ñaha ra naha nyıvi cuenda Nyoo. Yihı ra naha ñihı ra naha tsa catyı Nyoo tyin cuhva ra tsi ra naha. Yihı ra naha jatınyee Nyoo tsi ra naha quıvi nducu cahı ndicaha tsi ra naha.

³⁴ Yihı ra naha ña cayu ra naha jaha ñuhu tsitsi ono nu tyihı nyıvi tsi ra naha. Yihı ra naha cacu ra naha tan ña tsahı nyıvi tsi ra naha tsihin mityi. Yihı ra naha tsaha

Nyoo tunyee iñi tsi ra naha quıvi nduve tunyee iñi tsi-coo tsi ra naha, tan cuvı cañı taha ra naha tsihin nyıvi xaan iñi tsi ra naha tan jaha canaa ra naha tsi ñi.

³⁵ Tsicoo juhva ñiñaha, tsa nandoto nyıvi.

Juhva nyıvi tsınuhı ñi tan ndoho ñi jaha nyıvi, maa tyin vasu ndi maa tacan taha ñi, cunyeę xaan iñi ñi tan ña cuñı ñi ndoo nuña ñi. Nyıvi can catyı ñi tyin tun nacoo ñi tsi Nyoo ña cua nyehe ca ñi tundo, maa tyin ñi ıcan ña cuñı ñi tyin tsıtó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayıvi vaha ca.

³⁶ Inga ñi nyehe ñi tundo jaha nyıvi tyin cahan nyaa nyıvi can tsi ñi tan cañı ñi tsi ñi. Inga tucu ñi tsınuhı ñi tsihin cadena tan tsıyucu ñi vehe caa.

³⁷ Yihı ñi tsahı nyıvi tsi ñi tsihin yuu. Yihı ñi tsahı sava nyıvi tsi ñi tsihin cierra. Yihı ñi nducu cuhva nyıvi tsi ñi. Yihı ñi tsahı nyıvi tsi ñi tsihin mityi. Yihı ñi tsındıtsı ñi ñı mbee ticatyı tan ñı mbee; nduve jahma vaha ñi tsicoo tan ndi nduve vehe ñi. Ndaahvi xaan tsicoo ñi, tan tsicoo xaan ñi tucuihya iñi, tan nyehe ñi tundo jaha nyıvi tsa ña tsıtó tsi Nyoo.

³⁸ Tan nyıvi ndaahvi can vaha ca ñi nu Nyoo tan ñavin ca inga ca nyıvi. Tsica nu ndaahvi ñi nu tsıquı tan nu iyó yucu. Tsicoo ñi tsitsi cava tan tsitsi ñuhu.

39 Tandihí maa nyiví ndaahvi can vasu ndi maa vaha cahan Nyoo tuhun ñi tsa cuenda tsa tsinu iñi ñi tsi ra, maa tyin ña ñihí ñi tsa catyí ra tyin cuhva ra.

40 Tyin cuñí ra tsa ñihí ndihí ñi tsa vaha ca tsa tyaa ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

12

Na cuita iñi yo tsi intuhun ñi maa ra Jesús

1 Tandihí nyiví can quita vaha ñi nuu Nyoo tyin tsinu iñi ñi tsi ra. Tan vityin jandu iin ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñí tsi nacoo yo tandihí tsa jatyañú tsi yo, tan tandihí cuatyí tsa tuhvá jandavi ñaha tsi yo. Tan na cunyeē iñi yo cuhun yo ityi nuu ca tsihin Nyoo tsihin tsa taxin iyó añima yo.

2 Na nyehe yo tsi intuhun ñi maa ra Jesús tyin juvin ra jatyinyeé tsi yo tsa tsinú iñi yo tsi ra, tan tsahá tucu ra tandihí cuhva taahán tsi tsinu iñi yo. Ra Jesús cunyeē xaan iñi ra nyehe ra tundoho tan ña tyaa yahvi ra ticanuu tsa cua tahan ra tsa cúu ra nu cruu tumaa tsiihí iin nyiví iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumañi ca cúu ra, tan tsa tsitó maa ra tyin sii xaan cua cuñi ra tsa yaha cúu ra.

3 Jaha ndo cuenda cuhva tsicoo ra Jesús, tyin ra Jesús

nyehē xaan ra tundoho jaha nyiví iyó cuatyí, maa tyin cunyeē iñi ra. Tacan tucu nyoooho, ña cundihí iñi ndo tan ña ndu uvi iñi ndo tsa nyicún ndo tsi ra.

4 Tyin nyoooho ñaha ca nyehe ndo tundoho tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi.

5 ¿A tsa naa iñi ndo nácaa jaquihín ityi Nyoo tsi yo tsa cuví yo sehe ra? Catyí ra nu tutu ra tyehen:

Sehe luhlu yu, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihya iñi un tatun cuxaán yu tsi un.

6 Tyin yuhu jaquihín ityi yu tsi nyiví cuñí yu, tan tatsí tuñi yu tsi nyiví cuví sehe yu, catyí Nyoo.

7 Janyee ndo iñi ndo tan nducu ndo cuhva cutuhva ndo tun jaquihín ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandihí nyiví iyó sehe, jaquihín ityi ñi tsi sehe ñi.

8 Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juvin sehe vaha ra cuví yo.

9 Tan inga tucu tuhun, tsa ndi nyihí yo, jutu yo nu ñuhu ñayiví ihya jaquihín ityi ra naha tsi yo, tan jaha yo tsa ñayiví tsi ra naha. Tan vihi ca cuñí tsi tyaa yahvi yo tsi Jutu

yo Nyoo, tyin tacan tan cuvi coo cuii yo.

¹⁰ Jutu yo tsa iyó nu ñuhu ñayivi ihya, jaquihín ityi ra naha tsi yo tsa cuenda juhva ñi quivi, tan javahá ra naha can kuhva cuñí maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra.

¹¹ Nditsa tyin tsa ndi cuxaán Nyoo tsi yo nyehé yo tundoho. Maa tyin tun cutuhva yo javaha yo tsa vaha tsihin tsa nyehe yo tundoho can, cua quita vaha yo.

Ica xaan tun ña tyaá yahvi yo tsa caahán Nyoo tsihin yo

¹² Yacan cuenda ña ndu uvi iñi ndo tsa javaha ndo tsa cuñí Nyoo javaha ndo, tan ña nducuiihya iñi ndo.

¹³ Nducu ndo kuhva coo vaha ndo tsihin Nyoo, tan kuhva caca vaha ndo tsihin ra. Tyin tacan tan kuhva ra tunyee iñi tsi ndo tan nduvaha ndo nuu ra tan ña cuiihya ca cua cuñi ndo.

¹⁴ Jañiñi ndo tsi ndo tan coo vaha ndo tsihin tandihi nyivi. Nacoo ndo tandihi tsa ña vaha. Tyin nyivi tsa ña nacoo tsa ña vaha ña cuvi nyehe ñi tsi Nyoo Jutu yo.

¹⁵ Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihi ndo tan cua ñihi ndo tunyee iñi tsa tsahá Nyoo, tan ña cua ndoo tsa xaan tsitsi añima ndo tan ña cua tiví ndo nuu Nyoo, tyin jahá cuenda vaha ndo tsi ndo.

¹⁶ Nyooho rayi ndi intuhun ndo tan ña çaca nuu ndo tsihin ñaha. Tacan tucu nyooho ñaha, ña çaca nuu ndo tsihin rayi. Tan ña çaca iñi ndo tyin nduve yahvi nyaá tuhun Nyoo, tumaa tsicá iñi ra Esaú, tyin ra Esaú xico ra tsa cuví ra ra tsitsa tsacatyí tsa catsi ra.

¹⁷ Tsitó ndo tyin tsa yaha yacan tan cuñi ra Esaú tsa nasoco jutu ra tsi ra, maa tyin ña cuvi. Tsacu xaan ra, maa tyin ña ñihi ca ra kuhva nasama ra tsa tsa yaha javaha ra.

¹⁸ Nyooho ña taahán tsi javaha ndo tacan tyin tsaá ndo nuu Nyoo, maa tyin ñavin tumaa tsaá nyivi Israel nuu Nyoo quivi tsahan ñi yucu Sinaí tsa cuvi nyehe yo. Nyehe ñi cayu ñuhu, tan ñihi xaan yihí tatyí xaan, tan naa xaan cuvi.

¹⁹ Tan tsiñi ñi ndusu trompeta tan cahan Nyoo tsihin ñi. Tan cahan ndaahvi ñi tsihin ra na ña cahan ca ra tsihin ñi, tyin yuuhví xaan ñi

²⁰ tsa cuenda tyin ña cunyeé iñi ñi tsa tsahá cuenda ra tsi ñi Tyin catyí ra tyehen: “Nyivi natuhva tan cuañi tsaha yucu ihya çahñi ndo tsi ñi tsihin yuu o tsihin lanza, tahan ñi nyivi tan quití”, catyí Nyoo tsihin ñi.

²¹ Nayuhvi xaan ñi tsa nyehe ñi yacan, nda cuanda ra Moisés tan catyí ra: “Ñihi xaan ñihí yu jahá tsa yuuhví yu”, catyí ra.

²² Maa tyin nyooho ña nyehe ndo tsa yuuhví can tyin tsaá ndo yucu nañí Sión

tsa cuví ñuu Nyoo nyito. Tuhun ihya cuñi tsi catyi ñuu Jerusalén tsa canyií nda gloria, nu iyó cuenda mil ángel.

²³ Ndu iín ndo ican tsihin tandihí sehe Nyoo tsa iyó sivi nu libru nda gloria tan jacahnu ndo tsi ra. Natuhvã ndo nuu Nyoo, ra cuví juee [tsa jandaa cuatyí] tandihí nyívi, tan natuhvã ndo nuu tandihí añima nyívi vaha tsa janduvahã Nyoo.

²⁴ Natuhvã tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndoo Nyoo tuhun tsa tsihin yo. Tan niñi ra Jesús tsa tsatí tsahá tsa vaha ca tsi yo tan ñavin ca niñi ra Abel. [Tyin niñi ra Abel tsican tsi cuatyí tsaha ra yañi ra. Maa tyin niñi ra Jesús, jahá tucahnu iñi cuatyí yo.]

²⁵ Yacan cuenda cuñí tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahan juhva nyívi Israel tsa ña tyaa yahvi tsa cahã Nyoo quívi cahã ra yucu Sinaí nu ñuhu ñayívi ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuvi maa cacu yo.

²⁶ Tahan tsanaha jacanda Nyoo ñuhu ñayívi tsihin ndusu ra. Tan catyí ra tyehen vityin: “Cua jacanda yu iin tsaha ca ñuhu ñayívi, maa tyin ñavin ñuhu ñayívi ñi, tyin cua jacanda ndihí yu nda cuanda andívi.”

²⁷ Tsa caahán ra tyin cua

jacanda ra inga tsaha, cuví cutuñi iñi yo tyin cua catsiyo tandihí tsa javahã ra tsa cuví nacanda. Tan cua ndoo tsa ña cuví nacanda.

²⁸ Nu ndacá ñaha Nyoo nu tsahá ra cunyecu yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa niñi añima yo, tan tyaa yahvi yo tsi ra, tyin yacan cuví tsa taahán iñi ra.

²⁹ Tyin Nyoo yo cuví ra tumaa ñuhu tsa tsahmí, tan cua janaa ra tandihí maa tsa ña vaha.

13

Na coo yo cuhva taahán iñi Nyoo

¹ Ña jandihí ndo tsa cuñí ndo tsi tandihí nyívi yihí cuenda Nyoo tyin cuví ñi tumaa nyívi ndo.

² Ña ñaa iñi ndo tyaa nuu vaha ndo tsi nyívi tsaá vehe ndo, tyin tun javaha yo tacan nda cuanda cua cuhva yo nu coo ángel Nyoo, vasu ndi maa ña tsitó yo tun ángel cuví ra naha tumaa javahã juhva nyívi.

³ Ña ñaa iñi ndo tsi nyívi yucú vehe caa tumaa tsatyin yucú ndihí ndo tsihin ñi. Ndūcuhun iñi ndo tsi nyívi nyehé tundoho jahá nyívi. Cundaahvi iñi ndo tsi ñi tan jatyinyee ndo tsi ñi. Tyin tsitó ndo nácaa cuñí yo tun nyehe yo tundoho.

⁴ Nyooho nyívi tsa tsa tindahã, jahã tahan ndo tsa ñayívi tsi iin ndo tan tsi inga

ndo. Tan coo vaha ndo tyin Nyoo cua tatsi tuñi ra tsi rayi# tsicá nuu tsihin naha tan rayi# iyó ñasihi tun coo ra tsihin inga ñaha. Tan juvin ñi cua tatsi tuñi tucu ra tsi ñaha tsicá nuu tsihin rayi# tan ñaha tsa iyó y# tun coo ña tsihin inga rayi#.

5 Ña caça iñi ndo nácaa javaha ndo tan cuvi coo cuaha ca xuhun tsi ndo. Ndo ndo vaha tsihin tsa iyó tsi ndo, tyin catyí Nyoo tyehen: “Tandihí ñi tsaha nyaá yu tsihin un, tan ña cua nacoo ihñi maa yu tsi un”, catyí ra.

6 Tsa cuenda yacan cuví caahán yo tyehen tsihin tsa niñi iñi aña yu:

Jutu Mañi yu juvin un jatyinyeé tsi yu,
Yacan cuenda ña yuuhví yu tun javahá nyivi náa javahá ñi tsi yu.

7 Nducuhun iñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehe ndo tyin vaha iyó ra naha nuu Nyoo, tan cunanyicun ndo cuhva vaha tsinú iñi ra naha tsi Nyoo.

8 Ra Jesucristo ña nasamá ra. Juvin ra iyó nda tsanaha, tan juvin ra iyó vityin. Tan juvin ra cua coo yoso cuahán quivi.

9 Ña cuhva ndo jandavi ñaha nyivi tsi ndo tsihin tsa siin siin tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo aña yu, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa

tsatsí yo. Tan ña jatyinyeé can ndi tsi maa ñi.

10 Tsatiñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatyinyeé ra Cristo tsi ra naha.

11 Ra jutu tsaahnu cuví ityi nuu cuenda nyivi Israel tsindacá ra naha niñi quiti tsitsi Vehe Ii Xaan tsa cuenda cuateyi nyivi, maa tyin cuñu ti tuhvá can cayú ityi tsata ñuu.

12 Tacan tucu ra Jesús, tava tyiñu Nyoo tsi ra tsa nyehe ra tundoho tan cúu ra ityi tsata ñuu Jerusalén, tyin tacan tan janduvaha ra tsi yo tsihin niñi ra.

13 Na cunycun yo tsi ra Cristo tan ña nducahan nuu yo vasu ndi maa vacu nducu nyivi tsi yo.

14 Tyin tsa cuenda yoo nduve ñuu tsa ña cua cundihi maa nu ñuhu ñayivi ihya. Yacan cuenda nanducú yo iin ñuu tsa cua quitsi, tsa yaha naa ñuhu ñayivi ihya.

15 Yacan cuenda vityin tsa iyó ra Cristo aña yu, taahán tsi jañiñi yo tsi yo tan jacahnu yo tsi Nyoo tsihin tsa cata yo yaa ra, tan tsihin tsa caahán yo.

16 Ña naa iñi ndo javaha ndo tsa vaha. Tan jatyinyeé tahan ndo tsi ndo tsihin tsa iyó tsi ndo, tyin yacan cuví tsa taahán iñi Nyoo.

17 Tyaa yahvi ndo tsi ra jaquihín ityi tsi ndo naha ra; cuhva ndo tsi ndo cundaca ñaha ra naha tyin juvin ra naha jahá cuenda aña yu. Tan coo quivi cua cuhva cuenda ra naha tyiñu jahá ra

naha tsi Nyoo. Ndücu ndo cuhva javaha ndo tsa vaha, tyin tacan tan sîi cua cuñi ra naha cuhva cuenda ra naha tsi ndo tsi Nyoo. Maa tyin tun ña javahá ndo tsa vaha, cua cuhva cuenda ra naha tsi ndo tsi Nyoo tsihin tucuiihya iñi, tan ña cua quita vaha ndo nuu ra.

¹⁸ Ndacan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñi ndi javaha ndi.

¹⁹ Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyi yu tsihin ndo.

Nu ndihî cahān ra tan tsahá ra nacumi tsî ñi

²⁰ Jutu Mañi yo Jesucristo tsa janandoto Nyoo, ra tsahá tsa taxin coo añima yo, juvin ra jahá cuenda tsi yo tsa cuví yo tumaa mbee jana ra. Tsihin niñi ra Cristo tsa tsati, ndoq Nyoo tuhun tsaa tsa ña cua cundihi maa tsihin yo.

²¹ Tandihî tsa cuñi Nyoo javahá ra tsihin tandihî yo, maa ra Jesucristo javahá can jahá ra. Tan na javaha ra tsihin yo tsa cuñi ra javaha ra. ¡Na jacahnu yo tsi ra Cristo yoso cuahán quivi! ¡Na cuvi tsi tacan ñi!

²² Yañi, caahán ndaahvi yu tsihin ndo; janyee ndo iñi ndo tan javaha ndo tsa tsahá cuenda yu tsi ndo tsihin tsa taxin iyó añima ndo, tyin ña cuaha xaan tuhun tyaa yu tsa cuenda ndo.

²³ Cuñi yu tsa coto ndo tyin ra Timoteo, yañi yo, tsa quita ra vehe caa. Tatun yatyi tsaa ra, cua quitsi ra tsihin yu na quitsi yu quitsi nyehe yu nu yucú ndo.

²⁴ Cuhva ndo nacumi tsi tandihî ra jaquihín ityi tsi ndo, tan tsi tandihî nyivi yihî cuenda ra Cristo. Nyivi Italia nu nyi yu, tsahá ñi nacumi tsi ndo.

²⁵ Tan na nasoco Nyoo tsi tandihî ndo. Na cuvi tsi tacan ñi.

Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

*Nu tsahá ra Santiago
nacumi tsi nyivi*

¹ Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsí yu nacumi tsi tandihi nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

*Tsa tsiñi tuñi tsa tsahá
Nyoo tsi yo*

² Yañi, cusii iñi ndo tun cuaha tundoho nyehé ndo.

³ Tyin tsitó ndo tyin tsihin tsa nyehé ndo tundoho tan cua cahnú ca ndo tsihin tsa tsinú iñi ndo. Tan cua cunyeé iñi ndo nyehe ndo náa ndihi ca tundoho vatsí siqui ndo.

⁴ Jaña ndo na quitsi maa tundoho can siqui ndo, tyin tun tsa cunyeé iñi ndo yaha ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandihi maa tundoho tsa cua quitsi siqui ndo.

⁵ Ndáa nyooho cumañi tsa tsiñi tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihi nyivi tan ña tuhvá ra tyicuhvá itsi, tan ndi ña cuxaán ra tsi ñi

tun tsicán ñi náa tsicán ñi tsi ra.

⁶ Maa tyin cuñí tsi ndacan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihi yo tsa tsicán yo, cuví yo tumaa ndutya ñuhu tsa tandahá tatyí ityi ihya tan ityi can.

⁷ Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra.

⁸ Tyin uvi xaan tsicá iñi ra. Ña tyaá iñi ra tsa tsicán ra, tyin ña iin cuñí ra. Vityin cuñí ra tsa cuñí ra, tan inga tsa cuñi tucu ra tyaan.

⁹ Tatun iyó iin ra yañi yo, ndaahvi ra, na cusii iñi ra tyin cahnú cuví ra jahá Nyoo.

¹⁰ Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusii iñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucoyó can.

¹¹ Tyin ihñi xaan cuví tsitsi cuhu jahá ñicanyii. Tacan tan na ityí ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsiihí tsi ra tan cua cundihí tsa cuca ra.

*Nacaa cunyeé iñi yo nyehé
yo tundoho*

¹² Sii xaan cuví tsi ra tsa cua cunyeé iñi nyehe tundoho tyin tsa yaha nyehe ra tundoho cua ñihi ra ñayivi nyito tsa catyi Nyoo tyin cuhva ra tsi ñi tsa cuñí tsi ra.

¹³ Tatun ndáa nyooho tsicá iñi ndo tsa javaha ndo tsa

ña vaha, ña cuñi ndo tyin Nyoo tsahá tsa caca iñi ndo tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha.

14 Maa tyin nyooho tsa javahá tsa ña vaha, javahá ndo can tyin cuñi ndo javaha ndo can. Tan yacan cuenda tsicoó cuatyí ndo.

15 Tatun cua cuhva yo tsa caca iñi yo tuhun ña vaha, coo quivi cua javaha yo cuhva tsicá iñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

16 Yañi, cuñi xaan yu tsi ndo. Ña jandavi ñaha ndo tsi ndo.

17 Tandihí tsa vaha tan tsa vii tsa ñihí yo, queé tsi ityi siqui tyin maa Nyoo Jutu yo tsahá itsi. Tan maa ra javaha ñuhú tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama.

18 Tan tsahá ra ñayivi tsa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javaha ra, tyin tacan cuñi maa ra.

Ityi nditsa tsa taahán tsi cahun yo

19 Yacan cuenda yañi, intuhun yo tan taahán tsi cahun iñi yo tsa tyaá soho yo, maa tyin ña yatyí xaan nacahan yo tan ndi ña yatyí xaan cuxaan yo.

20 Tyin nyivi tsa cuxaán, ña javahá ñi tsa taahán iñi Nyoo.

21 Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayivi ihya. Ndaahvi jaha ndo tsi ndo tan tñin cuenda vaha ndo tuhun Nyoo tsa tatsi ra añaima ndo. Tyin tuhun Nyoo can iyó tunyee iñi itsi tsa jacacú tsi tsi yo.

22 Javaha ndo cuhva caahán tuhun Nyoo, tan ña tyaa soho ñi maa ndo itsi, tyin tatun tyaa soho ñi maa ndo itsi juvin ñi tsi maa ndo jandavi ñaha ndo.

23 Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu.

24 Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi.

25 Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sií cua cuví tsi ñi ican tan cua quita vaha tandihí tsa javahá ñi.

26 Tan nyivi tsa catyí tyin tuhun Nyoo yihí ñi, maa tyin yatyí xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juvin ñi tsi maa ñi jandavi ñaha ñi.

27 Tyin tsa cuenda Nyoo, nyivi tsa nditsa tsinú iñi tsi ra juvin ñi cuví ñi tsa javahá tyehen: Jatyinyeé ñi tsi nyivi ndaahvi tsa tsihi yí, tan jahá cuenda ñi tsi tsa nyihí tsa nduve ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña

vaha.

2

Na inducu ñi cuñi yo tsi nyivi tyin ña sñin caá intuhun ñi tan inga ñi

¹ Yañi, nyooho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyivi tan ñavin ca inga ñi.

²⁻³ Tatun cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsí ra jahma xiñu, ¿nácaa cua cahan ndo tsihin ra? ¿A ña cua catyi ndo, “Cunyata nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsí ra jahma tyaahnyá, tan catyi ndo tsihin ra, “cunyata nyityi juvin o cunyata nu ñuhu ihya”.

⁴ Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

⁵ Yañi tsa cuñi xaan yu, tyaa soho ndo tuhun ihya: Nyoo nacatsi ra tsi nyivi ndaahvi nu ñuhu ñayivi ihya, tyin nducuca ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyi ra tyin cuhva ra tsi nyivi tsa cuñi tsi ra.

⁶ Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juvin nyivi cuca tsahñi ndaahvi tsi ndo, tan tsindacá ñi tsi ndo nuu ra cumí tyiñu?

⁷ Tan ¿a ña tsitó ndo tyin nyivi can caahán ñi ndavaha

ñi sivi ii ra Cristo, ra yihí ndaha tsi ndo?

⁸ Ley Nyoo tsa ñiñi ca catyi tsi: “Cuñi ndo tsi nyivi tumaa tsa cuñi ndo tsi maa ndo.” Tatun javahá ndo tsa catyi ley can, vaha javahá ndo.

⁹ Maa tyin tun intuhun ñi nyivi cuñi ndo, tan ña cuñi ndo tsi inga ñi, tsicoó cuatyí ndo tyin catyi ley Nyoo tyin iyó cuatyí nyivi javahá tacan.

¹⁰ Tyin tatun iin nyivi tsa tyaá yahvi tandihi ley, tan ña tyaa yahvi ñi intuhun tsi, cuví tsi tumaa tsa ña tyaá yahvi ñi tandihi ley.

¹¹ Tyin Nyoo catyi ra tyin ña coo inga ñaha tsi rayi, tun iyó ñasihhi ra. Tacan tucu ñiñaha, tsa iyó yii, ña cuví coo inga rayi tsi ñi. Tan juvin ñi catyi tucu ra tyin ña cahñi yo nyivi. Yacan cuenda tatun iin ra nduve inga ñaha tsi ra, maa tyin tsahñi ra iin nyivi, juvin ñi ña tyaá yahvi ra tsa catyi ley.

¹² Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo.

¹³ Tyin nyivi tsa ña cundaahvi iñi tsi tahan ñi, Nyoo cua tatsi tuñi ra tsi ñi, tan ña cua cundaahvi iñi ra tsi ñi. Maa tyin ñi tsa cundaahvi iñi tsi inga ñi, cua quita vaha ñi quivi cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?

¹⁴ Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A

jacacu tsa tsinu iñi yo tsi Nyoo ñi tsi yo?

¹⁵ Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahan ra yuvehe un,

¹⁶ Maa tyin yooho ña tsaha un jahma ra tan ndi tsa catsi ra tan catyí un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyí un. Nduve nacatyí cahan un tacan tyin ña tsaha un tsa tsiñi ñuhu tsi ra.

¹⁷ Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatyinyee yo tsi nyivi, nduve yahvi nyaá catyí yo tyin tsinú iñi yo.

¹⁸ Yihí ndo cua catyí ndo: “Yooho tsinú iñi un tsi Nyoo tan yuhu javahá yu tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyí yu tyin juvin ñi cahnu cuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yu tun ña javaha un tsa vaha. Maa tyin yuhu cuví janahá yu tsa tsinú iñi yu tsi Nyoo tsi un tsihin tsa javahá yo tsa vaha.

¹⁹ Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda nihí nahnu tsihin tsa yuuhví nahnu tyin ña cua cacu nahnu.

²⁰ Ña soho xaan caça iñi un. Cutuñi iñi tyin tun tsinú iñi

yo tan ña javahá yo tsa vaha, nduve yahvi nyaá tsa tsinú iñi yo.

²¹ Ra Abraham, tsii tsaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyí maa Nyoo tsihin ra.

²² Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyí ra tsihin ra tyin javaha ra. Tan tsa javahá ra yacan, quituví vaha tsa tsinú iñi ra tsi Nyoo.

²³ Tacan tan cundaa tsa catyí nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyí tsi: “Ra Abraham, cuví ra ra vaha iñi tsi Nyoo.”

²⁴ Tan ihya cuví nu cutuñi iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra.

²⁵ Tan tacan tucu ña Rahab tsa tsicá nuu tsihin rayii. Yahá tsa javahá ña cuatyí, javahá ña tsa vaha quivi tsaha ña nu tsiyucú xeehe ra tsa jacuhun ra Josué. Tan jatyinyee ña tsi ra naha tsa cuhun ra naha inga ityi. Tan tsa cuenda yacan, catyí Nyoo tyin vaha ña.

²⁶ Tan tacan tucu cuví cuñi ñuhu nyivi. Tatun nduve ca tsa nyitó ñi iyó tsitsi cuñi ñuhu can, nduve ca yahvi nyaá can. Tan tacan cuví tucu yoó, tatun ña javahá yo tsa vaha, nduve yahvi nyaá tsa tsinú iñi yo.

3

*Nacaa jaha cuenda yo
cuhva caahán yo*

1 Nyooho yañi, ña yatyi xaan cuñi ndo cuvi ndo ra cahan tuhun Nyoo. Tyin tsitó ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyivi tsa ña caahán tuhun Nyoo.

2 Tyin tandihí maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juvin ra cuví ra vaha tyin cuví ndaca ñaha ra naní cahnú cuñu ñuhu ra.

3 Tumaa ra tsa tyihí yoho yuhu cuayu cuví ndaca ñaha ra tsi ti, vasu ndi maa cahnú ti.

4 Tan tacan tucu iin yutun ndoo tsa tsicá nu ndutya ñuhu, vasu cahnú tsi maa tyin tsihin vitu luhlu tsa nyaá ityi xuu tsi, cuví jacuhun ra jacacá itsi ndáa ityi cuñí maa ra, vasu ñihi xaan yihí tatyí.

5 Tan tacan tucu yaa yo, luhlu xaan tsi. Maa tyin cuaha tsa caquiñi cuví cahan yo tsihin tsi. Tumaa nu natiñ iin ñuhu luhlu iin cuhu cahnú tan cayu tandihí maa yutun.

6 Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnú tsa jativi tsi naní cahnú cuñu ñuhu yo tan tandihí cuhva iyó yo ñayivi ihya, tyin juvin ñi maa nu ña vaha natyuhú itsi.

7 Nyivi cuví jandumasu ñi tandihí maa nuu quiti tsa iyó:

saa, coo, tan quiti tsa iyó tsitsi ndutya ñuhu.

8 Maa tyin yoñi cuví jandumasu yaa yo tyin cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí ti venenu ti tsi nyivi, tan tsiihí ñi. Tacan cuví yaa yo.

9 Tyin juvin ñi tsihin yaa yo jacahnú yo tsi Nyoo Jutu yo. Tan juvin ñi tsihin can caahán tucu yo ndavaha ñi siqui nyivi tsa javahá Nyoo tumaa caá maa ra.

10 Juvín ñi tsihin yuhu yo jacahnú yo tsi Nyoo. Tan juvin ñi tsihin can caahán yo tsa caquiñi. Maa tyin yañi, ña taahán tsi tsa javahá ndo tacan.

11 Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví.

12 Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsiñi tuñi tsa vaha ca

13 Tatun yihí ndo tsitó ndo tan iyó tsa tsiñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsiñi tuñi Nyoo tsa iyó tsi ndo.

14 Maa tyin tatun nyiyo iñi ndo tsitsi añima ndo tan cuñi xaan ndo nduvaha ndo nu nyivi, ña cahnú jaha ndo tsi ndo tan catyi ndo tyin iyó tsa tsiñi tuñi tsi ndo. Tyin tun

cahnu jahá ndo tsi ndo, tyihí xeehe ndo tsa nditsa, cuví can.

¹⁵ Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyivi ña tsitó tsi Nyoo tan cuhva tsica iñi nu ña vaha cuví can.

¹⁶ Tyin tatun nyiyó iñi ndo tan cuñí ndo nduvaha ndo nuu nyivi, ticaña xaan tsicá iñi ndo. Tan iyó tucu tandihi inga nuu tsa ña vaha nu yucú ndo.

¹⁷ Maa tyin tatun iyó tsa tsiñi tuñi Nyoo tsi ndo, cuiti iyó ndo, catsi iyó ndo. Tan nducú ndo cuhva coo vaha ndo tsihin nyivi tsihin tsa vita iñi ndo, tan vaha nyivi cuví ndo. Tan catsi vaha tsicá iñi ndo, tan cundaahví iñi ndo tsi nyivi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa ñi iñi ndo.

¹⁸ Tatun iyó vaha yo tsihin nyivi, tan iyó taxin yo tsihin ñi, cua coo yo ñayivi cuiti.

4

Ña taahán tsi javaha yo cuhva cuñí cuñu ñuhu yo

¹ ¿Nacuenda iyó tsihi nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha.

² Iyó tsaha nda cuanda tsahñí ndo nyivi tyin cuñí ndo tsa cuñí ndo tan ña ñihí ndo can. Tatun nyehé ndo náa cuví can nyehé ndo, nyiyó iñi ndo can tan tsa ña ñihi ndo can quítsaha cañi tahan ndo. Ña ñihí ndo tsa cuñí ndo tyin ña tsicán ndo can tsi Nyoo.

³ Tatun tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyin tsitó ra tyin cua jativi ndo can tsihin tsa taahán iñi ndo.

⁴ ¿Nacuenda javahá ndo cuhva cuñí nyivi, nyooho tsa ña tsinú vaha iñi tsi Nyoo? ¿A ña tsitó ndo tyin tun javahá yo cuhva cuñí nyivi, ñi xaan iñi tsi Nyoo cuví yo?

⁵ Tan yacan iyó cuenda catyí nu tutu Nyoo tyin Tatyí Ii tsa tsahá ra coo añima yo, cuñí xaan tsi tsi yo tan cuiñu xaan tsi tsi yo tyin cuñí tsi tsa jacahnu yo tsi intuhun ñi maa ra.

⁶ Tan jatyinyeé xaan Nyoo tsi yo tsa nacuhvá yo tsi yo tsi ra. Tyin catyí ra tyin jatyinyeé ca ra tsi nyivi ndaahvi tsa tsitó tyin tsiñí ñuhu ra tsi ñi. Tan ña cuñí ra nyehe ra tsi ra tsa cahnu jahá tsi.

⁷ Yacan nacuhva vaha ndo tsi ndo tsi Nyoo. Ña tyaa yahvi ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehe nu tsi ndo.

⁸ Nducú ndo cuhva cun-yanaa vaha ca ndo tsi Nyoo tyin tacan tan natuhva ra tsi ndo. Nyooho, nyivi iyó cuatyí, jandundi ndo tsi ndo. Tan nyooho tsa tsicá iñi tyin cuví javaha ndo tsa iyó nu ñuhu ñayivi ihya tan juvin ñi cuhva can tan jacahnu tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyin tacan tan ndundi ndo nuu ra.

⁹ Cuiihya cuñi ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa siñ cuñi ndo, vacu ndo tsihin tsa cuiihya cuñi ndo. Tan tsa siñ cuñi ndo na nanduvi tsi tucuiihya iñi.

¹⁰ Ndaahvi jaha ndo tsi ndo nuu Jutu Mañi yo, tyin tacan tan janducahnu ra tsi ndo.

Ña cahan nyaa ndo tsi nyivi

¹¹ Yañi, ña cahan ndo ndavaha ñi siqui iin yañi yo. Tyin nyivi caahán ndavaha ñi siqui nyivi, o caahán nyaa ñi nyivi, siqui ley Nyoo caahán ñi ndavaha ñi tan caahán nyaa ñi cuvi can. Tyin tun caahán nyaa yo ley Nyoo, juez jahá yo tsi yo tsa nuu tsa tyaá yahvi yo tsa caahán ley can.

¹² Tyin intuhun ñi ra tsahá ley can. Tan juvin ñi ra cuvi juez. Tan juvin ra cuvi ra jacacú tsi yo, o jacunaá tsi yo. Tan ¿yoocho yoo ra cuvi un tyin cahan nyaa un tsi inga nyivi, tan tatsi tuñi un tsi ñi tan jaha un tsi un tumaa juez?

Ña tsitó yo náa cua cuvi tsi yo tyaan, yacan cuenda ña taahán tsi cahnu jaha yo tsi yo

¹³ Yihí ndo catyí ndo: “Vityin o tyaan cahun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaa soho ndo tsa cua cahan yu ihya:

¹⁴ Ñayivi tsa iyó yo cuvi tsi tumaa vico nuhu tsa tuhvá yihí tan iin yaha ñi naa ihñi

nyico. Ndi ña tsitó ndo tsa cua cuvi tyaan tan catyí ndo tyin cahun ndo.

¹⁵ Vaha ca cahan ndo tye-hen: “Coo yo juhva ca quivi tan javaha yo tsehe o yacan, tun Jutu Mañi yo tan cuñi ra.”

¹⁶ Maa tyin nyoocho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyivi javahá tacan.

¹⁷ Tyin yoo tsa tsitó javaha tsa vaha tan ña javahá yo can, tsicoó cuatyí yo.

5

Nu tsahá cuenda ra Santiago náa cua tahan nyivi cuca

¹ ¡Tyaa soho ndo tuhun caahán yu ihya, nyoocho nyivi cuca! Vacu ndo tsihin tsa cuiihya cuñi ndo, çana tsa ndo tsa cuenda tundoho tsa cua nyehe ndo.

² Tyin tsa cuca tsa jacayá ndo, tsa ndihí can tyaahyú. Tan jahma vaha ndo, tsa ndihí maa can tsatsi tiquixin.

³ Xuhun cuaan tan xuhun cuitsin ndo tsa ndihí can cuxi. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuvi tumaa ñuhú tsa cua cahmi tsi ndo. ¿Nacuenda jacayá ndo tsa cuca nu cua ndihí quivi ihya?

⁴ Tan ña tyahvi ndo yahvi tsa taahán tsi tsi nyivi ndaahvi tsa jaha tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihí ángel tsa cuvi andaru cuenda ra. Tan maa Jutu

Mañi yo tsiñi ra tuhun caahán ñi ndaahvi can.

⁵ Iyó vaha xaan ndo nu ñuhu ñayivi ihya tyin cuca ndo. Tan javahá ndo cuhva cuñi maa ndo. Tumaa tuhvá nyivi janduxaahán quini tyin cuu ti, tacan javahá ndo tsihin ndo. Tan vityin tsa tsaá quivi tsa cua cuu ndo.

⁶ Tyin tyaa ndo cuatyí tsaha nyivi vaha tan tsahñi ndo tsi ñi. Tan ndi ña cahan ñi cuatyí siqui ndo.

Na cunyeé iñi yo cuatu yo tsi ra Cristo

⁷ Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihi cuun nyico tsi, tan naquihin ra tsa tatsi ra.

⁸ Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuui quitsi ra.

⁹ Yañi, ña tyaa ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñi quitsi ra.

¹⁰ Yañi, quihin cuenda ndo cuhva tsicoo ra cuví ndusu yuhu Nyoo tahan tsanaha. Tyin ra ican naha ra cunyeé xaan iñi ra naha nyehe ra naha tundoho quivi tsaha cuenda ra naha tuhun Jutu Mañi yo.

¹¹ Tsitó yo tyin sii xaan cuñi ra tsa cunyeé iñi nyehe tandihi nuu tundoho, tumaa tsa cunyeé xaan iñi ra Job nyehe ra tundoho. Tan nu

ndihi ña, cuaha xaan tsa vaha tsaha Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahvi iñi ra nyehe ra tsi yo.

¹² Maa tyin yañi, ña cahan ndo: “Naha Nyoo maa”. Tan ña cahan ndo: “Tsitó vaha maa ra nyaá gloria”, tan ndi ña cahan ndo: “Tsitó vaha maa ra javaha ñuhu ñayivi”, tan ndi ña cahan ndo inga ca tuhun tahan can. Tatun nditsa tuhun caahán ndo, “nditsa” catyi ndo. Maa tyin tatun tsitó ndo tyin ña nditsa, catyi ndo tyin “ña nditsa”, coto tatsi tuñi Nyoo tsi ndo.

¹³ Tun ndaa nyoooho nyehe tundoho, ndacan tahvi ndo tsi Nyoo. Tan nyoooho tsa sii cuñi, cata ndo yaa Nyoo.

¹⁴ Tan nyoooho tsa cuuhví, cana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sivi ra Cristo.

¹⁵ Tan tatun tsinú iñi ra naha tsi Nyoo cuhva tsa tsicán tahvi ra naha, nyivi cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoo ñi cuatyí, Nyoo cua jaha ra tucahnu iñi tsi ñi.

¹⁶ Yacan cuenda nahma ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyivi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo.

¹⁷ Tumaa ra Elías ra cuví ndusu yuhu Nyoo tahan tsanaha. Cuví ra iin rayii

tumaa maa yo. Tan tsic̄an
 tahvi ra tsi Nyoo tyin na ña
 cuun savi. Tan ña cuun savi
 uñi cuiya sasava.

¹⁸Yaha can tan tsic̄an tahvi
 nyico ra tsi Nyoo inga tsaha
 tyin na cuun savi. Tan cuun
 tsi inga tsaha. Tan tsahnu tsiti
 tsa tatsi nyivi.

¹⁹Yañi, tatun iin nyivi
 tahan ndo nacoo ñi tuhun
 nditsa Jutu Mañi yo, tan
 cuanuhū ñi ñayivi inga tsaha,
 tan jatyinyeé ndo tsi ñi tsa
 nanducu nyico ñi ityi Nyoo,

²⁰coto ndo tyin tsa javaha
 ndo tacan tsihin ñi, jacacu
 ndo añima ñi tan ña cua
 cahun ñi anyaya. Tan jahá
 Nyoo tucahnu iñi cuatyí ñi
 jahá ndo.

Carta Tsa Jihna Ñi Tsa Jacuhun Ra Pedro Tsi Nyivi Yihí Cuenda Nyoo

Nu quitsaha tyaá ra Pedro carta tsa cuenda nyivi yihí cuenda Nyoo

¹ Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví.

² Tyin nda tsanaha tan nacatsi vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsi ra tsi ndo, jatyinyee Tatyí lí ra tsi ndo tan nacuhva ndo tsi ndo tsi ra, tan tyaá yahvi ndo tsi ra Jesucristo vityin, tan ndundí ndo tsihin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

Cuita iñi ndo tyin cua ñihi yo ñayivi tsa coo yo

³ Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsa yo inga tsaha tyin janandoto ra tsi ra Jesucristo. Yacan cuenda cuita iñi yo tyin cua ñihi yo ñayivi tsa tsa ña cua naa maa.

⁴ Tan tsa cuenda tsa nacacu tsa yo, Nyoo cua cuhva ra tandihi tsa cumí vaha ra nda

gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita.

⁵ Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndihi cacu yo. Tan cua janaha ra tsi yo náa cuñi tsi catyi tsa cacú yo nu cua ndihi tyembu tyin tsa ndatú vaha can tsi yo.

⁶ Yacan cuenda sii cuñi ndo, vasu ndi maa nyehé ndo tandihi nuu tundoho juhva quivi vityin.

⁷ Tyin tandihi maa tundoho can tan taahán tsi nyehe yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

⁸ Nyooho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan sii xaan sii xaan cuñi ndo nda cuanda ña cuví ñihi ndo cuhva catyi ndo naja cuhva tsa sii cuñi ndo,

⁹ tyin nu ndihi cua cacu ndo tan yacan cuví tsa cua ñihi

ndo jahá tsa tsinú iñi ndo tsi Nyoo.

¹⁰ Ra ndusu yuhu Nyoo tsa tsicoo tahan tsanaha nducu tuhun ra naha nácaa cua cacu yo. Tan nducu ra naha cuhva coto ra naha náa cuví tsi. Tyaá ra naha nu tutu cuenda tsa vaha tsa cua cuhva Nyoo tsi yo.

¹¹ Tan Tatyí Ii ra Cristo tsa iyó tsihin ra naha jacoto tsi tsi ra naha náa ndihi tundoho cua nyehe ra Cristo, tan nácaa cua jacahnu Nyoo tsi ra. Tan nducu xaan ra naha cuhva coto ra naha yoo ra cua cuvi ra Cristo tsa cua tahan tacan, tan ama cua cuvi tuhun tsa catyí Tatyí Ii tsihin ra naha.

¹² Maa tyin jacoto Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihi tsa cahān ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñi ndo. Tan ra tsa cahān tuhun ihya naha ra, maa Tatyí Ii Nyoo jacahān tsi ra naha. Tan ra ángel naha ra cuñi xaan ra naha coto ra naha tuhun ihya.

Nyoo caná ra tsi yo tyin coo yo ñayivi cuiti

¹³ Yacan cuenda jaha vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra.

¹⁴ Coo ndo tumaa iyó tsa nyihi tsa tyaá yahvi tsi jutu. Ña coo ndo tumaa tsicoo

ndo quivi tsa ndi cumañi ca nacoto ndo tsi Nyoo tyin tsanaha tsindaca ñaha tsa ña vaha tsa cuñi cuñu ñuhu ndo tsi ndo.

¹⁵ Maa tyin vityin coo ndo ñayivi cuiti tyin maa Nyoo, ra tsa cana tsi ndo, cuiti iyó ra.

¹⁶ Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

¹⁷ Tatun tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jaha cuenda ndo tsi ndo tan jaha ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuvi yo nyivi cuca, an nyivi ndaahvi.

¹⁸ Nyoo nasama ra cuhva tsa ña vaha tsicoo ndo, cuhva tsa janaha tsi tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahvi ra tan cacu yo,

¹⁹ tyin tyahvi ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhvá nyivi Israel jamañi nuu Nyoo], tan tsihi ra vasu ndi maa nduve cuatyí ra.

²⁰ Tsa ndi cumañi ca tsinu ñuhu ñayivi tsinyaá cuhva tyin tyehen cua tahan ra Cristo. Maa tyin ña cuvi tsi tsa numi ñi. Nda cuanda vityin nu cua ndihi quivi, cuvi tandihi can tsa cuenda tsa vaha tsi maa yo.

²¹ Tsa cuenda ra Cristo tan tsinú iñi ndo tsi Nyoo tyin ju-

vin ra janandoto tsi ra Cristo tsa yahā tsihi ra tan jacahnu ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua naquihin ra tsi ndo.

²² Tsihin tunyee iñi Tatyi Iin Nyoo tyaá yahvi ndo tuhun nditsa. Tan tsa ndundi ndo jahā Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa nñi iñi ndo, tan tsihin tandihi tunyee iñi tsa iyó tsi ndo.

²³ Tyin tsa nacacu tsa ndo, maa tyin ñavin tumaa cacú nyivi nu ñuhu ñayivi ihya, tyin jutu ndo cacu ra naha jahā sihi ra naha tan tsihi ra naha. Tan nyooho vityin nacacu tsa ndo tsihin Nyoo tsa ña cua cundihí maa, tyin tacan ñi cua coo maa tsi.

²⁴ Tyin catyí tuhun Nyoo tyehen:

Tandihí nyivi tsa iyó nu ñuhu ñayivi ihya cuví ñi tumaa cuhu.

Tan tsa cahnu tsa javahá ñi cuví tsi tumaa ita.

Tyin cuhu can na ityí can, tan cucoyó ita can.

[Tacan cuví nyivi, tyin iin yaha ñi tsihi ñi.]

²⁵ Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

2

¹ Yacan cuenda nācoo ndo tandihí nuu tsa caquiñi. Ña jandavi ñaha ndo tsi nyivi, ña

jahā ndo tyin vaha ndo tan ña nditsa, ña nyiyo iñi ndo nyehe ndo tsa iyó tsi inga nyivi, ña cahan ca ndo cuendu.

² Jāvaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacahnu tsi ndo tan nacoto vaha ca ndo tsi Nyoo nda cuanda ndihí cacu ndo,

³ tun nditsa tyin tsitó ndo tyin Jutu Mañi yo, vaha xaan ra cuví ra.

Ra Cristo cuví yuu nyito

⁴ Cūnyaa naa ndo tsi Jutu Mañi yo. Tyin juvin ra cuví yuu nyito tsa ña cuñi nyivi cuatyí ñi. Maa tyin Nyoo nacatsi ra tsi Jutu Mañi yo tyin juvin ra cuví yuu si caá tsa yahvi nyaá tsa cuenda ra.

⁵ Tatun nyaa naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cūhva ndo tsa jandu iin Nyoo tsi ndo tsihin ra Cristo tyin tun tsa nyaa naa vaha ndo tsi ra, cua cuví ndo tumaa ra jutu tsa javahá maa ñi tyiñu Nyoo. Cua jacahnu ndo tsi ra tan si xaan cua cuñi ra.

⁶ Tyin catyí tucu nu tutu ra tyehen:

Yuhu nacatsi yu iin yuu tsa tsiñi ñuhu ca tan si ca caá, tan tsaquin yu yuu can nu cua javaha yu vehe yu nda Sión.

Tan nyivi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo

tuhun ra Cristo nu tutu ra.

7 Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñi ñuhu xaan ra tsi yo. Tan tsa cuenda nyivi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen:

Yuu tsa ña cuñi ra javahá vehe cuatyíñu ra, yacan cuví yuu tsa tsiñi ñuhu ca, catyí tsi.

8 Tan catyí tucu tsi:

Ra ican cuví yuu tsa cuaha xaan nyivi cua nañi tsaha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyivi can tyin tsiñi ñi tuhun Nyoo, tan ña tyaa yahvi ñi itsi tyin tacan nyaá tyin cua javaha ñi.

Nyivi yihí cuenda Nyoo

9 Maa tyin nyooho cuví ndo nyivi nacatsi maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyivi ii ityi nuu ra tan cuví ndo nyivi maa ra, tacan tan cahan ndo tuhun vaha tsa javahá ra. Tyin juvin ra tava tsi yo nu naa tan tyihí ra tsi yo nu nditsin tan nu sii caá.

10 Tsa ndi cumañi ca cuví ndo nyivi Nyoo, nduve yahvi nyaá ndo. Maa tyin vityin nyivi Nyoo cuví ndo. Quivi can yoñi cundaahvi iñi tsi ndo, maa tyin vityin Nyoo cundaahvi iñi ra tsi ndo.

Nu catyí ra Pedro tyin coo yo, tan javaha yo tyiñu nuu Nyoo

11 Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayivi cuví ndo, tyin nda gloria cuví ñuu ndo. Yacan cuenda ña javaha ndo cuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo.

12 Jaha cuenda ndo tsi ndo nu iyó ndo tyañu nyivi tsa ña tsitó tsi Nyoo. Tyin vasu caahán ñi ndavaha ñi siqui ndo, tan catyí ñi tyin ña vaha ndo, maa tyin quivi quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

13 Tyaa yahvi ndo tsi ra cumí tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tyiñu, a cuví ra rey cahnu ca,

14 a iin ra jaquitsi ra rey tyin tatsi tuñi ra tsi ra iyó cuatyí naha ra tan naquihin ndaahvi ra tsi yoo tsa javahá tsa vaha.

15 Tyin Nyoo cuñi ra tsa javaha yo maa ñi maa tsa vaha tyin tacan tan ña ñihi ca nyivi soho tan nyivi ña tsitó náa cahan ñi siqui yo.

16 Çoo ndo tumaa iyó nyivi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra.

17 Jaha ndo tsa ñayivi tsi tandihí ñi nyivi. Cuñi ndo tsi ñi yihí cuenda Nyoo. Jaha

ndo tsa ñayivi tsi ra ndacá ñaha, tyin Nyoo nyehé ra tandihi tsa javahá yo.

Uvi taahan cuhva nyehé yo tundoho

¹⁸ Nyooho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha.

¹⁹ Tyin tatun cunyeé iñi yo nyehé yo tundoho tsa janyehé nyivi tsi yo tsa cuenda tsa javahá yo tsa vaha nu Nyoo, cua tsa can nuu ra.

²⁰ Maa tyin tatun tatsí tuñi nyivi tsi ndo tsa cuenda tsa javahá ndo tsa ña vaha tan cunyeé iñi ndo nyehe ndo tundoho, nduve náa catyi. Maa tyin tatun ña cundihí iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuví tsa vaha nuu Nyoo.

²¹ Tumaa tsa nyehe maa ra Cristo tundoho tsa cuenda yo, tacan taahán tsi cunyeé iñi yo nyehe yo tundoho tyin tsa cuenda yacan cana Nyoo tsi yo.

²² Ra Cristo ndi intuhun cuatyí ña javaha ra. Tan ndi iin tsaha tan ña jandavi ñaha ra tsi nyivi.

²³ Quivi jacuñi nyaa ñi tsi ra, ña jacuñi nyaa ra tsi ñi. Quivi tsa janyehé ñi tundoho tsi ra ña jayuhvi ra tsi ñi. Tyin intuhun ñi maa Nyoo cuví ra tuhvá jacutuñi tsi nyivi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo.

²⁴ Tyin cuhva tsa ticaá ra Cristo nu cruu can, tsicoso tandihi cuii maa cuatyí yo tsata ra. Tacan cuví tyin tacan tan ña javaha ca yo cuatyí, tan coo yo ñayivi cuiti. Tyin tsihin tsa ñicuehe ra, tan nduvaha yo.

²⁵ Tyin quivi can tsica nuu yo cuví yo tumaa mbee tsa ndoo ihñi, tsa nduve tsitoho. Maa tyin vityin nacuhva cuenda yo tsi yo tsi ra Cristo, tan jahá cuenda ra añaima yo. Cuví ra ityi nuu tsihin yo.

3

Nacaa taahán tsi coo nyivi tindaha

¹ Tacan tucu nyooho, ñiñaha tsa iyó yí. Tyaa yahvi ndo tsi yí ndo tyin tatun ña tsinú iñi ra tsi ra Cristo, cua tsinu ndihí iñi ra tsi ra Cristo tsihin cuhva javahá ñi ndo tyin nyehe ra tyin vaha tsahá ndo tsa quihí ndaha ra tsi ndo. Tan ña cuñí tsi cuaha xaan cahan ndo tsihin ra,

² tyin nyehé ra tyin catsi iyó ndo tan jahá ndo tsa ñayivi tsi ra.

³ Ña caça xaan iñi ndo janduvaha ndo tsi ndo ityi tsata ñi, tyin ña ñiñi xaan cuñí tsi tsa iyo xaan janduvaha ndo jiñi ndo, tan cuatyínu ndo tsa cuví xuhun cuaan tan cunditsi ndo jahma xiñu xaan. Ña nducu ndo tandihí yacan.

⁴ Maa tyin jandutyacuí ndo tsi ndo tsihin tsa quitá añaima ndo tyin tun cuiti iyó yo tan vita iñi yo, tan taxin iyó yo, yacan cuví tsa sii ca caá nuu Nyoo. Tan ña cua tiví maa can.

5 Tyin tsihin tsehe ndutyaquĩ ñiñaha tsa nacoto tsi Nyoo, ñi tsa tsicoo tahan tsanaha. Nyita iñi ñi tsi Nyoo tan tyaã yahvi ñi tsi yii ñi.

6 Tumaa ña Sara, tyaã yahvi ña tsi ra Abraham yii ña. Tan catyí ña: “Tata”, tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuvi ndo tumaa maa ña.

7 Tan tacan tucu nyooho, ra iyó ñasihi naha ra, çutuñi iñi ndo kuhva coo ndo tsihin ñasihi ndo. Jaha ndo tsa ñayivi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuvi ñayivi iyó ndo. Javaha ndo tyehen tyin tacan tan tiin cuenda Nyoo tuhun caahán ndo tsihin ra.

Nu tsahá cuenda ra Pedro nácaa taahán tsi coo yo

8 Nu ndihi tuhun, iin ñi kuhva çaca iñi tandihi ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñí ndo tsi yañi ndo tsa cacu tsihin ndo. Vita çahan ndo tsihin tahan ndo, tan ña cahnu jaha ndo tsi ndo; cuvi ndo nyivi vaha.

9 Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña çahan ndo tsi ñi tatun caahán ñi tsi ndo, tyin Nyoo canã ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo.

10 Tyin tuhun Nyoo catyí tsi tyehen:

Nyivi tsa cuñí coo ñayivi tsihin tsa sii,

cuñí tsi jaha ñi cuenda yaa ñi, tan ña cahan ñi tsa ndavaha ñi,

tan ndi ña cahan ñi cuendu.

11 Jandihí ndo tsa javahá ndo tsa ña vaha, tan javaha ndo tsa vaha.

Nducu ndo kuhva coo taxin ndo, tan çoo ndo tacan.

12 Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi.

Maa tyin nyivi javahá tsa ña vaha, ña cuñí ra nyehé ra tsi ñi.

13 Ndi intuhun maa nyivi tan ña cuvi javaha ñi tsa ña vaha tsihin ndo tatun nyooho tan maa ñi tsa vaha nanducú ndo.

14 Çusi iñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo.

15 Jachannu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Çaca iñi ndo tuhun Nyoo tyin tatun ndaca tuhun nyivi tsi ndo nacuenda tsinú iñi ndo tsi ra, cuvi kuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi.

16 Catsi çoo ndo tyin tun catsi iyó ndo ña cua nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra Cristo, juvin ñi maa ñi tan cua

nducahan nuu ñi tsa cuenda tsa caħan ñi siqui ndo.

¹⁷ Vaha ca nyehé yo tundoho tsa cuenda tsa javahá yo tsa vaha tatun Nyoo cuñi, tan ñavin ca tsa nyehe yo tundoho cuenda tsa ña vaha.

¹⁸ Tyin ra Cristo nyehe ra tundoho tan tsihi ra iin tsaha ñi tsa cuenda cuatyin tandihi yo. Ra vaha cuví ra maa tyin nyehe ra tundoho tan tsihi ra tsa cuenda yo tsa cuví yo nyivi caquiñi, tyin tacan tan cuví tsaá yo nu nyaá Nyoo. Tsihi cuñu ñuhu ra, maa tyin nandoto nyico ra tsihin Tatyí li ra.

¹⁹ Tacan tan tsihin Tatyí li ra tsahan ra tsicahan ra tsihin añima nyivi tsa yucú anyaya.

²⁰ Tan ñi ican cuví ñi tsa ña tyaá yahvi tsi Nyoo quivi tsicoo ra Noé tahañ tsanaha, tyin ñi tsinú yutun ndoo tacan tsa ndatu Nyoo tsa ndu uvi iñi ñi cuatyí ñi. Maa tyin ña cuaha ñi cacu quivi cuñ savi cahnu tsa tsahñi ndutya ñuhu tsi ñi. Una taahan ñi ñi cacu tsitsi yutun ndoo tyin nandaá yutun ndoo can nu ndutya ñuhu.

²¹ Tan tacan tucu maa yo tumaa tsa cacu ñi ican, tacan cacu yo quivi tsicoondutya yo. Maa tyin ñavin nyahyu yo nacatya ndutya can tsa tsi-coondutya yo. Yacan cuñi tsi catyi tsa tsicán tahvi yo tsi Nyoo na nacatya ra añima yo tan cacu yo jahá tsa nandoto ra Jesucristo.

²² Tan nandaá ra nda gloria, tan nyaá ra xiin cuaha Nyoo vityin. Ndacá ñaha ra tsi

ángel tan tandihi tatyí ña vaha tsa ndacá ñaha tsi nyivi.

4

Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.

¹ Yacan cuenda janyee ndo iñi ndo nyehe ndo tundoho tumaa nyehe ra Cristo tundoho tsihin cuñu ñuhu ra. Tyin nyivi tsa nyehé tundoho tsihin cuñu ñuhu ñi, ña javahá ca ñi tsa caquiñi tsa cuñi cuñu ñuhu ñi.

² Tyin tacan tan tandihi quivi coo ñi cua javaha ñi cuhva cuñi Nyoo, tan ñavin cuhva cuñi cuñu ñuhu ñi.

³ Vityin tsindihí tsa javahá ndo tsa caquiñi tsa taahán iñi nyivi tsa ña tsitó tsi Nyoo. Tsicoo ndo cuhva cuñi ndo, cuaha tsa caquiñi javaha ndo, tan javaha ndo tsa caquiñi tsa cuñi cuñu ñuhu ndo. Javaha ndo vico tan tsiñi ndo. Tan jacahnú ndo tsitoho tsa ña taahán tsi jacahnú ndo.

⁴ Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñi ñi. Tan caahán ñi ndavaha ñi siqui ndo.

⁵ Maa tyin tandihi tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi.

⁶ Yacan cuenda jacoto ra Cristo tuhun vaha tsi ndiyi. Tyin tacan tan cuví coo añima ñi tumaa iyó Nyoo, vasu ndi maa tsihi ñi nu ñuhu ñayivi ihya tumaa tsihi tandihi ca nyivi.

7 Tsa yatyin cuii cundihi tandihi maa tsa iyó nu ñuhu ñayivi ihya. Yacan cuenda catsi cōo ndo tan ña jandihi ndo tsa ndacan tahvi ndo tsi Nyoo.

8 Tsa jihna ñi taahán tsi tsa cuñi tahan ndo tsi ndo, tyin tatun cuñi tahan yo tsi yo, cuaha tsaha cua jaha yo tuc-ahnu iñi tsi ñi.

9 Tatun tsaá iin nyivi vehe ndo, vaha tyānuu ndo tsi ñi tan ña caca iñi ndo tyin jatyañu ñi tsi ndo.

10 Tan cuñi tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin siin siin tsa tsahá Nyoo tsi tsa intuhun intuhun yo. Tan taahán tsi cuatyñu yo can tsihin tahan yo.

11 Tatun tsahā Nyoo tuhun cahan un tsihin nyivi, cahan, maa tyin maa ñi tuhun tsa tsahā ra tsi un. Tatun tsahā ra tyin javaha un tyiñu nuu nyivi, javaha tsihin tunyee iñi tsa tsahá maa ra. Tandihí tsa catyí Nyoo tyin javaha ndo, javaha ndo can, tyin tacan tan jacahnu nyivi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jacahnu yo. Tan na cundaca ñaha ra tsihin tunyee iñi ra tacan ñi maa. Tan na cuvi tsi tacan.

Sii cuñi ndo tun nyehé ndo tundoho tsa cuenda ra Cristo

12 Yañi tsa cuñi xaan yu, ña iyo xaan cuñi ndo tatun vatsi tundoho ñihi siqui ndo. Ña cuñi ndo tyin ña taahán tsi nyehe ndo tundoho.

13 Cū sii iñi ndo tyin cuvi nyehe ndo tundoho tumaa nyehe ra Cristo tundoho. Tyin tacan tan quivi quitsi nyico ra Cristo inga tsaha, sii cua cuñi ndo nyehe ndo tsa cahnu cuvi ra.

14 Tatun caahán nyivi ndavaha ñi siqui ndo tyin nyicún ndo tsi ra Cristo, sii cuñi ndo, tyin nyaá Tatyí Ii Nyoo tsihin ndo. Maa ñi caahán ñi ndavaha ñi siqui ra Cristo, maa tyin nyooho jacahnú ndo tsi ra.

15 Tatun nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhu ndo, o javahā ndo tsa ña vaha, o tsa tyihí ndo tsi ndo nu ña taahán tsi.

16 Maa tyin tun nyehé ndo tundoho tsa cuenda tsa yihí ndo cuenda ra Cristo, ña nducahan nuu ndo. Jacahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

17 Tyin tsa tsaā quivi tsa quitsahā jacutuñi Nyoo tsi tandihí nyivi. Tan jihna ca yoo tsa yihí cuenda ra cua cutuñi. Tatun tyehen tatsí tuñi Nyoo luxu ñi tsi yoo, ¿nácaa cua tatsi tuñi ra tsi nyivi tsa ña tyaá yahvi tuhun caahán ra?

18 Tatun yii cacú añima nyivi vaha, ¿nácaa cua cacu añima ñi quiñi iyó, ñi ña vaha?

19 Yacan cuenda tatun nyehé ndo tundoho cuhva cuñi Nyoo, cuñi tsi tsa jañihi ca ndo javaha ndo tsa vaha. Tan tyāa cuenda ndo añima

ndo ndaha ra tyin maa ra javaha tsi yo, tan cua javaha ra tumaa caahan ra.

5

Nu tsahá cuenda ra Pedro tsi yo nácaa coo yo

1 Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehe yu tandihi tundoho tsa tahan ra Cristo. Tan cua cutahan yu tsihin tandihi ca ra naha quivi quitsi ra Cristo inga tsaha tsihin tsa cahnu cuví ra.

2 Jaha cuenda ndo tsi nyivi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa ñi ñi añima ndo tan ñavin tsihin tsa ñiñi, maa tyin cuhva cuñí Nyoo. Ña javaha ndo can tsa cuenda tsa cuñí ndo xuhun. Tandihi tyiñu javahá ndo, javaha ndo can tsihin tsa cacu ñi ndo.

3 Tyin tun vaha iyó ndo nyehé ñi, tacan cua coo ndihi ñi tyin nyehe ñi tyin ña ndacá ñaha ñihi ndo tsi ñi.

4 Tacan tan quivi cua quitsi ra cuví ityi nuu tsihin nyooho tsa jahá cuenda mbee jana Nyoo, cua cuhva ra tsa sñi caá tsa ña cua tiví maa tsi ndo.

5 Tacan tucu nyooho, ra cuatyí tan ñi cuatyí, tyaa yahvi ndo tsi ra tsahnu naha ra. Tan tandihi ndo ndaahvi jaha ndo tsi ndo tan tyaa yahvi tahan ndo tsi ndo. Tyin catyí nu tutu Nyoo tyehen:

Nyoo ña cuñí ra nyehe ra tsi nyivi tsa yaa xaan,

Maa tyin jatyinyeé ra tsi ñi tsa ña yaa.

6 Yacan cuenda ndaahvi jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee ñi tsa iyó tsi ra, tyin tacan tan cuvi jacahnu ra tsi ndo quivi cua tahan tsi.

7 Tyaa cuenda ndo tandihi tsa tsicá xaan ñi ndo ndaha Nyoo tyin maa ra jahá cuenda tsi ndo.

8 Catsi cuhun ñi ndo tan jaha vaha ndo cuenda ndáa tsa vaha tan ndáa tsa ña vaha, tyin nu ña vaha, nu xaan ñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú ti tsa catsi ti.

9 Ñihi cunyecu ndo tsihin tsa tsinú ñi ndo tsi Nyoo tyin tacan tan cuvi jaha ndo tsi nu ña vaha. Tyin juvin ñi tundoho tsa nyehé nyooho tan nyehé tucu tandihi ca nyivi yihí cuenda ra Cristo taniñi cahnu nu ñuhu ñayivi.

10 Maa tyin Nyoo jatyinyeé ra tsi yo, tan tsa yaha nyehe ndo tundoho juhva quivi, Nyoo cua jacutsa ca ra tsi ndo, ñihi cunyecu ndo tsihin tsa tsinú ñi ndo, tan cua cuhva ca ra tunyee ñi tsa iyó tsi ra tsi ndo. Tan juvin Nyoo cuví ra tsahá tandihi tsa vaha tsi yo, tan maa ra cana tsi yo tyin ndu iin yo tsihin ra Cristo tyin coo yo nu sñi caá tsihin ra tacan ñi maa.

11 Na jacahnu yo tsi ra tan na cundaca ñaha maa ra tacan ñi maa. Tan na cuvi tsi tacan.

Nu tsahá ra Pedro nacumi tsi nyivi nu ndihi ña

¹² Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin n#i xaan iñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñi xaan Nyoo tsi yo. Yacan cuenda ña ñacoo ndo itsi.

¹³ Nyivi yihí cuenda Nyoo ñuu Babilonia tsa nacatsi Nyoo tumaa nacatsi ra tsi nyooho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihi ra nacumi tsi ndo.

¹⁴ Cuñi tahan ndo tsi ndo tan cuhva tahan ndo nacumi tsi ndo.

Na coo ca tsa taxin añaima tandihi nyooho tsa iin ñi cuví tsihin ra Jesucristo.

Tan na cuvi tsi tacan ñi.

Carta Tsinu Uvi Tsa Jacuhun Ra Pedro Tsi Nyivi Yihi Cuenda Nyoo

Nu tyaá ra Pedro inga carta tsa cuenda nyivi yihí cuenda Nyoo

¹ Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinu vaha iñi tsi Nyoo tumaa tsa tsinú iñi nyuhu. Inducu ñi tsinú iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo.

² Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

Nacaa taahán tsi coo nyivi yihí cuenda Nyoo

³ Nyoo, tsihin tunyee iñi tsa iyó tsi ra, tsahá ra tandihi tsa tsiñi ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihi tsehe ñihí yo tsa cuenda tsa tsahá ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyó tsa javahá ra.

⁴ Tan tsihin tandihi tsa vaha can, tsahá tucu ra tsa catyi ra tyin cuhva ra tsi yo.

Maa tyin cahnu xaan tan yahvi xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacoó yo tandihi tsa caquiñi tsa javahá yo, tan ña cua tiví yo tumaa tiví nyivi nyicún tsa ña vaha tsa iyó nu ñuhu ñayivi ihya.

⁵ Yacan cuenda cuñi tsi tsinú ca iñi yo tsi Nyoo tan ñavin yacan ñi tyin cuñi tucu tsi nducu yo cuhva coo cuiti yo. Tan cuñi tucu tsi nducu yo cuhva cutuñi vaha iñi yo cuhva cuñi Nyoo tsihin yo.

⁶ Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihí iñi yo. Yaha can tan nducu yo cuhva coo yo ñayivi iyó Nyoo.

⁷ Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñi maa Nyoo tsi tandihi yo.

⁸ Tatun tacan iyó ndo tan tacan nducú ndo cuhva tsa coo tandihi tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihi yacan.

⁹ Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñi iñi ñi tsa taahán tsi coto ñi. Tan tsa naq iñi ñi tyin ndatsi Nyoo cuatyí ñi tahan tsanaha.

¹⁰ Nyoo caná tsi ndo tan nacatsi ra tsi ndo. Yacan cuenda yañi, tun javahá ndo tandihi tsa caahán yu tuhun

ihya, ña cua nduva ihñi ndo.

¹¹ Tacan tan ña yñi cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuui ndo tsihin ra.

¹² Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñiñi cuñí ndo javahá ndo tuhun nditsa tsa cutuhva ndo.

¹³ Tan cuñí yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu.

¹⁴ Tyin tsa jacoto Jutu Mañi yo Jesucristo tsi yu tyin ña naha ca tan cua nacoo yu ñuhu ñayivi ihya.

¹⁵ Tan cua jañiñi yu tsi yu tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

Nu nacatyí tuhun ra Pedro nácaa nyehe ra naha tsa cahnu cuví ra Cristo

¹⁶ Ñavin tsa nandacu iñi ñi maa ndi tan cahān ndi tsihin ndo quivi jacoto ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyehe ndi tsa cahnu cuví ra. Tan jacoto ndi tsi ndo tyin iyó xaan tunyee iñi tsi ra tan cua quitsi ra inga tsaha.

¹⁷ Tyin nyehe ndi nu jacahnū Nyoo Jutu yo tsi ra tan nyehe ndi nu janduxiñū ra cuhva caá ra. Tan siñi xaan cuví nu cahān Nyoo tan catyí ra: “Ra ihya cuví Sehe yu, tan cuñí xaan yu tsi ra. Tan siñi xaan cuñí yu tsihin ra”, catyí

Nyoo tuhun ra Jesús quivi can.

¹⁸ Juvin nyuhu tsiñi ndusu Nyoo tsa quitsi ityi andivi quivi tsiyucu ndi yucu ii tsihin Jutu Mañi yo.

¹⁹ Tuhun ihya janahá tyin nditsa tsa tyaa ra cuví ndusu yuhu Nyoo nu tutu taħan tsanaha. Tatun tyaa yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tuvi tyin jandunditsín ra tsitsi añima yo.

²⁰ Maa tyin cuñí tsi coto ndo tyin ña cuví nacatyí tuhun tsa intuhun ñi maa yo tsa cuñí tsi catyí tsa tyaa ra ndusu yuhu Nyoo.

²¹ Tyin ra cuví ndusu yuhu Nyoo taħan tsanaha ña cahān ra naha cuhva cuñí maa ra naha. Maa tyin cahān ra naha cuhva cuñí Nyoo tyin maa Tatyí Ii Nyoo jaquihñi ityi tsi ra naha.

2

Ra jacuahá tsa ña nditsa (Judas 4-13)

¹ Maa tyin tsicoo tucu ra cahān cuendu naha ra nu tsicoo nyivi Israel taħan tsanaha. Catyí ra naha tyin cuví ra naha ndusu yuhu Nyoo tan ña nditsa. Tan tacan cua coo tucu ra vatya naha ra nu yucú ndo. Xeehe xaan cua jacuahā ra naha tsa ña nditsa tsa cuví jativí tsi ndo. Tan cua catyí ra naha tyin ña nditsa tuhun Jutu Mañi yo tan juvin

ra jatá tsi ra naha. Yacan cuenda numi ñi cua cunaa ra can naha ra.

² Tan cuaha xaan nyivi cua cunyicun tsi ra naha tsihin tsa caquiñi tsa javaha ra naha. Tan cuaha xaan ñi cua cahan ndavaha ñi siqui tuhun tsa nditsa vaha ra Cristo.

³ Tan tsa cuenda tsa cuñi ra naha xuhun, cua nducu ra naha kuhva jandavi ñaha ra naha tsi ndo tsihin tsa jacuaha ra naha maa ñi tsa ña nditsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

⁴ Tyin ndi ña jahá Nyoo tuc-ahnu iñi tsi ángel tsa tsicoo cu-atyí tahañ tsanaha. Jacuhun ra tsi nahnu anyaya. Tsahñi ra tsi nahnu tsihin cadena, tan nacoo ra tsi nahnu nu naa nda cuanda tahan tsi jacutuñi ra tsi nahnu.

⁵ Tan ndi ña jahá ra tuc-ahnu iñi tsi nyivi ña vaha tsa tsicoo tsanaha. Jacuun ra savi xaan tsahñi tsi ñi. Maa tyin jacacu ra tsi intuhun ñi ra Noé tsihin utsa taahan nyivi ra. Ra ican cahan ra tsihin nyivi na nducu ñi kuhva coo vaha ñi tsihin Nyoo.

⁶ Tacan javaha tucu ra tsihin ñuu Sodoma tan ñuu Gommorra, janaa ra itsi. Tsahmi ra ñuu can tan nanduvi tsi nyaa, tyin coto nyivi caquiñi tsa iyó vityin tan nyivi tsa cua coo náa cua tahan ñi.

⁷ Maa tyin jacacu ra tsi ra Lot tyin vaha iyó ra nuu ra. Cuiihya cuñi ra Lot nyehé ra kuhva iyó nyivi caquiñi can.

⁸ Tandihí quivi tsa tsicoo

ra Lot ñuu can, cuiihya cuñi añima ra tsa cuenda tsa tsiñi ra tan nyehé ra tsa caquiñi javahá ñi can. Tyin maa ra, ra vaha cuví ra, tan ñi ican maa ñi tsa ña vaha javahá ñi.

⁹ Tacan jacacu Nyoo tsi yo tatun vaha iyó yo nuu ra. Maa tyin naquihín vaha ra tsi nyivi caquiñi nda cuanda tahan tsi quivi cutuñi ñi.

¹⁰ Yaha ca cua tatsi tuñi Nyoo tsi nyivi tsa javahá tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha kuhva cuñi maa ra naha. Tan ña yuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha.

¹¹ Tan ángel, vasu ndi maa iyó ca tunyee iñi tsi ra naha tan ñavin ca nyivi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

¹² Maa tyin ra vatya can naha ra cuví ra naha tumaa quití tsa ña cutuñi iñi tan javahá ti naha ti tsa cuñi maa ti naha ti. Tyin quití, ¿náa cuenda iyó ti? Iyó ti tyin tiin yo tsi ti, tan cahñi yo tsi ti. Tacan ra can naha ra: Caahán ra naha ndavaha ñi siqui tsa ña cutuñi iñi ra naha, tan cua cúu ra naha tumaa tsihi quití can naha ti.

¹³ Cua nyehe ra naha tundoho tsa cuenda tsa janyehé ra naha tundoho tsi inga nyivi. Si xaan cuñi ra naha tsihin tsa caquiñi javahá ra naha nu tuvi. Tsahá ra naha

ticanuu nu yucú ndo nu iyó vico tatun cutahán ra naha tsihin ndo. Nyaá xaan ra naha tusii iñi. Maa tyin juvin ñi tsi maa ra naha jandaví ñaha ra naha.

¹⁴ Tandihí ñaha tsa nyehé ra naha, cuñí ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandaví ñaha ra naha tsi nyivi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha.

¹⁵ Nacoó ra can naha ra ityi vaha tan naquihín ra naha ityi tsa cuahán nu cua cunaa ra naha tyin javahá ra naha tumaa javahá ra Balaam, sehe ra Beor. Tyin ra Balaam cuñí ra jaha canaa ra xuhun tsihin tsa ña vaha tsa javaha ra.

¹⁶ Tacan tan nacahan burru jana ra tsihin ra, tumaa caahán nyivi, tan tsa nacahan ti ña tsahá ti cuhun ra javaha ra tsa ña vaha tsicá iñi ra.

¹⁷ Tan tacan tucu maa ra can naha ra. Cuví ra naha tumaa iin soco ityi nu nduve ndutya yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cuhun ra naha nu naa xaan tan ican cuví nu cua ndoo cuii ra naha.

¹⁸ Yaa xaan caahán ra naha. Maa tyin tandihí tsa caahán ra naha nduve yahvi nyaá can. Tan tsihin tandihí tsa ña vaha tsa javahá ra tan tsihin tsa ña vaha tsa cuñí cuñu ñuhu ra naha jandaví ñaha ra naha tsi nyivi tsa tsa yaha

quitá mahñu nyivi tsa javahá tsa caquiñi.

¹⁹ Catyí ra naha tsihin ñi tyin cua coo nuña ñi. Maa tyin juvin ñi maa ra naha tsahá tsa cundaca ñaha tsa caquiñi tsi ra naha. Tyin tatun tsahá yo tsa cundaca ñaha tsa cundaca ñaha tsi yo, musu can cuví yo.

²⁰ Tyin nyivi tsa nacoto tsi Jutu Mañi yo Jesucristo, ra jacacú tsi yo, tsa yaha nacoó ñi tsa caquiñi tsa iyó nu ñuhu ñayivi ihya maa tyin tatun javaha nyico ñi tsa caquiñi, cahnu ca cuatyí ñi cua coo nu Nyoo.

²¹ Vaha ca tun tsatyin ña nacoto ñi ityi vaha, tan ñavin ca tsa nacoó ihñi ñi tsa tsahá Nyoo tsi ñi tsa tsa yaha nacoto ñi tsi ra.

²² Maa tyin cundaá tsa tuhvá nyivi caahán: “Ina tsatsí nyico ti tsa ndutsan ti. Tan quini tucu, tun tsa yaha tsityí ti, quihví nyico ti nu xahan nyahyu.” Tacan cuví ñi can tyin javahá nyico ñi tsa javahá ñi nda jihna.

3

Quivi cua quitsi nyico Jutu Mañi yo

¹ Yañi, cuñí xaan yu tsi ndo. Carta ihya cuví carta tsinu uvi tsa jaquitsí yu tsi ndo. Tan nu nduví taahan carta ihya tsahá cuenda yu tsi ndo na caca vaha iñi ndo tan ña naa iñi ndo tsa cutuhva ndo.

² Ndūcuhun iñi ndo tsa cahan ra cuví ndusu yuhu Nyoo tahanan tsanaha. Tan ndūcuhun tucu iñi ndo tsa

jacuahā ndi tsi ndo. Tyin cuvī ndi ra tava tyiñu Jutu Mañi yo Jesucristo, ra jacacú tsi yo.

³ Coto jihna ndo tyin nu cua ndihī quivī cua quitsi nyivī cua vacu nducu tuhun Jutu Mañi yo. Tan cua coo ñi cuhva ña vaha cuñi cuñu ñuhu ñi.

⁴ Tan cua catyi ñi: “¿Náa ra Jesucristo tsa catyi tyin cua quitsi ra inga tsaha? ¿Numaa nyií ra? Tyin nda quivī tsa tsihī tsi tsaahnu yo tan nda cuanda tsa tsinu ñuhu ñayivī tan nda vityin caá ñi maa tahan ñi caá”, cua catyi ñi.

⁵ Tyin maa ñi ña cuñi ñi coto ñi tyin nda tyembu tsahnu cahān Nyoo tan javahā ra andivī tan ñuhu ñayivī. Quita ñuhu ñayivī tsitsi ndutya, tan tsihin ndutya tsinu tsi.

⁶ Tsa yaha javahā Nyoo ñuhu ñayivī juvin ñi maa tsihin ndutya naā ñuhu ñayivī quivī cuun savi xaan.

⁷ Maa tyin andivī tan ñuhu ñayivī tsa iyó vityin ndatú tsi tsa cayu tsi tumaa catyi maa Nyoo. Cua cayu andivī tan ñuhu ñayivī tsihin ñuhu quivī cua cutuñi nyivī tan cua naa nyivī caquiñi.

⁸ Maa tyin nyooho yañi yu tsa cuñi xaan yu, ña naa iñi ndo tyin tsa cuenda Jutu Mañi yo tsa iin quivī cuvī tsi tumaa mil cuiya, tan tsa mil cuiya cuvī tsi tumaa tsa iin quivī tsa cuenda ra.

⁹ Vasiqui yihī ndo tsicá iñi ndo tyin maa Jutu Mañi yo ña cuñi naha quitsi. ñaha ca quitsi ra tyin ndatú jihna ra nda ndu uvī iñi tandihī nyivī

tan nasama ñi cuhva iyó ñi tyin ña cuñi ra tsa cunaa ndi intuhun yo.

¹⁰ Maa tyin quivī cua quitsi Jutu Mañi yo, yoñi maa cua coto tyin cua quitsi ra quivī tsa ña ndatú yo tsi ra. Cua quitsi ra tumaa iin ñasuhu. Tan ñihī cunahma tan cua naa andivī. Tan cua janaa ñuhu tandihī tsa iyó ityi siqui. Tan ñuhu ñayivī cua cayu tsi tsihin ñuhu tsihin tandihī tsa iyó nuu tsi.

¹¹ Tacan cua naa tandihī tsa iyó. Yacan cuenda cuñi tsi cuiti coo yo tumaa iyó maa Nyoo.

¹² Cuatu ndo quivī quitsi Nyoo. Nducu ndo cuhva quitsi ñi ra tyin quivī tsa cua quitsi ra cua naa andivī jaha ñuhu. Tan tandihī tsa iyó cua naa tsi tsihin tsa ihñi ñuhu can.

¹³ Maa tyin yoo ndatú yo andivī tsaa tan ñuhu ñayivī tsaa tsa catyi Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

¹⁴ Yacan cuenda yañi, tsitsi tsa ndatú yo tsi Jutu Mañi yo, nducu ndo cuhva coo vaha ndo tsihin Nyoo, tyin tacan tan quivī quitsi ra, sií cua cuñi yo tan cua coo taxin añima yo tyin nduve ca cuatyí yo iyó.

¹⁵ Coto ndo tyin Jutu Mañi yo ña cundihī iñi ra ndatú ra tsi yo tyin cuñi ra tsa cacu cuaha nyivī. Juvin ñi tyehen caahān tucu ra Pablo yañi yo nu carta tsa jaquitsi ra tsi ndo. Tyaa ra itsi tsihin tsa tsiñi tuñi tsa tsahā Nyoo tsi ra.

¹⁶ Tandihí ñi nu carta ra tan caahán ra tuhun ihya. Vasu yihí tsa yíi xaan cutuñi iñi yo. Tan nyivi tsa ña cutuñi iñi, ñi tsa ña ñihi nyaá tsihin Nyoo, siin cuhva cutuñi iñi ñi itsi. Juvín ñi tacan javahá ñi tsihin tuhun Nyoo tsa tyaq inga ca ra naha. Tan tsa tacan javahá ñi, juvín ñi tsi maa ñi jacunaá ñi.

¹⁷ Yacan cuenda yañi, vityin tsa tsitó ndo tuhun ihya tsa ndi cumañi ca cuvi tsi, jaha ndo cuenda tsi ndo tan cuñi yu tsa coto ndihi ndo cuhva jandaví ñaha ra caquiñi can naha ra, tyin tacan tan ña nacoo ndo cuhva vaha tsa cuahán ndo.

¹⁸ Maa tyin cuñi tucu tsi nacoto vaha ca ndo tsi Jutu Mañi yo ra Jesucristo, ra jacacú tsi yo. Tan cuahnu ca ndo tsihin tsa vaha ra tsa tsahá ra tsi yo. Na jacahnu yo tsi ra vityin tan tacan ñi maa.

Tan na cuvi tsi tacan ñi.

Carta Tsa Jihna Ñi Tsa Tyaa Ra Juan

Cua coo yo ñayivi nyito

¹ Ihya tyaá ndi tuhun ra tsa iyó nda ndi cumañi coo tandihí tsa iyó. Tsiñi ndi tsa cahan ra quivi tsica ndi tsihin ra. Nyehe ndi tsi ra tsihin tinuu ndi tan cutuñi iñi ndi yoo ra cuví ra. Tan tñin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsaḥa ra ñayivi nyito iyó yo.

² Tan quivi tsaḥa ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaḥa tsi nu iyó yo.

³ Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuví ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra.

⁴ Tan tyaá ndi tuhun ihya tsa cuenda ndo tyin tacan tan coto ndo tandihí tsa tsaḥa Nyoo tsi ndo tan sii xaan cua cuví tsi ndo.

Nyoo, ñuhú cuví ra

⁵ Vityin nacatyí tuhun ndi tsihin ndo tsa cahan ra Cristo tsihin ndi. Catyí ra tsihin ndi tyin Nyoo ñuhú cuví ra. Tan nduve tsa naa tsi ra, [nduve tsa ña vaha tsicá iñi ra cuví can].

⁶ Tun catyí yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa.

⁷ Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihí cuatyí yo tsihin niñi ra.

⁸ Tatun catyí yo tyin nduve cuatyí yo, juvin ñi maa yo jandaví ñaha yo, tan nduve tsa nditsa iyó añima yo.

⁹ Maa tyin tatun naahmá yo cuatyí yo nuu Nyoo, cuví cuita iñi yo tsi ra tyin cua jaha ra tucahnu iñi tsi yo tsa cuenda cuatyí yo tan cua nacatya ra tandihí cuatyí yo tyin maa ra vaha ra tan javahá ra cuhva catyí ra tyin ña vatya ra.

¹⁰ [Nyoo catyí ra tyin iyó cuatyí yo], tan tatun catyí yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó añima yo.

2

Ra Cristo cuví ra caahán ndaahvi tsaha yo

¹ Sehe nyihi yu, caahán yu tandihí tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuví ca nduyaha ndo nuu Nyoo, tyin iyó iin ra caahán ndaahvi tsaha yo nuu

Nyoo. Tan ra ican cuví ra Jesucristo, ra cuítí iyó.

² Juvín ra jahá tucahnu iñi tsi yo tyin tsihí ra nu cruu tsa cuenda cuatyí yo. Tan ñavin tsa cuenda maa ñi maa yo tsihí ra, tyin tsihí ra tsa cuenda tandihí cuii nyívi iyó nu ñuhu ñayívi.

³ Tatun tyaá yahvi yo tsa caahán Nyoo, nacotó yo tsi ra.

⁴ Maa tyin tatun iin ra tsa catyí tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra.

⁵ Nyívi javahá tsa caahán Nyoo, ñi ican cuví ñi cuñí tsi ra tsihin tsa ñi iñi añima ñi. Tan tsihin yacan tsitó yo tyin iin ñi cuví ñi tsihin ra.

⁶ Nyívi catyí tyin iin caa ñi iyó ñi tsihin Nyoo, taahán tsi coo ñi tumaa tsicoo maa ra Jesucristo quívi quítsi ra nu ñuhu ñayívi ihya.

Taahán tsi tsa cuñí tahan yo tsi yo

⁷ Yañi, ñavin tuhun tsa ja-cotó yu tsi ndo, tyin cuví tsi tuhun tsahnu tsa tsa tsitó maa ndo nda quítsi ca tsi. Tan juvín tsi cuví tsa tsa yahá tsiñi ndo.

⁸ Maa tyin ña tsindihí tsa tsa tsi tyin tyaá yahvi yo itsi tan tsa tyaá yahvi yo itsi, cuñí tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihi ca jandunditsín ñuhu tsa nditsa.

⁹ Nyooho tsa catyí tyin iyó ndo nu nditsin, tan ndasi cuñí ndo nyehe ndo tsi nyívi yihí

tuhun Nyoo tsihin ndo, ndi iyó ndo nu naa.

¹⁰ Maa tyin nyívi tsa cuñí tsi nyívi yihí tuhun Nyoo tsihin ñi, iyó ñi nu nditsin. Tan nduve maa cuatyí cuvi janduva tsi ñi.

¹¹ Maa tyin nyívi ndasi cuñí nyehe tsi nyívi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehé ñi tyin tumaa tsa cuaa ñi jahá tsa naa can.

¹² Jaquitsí yu tandihí tuhun ihya tsi nyooho tsa ndi nacuhva cuenda tsi ndo tsi Nyoo. Tyin tsa yahá jahá Nyoo tucahnu iñi cuatyí ndo tsa cuenda tsa tsihí ra Jesucristo cuenda yo.

¹³ Nyooho tsa tsa tsahnu tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayívi. Tan tyaá tucu yu itsi tsa cuenda nyooho ra tsa ndi cuahan cutuñi vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhva cuenda tsi ndo tsi Nyoo, tyin nacotó ndo tsi Nyoo Jutu yo.

¹⁴ Jaquitsí yu carta ihya tsi nyooho tsa tsa tsahnu tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayívi. Tan jaquitsí yu carta ihya tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndo jahá tuhun Nyoo tsa iyó añima ndo. Tan

jaha canaa ndo tsi nu ña vaha.

¹⁵ Ña cuñi ndo tsa caquiñi tsa iyó nu ñuhu ñayivi ihya. Tyin nyivi cuñi tandihi yacan, ña cuñi ñi tsi Nyoo Jutu yo.

¹⁶ Tyin tandihi tsa ña vaha tsa iyó nu ñuhu ñayivi ihya, tsa cuñi cuñu ñuhu yo, tsa nyehé yo tan cuñi yo coo tsi yo, tan tsa cuñi yo nduyaa yo tsihin tsa iyó tsi yo, tandihi yacan tsahá ñuhu ñayivi ihya tsi yo, tan ñavin Nyoo Jutu yo tsahá can.

¹⁷ Ñuhu ñayivi ihya cua cundihí can, tan cua cundihí ndihí tucu tandihi tsa caquiñi tsa cuñi nyivi javaha ñi. Maa tyin nyivi tsa javahá cuhva cuñi Nyoo, cua coo cuii ñi tsihin ra.

Nu tsa ndasi cuñi nyehe tsi ra Cristo

¹⁸ Nyooho, tsa cuví ndo tu-maa sehe yu, coto ndo tyin tsa cua ndihí quivi. Tan nyooho tsiñi ndo tyin vatsí nyivi tsa ña cuñi nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahañ tsi cundihí quivi.

¹⁹ Nyivi can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyivi yihí tuhun Nyoo tsihin yo cuví ñi.

²⁰ Maa tyin nyooho tsa tsitó ndo tsa caahán Nyoo tyin tsahá ra Cristo Tatyí Ii Nyoo

iyó aña ndo tan jacotó tsi tandihí tsi ndo.

²¹ Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuvi quita tuhun vatya tsihin tuhun nditsa.

²² ¿Yóo cuví nyivi vatya? Nyivi vatya cuví ñi catyí tyin ra Jesús ñavin ra Cristo cuví ra. Tan juvin ñi ican cuví ñi ndasi cuñi nyehé tsi ra Cristo. Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra.

²³ Tan tandihi nyivi tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyivi tsa caahán tsihin tsa ñi iñi aña ñi tsihin nyivi tyin ra Jesucristo cuví Sehe Nyoo, iyó Nyoo Jutu yo tsihin ñi.

²⁴ Yacan cuenda naquihin vaha ndo tsitsi aña ndo tandihí tsa tsiñi ndo nda quivi jihna ñi. Tyin tun naquihin vaha ndo itsi tsitsi aña ndo, cua coo ndo iin caa ñi tsihin Nyoo Jutu yo tan tsihin Sehe ra.

²⁵ Tan ñayivi nyito can cuví tsa catyí ra Jesucristo tyin cuhva ra tsi yo.

²⁶ Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandaví ñaha tsi ndo.

²⁷ Maa tyin ra Jesucristo tsahá ra Tatyí Ii Nyoo iyó aña ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí Ii Nyoo jacuahá tandihí maa tyiñu tsi ndo. Tan tsa nditsa cuví tsi, ñavin cuendu

cuví tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí li Nyoo tsi ndo.

²⁸ Tan vityin nyooho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quívi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quívi tsa ra.

²⁹ Vityin tsa tsa tsitó ndo tyin vaha ra Cristo, cuñi tsi coto ndihi ndo tyin tandihi nyívi javahá tsa vaha, sehe Nyoo tsi ñi.

3

Nyívi cuví sehe Nyoo

¹ Nyehe ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuví yo sehe ra. Tan tsa cuenda yacan, nyívi taahán iñi tsa iyó nu ñuhu ñayívi ihya ña cutuñi iñi ñi cuhva tsicá iñi yo tyin ña nacoto ñi tsi maa ra.

² Nyooho yañi, tsa cuví yo sehe ra vityin, maa tyin ñaha ca coto yo náa cua cuví yo. Maa tyin tsitó yo tyin quívi quitsi ra Jesucristo, cua cuví yo tumaa cuví maa ra, tyin cua nyehe vaha yo tsi ra tan cua nyehe tucu yo nácaa caá ra.

³ Tandihi yoo tsa ndatú tsa cua cuví tacan, nducú yo cuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuiti iyó ra.

⁴ Tandihi nyívi tsa tsicoó cuatyí, ñi ican cuví ñi tsa ña tyaá yahvi ley Nyoo. Tyin tun javahá yo tsa ña vaha, cuñi tsi catyi tyin ña tyaá yahvi yo ley Nyoo.

⁵ Nyooho tsa tsitó tyin ra Cristo quitsí ra nu ñuhu ñayívi ihya tyin quinyaa ra cuatyí yo, tan tsitó tucu ndo tyin maa ra nduve cuatyí ra.

⁶ Tandihi yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyívi javahá tsa ña vaha, ñaha ca nyehe ñi tsi ra, tan ñaha ca coto ñi tsi ra.

⁷ Nyooho, tsa cuví tumaa sehe yu, coto jandavi ñaha nyívi tsi ndo. Tyin nyívi javahá tsa vaha, cuví ñi nyívi vaha, tumaa vaha maa ra Cristo.

⁸ Tyin nyívi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quívi jihna ñi. Yacan cuenda quitsí ra Jesucristo, Sehe Nyoo, tyin janaa ra tandihi tsa javahá nu.

⁹ Tandihi yoo tsa tsa yaha nacacu tsa jahá Nyoo, ña taahán ca iñi yo javahá yo tsa ña vaha, tyin iyó yo ñayívi tsahá Nyoo tsi yo. Yacan cuenda ña javahá ca yo tsa ña vaha, tyin tsa yaha nacacu tsa yo tan vityin cuví yo sehe Nyoo.

¹⁰ Cuví nacotó yo ndáa nyívi cuví sehe Nyoo, tan ndáa nyívi cuví sehe nu ña vaha, tyin tandihi nyívi tsa ña javahá tsa vaha tan ña cuñi tsi nyívi yihí cuenda Nyoo, ñavin sehe Nyoo tsi ñi.

Na cuñi tahan yo tsi yo

11 Tyin tsa tsiñi ndo nda quivi jihna ñi cuví: Tsa cuñi tahan yo tsi yo.

12 Ña taahán tsi javaha yo tumaa javaha ra Caín, tyin ra Caín cuví ra iin ra cuenda nu ña vaha. Tan tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javaha ra tsa vaha, tan maa ra javaha ra tsa ña vaha.

13 Nyooho yañi, ña iyo cuñi ndo tun ndasi cuñi nyivi ña yihí tuhun Nyoo nyehé ñi tsi ndo.

14 Yoo tsa cuñi tsi nyivi yihí tuhun Nyoo tsitó yo tyin iyó yo ñayivi nyito, tyin juvin tsi janahá tsi yo tyin ña cuví ca yo nyivi tsihi. Maa tyin nyivi ña cuñi tsi nyivi yihí tuhun Nyoo, cuví ñi tumaa nyivi tsihi.

15 Nyivi ndasi cuñi nyehé tsi nyivi, cuví ñi tumaa nyivi tsahñi nyivi. Tan tsitó ndo tyin ndi intuhun ñi tsahñi nyivi, tan ña cua kuhva Nyoo ñayivi nyito coo ñi.

16 Tsitó yo náa cuví tsa cuñi tahan yo tsi yo tyin tsa yaha janaha ra Jesucristo tsi yo nácaa taahán tsi cuñi tahan yo tsi yo. Tyin maa ra nda cuanda tsaha ra ñayivi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñi tsi kuhva yo nda cuanda ñayivi iyó yo tsa cuenda nyivi yihí tuhun Nyoo.

17 Tatun yihí yo tan iyó luxu tsa iyó tsi yo, tan nyehé yo

tyin cumañi tsa cumañi tsi inga nyivi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra.

18 Nyooho tsa cuví ndo tumaa sehe yu, na ña cuñi yo tsi nyivi tsihin tuhun caahán ñi yo, na cuñi tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa ñi iñi yo.

Nacaa javaha yo tan coo vaha yo tsihin Nyoo

19 Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo.

20 Tatun tuví iñi tsitsi añima yo tyin iyó cuatyí yo, na ña cuita iñi yo yacan. Na cuita iñi yo tsi Nyoo tyin juvin ra tsitó tandihi tsa iyó añima yo tan cahnu ca cuví ra tan ñavin ca añima yo.

21 Yañi, tatun tuví iñi yo tyin nduve cuatyí yo, na ña nayuhvi yo nyehe yo tsi Nyoo.

22 Tan tandihi tsa cua ndacan yo tsi ra, cua kuhva ra can tsi yo, tyin tyaá yahvi yo tsa caahán ra, tan javahá yo kuhva taahán iñi ra.

23 Tyin tyiñu tsa tsaha ra tsi yo yacan cuví tsa tsinu iñi yo tyin ra Jesucristo cuví Sehe ra, tan tsa cuñi tahan yo tsi yo, tumaa tava tyiñu ra tsi yo.

24 Nyivi tyaá yahvi tyiñu tsaha ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyí Ii ra tsa tsaha ra tsi yo.

4

Tatyí Ii Nyoo tan tatyí nu ña vaha

¹ Nyooho yañi tsa cuñi xaan yu, ña tsinu iñi ndo tsa caahán nyivi catyí tyin tuhun Nyoo caahán ñi. Nyehe jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaha xaan nyivi jandaví ñaha iyó. Catyí ñi tyin Nyoo caahán tsa caahán ñi tan ña nditsa ñi.

² Cuví nacoto ndo tsi nyivi tun juvin Tatyí Ii Nyoo jacahán tsi ñi o ñavin. Ñi tsa iyó Tatyí Ii Nyoo tsihin, catyí ñi tyin quee ra Jesucristo nda gloria tan quitsi ra nu ñuhu ñayivi ihya, tan cuví ra iin rayi tumaa maa yo.

³ Maa tyin tandihi nyivi tsa catyí tyin ñavin tacan cuví, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsi nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

⁴ Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yahá jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuví ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihya.

⁵ Ñi ican, cuenda nu ñuhu ñayivi ihya cuví ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi cuenda nu ñuhu

ñayivi ihya tyaá soho ñi tsa caahán ñi ican.

⁶ Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuví nacoto yo ndáa nyivi iyó Tatyí Ii Nyoo tsihin, tan caahán ñi tsa nditsa tan ndáa nyivi yihí tatyí ña vaha tan jandaví ñaha ñi.

Nyoo cuñi xaan ra tsi tandihi nyivi

⁷ Nyooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihi yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo.

⁸ Nyivi ña cuñi tsi inga nyivi, ña nacotó ñi tsi Nyoo, tyin Nyoo cuñi xaan ra tsi yo tan tsi tandihi nyivi.

⁹ Nyoo janahá ra tsi yo tsa cuñi ra tsi yo tsihin tsa tsaḥa ra Sehe mañi ra quitsi nu ñuhu ñayivi ihya, tyin cuhva ra ñayivi nyito coo yo.

¹⁰ Nyehe ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquitsi ra Sehe ra tyin tacan tan cúu ra tsa cuenda yo tan quinyaa ra cuatyí yo.

¹¹ Nyooho yañi, tatun tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo.

¹² Ndi intuhun maa nyivi, tan ñaha ca maa nyehe ñi tsi

Nyoo, maa tyin tatun cuñi tahan yo tsi yo, iyó Nyoo ańima yo. Tan ni vaha ińi yo cuñi yo tsi ra tan tsi nyivi.

¹³ Tan tsitó yo tyin iyó vaha yo tsihin ra tan maa ra iyó ra ańima yo, tyin tsaha ra Tatyi li ra iyó ańima yo.

¹⁴ Nyuhu nyehe vaha ndi tan cuvı ndi tsandaa tyin jaquitsi Nyoo Jutu yo tsi Sehe ra tyin jacacu ra tsi yo tsa cuvı yo nyivi iyó nu ńuhu ńayivi ihya.

¹⁵ Tandihı nyivi tsa tsinú ińi tan caahán tyin ra Jesús cuvı Sehe Nyoo, iyó Nyoo ańima ńi. Tan iyó ńi iin caa ńi tsihin ra.

¹⁶ Yoo tsitó yo tan tsinú ińi yo tyin Nyoo cuñi ra tsi yo, tan cuñi ra tsi tandihı nyivi. Tan tandihı yoo tsa cuñi tahan yo tsi yo, iyó yo iin caa ńi tsihin Nyoo; tan Nyoo iyó ra tsitsi ańima yo.

¹⁷ Tyin tatun cuñi yo tsi Nyoo tsihin tsa ni ińi ańima yo, ńa cua nayuhvi yo nyehe yo tsi ra na tahan tsi quivi cutuńi tandihı nyivi nuu ra. Tyin tumaa iyó ra Jesucristo, tacan iyó yo nu ńuhu ńayivi ihya.

¹⁸ Nyoo cuñi ra tsi yo, tan tatun cuñi yo tsi ra, nduve tsa nayuhvi yo. Tatun ni ińi yo cuñi yo tsi Nyoo ńa nuńa ca nu quihvi tuhun yuuhvi can ańima yo, tyin Nyoo jatsiyó ra tandihı maa yacan. Tyin tatun yuuhvi yo, yihı can tyin tuvı ińi yo tyin iyó cuatyı yo. Tan yuuhvi yo tsa cua tatsı tuńi Nyoo tsi yo. Tyin tatun yuuhvi cuñi yo, yuuhvi yo

tyin ńaha ca cuñi yo tsi Nyoo tumaa taahán maa tsi cuñi yo tsi ra.

¹⁹ Yoo cuñi yo tsi Nyoo tyin jihna ca maa ra cuñi tsi yo.

²⁰ Tatun iin nyivi tan catyi ńi: “Yuhu cuñi yu tsi Nyoo”, tan ndasi cuñi ńi nyehé ńi tsi nyivi tahan ńi, nyivi vatya cuvı ńi. Tyin tatun ndasi cuñi yo nyehé yo tsi nyivi tahan yo tsa tuhvá yo nyehé, ńnáca cua cuñi yo tsi Nyoo tsa ńa cuvı nyehe yo? ńa cua cuvı.

²¹ Tava tyińu Nyoo tsi yo tyin tun cuñi yo tsi ra, tacan cuñi tsi tsa cuñi tahan yo tsi yo.

5

Tatun ni ińi yo tsinú ińi yo tsi Nyoo cuvı jaha canaa yo tsi tsa ńa vaha

¹ Tandihı nyivi tsa tsinú ińi tyin ra Jesús cuvı ra Cristo ra quee nda gloria jaha Nyoo, juvin ńi cuvı sehe Nyoo. Tyin tatun cuñi yo tsi iin ra iyó sehe, cuñi ndihı yo tsi sehe ra.

² Tatun cuñi yo tsi Nyoo tan javahá yo tsa caahán ra, cua cuñi ndihı yo tsi nyivi cuvı sehe ra.

³ Tyin tsa cuñi yo tsi Nyoo yacan cuvı tsa tyaá yahvi yo tsa tsaha cuenda ra tsi yo. Tan tandihı tsa tsaha cuenda ra tsi yo, ńa yi javaha yo can.

⁴ Tyin tandihı yoo tsa cuvı sehe Nyoo, jaha canaa yo tsi tsa ńa vaha tsa iyó nu ńuhu ńayivi ńayivi ihya. Cuvı jaha canaa yo can tyin tsinú ińi yo tsi Nyoo.

⁵ Maa ńi maa nyivi tsa tsinú ińi tyin ra Jesús cuvı Sehe

Nyoo, ñi ican cuví ñi cuví jahá canaa tsa ña vaha tsa iyó nu ñuhu ñayivi ihya.

Tatyí Ii Nyoo cuví tsandaa cuenda ra Jesús Sehe Nyoo

⁶ Ra Jesucristo quitsi ra nu ñuhu ñayivi ihya. Tan tsa tsi-coondutyá ra tsihin ndutya tan tsa tsati ñiñi ra janahá tyin Sehe Nyoo cuví tsi ra. Ñavin tsa tsicoondutyá ñi ra. tyin nda cuanda tsa tsati ñiñi ra. Tan juvin ñi maa Tatyí Ii Nyoo cuví tsandaa tyin tacan cuvi. Tan Tatyí Ii Nyoo ña jandaví ñaha tsi.

⁷ Nda andivi iyó uñi taahan tsa cuví tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí Ii Nyoo. Tsa nduñi taahan ra naha, iin ñi cuví ra naha.

⁸ Tan nu ñuhu ñayivi ihya iyó tucu uñi tsandaa: Tatyí Ii Nyoo tsa iyó añaima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutyá ra Jesús, nu catyi Nyoo tyin juvin ra Jesús cuví Sehe ra. Tan tsa tsinu uñi cuví nu tsati ñiñi ra Jesús. Tan tsa nduñi taahan yacan nacatsí tahan caahán can.

⁹ Yoo naquihín yo tsa caahán ra cuví tsandaa nu ñuhu ñayivi ihya. Tan Nyoo cahnu ca cuví ra tan ñavin ca ra ñuu ñayivi ihya. Yacan cuenda taahán tsi naquihin yo tsa caahán ra, tan juvin ñi maa ra catyi tyin Sehe ra cuví tsi ra Jesús.

¹⁰ Nyivi tsa tsinú iñi tyin Sehe Nyoo cuví tsi ra Jesús, tsitó ñi tsitsi añaima ñi tyin

nditsa. Nyivi tsa ña tsinú iñi tsi ra, jahá ñi tyin vatya Nyoo, tyin ña cuñi ñi tsinu iñi ñi tsa caahán Nyoo tsandaa cuenda Sehe ra.

¹¹ Tan tyehen caahán Nyoo tsihin yo: Catyi ra tyin tsa ha ra ñayivi nyito coo yo tan ñihi yo itsi tatun tsinú iñi yo tyin ra Jesucristo cuví Sehe ra.

¹² Nyivi iyó Sehe Nyoo añaima, iyó ñi ñayivi nyito. Tan nyivi nduve Sehe Nyoo iyó añaima, ña iyó ñi ñayivi nyito.

Nu ndihí cahan ra Juan tan nu tsahá ra tyiñu tsi nyivi

¹³ Tyaá yu tuhun ihya tsa cuenda nyoocho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayivi nyito tsa ña cua naa maa.

¹⁴ Ndita iñi yo tsi Nyoo tyin tatun tsicán yo tsa tsicán yo tsi ra tan cuhva cuñi maa ra tsicán yo, tsitó yo tyin maa ra tsiñi ra tsa caahán yo.

¹⁵ Tan tsa tsitó yo tyin tsiñi ra tsa tsicán yo, tsitó tucu yo tyin tsa ñihi yo tsa tsicán yo tsi ra.

¹⁶ Tatun iin nyivi tan nyehe yo tyin javahá ñi cuatyí tsa ña taahán tsi cúu ñi, taahán tsi cahan ndaahvi yo tsihin Nyoo tsa cuenda ñi na jaha ra tucahnu iñi tsi ñi tsa cuenda cuatyí can. Maa tyin tatun javahá ñi cuatyí tsa taahán tsi cúu ñi, ña ndacan tahvi yo tsa cuenda ñi.

¹⁷ Tandihí tsa caquiñi tsa javahá nyivi, cuatyí cuví can. Tan iyó tucu cuatyí tsa ña jaha Nyoo tucahnu iñi.

¹⁸ Tsitó yo tyin nyivi tsa nacacu tsa jahā Nyoo, ña jañihí ca ñi javaha ñi cuatyí. Tyin jahá cuenda Sehe Nyoo tsi ñi tan ña tsahá ra tsa tiin nu ña vaha tsi ñi.

¹⁹ Yoo tsa tsitó yo tyin cuenda Nyoo yihí yo. Tan tandihí nyivi tsa taahán iñi tsa iyó nu ñuhu ñayivi ihya, nu ña vaha ndacá ñaha tsi ñi.

²⁰ Tan tsitó tucu yo tyin quitsi Sehe Nyoo, tan tsahā ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ñi tsihin ra. Tan juvin maa ra cuví Nyoo tsa nditsa. Tan iyó ra ñayivi nyito tsa ña cua naa maa.

²¹ Nyooho tsa cuví tumaa sehe yu, jahā cuenda ndo tsi ndo tsihin tsitoho tsa jacahnú nyivi, tyin ñavin Nyoo cuví can.

Tan na cuví tsi tacan ñi.

Carta Tsinu Uvi Tsa Tyaa Ra Juan

*Nu caahán ra Juan tyin
cuñí xaan ra tsi nyivi yihí
cuenda Nyoo*

¹ Yuhu ra tsahnu cuenda vehe ñuhu, jaquitsí yu carta ihya tsi yooho, cuhva yu, tan tsi sehe un tyin cuví un ñaha tsa nacatsí maa Nyoo. Cuñí xaan yu tsi ndo tsihin tsa nii ñiña añima yu. Tan cuñí ndihi tucu tandihi nyivi tsa tsitó tsa nditsa tsi ndo, yacan ñavin yuhu ñi cuñí tsi ndo.

² Cuñí ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo.

³ Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

⁴ Sii xaan cuñí yu tyin tsitó yu tyin juhva sehe un vaha xaan nyicún ñi tsa nditsa, tumaa tava tyiñu maa Nyoo Jutu yo tsi yo.

⁵ Hermana, caahán ndaahvi yu tsihin un vityin, na cuñi tahan yo tsi yo. Tyiñu ihya cuñí yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndi tsahá Nyoo tsi yo cuví tsi. Tyin tsa iyó maa tsi nda nu quitsahá.

⁶ Tsa cuñí yo tsi Nyoo, yacan cuví tsa javahá yo tandihi tsa tava tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsiñi ndo nda quivi jihna ñi: Coo ndo tsihin tsa cuñí ndo tsi Nyoo tan tsi nyivi.

*Nu tsahá cuenda ra Juan
nácaa jaha cuenda yo tsi yo tsi-
hin nyivi jandavi ñaha*

⁷ Caahán yu tyehen tsihin un tyin cuaha xaan nyivi jandaví ñaha iyó nanii cahnu nu ñuhu ñayivi. Catyí ñi tyin ña nditsa tsa quitsí ra Jesucristo cacu ra tsihin cuñu ñuhu tan cuví ra ra ñayivi. Nyivi tsa caahán tacan, ñi jandaví ñaha cuví ñi. Tan ñi ndasi cuñi nyehé tsi ra Cristo cuví ñi.

⁸ Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihi ca ndo tandihi tsa cua cuhva Nyoo tsi ndo.

⁹ Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaá yahvi ñi itsi, iyó Jutu yo Nyoo tan ra Jesucristo Sehe ra tsihin ñi.

¹⁰ Tatun tsaá nyivi yuvehe ndo, tan cuñí ñi jacuahá ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndi ña cuhva ndo nacumi tsi ñi.

¹¹ Tyin tun cuhva yo nacumi tsi ñi, cuñí tsi catyí

tyin javahá ndihí yo tsa ña
vaha tsa javahá ñi.

Nu ndihí cahan ra Juan

¹² Iyó cuaha ca tuhun cuñí
yu cahan yu tsihin ndo. Maa
tyin ña cuñí yu cahan yu can
tsihin carta. Tyin tyaá yu
cuhva tsa quitsi yu nu yucú
ndo. Tyin tacan tan natuhun
vaha ca maa yo, tan cusí ca
iñi yo.

¹³ Ihya vatsí nacumi tsi un
jahá sehe ña tahan un tsa
nacatsi ndihí maa Nyoo.

Tan na cuvi tsi tacan ñi.

Carta Tsinu Uñi Tsa Tyaa Ra Juan

Nu caahán ra Juan tyin vaha cuahán ra Gayo tsihin Nyoo

¹ Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha iñi tsi yu tan tsa tsitó maa un tyin cuñí xaan yu tsi un tyin iin caa ñi nyicún yo tsa nditsa.

² Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un.

³ Yuhu sii xaan cuñi yu quivi quitsi juhva ra yañi yo naha ra nu nyii yu. Tan nacatyí tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa.

⁴ Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

⁵ Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra.

⁶ Tandihí ra naha, tan nacatyí tuhun ra naha nuu tandihí nyivi tsicá vehe ñuhu tyin cuñi xaan un tsi ra naha. Jaha tumañi iñi, jatyinyee ca tsi ra yañi yo naha ra, cuhva tsa tsiñi ñuhu tsi ra naha

tumaa taahán iñi maa Nyoo. Tyin tacan tan jañihi ca ra naha cuhun ra naha cahan ra naha tuhun Nyoo.

⁷ Tyin tyiñu ra Jesucristo tsicá ra naha. Tan ña cuñi ra naha tsa jatyinyee nyivi tsa ña tsitó tsi Nyoo tsi ra naha.

⁸ Yacan cuenda maa yo taahán tsi jatyinyee tsi ra naha tsihin tsa tsiñi ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

Nu caahán ra Juan tyin ña vaha javahá ra Diótfrefes

⁹ Yuhu jacuhun yu iin carta tsi nyivi tsicá vehe ñuhu, maa tyin ra Diótfrefes ña cuñi ra tyaa soho ra tsa caahán yu tyin cuñi xaan maa ra cuví ra ityi nuu tsihin nyivi.

¹⁰ Yacan cuenda tatun quitsi yu nu yucú ndo cua jandaa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyivi tsicá vehe ñuhu naquihín vaha ñi tsi ra hermano can naha ra, tyasí ra Diótfrefes tsi ñi, tan tavá ra tsi ñi vehe ñuhu.

¹¹ Yooho yañi yu tsa cuñi xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

Nu caahán ra Juan tyin vaha xaan tsinú iñi ra Demetrio tsi Nyoo

¹² Tandihí nyívi tan vaha caahán ñi tuhun ra Demetrio. Tan vaha xaan tyaá yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

Nu ndihí cahān ra Juan

¹³ Cuaha xaan tuhun cuñí yu jacoto yu tsi un, maa tyin ña cuñí yu jacoto yu can tsi un tsihin carta.

¹⁴ Tyin tyihí yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo.

¹⁵ Na coo tsa taxin añaima un. Ra vaha iñi tsi yo tsa iyó ityi ihya jaquitsí xaan ra naha nacumí tsi un. Tan cuñí yu jaha un tumañi iñi cuhva un nacumí tsi tsa intuhun intuhun ra vaha iñi tsi yo.

Carta Tsa Jacuhun Ra Judas Tsi Nyivi Yihí Cuenda Nyoo

Nu tyaá ra Judas carta tsa cuenda nyivi cana Nyoo

¹ Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyooho tsa cana Nyoo Jutu yo. Cuñí xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo.

² Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñí ra tsi yo. Tan na naquihin ca ndo tsa taxin tsahá ra tsi yo coo añima ndo.

Nu caahán ra Judas tuhun nyivi tsa jacuahá tsa ña nditsa (2 Pedro 2.1-17)

³ Tyihí yu cuhva tyaá yu iin carta tsa cuenda ndo yañi, tyin cuñí yu cahan yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñi yu tsi ndo na ña cuhva ndo tsa sama cuhva tsinú iñi ndo tsa vaha tsa tsahá Nyoo tsi yo tsa cuví yo nyivi yihí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi.

⁴ Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yaha jaha

Nyoo tucahnu iñi tsi yo, tan yacan cuenda cuví ñi javaha maa yo tsa cuñí yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahañ tsanaha tyin ra tsa javahá tacan, cua cunaa ra naha.

⁵ Vasu ndi maa tsa tsitó ndo tsa javahá Nyoo tahañ tsanaha, maa tyin cuñí yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacú ra tsi ñi ndaha nyivi Egipto can. Maa tyin tsa yaha can janaa ra tsi tandihí maa ñi tsa ña tsinu iñi tsi ra.

⁶ Tan juvin ñi tacan javahá tucu Nyoo tsihin ángel tsa ña tyaá yahvi tsi ra. Tsahá ra tyiñu tsi nahnu, maa tyin nacoq nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahan tsi quivi cutuñi nyivi.

⁷ Tacan tucu nyivi ñuu Sodoma tan ñuu Gomorra, tan nyivi ñuu nyihi tsa tsicoq nicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayi can naha ra tsicoq ra naha tsihin ñaha. Tan ñiñaha tsicoq ñi tsihin iin rayi tan inga ra. Tan cuaha ca tsa caquiñi javahá ñi tyin rayi tsicoq ra naha tsihin ra ndusihi. Tan tsa cuenda yacan, nyehe ñi tundoho nu cayu ñi quivi tsahmí Nyoo ñuu ñi. Tan yacan janahá tsi yo tyin nyivi javahá tsa caquiñi, cua cayu ñi tsihin

ñuhũ tsa ña cua ndahva maa.

⁸ Vasu ndi maa tacan cuvĩ, vityin ndi iyó ra jandavĩ ñaha naha ra. Cuñĩ ra naha tyin vaha javahá ra naha. Maa tyin jatívĩ ra naha cuñũ ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi siqui ra iyó ca tunyee iñi tsi tan ñavin ca maa ra naha.

⁹ Tan ndi ángel Miguel tsa cahnu cuvĩ nuu Nyoo, ña cana iñi ra javahá ra tacan. Tyin quivĩ cañi tahan ra tsihin nu ña vaha tsa cuenda cuñũ ñuhu ra Moisés, ña cana iñi ra cahán ra ndavaha ñi siqui nu. Intuhun ñi tsa catyi ra tsihin nu: “Na tatsi tuñi Jutu Mañi yo tsi un” catyi ángel Miguel can tsihin nu ña vaha.

¹⁰ Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quitĩ, tyin quitĩ ña cutuñi iñi ti. Ica ñi maa ti naha ti tsa cuñi cuñũ ñuhu ti naha ti. Tan tacan tucu ra can naha ra. Tsihin tsa caquiñi tsa javahá ra naha jatívĩ ra naha juvin ñi tsi maa ra naha.

¹¹ ¡Ndahvi ra ndaahvi can naha ra! tyin javahá ra naha tumaa javahá ra Caín. Tan tsa cuenda tsa cuñi ra naha jaha canaa ra naha xuhun, nacoó ra naha ityi Nyoo tumaa javahá ra Balaam. Tan cua cunaa ra naha tumaa cunaá ra Coré, tyin tsihi ra can tsa cuenda tsa ña tyaa yahvi ra tsa cahán ra cuvĩ ityi nuu tsihin ra.

¹² Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsi ra naha tan tsihi ra naha tsihin tsa si cuñi ra naha, tan ña cahán nuu ra naha tsa ña jahá ra naha tsa ñayivi tsi Nyoo. Cuvĩ ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuvĩ ra naha tumaa vico tsa yihĩ ityi siqui tun tsa cua cuun savĩ tan cuahán tsi tsihin tatyĩ tan ña cuun savĩ. Cuvĩ ra naha tumaa yutun tsa ña tsahá tsiti. Tyin yutun tsa ña tsahá tsiti cuvĩ tun tumaa yutun tsa tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuii yoho tun.

¹³ Tan juvin ñi cuvĩ tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuvĩ tucu ra naha tumaa tiñuu tsa iyó andivĩ tsa tsinaá. Tsa nyaá maa tsa cua ndoo cuii ra naha nu naa. Tacan ñi maa tsa cua tahan ra naha.

¹⁴ Tuhun ra can naha ra cahán ra Enoc tahan tsanaha. Ra Enoc tsa tsinu utsa tsa cuvĩ tata ra Adán. Cahán ra tuhun tsa tsahá maa Nyoo tsi ra, tan catyi ra: “Nyehe yu nu vatsi Jutu Mañi yo tan cuenda mil ángel ra vatsi tsihin ra

¹⁵ tyin vatsi ra vatsi tatsi tuñi ra tsi nyivi caquiñi tsa cuenda tandihĩ tsa ña vaha tsa javahá ñi, tan nyivi caahán ndavaha ñi siqui ra”, catyi ra Enoc tahan tsanaha.

¹⁶ Ra tsa jatyañú tsi ndo naha ra, ña ndoo ra naha

vaha tsihin tsa tsahá Nyoo tsi ra naha. Caahán ra naha tan catyí ra naha: “Yíi xaan, cahnu xaan tundoho nyehé yo.” Javahá ra naha tsa cuñí cuñu ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyívi, javahá ra naha can tyin cuñí ra naha tsa cahan nyívi tyin vaha xaan íñi ra naha.

Nu tsahá cuenda ra Judas tsi nyívi yihí cuenda Nyoo

17 Yañi, ña tyaa yahvi ndo tsi ra can naha ra. Maa tyin nducuhun íñi ndo tuhun tsa cahan ra tsa tava tyíñu Jutu Mañi yo Jesucristo,

18 tyin catyí ra naha tye-hen: “Nu cua ndihí quívi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá íñi ra naha.”

19 Ra tsa cahan ra naha tuhun cuví ra cuñí jasín tsi yo. Tyin tyaa yahvi ra naha cuhva cuñí cuñu ñuhu ra naha tan nduve Tatyí Ii Nyoo iyó tsihin ra naha.

20 Maa tyin nyooho yañi, jandu iin ndo íñi ndo tsihin tsa tsinú íñi ndo tsi ra Cristo. Ndacan tahvi ndo tsi ra tsihin tunyee íñi Tatyí Ii maa ra.

21 Nducu ndo cuhva cun-yanaa vaha ca ndo tsi Nyoo, tyin tacan tan coto ndo tyin cuñí xaan ra tsi yo. Tan cuatu ndo quívi cuhun yo coo cuii yo tsihin ra. Tyin yacan cuví tsa cua cuhva Jutu Mañi yo Jesucristo tsi yo tsa cuenda tsa cundaahví íñi ra tsi yo.

22 Cahán yuhu ndo tsihin nyívi tsa ña tsinú íñi, na tsinu íñi ñi.

23 Nducu ndo cuhva cacu ñi tsa cua cayu. Cundaahvi tucu íñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuanda jahma nditsí ñi tan ña vaha can.

Nu ndihí cahan ra Judas tan jacahnu ra tsi Nyoo

24-25 Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuví ra tsa jacacú tsi yo. Tan iyó xaan tunyee íñi tsi ra tsa jahá cuenda ra tsi yo tsa ña coo ca cuatyí yo quívi cua cuhun yo tsihin ra nu cahnu cuví nu nyaá ra. Tan síi xaan cua cuñi yo.

Na coto yo tsa cahnu xaan cuví ra. Na jacahnu yo tsi intuhun ñi maa ra tyin cahnu xaan cuví ra. Tan iyó xaan tunyee íñi tsi ra. Na cundaca ñaha intuhun ñi maa ra tandihí. Tyin nda nu quítsi tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuví tsi tacan ñi.

Tsa Janaha Ra Jesucristo Tsi Ra Juan

Tsa nyehe ra Juan

¹ Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihi tsa cua cuvi tsi yuhu, ra Juan, ra cuvi musu ra.

² Tan caahán yu tandihi tsa nyehe yu. Tan cuvi yu tsandaa tsa cuenda tuhun Nyoo tsa jacoto ra Jesucristo tsi yu.

³ Sii xaan cuvi tsi nyivi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahvi ñi itsi, tyin tandihi tuhun tsa nyaá nuu tutu ihya, tsa yatyin cuii cundaa tsi.

Nu jacuhun ra Juan tutu tsi nyivi tsa utsa taahan vehe ñuhu

⁴ Yuhu ra Juan jaquitsi yu tutu ihya tsi nyooho, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ii tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuvi Nyoo nda tsanaha, tan vityin, tan juvin ra cua quitsi.

⁵ Tan naquihin tucu ndo tsa vaha jahá ra Jesucristo. Tyin

ra ican cuvi ra tsandaa tan tsa nditsa. Juvín ra cuvi ra tsa nandoto tsa jihna ñi. Tan ndacá ñaha ra tsi ra cuvi rey tsa iyó nu ñuhu ñayivi ihya naha ra. Tan cuñi xaan ra tsi yo, tan nacatya ra tsi yo tsihin niñi ra.

⁶ Tan tsaha ra tsa cuvi yo rey tan cuvi yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

⁷ ¡Nyehe jihna ndo! ¡Tsa vatsi ra Cristo nu vico andivi! Tandihí nyivi cua nyehe ñi tsi ra nda cuanda nyivi tsa jañicuehe tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuvi. Nditsa, tacan cua cuvi, tan na cuvi tsi tacan ñi.

⁸ Catyí Jutu Mañi yo:

—Yuhu cuvi ra jihna ñi, tan yuhu cuvi ra cua coo nu cua ndihí quivi, tumaa letra A tan Z —catyí Jutu Mañi yo, ra iyó tandihí tunyee iñi tsi. Tacan ñi iyó maa ra: Juvín ra cuvi Nyoo nda tsanaha, tan vityin, tan juvin ra cua quitsi.

Nu nyehe ra Juan tsa iyo caá ra Cristo

⁹ Yuhu ra Juan cuvi yu yañi ndo. Tan iin caa ñi nyehé yu tundoho tsihin ndo, tan ndacá ñaha Nyoo tsi yo, tan iin caa ñi cunyeé xaan iñi yo náa cuvi tsi yo tyin jatyinyeé ra Jesucristo tsi yo. Nyíi yu vehe caa ñuhu Patmos tsa canyií mahñu ndutya ñuhu. Nyíi yu vehe caa tsa cuenda

tsa caahán yu tuhun Nyoo tsa jacuahā ra Jesucristo.

¹⁰ Tan iin tuingu quivi jacahnú yo tsi Jutu Mañi yo, tuvī iñi yu tsa nyaá Tatyí li Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta.

¹¹ Tan catyí tsi tsihin yu tye-hen:

—Yooho, Juan. Yuhu cuví ra jihna ñi, tan yuhu cua coo nu cua ndihi quivi. Tyaa nu iin tutu tandihi tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

¹² Tacan tan nyico coo yu tyin cuñi yu nyehe yu yóo caahán tsihin yu. Tan nyehe yu utsa taahan candileru xuhun cuaan.

¹³ Tan mahñu tsa utsa taahan candileru can, nyehe yu nyaá iin ra tsa caá tumaa caá rayi ñuhu ñayivi ihya. Nditsí ra jahma cañi nda nu tsaha ra. Tan yihí iin cinturón xuhun cuaan yiqui nyica ra.

¹⁴ Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyi. Tan tinuu ra caá tsi tumaa caá nu cayú ñuhu.

¹⁵ Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhu. Tan

ñihi xaan ndusu ra tumaa ndusu ndutya cuaha.

¹⁶ Tan ndaha cuaha ra nyecú utsa taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehe ñicanyii.

¹⁷ Cuhva tsa nyehe yu tsi ra, nduva yu tsaha ra tumaa tsa tsihi yu. Maa tyin tyiso ra ndaha cuaha ra siqui yu, tan catyi ra tsihin yu:

—Ña nayuhvi un. Yuhu cuví ra jihna ñi, tan yuhu cua coo nu cua ndihi quivi.

¹⁸ Yuhu nyito yu vasu tsihi yu, maa tyin vityin ña cua cundihí maa tsa iyó yu. Tan iyó ndatu tsi yu tsa catyi yu ama taahán tsi cúu nyivi, tan tatun cuhun ñi anyaya o ña cuhun ñi.

¹⁹ Tyaa nu libru tandihi tsa nyehe un, tan tsa iyó vityin, tan tsa cua coo nu cuahán ca tsi.

²⁰ Tuhun ihya cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñi tsi catyi tsa utsa vehe ñuhu.

2

Nu quitsaha tsahá cuenda ra Cristo tsi nyivi tsicá tsa utsa vehe ñuhu: Tsa tsaha cuenda ra tsi nyivi tsicá vehe ñuhu ñuu Éfeso

1 J̄acuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyi tsihin ra tyeheh: “Tyeheh catyí ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan:

2 Yuhu tsitó yu tandihi tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñí ndo nyehé ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyí tyin ra tsicá tyiñu Nyoo cuví ra naha, tan tsitō ndo tyin ña nditsa ra naha.

3 Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo.

4 Maa tyin iyó iin tsa ña vaha javahá ndo, tyin ña cuñí ca ndo tsi yu vityin tumaa tsa cuñí ndo tsi yu quivi jihna ñi.

5 Yacan cuenda nducuhun iñi ndo numaa nda nduva ndo. Tan nasama ndo cuhva iyó ndo, tan javaha nyico ndo tumaa javahá ndo quivi naquihin cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi.

6 Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñí ndo nyehé ndo tsa caquiñi tsa

javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan.

7 Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu. Catyí ra tyeheh: Tatun cuví jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito añima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

Tsa tsahá cuenda ra Jesu-cristo tsi nyivi tsicá vehe ñuhu ñuu Esmirna

8 J̄acuhun ndihi tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyi tsihin ra tyeheh: “Tyeheh catyí ra cuví tsa jihna ñi, ra cua coo nu cua ndihi quivi, ra tsa tsihi tan nandoto:

9 Yuhu nyehé yu tandihi tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavaha ñi siqui ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañi Satanás, cuví ñi.

10 Maa tyin ña nayuhvi ndo tsa nyehé ndo tundoho. Tyin nu ña vaha cua tyihi nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehé ndo tundoho. Maa tyin cuanyicun vaha ndo tsi Nyoo nda cuanda cúu ndo. Tan

yuhu cua cuhva yu ñayivi coo ndo tsihin Nyoo.

¹¹ Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu. Catyí ra tyehen: Tatun cuvi jaha canaa ndo tsi nu ña vaha, ña cua cuhun ndo anyaya, quivi cúu nyivi tsa tsinu uvi tsaha.”

Tsa tsaha cuenda ra Jesucristo tsi nyivi tsicá vehe ñuhu ñuu Pérgamo

¹² Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyi tsihin ra tyehen: “Tyehen catyí ra tsa ndahá mityi tsa xaan nduvi tsiyo yuhu:

¹³ Yuhu nyehé yu tandihi tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuvi tsandaa cuenda yu.

¹⁴ Maa tyin quituvi juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñi jandihí cuhva tsa javaha ra Balaam, ra tsicoo tsanaha. Tyin ra Balaam natyuhu ra tsi ra Balac, na jacatsi ra cuñu quiti tsa jamañi nyivi nu tsitoho tsi nyivi Israel. Tan natyuhu ra tsi ra na catyi ra tsihin ñi tyin ñavin cuatyi cuvi tun iin ñaha tan iyó ña tsihin iin rayi vasu ña tindaha ñi, tan tacan tucu ñi rayi.

¹⁵ Tan juvin ñi iyó tucu juhva nyivi tsa ña cuñi nacoo tsa jacuahá ra yihí cuenda ra Nicolás. Tan yuhu ndasi cuñi yu nyehe yu tsa jacuahá ra can naha ra.

¹⁶ Yacan cuenda janumi ndo nasama ndo cuhva iyó ndo. Tyin tatun ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi [tsa cuvi tuhun] quitá yuhu yu.

¹⁷ Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu: Tatun cuvi jaha canaa ndo tsi nu ña vaha, cua cuhva yu tsa catsi ndo paan tsa cuvi maná tsa nyii xeehe. Tan cua cuhva yu iin yuu cuitsin tsi ndo. Tan nu yuu can nyaá iin sivi tsa tsa yoñi tsitó; in-tuhun ñi nyivi tsa cua naquihin yuu can cua coto sivi can.”

Tsa tsaha cuenda ra Jesucristo tsi nyivi tsicá vehe ñuhu ñuu Tiatira

¹⁸ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan catyi tsihin ra tyehen: “Tyehen catyí Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronce tsa xiñu xaan.

¹⁹ Yuhu nyehé yu tandihi tsa javahá ndo. Tan tsitó yu tsa cuñi xaan ndo tsi nyivi. Tan tsitó yu tyin tsinú xaan iñi ndo tsi yu, tan jatyinyeé ndo tsi nyivi, tan cunyeé xaan iñi ndo. Tan tsitó yu tyin

cuaha ca tsa vaha javahá ndo vityin tan ñavin ca nu quitsi tsi.

²⁰ Maa tyin iyó juhva tsa cuñi yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javahá] ña Jezabel [tsa tsicoo tahan tsanaha]. Ña ican jacuaha tsi ndo, catyi ña tyin Nyoo tsahá tuhun caahán ña, maa tyin jandaví ñaha ña tsi nyivi tsa jahá tyiñu tyiñu yu tsihin tuhun jacuahá ña. Tyin catyi ña tyin ñavin cuatyí cuví tsa coo iin rayii tsihin ñaha o iin ñaha tsihin rayii tun ña tindaha ñi. Tan jacuahá ña tyin cuví catsi ñi nyayu tsa jamañi nyivi tsi tsitoho.

²¹ Yuhu tsa ndatu xaan yu tsa nasama ña cuhva iyó ña, maa tyin ña cuñi ña javaha ña can. Ña cuñi ña jandihí ña tsa tsicá nuu ña tsihin rayii.

²² Tan vityin cua quihin cuehe tsi ña tan ña cua cuví nduvita ña. Tan nyivi javahá tsa caquiñi tsihin ña, cua cuhva yu tundoho nyehe ñi tatun ña ndu uvi iñi ñi tsa javahá ñi.

²³ Tan cua cahñi yu sehe ña. Tacan tan cua coto tandihí nyivi tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyoocho cua cuhva yu tsa taahán tsi tsi ndo tsa cuenda tsa javahá ndo.

²⁴ Maa tyin tandihí ca nyoocho tsa iyó ñuu Tiatira, nyoocho tsa ña naquihin cuenda cuhva jacuahá ña,

ndi ña javahá ndo tsa catyi nyivi tyin cuví tuhun xeehe cuenda nu ña vaha, ña tyaa yu inga tsa yii siqui ndo.

²⁵ Maa tyin jañihi ndo javaha ndo tsa vaha nda cuanda quitsi nyico yu.

²⁶ Tan nyoocho tsa jaha canaa tsi nu ña vaha, tan javahá ndo cuhva cuñi yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyivi iyó nu ñuhu ñayivi ihya.

²⁷ Tumaa tsaha Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyivi. Tan cua tahvi cuatyí ndo tsi ñi tumaa tsa tahvi cuatyí yo quisi.

²⁸ Tan cua cuhva yu tiñuu cahnu tsa caná tsa naa ca coo tsihin ndo.

²⁹ Nyoocho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

3

Tsa tsaha cuenda ra Jesucristo tsi nyivi tsicá vehe ñuhu ñuu Sardis

¹ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Sardis. Tan catyi tsihin ra tyehen: “Tyehen catyi ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyi nyivi tyin nyito ndo, maa tyin tsa cuenda yuhu, tsa tsihi ndo.

² Jaha cuenda vaha ndo tsa vaha tsa iyó luxu ca tsi ndo.

Tyin coto ndihí ndihí tuhun yu nu yucú ndo. Nyehé yu tyin nuu Nyoo ña vaha maa tsa javahá ndo.

³ Ndūcuhun iñi ndo tsa vaha tsa cutuhvā ndo. Cuanyicun ndo can, tan ñasama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu.

⁴ Maa tyin iyó juhva nyooho, nyivi Sardis, tsa ña janyahyu jahma; ña javahá ndo tsa caquiñi cuví can. Tan juvin nyooho cua cunditsi jahma cuitsin tsihin yu, tan cua caca ndo tsihin yu, tyin taçan taahán tsi tsi ndo.

⁵ Tan nyooho tsa cua cuví jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sivi ndo nu libru nu nyecú sivi tandihí nyivi cua coo nyito tsihin Nyoo. Tan cua catyi yu tsihin Jutu yu, tan ángel ra tyin nacotó yu tsi ndo.

⁶ Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu.”

Tsa tsahā cuenda ra Jesu-cristo tsi nyivi tsicá vehe ñuhu ñuu Filadelfia

⁷ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Filadelfia. Tan çatyí tsihin ra tyehen: “Tyehen catyi ra ii, ra nditsa, ra yihí ndaha ndaha tucu ra rey David, ra tsa nuñá yuvehe tan ndi intuhun nyivi tan ña cuví nacasi. Tan tatun nacasi ra, ndi intuhun ñi tan

ñā cuvi nuña ñi. Tyehen catyi ra:

⁸ Yuhu nyehé yu tandihí tsa javahá ndo. Tan nuñā yu iin yuvehe tsa cuenda ndo tan yoñi cuví nacasi itsi, [tyin tsahā yu tsa cahan ndo tuhun Nyoo tsihin nyivi, tan yoñi cuví casi tsi ndo]. Tan iyó luxu tunyee iñi tsi ndo, tan tyaá yahvi ndo tsa caahán yu, tan ña catyi ndo tyin ña nacotó ndo tsi yu.

⁹ Tan nyivi yihí cuenda nu ña vaha, ñi vatya, ñi catyi tyin nyivi Israel cuví ñi, maa tyin ñavin nyivi Israel cuví ñi tsitsi añima ñi; cua jacuiñi tsiti yu tsi ñi nuu ndo, tyin taçan tan coto ñi tyin yuhu cuñí yu tsi ndo.

¹⁰ Tyin cunyeé xaan iñi ndo tumaa catyi yu tsihin ndo tyin cunyee iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quivi cua jaquitsi yu tundoho cahnu siqui tandihí nyivi, tyin cua nducu cuhva yu tsi tandihí ñi iyó nu ñuhu ñayivi.

¹¹ Yatyí cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyivi tsa vaha tsa cua ñihi ndo.

¹² Nyooho tsa cua cuví jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sivi Nyoo yu tsi ndo, tan sivi ñuu Nyoo yu, ñuu Jerusalén tsa

tsa cua quee nda andivi, tan juvin ñi cua tyaa tucu yu sivi tsaá yu tsi ndo.

¹³ Nyoooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu.”

Tsa tsahá cuenda ra Jesucristo tsi nyivi tsicá vehe ñuhu ñuu Laodicea

¹⁴ J̄acuhun tucu tutu tsi ra caahán tuhun yu tsihin nyivi tsicá vehe ñuhu ñuu Laodicea. Tan catyi tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javah̄ Nyoo tandih̄i maa tsa iyó:

¹⁵ Yuhu nyehé yu tandih̄i tsa javahá ndo. Tan cuví ndo tumaa ndutya tsa ña vitsin tan ndi ña ih̄ñi, tyin ndi ña tsinú vaha iñi ndo tsi yu, tan ndi ña jandih̄i tucu ndo tsa tsinú iñi ndo tsi yu. Vaha ca tsa tsinú vaha iñi ndo tuhun caahán yu, o jandih̄i cuii ndo tsa tsinú iñi ndo tsi yu.

¹⁶ Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ih̄ñi ndo, cua ndutsan yu tsi ndo.

¹⁷ Tyin nyoooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsi yu,’ catyí ndo. ¿A ña jahá ndo cuenda tyin cuih̄ya cuñí ndo nyehé ndo tundoho tsitsi añima ndo, ndaahvi ndo, cuaa ndo, tan tandih̄i ndo tsitsi añima ndo?

¹⁸ Yacan cuenda tsahá cuenda yu tsi ndo tyin tsi maa yu j̄ata ndo xuhun cuaan tsa cayu tan nā tsa nyahyu tsi,

tyin tacan tan nducuca ndo. Tan j̄ata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandih̄i ndo. Tan j̄ata ndo numeri quih̄vi tinuu ndo tyin tacan tan cuví nyehe ndo.

¹⁹ Yuhu tsahá cuenda yu tan tatsí tuñi yu tsi tandih̄i nyivi tsa cuñí xaan yu. Yacan cuenda catyí yu tsihin ndo: J̄andu iin ndo iñi ndo tsihin tsa n̄i iñi añima ndo tan javaha ndo tsa vaha.

²⁰ ¡Nyehe jihna! Yuhu nyaá yu yuvehe tan cañí ndaha yu. Nyivi tsa cua cuñi ndusu yu, tan nuña ñi yuvehe, cua quih̄vi yu tan cuxiñi yu tsihin ñi. Tan maa ñi cuxiñi ñi tsihin yu.

²¹ Cua cuhva yu tsa cunyecú ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jah̄a canaa yu tsi nu, tan vityin nyaá yu tsihin Jutu yu nu ndacá ñaha ra.

²² Nyoooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu” —catyí ra Jesucristo.

4

Tsa cuví nda gloria

¹ Tsa yah̄a can, tan nyehe yu ticoho iin yuvehe nda andivi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndaa nyehe tan janaha yu tsi un tsa cua cuví nu cuahán ca tsi —catyí ndusu can tsihin yu.

² Tan juvin ñi cuhva can tan tuvī iñi yu tsa nyaá Tatyī li Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá.

³ Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspē tan tumaa xiñu yuu cornalina. Tan taniñi cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda.

⁴ Tan nyehe yu nyecú oco cumi ca tyayu nu nyecú oco cumi ra tsahnu naha ra, tsinu nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jiñi intuhun intuhun ra naha.

⁵ Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuvī tsa utsa tatyī ii Nyoo.

⁶ Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyi.

Ñi canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can.

⁷ Iin tsa nyito can caá can tumaa caá ndicaha. Tan tsa tsinu uvi tumaa caá indiqui lee. Tan tsa tsinu uñi, tumaa caá nuu rayiñi caá nuu can. Tan tsa tsinu cumi tumaa caá tasu tsa cuahán ndavá.

⁸ Tan iyó iñu nditsin tsa

intuhun intuhun tsa nyito can. Tan taniñi cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuvī un; ra ii cuvī un; ra ii cuvī un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuvī Nyoo nda tsanaha tan vityin, tan juvin un cua quitsi.

⁹ Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naha tsi tacan,

¹⁰ tsa oco cumi ra tsahnu can naha ra tsicuiñi tsiti ra naha tan jacahnú ra naha tsi ra iyó tandihí tyembu. Tan tsaquín ra naha corona ra naha nu nyaá tyayu can. Tan catyí ra naha:

¹¹ Jutu Mañi ndi, Nyoo ndi cuvī un.

Yooho taahán tsi jacahnú ndi. Tan taahán tsi tsi un tsa cundaca ñaha un.

Tyin maa un javahá tandihí tsa iyó.

Tan tsa cuenda tsa iyó iñi maa un, tan tsicoo tandihí tsa iyó, catyí ra naha.

5

Nu nyehe ra Juan iin tutu tan Mbee Tiatyī Luhlu tsa cuvī ra Jesucristo

¹ Tacan tan nyehe yu tyin ra tsa nyaá nu tyayu can ndahá ra iin tutu tsihin ndaha cuaha

ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu.

² Tan nyehe yu iin ángel tsa nyee xaan. Tan caná tsa ra tan catyí ra:

—¿Yóo taahán tsi nacani tutu ihya tan jocon sellu ihya? —catyí ra.

³ Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi.

⁴ Tan tsacú xaan yu, tsa tsito yu tyin yoñi maa cuví nacani tutu can tan cuví cahvi, tan cuví nyehe nuu tsi.

⁵ Tacan tan catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha [o cuñí tsi catyi, ra ndacá ñaha], ra cuví tata ra Judá, tan tata ra rey David, ra ican jahá canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

⁶ Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyí Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan iyó utsa ndiqui ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tanii cahnu nu ñuhu ñayivi.

⁷ Tan ra Mbee Ticatyí Luhlu can tsahan ra nu nyaá ra nyaá nu tyayu can tan quihin

ra tutu tsa ndahá ra can nu ndaha cuaha ra.

⁸ Cuhva tsa quihin ra tutu can, tandihi tsa cumi tsa nyito can tan tandihi tsa oco cumi ra tsahnu can tsicuiñi tsiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu guitarra. Tan tsitu cutu tsitsi copa xuhun cuaan ndahá ra naha. Tan cutu can cuví tandihi tsa tsicán tahvi nyivi yihí cuenda Nyoo.

⁹ Tan tsitá ra naha iin yaa tsa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin niñi un jata un tsi ndi tyin coo vaha ndi tsihin Nyoo.

Tan cuví ndi nyivi ñuu nyihi tan ñuu nahnu tsa iyó tanii cahnu nu ñuhu ñayivi, nyivi caahán siin siin yuhu, tan nyivi siin siin tata.

¹⁰ Tsaḥa un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyivi iyó nu ñuhu ñayivi, catyí ra naha, tsitá ra naha.

¹¹ Yahá can tan tsiñi yu ndusu tan nyehe yu nyecú cuenda millón ángel tanii canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can.

¹² Tan ñihi caahán ángel can naha ra, tan catyí ra naha: Ra Mbee Ticatyí Luhlu tsa tsahñi nyivi,

juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihi tunyee iñi.

Na jacahnu yo tsi ra tan na jacahnu tandihi nyivi tan tandihi tsa iyó tsi ra, tyin cahnu xaan cuví ra, catyí ángel can naha ra.

13 Tan tsiñi tucu yu tsa caahán tandihi tsa javaha Nyoo; tandihi tsa iyó andivi, tan nu ñuhu ñayivi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnu xaan cuví ra tsa nyaá nu tyayu.

Cahnu xaan cuví ra Mbee Ticatyi Luhlu.

Tan tunyee iñi tsa iyó tsi ra naha ña cua cundihí maa tsa iyó tsi.

Tan taahán tsi tsa jacahnu yo tan tyaa yahvi yo tsi ra naha tacan ñi maa —catyí tandihi tsa javaha Nyoo.

14 Tan catyí tsa cumi tsa nyito can:

—iNa cuvi tsi tacan! —catyí tsi naha tsi.

Tan tsicuiñi tsiti tsa oco cumi ra tsahnu can naha ra tan jacahnú ra naha tsi ra tsa ña cua cundihí maa.

6

Nu jocon ra Jesucristo tsa utsa sellu tsa ndasí tutu can

1 Tacan tan nyehe yu nu jocon ra Mbee Ticatyi Luhlu can sellu tsa jihna ñi tsitsi tsa utsa sellu can. Tan tsiñi yu ndusu iin tsa nyito can

tan ndusu tsi cuví tumaa nu caahán savi, tan catyí tsi:

—iNaha, tan nyehe un! —catyí tsi tsihin yu.

2 Tacan tan nanyehe yu tan nyehe yu iin cuayu cuitsin, tan ra yosó tsi ti ndahá ra iin nduva. Tan ñihí ra iin corona yihí jiñi ra, yacan jaha canaa ra, tan ndi nyaá ca cua jaha canaa ca ra.

3 Tan tsa jocon ra Mbee Ticatyi Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—iNaha, tan nyehe un! —catyí tsi tsihin yu.

4 Tan quita iin cuayu cuaaha. Tan ra tsa yosó tsi ti ñihí ra ndatu tsa quinyaa ra tsa taxin iyó nu ñuhu ñayivi, tyin tacan tan cahñi tahan nyivi tsi ñi. Tan ñihí ndihí ra iin mityi cahnu cundahá ra.

5 Tan tsa jocon ra Mbee Ticatyi Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—iNaha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticatya.

6 Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyivi tsi iin musu tsa iin quivi, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jativi ndo acetye tan vinu —catyí ndusu can.

7 Tan tsa joçon ra Mbee Ticatyi Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—iNaha, tan nyehe un!
—catyí tsi tsihin yu.

8 Tan nanyehe yu, tan nyehe yu iin cuayu cuaan. Tan ra yosó tsi ti nañi ra Tuhun Tsihi. Tan tsata ra can vatsi inga ra tsa nañi Nu Yucú Añima Ndiyí. Tan ñihí ra naha tunyee iñi tsa cahñi ra naha tsa cuaha nyivi iyó nu ñuhu ñayivi. Tyin tsitsi tsa sava nyivi iyó nu ñuhu ñayivi, cua cahñi ra naha sava ñi. Tan cua cahñi ra naha tsi ñi tsihin tsa jacoo ra naha cuatyí, tan tsihin tama, tan tsihin cuehe, tan tsihin quití xaan iyó nu ñuhu ñayivi.

9 Tan tsa joçon ra Mbee Ticatyi Luhlu can tsa tsinu uhun sellu can, nyehe yu xuu altar. Tan ican yucú añima nyivi tsa tsihi tsa cuenda tsa jacoto ñi tuhun Nyoo.

10 Tan caná tsa ñi tan catyí ñi tyehen:

—Jutu Mañi ndi, ra ii cuví un, tan jandaá un tandihi tsa caahán un tyin javaha un. ¿Ama cua tatsi tuñi un tsi nyivi tsa tsahñi tsi ndi tsa cuenda un? —catyí ñi.

11 Tacan tan ñihí intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quivi, nda cuanda cahñi nyivi tsi tandihi ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihi tucu maa ñi.

12 Tan tsa joçon ra Mbee Ticatyi Luhlu can tsa tsinu iñu sellu can, nyehe yu tyin ñihi xaan taán. Tan ndutuun ñicanyii tumaa tuun jahma nyivi iyó tucuihya iñi. Tan yoo nducuaaha tsi tumaa cuaaha ñiñi.

13 Tan tiñuu cucoyo tsi nu ñuhu ñayivi tumaa cucoyó tsi yutya yutun tatun ñihi yahá tatyí.

14 Tan andivi tsiquihí tui tsi tumaa tyihí tui yo iin ndaha tutu. Tan tandihi yucu tan ñuhu nyihi tsa cayucú mahñu ndutya ñuhu nasama nu cayucú tsi.

15 Tan tandihi rey tsa iyó nu ñuhu ñayivi tsihin ra nahnu naha ra, tan ra cuca naha ra, tan ra cuví ityi nuu tsihin andarú naha ra, tan ra iyó xaan tunyee iñi tsi naha ra, tan tandihi nyivi tsa cuví musu, tan ñi tsa ñavin musu cuví, quihvixeehe ñi tsitsi yavi yuu tan tyañu cava tsa iyó yucu nahnu.

16 Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyi Luhlu can tsi ndi.

17 Tyin tsa tsaá quivi cahnu tsa cua tatsi tuñi ra tsi ndi, tan yoñi cunyee iñi can —catyí ñi.

7

Nu ñihí nyivi Israel tuñi cunya nutyaan ñi

1 Tsa yahá can tan nyehe yu nyecú cumi ángel tsa ndihi tsa cumi tutun ñuhu ñayivi ityi nu

tuhvá tatyí queé tyin tacan tan ña yaha tatyí nu ñuhu ñayivi tan nu ndutya ñuhu tan nu yutun.

² Tan nyehe tucu yu quee inga ángel, ityi nu caná ñicanyii, tan ndahá ra tuñi Nyoo nyito. Tan cana tsa ra tsi tsa cumi ángel tsa ñihí ndatu tsa jativí nu ñuhu ñayivi tan nu ndutya ñuhu. Tan catyí ra tsihin ra naha:

³ —Ña jativí naha ndo nu ñuhu ñayivi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyivi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

⁴ Tan catyí ra tsiñi yu tyin cientu uvi xico cumi mil cuví nyivi Israel tsa tsinyaa tuñi can.

⁵ Utsi uvi mil nyivi tata ra Judá tsinyaa tuñi, tan utsi uvi mil nyivi tata ra Rubén, tan utsi uvi mil nyivi tata ra Gad,

⁶ tan utsi uvi mil nyivi tata ra Aser, tan utsi uvi mil nyivi tata ra Neftalí, tan utsi uvi mil nyivi tata ra Manasés,

⁷ tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Isacar,

⁸ tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihí ñi can tan tsinyaa tuñi Nyoo tsi ñi.

Nu nyehe ra Juan tsi nyivi nditsí jahma cuitsin

⁹ Tsa yaha can tan nyehe yu yucú cuaha nyivi. Tan

yoñi maa cuví nacahvi tsi ñi, tyin cuaha xaan ñi. Yucú nyivi quee tandihí ñuu nyihi tan ñuu nahnu tsa iyó tani cahnu nu ñuhu ñayivi. Tan yucú nyivi caahán siin siin yuhu. Tan yucú nyivi siin siin tata. Tan nyecú ñi nuu ra nyaá nu tyayu, tan nuu ra Mbee Ticatyí Luhlu. Nditsí ñi jahma cuitsin. Tan ndahá ñi ndaha ndicaha.

¹⁰ Tan tandihí ñi caná tsa ñi tan catyí ñi:

Nyoo Jutu yo, ra nyaá nu tyayu, tan ra Mbee Ticatyí Luhlu,

juvin ra naha jacacu tsi yo —catyí ñi caná tsa ñi.

¹¹ Tan tandihí ángel naha ra nyecú ra naha tani canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsicuiñi tsiti ra naha tan tsaquin ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo.

¹² Tan catyí ra naha:

Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahvi nyoo tsi un.

Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuví tsi tacan tandihí tyembu, catyí ra naha.

¹³ Tacan tan tsica tuhun iin ra tsahnu can tsi yu tan catyí ra:

—¿Yóo nyiví cuví ñi nditsí jahma cuitsin ihya? ¿Tan ndáa ityi quee ñi? —catyí ra.

¹⁴ Tan catyí yu tshin ra:

—Maa un tsitó, tata.

Tan catyí ra tshin yu:

—Nyiví ihya cuví ñi nyehe tundoho cahnu. Maa tyin nacatya ñi jahma ñi tshin niñi ra Mbee Ticatyí Luhlu tan nducuitsin tsi.

¹⁵ Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tshin tsa nyaá ra tshin ñi.

¹⁶ Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tshin tsa ihñi.

¹⁷ Tyin ra Mbee Ticatyí Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihí ndutya nuu ñi —catyí ra tshin yu.

8

Nu jocon ra Jesucristo tsa tsinu utsa sellu tan nu quita iin ángel tshin iin cuu xuhun cuaan

¹ Tan tsa jocon ra Mbee Ticatyí Luhlu tsa tsinu utsa sellu tsa ndasí tutu can, ndutaxin nda andiví tumaa sava hora.

² Yahá can tan nyehe yu nyecú utsa ángel ityi nuu Nyoo. Tan intuhun intuhun

ra naha quihin cuenda ra naha iin trompeta.

³ Yahá can tan tsaá inga ángel tsa ndahá iin cuu xuhun cuaan. Tan tsinyaá nyityí ra ityi nuu altar can. Tan quihin cuenda ra cuaha xaan cutu, tyin cuhva cuenda ra itsi iin caa ñi tshin tsa tsicán tahvi nyiví tsi Nyoo nuu altar xuhun cuaan tsa nyaá ityi nuu tyayu Nyoo.

⁴ Tan quitá yuhma cutu tan yuhma tsa tsicán tahvi nyiví tsi Nyoo ndaha ra, tan cuahán yuhma can nu nyaá Nyoo.

⁵ Tacan tan ángel can quihin ra cuu can tan jacutu ra can tshin tuun ñuhu tsa quita nu altar can. Tan tyoso ra can nu ñuhu ñayiví. Tan quitsahá caahán savi, tan iyo cuví. Tan ñihi tatsa, tan quitsahá taán.

Nu tiví ángel naha ra trompeta

⁶ Tacan tan tsa utsa ángel tsa ndahá trompeta can, ndatú ra naha tsa tiví ra naha can.

⁷ Tsa tiví iin ángel can trompeta tsa ndahá ra, quitsahá cuún savi tan cucoyó yuu savi, ñihi cayú ñuhu tan sacá nuu niñi tshin can. Tan tsa yatyin cayú sava ñuhu ñayiví, tan tsa yatyin tucu sava cuhva nyaá cuhu tsitsa tan tandihí cuhva nyaá cuhu cuii.

⁸ Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacava can mahñu ndutya ñuhu. Tan tsa

yatyin sava ndutyá ñuhu can nanduvĭ tsi ñiñi.

⁹ Tan tsa tandihĭ quitĭ iyó tsitsi ndutyá ñuhu can tsihĭ tsa yatyin sava ti naha ti. Tan tahvĭ cuatyĭ tucu tsa yatyin sava yutun ndoo cuaha tsa iyó tsitsi ndutyá ñuhu can.

¹⁰ Tan tsa tivĭ tsa tsinu uñi ángel can trompeta tsa ndahá ra, nacavá iin tiñuu cahnu. Cayú tsi tumaa cayú yĭti. Tan nacavá tsi siqui tsa yatyin ña sava yutya nahnu tan tsa yatyin ña sava nu ndohyo.

¹¹ Tan sivi tiñuu cahnu can cuvĭ Ajenjo. Tan tsa yatyin ña sava ndutyá tsa iyó, ndu uvá tsi tumaa tsa uva xaan ajenjo can. Tan cuaha xaan nyivi tsihĭ tyin tsihĭ ñi ndutyá tsa ndu uvá can.

¹² Tan tsa tivĭ tsa tsinu cumi ángel can trompeta tsa ndahá ra, ndu naá tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaá tsi naha tsi. Tan tsa cuenda tsa ndunaá juhva ñicanyii, ndunaá nu ñuhu ñayivi cumi hora tsa iin iin nduvi. Tan tsa cuenda tsa tivĭ juhva yoo tan tiñuu, ña ndunditsĭn maa nu ñuhu ñayivi cumi hora tsa iin iin tsacuaa.

¹³ Yahá can tan nyehe yu iin ángel ndavá ra mahñu andivi tan tsiñi yu tsa caahán ra. Tsihin tsa ñihi ndusu ra catyĭ ra:

—¡Ndahvi nyivi iyó nu ñuhu ñayivi tsa cua tivĭ tsa uñi ca ra ángel naha ra trompeta tsa ndaha ra naha! —catyĭ ángel can.

9

¹ Tacan tan tsa tivĭ tsa tsinu uhun ángel can trompeta tsa ndahá ra, nyehe yu quee iin tiñuu ityi andivi. Tan nacavá can nu ñuhu ñayivi. Tan quihĭn cuenda can ndaha tucu tsa cuenda yavi cunu tsa nduve maa nuu tsindihi.

² Tacan tan nuña can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasi yuhma can nuu ñicanyii tan nasacá nuu can tsihin tatyĭ. Tan ndunaá nu ñuhu ñayivi.

³ Tan tsitsi yuhma can quitá tica xama. Tan ndavá ti naha ti nu ñuhu ñayivi. Tan ñihĭ ti naha ti ndatu tsa tyaa ti naha ti tsi nyivi tumaa tyaa tujuhma tsa iyó nu ñuhu ñayivi.

⁴ Quihĭn ti naha ti tuhun tyin na ña jativi ti naha ti cuhu tsa iyó nu ñuhu ñayivi, ndi cuhu cuii, tan ndi yutun. Maa tyin na tyaa ti naha ti tsi nyivi tsa nduve tuñi Nyoo nyaá nutyaan.

⁵ Ña ñihĭ ndatu ti naha ti tsa cahñi ti naha ti tsi nyivi, tyin tyaa ñi maa ti naha ti tsi ñi. Tan quihĭ xico ti tsi ñi uhun yoo. Tan xico uhvi can uhvi tsi tumaa uhvi nyivi tsa tyaa tujuhma.

⁶ Quivi can nyivi cua nanducú ñi tuhun tsihi. Maa tyin ña cua nañihĭ ñi can. Tan vasu ndi maa cuñi ñi cúu ñi, tuhun tsihi cua cunu tsi nuu ñi tyin ña cua cúu ñi.

⁷ Tica xama can caá ti tumaa caá cuayu tsa tsicá cuatyĭ. Tan jiñi ti naha ti yihĭ tsa

caá tumaa caá corona xuhun cuaan. Tan nuu ti naha ti caá tumaa caá nuu nyivi.

⁸ Tan ixi jiñi ti naha ti caá tumaa caá ixi jiñi ñaha. Tan nuhu ti naha ti caá can tumaa caá nuhu ndicaha.

⁹ Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí.

¹⁰ Tan juhma ti naha ti caá tumaa caá juhma tujuhma, tyin yihí iñu can. Tan tsihin can cua tyaa ti naha ti tsi nyivi tsitsi tsa uhun yoo.

¹¹ Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñi tsi catyi: Nu Janaá.

¹² Tsa yaha iin tundoho, tan cumañi uvi taahan ca.

¹³ Tan tsa tiví tsa tsinu iñu ángel can trompeta tsa ndahá ra, tsiñi yu iin ndusu tsa quitá tsitsi tsa cumi ndiqui tsa nyecú tutun altar xuhun cuaan tsa nyaá ityi nuu Nyoo.

¹⁴ Tan ndusu can caahán tsi tsihin tsa tsinu iñu ángel tsa ndahá trompeta can, tan catyi tsi:

—Ndatsi tsi tsa cumi ángel tsa nuuhñi yatyin yuhu yutya cahnu Eufrates —catyi ndusu can.

¹⁵ Tacan tan ndatsi ra tsi tsa cumi ángel can, tyin tsa ndatu xaan ra naha ora can, quivi can, yoo can, cuiya can, tyin

cahñi ra naha tsi tsa yatyin sava nyivi iyó nu ñuhu ñayivi.

¹⁶ Tan tsiñi yu tyin uvi cientu millón andaru tsa yosó cuayu.

¹⁷ Tacan nyehe yu cuayu jaha Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre.

¹⁸ Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitá yuhu cuayu can naha ti: ñuhu tan yuhma tan azufre.

¹⁹ Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá tumaa caá coo tan nuu juhma ti naha ti caá tumaa caá jiñi coo. Tan tsihin yacan jañicueehé ti naha ti tsi nyivi.

²⁰ Maa tyin tandihi ca nyivi tsa ndoo, ñi tsa ña tsihi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuví nyehe, ndi ña tsiñi, ndi ña cuví caca.

²¹ Ndi ña jandihí ñi tsa tsahñi ñi nyivi, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayi, tan rayi ña jandihí ra naha tsa tsicá nuu ra naha tsihin ñaha vasu ndi maa ña tindaha ñi. Tan ña jandihí ñi tsa suhú ñi.

10

Ángel tsa ndahá libru luhlu

1 Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsi nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú.

2 Tan ndahá ra iin libru luhlu nuñá nuu tsi. Tan tsañi tsaha cuaha ra nu ndutya ñuhu tan tsaha satyin ra nu ñuhu ñayivi.

3 Tacan tan cana tsaa ra, tumaa taná ndicaha tsa cuxaán ti. Tan cuhva tsa cana tsaa ra, tsiñi yu utsa ndusu tumaa cuví nu caahán savi, tan intuhun intuhun tsi caahán tsihin ndusu maa tsi.

4 Tsa yahá tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi yu caahán iin ndusu nda andivi, tan catyí tsi tsihin yu:

—Naquihin xeehe tuhun tsa cahan tsa utsa ndusu can. Tan ña tyaa un can nu tutu —catyí ndusu can.

5 Tacan tan ángel tsa nyehe yu tsa tsañi nu ndutya ñuhu tan nu ñuhu ñayivi, jandaá ra ndaha cuaha ra ityi andivi.

6 Tan ángel can catyí ra:

—Na nyehe maa Nyoo ra ña cua cundihi maa, ra tsa javahá andivi tan ñuhu ñayivi tan ndutya ñuhu tan tandihi tsa iyó nuu tsi tyin nduve ca tsa cucuee.

7 Tyin cuhva tsa cua quit-saha tivi tsa tsinu utsa ángel can trompeta tsa ndahá ra, cuhva can cua cundaa tuhun

xeehe tsa catyí Nyoo tyin javaha ra, tumaa cahan ra tsihin ra jahá tyiñu tyiñu ra, ra cuvi ndusu yuhu ra —catyí ángel can.

8 Tan ndusu tsa quita andivi, tsa cahan jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandica tsa ndahá ra ángel tsa tsañi nu ndutya ñuhu tan nu ñuhu ñayivi —catyí tsi.

9 Tacan tan tsahan yu nu nyaá ángel can tan tsican yu libru luhlu can tsi ra, tan catyí ra tsihin yu:

—Juhun, catsi itsi. Vixi xaan tsi cua cuvi tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyí ra tsihin yu.

10 Tacan tan quihin yu libru luhlu tsa ndahá ra, tsatsi yu. Tsa ndi nyii tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa coco yu itsi, ndu uva tsi tsitsi yu.

11 Tacan tan catyí ra naha tsihin yu:

—Cuñi tsi tsa cahan nyico un inga tsaha tuhun tsa caahán Nyoo siqui nyivi tsa iyó ñuu nyihi tan ñuu nahnu, tan nyivi caahán siin siin yuhu, tan siqui ra cuví rey naha ra —catyí ra tsihin yu.

11

Nduvi ra tsa cuví tsandaa naha ra

1 Tacan tan tsaha ra naha iin ndoo tsi yu. Caá tsi tumaa caá yutun tsa tuhvá yo tyihí

cuhva tsihin. Tan catyí ra naha tsihin yu:

—Nduvita tan tyíhi cuhva un vehe ñuhu Nyoo tan altar ra, tan cahvi najava taahan nyívi jacahnú tsi ra tsitsi vehe can.

² Maa tyin ña tyíhi cuhva un nuquehe vehe ñuhu can, tyin tsa cuenda nyívi inga ñuu cuví can. Cua vaca tsaha ñi nu ñuu ii tsitsi tsa uñi cuiya sasava.

³ Tan yuhu cua jacuhun yu uvi ra tsa cua cuvi tsandaa tan cahan tuhun yu tsitsi tsa mil uvi cientu uñi xico quívi. Tan cunditsi ra naha jahma tucuihya iñi.

⁴ Tan tsa nduvi tsandaa can cuví uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayívi.

⁵ Tan nyívi tsa cua cuñi jañicueehe tsi ra cuví tsandaa can naha ra, cua naa cuii nuu ñi. Tyin cua quita ñuhu yuhu ra naha, tan tsihin can cua cahmi ra naha tsi tandihí nyívi xaan iñi tsi ra naha.

⁶ Tan iyó ndatu tsi ra naha tsa casi ra naha nu cuun savi tandihí quívi tsa cua cuhva cuenda ra naha tuhun caahán Nyoo tsihin ra naha tsi nyívi. Tan iyó tucu ndatu tsi ra naha tsa jananduvi ra naha ñañi ndutya. Tan iyó tucu ndatu tsi ra naha tsa janyehe ra naha tundoho tsi nyívi iyó nu ñuhu ñayívi tsihin tandihí nuu cuehe. Tan cuví javaha ra naha yacan najava tsaha cuñi maa ra naha.

⁷ Maa tyin tsa cua ndihí cuhva cuenda ra naha tuhun Nyoo tsi nyívi, cua quita quiti

xaan yavi cunu can, tan cua cañi tahan ti tsihin tsa nduvi taahan ra cuvi tsandaa can. Tan cua jaha canaa ti tsi ra naha. Tan cua cahñi ti tsi ra naha.

⁸ Tan cua cava cuñu ñuhu ra naha tsitsi calle ñuu nu tsahñi nyívi tsi Jutu Mañi yo tan tyaa ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyívi ñuu can].

⁹ Tan tsitsi tsa uñi quívi sasava, cua nyehe tandihí nyívi cuñu ñuhu ra naha; nyívi iyó tandihí ñuu nyihi, nyívi tandihí ñi tata, tan ñi caahán siin siin yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quihí xeehe cuñu ñuhu ra naha tsitsi ñuhu.

¹⁰ Tan sii xaan cua cuñi ñi tsa cuenda tsa cua cúu ra can naha ra. Tan nda cuenda cua jacuhun ñi regalo tsi tahan ñi tsa cuenda tsa sii cuñi ñi tsa cua cúu nduvi taahan rayí tsa cahan tuhun Nyoo tsihin ñi. Tyin cuñi maa ñi tyin tsaha xaan ra naha tundoho tsi ñi.

¹¹ Maa tyin tsa cua yaha tsa uñi quívi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihí nyívi tsa cua nyehe tyin cua nandoto ra naha, cua nayuhvi xaan ñi.

¹² Tan tsa yahá tsa tsihí ra naha tan nyehe yu nandoto ra naha, tan catyí iin ndusu ityi andívi tsihin ra naha:

—Naha ndo nyehe

Tacan tan nandaá ra naha ityi andívi tsitsi vico. Tan nyehe nyívi xaan iñi tsi ra

naha nu nandaq̄ ra naha.

¹³ Tan ñihi xaan tañ can. Tan tsitsi ñuu can tan̄ cuaha xaan vehe. Tsitsi tsa utsi utsi vehe, tan̄ intuhun intuhun tsi. Tan tsih̄ utsa mil nyivi jah̄ tsa tañ can. Tan nyivi tsa ña tsih̄, jacahnu ñi tsi Nyoo, ra nyaá andivi, tsa cuenda tsa yuuhvi ñi.

¹⁴ Yacan cuví tundoho tsa tsinu uvi tsa nyehe nyivi, maa tyin tsa vatsí tsa tsinu uñi.

Nu tiví tsa tsinu utsa ángel trompeta tsa ndahá ra

¹⁵ Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andivi, tan catyí tsi:

Tandih̄ nu ndacá ñaha rey nu ñuhu ñayivi, tsa yah̄ nanduví tsi tsa tsii Nyoo Jutu yo tan ra Cristo.

Tan ña cua ndih̄ maa tsa ndacá ñaha ra naha, catyí ndusu can.

¹⁶ Tacan tan tsa oco cumi ra tsahnu tsa nyecú nu nyaá Nyoo, tsicuiñi tsiti ra naha tan tsaquin ra naha nuu ra naha nda nu ñuhu. Tan jacahnú ra naha tsi Nyoo.

¹⁷ Tan catyí ra naha: Jutu Mañi ndi Nyoo ndi. Ra iyó tandih̄i tunyee iñi tsi.

Tacan ñi iyó maa un. Juvín un cuví Nyoo nda tsanaha tan vityin, tan juvín un cua quitsi.

Tsahá xaan ndi tyahvi nyoo tsi un,

Tyin tsa naquih̄in cuenda un tunyee iñi un.

Tan tsa quitsah̄ ndacá ñaha un.

¹⁸ Tan vasu ndi maa cuxaán nyivi iyó tandih̄i ñuu nahnu.

Maa tyin tsa tsaq̄ quivi tatsi tuñi un tsi ñi.

Tan tsa tsaq̄ quivi tsa jacutuñi un tsi ndiyi.

Tan cuhva un tsa vaha tsa taahán tsi tsi nyivi jah̄ tyiñu tyiñu un, ñi tsah̄ cuenda tuhun caahán un,

ñi tsa nacuhva cuenda añima ñi tsi un, tan jacahnú ñi sivi un.

Vasu ndi maa cahnu cuví ñi o ndaahvi ñi.

Tan tsa tsaq̄ cuhva tsa janaa un tsi nyivi jativí tsi nyivi iyó nu ñuhu ñayivi, catyí ra naha.

¹⁹ Tacan tan nuñ̄a yuvehe ñuhu Nyoo tsa iyó gloria, tan tsitsi vehe ñuhu can quituví tsatun cuenda tsa ndoo ra tyiñu tsihin yo. Tan quihvi tatsa. Tan ñihí cuaá tan caahán savi. Tan tañ. Tan ñihi xaan cucoyo yuu savi.

12

Nu nducú coo xaan tsa iyó ndaha tsi ñaha

¹ Tacan tan quituví tsa iyo cahnu ityi andivi. Quita iin ñaha tan nditsí ña ñicanyii tumaa nditsí yo jahma. Tan tsañi ña nu yoo. Tan yihí iin corona tsa utsi uvi tiñuu jiñi ña.

² Tan ñaha ihya ñuhú sehe ña. Tan tsacú xaan ña tsihin tsa cuuhvi tsitsi ña, tyin nyehé xaan ña tundoho.

³ Tacan tan quita inga tsa iyo ityi andivi. Tan nyehe yu iin coo xaan tsa iyó ndaha. Cuaaha ti tan cahnu ti. Tan

iyó utsa jiñi ti, tan utsi ndiqui ti. Tan yihí corona intuhun intuhun jiñi ti.

⁴ Tan tsihin juhma ti jacoyo ti tsa yatyin sava tiñuu tsa iyó andivi nu ñuhu ñayivi. Tan coo can tsicuiñi ti nuu ñaha tsa cua cacu sehe, tyin cuñi ti catsi ti sehe ña náa cuhva cacu ñi maa tsi.

⁵ Tan ñaha can jacacu ña iin rayi. Tan juvin ra cua cundaca ñaha tandihi nyivi iyó nu ñuhu ñayivi. Ñihi xaan cua cundaca ñaha ra tumaa tsa tsihin iin tatun tsa cuvi caa. Tan tsa yaha cacu ra, naquihin Nyoo tsi ra cuahán ra nu nyaá ra nu tyayu ra.

⁶ Tan cuahán ñaha can tsinú xeehe ña ñuhu ityi, nu janduvaha Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quivi.

⁷ Yaha can tan tsicoo cuatyí nda andivi, cañi tahan ángel Miguel tan tandihi ángel tsa cutahán tsihin ra tsihin coo xaan can. Tan coo can tsihin tandihi tatyí ña vaha tsa cutahán tsihin ti, cañi tahan ti tsihin ángel Miguel.

⁸ Maa tyin ña cuvi jaha canaa ti tsa cañi tahan ti. Tan ña ñihí ca ti nu ndoo ti nda andivi tsihin tatyí ña vaha tsa cutahán tsihin ti.

⁹ Tacan tan tava Nyoo tsi nu coo xaan can, nu Coo Tsaahnu, tan juvin ñi nu cuvi nu ña vaha tan Satanás, juvin nu jandaví ñaha tsi tandihi nyivi iyó nu ñuhu ñayivi. Maa nu tan tatyí ña vaha tsa cutahán tsihin nu cucoyo nahnu nda nu ñuhu ñayivi.

¹⁰ Tacan tan tsiñi yu iin ndusu ñihi xaan ityi andivi, tan catyi tsi:

—Vityin tsa tsaá quivi tsa jacacú Nyoo tsi nyivi. Tsa jaha canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tava ra naha tsi nu tsa tyaa xaan cuatyí siqui ñi nuu ra naha nduvi tan ñiñu.

¹¹ Tan jaha canaa ñi tsi nu tsihin niñi ra cuvi Mbee Ticatyi Luhlu, tan tsihin tuhun Nyoo tsa cahan ñi tsihin nyivi. Ña nayuhvi ñi cúu ñi tan tsaah cuenda ñi ñayivi ñi.

¹² Yacan cuenda cusii iñi nyooho tsa iyó andivi. Maa tyin indahvi nyivi tsa iyó nu ñuhu ñayivi tan nu ndutya ñuhu! Tyin nu ña vaha nacava nu nu ñuhu ñayivi nu yucú ñi. Tan xaan xaan cuñi nu tyin tsitó nu tyin ña cuaha ca quivi tan cundihi tsa jandaví ñaha nu tsi ñi.

¹³ Tan tsa nyehe nu coo xaan tsa iyó ndaha can tyin nacava nu nu ñuhu ñayivi, quitsaha nyaá ndaha nu tsi ñaha tsa tsicoo sehe yñi can.

¹⁴ Maa tyin tsicoo uvi nditsin nahnu ñaha can tan caá can tumaa caá nditsin tasu. Tsicoo can tyin tacan tan cuvi ndava ña tan cahun ña cunu xeehe ña nu tsiqui nu ña cuvi ñihi coo can tsi ña. Ican cuvi nu cua ñihi ña tsa catsi ña tsitsi tsa uñi cuiya sasava.

¹⁵ Tan nu coo can tava nu ndutya tsihin yuhu nu, tyin coo yutya cahnu, tan tañi ñaha can tsitsi yutya can.

16 Maa tyin ñuhu ñayivi jatyinyee tsi tsi ña, tyin ndata tsi tan nanyee yutya tsa javaha nu coo tsihin ndutya tsa quita yuhu nu.

17 Tan tsa ña cuvi jaha canaa nu tsi ña, quitsaha cañi tahan nu tsihin nyivi cuvi tata ña, ñi tsa tyaá yahvi tuhun caahán Nyoo, tan nyicún ñi tsihin tsa nii iñi añima ñi tsa nditsa tsa caahán ra Jesucristo.

13

Nu nyehé ra Juan uvi quití caquiñi

1 Tan tsinyaa nyityi yu nu nyiti yuhu ndutya ñuhu, nyehé yu quita iin quití caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo.

2 Quití caquiñi can caá ti tumaa caá cuñi. Tsaha ti caá tumaa caá tsaha oso. Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsaha nu ndatu tsi quití caquiñi can tsa cunyaa ti nu tyayu nu. Tan tsaha nu ndatu tsi ti tsa cundaca ñaha ti.

3 Tan nyaá iin nu caahvi tsa cua cahñi tsi ti jiñi ti, maa tyin ndaha nu caahvi can. Tan tsa nyehé nyivi iyó nu ñuhu ñayivi ihya can, iyo xaan cuñi ñi. Tan quitsaha nyicún ñi tsi ti.

4 Tan jacahnú ñi tsi nu coo xaan can, tyin tsaha nu ndatu tsi quití can. Tan jacahnú

tucu ñi tsi quití can, tan catyi ñi:

—¿Yoñi maa cuvi tumaa cuvi quití ihya? ¿Tan yoñi cuvi cañi tahan tsihin ti? —catyi ñi.

5 Tan ñihj tucu quití can ndatu tsa cahan ndasi ti tan cahan ti ndavaha ñi siqui Nyoo. Tan cua cundaca ñaha ti uvi xico uvi yoo.

6 Tacan javaha ti: Cahán ti tsi Nyoo. Cahán ti ndavaha ñi nu iyó ra, tan sivi ra, tan tsa iyó andivi.

7 Tan tsicoo tucu ndatu tsi ti tsa cañi tahan ti tsihin nyivi yihí cuenda Nyoo nda cuando cuvi jaha canaa ti tsi ñi. Tan ñihj ndatu tucu ti tsa quihj ndaha ti tsi nyivi ndihj ñi tata, nyivi caahán sin sin yuhu, nyivi iyó tandihj ñi ñuu nyihj, tan ñuu nahnu.

8 Tan nyivi tsa ña cua coo ñayivi tsa tsihin ra cuvi Mbee Ticatyi Luhlu, ra tsa tsihj, ña cua coo ñi ñayivi tsa can tsa cuenda tyin ña tsinyaa sivi ñi nu libru ra tsa ndi cumañi ca tsinu ñuhu ñayivi. Tandihj maa ñi can cua jacahnu ñi tsi quití caquiñi can.

9 Tatun yihj ndo iyó soho ndo, tyaa soho ndo tuhun ihya:

10 Nyivi tyihj tsi inga nyivi vehe caa, cua cahun tucu maa ñi vehe caa. Tan nyivi tsa tsahñi tsihin tsa xaan, juvin ñi maa tsihin can cua cúu ñi. Yacan cuenda nyooho tsa yihj cuenda Nyoo cuñi tsi cunyeé iñi ndo tan tsinu iñi ndo tsi ra.

11 Yahā can tan nyehe yu quita inga quitī caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyī luhlu. Maa tyin caahán ti tumaa caahán coo xaan tsa iyó ndaha can.

12 Tan ndacá ñaha ti tumaa ndacá ñaha inga quitī caquiñi can. Tan nyehé inga quitī can tsa ndacá ñaha ti. Tan natyuhú ti tsi ñuhu ñayivi tan nyivi iyó nu tsi na jacahnu ñi tsi inga quitī caquiñi tsa cuñi cúu jahā tsa caahvi tsa tsinyaa tsi ti.

13 Tan cuaha xaan tsa iyo javahā ti nda cuando quita ñuhu andivi tan janacava ti can nu ñuhu ñayivi tyin nyehe nyivi.

14 Tan jandavj ñaha ti tsi nyivi iyó nu ñuhu ñayivi tsihin tsa iyo tsa cuvī javaha ti nuu quitī caquiñi tsa jihna ñi. Tava tyiñu ti na javaha ñi iin tsitoho quitī caquiñi tsa tyahnya caahvi tsihin mityi, tan ña tsihi ti.

15 Tan quitī caquiñi tsa tsinu uvi can tsicoo ndatu tsi ti tsa cuhva ti tsa coo nyito tsitoho quitī caquiñi tsa jihna can tyin tacan tan cuvī cahan tsi tan cahñi tsi tsi tandihi nyivi tsa ña cua jacahnú itsi.

16 Tan sin tyin catyī tsi tyin cunyaa tuñi tsi tandihi nyivi; nyivi nyihi, nyivi tsahnu, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi.

17 Tan yoñi maa cuvī jata tan xico tatun nduve tuñi can nyaá tsi ñi, o tatun nduve sivi

ti, o número sivi ti nyaá tsi ñi.

18 Tuhun ihya cuñi xaan tsi tsa tsiñi tuñi. Nyivi cutuñi iñi, na jaha cuenda ñi número quitī caquiñi can. Tyin número rayi cuvī can. Tan número can cuvī iñu cientu uñi xico iñu.

14

Nu tsitá cientu uvi xico cumi mil nyivi iin yaa tan jacahnú ñi tsi Nyoo

1 Yahā can tan nyehe yu tsi ra cuvī Mbee Ticatyī Luhlu, nyaá nyityi ra jiñi yucu Sión. Tan yucú cientu uvi xico cumi mil rayi tsihin ra. Ra ihya naha ra cuvī ra tsa nyaá sivi ra tan sivi Jutu ra nutyaan.

2 Tacan tan tsiñi yu cucayú ityi andivi, tumaa cucayú yutya nahnu, tan tumaa caahán savi tsa ñihi xaan, o tumaa cuvī nu javacú ra naha guitarra cuaha.

3 Tan tsitá ra naha iin yaa tsaa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihi ra tsahnu naha ra. Tan yoñi maa cuvī cutuhva yaa can, maa ñi maa tsa cientu uvi xico cumi mil rayi tsa cacu nu ñuhu ñayivi cuvī tsitá can.

4 Ra ihya naha ra cuvī ra tsa ña tsicā nuu tsihin ñaha, tyin ii ra naha. Tan nyicún ra naha tsi ra cuvī Mbee Ticatyī Luhlu tandihi ñi ityi cuahán ra. Cacu ra naha tan juvin ra naha jamañi tsi ra naha nuu Nyoo tan nuu ra cuvī Mbee Ticatyī Luhlu tsa jihna ñi.

⁵ Yoñi cuví catyi tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andívi. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyívi iyó nu ñuhu ñayívi; nyívi iyó tandihi ñi ñuu nahnu, tan ñuu nyihi, nyívi tandihi ñi tata, tan nyívi caahán siin siin yuhu.

⁷ Tan ñihi xaan cahan ra tan catyí ra:

—Nayuhvi ndo tsi Nyoo, tan jacahnu ndo tsi ra. Tyin tsa tahañ tsi cuhva tsa cua cutuñi nyívi. Jacahnu ndo tsi ra javaha andívi tan ñuhu ñayívi, tan ndutya ñuhu tan ndohyo —catyí ángel can.

⁸ Tan catyí inga ángel tsa vatsí nyicún tsi ra:

—Tsa nduva ñuu Babilonia tsa cuví ñuu cahnu, tsa taní tsi. Tyin nyívi iyó ñuu can jacuahá ñi tsa caquiñi tsa javahá ñi tsi inga nyívi iyó nu ñuhu ñayívi. Tumaa tsa tsiñi ñi tsihin vinu ña vaha, jaha ñi Babilonia cuví can —catyí ángel can.

⁹ Tacan tan vatsí tsa tsinu uñi ángel, tan ñihi cahan ra tan catyí ra:

—Tatun ndáa nyívi jacahnu tsi quití caquiñi can tan tsi-toho ti, o cuhva ñi tsa cunyaa tuñi ti nutyaan ñi o ndaha ñi,

¹⁰ cua nyehe xaan ñi tundoho tyin cua tyihi Nyoo tsi ñi

nu ñuhu, tan nu azufre. Tumaa tsa cua jacoho ra vinu xaan tsi ñi nuu ángel tan nuu ra cuví Mbee Ticatyí Luhlu cuví can.

¹¹ Tan ña cua cundihi maa tsa quita yuhma nu nyehé ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jacahnú tsi quití caquiñi can tan tsi tsi-toho ti, tan tsaha ñi tsi ñi cun-yaa tuñi sivi ti.

¹² Yacan cuenda nyívi yihí cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñí tsi tsa cunyeet iñi ñi —catyí ángel tsa tsinu uñi can.

¹³ Tacan tan tsiñi yu iin ndusu tsa quee nda andívi, tan catyí tsi tsihin yu:

—Tyaa tuhun ihya: “Vityin tan ityi nuu, si xaan cua cuví tsi nyívi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, si xaan cua cuví tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyívi

¹⁴ Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayívi. Yihí corona xuhun cuaan jiñi ra. Tan ndahá ra iin mityi yacua tan xaan.

¹⁵ Tan quita inga ángel tsitsi vehe ñuhu tan ñihi xaan cana tsaa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un

tsa iyó nu ñuhu ñayivi. Tyin tsa tsaá cuhva, tan tsa iyó nu ñuhu ñayivi tsa tsityí tsi —catyí ra.

¹⁶ Tacan tan ra tsa nyaá nu vico can jayahá ra mityí ra nu ñuhu ñayivi, tan naquihin ra tsa iyó nuu tsi.

¹⁷ Tacan tan quitá inga ángel tsitsi vehe ñuhu tsa iyó andivi. Tan juvin ñi ndahá tucu ra iin mityi yacua tsa xaan.

¹⁸ Tan quitá inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan caná tsa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yucu vixi tsa nañi uvas tsa iyó nu ñuhu ñayivi, tyin tsa tsityí tsi —catyí ra.

¹⁹ Tan jayahá ángel can mityi ra nu ñuhu ñayivi tan tsahnyá ra uvas can. Tan tyihí ra itsi iin nu tyihí ra tyin cua cuhñi ra itsi tan quita ndutyá tsi. Tan yacan cuñi tsi catyí tsa cua tatsi tuñi Nyoo tsi nyivi.

²⁰ Tan nacuhñi ra uvas can ityi tsata ñuu, tan cuñi tsi catyí tyin cuaha xaan nyivi tsihí, tan nu cuví can, cuaha xaan cuaha xaan niñi ñi tsatí. Tan tsaá tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

15

Nu quitá ndihi utsa taahan ña tundoho tsa cua nyehe nyivi

¹ Nyehe yu inga tsa iyo cahnu andivi tan nayuhvi xaan yu, nyehe yu utsa ángel tsa vatsí ndacá utsa taahan ña tundoho. Tsihin tundoho ihya cua cundihi tsa xaan cuñi Nyoo nyehé ra tsi nyivi tsa ña tyaá yahvi tuhun caahán ra.

² Tan nyehe tucu yu iin tsa caá tumaa caá ndutyá ñuhu tsa tsinú tsihin yutyi. Tan tumaa tsa nasacá ñuhu tsihin tsi. Tan nyivi tsa cunyeé jaha canaa tsi quitá caquiñi can tan tsi tsitoho ti, tan ña tsinyaa número sivi ti tsi ñi, tandihi ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsahá Nyoo tsi ñi.

³ Tan tsitá ñi yaa ra Moisés, ra jaha tyiñu tyiñu Nyoo, tan yaa ra cuví Mbee Ticatyi Luhlu. Tan catyí yaa can tyehen:

Cahnu tan iyo xaan caá tandihi maa tsa javahá un,

Nyoo, Jutu ndi, iyó tandihi tunyee iñi tsi un.

Ndoo xaan tan nditsa xaan ityi un,

Yooho Rey cuenda tandihi nyivi iyó nu ñuhu ñayivi.

⁴ ¿Yóo ña cua nayuhvi tsi un, yooho Jutu Mañi ndi?

¿Yóo ña cua jacahnu tsi un?

Tan intuhun ñi maa un cuví ra ñi.

Tan cua quitsi nyivi quee tandihi maa ñuu, tan cua jacahnu ñi tsi un, tyin nyehe ñi tsa vaha tsa javahá un, catyí yaa tsitá ñi.

⁵ Tacan tan nyehe yu nuña yuvehe ñuhu tsa nyaá nda andivi nu yucú vaha nduvi tabla tsa nyaá ley Nyoo nuu.

⁶ Tan quita utsa ángel tsa vatsi ndacá tsa utsa tundoho can tsitsi vehe ñuhu can. Nditsi ra naha jahma vaha, cuitsin tan xiñu. Tan yihí cinturón xuhun cuaan yiqui nyica tsa intuhun intuhun ra naha.

⁷ Tacan tan iin tsa nyito can, tsaha can intuhun intuhun coho xuhun cuaan tsi tsa intuhun intuhun tsa utsa ángel can. Tan tsitu maa can tsihin tsa xaan Nyoo tsa cua tatsi tuñi ra tsi nyivi. Ra ican ña cua cundihi maa tsa iyó ra.

⁸ Tan tsitu maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yoñi maa cuví quihvi tsitsi vehe ñuhu can tsitsi tsa ndi cumañi ndihi tsa utsa tundoho tsa vatsi ndacá tsa utsa ángel can.

16

Coho tsa yihí tundoho tsa cua jaquitsi tsa utsa ángel

¹ Tacan tan tsiñi yu iin ndusu ñihi xaan tsa quita tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cuacoyo ndo tsa yihí tsitsi coho ndahá ndo juvin siqui nyivi iyó nu ñuhu ñayivi, tyin Nyoo cua tatsi tuñi ra tsi ñi —catyí ndusu can.

² Tacan tan tsahan iin ángel can tsicoyo ra tsa yihí tsitsi coho ra siqui nyivi tsa nyaá

tuñi quití caquiñi can tan jacahnú ñi tsitoho ti. Tan quita nu caahvi xaan tan uhvi xaan tsi ñi.

³ Tacan tan coyó tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduvi tsi niñi tumaa niñi ndiyi, tan tandihi tsa nyito tsa iyó tsitsi ndutya ñuhu can tsihi tsi.

⁴ Tacan tan coyó tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduvi tsi niñi.

⁵ Tacan tan tsiñi yu tsa caahán ángel cuenda ndutya tan catyí ra:

—Jutu Mañi yu, yooho vaha xaan un tyin tatsi tuñi un tsi nyivi tyehen. Jutu Mañi yu, Nyoo ii cuví un tyin nda nu quitsaha tandihi tan nda cuenda vityin tacan ñi iyó maa un.

⁶ Tatsi tuñi un tsi ñi tyin maa ñi tsati ñi niñi nyivi yihí cuenda un tan niñi ra cuví ndusu yuhu un. Tan vityin yooho tumaa tsa jacohó un niñi tsi ñi tyin tacan taahán maa tsi tsi ñi —catyí ángel can.

⁷ Tan tsiñi tucu yu nacahan inga ndusu ityi nu nyaá altar Nyoo tan catyí tsi tyehen:

—Nditsa, Nyoo, Jutu Mañi yu, ra iyó tandihi tunyee iñi tsi, vityin tsa tatsi tuñi un tsi nyivi tsihin tsa nditsa tan tsihin tsandaa —catyí ndusu can.

⁸ Tan coyó tsa tsinu cumi ángel can tsa yihí tsitsi coho ra nu ñicanyii. Tacan tan tsi-coo ndatu tsi ñicanyii can tsa

cahmi tsi tsi nyivi tsihin ñuhu tsi.

⁹ Tan tandihí nyivi ndasi xaan cayu ñi jahá ñicanyii can. Maa tyin vasu ndi maa tacan tahañ ñi, ña nasamañ ñi cuhva tsicoo ñi, tan ndi ña jacahnu ñi tsi Nyoo. Tan cahañ ñi ndavaha ñi siqui Nyoo, ra tsa jaquitsi tundoño can siqui ñi.

¹⁰ Tan coyó tsa tsinu uhun ángel can tsa yihí tsitsi coho ra siqui tyayu quití caquiñi can. Tan ndunaá nu ndacá ñaha ti. Tan nyivi cuenda ti, nda cuanda tsatsi yihí ñi yaa ñi tsa cuenda tsa nyehé xaan ñi tsa uhvi.

¹¹ Maa tyin vasu ndi maa tacan cuvi, ña jandihí ñi tsa javahá ñi tsa ña vaha. Tan cahañ ñi ndavaha ñi siqui Nyoo, ra nyaá andivi, tsa cuenda tsa uhvi nu caahvi ñi.

¹² Tan coyó tsa tsinu iñu ángel can tsa yihí tsitsi coho ra nu yutya Eufrates cahnu. Tan ndoco ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra.

¹³ Tacan tan nyehe yu quitá tatyí ña vaha tsa caá tumaa caá sahva yuhu tsa intuhun intuhun quití. Iin can quitá yuhu quití caquiñi, inga can quitá yuhu coo xaan tsa iyó ndaha inga can quitá yuhu tsa cuví ndusu yuhu vatya.

¹⁴ Tatyí ña vaha can cuví tatyí nu ña vaha, tan nahnu tsa nyityi javahá nahnu. Quitá nahnu, jandu iin nahnu tandihí rey tsa iyó nu ñuhu ñayivi, tyin cañi tahan ra naha quivi tsa quivi janaha

Nyoo tyin iyó tandihí tunyee iñi tsi ra.

¹⁵ Tan catyí ra Cristo:

—Nyehe ndo tyin tsa vatsi yu tumaa vatsí iin ñasuhu tyin iin ñasuhu sana iñi ndo tan quihví ra tsitsi vehe ndo tacan yuhu. Sii xaan cua cuvi tsi nyivi ndatú quivi quitsi yu tan tsa iyó vaha jahma ñi tyin quivi cua tsa yu ña cua nducahan nuu ñi tyin ña tandiñi ñi —catyí ra Cristo.

¹⁶ Tan cua ndu iin ra cuví rey naha ra nu nañi Armagedón tsihin yuhu hebreo.

¹⁷ Tan coyó tsa tsinu utsa ángel can tsa yihí tsitsi coho ra nu tatyí, tacan tan quitá iin ndusu nu nyaá tyayu Nyoo tsitsi vehe ñuhu tsa nyaá nda andivi. Caná tsa tsi tan catyí tsi:

—Tsa iyó vaha vityin.

¹⁸ Tacan tan vaa ña maa cuví tan caahán savi tan cañi tatsa. Tan ñihi xaan tañ nu ñuhu ñayivi. Tan ña tuhvá maa taán tacan tsa ndi quit-sahá iyó nyivi nu ñuhu ñayivi.

¹⁹ Tan uñi nu ndatá ñuu cahnu Babilonia can, jahá tsa tañ. Tan tandihí ca ñuu tsa cayucu nu ñuhu ñayivi taní tsi. Nyoo ña naá maa iñi ra tsa javahá nyivi Babilonia. Yacan cuenda janyehe xaan ra tundoño tsi ñi.

²⁰ Tandihí maa ñuhu tsa iyó tsitsi ndutya ñuhu tan tandihí yucu, tandihí maa tsi tsinaá.

²¹ Tan cucoyo cuaha yuu savi nahnu xaan tsa quee andivi siqui nyivi. Vee xaan tsi. Tumaa vee uvi xico kilu, tacan vee tsa intuhun

intuhun yuu savi can. Tan nyivi cahān ñi ndavaha ñi siqui Nyoo tsa cuenda tundoho yuu savi can, tyin cuví tsi iin tundoho cahnu xaan tsa cuenda ñi.

17

Nu cua tatsi tuñi Nyoo tsi ñuu ña vaha

¹ Tacan tan quita iin ángel tsitsi tsa utsa ra tsa ndahá coho can naha ra, natuhva ra nu nyaá yu, tan catyí ra tsihin yu:

—Ñaha tyin janaha yu tsi un nácaa cua cutuñi ñaha ña vaha tsa tsicá nuu tsihin rayi, ña tsa nyaá nu ndutya cuaha.

² Tyin ra cuví rey nu ñuhu ñayivi tsicoo ra naha tsihin ña, tan tsa cuenda ña tiví tandihi nyivi iyó nu ñuhu ñayivi —catyí ra tsihin yu.

³ Tacan tan nyehe yu iin tsa janaha Tatyí Ii Nyoo tsi yu, tan tsindaca ángel can tsi yu nu tsiqui nu nduve maa nyivi iyó, tan juven ñi ican nyehe yu iin ñaha yosó iin quití cuaaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiqui ti.

⁴ Tan ñaha can nditsí ña jahma tijinda tan cuaaha. Tan cuaaha xaan xuhun cuan iñi tsi ña, tan yuu vaha, tan perla. Tan ndahá ña iin taza xuhun cuan tsitú tsihin tsa ña vaha tan tsa caquiñi tsa javahá ña.

⁵ Tan nyaá iin sivi tsa cuví iin tuhun xeehe tsa ña cutuñi iñi nyivi nutyaan ña. Tan catyí can tyehen: “Ñaha ihya cuví ñuu Babilonia

cahnu, sihi tandihi ñiñaha tsa tsicá nuu tsihin rayi tan sihi tandihi tsa ña vaha tsa iyó nu ñuhu ñayivi.”

⁶ Tacan tan nyehe yu tyin tsiñi ñaha can jahā tsa tsihi ña niñi nyivi yihí cuenda Nyoo, ñi tsa tsihi tsa cuenda tsa cahān ñi tuhun ra Jesús. Tsa nyehe yu tsi ña, iyo xaan cuñi yu.

⁷ Tacan tan catyí ángel can tsihin yu:

—¿Nacuenda iyo xaan cuñi un? Cua jacoto yu tsi un náa cuñi tsi catyí tuhun xeehe ñaha ihya tan quití caquiñi tsa yosó ña, quití tsa iyó utsa jiñi tan utsi ndiqui.

⁸ Quití caquiñi tsa nyehe un can, juven ti cuví quití tsa tsicoo tan vityin nduve ca ti iyó. Maa tyin cua quita ti tsitsi yavi cunu tsa nduve nu tsindihi. Ican nyií ti tsa ndi cumañi ca cahun ti nu cua cundihí cuii ti. Nyivi iyó nu ñuhu ñayivi, ñi tsa nduve sivi nyaá nu libru Nyoo nda quivi tsinu ñuhu ñayivi, iyo xaan cua cuñi ñi nyehe ñi tsi quití can. Libru can catyí yóo nyivi cua coo cuii.

⁹ Tuhun ihya cuñi tsi tsa cutuñi iñi yo itsi: Tsa utsa jiñi quití can cuñi tsi catyí tsa utsa yucu tsa nyaá ñaha can nuu.

¹⁰ Tan juven ñi cuñi tucu tsi catyí can utsa rey. Uhun ra naha tsa yahā tsindaca ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quitsi ra, ña naha cua cundaca ñaha ra.

11 Tan quit̄i caquiñi tsa tsi-coo tan vityin nduve ca ti iyó, juvin ti cuv̄i iin rey tsitsi tsa utsa taahan rey can, tan cua cuvi tucu ti rey tsa tsinu una. Tsa yaha cundaca ñaha nyico ti, tacan tan cua kuhun ti nu cua cundihi cuii ti.

12 Tan tsa utsi ndiqui tsa nyehe un can, cuñi tsi catyi utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quit̄i caquiñi can.

13 Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quit̄i caquiñi can. Tan tandihi ndatu tsa iyó tsi ra naha cua nacuhva ra naha tsi ti.

14 Tan cua cañi tahan ra naha tsihin ra Mbee Ticatyí Luhlu. Maa tyin ra Mbee can, cua jaha canaa ra tsi ra naha. Tyin juvin ra yihí ndaha tsi tandihi ra ndacá ñaha. Tan yihí ndaha tucu ra tsi tandihi ra cuv̄i rey naha ra. Tan nyivi yihí cuenda ra, maa Nyoo cana tsi ñi tan nacatsi ra tsi ñi. Tan nii xaan cuñi ñi nyicún ñi tsi ra.

15 Tan catyí tucu ángel can tsihin yu:

—Ndutya cuaha tsa nyehe un can, nu nyaá ñaha tsicá nuu can, yacan cuv̄i nyivi iyó tandihi ñuu nyihi tan ñuu nahnu, ñi caahán siin siin yuhu.

16 Rey tsa cuv̄i tsa utsi ndiqui quit̄i caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacoo

ihñi ra naha tsi ña. Tan cua jatandi ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña.

17 Tyin Nyoo tsaḥa ra tsa caca iñi rey can naha ra tyin javaha ra naha kuhva cuñi maa Nyoo. Tyin iin ñi kuhva cua caca iñi ra naha, tan cua kuhva ra naha ndatu tsi quit̄i caquiñi can tsa cundaca ñaha ti tumaa rey nda cuanda cundaa tuhun caahán maa Nyoo.

18 Ñaha tsa nyehe un can, juvin ña cuv̄i ñuu cahnu tsa ndacá ñaha tsi tandihi ra cuv̄i rey nu ñuhu ñayivi.

18

Nu naá ñuu Babilonia

1 Tsa yaha yacan tan nyehe yu quee inga ángel ityi andivi tan iyó xaan tunyee iñi tsi ra. Tan ndunditsin ñuhu ñayivi jaha tsa nditsin ra.

2 Tan cana tsa ra tsihin tsa ñihi ndusu ra, tan catyí ra:

—Tsa tsindihi nuu ñuu Babilonia cahnu. Nanduvi tsi nu iyó tatyí ña vaha, vehe tandihi nuu tatyí ña vaha, tan taça saa ña vaha tsa ña taahán iñi nyivi.

3 Tyin tandihi nyivi tiv̄i ñi tsa cuenda cuatyí javahá ñuu Babilonia can. Ra cuv̄i rey nu ñuhu ñayivi naha ra tumaa tsa tsicoo ra naha tsihin ñaha tsa cuv̄i ñuu Babilonia can. Javaha ra naha cuatyí tsihin ña. Tan nyivi ñuhu ñayivi nducuca ñi tsihin tsa cuaha xaan tsa yahvi tsa jata nyivi ñuu can.

4 Tacan tan tsiñi yu ndusu Nyoo ityi andivi, tan catyí tsi:

—Quita ndo ñuu ihya, nyooho tsa cuví nyívi yu, ña cudahan ndo tsihin nyívi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehé maa ñi.

⁵ Tyin tsa canyíi tucuíti cuatyí nyívi iyó ñuu can, nda cuanda tsaá can nu nyaá yu. Tan ñuhú iñi yu tsa ña vaha javahá ñi.

⁶ Cuhva ndo juvin ñi maa tsa tsahá ñi tsi inga nyívi tsi ñi; cuhva ndo uvi ca tsaha síqui tsa javahá ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsahá maa ñi tsi inga nyívi.

⁷ Yacan cuenda cuhva ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jacahnú xaan ñi tsi ñi tan cusíi xaan iñi ñi juvin cuhva can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho”, cuñí ñi, tsicá iñi ñi.

⁸ Yacan cuenda iin quívi ñi cua quítsi tundoho síqui ñuu can, cua quítsi tuhun tsihí, tucuiihya iñi, tama, tan cua cayu tsi tsihin ñuhú. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyívi ñuu can —catyí Nyoo.

⁹ Ra cuví rey nu ñuhu ñayívi ihya tumaa tsa tsicoo ra naha tsihin ñaha tsa cuví ñuu can, cua vacu xaan ra naha, tan cuiihya cua cuñi ra naha na

nyehe ra naha yuhma tsa cayu ñuu can.

¹⁰ Tan tsa cuenda tsa yuhví ra naha tundoho can, nda sava ñi cua cunyecu ra naha. Tan cua catyí ra naha:

—¡Ndahvi yooho, ñuu cahnu Babilonia, ñuu tsa tsicoo cuaha tunyee iñi tsi! Tyin iin yaha ñi tsaá tundoho nyehé un —cua catyí ra naha.

¹¹ Tan ra tsa xicó ndaha tyiñu naha ra, juvin ñi cua vacu xaan ra naha tan cuiihya cua cuñi ra naha tsa cuenda ñuu can. Tyin yoñi ca cua jata tsa xico ra naha.

¹² Tyin xicó ra naha xuhun cuaan, xuhun cuitsin, yuu síi caá, perla, jahma linu, jahma seda, tan jahma tijinda cuaaha. Tan xicó tucu ra naha tandihí nuu vitu tami tan náa ndihí tsa tsinú tsihin yíqui nuu landa, tan vitu síi caá, tan caa tsa cuví bronce, tan caa tsa cuví hierro, tan yuu tsa cuví mármol.

¹³ Tan xicó tucu ra naha canela, náa ndihí ca yucu tsa quihví tsihin tsa tsatsí yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, acetye, yutyí paan vaha, tan trigo. Tan juvin ñi xicó tucu ra naha quíti cuenda carga, tan mbee, cuayu, carreta, tan nda cuanda nyívi tsa cuví musu tan xicó ra naha.

¹⁴ Tan catyí ra naha tsihin nyívi ñuu can tyehen:

—Nduve ca tsa síi caá tsa tsicoo tsi un, tsa taahán xaan iñi un. Tan tsa tsindihí tandihí tsa cuca un. Tan ña

cua ñihi ca maa un tandihi yacan —catyí ra naha.

15 Ra tsa xicó tandihi can, nducucā ra naha tsa cuenda tsa jata nyivi ñuu Babilonia can tsa xicó ra naha. Nda sava cua cunyecuru ra naha tsa cuenda tsa yuuhví ra naha tsa cua nyehe nyivi can tundoho. Tan cua vacu xaan ra naha tan cuihya cua cuñi ra naha.

16 Tan cua catyi ra naha:

—¡Ndahvi ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu si caá tan perla.

17 ¡Tan iin yaha ñi ndihi tsa cuca xaan can! —cua catyi ra xicó can naha ra.

Tan tandihi ra cuví capitán tsa jacacá yutun ndoo nu ndutya, tsihin nyivi yucú tsitsi can tan tandihi ra jahá tyiñu nu ndutya ñuhu naha ra, nda sava cua ndoo ñi.

18 Tan tsa cua nyehe ñi yuhma tsa cayú ñuu can, cua cana tsa ñi, tan cua catyi ñi:

—¿Náa inga ñuu tsicoo tumaa ñuu cahnu ihya? Nduve —cua catyi ñi.

19 Tan cua coso ñi nyaca jiñi ñi, tan cua vacu xaan ñi. Tan cuihya cua cuñi ñi, cua cana tsa ñi, tan cua catyi ñi:

—¡Ndahvi ñuu cahnu can! Tyin tsihin tsa cuca tsi tan nducucā tandihi yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naa tsi! —cua catyi ñi.

20 Maa tyin nyooho cusii iñi ndo nyehe ndo tsa taahán ñuu can, nyooho tsa iyó

andivi, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihi ca nyooho tsa yihí cuenda Nyoo. Cusi iñi ndo tyin tsa cuenda tsa javaha ñi tsa ña vaha tsihin ndo tan tatsí tuñi Nyoo tsi ñi.

21 Tacan tan iin ángel tsa iyó xaan tunyee iñi tsi, cañihi ra iin yuu tsa caá tumaa caá iin yoso cahnu xaan, tan jacuhun ra can tsitsi ndutya ñuhu, tan catyi ra:

—Tyehen cua cundihí nuu ñuu Babilonia cahnu. Tan ndi iin tsaha ca tan ña cua nyehe ca ndo itsi.

22 Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihí ca tyiñu. Tan ndi ña cua cucayu ca molino.

23 Tan ndi ñuhu tyuma, tan ña cua cayu ca tsitsi ñuu can. Ndi ña cua cuñi ca yo ndusu nyivi nu iyó vico tindaha. Tacan cua cuvi vasu ndi maa ra xico tsa tsicoo ñuu can naha ra, cahnu xaan tunyee iñi tsicoo tsi ra naha, tan jandaví ñaha xaan nyivi iyó ñuu can tsi tandihí nyivi iyó nu ñuhu ñayivi tsihin tuhun tasi.

24 Tyin cuaha xaan niñi ra cuví ndusu yuhu Nyoo canyií tsitsi ñuu can tyin tsahñi ñi tsi ra naha. Tan canyií tucu niñi inga ca nyivi yihí cuenda Nyoo, tan niñi tandihí nyivi tsa tsahñi nyivi naní cahnu nu ñuhu ñayivi.

19

1 Tsa yaha yacan, tan tsiñi yu ndusu nyivi cuaha ityi andivi. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

2 Tyin tsihin tsa vaha tan tsandaa tan tsa nditsa jacutuñi ra.

Tatsi tuñi ra tsi ñaha tsicá nuu tsa cuví ñuu Babilonia tsa jativí xaan tsi nyivi iyó nu ñuhu ñayivi tsihin tsa caquiñi tsa javaha ña tsihin ñi.

Tan tatsi tuñi ra tsi ña tsa cuenda tsa tsahñi ña tsi nyivi jahá tyiñu tyiñu ra.

3 Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihí maa tsa ndaa tsi ityi siqui —catyí ñi.

4 Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na cuví tsi tacan! —catyí ra naha.

5 Tan nu nyaá tyayu Nyoo, nacañan iin ndusu, tan catyí tsi:

¡Jacahnu ndo tsi Nyoo Jutu yo tandihí nyooho tsa jahá tyiñu tyiñu ra,

tan tyaá yahvi ndo tsi ra, nyooho nyivi nyihi tan nyivi tsahnu.

Nu iyó vico tindaha ra Mbee Ticatyí Luhlu tan nyivi tsinú iñi tsi ra

6 Tan tsiñi tucu yu ndusu tumaa cuví nu cuaha xaan nyivi yucú, o tumaa ndusu nu cuaha xaan yutya o tsa ñihi xaan caahán savi. Tan catyí tsi:

¡Cahnu xaan cuví Nyoo Jutu yo, ra iyó tandihí tunyee iñi tsi! Tyin tsa quitsaha ndacá ñaha ra.

7 Na cusii iñi yo tan na cutu yo tsihin tsa sii. Na jacahnu yo tsi ra,

Tyin tsa tsaá cuhva tsa coo yo vico tindaha ra Mbee Ticatyí Luhlu.

Tan yoo cua cuví yo tumaa ñasihí ra, tan ndatú yo quivi tindaha yo tsihin ra.

8 Tyin tsa ñihí ndatu yo tsa cunditsi yo jahma cuitsin tsa ña nyahyu ca tsa cuví jahma linu.

Tyin jahma linu can cuñi tsi catyí tsa vaha tsa javahá nyivi yihí cuenda ra.

9 Tacan tan quitsaha catyí ángel can tsihin yu:

—Tyaá tyehen nu tutu: “¡Sii xaan cuví tsi nyivi tsa cua cahun nu tindaha ra Mbee Ticatyí Luhlu!”

Tan catyí tucu ra tyehen:

—Tuhun ihya cuví tuhun nditsa Nyoo —catyí ra tsihin yu.

10 Tacan tan tsicuiñi tsiti yu nuu ángel Nyoo can tsa cua jacahnu yu tsi ra. Maa tyin catyí ra tsihin yu:

—Ña jacahnu un tsi yuhu, tyin yuhu musu Nyoo ñi cuví

tucu yu tumaa yooho, tan tumaa tandihi ra yañi un tsa tsinú iñi tuhun nditsa tsa cahan ra Jesucristo. Tsi Nyoo taahán tsi jacahnu yo —catyí ra tsihin yu.

Tyin tsa cahan ra Jesús, yacan cuví tsa jandu iin iñi tsi ra cuví ndusu yuhu ra, ra tsahá cuenda tuhun caahán Nyoo tsihin yo.

Nu nyehe ra Juan tsi ra tsa yosó cuayu cuitsin

11 Tacan tan nyehe yu ticohó andivi. Tacan tan quituvj iin cuayu cuitsin. Tan ra yosó tsi ti nañi ra Ra Nditsa Tsa Nñi Iñi Jahá Tyiñu Tyiñu Nyoo. Tyin tsihin tsa ndaa jacutuñi ra tsi nyivi, tan ndaa javahá ra tsa cañi tahan ra.

12 Tan tumaa caá nu cayú ñuhu, tacan caá tinuu ra. Tan cuaha xaan corona yihí jiñi ra. Tan intuhun ñi maa ra tsitó iin sivi tsa nyaá tsi ra.

13 Tan nditsí ra jahma cahyí tsihin niñi. Tan nañi ra Tuhun Nyoo.

14 Tan nyicún andaru andivi tsi ra, nditsí ra naha jahma vaha tsa cuví linu, cuitsin tsi tan ña nyahyu tsi. Tan yosó ra naha cuayu cuitsin.

15 Tan quitá iin mityi xaan yuhu ra, yacan cuví Tuhun Nyoo; tsihin yacan cua jañicueehe ra tsi nyivi iyó nu ñuhu ñayivi. Tan ñihi cua cundaca ñaha ra tsi ñi tsihin tatun tsa cuví caa. Cua tatsi tuñi ra tsi ñi tumaa javahá ra tavá ndutya yucu vixi tsa cuví uva tsihin tsaha ra. Tan cua jacoho ra vinu tsa tsinú

tsihin uva tsi ñi, tsehe cuñi tsi catyi tyin cuxaán Nyoo tsihin ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihi tunyee iñi tsi.

16 Nu jahma ra tan nu sihin ra can nyaá letra tsa catyí tye-hen: “Ra ihya cuví ityi nuu tsihin tandihi rey. Tan juvin ñi ra cuví ityi nuu tsihin tandihi ra ndacá ñaha naha ra.”

17 Tacan tan nyehe yu nyaá nyityi inga ángel nu ñicanyii. Tan ñihi xaan cana tsa ra tsi tandihi saa tsa ndavá ityi andivi, tan catyí ra tsihin ti naha ti:

—Nuu ndo tan ndu iin ndo tan cuxiñi ndo tsa tsahá Nyoo catsi ndo.

18 Cua catsi ndo cuñu ra cuví rey naha ra tan ra cuví ityi nuu tsihin andaru naha ra tsihin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandihi ra naha, ra iyó tsitoho tan ra nduve tsitoho, tahan ñi nyivi nyihi tan nyivi tsahnu —catyí ra tsihin saa can naha ti.

19 Tacan tan nyehe yu quití caquiñi can tsihin ra cuví rey tsa iyó nu ñuhu ñayivi tsihin andaru cuenda ra naha. Ndu iin ra naha tsa cua cañi tahan ra naha tsihin ra yosó cuayu cuitsin can tan andaru cuenda ra.

20 Tiin ra yosó cuayu cuitsin can tsi quití caquiñi can iin caa ñi tsihin ra cuví ndusu yuhu vatya can, tyin nuu quití caquiñi can javahá ra vatya can tsa nyityi, tan tsihin yacan jandavj ñaha

ra tsi nyivi tsa tsaha cunyaa tuñi quití caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhu tsa cayú tsihin azufre.

²¹ Tan tandihi ca ñi tsihi ñi tsihin mityi xaan tsa quitá yuhu ra yosó cuayu cuitsin can. Tan tandihi maa saa, tsatsi xaan ti naha ti cuñu ñi.

20

Nu nyehe ra Juan tsa cuenda tsa mil cuiya

¹ Tsa yaha can tan nyehe yu quee iin ángel ityi andivi, ndahá ra ndaha tucu yuvehe yavi cunu tsa nduve maa nu tsindihi. Tan ndahá tucu ra iin cadena cahnu.

² Tijn ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañi nu Satanás. Tsahñi ra tsi nu tsihin cadena iin mil cuiya.

³ Tan jacuhun ra tsi nu tsitsi yavi cunu xaan can. Nacasí ra yuhu yavi can, tan tyaá ra iin sellu yuhu can tyin tacan tan ña jandavi ñaha ca nu tsi nyivi iyó nu ñuhu ñayivi, nda yaha mil cuiya. Tsa yaha mil cuiya can, cua ndatsi nyico nu juhva ca quivi.

⁴ Yaha can tan nyehe yu nyecú cuaha tyayu. Tan nuu can nyecú nyivi tsa ñihí ndatu tyin tatsi tuñi ñi tsi nyivi. Tan nyehe tucu yu añima nyivi tsahnya nyivi jiñi tsa cuenda tsa cahán ñi tuhun Nyoo tsa tsaha cuenda ra Jesús tsi ñi. Nyivi ihya ña jacahnú ñi tsi

quití caquiñi can, ndi tsi tsi-toho ti, tan ndi ña tsaha ñi cunyaa tuñi ti nutyaan ñi, tan ndaha ñi. Nyehe yu nandoto ñi can tan tsindaca ñaha ñi tsihin ra Cristo tsitsi tsa mil cuiya can.

⁵ Ñi ihya cuví ñi tsa nandoto tsa jihna ñi. Maa tyin inga ndiyi ña nandoto ñi tyin cua nandoto ñi nda yaha mil cuiya can.

⁶ ¡Sií xaan cuví tsi ñi tsa nandoto jihna tyin nacatsi Nyoo tsi ñi! Tan ña cua cuhun ñi anyaya nu tatsi tuñi Nyoo añima ña vaha tsa cua cúu nyivi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundaca ñaha ñi tsihin ra Cristo mil cuiya.

⁷ Tsa yaha mil cuiya can, cua ndatsi Satanás nu nyii nu nuuhñi nu.

⁸ Cua quita nu, jandavi ñaha nu tsi nyivi Gog tan Magog, ñi xaan iñi tsi Nyoo tsa iyó nanií cahnu nu ñuhu ñayivi. Cua jandu iin nu tsi andaru ñi can tyin cuhun ra naha cutyi. Cuaha xaan ra naha, tumaa cuaha nyiti yuhu ndutya ñuhu.

⁹ Tacan tan nyehe yu quee ra naha nanií cahnu nu ñuhu ñayivi. Tan tyasi nduvi ra naha nu iyó nyivi yihí cuenda Nyoo ñuu Jerusalén tsa cuñi xaan Nyoo. Maa tyin Nyoo januu ra ñuhu tsa quee andivi tan tsahmi tsi tsi tandihi ra naha.

¹⁰ Tan nu ña vaha tsa jandavi ñaha tsi ñi, jacuhun Nyoo tsi nu anyaya nu

cayú ñuhŷ tsihin azufre, nu jacuhun ra tsi quitŷ caquiñi can tan ndusu yuhu vatya can. Ican cua nyehe nahnu tundoho tacan ñi maa, nduvi tan ñiñu.

Nu cutuñi nyivi ityi nu nyaá tyayu cuitsin nu nyaá Nyoo

¹¹ Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehé ra nu naa ñuhu ñayivi tan andivi. Tan ña ñihŷ tsi numaa cava tsi.

¹² Tan nyehe yu tandihŷ añima nyivi tsihŷ, tahan ñi nyivi tsahnu tan nyivi nyihi, nyecú nyityi ñi ityi nuu Nyoo. Tacan tan nuña libru tsa nyaá tandihŷ tsa javaha ñi quivi tsicoo ñi. Tan nuña tucu inga libru nu nyecú sivi nyivi tsa cua coo nyito tsihin Nyoo. Ndiyŷ can cua cutuñi ñi tsa cuenda náa ndihŷ ca tsa javaha ñi tsa nyaá nu libru can.

¹³ Tan ndutya ñuhu nacuhva cuenda tsi añima nyivi tsa tsihŷ tsa cumí tsi. Tan nu yucú añima nyivi tsihŷ tan Tuhun Tsihi, nacuhva cuenda nahnu añima nyivi tsa yihŷ ndaha nahnu. Tan tandihŷ ñi cua tahan ñi nácaa javaha maa ñi.

¹⁴ Tacan tan Tuhun Tsihi can tan nu yucú añima nyivi tsihŷ can cua jacuhun ndihŷ Nyoo nduvi taahan can anyaya cahnu nu cayú ñuhŷ. Tan tsehe cuvŷ tuhun tsihi tsa tsinu uvi.

¹⁵ Juvŷn ñi ican jacuhun ra tsi nyivi tsa nduve sivi nyaá nu libru nu nyecú sivi nyivi

cua coo nyito tsihin Nyoo tacan ñi maa.

21

Nu nyehé ra Juan andivi tsaa tan ñuhu ñayivi tsaa

¹ Yaha can tan nyehe yu iin andivi tsaa tan iin ñuhu ñayivi tsaa, tyin andivi tan ñuhu ñayivi tsa tsicoo jihna naa tsi. Tan tacan tucu ndutya ñuhu naa tsi.

² Yuhu ra Juan nyehe yu ñuu ii tsa cuvŷ Jerusalén tsaa tsa quee nda nu nyaá Nyoo andivi, nyehe yu nuu tsi. Tan sii xaan caá cucutu tsi tumaa cucutu iin ñaha cua tindaha.

³ Tan tsiñŷ yu iin ndusu ñihŷ tsa quitŷ nda andivi, tan catyŷ tsi:

—¡Nyehe jihna! Iyó Nyoo mahñu nyivi. Cua coo ra tsihin ñi. Maa ñi cua cuvŷ ñi nyivi ra. Tan cua cunyaa ra tsihin ñi, tan cua cuvŷ ra Nyoo cuenda ñi.

⁴ Juvŷn ñi maa ra cua nacuhva ndutya nuu ñi. Ña cua coo ca tuhun tsihi tan ndi tucuihŷya iñi. Ña cua vacu ca nyivi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandihŷ tsa tsicoo, tsa tsindhŷ tsi —catyŷ ndusu can.

⁵ Tacan tan ra nyaá nu tyayu cahnu can, catyŷ ra:

—Nyehe jihna. Jandutsaa yu tandihŷ maa tsa tsicoo.

Tan catyŷ tucu ra:

—Tyaa tuhun caahan yu ihŷa, tyin tuhun nditsa cuvŷ tsi. Cuita iñi tuhun ihŷa tyin cua cundaa tsi —catyŷ ra tsihin yu.

6 Tsa yahā cahān ra yacan tan catyí tucu ra:

—Tsa iyó vaha tandihi vi-tyin. Yuhu cuví ra jihna ñi, tan yuhu cuví ra cua coo nu cua ndihi quivi: tumaa letra A cuví tsi letra jihna ñi tan tumaa letra Z cuví tsi letra nu ndihi ña. Nyivi tsa na ityi iñi cua kuhva yu ndutya coho ñi; tuhun ihya cuñí tsi catyi: Ñi cuñí tyaa soho tuhun yu, cua kuhva yu ñayivi tsa ña cua naa maa coo ñi, tan nduve yahvi tsi cua coo.

7 Nyivi jahá canaa tsi nu ña vaha, cua ñihi ñi tandihi tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu.

8 Maa tyin nyivi yuuhví xaan, ñi ña tsinú iñi, ñi quiñi iyó, ñi tsahñi, ñiñaha tsicá nuu tsihin rayi, tan rayi tsicá nuu tsihin ñaha, ñi tasi, ñi jacahnú tsitoho, ñi vatya; tandihi maa nyivi ihya taahán tsi cahun ñi anyaya cahnu nu cayú ñuhū tsihin azufre, nu cuví tsa tsinu uvi tuhun tsihí, nu tatsí tuñi Nyoo añima ña vaha.

Nu nyehé ra Juan nácaa cua cuví ñuu Jerusalén tsa

9 Tacan tan tsitsi tsa utsa ángel tsa ndahá coho tsitú tsihin tundoho, quitā iin ra tan natuhvā ra nu nyaá yu tan catyí ra:

—Cohon tsihin yu tan janaha yu nyivi yihí cuenda ra Cristo tsi un, ñi tsa cuví tumaa ñasihi ra Mbee Ticatyi Luhlu —catyí ra tsihin yu.

10 Tan janahā Tatyí li Nyoo tsi yu tyin tsindacā ángel can tsi yu iin yucu sucun tan cahnu. Tan janahā ra ñuu ii, ñuu Jerusalén cahnu can tsi yu. Juvín ñi kuhva tsa vatsí nuu tsi tsa quee tsi andivi nu nyaá Nyoo.

11 Xiñu xaan ñuu can tsihin tsa sií caá Nyoo. Xiñu xaan tumaa iin yuu vaha tan sií caá, tumaa yuu jaspe, tumaa nyehé yo tsa nyaá inga tsiyo tsihin yutyi, tacan caá tsi.

12 Nñi canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsi tsaahnu yo naha ra.

13 Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii.

14 Utsi uvi yuu yihí nu cacu tsaha tsi. Tan nuu yuu can nyecú sivi tsa utsi uvi ra tsa tavā tyiñu ra Mbee Ticatyi Luhlu.

15 Tan ángel tsa cahān tsihin yu, ndahá ra iin metru tsa tsinū tsihin xuhun cuaan, tsihin yacan tyihí kuhva ra ñuu can, tan yuhu cora can tan nanñi canduvi cora ñuu can.

16 Iyó cumi taahan tutun ñuu can. Tan inducu ñi tsa quihin tan tsa cañi tsi. Tan tyihí kuhva ángel can ñuu can tsihin metru xuhun cuaan can. Tan quitā uvi mil uvi cientu kilómetro. Iin ñi kuhva tsa cañi tan tsa sucun tan tsa quihin.

17 Tacan tan tyihí cuhva ra cora ñuu can. Tan quitá uñi xico cumi metru tsa quiihin, tyihí cuhva ra tumaa tyihí cuhva nyivi.

18 Tsihin yuu jaspe sama cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyi tun ndoó vaha tsi.

19 Tan tsaha cora can sama tsi tsihin tandihí ñi nuu yuu sii caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda;

20 tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu ñin cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndihí ña cuví amatista.

21 Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tsihin tsi, tacan caá tsi.

22 Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihí tunyee iñi tsi, tan ra Mbee Ticatyi Luhlu cuví vehe ñuhu ñuu can.

23 Ña tsiñí ñuhu tsa jandunditsín ñicanyii ñuu can tan ndi tsa jandunditsín yoo. Tyin juvin ñi maa tsa nditsin Nyoo tan tsa nditsin ra Mbee

Ticatyi Luhlu jandunditsín tsitsi ñuu can.

24 Tandihí nyivi tsa cacu añima, cua caca nuu ñi nu nditsin can. Tan ra cuví rey nu ñuhu ñayivi naha ra cua cundaca ra naha tsa cuca ra naha tan tandihí tsa cahnu cuví ra naha ñuu can.

25 Ña cua cundasi yuhu cora tsa tsinu cahñi, tan ña cua coo tsacuaa ñuu can.

26 Tan tandihí tsa cuca, tan tsa cahnu, tsa iyó nu ñuhu ñayivi cua tsa tsi ñuu can.

27 Maa tyin ña cua cuví quihvi tsa caquiñi, ndi intuhun nyivi javahá tsa caquiñi, tan ndi ñi vatya. Intuhun ñi maa nyivi iyó sivi nu libru ra Mbee Ticatyi Luhlu cua cuví quihvi, tan cua coo nyito tsihin ra tacan ñi maa.

22

1 Tacan tan janaha ángel can iin yutya cuii xaan tsi yu. Nduya tsa tsahá tsa coo nyito yo cuví. Cuii xaan tsi tumaa cuii iin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyi Luhlu.

2 Mahñu tsitsi ityi cahnu ñuu can tan nduvi tsiyo xiin yutya can, nyecú yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyivi iyó nu ñuhu ñayivi.

3 Nduve maa tsa ña vaha cua coo ñuu can tyin ican nyaá tyayu Nyoo nu nyaá ra

tan cua cundaca ñaha ra tsihin ra Mbee Ticatyi Luhlu. Tan cua jacahnu nyivi yihí cuenda ra tsi ra.

⁴ Tan cua nyehe tsihin nuu ñi tsi ra. Tan cua cunyaa sivi ra nutyaan ñi.

⁵ Ña cua coo ca tsacuaa ican. Tan nyivi tsa cua coo ican ña tsiñi ñuhu ñuhu candili tsi ñi, ndi ñuhu ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tsihin ra tacan ñi maa.

Nu janahá tsi tyin tsa cuyatyin quitsi ra Cristo

⁶ Tacan tan catyí ángel can tsihin yu:

—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahān tsihin ra cuví ndusu yuhu ra tahān tsanaha, juvin ra jacuhun ángel ra, tyin janaha ra tsi nyivi jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

⁷ —¡Tsa cuyatyin quitsi yu! —catyí ra.

¡Siñi xaan cuví tsi nyivi tsa javahá cuhva caahān tuhun Nyoo tsa nyaá nu libru ihya!

⁸ Yuhu ra Juan, tsiñi yu tan nyehe yu tandihi tuhun ihya. Tsa yahā nyehe yu tan tsiñi yu itsi, tsicuiñi tsiti yu tsaha ángel tsa janahā itsi tsi yu, tyin jacahnu yu tsi ra.

⁹ Maa tyin catyí ra tsihin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan

tandihí ca ra yañi un tsa cuví ndusu yuhu Nyoo, tan tumaa tandihí ca nyivi tyaá yahvi tuhun nyaá nu libru ihya. Intuhun ñi Nyoo taahān tsi jacahnu yo —catyí ra tsihin yu.

¹⁰ Tan catyí tucu ra tsihin yu:

—Ña tyihí xeehe un tuhun Nyoo tsa nyaá nu libru ihya, tyin tsa yatyin cuii cundaa tsi.

¹¹ Maa tyin jaña ndaha tsi nyivi caquiñi, na javaha maa ñi cuhva cuñi maa ñi. Tan nyivi iyó cuatyí, na coo ca cuatyí ñi. Maa tyin nyivi javahá tsa vaha, na jañihí ca ñi javaha ñi tsa vaha. Tan nyivi tsa jandu íí Nyoo, na cunyicun vaha ca ñi tsi ra —catyí ra tsihin yu.

¹² Tan Jutu Mañi yo catyí ra: —Nyehe ndo. Tsa cuyatyin quitsi yu. Tan tyahvi yu tsi intuhun intuhun nyivi tsa cuenda tsa javahá ñi, a javahá ñi tsa vaha o tsa ña vaha.

¹³ Yuhu cuví ra jihna ñi, tan yuhu cuví ra cua coo nu cua ndihí quivi, tsa iyó maa yu nda nu quitsahā tandihí tan tacan ñi maa cua coo yu nu cua ndihí tumaa letra A cuví tsi letra jihna ñi tan letra Z cuví tsi letra nu ndihí ña —catyí Jutu Mañi yo.

¹⁴ Siñi xaan cuví tsi nyivi tsa nacatyá jahma, [ñi janduvahá añima], tyin cua ñihí ñi ndatu catsi ñi tsiti yutun tsa tsahá tsa coo nyito añima yo. Tan cuví quihvi ñi yuhu cora ñuu can.

¹⁵ Maa tyin nyivi javahá tsa caquiñi, tumaa ñi tasi, rayiñi

tsa tsicá nuu tsihin ñaha tan ñiñaha tsa tsicá nuu tsihin rayii, tan ñi tsahñi, tan ñi jacahnú tsitoho, tan tandihí ñi vatya, tan ñi jandaví ñaha; tandihí maa ñi can, ña cua quihvi ñi tsitsi ñuu can.

¹⁶ Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihí tuhun ihya tsi nyivi tsicá vehe ñuhu. Yuhu cuví nyivi tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

¹⁷ Tatyí Ii Nyoo tan nyivi yihí cuenda ra, ñi tsa cuví tumaa ñasihi ra Mbee Ticatyi Luhlu, catyí ñi tyehen:

—Ñaha ñi, Jutu Mañi yu —catyí ñi.

Tan nyivi tsa tsiñi tuhun ihya, na catyí ndihí ñi:

—Ñaha.

Tan nyivi na ityi iñi tan tandihí nyivi cuñi quitsi, na quitsi ñi tan coho ñi ndutya tsa tsahá tsa coo nyito añima

yo, tan nduve náa cua tyahvi ñi.

¹⁸ Tan tandihí nyooho tsa tsiñi tuhun Nyoo tsa nyaá nu libru ihya, cuñi yu catyi yu tsehe tsihin ndo: Nyivi tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya siqui ñi.

¹⁹ Tan nyivi tsa cua quinyaa juhva tuhun Nyoo tsa nyaá nu libru ihya, Nyoo cua quinyaa ra tsa taahán tsi tsi ñi tsa nyaá nu libru tsa caahán yoo nyivi cua coo nyito, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun.

²⁰ Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuy-
atyin quitsi yu —catyí ra.

Tan yuhu catyí yu:

—Na cuvi tsi tacan. Ñaha ñi, Jutu Mañi yu, Jesús —catyí yu.

²¹ Na naquihin tandihí ndo tsa vaha tsa tsahá Jutu Mañi yo Jesucristo tsi yo.

Tan na cuvi tsi tacan ñi.